


Xtiidx Dios



New Testament in Zapotec, Santo Domingo Albarradas

(MX:zas:Zapotec, Santo Domingo Albarradas)

Xtiidx Dios

New Testament in Zapotec, Santo Domingo Albarradas

(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
fb4ebcb8-e1f4-5bfc-b08c-f590e137d86d

Contents

San Matew	1
San Marcw	54
San Lujc	88
San Juan	143
Ni been ree apóstoles	183
Gui'ch par ree bén Rom	233
Gui'ch yaløj par ree bén Corinto	255
Gui'ch barojp par ree bén Corinto	277
Gui'ch par ree bén Galacia	291
Gui'ch par ree bén Éfeso	298
Gui'ch par ree bén Filipos	305
Gui'ch par ree bén Colosas	310
1 Ts	315
2 Ts	319
Gui'ch yaløj par Timoteo	322
Gui'ch barojp par Timoteo	328
Gui'ch par Tito	332
Gui'ch par Filemón	335
Gui'ch par ree bén Hebreos	336
Gui'ch bacaa Santiaaw	352
Gui'ch yaløj bacaa San Pedr	357
Gui'ch barojp bacaa San Pedr	363
Gui'ch yaløj bacaa San Juan	367
Gui'ch barojp bacaa San Juan	373
Gui'ch bayon bacaa San Juan	374
Gui'ch bacaa San Judas	375
Ni balüü Jesucrist loj San Juan	377

Xtiidxza'c Jesucrist ni bacaa San Matew

Xdiaagual Jesucrist

(Lc. 3:23-38)

¹ Guie zëéd laj ree bën naj xdiaagual Jesucrist, bën zëéd ree loj xdiaa rey Davi në loj xdiaa Abraham.

² Abraham brii laj xdad Isaac, abi' Isaac gojc xdad Jacob, guiáad Jacob gojc xdad Judá con ree bijchaman. ³ Dxel Judá cwa'man Tamar, abi' guyu xi'n reeman brii laj reeman Fares con Zara. Fares gojc xdad Esrom, Esrom gojc xdad Aram. ⁴ Aram gojc xdad Aminadab, Aminadab gojc xdad Naasón, Naasón gojc xdad Salmón. ⁵ Salmón gojc xdad Booz, guiáad xniaa Booz brii laj Rahab. Booz cwa'man Rut, abi' xi'n reeman brii laj Obed. Obed gojc xdad Isai, ⁶ Isai gojc xdad rey Davi. Dxel rey Davi con bën goc lacheel Urías guyu xi'n reeman brii lajman Salomón.

⁷ Dxel Salomón gojc xdad Roboam, Roboam gojc xdad Abías, Abías gojc xdad Asa. ⁸ Asa gojc xdad Josafat, Josafat gojc xdad Joram, Joram gojc xdad Uzías. ⁹ Uzías gojc xdad Jotam, Jotam gojc xdad Acáz, Acáz gojc xdad Ezequías. ¹⁰ Ezequías gojc xdad Mainán, Mainán gojc xdad Amón, Amón gojc xdad Josías. ¹¹ Dxel Josías gojc xdad Jeconías con ree bijchaman, tiamp ni guzu ree bën Israel Babilonia zi'c bën yu' ladxguiib.

¹² Chi ma barii reeman Babilonia lod guzu reeman zi'c bën yu' ladxguiib, gojl Salatiel, xdadaman gojc Jeconías. Dxel Salatiel gojc xdad Zorobabel. ¹³ Zorobabel gojc xdad Abiud, Abiud gojc xdad Eliaquim. Eliaquim gojc xdad Azor, ¹⁴ Azor gojc xdad Sadoc, Sadoc gojc xdad Aquim. Aquim gojc xdad Eliud, ¹⁵ Eliud gojc xdad Eleazar. Eleazar gojc xdad Matán, Matán gojc xdad Jacob. ¹⁶ Jacob gojc xdad Xiëb lacheel Li. Dxel Li gojc xniaa Jesús, bën la gajc Cristo.

¹⁷ Zian gojc, diizd xtiamp Abraham xt xtiamp rey Davi, guyu chidaj generacion, dxel chidaj generacion guyu diizd xtiamp rey Davi xt tiamp ni guzu ree bën Israel Babilonia zi'c bën yu' ladxguiib, abi' zachidaj generacion guyu diizd tiamp ni barii ree bën Israel Babilonia xt chi bidxin dxej gojl Jesucrist loj guidxliuj.

Gojl Jesucrist

(Lc. 2:1-7)

¹⁸ Ze gojc gojl Jesucrist: Li, xniaaman, ma naj tia' Xiëb laaman. Per chi gad reeman tia' lasa', guyu xi'n Li por xSprijt Dios. ¹⁹ Abi' Xiëb guial najman benza'c, ad guyëntaman nusa'nxtuman Li. Beenman xgab niro'nladxaman laaman ralanzi. ²⁰ Per la'tgaj cayünman xgab zian, balüüloj tijb xianjl Dios lojman loj baaal, rëb anjl guin lojman:

—Xiëb, xdiaa Davi, ad bal rdxebil tia'l Li, din xindo nüüm por xSprijt Dios zëédix. ²¹ Tijb xindoniguiaaw gac xi'n Li, yagu'l lajx “Jesús”, din por laax gra ree xbejnx gac perdon xtol.

²² Gra ree ni guie gojc persi guzobj xtiidx Dios zi'c gunee bën badëe xtiidxaman loj ree bejn, chi rëbaman:

²³ Tijb biinxdüb chu' xi'n,
abi' chi galix grii lajx Emanuel,
rën guiëban: Dios za'në dunuj ree.

²⁴ Chi baban Xiëb, dxel beenman zi'c gunabee xianjl Dios laaman, cwa'man Li, ²⁵ per ad bagaalt Xiëb laaman xt chi bidxin dxej gojl xi'nman. Dxel bagu' Xiëb laj xindobëz guin JESÚS.

2

Bignaj ree bén rajc Jesús

¹ Jesús gojlaman Belén tijb guiedx naaz Judea, tiamp gunabee rey Herodes. Dxel bidxin ree bén rajc, Jerusalén, laa reeman naj magos, za reeman niz oriente. ² Abi' gunabdiidx reeman, rëb reeman:

—¿Con xrey ree bén Israel, bén ma gojl? Din dunujn diizd duladxan baguiaa xbajlaman xanyabaa, zeel zio'pan din yazuxiban lojman.

³ Chi biguien rey Herodes zian, dád gyunawëëgaman, nëgajc gra ree bén Jerusalén gyunawëëg. ⁴ Zeel gurejdx Herodes gra ree bixhioz rniabee ree bixhioz, në ree mextr rajc ley, persi gunabdiidxaman loj reeman banguin naj gal Cristo. ⁵ Dxel rëb reeman:

—Belén naj galaman, tijb guiedx naaz Judea, din ze bacaa bén badëë xtiidx Dios loj ree bejn:

⁶ Lüy Belén, tijb guiedx naaz Judea, majsi guiedx dobëz najl loj gra ree guiedxro' naaz Judea. Per lasajquil din luguiedx Belén guin grii tijb bén nabee guiniaj tëëman da bén Israel reen.

⁷ Dxel ralanzi gurejdx rey Herodes bén rajc guin ree, persi gunabdiidxaman goc balüüloj bajl xanyabaa guin loj reeman. ⁸ Abi' guxhaalaman laa reeman Belén, rëbaman loj reeman:

—Gol wej, gol bignabdiidxchaaw graczi xcwent xindobëz guin. Abi' chi yadxejlidi laax, laa gol bagojn gajc naj, din në naj chigzuxib lojx.

⁹ Chi gulox rëb Herodes loj reeman zian, dxel zë reeman. Abi' bajl xanyabaa baguiaa reeman diizd ladx reeman, nedan loj reeman, xt lod yu' xindobëz guin guzudxen. ¹⁰ Chi baguiaa reeman bajl guin, dád babaa reeman. ¹¹ Abi' chi guyu reeman lënü guin, baguiaa reeman xindo guin con xniaax Li. Abi' bazuxib reeman gojp reeman laax respejt. Dxel guxhal ro' xcaj reeman, abi' bazaladx reeman or, në yaal, nëtëë mirra par xindo guin. ¹² Chi ma guidxin dxej yaza reeman, dxel bagojn Dios laa reeman loj bacaal chitëë yayejc reeman niz lod za' Herodes, zianan zeel bayejc reeman niz lood ren.

Zë reeman Egipto

¹³ Chi ma zia ree bén rajc guin ladx reeman, dxel balüüloj tijb xianjl Dios loj Xiëb loj bacaal, rëbaman:

—Bixche, cwa' xindo guin con xniaax, gol chej niz Egipto. Ni gol guzuj xt chi ganin lëjt, din zaguiil Herodes laax din gugüjtaman laax.

¹⁴ Dxel bixche Xiëb, cwa'man xindobëz guin con xniaax, abi' guxhin guin brii reeman zë reeman niz Egipto. ¹⁵ Ni guzu reeman xt güjt rey Herodes. Zian guzobj xtiidx Dios ni gunee bén badëë xtiidxaman loj ree bejn, chi rëbaman: “Babedx da xi'nan Egipto.”

Gunabee Herodes guiët ree xindobëz

¹⁶ Chi gogbee Herodes guial basquiee ree bén rajc guin laaman, dád bidxe'chaman. Dxel gunabeeman guiët gra ree xindoniguiaaaw diizd ree xindo qui gojlri ree xt ree xindo ma yu' ree guia' tio'p ijz, xindo yu' ree Belén në gra ree guiedx riga' niz ni, guial yu'guijcaman ni rëb ree bén rajc guin guial

ma gojc tio'p ijz ni baguiaa reeman bajl guin. ¹⁷ Zian gojc cumplid ni bacaa Jeremías, bèn badëë xtiidx Dios loj ree bejn, chi rëbaman:

¹⁸ Biguien cha' tijb bejn guiedx Ramá,

yu' guialroon nē guialrbixdiaj,

Raquelan cayoon por ree xi'nman,

abi' ad rile't chu gusqueijn laaman guial güjt ree xi'nman.

¹⁹ Per chi güt Herodes, dxel balüüloj tijb xianjl Dios loj Xiëb loj bacaal lod zobj reeman, Egipto, abi' rëbaman lojman:

²⁰ —Bixche, cwa' xindobëz guin con xniaax. Gol baguiaj niz Israel, din ma güjt ree bèn guyën nugüjt laax.

²¹ Dxel bixche Xiëb cwa'man xindobëz guin con xniaax, bayejc reeman niz Israel. ²² Per chi gogbee Xiëb guial Arquelao, xi'n Herodes, naj bèn canabee niz Judea, bidxebaman naguiaj reeman niz ni. Dxel bagojn Dios laaman loj bacaal din che reeman niz Galilea, dxel zë reeman. ²³ Chi bidxin reeman ni, gurej reeman guiedx Nazaret. Zian gojc persi guzobj diidx ni gunee ree bèn badëë xtiidx Dios loj ree bejn, guial grii laj Jesús bèn Nazaret.

3

Düidx gunee Waj bèn baroobnijs bejn ree (Mr. 1:1-8; Lc. 3:1-9, 15-17; Jn.1 :19-28)

¹ Lën ree dxej ni bidxin Waj, bèn baroobnijs bejn ree, loj yujbidx niz Judea catie'chaman xtiidx Dios. ² Rëbaman:

—Gol bayüjn xgab por xtolidi din ma zidyob xguialrniabee Dios.

³ Xcwent Waj guinan bacaa Isaías, bèn badëë xtiidx Dios loj ree bejn, chi rëbaman:

Rguien cha' tijb bèn rbidxa' niz loj yujbidx, rëbaman:

“Gol beenchaaw xnejz dux Dad ree Dios, gol guxhal tijb nejj nali.”

⁴ Con guidxlad camell gojcnë xab Waj, abi' lënman bixii tijb guid. Gudaw tëeman bi'tsu con dxijn yu' dajn. ⁵ Dxel bèn Jerusalén ree nē los demazri ree bèn Judea nētëë gra ree bèn zobj gadë ro' guiiw Jordán, brii reeman bicaagdiaj reeman ni rniee Waj. ⁶ Dxel guxhoobdol reeman, abi' baroobnijs Waj laa reeman loj guiiw Jordán guin.

⁷ Per chi baguiaa Waj zien ree bënfarisew nē ree bënsaducew bidxin din tiobnijs reeman, rëbaman loj reeman:

—jXi'n xindxab! ¿Chu bagojn lëjt din laadi loj castiro' ni zëed? ⁸ Gol gubajn zagdxé din guiguien guial waliquidi ma bayüjndi xgab por xtolidi, ⁹ abi' ad bal rlies xvalorgajquidi, rëbidi: “Dunujn zio'p loj xdiaa Abraham”, din naj rni lëjt xt guiaj guie ree zile' yayüjn Dios xdiaa Abraham. ¹⁰ Abi' ree bèn ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn tijb yag chi ad rtiatan, rutüügaman laan din che'can. ¹¹ Naj rni lojdi, curobnijsan lëjt con nijs zi'c tijb sen guial ma bayüjndi xgab por xtolidi. Per bèn zidnal naj, laaman guroobnijs lëjt con xSprijt Dios con nē bajl, din laaman mazri rajp guialrniabee guial lon, abi' ni'qui xgurëchaman ad rayalt gaxhiecan. ¹² Abi' zi'c raya trigo zian güünnëman bejn. Din bèn zinal ree xnejz Dios chinëman laa reeman lod rniabeeman, guiáad ree bèn ad zinalt xnejz Dios guixhiaalaman laa reeman loj bajl ni ad yu't dxej yayü'.

Guroobnijs Jesús (Mr. 1:9-11; Lc. 3:21-22)

¹³ Lën ree dxej zii guza Jesús niz Galilea wejman ro' guiiw Jordán lod za' Waj, din guroobnijs Waj guin laaman. ¹⁴ Per ad nuyëntaman nuroobnijsaman Jesús, rëbaman lojman:

—Lüj rayal guroobnijs naj, ad najt rayal guroobnijs lüj.

¹⁵ Dxel rëb Jesús lojman:

—Yo guna gac zian, din mazri zagdxë yaguieen gra zi'c rniabee Dios.

Dxel cwëjb Waj baroobnijsaman laaman. ¹⁶ Chi gulox guroobnijsaman, naabzi bariiman loj nijs guin, dxejczï bixal xanyabaa, abi' baguiaaman zidguiajt xSprijt Dios zi'c tijb palom xt guijcaman. ¹⁷ Dxel biguien cha' tijb bejn xanyabaa, rëbaman:

—Bén guie naj da Xi'nan, bén rën da'tan bén rabaanë' tëen.

4

Gojc Jesús prueb

(Mr. 1:12-13; Lc. 4:1-13)

¹ Dxel binë xSprijt Dios Jesús niz loj yujbidx, din güün xindxab laaman prueb.

² Ni guzuman tiuu dxej tiuu guiaal sin gualraw, dxel gulaanman. ³ Abi' bidxin xindxab beenx laaman prueb, rëbix:

—Bal wali najl xi'n Dios, gunabee yayajc guiaj guie ree guiadxtil.

⁴ Per badxi' Jesúsán rëbaman:

—Loj xtiidx Dios rëb: “Ad ganaxtizi guiadxtil guiban bejn, nëgajc gra diidx rniee Dios.”

⁵ Dxel binë xindxab guin laaman Jerusalén, abi' gulë'pix laaman guijc yadooro' zojb luguiedxzi, ⁶ abi' rëbix lojman:

—Bal wali najl xi'n Dios, gudidya' diizd guie, din loj xtiidx Dios rëb:

Dios guixhiaal ree xianjlanan din guinia reeman lüj.

Guiniaaz reeman lüj con yaa reeman

chitëë ladx ni'czi tijb guiaj guia'l.

⁷ Badxi' Jesúsán, rëbaman:

—Rëb gajc loj xtiidx Dios: “Ad güünl prueb xDadil Dios.”

⁸ Dxel binë xindxab guin laaman tijb guijc guia' ya da't, lod balüüx laaman gra ree guiedx riga' loj guidxliuj në ree gualnaza'c yu' loj reen. ⁹ Abi' rebix lojman:

—Naj gune gra ree ni guie lojl, bal guzuxibil lon guiniajchi' tëël naj.

¹⁰ Badxi' Jesúsán, rëbaman:

—Biquied, xindxab, din loj gajc xtiidx Dios rëb: “Gunajchi' xDadil Dios, tijbzi lojman been sirv.”

¹¹ Dxel biquied xindxab guin lojman, abi' bi't tio'p choon ree xianjl Dios persi been reeman laaman sirv.

Rzuloj Jesús rtie'chaman xtiidx Dios niz Galilea

(Mr. 1:14-15; Lc. 4:14-15)

¹² Chi gogbee Jesús guial yu' Waj ladxguuib, bayejcaman Galilea. ¹³ Per ad gurejtraman guiedx Nazaret, wejman bisobaman guiedx Capernaum, tijb guiedx riga' gajxh ro' nijs Galilea niz lod goc ree xdajn Zabolón në Neftalí.

¹⁴ Zian gojc persi gojc cumplid ni bacaa Isaiás, bén badëë xtiidx Dios loj ree bejn, chi rëbaman:

¹⁵ Bén Zabolón con ree bén Neftalí,

në ree bén zojb gajxh ro' nijsdoo, nëtëë ree bén zojb xijch guiiw Jordán

con gra ree bén zojb niz Galilea,

lod zojb ree bén ad najt bén Israel,

¹⁶ gra reeman gubajn loj xcaj.

Yan ma brii tijb biani par laa reeman,

abi' biani guin guxhal xquiarguejn ree bèn ad nabant xnejz loj Dios.

¹⁷ Diizd dxejzii guzuloj gutie'ch Jesús xtiidx Dios, rëbaman:

—Gol bayüjn xgab por xtolidi din ma zëed gajxh xguialrniabee Dios.

Rbejdx Jesús tajp ree bèn gac xbejnman

(Mr. 1:16-20; Lc. 5:1-11)

¹⁸ La'tgaj caza Jesús gajxh ro' nijsdoo Galilea, baguiaaman Simón bèn la gajc Béd con bijchaman Andrejs. Cuzaal reeman guijxh loj nijs din guiniaaz reeman bëjl. Guial laan naj xchiin reeman. ¹⁹ Dxel rëb Jesús loj reeman:

—Gol tanal naj, din gulün lëjt xhienaag güüdi din guto'pidi bejn par Dios luar guiniaazidi bëjl.

²⁰ Loj hor guin gajc basa'n xguijxh reeman abi' zinal reeman laaman.

²¹ Guzaman zatibda'n dxel baguiaaman zatio'p ree bejn, Jacob con bijchaman Waj, xi'ngaan ree Zebedeo. Yu' reeman loj tijb barcw con xdad reeman cayüjnchaaw xguijxh reeman. Dxel gurejdx Jesús laa reeman, ²² abi' basa'n reeman barcw guin con xdad reeman, dxel laa zinal gajc reeman laaman.

Rülüü Jesús zien ree bejn

(Lc. 6:17-19)

²³ Wej Jesús guidibczi niz Galilea, abi' tijbgaj ree guiedx wejman lën ree yadoo persi balüüman bejn ree. Balüüman laa reeman xtiidx Dios, rëbaman loj reeman xhienaag naj xguialrniabee Dios, abi' bayüjnman bèn rdoob ree në gra ree bèn rajc xhietëez guialguijdxan. ²⁴ Guidibczi niz Siria bire'ch xtiidx Jesús, abi' bidnë reeman bèn cusagdiaj ree gadxagayaa ni mal në graloj ree guialguijdx, bèn yu' ree xindxab luxdoo, në ree bèn rëjtya', nëtëë ree bèn ad rilet' suli, abi' bayüjn Jesús laa reeman. ²⁵ Dád zien ree bejn binal laaman, bèn Galilea ree, bèn zëed ree Decápolis, bèn Jerusalén ree, bèn zëed ree niz Judea në ree bèn zëed stiblad ro' guiiw Jordán.

5

Ni balüü Jesús tijb guijc guia'

¹ Chi baguiaa Jesús bèn guixiuj ree, wë'paman tijb guijc guia' abi' gurejman, dxel gubig ree xbejnman lojman. ² Abi' guzuloj culüüman laa reeman, rëbaman:

Xiquilbaa ree bejn

(Lc. 6:20-23)

³—Xiquilbaa ree bèn ragbee guial ryaadx gagnë Dios laa reeman, din por zian yayal reeman lod rniabeeman.

⁴ Xiquilbaa ree bèn yu'naya, din Dios yagu' luxdoo reeman zagdxë.

⁵ Xiquilbaa ree bèn naj bèn chaawladx, din laa reeman tia' guidxliuj ni rëb Dios gudëedaman loj reeman.

⁶ Xiquilbaa ree bèn rzajc zi'c chi rliaan bejn o chi re'caman nijs zian rën da't reeman güün reeman zi'c rniabee Dios, din Dios gagnë laa reeman din güün reeman zi'c ruladxaman.

⁷ Xiquilbaa ree bèn raya lasa', din zian yaya Dios laa reeman.

⁸ Xiquilbaa ree bèn naya loj Dios, din laa reeman guguiaa laaman.

⁹ Xiquilbaa ree bèn rüjn naguiejn cwedxenë lasa', din laa reeman grii laj xi'n Dios.

¹⁰'Xiquilbaa ree bën cadëd loj guialzi por graloj ni rujnnë bejn laa reeman guial cayüjn reeman zi'c rniabee Dios, din laa reeman yayal lod rniabeeman.

¹¹'Xiquilbaadi, chi rüjnnë reeman lëjt xhiernarajc në chi rnieeguidx reeman lëjt nëtëë chi rudxiib reeman guijquidi graczi, guial najdi da bejnan. ¹²Gol badxe' l uxdoodi nix, gol babaa tëë din narooob naj ni gunee Dios lojdi xanyabaa. Abi' lëjt ragbee guial ziangajc basagzi reeman bën badëë ree xtiidx Dios loj ree bejn gocli chi gadidi gui't loj guidxliuj.

Lëjt naj zi'c zëd në zi'c bajl
(Mr. 9:50; Lc. 14:34-35)

¹³'Lëjt naj zi'c zëd loj guidxliuj guie. Per bal id naxijran, çxhieza naag yayajcan naxij zatijb? Achetri dxiin güünan, gaz guire'chan abi' chë'p ree bejn guijcan.

¹⁴'Lëjt naj zi'c tijb biani loj guidxliuj guie, naj tëëdi zi'c tijb guiedx ni riga' tijb guijc guia' abi' ad zajct guiguie'chan. ¹⁵Ad ritiaguij tëët tijb guij par guida'cwan lën tijb yagaln, ritiaguijn persi rzojban ya din gusnin loj gra ree bën yu' lënü. ¹⁶Ziangajc lëjt, gol gojc zi'c biani loj ree bejn, din chi guguiaa reeman ni zagdxe cayüjndi guza't reeman xDadidi Dios zagdxe bën yu' xanyabaa.

Rulüü Jesús xcwent ley

¹⁷'Ad naladxidi zialan par günan ley tibladi, ley ni badëë Dios loj Moisejs o ni balüü ree bën badëë xtiidx Dios loj ree bejn, zialan par günanan cumplid. ¹⁸Din naj rni lojdi, la'tgaj yu' xanyabaa në guidxliuj, ad ziquiedt tijb punt o tijb lejtr loj ley xt chi gac gra ni naj gac. ¹⁹Zianan zeel bën ad ruzoobt tijb mandamient ni zëed loj ley guin majsi nidobëz naj mandamient guin, bal rulüü tëëman bejn ree güün reeman zian, laaman lasajc ta'nzi lod rniabee Dios. Per bën ruzoob gra ree mandamient ni zëed loj ley guin, rulüü tëëman bejn ree guzoob reeman laan, laaman naj mazri bën lasajc lod rniabee Dios. ²⁰Zeel naj rni lojdi, bal id zabajndi mazri zagdxe guial loj ree mextr rajc ley në ree bënfarisew, ad zayaltidi lod rniabee Dios.

Rulüü Jesús xcwent guialrdxe'ch lasa'
(Lc. 12:57-59)

²¹'Lëjt ragbee guial rëb Dios loj ree xbëngulalidi: "Ad gugüjtil bejn, din bën gugüjt bejn yayalaman casti." ²²Per naj rni lojdi, chutëëz bën rdxe'chnë lasa', yayalaman casti, në bën rniee diidxguijdx lasa' xt loj guxtis zajc cheman, guiáad bën rëb loj lasa' achet sirv lüj, laaman yayal loj bajl yu' gabijl.

²³'Zeel bal zinël gon lën yadoo abi' yagaj rusaaladxil guial yu' bën rdxe'chil, ²⁴basa'nsii xgonl yagaj, yalojxgaj babenë bën rdxe'chil zagdxe, dxel ma zile' yajeyquil din gusa'n xgonl.

²⁵'Bal chu bën rudëed lüj loj guxtis, baya'nnëman diidx zagdxe la'tgaj yu' tiamp, chitëë yayüman lüj loj guxtis, abi' guxtis guin nabee chu'l ladxguuib. ²⁶Naj rni lüj, ad zariitil ladxguuib guin xtczi quixil gra ni na guxtis guin.

Rulüü Jesús xcwent guialrzunë lacheel ben ren

²⁷'Lëjt ragbee guial loj ley rëb: "Ad sunël lacheel ben ren." ²⁸Per naj rni lëjt, chutëëz bën rüjn xgabmal chi ruguiaaman tijb bëngunaa, con laan ma beenman dol lën luxdooman por bëngunaa guin.

²⁹'Bal laagajc guiaalaj ladbeel rüjn din güünl dol, mazri zagdxe naj gulëen bazaalan zijt. Din mazri zagdxe naj nit tibladi guiaalojl luar che guidibil

gabijl. ³⁰ Abi' bal laagajc yaa ladbeel rüjn din güünl dol, gutü'n bazaalan zijt. Din mazri zagdxe naj nit tiblاد yaal luar che guidibil gabijl.

Ruliü Jesüs xcwent guial rala' lasa' bejn
(Mt. 19:9; Mr. 10:11-12; Lc. 16:18)

³¹ Ma bacaagdiajg tēdi: “Chutēz bēn rala' lacheel, rayal gudēedaman gui'ch lojman guial ma bala' lasa' reeman.” ³² Per naj rni lējt: Xinguaaw rala' xbéngunaa, abi' ad za'nēt béngunaa guin xin ren, laagajc laax cayüjn din sunē xbéngunaa xin ren. Abi' xin tia' béngunaa guin dolan cayüjnx.

Ad rayalt guza't xlia' bejn Dios

³³ Rēb tēē Dios loj ree xbénguladi: “Ad guza't xlia'di Dios, rayal güündi cumplid ni rēbidi gudēēdidi lojman.” ³⁴ Per naj rni lojdi: Ad rayaltczi guza'tidi Dios, ni'qui xanyabaa par chililadx reeman lējt din ni zojb Dios, ³⁵ ni'qui guidxliuj din loj guidxliuj naj lod ruzuj guia'man, ni'qui Jerusalén din laan naj ladx rey mazri rniabee. ³⁶ Ad guza't tēē guijquidi par chililadx reeman lējt, din ni'qui tijb guidxguijquidi ad zajct güündi ni ya's o ni naquich ya. ³⁷ Zagdxeli con gol güjdx “an” o “a'n”, din los demazri ree ni guinieedi loj xindxab zan.

Ad yadxi'di ni mal por ni mal
(Lc. 6:29-30)

³⁸ Lējt ragbee guial loj ley rēb: “Bēn cwēē guiaalojl, gulēē gajc guiaalojman. Guiáad bēn cwēē layil, gulēē gajc layaman.” ³⁹ Per naj rni lējt: Ad yadxi'di ni mal por ni mal, bal chu chēēz xhagj ladbeedi, gol badēē stibladan chēēzaman. ⁴⁰ Bal chu bēn tilē lüj din cwēēxuman xmanguil, badēē nē xchamarri tia'man. ⁴¹ Abi' bal rüjn reeman lüj naguiejn güül tijb yuu din sanēlan tib kilometro, guzanēn tio'p kilometro. ⁴² Chutēz bēn rniab xhienin lojl, badēēdan, bal chu tēē rgui'n xhienin lojl ad bal cwexuul gudēēdilan.

Guyēn bēn rdxe'ch lüj
(Lc. 6:27-28, 32-36)

⁴³ Ragbee tēēdi rēb ree bejn: “Guyēn bēn rēn lüj, bidxe'ch tēē bēn rdxe'ch lüj.” ⁴⁴ Per naj rni lojdi: Gol guyēn bēn rdxe'ch lējt, gol gurejdx tēē Dios por ree bēn rzunal lējt, din güün reeman lējt ni mal. ⁴⁵ Din zian gaquidi xi'n xDadidi Dios bēn yu' xanyabaa, din laaman ruslejn xgubijdxaman par ree benza'c nē par ree benmal, ruscal tēēman guia par ree bēn naban zi'c rayal nē par ree bēn ad nabant zi'c rayal. ⁴⁶ Din bal rēndi ganaxzi bēn rēn lējt, çxhiezia tia'di loj Dios zian? Din xt bēndol ree rüjn zian. ⁴⁷ Abi' bal ganaxzi bēn rēndi rugajpdiozidi, çxhiezia ni zagdxe cayüjndi? Din xt bēn ad nünbeet ree Dios rüjn zian. ⁴⁸ Zeel gol gojc benza'c, zi'c naj xDadidi Dios bēn yu' xanyabaa.

6

Xhienaag gagnē lasa' bejn

¹ Ad güündi ni zagdxe niz loj ree bejn naabzi par yadxaloj reeman lējt. Din bal güündi zian, xDadidi Dios bēn yu' xanyabaa achet guneeaman lojdi. ² Zeel chi güünl yudar bēn ryaadx xhienin, ad gutie'chil diidx par gagbee bejn xhie cayüjn zi'c rüjn ree bēn rusquiee, lēn ree yadoo nē ree lunejz, din guilies bejn xvalor reeman naj reeman benza'c. Per diidxliczi rnin lojdi, laazan naj ni rayal reeman. ³ Zeel chi güünl yudar bēn ryaadx xhienin, ni'czi loj xmiwda'til ad gül diidx ni cayüjn. ⁴ Mazri zagdxe lüjzi gagbee ni cayüjn, abi' xDadil Dios laaman cuguiaa ni cayüjn lüjzi, laaman gunee ni rayalil.

Xcwent xhienaag cwedx guiniab bejn Dios

(Lc. 11:2-4)

⁵ Chi cwedx guiniabidi Dios, ad güündi zi'c rüjn ree bén rusquiee, bén ruladx ree rzuli par cwedx guiniab reeman Dios lén ree yadoo në ree xquin nejz, din yadxaløj bejn laa reeman. Din naj rni lojdi, laazan naj ni rayal reeman. ⁶ Per lüj chi cwedx guiniabil Dios, bayu lénü lidxil, basiaaw ro' port, dxel gurejdx gunab Dios bén za'në lüj. Abi' laaman cuguiaa ni cayüjn lüjzi, laaman gunee ni rayalil.

⁷ Chi rbejdx rniabidi Dios, ad radxi'di diidx guin guië'tzi guië't naabzi par gaxhiey xtiidxidi, zi'c rüjn ree bén ad nünbeet Dios. Din laa reeman naladx guial zien ni rniee reeman mazri guidxga' Dios laa reeman. ⁸ Ad güündi zi'c rüjn reeman, din xDadidi Dios ma ragbeeman xhie ryaadxidi chi gadidi guiniab laan. ⁹ Zeel chi cwedx guiniabidi Dios, gol güjdx:

Dad, lüj yu' xanyabaa,
rayal yaya'p da'tan lajl respejt.

¹⁰ Gac zi'c rniabeel.

Gac zi'c rënl loj guidxliuj zi'c rajc xanyabaa.

¹¹ Bane ni yadaawan guixie guixie.

¹² Been dunujn perdon gra ree ni mal ma baguieenan
zi'c raguieenan perdon bén rüjn ree dunujn ni mal.

¹³ Ad guslaal dunujn yaguieenan dol,
babëe dunujn loj gra ni mal.

¹⁴ Din bal güündi perdon bén rüjn lëjt ni mal, ziangajc xDadidi Dios bén yu' xanyabaa züjn gajcaman perdon xtolidi. ¹⁵ Per bal id züjndi perdon bén rüjn ree lëjt ni mal, ziangajc xDadidi Dios ad züjntaman lëjt perdon.

Xcwent guialrba'n

¹⁶ Chi rba'ndi ad güün lojdi naya, zi'c rüjn ree bén rusquiee din guguiaa bejn guial naba'n reeman. Naj rni lojdi, guial laazan naj ni rayal reeman.

¹⁷ Per lüj, chi rba'nl, gudiib lojl gudüjn tée guijquil ¹⁸ chitëe gagbee ree bejn guial naba'nl. Tijbzi xDadil Dios bén za'në lüj naj bén gagbee laan, abi' laaman gunee lüj ni rayal tia'l.

Guialnaza'c yu' xanyabaa

(Lc. 12:33-34)

¹⁹ Ad guto'pidi guialnaza'c loj guidxliuj guie lod zajc tiabe reen o xhin reen o chu' xingubaan cwan laa reen. ²⁰ Zagdxeli gol been naguiejn gol been gan guialnaza'c yu' xanyabaa lod ad zacabet reen, lod ad zaxint reen, lod ad zu tëet xingubaan cwan laa reen. ²¹ Lod gapil guialnaza'c guin yagaj su luxdool.

Guiaaløj bejn naj zi'c biani

(Lc. 11:34-36)

²² Guiaaløj bejn naj zi'c tijb biani par xcuerpaman. Zeel bal cayüjnl ni zagdx, guidib xcuerpil rajp biani. ²³ Per bal cayüjnl ni mal, guidib xcuerpil naj zi'c lod nacay, zi'c naj lod nacaybuu.

Dios ya o milia

(Lc. 16:13)

²⁴ Ad zile't chu güün sirv loj tio'p patron, din zadxe'chaman tijbaman abi' guiënman stijbaman, o gacaman benza'c con tijbaman abi' ad zëntaman stijbaman. Zeel ad zile't güündi sirv loj Dios në loj milia.

*Achetzci rayal chu' bejn xgab**(Lc. 12:22-31)*

²⁵ 'Naj rni lëjt: Ad chu'di xgab por ni gawidi në por ni guië'di din guibandi, ni'qui por lajd ni gacwidi. Guialnaban mazri lasajc guial loj guialraw, abi' xcuerp bejn mazri lasajc guial loj xabaman. ²⁶ Gol baguiaa ree be rzuj xanyabaa, ad rxübit reeb, ad rato'p tëët reeb guialnaza'c, ad naj tëët lod cu'chaaw reeb guialnaza'c guin. Per xDadidi Dios bën yu' xanyabaa rudëëd ni raw reeb. Abi' mazri lasajquidi guial loj reeb. ²⁷ Abi' tëë, ζwen guial ru da'tidi xgab ma güün lëjt mazri ziool ya?

²⁸ ζChexquiza zeel dád rudi xgab por xabidi? Gol baguiaa xhienaag rni's ree guiaa dajn. Achet dxiin rüjn reen ad rguib tëët reen, ²⁹ per ni'qui rey Salomón ad guzujchaawt zi'c za'chaaw ree guiaa majsi mast guzujchaawaman. ³⁰ Abi' bal gui'xh dajn ruzujchaaw Dios yan, majsi guixiezi che'can. Diidxgui lëjt bën ad rliladxza'ct ree laaman, nid zuneeman ni gacwidi ya. ³¹ Zeel ad rudi xgab xhie gawidi, o xhie guië'di, o xhie gacwidi. ³² Din bën ad nünbeet ree Dios rüjn zian, laa reeman ru xgab por gra ree ni guin. Per lëjt yu' xDadidi xanyabaa, abi' laaman ragbeechaaw xhienin ryaadxidi. ³³ Per yalojxgaj gol baguiil güüdi zi'c rniabee Dios, gol been tëë zi'c rënman, dxel laaman gunee gra ree ni ryaadxidi. ³⁴ Ad chu'di xgab por ni gac guixie, gol basa'nan par guixie, zagdxeli gol guyu xgab tib dxejgaj.

7*Xcwent guialrula'ch**(Lc. 6:37-38, 41-42)*

¹ 'Ad gula'chidi bejn chitëë saquidi zian. ² Din bal rula'chidi bejn ziangajc saquidi, zi'c rüjnnëdi bejn ziangajc güünnë reeman lëjt. ³ Ad gula'chidi bën ren por falt dobëz ni rajpaman, zagdxeli gol guyu xgab por falt narooob ni rajpidi. ⁴ Abi' bal mazri falt narooob rajpidi, ζxoza guiëbidi loj stijb bejn: "Ad laa naj ni rüjnl"? ⁵ ¡Bën rusquiee! Yalojxgaj gol been zi'c rayal, chi ma rüjndi zian dxel ma zile' guiëbidi loj stijb bejn: "Ad laa naj ni rüjnl."

⁶ 'Ad güüdi nagueiejn güüncwent ree bën ad rënt güüncwent xtiidx Dios, chitëë xhie güünnë reeman lëjt. Din bal güüdi zian, laan naj zi'c chi ruzaal bejn tijb ni nagle' loj bë'cw, o chi ruzaal bejn tijb ni lasajc loj cüch abi' chë'pzib guijcan.

*Ni guiniabidi zaca'dan**(Lc. 11:9-13; 6:31)*

⁷ 'Naj rni lëjt: Gol gunab loj Dios, abi' laaman gunee ni rniabidi. Gol baguiilaman, zadxejlidi laaman. Gol gurejdx gunabaman, züjncwentaman lëjt. ⁸ Din bën rniab, zaca'man. Abi' bën rguuil, zadxejlaman, guiaad bën rbejdx rniab laaman, züjncwentaman laaman.

⁹ 'Lëjt najdi dad, ζwen zudëedi tijb guiaj loj xi'ndi ya chi guiniabix guidx-til? ¹⁰ ζo zudëedi tijb bëel ya chi guiniabix bëjl? ¹¹ Nacli lëjt najdi bëndol rajc rudëëdi ni rën xi'ndi. ¡Diidxgui xDadidi bën yu' xanyabaa, nid zudëëdaman ni zagdx loj ree bën rniab laan ya!

¹² 'Gol beennë ree bejn zi'c rëndi güünnë reeman lëjt. Din zian rniabee xley Dios në ni bacaa ree bën badëë xtiidxaman loj ree bejn.

*Port nadëë**(Lc. 13:24)*

¹³ 'Gol been naguiejn din chu'di niz ro' port nadëe. Din port gulajg në nejz gulajg, laa reen naj ni zinë bejn loj nejz mal, abi' zien bejn zë loj nejz guin.
¹⁴ Per port nadëe guin në nejz nadëe guin laa reen naj ni rnë bejn lod yu' guialnaban tiblyaa, abi' ta'nzi ree bejn zë loj nejz guin.

Por ni rüjndi zayünbee ree bejn lëjt

(Lc. 6:43-44)

¹⁵ 'Gol gojp cudad con ree bën rusquiee rëb rudëed reeman xtiidx Dios. Din rulüü dád bën chaawladx reen, per rüjnzi reeman par gusquiee reeman bejn.
¹⁶ Per zayünbeedi laa reeman por ni rüjn reeman, din ad rtiat uv loj yaquíejch ad rtia tëet higo loj gui'xh guiëjch. ¹⁷ Zeel gra yag zagdxe rtia ni zagdxe lojn. Guiáad gra yag guiidx rtia ni guiidx lojn. ¹⁸ Ad rtiat ni guiidx loj yag zagdxe, ad rtia tëet ni zagdxe loj yag guiidx. ¹⁹ Gra yag ad rtiat ni zagdxe, rirugan dxel re'can. ²⁰ Ziangajc lëjt zayünbeedi laa reeman por ni rüjn reeman.

Ad grat bejn chu' lod rniabee Dios

(Lc. 13:25-27)

²¹ 'Ad grat ree bën na lon: "Dad, Dad," chu' lod rniabee Dios, ganaxzi ree bën rüjn zi'c rën da Dadan, bën yu' xanyabaa. ²² Dxejzii, zien ree bën na lon: "Dad, Dad, por lüj batie'chan xtiidxil, abi' guial baza'tan lajl balëen xindxab ree luxdoo ree bejn, baguieen tëen zien ree milagr guial baza'tan lajl." ²³ Dxel guiën loj reeman: "Ad benbeetzan lëjt, gol gubi'ca lon bëndol."

Tio'p loj cimiant

(Lc. 6:47-49; Mr. 1:22)

²⁴ 'Chutéz bën rucaagdiajg da diidxan abi' rüjnman ni rën, laaman naj zi'c tijb bën nasin gules xcimiant lidx loj guiaj. ²⁵ Abi' gol guia, dxel biguiajt nijs ro' gubi' tée bidoxh, gulaj reen lad yu' guin, per ad gulenxantan guial naj xcimiantan loj guiaj. ²⁶ Per bën riguiejn da diidxan abi' ad rüjntaman ni rën, laaman naj zi'c tijb bën ad nasint bazoob lidx loj üx. ²⁷ Abi' chi gol guia biguiajt nijs narooob, gubi' tée bidoxh. Abi' gulaj reen lad yu' guin zianz gulenxanan, ni'qui tibda'nan ad baya'nt.

²⁸ Chi gulox guneenë Jesús bën guin ree, graczi reeman badxa da't loj zi'c balüüman laa reeman, ²⁹ guial rulüüman laa reeman zi'c bën rajp guialrniabee, ad zi'c rulüüt ree mextr rajc ley.

8

Rayüjn Jesús tijb bën rajc guialguijdx la lepra

(Mr. 1:40-45; Lc. 5:12-16)

¹ Chi baza Jesús ruguia' guin, dád zien bejn nal laaman. ² Dxel gubig tijb bejn lojman rajcaman guialguijdx la lepra, abi' bazuxibaman lojman, rëbaman:

—Dad, bal tiëbil, zile' yayüjnl naj.

³ Dxel basli yaa Jesús baqui'man laaman, rëbaman:

—Rënan. Bayajc.

Chi rëb Jesús zian, loj hor ziigajc biquied guialguijdx guin abi' bayaman.

⁴ Dxel rëb Jesús lojman:

—Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël zi'c gunabee Moisejs, din gagbee gra ree bejn guial ma bayajquil.

Bayajc xmojs tijb bën sultad rniabee ree sultad

(Lc. 7:1-10)

⁵ Chi guyu Jesús luguiedx Capernaum, tijb suldad Rom rniabee ree suldad bibig lojman, guzajcaman laaman liaadx, ⁶ rëbaman:

—Dad, laa da mojsan naga' lidxan ragxuux. Ad rilet' chixchex, dád cusagzi gualguijdx guin laax.

⁷ Dxel rëb Jesús lojman:

—Gan din yayünan laax.

⁸ Badxi' bën rniabee ree suldad guinan, rëbaman:

—Dad, ad rayaltan chu'l lidxan, per guneë diizd guie din yayajc da mojsan.

⁹ Din zi'c naj yu' ree bën rniabee naj, ziangajc naj yu' ree da suldad x'in rniabeen. Chi rën loj tijb reex: “Wej”, rejx, chi rën loj stijbix: “Guda,” ri'tix. Abi' chi rë loj da mojsan: “Been ni guin”, rüjnxan.

¹⁰ Chi biguiejn Jesús zian, dád badxalojman abi' rëbaman loj ree bën zinal laaman:

—Naj rni lojdi, ni'qui Israel ad wadxaaglojtan tijb bën r'iladx Dios zi'c r'iladx bën guin Dios. ¹¹ Naj rni lëjt, dád zien ree bën gralad yayal gawnë Abraham, në Isaac, në Jacob lod rniabee Dios. ¹² Guiáad ree bën rayal niu lod rniabee Dios, laa reeman yayal lod nacay da't lod goon reeman lod gaw tëe lay reeman.

¹³ Dxel rëb Jesús loj suldad rniabee guin:

—Baguij lidxil, gac tëe zi'c ma bililadxil.

Abi' loj hor guin gajc bayajc xmojs bën guin.

Rayüjn Jesús xnasuegr Bëd

(Mr 1:29-31; Lc 4:38-39)

¹⁴ Chi we Jesús lidx Bëd, baguiaaman xnasuegr Bëd naga'man yu'man xliaa. ¹⁵ Dxel gunaazaman yaaman, abi' bariiman xliaa guin, dxel bixche-man guzuloj cuyaanan laa reeman.

Rayüjn Jesús zien ree bënragxuux

(Mr 1:32-34; Lc 4:40-41)

¹⁶ Chi ma caxhin, binë ree bejn zien ree bën yu' xindxab luxdoo loj Jesús. Abi' con tijb diidx ni guneeman babëëman xindxab guin luxdoo reeman, bayüjn tëëman gra ree bënragxuux. ¹⁷ Zian gojc persi gojc cumplid ni rëb Isaías, bën badëë xtiidx Dios loj ree bejn, chi rëbaman: “Laaman zignë dux gualguijdx ree, laa tëëman zignë dux gualzi ree.”

Bën rën chinal Jesús

(Lc 9:57-62)

¹⁸ Chi baguiaa Jesús bénguixiuj nayaw laaman, gunabeeman tédaman stiblad ro' nijs naj yagaj. ¹⁹ Dxel gubig tijb mextr rajc ley loj Jesús, rëbaman: —Mextr, rënan guidnaalan lüj bantëëz guin chel.

²⁰ Abi' rëb Jesús lojman:

—Bëz ree yu' xbilíaa reeb, abi' ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

²¹ Dxel rëb stijb ree bën zinal laaman:

—Dad, baslaa naj gabenë' da dadan xt chi guiëtaman.

²² Per rëb Jesús lojman:

—Tanal naj, basa'nman con ree bën ad rënt guidnal naj, laa reeman guquie'ch laaman chi guiëtaman.

Racwëëz Jesús bidoxh

(Mr 4:35-41; Lc 8:22-25)

²³ Guyu Jesús loj barcw con ree xbejnman, ²⁴ abi' la'tgaj zè reeman loj nijs guin dxejlci gubi' tijb bidoxh, ma cazëëbczi barcw guin xan nijs. Per Jesús naga'yëjsaman. ²⁵ Dxel bicwëën ree xbejnman laaman, rëb reeman:

—¡Dad, gunaj dunujn! ¡Ma cayzëëban xan nijs!

²⁶ Badxi'man laan rëbaman:

—¿Chexc zeel dád rdxebidi? ¿Chexc zeel ad rliadxza'ctidi naj?

Dxel bixchewan abi' gunabeeman bacwëëz bi guin nè nijs guin. Loj hor ziigajc babedxe reen. ²⁷ Abi' ree xbejnman badxa da't loj reeman, zianz gunabdiidx loj lasa' reeman, rëb reeman:

—¿Chu bën guin, zeel xt bi nè nijs ruzoob xtiidxaman?

Tio'p ree bën yu' xinxab luxdoo

(Mr. 5:1-20; Lc. 8:26-39)

²⁸ Chi bidxin Jesús stiblad ro' nijs guin, loj xguidxliuj ree bën Gadara, dxel tio'p ree xinguaaw yu' xinxab luxdoo brier reex lad ree baa abi' wej reex loj Jesús. Dád nadoxh reex, zeel ad rilet' chu téd lunejz guin. ²⁹ Chi baguiaa reex Jesús, gurixdiaj reex rëb reex:

—¿Xhie rën con dunujn, Jesús, Xi'n Dios? ¿Zëëdil guie ya din gusagzil dunujn chi gadli dxej guidxin?

³⁰ Per gajxh yagaj za' zien ree cüch, cayaw reeb, ³¹ abi' guzajc ree xinxab guin liaadx loj Jesús, rëb reex:

—Bal yabëël dunujn, banee mod yadxu'n lën ree cüch guin.

³² Dxel rëb Jesús:

—Gol wej.

Dxel barii ree xinxab guin luxdoo ree bën guin bayu reex lën ree cüch guin. Abi' gra reeb guzuloj cuxüün zianz bitidia' reeb ro' tijb bala' xt loj nijs, lod gu' reeb nijs abi' güjt reeb.

³³ Abi' ree bën cayajp cüch guin ree, baxüün reeman. Dxel chi badxin reeman luquiedx guin, be reeman diidx gra ni goc nè gra ni guzac ree bën yu' ree xinxab guin luxdoo. ³⁴ Dxel gra ree bën guiedx guin brier wej lod za' Jesús, abi' chi baguiaa reeman laaman, guzajc reeman laaman liaadx, din yazaman ladx reeman.

9

Bayüjn Jesús bën nëjt xcuerp

(Mr. 2:1-12; Lc. 5:17-26)

¹ Dxel bayu Jesús loj tijb barcw, badëdaman stiblad ro' nijs guin abi' badxin ladxaman. ² Yagaj binë ree bejn tijb xin nëjt xcuerp, naga'x loj da. Chi baguiaa Jesús guial rliadx reeman laaman, rëbaman loj xin ragxuu guin:

—Bagu' luxdool zagdx, xi'n. Ma benan perdon xtolil.

³ Dxel tio'p choon ree mextr rajc ley been reeman xgab: “Diosan rüjnx tibladi guial rnieex zian.” ⁴ Per guial gogbee gajc Jesús xhie xgaban cayüjn reeman, dxel rëbaman loj reeman:

—¿Chexc zeel rüjndi xgabmal? ⁵ ¿Conin mazri nawëëg gac? ¿Guial guiën ya: “Ma benan perdon xtolil” o guiën: “Bixche, guza”? ⁶ Per yan, gulün lëjt guial naj, Bën guxhaal Dios ra'pan guialrniabee loj guidxliuj guie par günan perdon dol ree.

Dxel rëb Jesús loj xin ragxuu guin:

—Bixche. Baca' ni go'til loj. Baguiaj lidxil.

⁷ Laa bixchegajquix zia lidix. ⁸ Chi baguiaa ree b́en guin zian, bidxeb reeman, abi' baza't reeman Dios zagdxo por gualrniabee ni badēman loj ree bejn.

Rbejdx Jesús Matew
(Mr. 2:13-17; Lc. 5:27-32)

⁹ Chi baza Jesús yagaj ziaman, baguiaaman tijb xin la Matew. Zojbix lod ruquijxix impuest, abi' rēbaman lojx:

—Tanal naj.

Dxel bisu Matew zinalix laaman.

¹⁰ Tijb dxej chi cayaw Jesús lidx Matew con zien ree b́en ruquijx impuest nē ree b́en zēēb xtiidx ad nabant xnejz, gra reeman zojbnē Jesús xan mex con ree xbejnman. ¹¹ Chi baguiaa ree b́enfarisew zian, gunabdiidx reeman loj ree xbejn Jesús rēb reeman:

—¿Chexc zeel cayawnē xmxextridi b́en ruquijx ree impuest nē ree b́endol?

¹² Chi biguiejn Jesús ni rēb reeman, dxel rēbaman:

—Bēnnadaan ree ad ryaadxt reeman doctor, b́enragxuu ree laa reeman ryaadx doctor. ¹³ Gol chej, gol basiid xhie rēn guiēb loj xtiidx Dios lod rēb: “Ni mazri rēnan naj guial yaya lasa'di luar guidnēdi gon lon.” Yan, naj ad zialtan par ree benza'c, zialan par ree b́endol, din yayūjn reeman xgab por xtol reeman.

Rniabdiidx reeman loj Jesús xcwent guialrba'n
(Mr. 2:18-22; Lc. 5:33-39)

¹⁴ Dxel ree xbejn Waj, b́en baroobnijs bejn ree, bibig reeman loj Jesús, zianz gunabdiidx reeman lojman, rēb reeman:

—¿Chexc zeel dunujn con ree b́enfarisew dád zienvolt raba'nan, guiáad ree xbejn ad rba'nt reeman?

¹⁵ Badxi' Jesúsán rēbaman:

—Lod yu' guialruxhliaa, ¿wen runaya ree biooz ya chi za'nē xin cuxhliaa guin laa reeman? Per guidxin dxej chiquiedix, dxel guiba'n reeman.

¹⁶ ‘Achut rata' lajd cūb loj lajd yojx din zaxū'n lajd cūb guin, abi' mazri quixya'n lajd yojx guin. ¹⁷ Ad rgu'tēēt reeman vin cūb lēn anfr yojx din zaxya' anfr yojx guin, abi' zi'c anfr guin zi'c vin guin zaxin reen. Zeel naj guial chu' vin cūb lēn anfr cūb, din ni'qui tijb reen ad zaxint.

Bayajc xi'n Jairo nē b́engunaa bargaal xab Jesús
(Mr. 5:21-43; Lc. 8:40-56)

¹⁸ La'tgaj canee Jesús zian, bidxin tijb b́en rniabee lēn xyadoo ree b́en Israel, abi' bazuxibaman loj Jesús, rēbaman:

—Yangajczi gūjt da xi'ndxa'pan, per bal gui'til guixhioob yaal guijquim zabann.

¹⁹ Dxel zinē Jesús laaman con ree xbejn Jesús. ²⁰ Abi' tijb b́engunaa ragxuu ma gojc chiptio'p ijz ad rbēzt ryajbaman rejn, gubigaman niz xijch Jesús abi' bargaalaman guia' xabaman, ²¹ guial gunaladxaman: “Bal gugaalaman majsi xabzaman, zayajcaman.” ²² Per badxi' loj Jesús, abi' baguiaadxijchaman b́engunaa guin, dxel rēbaman lojman:

—Zagdxo bagu' luxdool, xi'n. Ma bayajquil guial bililadxil naj.

Abi' loj hor ziigajc bayajc b́en guin.

²³ Chi bidxin Jesús lidx b́en rniabee guin, baguiaaman ma riga' ree xinrucwejdx din chiquie'ch reex xi'nman, abi' ree bejn roon rbixdiaj reeman guijquim. ²⁴ Dxel rēb Jesús loj reeman:

—Gol barij guie, din ad gūjtt bindo guin, naga'yējszim.

Abi' baxijdxnë reeman laaman. ²⁵ Chi ma barii reeman, zianz guyuman. Gunaazaman yaa bindo guin dxel bixchem. ²⁶ Abi' guidib niz yagaj bire'ch diidx ni goc.

Rayÿjn Jesús tio'p bénlutia'p

²⁷ Chi baza Jesús yagaj, binal tio'p bénlutia'p laaman, rbixdiaj reeman, rëb reeman:

—Jesús, xdiaa Davi, baya dunujn!

²⁸ Chi badxin Jesús lod zobjaman, dxel bibig ree bén guin lojman, abi' gunabdiidxaman loj reeman, rëbaman:

—¿Rliladxidi ya guial zile' yayünan lëjt?

Badxi' reeman laan rëb reeman:

—Raliduladxan, Dad.

²⁹ Dxel bagaal Jesús guiaaloj reeman, rëbaman:

—Gac zi'c rliadxidi.

³⁰ Abi' bayajc guiaaloj reeman, dxel rëb Jesús loj reeman:

—Ad bal chu loj guiëbidi guial bayajc guiaalojdi.

³¹ Per naabzi baza reeman yagaj, guzuloj catie'ch reeman diidx guidib niz yagaj ni been Jesús.

Rayÿjn Jesús tijb bengop

³² Chi baza ree bén bayÿjn Jesús guiaaloj, dxel bidxinnë ree bejn tijb bengop, yu' xindxab luxdooan. ³³ Abi' guloxzi babëë Jesús xindxab guin luxdoo bengop guin, laa guzuloj gajc caneeman. Abi' dád badxaloj ree bejn, rëb reeman:

—Ad goct waguiaa ree lasa' milagr guie niz Israel.

³⁴ Per ree bénfarisew rëb reeman:

—Bén guin rabëë xindxab luxdoo ree bejn por xguialrniabee gajc xindxab rniabee ree xindxab.

Raya Jesús bejn ree

³⁵ Wej Jesús gra ree ciuda në ree guiedx ni riga' niz yagaj, abi' beegaj lod rejman ruman lën ree yadoo persi rulüüman bejn ree xtiidx Dios, rëbaman loj reeman xhienaag rniabee Dios, rayÿjn tëëman graloj guialrdoob në graloj guialguijdx ni rajc ree bejn. ³⁶ Chi baguiaa Jesús benzien guin ree, bayaman laa reeman, guial dád naya riga' reeman, riga' reeman zi'c xiil ad rya'pt. ³⁷ Dxel rëbaman loj ree xbejnman:

—Walican zien bejn rën gucaagdiajg xtiidx Dios, per ad zient bén gulüü laa reeman yu'. ³⁸ Zeel gol gunab loj Dios din guixhiaalaman mazri ree bén gulüü laa reeman.

10

Gulej Jesús chiptio'p ree apóstoles (Mr. 3:13-19; Lc. 6:12-16)

¹ Gurejdx Jesús chiptio'p ree xbejnman, abi' badëëman gualrniabee loj reeman din yabëë reeman xindxab luxdoo ree bejn din yayÿjn tëë reeman bejn ree graloj guialrdoob në graloj guialguijdx.

² Bén guie ree naj guidixiptio'p ree xi apóstoles Jesús: Simón bén gulëëljaman Béd, con bijchaman Andrejs, në Jacob con Waj, bén naj ree xi'n Zebedeo. ³ Në Felip, Tol, Tumajs con Matew bén baquijx impuest, nëtëë Jacob xi'n Alfeo con Lebeo bén la gajc Tadeo ⁴ në Simón bén bi'ch loj ree bén Cananistas con Judas Iscariote bén yayü Jesús.

*Rxhiaal Jesús gra ree xbejnman chigliüü reeman xtiidx Dios
(Mr. 6:7-13; Lc. 9:1-6)*

⁵ Chi guxhaal Jesús guidxiptio'p ree xbejnman, rëbaman loj reeman:

—Ad chedi niz lod zojb ree bën ad najt bën Israel, ni'qui ree guiedx riga' niz Samaria, ⁶ gol chejli niz lod zojb ree bën Israel bën ad zinalt ree xnejz Dios. ⁷ Gol güjdx loj reeman guial ma zëed gajxh xguialrniabee Dios. ⁸ Gol bayüjn bënragxuu ree, gol basban bën ma güjt ree, gol bayüjn bën rajc ree guialgüjdx la lepra, gol babëë tëë xindxab luxdoo ree bejn. Zi'cgajc cwa' lagajdi guialrniabee, ziangajc yayüjndi bejn lagajzi.

⁹ Ad chinëdi or, ni'qui plajt, ni'qui cobr, ¹⁰ ni'qui guijxh. Ad bal chinë stib nejj xabidi, ni'qui stib nejj xgurëchidi, ni'qui yagrliaidxidi, din bën rüjn dxiin rayal guidëed ree bejn ni gawaman.

¹¹ 'Chi guidxindi tijb guiedx o tijb ciuda, gol gule'c ruson chu bën naj benza'c yaya'ndi lidx, yagaj gol baya'n xt chi yazadi luguiedx guin. ¹² Abi' chi chu'di lënu guin, gol güjdx loj ree bën zojb yagaj: “Yabe'cdxe Dios luxdoodi.”

¹³ Bal rayal reeman guialnaza'c guin, zaya'nan con laa reeman guiáad bal id rayal reeman laan zayejcan con lëjt. ¹⁴ Guiáad bal yu' guiedx o yu ya lod ad raca't reeman lëjt o bal id rën reeman gucaagdiajg reeman ni guiëbidi, gol baza yagaj, gol gudxijp guxyuj guia'di zi'c tijb sen guial ad bazoobt reeman xtiidxidi. ¹⁵ Naj rni lëjt guial dxej ni yadëed ree bejn cwent loj Dios, mazri casti narooob yayal reeman guial loj ree bën Sodoma në Gomorra.

Guialzi ni zëed

¹⁶ Rëb tëë Jesús loj ree xbejnman:

—Gol bacaagdiajg ni rnin, naj rxhial lëjt zi'c ree xiil loj ree cuyojt. Zeel gol gojc nasin zi'c bëel, gol gojc tëë nadoo zi'c palom. ¹⁷ Gol gojp cudad din zayü ree bejn lëjt loj ree guxtis, zaguijn reeman lëjt lën ree yadoo. ¹⁸ Abi' xt chinë reeman lëjt loj ree gobernador në loj ree rey guial rliiladxidi naj, zian güdi da diidxan loj reeman në loj ree bën ad zinalt xnejz Dios. ¹⁹ Per chi chinë reeman lëjt loj guxtis, ad chu'di xgab xhie guinieedi xhie tëë naag guinieedan, din chi guidxin hor guinieedi, Dios yazaladx lëjt diidx ni guinieedi. ²⁰ Din ad lëjtтан guiniee, xSprijt xDadidi Diosan guiniee por lëjt.

²¹ 'Zadxin dxej yayü ree bejn laagajc bijch reeman par guiët reeman. Guiáad ree dad yayü laagajc xi'n reeman, abi' ree bejn zadxe'ch xdad reeman në xniaa reeman abi' yayü reeman laa reeman par guiët reeman. ²² Gra bénguidxliuj guidxe'ch lëjt guial najdi da bejnman, per bën sudxi'ch loj guial rliiladxaman naj xt dxej chigra guibanman, laaman yayal xanyabaa. ²³ Chi sunal reeman lëjt tijb luguiedx par güün reeman lëjt xhienin, gol chej stijb guiedx, din naj rni lojdi, ad warat xguiedx Israel chedi chi gui't Bén guxhaal Dios.

²⁴ 'Tijb bejn ad mast lasajc loj xmextraman, ni'qui tijb mojs ad mast lasajquix loj xpatronx. ²⁵ Bën cusiid rayal xhienladxaman chi ma rajcaman zi'c rajc xmextraman guiáad tijb mojs rayal xhienladxix chi ma najx zi'c xpatronx. Nacli naj rniabeen lojdi, gulëläj ree bejn naj Beelzebú, diidxgui lëjt najdi da bejnman.

*Chu rayal guidxeb bejn
(Lc. 12:2-9)*

²⁶ Ad guidxebidi bejn ree, din achet ni ralan yu' ni ad zaguiet, ni'qui tijb ni naguie'ch ad yu't ni ad zagbeet bejn. ²⁷ Ni canin lëjt naguie'ch, gol güjdxan loj ree bejn, guiáad ni canin lëjt ralan, gol güjdxan loj gra ree bejn. ²⁸ Ad rdxebidi

bén rën ree gugÿjt lëjt. Din zile' gugÿjt reeman xcuerpidi, per xsprijtidi ad zile't gugÿjt reeman laan. Gol bidxebli Dios din laaman zile' gunijt xcuerpidi abi' guixhiaalaman xsprijtidi gabijl.

²⁹ Lëjt ragbee guial biguijndoo ree ad lasajct reeb wayëjx, per ni'qui tijb reeb ad zëjtt sin xpermis xDadidi Dios. ³⁰ Guiáad lëjt xt guidxguijquidi graczan nayab loj Dios. ³¹ Zeel ad rdxebidi din mazri lasajquidi guial loj zien da't ree biguijndoo.

Bén rëb loj ree bejn guial najman xbejn Jesucrist
(Lc. 12:8-9)

³² 'Bén guiëb niz loj ree bejn guial da bejnanan, ziangajc naj guië loj da Dadan Dios bén yu' xanyabaa guial da bejnanan. ³³ Per bén guiëb niz loj ree bejn guial ad da bejntanan, ziangajc guië loj da Dadan Dios bén yu' xanyabaa guial ad da bejntanan.

Por Jesús rlia' lasa' ree bejn
(Lc. 12:51-53; 14:26-27)

³⁴ Rëb tëë Jesús:

—Ad zialtan par yabecdxen luxdoo bejn, zialan din guial chililadx reeman naj chu' wadijl. ³⁵ Din guial chililadx bejn naj, zadxe'ch xinguaaw xdadix, guiáad biingunaa zadxe'ch xniam, abi' biinwalidx zadxe'ch xnasuegrim. ³⁶ Abi' laagajc bén zobj ree lënülixidi guidxe'ch lëjt.

³⁷ 'Bén rën xdad o xniam mazczi guial lon, ad zajct gacaman da bejnan. Ziangajc bén rën xi'ngaan o xi'ndxa'p mazczi guial lon, ad zajct gacaman da bejnan. ³⁸ Bén rën guidnal naj, abi' ad rëntaman sagdiajman por naj, ad zile't gacaman da bejnan. ³⁹ Bén rniajchi' gualnaban rajpaman loj guidxliuj guie, zadxin dxej gunijtaman laan, per bén guiët por naj, zajpaman gualnaban tiblyaaa con Dios.

Ni tia' ree bejn
(Mr. 9:41)

⁴⁰ 'Bén ridxga' lëjt, najn ridxga'man, guiáad bén ridxga' naj, bén guxhaal najn ridxga'man. ⁴¹ Bén ridxga' tijb bén rudëë xtiidx Dios loj ree bejn, guial zëëdaman por Dios, zaca'man lasa' ni rayal tia' bén guin loj Dios. Ziangajc bén ridxga' tijb bén naban zi'c rën Dios, zaca'man lasa' ni rayal tia' bén guin loj Dios. ⁴² Abi' chutëëz bén gudëëd majsi tib xijgzi nijs naalyuj loj bejn guial najman da bejnan, naj rni lojdi guial yu' ni gudëëd Dios tia' reeman.

11

Bigneenë ree xbejn Waj Jesús
(Lc. 7:18-35)

¹ Chi gulox rëb Jesús loj guidxiptio'p ree xbejnman con ree nin chiguiëen reeman, dxel bazaman yagaj ziglüüman bejn ree xtiidx Dios loj ree guiedx riga' niz yagaj.

² Abi' Waj, la'tgaj yu'man ladxguiib, cwa'man ruson gra ree ni cayÿjn Jesús. Dxel guxhaal tio'p choon ree xbejnman, ³ bignabdiidx reeman lojman, rëb reeman:

—¿Lüj naj Cristo ya bén naj gui't, o yalëjzan ben ren ya?

⁴ Dxel rëb Jesús loj reeman:

—Gol chej gol güjdx loj Waj ni cuguiaadi në ni cucaagdiajguidi. ⁵ Gol güjdx lojman guial ma ruguiaa ree bénlutia'p, ma rajc rza ree bencoj, ma bayajc tëë ree bén rajc gualgüjdx la lepra, ma riguiëjn ree bén nacwa't guiáad ree

bengüt ma baban reeman, abi' ree bén prob ma cagueijn reeman xtiidx Dios.
⁶ Xiquilbaa ree bén ad zucwëzt chililadx naj.

⁷ Chi baza ree bén guxhaal Waj, dxel guzuloj Jesús caneeman loj ree bejn xcwent Waj, rëbaman:

—¿Chu naladxidi naj bén biquiaadi loj yujbidx? ¿Naladxidi ya najman zi'c tijb biqui ni runiib bi? ⁸ ¿O xhienaag naj bén biquiaadi? ¿Najman tijb bén najcw lajd zagdx ya? Lëjt ragbee guial bén rajcw ree lajd zagdx lën palas zobj reeman. ⁹ ¿Chuzu biquiaadi? ¿Tijb bén rudëe xtiidx Dios loj ree bejn ya? Per naj rni lojdi guial biquiaadi tijb bén mazri zobjloj guial loj bén rudëe xtiidx Dios loj ree bejn. ¹⁰ Wajn din laaman naj ben ruza't loj xtiidx Dios lod rëb:

Naj rxhial tijb bén ned lojl,
 ben güünchaaw xnejzil.

¹¹ Naj rni lëjt, loj graczi ree bénguidxliuj, ad wayut bén mazri zobjloj guial loj Waj. Per majsi zian, bén ad zobjlojt loj xguialrniabee Dios, laaman mazri zobjloj guial loj Waj.

¹² Diizd chi bi't Waj xt yan, zien bejn rüjn da't nagueijn chu' lod rniabee Dios. Abi' ree bén rüjn da't nagueijn laa reeman chu' lod rniabeeman.

¹³ Diizd ley badëe Dios loj Moisejs con loj ree bén badëe xtiidx Dios loj ree bejn, xt Waj, laa reeman guneec xcwent xguialrniabee Dios. ¹⁴ Abi' bal chililadxidi ni ganin lëjt, naj rni guial Wajn naj Elías bén badëe xtiidx Dios loj ree bejn. ¹⁵ Bén rën ree gucaagdiajg, gol bacaagdiajg.

¹⁶ ¿Xhienaag ganin lëjt naj ree bén riga' loj guidxliuj guie yan? Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: ¹⁷ “Bacwejdxan bidxa, per ad baya'tidi, badoolan ni naya ree per ad biintidi.” ¹⁸ Din bi't Waj bén baroobnijs bejn ree, ad rawtaman ad rë' tëtaman vin, abi' rëbidi xindxab yu' luxdooman. ¹⁹ Yan, bi't Bén guxhaal Dios, rawaman rë' tëeman vin abi' rëbidi nalaman ruladx tëeman guië'man, ruchajg tëeman bëndol ree con ree bén ruquijx impuest. Per ree bén ma ca' xguialrniabee Dios, por laa reeman rguien guial gra ni rüjn Dios naj zagdx.

Bén ad bazoobt ree xtiidx Dios

(Lc. 10:13-15)

²⁰ Dxel guzuloj Jesús cadilëman bén zobj ree guiedx lod beenman mazri zien ree milagr. Din bén guin ree ad bayüjnt reeman xgab por xtol reeman, abi' rëbaman loj reeman:

²¹ —¡Proba lëjt Bén Corazín! ¡Proba lëjt Bén Betsaida! Din bal luguiedx Tiro në luguiedx Sidón niajc ree milagr ni goc ladxidi, diizd gocli nayüjn reeman xgab por xtol reeman, niajcw reeman lajd ya's nuroob tëe cobdëj guijc reeman zi'c tijb sen guial ma bayüjn reeman xgab por xtol reeman.

²² Per rnin lëjt guial dxej yadëed ree bejn cwent loj Dios, mazri casti narooob yayalidi guial loj ree bén Tiro në ree bén Sidón. ²³ Guiáad lëjt Bén Capernaum, ad naladxidi yayalidi xanyabaa, lëjt yayal gabijl. Din bal luguiedx Sodoma niajc ree milagr goc ladxidi, xt yan sta yu' guiedx guin. ²⁴ Per rnin lojdi guial dxej yadëed ree bejn cwent loj Dios, mazri casti narooob yayalidi guial loj ree bén Sodoma.

Gol guda lon din yaziiladxidi

(Lc. 10:21-22)

²⁵ Lën ree dxejzii rëb Jesús:

—Dad, ruzatan lüj zagdxé, din ni baquie'chil loj ree b́en rajc ńe loj ree b́en rignia', laan ma balüül loj ree b́en ad rajct. ²⁶ Zian gojc Dad, din zian guyénl.

²⁷ 'Da Dadan banee gra lon. Abi' achut núnbee Jesucrist xi'n Dios, tijbzi Dios, achu t́eet núnbee Dios, tijbzi Jesucrist xi'nman, con ree b́en ŕenman güünbee Dios. ²⁸ Gradi, b́en ma badxag ŕüjn xhienin din yaya'ndi zagdxé loj Dios, ma badxag t́eedi nüü xtolidi. Gol guda lon, naj gune guialraziiladx lojdi. ²⁹ Gol bazoob da diidxan, gol basiid t́eé gaquidi benza'c ńe b́en chaawladx zi'c naj, din yabedxe luxdoodi loj Dios. ³⁰ Din ad nawëégt guial guzoobidi da diidxan, ad nawëégt t́eet guial güündi zi'c ŕenan.

12

Rgui'ch ree xbejn Jesús trigo dxej raziiladx ree b́en Israel
(Mr. 2:23-28; Lc. 6:1-5)

¹ Tijb dxej raziiladx ree bejn, chi cadéd Jesús con ree xbejnman loj tijb guiniaa lod yu' trigo, dxel calaan ree xbejnman abi' guzuloj cagui'ch reeman trigo persi cayaw reeman laan. ² Abi' chi baguiaa ree b́enfarisew ni cayüjn reeman, ŕeb reeman loj Jesús:

—Baguiaa ree xbejnl nial cayüjn reeman ni ad rayalt güün reeman dxej raziiladx ree bejn.

³ Dxel ŕeb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman? ⁴ Guyu Davi ĺen xyadoo Dios abi' cwa'man guidxtil ma nagle' ree gudawaman con ree xcompniaraman, ni ad rayalt niajw reeman, bixhiosi ree rayal gaw laa ree. ⁵ ¿O gadidi gool loj xley Moisejs ya guial achet dol ŕüjn ree bixhioz chi ŕüjn reeman dxiin ĺen yadoo majsi ad raziiladxt reeman dxej raziiladx ree bejn? ⁶ Abi' naj rni ĺéjt guial naj, b́en za'né ĺéjt mazri lasajcan guial loj yadoo. ⁷ Bal rignia'di xhie ŕen guiéb loj xtiidx Dios lod ŕeb: “Ni ŕenan naj guial yaya lasa'di, ad guial guneetidi gon lon.” Bal rignia'di diidx guin ree ad zudxiibtidi guijc ree b́en ad rajpt dol. ⁸ Abi' B́en guxhaal Dios rajpaman guialrniabee dxej raziiladx ree bejn.

Rayajc tijb b́en ńéjt tibladyaa
(Mr. 3:1-6; Lc. 6:6-11)

⁹ Chi gudéd gojc zian, dxel baza Jesús abi' guyuman ĺen tijb yadoo naj niz yagaj. ¹⁰ Ĺen yadoo guin za' tijb b́en ńéjt tibladyaa. Abi' guial ree b́enfarisew raguuil reeman mod xhie gudxiib reeman guijc Jesús, dxel gunabdiidx reeman lojman, ŕeb reeman:

—¿Zile' yayüjn bejn tijb b́enragxuu dxej raziiladx bejn ya?

¹¹ Badxi' Jesúsán ŕebaman:

—Bal tijb ĺéjt rajp tijb xiil, abi' yabib ĺen bala' dxej raziiladx bejn. ¿Nid zabéédi laab dxej guin ya? ¹² ¿Wen id mazri lasajc tijb bejn guial loj tijb xiil ya? Zeel achet güünan zajc güün bejn ni naj zagdxé dxej raziiladx bejn.

¹³ Dxel ŕeb Jesús loj b́enragxuu yaa guin:

—Basli yaal.

Abi' basli yaa b́en guin, loj hor ziigajc bayajc yaaman zi'c naj stibladan.

¹⁴ Per chi barii ree b́enfarisew guin ĺen yadoo guin, guzuloj cayü reeman diidx xhienaag güün reeman din gugüjt reeman Jesús.

B́en gule Dios

¹⁵ Chi gogbee Jesús zian, laa zia gajcaman, abi' zien ree bejn binal laaman. Dxel bayüjnman gra ree b́enragxuu, ¹⁶ abi' gunabeeman laa reeman chit́eé

guitie'ch reeman diidx chu bayüjn laa reeman. ¹⁷ Zian guzobj xtiidx Isaías, bën badëe xtiidx Dios loj ree bejn, chi rëbaman:

¹⁸ Gol baguiaa, bën guie naj bën gulen

din güünman naj sirv,

laaman naj bën rën da'tan,

rabaanë' tēen laaman.

Gudë da Sprijtan lojman

abi' guiëbaman loj ree bénguidxliuj

xhienaag naj da gualrniabeen.

¹⁹ Achut tilnëman,

ad zabixdiaj tētaman

achut tēt guien cha'man niz lunejz.

²⁰ Ad zudëedtaman casti bën ad za'dxi'cht

ree loj da nejzan, nè ree bën ad ridxga'za'ct naj,

xt chi ma beenman gan gac gualguxtis.

²¹ Abi' xt ree bën ad najt bën Israel

cwëz reeman yabëëman laa reeman loj dol.

Rëb ree bejn ca' Jesús xgualrniabee Beelzebú

(Mr. 3:19-30; Lc. 11:14-23; 12:10)

²² Binë ree bejn tijb xinguaaw lod za' Jesús, yu' xindxab luxdoox, natia'p lojx naj tēex gop. Dxel bayüjn Jesús laax abi' guzuloj rnieex ruguiaa tēex.

²³ Graczi ree bejn dád badxaloj reeman, abi' rëb reeman:

—¿Id bën guinan zëed loj xdiaa Davi ya?

²⁴ Chi biguiejn ree bënfarisew zian, dxel rëb reeman:

—Bën guin rabëë xindxab luxdoo ree bejn por xgualrniabee Beelzebú xin rniabee ree xindxab.

²⁵ Per Jesús gogbee gajcaman xgab cayüjn reeman, abi' rëbaman:

—Gra nacion o ciuda bal id nadxag riga' bejn, rlia' lasa' reeman, ziangajc tijb famil bal id nadxag riga' reeman, rlia' lasa' reeman. ²⁶ Ziangajc bal xindxab su contr laagajquix, nayob nitix. ²⁷ Lëjt na guial naj rabë xindxab luxdoo ree bejn por xgualrniabee Beelzebú, per bal zianan, ¿chuza rudëë guialrniabee loj xbejn di din yabëë reeman xindxab? Zeel laagajc reeman rulüü guial ad laat rnieedi. ²⁸ Per naj, bal por xSprijt Dios rabën xindxab luxdoo ree bejn, rën guiëban guial ma za'në xgualrniabee Dios lëjt.

²⁹ 'Din ¿xhieza naag chu' tijb bejn lidx tijb bën gojl par cwanman ni rajpaman, bal id zaxhixgajman laaman? Zian güünman din chile' cwanman ni rajpaman.

³⁰ Bën ad za't con naj, za'man contr naj. Guiáad bën ad ruto'pt bejn par naj, rtie'chaman laa reeman.

³¹ 'Zeel rnin lëjt: Züjn Dios perdon xhietëez dolan, nè ree diidxguijdx ni rnieetzi ree bejn, per ad züjntaman perdon bën rnieeguijdx ree xSprijt Dios.

³² Chutëez bën guinieeguijdx Bën guxhaal Dios, zajcaman perdon, per bën guinieeguijdx xSprijt Dios ad zajctaman perdon yan, ni'qui chi yaguialan.

Nünbee bejn tijb yag por ni rtia lojn

(Lc. 6:43-45)

³³ Lëjt ragbee, bal tijb bejn ruzuj tijb yag zagdxe, rtia ni zagdxe lojn, per bal guzujman tijb yag guiidx, rtia ni guiidx lojn. Din tijb gaj yag nünbee bejnan por ni rtia lojn. ³⁴ ¡Xi'n xindxab! ¿Xoza guinieedi diidx zagdxe ree awa benmal lëjt? Din ni yu' luxdoo bejn laan rnieeman. ³⁵ Benza'c rnieeman diidxza'c, din laan yu' luxdooan. Guiáad benmal rnieeman diidxmal din

laan yu' luxdooan. ³⁶ Per naj rni lëjt guial dxej ni güün xguialguxtis Dios, gra ree bejn yadëed cwent lojman por gra ree diidxguijdix ni rníee reeman. ³⁷ Din por xtiidx gajc bejn guiguien bal rayalaman xcasti Dios o ad rayaltaman laan ya.

Rniab ree bënfarisew tijb milagr

(Mr. 8:12; Lc. 11:29-32)

³⁸ Yu' ree bënfarisew con ree mextr ni rajc ley, rëb loj Jesús:

—Mextr, rayënan yaguaian güünl tijb milagr.

³⁹ Badxi' Jesúsán rëbaman:

—Lëjt benmal, bën ad rüjnt ni rën Dios abi' rëndi günan tijb milagr. Per achetri guguaadi, tijbzi zi'c guzac Jonás bën badëe xtiidix Dios loj ree bejn.

⁴⁰ Din zi'c guyu Jonás lën bëjl narooob choon dxej choon guiaal, ziangajc Bën guxhaal Dios, choon dxej choon guiaal chu'man lën baa. ⁴¹ Abi' chi yadëed ree bejn cwent loj Dios, bën guban ree Nínive zaban reeman abi' guiëb reeman guial ree bën riga' yan, yayal reeman xcasti Dios. Din bën Nínive ree bayejc reeman loj Dios chi bacaagdiajg reeman xtiidix Dios ni guneé Jonás. Abi' yan, bën za'në lëjt mazri lasajcaman guial loj Jonás. ⁴² Ziangajc bën goc reina niz sur, zabanman chi yadëed ree bejn cwent loj Dios, dxel guiëbaman guial ree bën riga' yan, yayal reeman xcasti Dios. Din laaman dád zijt guzaman persi bicaagdiajgaman xguialrajc rey Salomón. Abi' yan, bën za'në lëjt mazri lasajcaman guial loj Salomón.

Xindxab ni rayejc

(Lc. 11:24-26)

⁴³ Chi rariü tijb xindxab luxdoo tijb bejn, abi' rzax niz loj yujbidx rguilix lod yaziiladxix. Abi' chi ad rdxejlt lod yaziiladxix, dxel rüjnx xgab naladxix:

⁴⁴ “Zagdxeli yaye'can lod guzaan.” Abi' chi rayejquix ruguiaax luxdoo bën guin najn zi'c tijb lënü lod achut zojb, lod bilioob lod najcchaaw tëë. ⁴⁵ Dxel rica'x za gajdx xindxab naj ree mazri xinmal guial lojx. Abi' ru gra reex luxdoo bën guin. Dxel mazri benmal gacaman guial loj ni gocaman yaloj. Ziangajc sac ree benmal riga' loj guidxliuj yan.

Xniaa Jesús con ree bijchaman

(Mr. 3:31-35; Lc. 8:19-21)

⁴⁶ Sta canee Jesús loj ree bejn, bidxin xniaaman con ree bijchaman, za' reeman lule', rën reeman guinieenë reeman laaman. ⁴⁷ Abi' yu' tijb bën rëb lojman:

—Laa xniaal con ree bijchil za' lule' guin, rën reeman guinieenë reeman lüj.

⁴⁸ Per Jesús badxi'man xtiidix bën guin rëbaman:

—¿Chu naj da nan chu tëë ree nin naj da bichan?

⁴⁹ Dxel con yaaman balüü ree xbejnman rëbaman:

—Bën guie ree naj da nan në ree da bichan. ⁵⁰ Din chutëéz bën rüjn zi'c rën da Dadan bën yu' xanyabaa, laaman naj da bichan, da zanan, në da nan.

13

Xcwent bën rtie'ch bin

(Mr. 4:1-9; Lc. 8:4-8)

¹ Dxejzii brüi Jesús yu lod zojbaman, bisobaman ro' nijs Galilea. ² Abi' guial dád zien ree bejn bido'p yagaj, beenan naguiejn wë'p Jesús loj tijb barcw dxel gurejman lojn, guiáad ree bën guin za' reeman ro' nijs guin. ³ Zien ree

ni guzuloj culüüman laa reeman, per con ganax zi'c cwent ree, rëbaman loj reeman:

—Tijb bejn, briiman bigtie'chaman bin loj xguiniaaman. ⁴ Chi catie'chaman bin guin, ta'nan biajb loj nejz, abi' bi't ree biguijn gudaw reeb laan. ⁵ Sta'nan biajb loj ree guiaj lod ad riga't zien yuj, cari gulejnan guial ad zient yuj riga'. ⁶ Per chi brieri gubijdx, baze'can laan, abi' guial ad yu't liujn gubidixan. ⁷ Dxel sta'nan biajb loj ree yaquiejch, chi guni's ree yaquiejch guin banidloj reen laan. ⁸ Per sta'nan biajb loj yuj za'c, abi' dád gojcan. Yu'n cwa tibgayuu bin loj, yu'n cwa gayojn yu' tēen cwa gajlbichii. ⁹ Bén rēn gucaagdiajg, gol bacaagdiajg.

Chexc zeel ruliü Jesús con ni naj ree zi'c cwent

(Mr. 4:10-12; Lc. 8:9-10)

¹⁰ Dxel gubig ree xbejn Jesús lojman rēb reeman:

—¿Chexquiza zeel ruliü bejn ree con ganax zi'c cwent ree?

¹¹ Badxi' Jesús laan rēbaman:

—Lējt, Dios ma basa'n lējt din chignia'di xhienaag naj xguialrniabeeman, per bén guin ree ad basa'nt Dios laa reeman chignia' reeman laan. ¹² Din Bén ma rignia', gusnuu chignia'man mazri, abi' zignia' da'taman. Per bén ad rignia'za'ct ad rüjn tēētaman naguiejn chignia'man mazri, xt ta'n ni rignia'man zayanladxaman. ¹³ Zeel rniē'n laa reeman con ganaxzi zi'c cwent ree. Din majsi rani loj reeman per rüjn reeman zi'c bén ad ruguiaat, abi' majsi rigueijn reeman per rüjn reeman zi'c bén ad riguejnt, bén ad rignia' tēt. ¹⁴ Zian rzojbx xtiidx Isaias, bén badēē xtiidx Dios loj ree bejn, chi rēbaman:

Majsi rigueijn reeman, per achetczi chignia' reeman.

Abi' majsi rani loj reeman, per ad ruguiaat reeman.

¹⁵ Din ma been luxdoo reeman gojl,

nayaaw guidiajg reeman,

nayaaw tēē guiaaloj reeman.

Chitēē guguaa reeman,

guiguiejn reeman,

chignia' tēē reeman.

Din ad rēnt reeman gui't reeman lon din gūnan laa reeman perdon.

¹⁶ Per xiquilbaadi cuguaadi cagueijn tēēdi. ¹⁷ Din naj rni lojdi guial dád zien ree bén badēē xtiidx Dios loj ree bejn, nē ree bén guban zi'c rayal, guyēn reeman nuguiaa reeman ni cuguaadi per ad baguiaat reeman laan. Guyēn reeman niguiejn reeman ni caguejndi per ad biguejnt reeman laan.

Rusignia' Jesús xcwent bén rtie'ch bin

(Mr. 4:13-20; Lc. 8:11-15)

¹⁸ Yan gol bacaagdiajg xhie rēn guiēb ni rnin lojdi xcwent bén bigtie'ch bin. ¹⁹ Bén rigueijn xtiidx Dios abi' ad rignia'taman laan, laaman naj zi'c bin biajb loj nejz, guial laa ri't gajc xindxab rquiedix ni bacaagdiajgaman. ²⁰ Guiaad bin biajb loj ree guiaj naj zi'c bén rigueijn xtiidx Dios, abi' dád nix ru luxdooan rigueijnman laan, ²¹ per guial najman zi'c cwaan ni ad yu't xliuj, ad rzudxi'chtaman. Chi rzagdiajman o rdxē'ch ree bejn laaman por xtiidx Dios, laa rusa'n gajcaman ni rliadxaman. ²² Abi' bin biajb loj ree yaquiejch naj zi'c bén rigueijn xtiidx Dios, per guial mazri ruman xgab por ni yu' loj guidxliuj guie, rusquiee guialnaza'c riga' loj guidxliuj guie laaman, abi' zianzi rucwēēz rucaagdiajgaman xtiidx Dios achet sirv been ni bacaagdiajgaman. ²³ Per bin biajb loj yuj za'c naj zi'c bén rigueijn xtiidx Dios

abi' rignia'man laan rüjn tēēman zi'c rēn Dios, zi'c ni cwa tibgayuu bin loj o zi'c ni cwa gayojn o ni cwa gajlbichii.

Trigo con gui'xhguijdx

²⁴ Be Jesús stijb ni naj zi'c cwent loj reeman, rēbaman:

—Xguiarlriabee Dios naj zi'c tijb bēn badxe' ganax bin zagdxē loj xguiniaa. ²⁵ Per la'tgaj naga'yējs gra reeman, bidxin bēn rdxe'ch laaman guxūbinman gui'xhguijdx ree loj trigo guin dxel ziaman. ²⁶ Abi' chi gulen trigo guin brii tēē dojn lojn nē ree gui'xh guin ma yu' lojn. ²⁷ Dxel bicojn ree xmojs bēn naj xguiniaa laan laaman, rēb reeman: “Dad ħnid ganax bin zagdxē badxe' loj xguiniaal ya? yan, ħbanza guza gui'xh yu' lojn?” ²⁸ Badxi'man laan rēbaman: “Wed tijb bēn rdxe'ch naj bidgadxe' laan.” Dxel gunabdiix ree mojs guin lojman rēb reeman: “ħXhie nal zudojxhan gui'xh guin ree ya?” ²⁹ Dxel rēbaman loj reeman: “Yajqui, chitēē guial gaxhidi gui'xh guin gaxhidi nē trigo guin. ³⁰ Zagdxeli gol basa'nan din ni'snēn trigo guin xt chi ma gojcan. Abi' chi guidxin dxej yado'p trigo guin guiēn loj ree bēn guto'p laan din yalojxgaj gui'xh guin yato'p reeman din guixhii reeman lēnan zianz che'can. Dxelri yato'p reeman trigo guin din cu'chaaw reeman laa reen lod ruchaaw reen.”

Xcwent xhaj moxtajs

(Mr. 4:30-32; Lc. 13:18-19)

³¹ Be Jesús stijb ni naj zi'c cwent loj reeman, rēbaman:

—Xguiarlriabee Dios naj zi'c xhaj moxtajs, ni rudxe' tijb bejn loj xguiniaaman. ³² Abi' bin guin naj mazri ni wit loj gra ree bin, per chi rni'san laan rajc mazri ni narooob loj gra ree cwaan. Abi' guial narooob da't rajcan, xt rüjn xguixbitia's ree biguijn xidxan.

Xcwent levadur

(Lc. 13:20-21)

³³ Be tēē Jesús stijb ni naj zi'c cwent loj reeman, rēbaman:

—Xguiarlriabee Dios naj zi'c levadur ni rugo'ch tijb bēngunaa choon midid harin, abi' laan rusaaguij gra cob guin.

Chexc zeel ruliū Jesús con ni naj ree zi'c cwent

(Mr. 4:33-34)

³⁴ Gra ree ni balüū Jesús bejn ree, balüūman laa reeman con ganax ree ni naj zi'c cwent, achet balüūman laa reeman con ni ad najt ree zi'c cwent.

³⁵ Zian gojc persi guzobj xtiidx bēn badēē xtiidx Dios loj ree bejn, chi rēbaman: Con ganaxzi ni naj ree zi'c cwent gulūn bejn ree, guiēn loj reeman ni gad reeman gagbee diizd chi gocchaaw guidxliuj.

Rusignia' Jesús xcwent gui'xhguijdx

³⁶ Chi ma bazaadiidxnē Jesús benzien guin ree, dxel bayuman lēnū con ree xbejnman, abi' gunabdiidx reeman lojman, rēb reeman:

—Bassignia' dunujn xcwent gui'xhguijdx ni gulen loj guiniaa guin.

³⁷ Badxi' Jesúsān rēbaman:

—Bēn rudxe' bin zagdxē guin naj Bēn guxhaal Dios, ³⁸ abi' guiniaa guin naj guidxliuj. Guiáad bin zagdxē guin naj ree bēn naj par loj xguiarlriabee Dios. Abi' ree gui'xh guin naj bēn naj ree par xindxab. ³⁹ Guiáad bēn rdxe'ch, bēn guxūbin trigo guin naj xindxab. Abi' guial rado'p gualnaza'c guin rēn guiēb chi nit guidxliuj, guiáad ree bēn yato'p gualnaza'c guin naj ree xianjl Dios. ⁴⁰ Zian zi'c rado'p ree gui'xhguijdx guin par che'c reen, zian gac chi nit guidxliuj. ⁴¹ Bēn guxhaal Dios guixhiaal ree xianjlaman din yabēē reeman bēn rayal ree yarii loj xguiarlriabeeman, bēn ruzaalguiiw bejn ree din giūn

reeman dol në gra ree bën cayüjn dol. ⁴² Abi' guzaal reeman laa reeman loj bajl lod goon reeman xt gaw lay reeman. ⁴³ Dxel bën naban ree zi'c rën Dios, guidiin reeman bacha' loj xguialrniabee xDad reeman Dios, zi'c rdiin gubijdx bacha'. Bën rën gucaagdiajg, gol bacaagdiajg.

Xcwent ni lasajc

⁴⁴ Xguialrniabee Dios naj zi'c tijb ni lasajc da't, ni naguie'ch loj tijb guidxliuj. Abi' rdxejl tijb bejn laan zianz ruquie'chaman laan stijb, lod gulëëman laan. Abi' dád rabaaman ruto' gra ni rajpaman persi rsiiman guidxliuj guin.

Xcwent perl

⁴⁵ Rni tëën lëjt: Xguialrniabee Dios naj zi'c tijb bën rguuil perl zagdxe din siiman laan. ⁴⁶ Chi rdxejlaman tijb perl lasajc, ruto' gra ni rajpaman abi' rsiiman laan.

Xcwent guijxh rniaaz bëjl

⁴⁷ Abi' tëë xguialrniabee Dios naj zi'c tijb guijxh ni ruzaal reeman loj nijs abi' rniaazin graloj bëjl. ⁴⁸ Dxel chi ma gudxa guijxh guin rabëë reeman laan ro' nijs guin, abi' rbej reeman rabe reeman loj bëjl guin, dxel ragu' reeman be zagdxe lën dxüm guiáad be ad najt zagdxe rusëëb reeman. ⁴⁹ Zian gac dxej nit guidxliuj, gui't ree xianjl Dios yabe reeman benmal loj ree benza'c. ⁵⁰ Abi' guzaal reeman benmal guin ree loj bajl lod goon reeman abi' xt gaw lay reeman.

Bën rbe nicüb në ni yojx

⁵¹ Dxel gunabdiidx Jesús loj ree xbejnman, rëbaman:

—¿Rignia'di gra ni canin lëjt ya?

Badxi' reeman laan rëb reeman:

—Rayignia'nan, Dad.

⁵² Dxel rëb Jesús loj reeman:

—Gra ree mextr ni rajc ley, abi' cusiid reeman xhienaag naj xguialrniabee Dios, laa reeman naj zi'c tijb bën rbe nicüb në ni yojx loj gra ni rajpaman.

Badxin Jesús Nazaret

(Mr. 6:1-6; Lc. 4:16-30)

⁵³ Chi gulox guneë Jesús loj reeman zian, zianz bazaman. ⁵⁴ Dxel badxin ladxaman, ni guzuloj culüüman bejn ree lën xyadoo reeman. Abi' dád badxaloj ree bën guin, rëb reeman:

—¿Ban guin basiidaman gra ree ni rajcaman? ¿Chexquiza zeel rajc rünman milagr ree? ⁵⁵ ¿Nid laaman naj xi'n carpinter ya, abi' xniaaman naj Li, guiáad ree bijchaman naj Jacob, Xiëb, Simón, në Judas? ⁵⁶ ¿Nid luguiedx guie zojb ree bizanman ya? ¿Banza guin basiidaman gra ree ni rajcaman?

⁵⁷ Abi' ad bidxga't reeman Jesús. Per rëbaman loj reeman:

—Bantëëz guin rajp ree bejn respejt tijb bën rudëë xtiidx Dios loj ree bejn, per ladxaman achut rajp laaman respejt ni'qui lidxaman.

⁵⁸ Abi' ad zient milagr beenman yagaj guial ad bililadxt reeman laaman.

14

Güjt Waj Bén baroobnijs bejn ree

(Mr. 6:14-29; Lc. 9:7-9)

¹ Tiampzii Herodes bën canabee niz Galilea, biguiejnman ni cayüjn Jesús.

² Abi' rëbaman loj ree xbejnman:

—Waj b́en baroobnijs bejn ree, laaman baban zatijb, zeel rajpaman guial-riabee rúnjman milagr ree.

³ Rêb Herodes zian guial laaman gunabee biniaaz Waj, abi' bixiiman con caden dxel badxe' reeman laaman ladxguiib. Been Herodes guin zian por Herodias lacheel bijchaman b́en la Felip, ⁴ guial rêb Waj guin loj Herodes:

—Ad laat guial zojbnêl laagajc lacheel bijchil.

⁵ Guyên Herodes nugýjtaman Waj, per bidxebaman xhie nýjn ree bejn laaman guial graczi reeman rêb Waj naj tijb b́en rudêed xtiidx Dios loj ree bejn. ⁶ Per chi baza' Herodes ijz, brii xi'n Herodias baya'm loj ree xbioozaman. Abi' dád bayuladx Herodes zi'c baya'm, ⁷ dxel rêb Herodes gudêedaman xhietêez ni guiniabim. ⁸ Abi' xniaam rêb lojm xhie guiniabim, dxel rêbim loj Herodes:

—Baneen guijc Waj b́en ruroobnijs bejn ree, baneen loj tijb pliajt.

⁹ Dád guyunaya rey Herodes, per guial mal baya'n reeman diidx niz loj gra ree xbioozaman, gunabeeman xsuldadaman gudêed reeman ni gunabim.

¹⁰ Dxel gunabeeman gütü' reeman guijc Waj lèn ladxguiib guin, ¹¹ abi' bidxinnê reeman laan loj tijb pliajt badêed reeman laan lojm, dxel bayümin loj xniaam.

¹² Zianz bidxin ree xbejn Waj baca' reeman xcuerpaman persi biquie'ch reeman laaman. Dxel bicojn reeman Jesús.

Ruyaan Jesús gaay mil bejn
(Mr. 6:30-44; Lc. 9:10-17; Jn. 6:1-14)

¹³ Chi gogbee Jesús zian, guyuman loj tijb barcw zêman niz lod achutdzi zojb din su laazaman. Chi gogbee ree bejn, dxel brii ladx reeman zê guia'zi reeman lod guidxinman. ¹⁴ Chi barii Jesús loj barcw guin baguiaaman b́en reexiuj ree riga' yagaj, bayaman laa reeman abi' bayünjman b́enragxuu zinê reeman. ¹⁵ Chi ma gudxe, gubig ree xbejnman lojman rêb reeman:

—Ma gudxe yan, abi' achut bejn zojb niz guie. Güjdx loj ree b́en guin ma gojl yaguiaj reeman, din che reeman guiedx lod sii ni gaw reeman.

¹⁶ Per badxi' Jesúsán rêbaman:

—Ad rúnjt naguiejn yaguiaj reeman, lëjt gol badêe ni gaw reeman.

¹⁷ Badxi' reeman laan rêb reeman:

—Per gaayzi guiadxtil naca'n con zatio'p bëjl.

¹⁸ Dxel rêb Jesús loj reeman:

—Gol tanê reen guie.

¹⁹ Dxel gunabeeman gurej gra ree b́en guin loj guixya'. Abi' cwa'man guigaay guiadxtil guin con grop bëjl guin. Dxel gules lojman xanyabaa badêeman quixtêe loj Dios, abi' gula'man guiadxtil guin badêeman laan loj ree xbejnman persi gudi's reeman laan loj gra ree b́en guin. ²⁰ Gra reeman gudaw xt bigdxinladx reeman, abi' staczi bacha reeman za chiptio'p dxüm ni baya'n. ²¹ B́en gudaw guin ree naj reeman cost gaay mil xingüiaaw garenqui ree b́engunaa con ree xindoo.

Riza Jesús loj nijs
(Mr. 6:45-52; Jn. 6:16-21)

²² Dxel gunabee Jesús xbejnman guyu reeman loj barcw din ned reeman téd gaj reeman stiblad ro' nijs guin, la'tgaj cuzaadiidx nêman benzien guin ree. ²³ Chi ma gulox bazaadiidx nêman laa reeman, dxel zê xtijbaman guijc tijb guia' din cwedx guiniabaman Dios. Chi gure guiaal xtijbzaman za' guijc guia' guin. ²⁴ Guiáad barcw guin zijt ma zên loj nijs, dád rliaro' xtüjp nijs guin

laan guial rliaj bi niz loj barcw guin. ²⁵ Chi ma cayreguiaal, zibig Jesús loj ree xbejnman rzaman loj nijs guin. ²⁶ Dxel baguiaa ree xbejnman laaman rzaman loj nijs guin, dád bidxeb reeman abi' gurixdiaj reeman rëb reeman:

—iTijb anman!

²⁷ Per guneenë Jesús laa reeman rëbaman:

—iGol bagu' luxdoodi! iNajn, ad rdxebidi!

²⁸ Badxi' Bëdan rëbaman:

—Dad, bal lüjn, gunabee gazan loj nijs guin guialan lojl.

²⁹ Abi' rëb Jesús lojman:

—Guda.

Dxel baguiaajt Bëd loj barcw guin, rzaman loj nijs guin zëman loj Jesús.

³⁰ Per chi baguiaaman bidoxhan cabi' dxel bidxebaman, abi' guial guzuloj cazëëbaman xan nijs guin guridxa'man rëbaman:

—iGognë naj, Dad!

³¹ Loj hor ziigajc basli yaa Jesús gunaazaman yaa Bëd, rëbaman lojman:

—iChexc zeel ad rliadxza'ctil, chexc zeel yu' nawëëguil?

³² Abi' chi bayë'p reeman loj barcw guin, laa bacwëëz gajc bi guin. ³³ Guiáad ree bën yu' loj barcw guin bazuxib reeman loj Jesús, rëb reeman:

—Diidxliczi lüjn naj xi'n Dios.

Rayüjn Jesús bënragxuu ree Genesaret

(Mr. 6:53-56)

³⁴ Chi gudëd reeman loj nijs guin dxel bidxin reeman xyuj ree bën Genesaret. ³⁵ Abi' ree bën niz ni bayünbee reeman Jesús, abi' guidibczi niz yagaj gutie'ch reeman diidx guial za'man ni. Dxel binë ree bejn bënragxuu ree lojman, ³⁶ guzajc reeman liaadx lojman din tiëbaman gugaal reeman majsi guia'zi xabaman. Abi' gra ree bën bagaal xabaman bayajc.

15

Ni rüjn persi rajc bejn bëndol

(Mr. 7:1-23)

¹ Bénfarisew ree con ree mextr rajc ley, bën za ree Jerusalén, gubig reeman loj Jesús abi' gunabdiidx reeman lojman, rëb reeman

² —iChexc zeel ad zinalt ree xbejnl costumbr ni basa'n dux béngulal ree? iChexc zeel ad zinalt reeman costumbr zi'c rayal gunaa reeman chi gad reeman gaw?

³ Dxel rëb Jesús loj reeman:

—Laadx léjt, iChexc zeel rüjndi xtiidx Dios tiblax persi zinal xcostumbridi?

⁴ Din Dios rëb: “Gojp respejt xDadil con xniaal”, abi’ “Bën rníee diidxguijdx loj xdadaman o xniaaman ya, rayal guiëtaman.” ⁵ Per léjt rëb zile' guiëb bejn loj xdadaman o xniaaman: “Ad zile't günan lüj yudar, din gra ni ra'pan naj par Dios.” ⁶ Rëbidi guial bën guiniee zian, ad zile't güün yudar xdadaman con xniaaman, abi' zian rbëëladxidi xtiidx Dios persi zinal xcostumbridi. ⁷ iBën rusquiee! iRüjnzi di guial nabandi xnejz! Waliqiu ni gunee Isaías, bën badëe xtiidx Dios loj ree bejn, chi rëbaman:

⁸ Bén guie ree rëbzi reeman rníajchi' reeman naj, per ad rënt reeman naj con guidib luxdoo reeman.

⁹ Xlia'czi rníajchi' reeman naj, abi' rulüü reeman bejn ree ganaxzi ni rbëëguijc ree bénguidxliuj.

¹⁰ Dxel gurejdx Jesús ben zien riga' ree yagaj, abi' rëbaman loj reeman:

—Gol bacaagdiajg, gol bignia' tēē ni ganin lojdi. ¹¹ Ad ni rawt bejn rüjn laaman béndol, ni ririi ro'man laan rüjn laaman béndol.

¹² Dxel gubig ree xbejn Jesús lojman, rēb reeman:

—¿Gogbeel ya bidxe'ch ree bēnfarisew chi biguiejn reeman ni guneel?

¹³ Badxi' Jesús laan rēbaman:

—Gra ni ad zēēdt por da Dadan Dios bēn yu' xanyabaa, yu' dxej nitan.

¹⁴ Zeel gol basa'n reeman din laa reeman naj zi'c tijb bēnlutia'p ruluū stijb bēnlutia'p ban niz cheman. Abi' bal tijb bēnlutia'p guluū stijb bēnlutia'p guin, zayajb grop reeman ro' bala'.

¹⁵ Dxel rēb Bēd loj Jesús:

—¿Basignia' dunujn xhie rēn guiēb ni guneel?

¹⁶ Badxi' Jesús san rēbaman:

—¿Wen, ni'qui lējt ad rignia'tan ya? ¹⁷ ¿Id rignia'di ya guial gra ni raw bejn rej lēnman abi' rariin? ¹⁸ Per diidx ririi ro' bejn, luxdooman zan, abi' laan rüjn laaman béndol. ¹⁹ Din luxdoo bejn za graloy ree xgabmal, guialrugüjt bejn, guial rüjn nidxuudx, guialrzunē lacheel ben ren, guialrban, guialrusquiee nē guialrniee diidxgujdx loj lasa'. ²⁰ Gra ree ni guie naj ni rüjn bejn béndol. Per guial ad zunaat bejn zi'c naj costumbr ni rayal güün bejn chi gadaman gaw, ad laatan naj ni rüjn laaman béndol.

Tijb bēngunaa Canaán bililadx Jesús

(Mr. 7:24-30)

²¹ Chi baza Jesús yagaj zēman niz Tiro nē niz Sidón. ²² Abi' yagaj zojb tijb bēngunaa za niz Canaán, briiman, rbixdiajman rēbaman loj Jesús:

—¡Dad, xdiaa Davi, baya naj! Da xi'ndxa'pan yu' bendxab luxdoo, dád rusagziman laam.

²³ Abi' Jesús ad badxi'taman xtiidx bēngunaa guin. Dxel gubig ree xbejnman lojman, rēb reeman:

—Bidxga' bēngunaa guin, din yaguijman, din rbixdiajman nalaman dunuj ree.

²⁴ Dxel rēb Jesús:

—Dios guxhaal naj din günan yudar ganaxzi ree bēn Israel zē loj nejj mal.

²⁵ Per bēngunaa guin bigzuxibaman loj Jesús, rēbaman:

—¡Dad, gognē naj!

²⁶ Badxi' Jesús san, rēbaman:

—Ad zagdxet naj chiquied bejn guidataxil loj xi'nman din gudēedaman laan loj ree bē'cw.

²⁷ Badxi' bēngunaa guinan, rēbaman:

—Waliquil, Dad, per nē ree bē'cw ruto'p guidataxil laay ni ryajb xan xmex bēn naj xbē'cw laa reeb.

²⁸ Dxel rēb Jesús lojman:

—¡Na, waliquil rliladxil con guidib luxdool! Gac zi'c rēn.

Loj hor guin gajc bayajc xi'n bēn guin.

Rayün Jesús zien ree bēnragxuu

²⁹ Baza Jesús yagaj, bidxinman ro' nijs Galilea, dxel wē'paman guijc tijb guia' abi' gurejman yagaj. ³⁰ Dád zien bejn bido'p lod za'man. Binē reeman bengoj ree, nē ree bēnlutia'p, nē ree bēn ad rüjnt xu'c dxiin, con ree bengop nē zien ree bēnragxuu ren ree, badxig reeman laa reeman loj Jesús, abi' bayünman laa reeman. ³¹ Dád badxa loj ree bejn chi baguiaa reeman ma rniee ree bengop, ma bayajc xu'c ree bēn ad rüjnt dxiin xu'c, guíaad ree

bencoj ma rza reeman abi' ree bénlutia'p ruguiaa reeman. Zianz guzuloj cuza't reeman zagdxé xDios ree bén Israel.

Ruyaan Jesús tajp mil bejn
(Mr. 8:1-10)

³² Abi' gurejdx Jesús bén naj ree xbejnman, rëbaman loj reeman:

—Rayan bén guin ree, din ma gojc choon dxéj za' reeman con naj, abi' achet ni gaw reeman. Ad réntan yagu'nejzan laa reeman sin guialraw ad nial yadaj reeman niz lunejz.

³³ Dxel rëb ree xbejnman lojman:

—Per ¿ban guin yuca'n ni gaw ree benzien guin, zi'c naj guie lod achutdzi bejn zobj?

³⁴ Gunabdiidx Jesús loj reeman, rëbaman:

—¿Bél guiadxtil ca'di?

Badxi' reeman laan rëb reeman:

—Gajdx guiadxtil con zatio'p choon bëjl.

³⁵ Dxel gunabee Jesús gurej gra ree bén guin luyuj. ³⁶ Abi' cwa'man guigajdx ree guiadxtil guin con ree bëjl guin, badëëman quixtëë loj Dios. Dxel gula'man laa reen, badëëman laa reen loj ree xbejnman persi gudi's reeman laa reen loj gra ree bén guin. ³⁷ Gra reeman gudaw xt bigdxinladx reeman. Abi' staczi bacha reeman gajdx dxüm ni baya'n. ³⁸ Bén gudaw ree naj reeman tajp mil xinguaaw, garenqui ree béngunaa con ree xindoo. ³⁹ Dxel bazaadiidxné Jesús laa reeman, abi' guyuman loj barcw ziaman niz Magadán.

16

Rniab reeman güün Jesús tijb milagr
(Mr. 8:11-13; Lc. 12:54-56)

¹ Bénfarisew ree con ree bénsaducew bidxin reeman lod za' Jesús, abi' par güün reeman laaman prueb gunab reeman lojman din güünman tijb milagr din guiguien guial Dios guxhaal laaman. ² Per badxi' Jesús laan rëbaman:

—Wadxe ree chi ruguiaadi naxnia xanyabaa, rëbidi: “Zagdxé gac guixie din naxnia xanyabaa.” ³ Guiáad rsil chi naxnia xanyabaa yu' tée zaj, rëbidi: “Ad laat gac yandxéj.” ¿Bén rusquiee!, bal ragbeedi xhie rën guiëb sen yu' xanyabaa, ¿chexc ad rignia'tidi xhie rën guiëb gra ni cuguaadi yan? ⁴ Bén mal, ad rililadxtidi abi' rniabidi günan tijb milagr, per achet guguiaadi, tijbzi zi'c guzac Jonás.

Dxel basa'n Jesús laa reeman, ziataman.

Xlevadur ree bénfarisew
(Mr. 8:14-21)

⁵ Dxel gudëdnë ree xbejnman stiblad ro' nijs guin, per bayanladx ree xbejnman ninë reeman guiadxtil. ⁶ Abi' rëb Jesús loj reeman:

—Gol gojp cudad con xlevadur ree bénfarisew në ree bénsaducew.

⁷ Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

⁸ Gogbee Jesús ni canee reeman abi' rëbaman loj reeman:

—¿Chexc zeel rëbidi guial ad ca'tidi guiadxtil? Ta'nnijt rililadxidi naj.

⁹ ¿Staczi ad rignia'tidi ya? ¿Nid rusaaladxidi ya chi gudi'san gaay guiadxtil loj gaay mil bejn, abi' zabël dxüm ni baya'n bato'pidi? ¹⁰ ¿Nid zaladx tëëdi ya chi gudi'san gajdx guiadxtil loj tajp mil bejn, abi' zabël dxüman bato'pidi?

11 ĆChexc zeel ad rignia'tidi guial ad guiadxtiltan cuzatan lojdi, chi rnin lojdi gapidi cudad con xlevadur ree b nfarisew n  ree b nsadusew?

12 Dxel bignia' ree xbejnman guial ad xlevadurt guiadxtilan cuza'taman loj reeman, r baman zian din gap reeman cudad con ni rul u ree b nfarisew n  ree b nsaducew.

R b B d guial Jes s naj Cristo
(Mr. 8:27-30; Lc. 9:18-21)

13 Chi bidxin Jes s niz Cesarea de Filipino, gunabdiidxaman loj ree xbejnman, r baman:

—ĆChu r b ree bejn, naj B n guxhaal Dios?

14 Badxi' reeman laan, r b reeman:

—Yu' reeman r b guial Wajn, b n baroobnijs bejn ree. Yu'za reeman r b guial El sasan, b n bad   xtiidx Dios loj ree bejn, yu' t   reeman r b guial Jerem sasan, b n bad  d xtiidx Dios loj ree bejn o stijb ben ren ya, b n bad  d xtiidx Dios loj ree bejn.

15 Dxel r baman loj reeman:

—Laadx l jt, Ćxhie nadi, chu naj?

16 Badxi' Sim n B dan, r baman:

—L jn naj Cristo. L jn naj Xi'n Dios naban.

17 Dxel r b Jes s lojman:

—Xiquilbaal, Sim n, xi'n Jon s, din ad b nguidxliujt guna lojl ni guinieel, da Dadan b n yu' xanyabaa laaman naj b n guna lojl. 18 Abi' naj rni lojl, B d, (r n gui ban “guiaj”) l j naj zi'c tijb guiaj ni gacn  lidxan, din por l j grii ree b n gac da bejnan abi' ni'qui guialg jt ad zunijtt laa reeman. 19 Naj gune l j guialrniabee ni za xanyabaa, abi' gra ni ti bil gac loj guidxliujt guie ma naj gacan xanyabaa, gui ad ni ad zati jbtal gac loj guidxliujt guie ad najt gacan xanyabaa.

20 Dxel gunabee Jes s loj gra ree xbejnman guial achu loj gui b reeman guial laaman naj Cristo.

Rugojn Jes s gui taman
(Mr. 8:31–9:1; Lc. 9:22-27)

21 Diizd nadxel guzuloj Jes s bagojn ree xbejnman guial naj cheman Jerusal n, abi' ree guxtis Israel con ree bixhioz rniabee ree bixhioz n  ree mextr rajc ley, laa reeman naj b n gusagzi laaman, gug jt reeman laaman, per ni yayon dxej yabanman. 22 Dxel gul  caan B d laaman, r baman lojman:

—ĆDios ad zab  ladxt l j, Dad! ĆLaaman ad zati jbt saquil zian!

23 Per badxi' loj Jes s, r baman:

—ĆBasa'n naj, xindxab!, ad r jn naw  guil lon. Din ad por Diost z  d ree xgab ni r jnl, xixgab b nguidxliujn r jnl.

24 Dxel r b Jes s loj ree xbejnman:

—Bal yu' b n r n gac da bejnan ad zajct g  nman zi'c naj xixgabaman, siibnejxaman gualzi ni t dzaman abi' guidnalaman naj. 25 Din b n mazri r n xgualnaban ni rajpaman loj guidxliujt guie zadxin dxej gunijtaman laan. Per b n gui t por naj, zajpaman gualnaban tiblayaa con Dios. 26 Xhieci gan gap bejn gra ni yu' loj guidxliujt, abi' nitaman loj Dios. Din ad zile't sii bejn xgualnabean xanyabaa. 27 Abi' B n guxhaal Dios, gui'taman con xgualrniabee xDadaman Dios n  ree xianjl Dios din gud  man ni rayal tijbgaj bejn, bal gonin been bejn. 28 Diidxliczi rnin lojdi guial yu' ree b n riga' guie ad z jtt reeman chi gad reeman guguaa B n guxhaal Dios, gui'taman con xgualrniabeeman din nabeeman.

17

*Bidxaa Jesús loj choon ree xbejnman**(Mr. 9:2-13; Lc. 9:28-36)*

¹ Chi gudëd xho'p dxej, binë Jesús Bëd, në Jacob con Waj bijch Jacob, binëman laa reeman guijc tijb guia' ya. ² Ni bidxaa Jesús niz loj reeman. Dád balaa bacha' lojman zi'c rulaa gubijdx bacha', guiaád xabaman bayajcan naquich, balaa tëën bacha' zi'c guij. ³ Abi' loj hor guin baguiaa reeman Moisejs con Elías cayünë reeman Jesús diidx. ⁴ Dxel rëb Bëd loj Jesús:

—Dad, jzagdxe naj nadxu' ree guie! Bal rën, günan choon ranch, tijban par lüj, tijban par Moisejs, stijban par Elías.

⁵ La'tgaj canee Bëd zian, biguiajt tijb zaj xt guijc reeman ridiinan bacha', loj zaj guin brii cha' bejn rëbaman:

—Bën guie naj da Xi'n'an, bën rën da'tan, bën rabaanë' tëën, gol bacaagdiajg xtiidxaman.

⁶ Chi biguejn ree xbejn Jesús diidx guin ree, bazuxib reeman basajb loj reeman xt luyuj, dád bidxeb reeman. ⁷ Dxel gubig Jesús lod za' reeman, baqui'man laa reeman, rëbaman:

—Gol guzuli, ad ridxebidi.

⁸ Abi' chi gules loj reeman achutri baguiaa reeman, tijbzi Jesús za' yagaj.

⁹ La'tgaj cayguiajt reeman ruguia' guin, rëb Jesús loj reeman:

—Achuczi loj guiëbidi ni baguiaadi, xt chi yaban Bén guxhaal Dios.

¹⁰ Dxel gunabdiidx ree xbejnman lojman, rëb reeman:

—¿Chexquiza zeel rëb ree mextr rajc ley guial yaloj Elías gui't?

¹¹ Badxi' Jesús'an, rëbaman:

—Walican guial yaloj Elías gui't, laaman guzuxnejz gra. ¹² Per naj rni lëjt guial mal bi't Elías, abi' ad bayagbeet ree bejn laaman, beennë reeman laaman ni guyëntzi reeman. Abi' ziangajc gusagzi reeman Bén guxhaal Dios.

¹³ Dxel gogbee ree xbejnman guial Wajn bën baroobnijs bejn ree cuza'taman.

*Rayüjn Jesús tijb xin rëjtya'**(Mr. 9:14-29; Lc. 9:37-43)*

¹⁴ Chi badxin Jesús con guiyon ree xbejnman, lod cabëz ree ben zien laaman bibig tijb xinguaaw lojman, bazuxibix lojman rëbix:

¹⁵ —Dad, baya da xi'n'an, din dád rzagdiajx rëjtya'x. Bëlczi volt riyajbix lojguij o lojnijs ya. ¹⁶ Bidnë'n laax loj ree xbejnl, per ad rajct rayüjn reeman laax.

¹⁷ Badxi' Jesús'an, rëbaman:

—¡Benguijdx, bën ad rliiladxt! ¿Xt goc gazunë'n lëjt? ¿Xt goc gadaanan lëjt? Gol tanë xinzii guie.

¹⁸ Dxel gudilë Jesús xindxab guin, babëëman laax luxdoo xin guin. Loj hor guin gajc bayajquix.

¹⁹ Abi' gunabdiidx ree xbejn Jesús lojman lood ren, rëb reeman:

—¿Chexc zeel ad gojct nalëën xindxab guin luxdoo xin guin?

²⁰ Dxel rëb Jesús loj reeman:

—Guial ta'nzi rliiladxidi. Naj rni lojdi bal naj xguialrliiladxidi majsi zi'ctzi naj xhaj moxhtajs, zile' guiëbidi loj guia' guin: “Bisüd guie, bisob lood ren”, zucaagdiajgan xtiidxidi. Achetczi gac nawëëg par lëjt. ²¹ Per par yarii lasa' ree xindxab guie ryaadx chu cwedx guiniab Dios guiba'n tëë.

*Rugojn Jesús zatijb guial guiëtaman**(Mr. 9:30-32; Lc. 9:43-45)*

²² La'tgaj za' Jesús niz Galilea con ree xbejnman, rëbaman loj reeman guial yayü reeman Bén guxhaal Dios loj ree bejn, ²³ abi' gugÿjt reeman laaman, per ni yayon dxej yabanman. Chi biguejñ ree xbejnman zian, dád guyu naya reeman.

Ni rajx par yadoo

²⁴ Chi badxin Jesús con ree xbejnman guiedx Capernaum, bén ruquijx ree impuest par yadoo wej reeman loj Béd bignabdiidx reeman, rëb reeman:

—¿Rguijx xmextril impuest par yadoo ya?

²⁵ Badxi' Bédan, rëbaman:

—Riguijxcaman laan.

Dxel chi bayu Béd lëñü lod za' Jesús, yalojli Jesús gunabdiidx lojman, rëbaman:

—¿Xhie naladxil, Simón? ¿Chu rguijx impuest loj ree rey yu' loj guidxliuj guie? ¿Xi'n reeman ya o benzit ree?

²⁶ Badxi' Béd laan rëbaman:

—Benzit ree.

Dxel rëb Jesús:

—Abi' ree bén ladx reeman ad rguijxt reeman laan. ²⁷ Per chitëë guidxe'ch reeman, wej ro' nijs, bazaal xiansuelil, dxel bëjl yaloj ni guiniaazil babëëb. Ro' bëjl guin guidxeliñ tijb cintabl, con laan bitijx dux impuest.

18*¿Chu mazri zojbloj?**(Mr. 9:33-37; Lc. 9:46-48)*

¹ Lën ree dxejzii badxin ree xbejn Jesús lod za'man, abi' gunabdiidx reeman lojman, rëb reeman:

—¿Chu mazri zojbloj lod rniabee Dios?

² Dxel gurejdx Jesús tijb xindoo, bazujman laax galay reeman, ³ abi' rëbaman:

—Diidxliczi rnin lojdi bal id zayÿjndi xgab por xtolidi, bal id zajc tëëdi zi'c tijb xindoo, ad zutidi lod rniabee Dios. ⁴ Bén güün naya loj Dios, gac tëëman zi'c xindo guie, laaman gac bén mazri zojbloj lod rniabee Dios. ⁵ Abi' bén yaca' tijb xindoo, por naj, najn raca'man.

*Bén rÿjn persi ryajb ree bejn loj dol**(Mr. 9:42-48; Lc. 17:1-2)*

⁶ Bal chu gusajb tijb bén qui rliladxri naj loj dol, zagdxeli guixhii reeman tijb guiajro' yëjnman guzaal reeman laaman xt xan nijs. ⁷ ¡Probza bénguidxliuj guial yu' da't ni rusajb laaman loj dol! Zianczi yu' ni mal guin loj guidxliuj, per ¡probza bén gusajb bejn ree loj dol!

⁸ Zeel, bal laagajc yaal o guia'l rusajb lÿj loj dol, zagdxeli gutü'n bazaalan zijt, din zagdxeli chu'l xanyabaa con tiblodzi yaal o con tiblodzi guia'l, luar chu'l con groplad yaal o groplad guia'l loj bajl ni ad yu't dxej yayü'. ⁹ Abi' bal laagajc guiaalolj rusajb lÿj loj dol, gulëen bazaalan zijt, zagdxeli chu'l con tiblodzi guiaalolj xanyabaa, luar chu'l con gropladan loj bajl yu' gabijl.

*Xcwent xiil gunit**(Lc. 15:3-7)*

¹⁰ Ad guiniajgaadi loj ree bén qui rliladxri naj. Din diidxliczi rnin lëjt guial xanyabaa yu' ree anjl rniaj laa reeman zianczi za' reeman loj da Dadan Dios

bén yu' xanyabaa. ¹¹ Guiáad Bén guxhaal Dios zëédaman par ree bén ad zinalt xnejz Dios din laa reeman loj dol.

¹² ¿Xhie naladxidi? Bal tijb bejn rajp tibgayuu xiil, abi' rizëéb tijbib, ¿nid zusa'nman zatajpgaljchiinbitapib dajn ya din chigdiilaman be bizëéb guin? ¹³ Abi' bal yadxejlaman laab, diidxliczi rnin mazri yabaanëman laab guial loj tajpgaljchiinbitap be ad bizëéb guint. ¹⁴ Ziangajc dux Dad ree Dios bén yu' xanyabaa ad rëntaman nit ni'czi tijb ree bén qui rliladxri laaman.

Xhienaag yaguieen perdon du lasa' ree
(Lc. 17:3)

¹⁵ 'Bal xhie tijb ni mal güün lasa'l lüj, guneenëman lüjzi din gagbeeman xhie falt badxe'man. Bal guidxga'man xtiidxil, ma beenl gan yaneenël laaman zagdx. ¹⁶ Bal id ridxga'man lüj, binë zatijb o zatio'p bejn, din chigneenëdi laaman din con xtiidx tio'p o choon bejn guiguien guial ma bigneenël laaman. ¹⁷ Dxel bal ni'qui xtiidx reeman ad ridxga'taman, bagojn ree bén zinal xnejz Dios, abi' bal ni'qui xtiidx reeman ad ridxga'taman, dxel ma guguaadi laaman zi'c tijb bén ad rliladxt Dios o zi'c tijb bén ruquijx impuest par Rom.

¹⁸ 'Diidxliczi rnin, gra ni ad zatiëjbtidi gac loj guidxliuj guie ad rajctan xanyabaa, guiáad ni tiëbidi gac loj guidxliuj guie mal rajcan xanyabaa.

¹⁹ 'Rni tëën lëjt: Bal yaya'n tio'pidi diidx loj guidxliuj guie, par guiniabidi xhienin loj da Dadan bén yu' xanyabaa, laaman gunee laan. ²⁰ Din lod rado'p tio'p o choon bejn por naj, laa naj za' galay reeman.

²¹ Dxel gubig Bëd gunabdiidxaman loj Jesús, rëbaman:

—Dad, ¿bël volt rayal günan perdon lasa'n, bal güünman naj xhienin? ¿Xt gajdx volt ya?

²² Badxi' Jesúsán rëbaman:

—Ad gajdx voltizi rayal güün lasa'l perdon, rayal güünl perdon gajdx volt gayojnchi.

Xcwent bén ad rüjnt perdon lasa'

²³ 'Xguialrniabee Dios naj zi'c tijb rey ni been xgab guial ma gojl yaguijx ree xmojsaman lojman. ²⁴ Chi guzulojman caybëëman cwent guin, bidxin tijb xmojsaman lojman bén ral zro' da't. ²⁵ Abi' guial achet rajp bejn guin din yaguixxaman ni ralaman, gunabee rey guin to'man loj ree bejn në lacheelaman con ree xi'nman nëtëë gra ni rajpaman din chile' yaguixxaman di'n guin. ²⁶ Dxel bazuxibaman loj rey guin, beenman naya rëbaman: “Dad, gojp naj pacens zaguixcan graczi ni ralan lojl.” ²⁷ Zianz baya rey guin laaman, beenman laaman perdon gra ni ralaman, abi' baslaaman laaman xiaman. ²⁸ Per chi barii mojs guin yagaj, badxajgaman tijb bén rüjnnëman dxiin, ralaman ta'nzi milia lojman. Dxel gunaazaman laaman guzuloj caguiajman yëjnmán, rëbaman: “iBaguixx ni ralil lon!” ²⁹ Dxel bazuxib bén guin lojman beenman naya rëbaman: “Gojp naj pacens zaguixcan graczi ni ralan lojl.” ³⁰ Per ad guyënt bén guin, badxe'man laaman ladxguuib xt lodzi yaguixxaman di'n guin. ³¹ Chi baguiaa ree los demazri ree xmojs rey guin, dad gognaa luxdoo reeman, abi' wej reeman biguiedx reeman lojman gra ni goc. ³² Dxel gurejdx rey guin mojs guin, zianz rëbaman lojman: “iMojs guijdx! Benan perdon gra ni ralil lon guial beenl naya. ³³ ¿Nid nëgajc lüj rayal naya xcompnariil ya, zi'cgajc bayan lüj?” ³⁴ Abi' guial tant balen rey guin, gunabeeman badxe' reeman laaman ladxguuib xt lodzi baguixx gra ni ralaman.

³⁵ Basnuu Jesús rëbaman:

—Ziangajc güünnë da Dadan lëjt, bën yu' xanyabaa, bal id züjn perdon lasa'di con guidib luxdoodi ni rüjnnë reeman lëjt.

19

Rulüü Jesús xcwent guial rala' lasa'

(Mr. 10:1-12; Lc. 16:18)

¹ Chi gulox guneë Jesús zian, bazaman niz Galilea, zëman niz Judea, niz stiblad ro' guiiw Jordán. ² Zien ree bejn binal laaman, yagaj bayünman bënragxuu ree.

³ Abi' tio'p choon ree bënfarisew bibig loj Jesús, dxel par güün reeman laaman prueb, gunabdiidx reeman lojman rëb reeman:

—¿Zile' yala' bejn lacheelaman por xhiedxitzinin ya?

⁴ Badxi' Jesúsán rëbaman:

—¿Nid wayoolidi loj xtiidx Dios ya, guial diizd guia'xchej Dios “been xinguaaaw në béngunaa”? ⁵ Rëb tëëman: “Zeel xinguaaaw gusa'n xdad xniaax din guibannë lacheelix, dxel grop reex ma gac zi'c tijbzi bejn.” ⁶ Zianan zeel ad najtri reex tio'p, ma naj reex tijbzi. Zeel bénguidxliuj ad rayalt yala'man lasa' ni ma bachajc Dios.

⁷ Dxel rëb ree bënfarisew guin loj Jesús:

—¿Chexquiza zeel rëb Moisejs guial zile' yala' lacheel bejn, con gudëëdaman gui'ch guial ma bala' lasa' reeman?

⁸ Badxi' Jesúsán, rëbaman:

—Cwëjb Moisejs gojc zian guial ad rëntidi guzoobidi diidx, per ad ziant gojc diizd guia'xchej. ⁹ Naj rni lojdi. Xin yala' lacheel, bal id za'në lacheelix xin ren, abi' tia'x ben ren dolan cayüjnx. Ziangajc xin tia' bën qui bala'ri lasa' guin dolan cayüjnx.

¹⁰ Dxel rëb ree xbejn Jesús lojman:

—Bal zian naj xcwent guial ru lacheel, zagdxeli ad zut lacheel bejn

¹¹ Badxi' Jesúsán rëbaman:

—Ad grat bejn zile' chignia' ni canin, bën ca'zi ree quiarguejn par chignia' reeman laan. ¹² Yu' bejn diizd rajlaman ad zëëdtaman loj guidxliuj par guxhliaaman, yu'za reeman, bejn rüjn laa reeman zian. Abi' yu' reeman rüjn xgab guial zagdxeli guitie'ch reeman xtiidx Dios luar guxhliaa reeman. Bën rën chignia', gol bignia'.

Rüjnle Jesús xindoo ree

(Mr. 10:13-16; Lc. 18:15-17)

¹³ Binë ree bejn xindoo ree lod za' Jesús, din guixhioob yaaman guijc reex cwedx guiniab tëëman Dios por laa reex, per ree xbejnman guzuloj cadilë reeman bën zinë ree laa reex. ¹⁴ Dxel rëb Jesús loj reeman:

—Gol baslaa gui't reex lon, ad bal rudxoondi, din lod rniabee Dios naj par ree bën naj zi'c laa reex.

¹⁵ Abi' guxhoob yaa Jesús guijc ree xindo guin, dxel ziaman.

Tijb xinrijcw

(Mr. 10:17-31; Lc. 18:18-30)

¹⁶ Bidxin tijb xin guin loj Jesús, abi' gunabdiidxix lojman, rëbix:

—Mextr, ¿xhie ni zagdxë günan din ga'pan guialnaban tiblayaa con Dios?

¹⁷ Dxel rëb Jesús lojx:

—¿Chexc zeel rniabdiidxil lon conin naj ni zagdxe? Achut naj benza'c, tijbzi Dios. Per bal rēnl gapil guialnaban tiblyaa con Dios, been zi'c rēb ree mandamient.

¹⁸ Dxel gunabdiidxix loj Jesús rēbix:

—¿Con ree mandamientan?

Badxi' Jesúsán, rēbaman:

—Ad gugūjtil bejn, ad sunēl lacheel ben ren, ad cwanl, ad cwēēl xtiidx bejn,

¹⁹ gojp respejt xdad xniaal, guyēn tēē ree lasa'l zi'c rēn lūj gajc.

²⁰ Dxel rēbix:

—Gra ree ni guin cayūnan diidz najn xindoo, ¿xhieri ryaadx gūnan yan?

²¹ Badxi' Jesúsán, rēbaman:

—Bal rēnl gaquil benza'c loj Dios, bigto' gra ni rajpil dxel gudēēl milia guin loj ree bēnprob. Zian gapil guialnaza'c xanyabaa. Zianz guidnalil naj.

²² Chi biguiejn xin guin zian, dád guyu nayax ziax, guial dád xinriycwan.

²³ Dxel rēb Jesús loj ree xbejnman:

—Diidxiczi rnin lojdi: Dád nawēēg chu' benriycw lod rniabee Dios. ²⁴ Naj rni lējt. Adli nawēēgt tēd tijb camell xan gagux, guial chu' tijb benriycw lod rniabee Dios.

²⁵ Chi biguiejn ree xbejn Jesús zian, dád badxaloj reeman, abi' rēb reeman:

—¿Chuzazajc gac perdon loj Dios?

²⁶ Dxel baguiaa Jesús loj reeman, rēbaman:

—Nawēēg gac zian par bēnguidxliuj, per par Dios achet ni nawēēg yu'.

²⁷ Abi' rēb Bēd lojman:

—Ma basa'nan graczi ni raya'pan, persi zudnaalan lūj. Abi' ¿xhieza yay-alan?

²⁸ Badxi' Jesúsán, rēbaman:

—Diidxiczi rnin lojdi chi guidxin dxej yacüb gra, guidxin tēē dxej cwe Bēn guxhaal Dios luar lod nabeeman, nē lējt, guial zidnalidi naj, cwedi loj chiptio'p ree luar lod nabeedi, din gūn xguialguxtisidi loj guidxiptio'p ree xdiaa Israel. ²⁹ Abi' gra ree bēn basa'n lidz, bijch, bizan, xdad, xniaa, xi'n, o guidxliuj ree por naj, zaca' reeman tibgayuu volt mazri guial loj ni basa'n reeman, zajp tēē reeman guialnaban tiblyaa con Dios. ³⁰ Per zien ree bēn naj bēn yaloj, gac reeman bēn bigra, abi' zienza ree bēn naj bēn bigra, gac reeman bēn yaloj.

20

Xcwent ree bēn rūjn dxiin

¹ Rēb tēē Jesús:

—Xguialrniabee Dios naj zi'c tijb bēn rajp tijb guiniaaro', rsiladoo briiman zitiilaman mojs gūn dxiin loj xguiniaaman. ² Baya'nnēman laa reeman diidx plac quixaman tijb gaj reeman tibdxej, dxel guxhaalaman laa reeman loj xguiniaaman. ³ Dxel briiman stijb cost raca gaa rsil, abi' baguiaaman ben ren ree za' reeman galay luguiedx, achet xchiin reeman. ⁴ Zianz rēbaman loj reeman: “Gol biguieen dxiin loj da guiniaan, naj gaguix lējt zi'c rayal.” Dxel zē reeman. ⁵ Cost garol dxej briiman stijb, abi' brii gajman cost raca choon wadxe ziangajc rēbaman loj ree bēn riga' yagaj, bēn achet xchiin. ⁶ Cost raca gaay wadxe wejman galay luguiedx guin stijb, abi' bidxaaglojman ben ren ree, bēn achet ree xchiin, gunabdiidxaman loj reeman, rēbaman: “¿Chexc zeel za'di guin gudēdchej ad cayūntidi dxiin?” ⁷ Badxi' reeman laan rēb reeman: “Achut wanee dxiin yaguieenan.” Dxel rēbaman loj reeman: “Nē lējt gol

biguieen dxiin loj da guiniaan naj gaguix lëjt zi'c rayal.”⁸ Chi ma gurej guiaal, rëb bën naj xguiniaan loj bën naaz dxiin guin: “Gurejdx ree mojs guin din quixil laa reeman, per yalojxgaj gudijx ree bën bigra guyu, zianz quixil bën guyu ree yaloj.”⁹ Chi bidxin ree bën guyu loj dxiin guin raca gaay wadxe, gojx tijbgaj reeman xieen tibdxej.¹⁰ Dxel chi bidxin ree bën guyu loj dxiin diizd rsil, gunaladx reeman niajx reeman mazri, per nëgajc reeman gojx xieen tibdxej.¹¹ Abi' chi cayajx reeman, guzuloj cadxe'ch reeman bën naj xguiniaa laan,¹² rëb reeman lojman: “Bën bigra guyu ree, been reeman dxiin tib horzi abi' zi'cgajc caguijxil dunujn gudijxil laa reeman, abi' dunujn badaanan baguieenan dxiin dëchej loj guialnalaa.”¹³ Per rëb bën guin loj tijb reeman: “Achet ni mal cayünan lüj. ¿Nid baya'n diidx ya plac gunen tia'l tibdxej?”¹⁴ Cwa' ni bayalil baguiaj. Din naj rënan gaguixan bën bigratë guyu zi'c gudixan lüj,¹⁵ zajc günnë' da milian ni rëntzan. ¿O nadëdloj ya guial najn benza'c?”¹⁶ Zianan zeel bën naj ree bën bigra gac reeman bën yaloj, guiaad ree bën yaloj gac reeman bën bigra.

Bayon volt bagojn Jesús guial guiëtaman
(Mr. 10:32-34; Lc. 18:31-34)

¹⁷ Chi zë Jesús Jerusalén, gurejdx guidxiptio'p ree xbejnman tibläd, rëbaman loj reeman:

¹⁸ —Ganin lëjt, ziyo' ree Jerusalén, lod yayü reeman Bën guxhaal Dios, loj ree bixhioz rniabee ree bixhioz në loj ree mextr rajc ley, abi' laa reeman nabeë guiëtaman,¹⁹ yayü reeman laaman loj ree benzit, din guze' reeman laaman quin tëë reeman laaman, abi' gucaa reeman laaman loj crüjz, per yayon dxej yabanman.

Ni gunab xniaa Jacob con Waj
(Mr. 10:35-45)

²⁰ Gubig lacheel Zebedeo loj Jesús con grop ree xi'nman, bazuxibaman lojman din guiniabaman ni rënman.²¹ Gunabdiidx Jesús lojman, rëbaman:

—¿Xhie rën!

Badxi' bën guinan, rëbaman:

—Rënan nabeel cwe tijb da xi'nän xladbeel, stijbim xladruvejsil, chi ma canabeel.

²² Dxel rëb Jesús:

—Ad ragbeetidi ni rniabidi. ¿Wen zajc tädidi guialzi zi'c naj ni gadëëdan ya?

Badxi' reeman laan, rëb reeman:

—Zayajcan.

²³ Abi' rëbaman:

—Diidxliczi rnin zajc tädidi guialzi zi'c naj ni gadëëdan, per guial cwedi da ladbeen o da ladruvejsan ya ad najt rayal ganabee, din ma najn par ree bën bacaabee da Dadan.

²⁴ Chi biguiejn zachii ree xbejn Jesús zian däd balen reeman grop bijch reeman.²⁵ Per gurejdx Jesús laa reeman, rëbaman:

—Lëjt ragbee, bën rniabee ree loj guidxliuj, rniabee reeman bejn ree zi'ctzi rën reeman, guiaad ree bën zobjloj rüjnnë reeman bejn ree zi'ctzi rën reeman por guialrniabee ni rajp reeman.²⁶ Per con lëjt ad rayalt gac zian. Bal chu rën gac bën rniabee lojdi, rayal güünman sirv lojdi.²⁷ Ziangajc bën rën gac bën zobjloj lojdi, rayal güünman sirv lojdi zi'c bën nado'.²⁸ Zi'c Bën guxhaal Dios ad bi'ttaman par güün reeman sirv lojman, bi'ttaman par güünman sirv gudëë tëë xguialnabanman din laa zien bejn loj dol.

*Rayüjn Jesús tio'p ree bénlutia'p**(Mr. 10:46-52; Lc. 18:35-43)*

²⁹ Chi bazaman luguiedx Jericó con ree xbejnman, dád zien ree bejn binal laaman. ³⁰ Dxel tio'p ree bénlutia'p zojb cwë' nejz chi biguiejn reeman cadëd Jesús niz yagaj, gurixdiaj reeman rëb reeman:

—¡Dad, xdiaa Davi, baya dunujn!

³¹ Abi' rdilë ree ben guin laa reeman din yacwëéz ro' reeman, per mazri ribixdiaj reeman rëb reeman:

—¡Dad, xdiaa Davi, baya dunujn!

³² Dxel guzudxe Jesús, gurejdxaman laa reeman, gunabdiidxaman loj reeman, rëbaman:

—¿Xhie rëndi gūnan por lëjt?

³³ Badxi' reeman laan, rëb reeman:

—Dad, rayënan yaxal du lojn.

³⁴ Dxel baya Jesús laa reeman, abi' baqui'man loj reeman. Loj hor zii baxal loj reeman, dxel binal reeman Jesús.

21*Ru Jesús Jerusalén**(Mr 11:1-11; Lc. 19:28-40; Jn.12 :12-19)*

¹ Chi ma cadxin Jesús con ree xbejnman Jerusalén, niz guiedx la Betfagé, gajxh ruguia' Olivos, guxhaal Jesús tio'p ree xbejnman, ² rëbaman loj reeman:

—Golchej guiedx riga' lad ni, ni guidxaaglojdi tijb bur, caduunë xi'nb. Gol guxhiec reeb gol tanë reeb guie. ³ Abi' bal chu xhie na lojdi, gol güjdx guial Dad Jesús cayaadx laa reeb, gandoo yaxhaalaman laa reeb.

⁴ Zian gojc persi gojc cumplid ni gunee bén badëë xtiidx Dios loj ree bejn, chi rëbaman:

⁵ Gol güjdx loj ree bén Sión:

“Gol baguiaa laa xreydi zëéd lojdi, ad zëëdtaman nabë, dxiibaman tijb bur, tijb burdoo xi'n tijb be rüü.”

⁶ Dxel wej ree xbejn Jesús abi' been reeman zi'c rëbaman loj reeman, ⁷ binë reeman bur guin con xi'nb, abi' badxiib xab reeman xijch reeb zianz gudxib Jesús burdo guin. ⁸ Abi' guial zien ree bejn, yu' reeman rguijxh xab lunejz, zien tëë reeman ritü' xidx ree yag persi rguijxh reeman laa reen lod cadëdaman. ⁹ Abi' zi'c ree bén ned zi'c ree bén zidnal laaman, rbixdiaj reeman, rëb reeman:

—¡Benza'c bendxoon naj xdiaa rey Davi! ¡Nüjnle' Dios bén guxhaalaman! ¡Benza'c bendxoon naj Dios bén yu' xanyabaa!

¹⁰ Chi guyu Jesús luguiedx Jerusalén, gra ree bén luguiedx guin badxaloj, abi' riniabdiidx loj lasa' reeman, rëb reeman:

—¿Chu bén guin?

¹¹ Dxel rëb ree benzien guin:

—Laaman naj Jesús, bén rudëë xtiidx Dios loj ree bejn, bén Nazaret guiedx riga' niz Galilea.

*Rabëë Jesús bén ruto' ree lën yadoo Jerusalén**(Mr 11:15-19; Lc. 19:45-48; Jn.2 :13-22)*

¹² Chi bidxin Jesús ro' yadooro' Jerusalén, guzuloj caybëëman bén cuto' ree në ree bén cazii. Barexguiataman xmex ree bén cuchaa milia në xmex ree bén cuto' palom. ¹³ Dxel rëb Jesús loj reeman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nüjndan zi'c lidx ree xingubaan.

¹⁴ Dxel bénlutia'p ree con ree bencoj bibig reeman loj Jesús lën yadoo guin abi' bayüjnman laa reeman. ¹⁵ Per chi baguiaa ree bixhioz rniabee ree bixhioz con ree mextr rajc ley milagr cayüjn Jesús, bigueijn tée reeman rëb ree xindoo lën yadoo guin: “Benza'c bendxoon naj xdiaa rey Davi”, dxel dád bidxe'ch reeman. ¹⁶ Abi' rëb reeman loj Jesús:

—¿Rguiejnl ni canee ree xindo guin ya?

Badxi' Jesúsán, rëbaman:

—Rguiejncan. Per ¿gadidi gool loj xtiidx Dios ya? Lod rëb:

Lüj badëed ni gool ree xindoo në ree xindobëz sta rë' dud, dín guillies reex xvaloril.

¹⁷ Dxel basa'n Jesús laa reeman, zëman Betania ni baya'nman guxhin guin.

Tijb yag higo ni gubidx

(Mr. 11:12-14, 20-26)

¹⁸ Chi bareguiaal rsil la'tgaj zë Jesús Jerusalén stijb, guzuloj gulaanman. ¹⁹ Abi' baguiaaman zobj tijb yag higo cwë' nejz, dxel gubigaman cwë'n, per ganaxzi balag ca lojn. Zianz rëbaman loj yag higo guin:

—¡Ad yu'tri dxej tial higo!

Loj hor guin gajc gubidx yag guin. ²⁰ Chi baguiaa ree xbejnman zian, dád badxaloj reeman abi' gunabdiidx reeman loj Jesús, rëb reeman:

—¿Xhienaag gojc zeel laa gubidx gajc yag higo guin?

²¹ Badxi' Jesúsán, rëbaman:

—Naj rni lojdi, bal rliladxidi Dios abi' ad zunawëëgtidi, ad ni bentzan con yag higo guin zajc güündi, zajc guiëbidi loj guia' guie: “Biquied guie, bisob loj nijsdoo”, abi' zajc gajc zian. ²² Gra ni guiniabidi loj Dios, bal rliladxidi laaman, zuneeman laan.

Xgualrniabee Jesús

(Mr. 11:27-33; Lc. 20:1-8)

²³ Chi guyu Jesús lën yadooro' Jerusalén, la'tgaj culüüman bejn ree. Bixhioz rniabee ree bixhioz con ree guxtis Israel, gubig reeman loj Jesús, abi' gunabdiidx reeman, rëb reeman:

—¿Chu na güünl ni guin ree? ¿Chu banee gualrniabee lojl?

²⁴ Badxi' Jesúsán, rëbaman:

—Ziangajc naj yu' tijb ni ganabdiidxan lojdi, bal yadxi'dan dxel ganin lëjt chu banee gualrniabee günan ni guin ree. ²⁵ ¿Chu guxhaal Waj chigroobnijsaman bejn ree, Dios ya o bénguidxliuj?

Dxel guzuloj cayü reeman diidx, rëb reeman:

—Bal yaguie'ch ree, “Dios guxhaal laaman”, zanaman: “¿Chexza zeel ad bililadxtidi laaman?” ²⁶ Abi'za bal yaguie'ch ree: “bénguidxliuj guxhaal laaman”, radxeb ree yalen ree bejn dín gra reeman rliladx gual Waj naj bën badëed xtiidx Dios loj ree bejn.

²⁷ Dxel rëb reeman loj Jesús:

—Ad rayagbeetan.

Badxi' Jesúsán, rëbaman:

—Ni'qui naj ad zanitan lojdi chu banee gualrniabee günan ni guin ree.

Tijb bën guyu tio'p xi'n

²⁸ Basnu Jesús rëbaman loj ree bixhioz rniabee ree bixhioz në loj ree guxtis Israel.

—¿Xhie nadi ni ganin lëjt? Tijb bejn guyu tio'p xi'nman, dxel rëbaman loj tijbix: “Xi'n, wej yandxex biguieen dxiin loj guiniaa yu' uv.” ²⁹ Badxi'xan, rëbix: “Ad zatan.” Per dxelri bayüjnx xgab zianz wejx. ³⁰ Abi' rëbaman loj stijb xi'nman din chex, badxi'xan, rëbix: “Yo dad, gazacan.” Per ad wejtitx. ³¹ Yan, ¿chu loj grop reex been ni rën xdad reex?

Badxi' reeman laan, rëb reeman:

—Xin rëbaman loj yaloj guin.

Dxel rëb Jesús loj reeman:

—Diidxiczi rnin, bën ruquijx ree impuest con ree béngunaa naban nadxu-udx, yalojl laa reeman chu' lod rniabee Dios guial lojdi. ³² Din bi't Waj, bën baroobnijs bejn ree par gulüüman lëjt xhienaag guiband, per ad bililadxtidi xtiidxaman. Guiáad ree bën ruquijx impuest con ree béngunaa naban nadxu-udx, bililadx reeman xtiidxaman. Per lëjt majsí baguiaadi gra ree ni guin, ad bayüjntidi xgab por xtolidi din nililadxidi laaman.

Xcwent ree mojs guiidx
(Mr. 12:1-12; Lc. 20:9-19)

³³ Rëb tée Jesús loj reeman:

—Yan, gol bacaagdiajg ganin lëjt stijb ni naj zi'c cwent. Guyu tijb bejn guxübinman uv ree loj xguiniaaman, dxel beenman gurajl gadëd ro'n, beenchaaw tëëman tijb luar lod grii xnijs uv guin, abi' bazoobaman tijb yu ya da't din guiya'p guidib guiniaa guin.

‘Zianz badëëdaman laan garol loj ree bën güün dxiin lojn, zëtaman zijt. ³⁴ Chi bidxin dxej yaru' ree uv guin, guxhaalaman tio'p choon ree xmojsaman chigxii reeman ni rayalaman. ³⁵ Per ree bën rüjn dxiin loj guiniaa guin gunaaz reeman mojs guin ree. Tijbaman gudijn reeman, stijbaman bagüjt reeman, stijbaman bacaaguij reeman. ³⁶ Dxel bën naj xguiniaan guxhaalaman mazri ree mojs guial loj ree bën we yaloj, per ziangajc beennë ree bën guin laa reeman.

³⁷ ‘Ni bigra, guxhaal xi'nman guial gunaladxaman: “Zajpqui reeman da xi'nan respejt.” ³⁸ Per chi baguiaa ree bën guin xi'nman, rëb loj lasa' reeman: “Xin guinan naj xin tia' guidxliuj guin, yagüjt reex din gacan du xieen ree.” ³⁹ Abi' gunaaz reeman laax, babëë reeman laax loj guiniaa guin dxel bagüjt reeman laax.

⁴⁰ Dxel gunabdiidx Jesús loj ree bën caneenëman, rëbaman:

—Chi yadxin bën naj xguidxliuj laan, ¿xhie naladxidi güünnëman bën guin ree?

⁴¹ Abi' rëb reeman loj Jesús:

—Ad zayataman gugüjtaman bën guin ree, dxel gudëëman guidxliuj guin garol loj ree ben ren, bën yayü ni rayalaman chi guidxin dxej yaru' ree uv guin.

⁴² Dxel rëb Jesús loj reeman:

—¿Id wayolczidi loj xtiidx Dios ya? Lod rëb:

Guij ni gulëëgo'n ree bën rüjn yu.

Laan goc ni mazri been sirv gojcnë yu guin.

Laan naj ni been Dios,

abi' dád radxa du loj ree.

⁴³ Zeel rnin lojdi, zariicadi loj xguialrniabee Dios abi' ben ren ree yayu xluaridi, bën wali ree güün zi'c rënman. ⁴⁴ Abi' chutëëz bën yab guiic guiaj guin, zarooxaman, guiáad bal yab guiaj guin guijcaman zanidlojman.

⁴⁵ Chi biguiejn ree bixhioz rniabee ree bixhioz con ree bénfarisew guin ni cayü Jesús zi'c cwent, dxel gogbee reeman guial laa reeman cuza'taman. ⁴⁶ Abi' guyèn reeman niniaaz reeman laaman, per bidxeb reeman bejn ree guial rliladx reeman laaman naj Bén rudëéd xtiidx Dios loj ree bejn.

22

Xcwent guialruxhliaa

¹ Basnuu Jesús beman zi'c cwent loj reeman rëbaman:

² —Xguialrniabee Dios naj zi'c tijb rey Bén been lanijro' chi baxhliaa xi'nman. ³ Abi' guxhaalaman mojs ree bignee reeman biooz ree, per biooz guin ree ad guyënt reeman nej reeman. ⁴ Dxel guxhaalaman mojs ren ree, rëbaman loj reeman: “Gol güjdx loj ree biooz guin ma naj guialraw, ma gunabeen güjt ree da go'nan në ree beren, bero' ree. Ma najcchaaw graczi, gol güjdx loj reeman din gui't reeman loj guialruxhliaa guin.” ⁵ Per biooz guin ree ad bidxga't reeman xtiidx rey guin, yu' reeman zë loj xguiniaa, yu' reeman zë xmandad, ⁶ yu' tëë reeman gunaaz mojs guin ree gudijn reeman laa reeman abi' bagüjt reeman laa reeman. ⁷ Chi gogbee rey guin zian, dád bidxe'chaman. Guxhaalaman Bén naj ree xsuldadaman persi bagüjt reeman Bén guin ree baze'c tëë reeman lidx reeman. ⁸ Dxel rëbaman loj ree xmojsaman: “Graczi ma najcchaaw par loj guialruxhliaa guin, per ree Bén gunen ad najt guial ni't reeman. ⁹ Yan, gol wej lod radxaag lasa' ree nejz, gol güjdx loj ree Bén guidxaalojtzidi din gui't reeman loj guialruxhliaa guin.” ¹⁰ Abi' brii ree mojs guin wej reeman lunejz guin ree, bato'p reeman gra ree Bén bidxaalojtzidi reeman, zi'c ree benmal zi'c ree benza'c, zian gudxa ree biooz lidx rey guin.

¹¹ Per chi guyu rey guin din guguaaman biooz guin ree, baguiaaman tijb Bén ad najcwt xab ni rayal gacwaman loj guialruxhliaa guin. ¹² Abi' rëb rey guin lojman: “Laadx lüj, ¿xhienaag beenl guyul guie abi' ad najcwt xabil ni rayal gacwil loj guialruxhliaa?” Dxel achet badxejl niëjb Bén guin. ¹³ Zianz rëb rey guin loj ree Bén cagui's guialraw: “Gol guxhii guia'x në yaax, gol bazaal tëëx xchu lod nacay da't lod goonx gaw tëë layix.” ¹⁴ Din zien ree bejn rdxejl, per ad grataman chu'.

¿Rayal gax impuest ya?

(Mr. 12:13-17; Lc. 20:19-26)

¹⁵ Dxel baza ree Bénfarisew yagaj, abi' baya'n reeman diidx xhie guini-abdiidx reeman loj Jesús din guidoon xhie guiëbaman, zian chile' gutedia' reeman laaman. ¹⁶ Abi' guxhaal ree xbejn reeman con ree xbejn Herodes, rëb reeman lojman:

—Mextr, dunujn rayagbee guial lüj rniee diidxli, abi' walil rulüül guial xhienaag rën Dios guiban bejn, ad ridxga' tëëtíl chu naj bejn. Din lojl tiblojzi naj bejn. ¹⁷ Guna du lojn: ¿Zagdxen ya yadijxan impuest loj César o ad zagdxetan ya?

¹⁸ Per gogbee gajc Jesús xgabmal ni cayüjn reeman, abi' rëbaman loj reeman:

—Bén rusquiee, ¿chexc zeel raguiilidi mod xhienaag gutidia'di naj? ¹⁹ Gol balüü tijb cantabl lon ni rguijxnëdi impuest.

Dxel badëéd reeman tijban lojman, ²⁰ abi' gunabdiidx Jesús loj reeman, rëbaman:

—¿Chu loj ca lojn chu tëë laj ca lojn?

²¹ Badxi' reeman laan, rëb reeman:

—Laj César në lojman.

Dxel rëbaman:

—Gol badëed loj César ni naj xieen César, guiáad loj Dios gol badëed ni naj xieen Dios.

²² Chi biguiejn reeman zian, dád badxaloj reeman, dxel basa'n reeman laaman, zianz zia reeman.

Gunabdiidx reeman xcwent guial yaban ree bengüt

(Mr. 12:18-27; Lc. 20:27-40)

²³ Dxejzii gajc tio'p choon ree bénsadusew wej reeman bignaj reeman Jesús, bénsadusew guin ree ad rliadxt reeman guial yaban ree bengüt, zeel rëb reeman loj Jesús:

²⁴ —Mextr, Moisejs rëb guial bal guiët tijb xinguaaw abi' achut xi'n reex guyu con lacheelix, bijch xingüt guin guxhliaanë béngunaa bizëjb guin din chu' xi'n reex luar bijchix. ²⁵ Du lojn guyu tijb famil lod gojc reex gajdx bijch. Baxhliaa xin yaloj guin, per güjtix abi' guial ad guyut xi'nx, dxel bijch barojpiz baxhliaanë béngunaa guin. ²⁶ Per ziangajc guzajc xin barojp guin abi' ziangajc guzajc xin bayon guin, xt bagajdx reex guzajc zian. ²⁷ Chi bara reex güjt dxel güjt béngunaa guin. ²⁸ Yan, chi yaban ree bengüt, loj guigajdx reex, ¿chu gac xbéngunaa laaman guial gra reex baxhliaanë laaman?

²⁹ Badxi' Jesúsán, rëbaman:

—¡Ragdxadi guial ad nünbeeti xtiidx Dios ad nünbee tēëtidi xhienaag naj xguialrniabeeman! ³⁰ Din chi yaban ree bengüt, ad zuxhliatri reeman ad zudëed tēëtri xi'n reeman guxhliaa, ma gac reeman zi'c ree anjl yu' xanyabaa. ³¹ Abi' xcwent ni yaban ree bengüt, ¿gadidi gool ya lod ca guial Dios gajc rëb: ³² “Naj naj xDios Abraham, xDios Isaac në xDios Jacob”? Abi' Dios ad najtaman xDios ree bengüt, najman xDios ree bën naban.

³³ Chi biguiejn ree bejn zian, dád badxaloj reeman zi'c rulüüman laa reeman.

Mandamient mazri zobjloj

(Mr. 12:28-34)

³⁴ Chi gogbee ree bënfarisew guial achet badxejl niëjb ree bénsadusew loj Jesús, dxel baya'n reeman diidx badxaag lasa' reeman. ³⁵ Abi' tijb ree bënfarisew guin, bën naj mextr rajc ley, gunabdiidxaman loj Jesús din guidoon xhie guiëbaman, rëbaman:

³⁶ —Mextr, ¿con mandamientan mazri zobjloj loj gra ree mandamient ni zëed loj ley?

³⁷ Badxi' Jesúsán rëbaman:

—“Guyën xDadil Dios guidiblagaa guidib guijc guidib ladxil.” ³⁸ Laan naj mandamient mazri zobjloj. ³⁹ Ziangajc naj mandamient rarojp ni rëb: “Guyën ree bejn zi'c rën lüj gajc.” ⁴⁰ Con grop ree ni mandamient guie, ma cayüjn bejn cumplid gra ley bacaa Moisejs në ree ni bacaa ree bën badëe xtiidx Dios loj ree bejn.

Chu loj xdiaa za Cristo

(Mr. 12:35-37; Lc. 20:41-44)

⁴¹ La'tgaj nadxag lasa' ree bënfarisew guin, gunabdiidx Jesús loj reeman, rëbaman:

⁴² —¿Xhie xgab rüjndi por Cristo? ¿Chu loj xdiaa zaman?

Badxi' reeman laan rëb reeman:

—Loj xdiaa Davi.

⁴³ Dxel rëb Jesús loj reeman:

—Per, ¿chexquiza zeel por xSprijt Dios rëb Davi lojman, Dad? Din Davi rëb:

⁴⁴ Dios rëb loj bën rniabee naj:

“Gurej da ladbeen, xt gabecan xin rdxe'ch ree lüj guia'l.”

⁴⁵ Yan, bal xi'n Davi naj Cristo, ¿chexquiza zeel rëb Davi lojman Dad?

⁴⁶ Achutdzi gojc nadxi' xtiidx Jesús, ni'czi tijb diidx. Abi' diizd dxejzii achutdzi bayax niniabdiidx xhienin lojman.

23

Ni rüjn ree mextr rajc ley në ree bënfarisew

(Mr. 12:38-40; Lc. 11:37-54; 20:45-47)

¹ Rëb Jesús loj ree bejn në loj ree xbejnman:

² —Mextr rajc ree ley con ree bënfarisew rülüü reeman xhie rën guiëb ni ca loj xley Moisejs. ³ Zeel gol bazoob xtiidx reeman, gol been tée gra ni na reeman lojdi, per ad güündi zi'c rüjn reeman, din laa reeman ni ren na reeman abi' ni ren rüjn reeman. ⁴ Rniabee reeman güün bejn ni nawëëg da't, per rniabeezi reeman güün bejn zian, guiáad laa reeman ni'qui ta'n ad rüjnt reeman bejn yudar din güün reeman zi'c rën reeman. ⁵ Gra ni rüjn reeman, rüjn reeman laan din yadxaløj bejn laa reeman. Ruladx reeman guixhii lucwaj reeman në xu'c reeman tijb cint ni ca xtiidx Dios loj, ruladx tée reeman gacw reeman lajd zagdx. ⁶ Ruladx reeman cwe reeman lod rayal rbej ree bën zojbloj, loj tijb guialraw, abi' ziangajc rüjn reeman lën ree yadoo. ⁷ Ruladx tée reeman gugajpdioz bejn laa reeman zagdx niz lunejz guiëb tée reeman loj reeman mextr.

⁸ Per lëjt ad sëëbladxidi guiniee bejn lëjt mextr, din tijbzi naj gradi, tijbzi mextr rajpidi abi' laaman naj Cristo. ⁹ Ni'qui tijb loj bénguidxliuj, bën ad najt xdadidi, ad guiëbidi dad, din tijbzi xdadidi yu', laaman yu' xanyabaa. ¹⁰ Ad güün téeði naguiejn yayagbee ree bejn lëjt zi'c bën rniabee, din tijbzi bën rniabee yu', laaman naj Cristo. ¹¹ Bën mazri zojbloj lojdi, laaman rayal güün sirv lojdi. ¹² Din bën rlies xvalor gajc achet lasajcaman. Guiáad bën rüjn naya, zajs xvaloraman.

¹³ 'iProbza lëjt mextr rajc ley në lëjt bënfarisew, bën rusquiee!, ad rtiëjbtidi gagbee ree bejn xhienaag din gac reeman xbejn Dios, ni'quiza lëjt ad rüjntidi naguiejn gaquidi xbejn Dios, abi' rudxoondi gac xbejn Dios bën rën ree gac xbejnman.

¹⁴ 'iProbza lëjt mextr rajc ley në lëjt bënfarisew, bën rusquiee!, din raca'di lidx ree béngunaa bizëjb, abi' din guiëb bejn guial benza'c lëjt dád xchej rbejdx rniabidi Dios. Zeel mazri castiro' yayalidi.

¹⁵ 'iProbza lëjt mextr rajc ley në lëjt bënfarisew, bën rusquiee!, zizadi guidib-doo rguilidi bën gac ree xbejnidi, abi' chi ma beendi gan tijbaman al mazri xi'n xindxab rüjnidi laaman guial lojdi.

¹⁶ 'iProbza lëjt, bénlutia'p!, rëbidi: “Achet güünan bal id züjn bejn ni guneeman, majsi ma baza'taman yadooro! Jerusalén, per bal guza'taman ni or yu' ree lën yadoo guin, dxel ma rüjn naguiejn güünman ni guneeman.” ¹⁷ iNatontidi, wed natia'p lojdi! ¿Conin mazri lasajc: Or guin ya o yadoo beenle' or guin? ¹⁸ Rëb téeði: “Achet güünan bal id züjn bejn ni guneeman majsi ma baza'taman xialtar yadoo guin, per bal guza'taman gon dxiib loj altar guin, rüjn naguiejn güünman ni guneeman.” ¹⁹ iBénlutia'p! ¿Conin mazri lasajc

par lëjt: Gon guin ya o altar beenle' gon guin? ²⁰ Bén ruza't altar guin ad altar guintzan ruza'taman, nêgajc gra ni dxiib lojn ruza'taman. ²¹ Guiáad bén ruza't yadoo guin, ad yadoo guintzan ruza'taman, Diosan ruza'taman din lidxaman naj yadoo guin. ²² Abi' bén ruza't xanyabaa, Diosan ruza'taman nê lod zojbaman.

²³ ;iProbza lëjt mextr rajc ley nê lëjt bénfarisew, bén rusquiee!, rbëecadi bidtül, anís nêtëë comin ni rayal gudëedi loj Dios, abi' ad ruzoobtidi xley Moisejs ni mazri zojbloj, ad rüjntidi zi'c rayal, ad rayat lasa'di, ad za'dxi'ch tëtidi loj xnejz Dios. Laa reen rayal güündi, per ad cwëëladxidi gudëedi ni rayal loj Dios. ²⁴ ;Bénlutia'p, rajpidi cudad chitëë guiëbidi tijb bizëdlajs, abi' rguiëjbidi tijb camell!

²⁵ ;iProbza lëjt mextr rajc ley nê lëjt bénfarisew, bén rusquiee!, rusiadi xijch ree vajs nê xijch ree pliajt naj nadxuudx, guiáad luxdoodi guidxa ni dxuudx, nê guialgubaan nêtëë guialrdxe'ch lasa'. ²⁶ ;Bénfarisew lutia'p: Yalojxgaj gol basia, zian guiguuien waliquidi nayadi loj Dios!

²⁷ ;iProbza lëjt mextr rajc ley nê lëjt bénfarisew, bén rusquiee!, najdi zi'c baa nayë' culor naquich, guijcan rguien nix da't, per lënan guidxa ree xdxijjt bengüt nê graloj ree ni dxuudx. ²⁸ Zian najdi, niz loj ree bejn, rulüüdi benza'c, per luxdoodi guidxa guialrusquiee nê guialnaladx.

²⁹ ;iProbza lëjt mextr rajc ley nê lëjt bénfarisew, bén rusquiee!, rüjndi xbaa ree bén badëë xtiidx Dios loj ree bejn, abi' rüjnchaawidi xbaa ree bén goc benza'c, ³⁰ dxel rëbidi: “Bal nabajnan xtiamp ree dux bêngulalan, ad nêt dunujn nagüjt bén badëë ree xtiidx Dios loj ree bejn.” ³¹ Abi' con ni guin ree, rayünbeegajquidi guial loj xdiaa bén bagüjt ree bén badëë xtiidx Dios loj ree bejn zëedidi. ³² ;Gol balooxa ni guzuloj been xbéngulalidi!

³³ ;iBëndol, xi'n xindxab! ;Xhienaag laadi loj castiro' ni yu' gabijl? ³⁴ Zeel gaxhalan lojdi bén gudëë ree xtiidx Dios, bén rajc ree nê ree mextr. Per yu' reeman gugüjtidi, yu' reeman gucaadi loj crüjz, yu' tëë reeman quindi lën ree xyadoodi abi' sunalidi laa reeman guiedx por guiedx din güündi laa reeman xhienin. ³⁵ Zianan zeel guijquidi yab xtol gra ree bén bagüjt bén goc ree benza'c diizd Abel bén guban xnejz loj Dios xt Zacarías xi'n Berequías, bén bagüjt reeman lule' yadooro' Jerusalén. ³⁶ Diidxliczi rnin lëjt, xcasti gra ree ni guin yab guijc ree bén riga' loj guidxliuj yan.

Roon Jesús por Jerusalén (Lc. 13:34-35)

³⁷ Rëb tëë Jesús:

—;Bén Jerusalén, bén Jerusalén, rugüjtidi bén rudëë ree xtiidx Dios loj ree bejn abi' rucaaguiajdi bén rxhiaal Dios lojdi! ;Bëlczí volt guyënan nuchagan lasa'di, zi'c rüjn tijb guid ruchajg lasa' ree xi'nb lën xhiilib, per ad gutiëjbidi! ³⁸ Zianan zeel yaya'n ladxidi zi'c tijb guiedx lod achut zojb. ³⁹ Abi' rnin lëjt diizd yan ad zuguaatrudi naj, xt chi guidxin dxej guiëbidi: “;Nünjle' Dios bén guxhaalaman!”

24

Rëb Jesús guialyaze'n yadooro' (Mr. 13:1-2; Lc. 21:5-6)

¹ Chi barii Jesús lën yadooro' Jerusalén, ziaman, bibig ree xbejnman lojman balüü reeman gra ree xyu yadoo guin lojman. ² Abi' rëb Jesús loj reeman:

—Diidxiczi rnin, gra ni cuguaadi yu' dxej ni'qui tijb guiaj guin ad zaya'nt guijc stijban, gran yaze'n.

Ni gac chi gad guidxliuj nit

(Mr. 13:3-23; Lc. 21:7-24; 17:22-24)

³ La'tgaj zojb Jesús guijc guia' la Olivos, gubig ree xbejnman lojman, rëb reeman:

—Rayënan nal goc gac zian. ¿Xhie ree sen gac chi ma zidyob gui'til stijb, në chi ma zidyob nit guidxliuj?

⁴ Dxel rëb Jesús loj reeman:

—Gol gojp cudad achu gusquiee lëjt. ⁵ Din zien ree bejn gui't guiëb reeman guial por naj zëed reeman, guiëb tëë reeman: “Naj naj Cristo”, abi' zien bejn gusquiee reeman. ⁶ Per lëjt chi guiguiejni cayajc wadijl o zëëb diidz guial gac wadijl, ad guidxebidi din zian naj gac. Per ad wadxtint dxej nit guidxliuj.

⁷ Din til nacion con stijb nacion, në bën rajp gualrniabee con stijb bën rajp gualrniabee. Abi' gui't xudoxh në gubijn niz ni niz guie. ⁸ Gra ree nine ree gac chi ma suloj gualzi guin.

⁹ Dxel yayü ree bejn lëjt loj ree bën gusagzi lëjt, gugüjt reeman lëjt, abi' gra ree bénguidxliuj guidxe'ch lëjt guial najdi da bejnan. ¹⁰ Chi gac zian zien ree bejn gusa'n gualrliladx reeman naj, guidxe'ch lasa' reeman abi' yayü lasa' reeman loj ree bën ralen laa reeman. ¹¹ Gui't tëë zien ree bën gusquiee, guiëb reeman guial rudëed reeman xtiidx Dios, abi' zien bejn gusquiee reeman. ¹² Abi' guial dád zien ni mal gac, zien da't bën ad zëntri ree lasa'. ¹³ Per bën sudxi'ch loj gualrliladxaman naj, xt dxej chigra guibanman, laaman yayal xanyabaa. ¹⁴ Abi' xtiidx Dios ni canin lëjt yan guire'chan guidibczi guidxliuj din gagbee gra bejnan, dxelri nit guidxliuj.

¹⁵ 'Zianan zeel chi guguiaadi zojb tijb ni dxuudx, ni ad rüjnt sirv lën yadooro' Jerusalén, zi'c gunee Daniel bën badëë xtiidx Dios loj ree bejn (bën gool gui'ch guie ree, gol bignia'), ¹⁶ guial bën zojb ree Judea rayal guxüün reeman che reeman dajn. ¹⁷ Guiaad ree bën yë'p guijc yulidx dxejzii, ad yayu lëñülix reeman par tia' xhie xieen reeman. ¹⁸ Abi' ree bën za' dajn, ad yayejc reeman chigxii xab reeman. ¹⁹ ¡Probza ree béngunaa nüü xi'n o bën ca' ree xindobëz lën ree dxejzii! ²⁰ Gol gurejdx gunab Dios chitëë gac zian tiamp nayaag o dxej raziiladx ree bejn ya. ²¹ Din nadxel dád gualziro' chu', zi'c ad wayajctczi diidz guia'xchej chi gad guidxliuj gacchaaw ad yu' tëtë dxej gac zian. ²² Abi' bal id Dios gucwëëz guialzi chu' lën ree dxej guin, ni'qui tijb bejn ad zalaat, per gucwëëzaman laa reen por ree bën guleman.

²³ 'Lën ree dxejzii bal chu na lojdi: “Gol baguiaa, laa Cristo za' guie”, o “Gol baguiaa laaman za' ni”, ad bal chililadxidi. ²⁴ Din zi' zien ree bën gusquiee na guial laa reeman naj bën guxhaal Dios o na reeman guial laa reeman naj bën rudëed xtiidx Dios. Abi' züjn reeman milagr ree në graloj ni yadxaloj bejn din gusquiee reeman laa reeman, abi' bal zile'n xt në ree bën gulej Dios gusquiee reeman. ²⁵ Ma rni xgajn lojdi ni gac. ²⁶ Zeel bal chu na lojdi: “Gol baguiaa laa Cristo za' niz loj yujbidx”, ad bal chedi o na reeman lojdi: “Laa Cristo yuz' lëñü ni”, ad bal chililadxidi. ²⁷ Din zi' chi rë'p nijs, abi' rulaan bacha' niz lod rliejn gubijdx xt lod rëëzan, ziangajc gac dxej gui't Bén guxhaal Dios stijb. ²⁸ Bén rliladx ree naj gui't reeman lon, zi'c chi rado'p ree golbich lod naga' tijb begüt.

Gui't Bén guxhaal Dios stijb

(Mr. 13:24-37; Lc. 21:25-33; 17:26-30, 34-36)

²⁹ 'Chi ma gudëd ree dxej ni gac ree gualzi guin, guicajy loj gubijdx, ad zusnit bëew, guiyajb ree bajl xanyabaa abi' gra ree ni yu' xanyabaa guiniib. ³⁰ Dxel guiguinen tijb sen xanyabaa guial ma gui't Bén guxhaal Dios. Abi' gra ree bënguidxliuj goon da't chi guguaa reeman Bén guxhaal Dios, rdiinman bacha' zëëdaman loj zaj con xgualrniabee. ³¹ Dxel guixhiaal ree xianjlanan, abi' rejs da't gucwejdx reeman trompejt, din yadxajg lasa' ree bén guleman, bén za' ree gralad guidiblagaa guidxliuj.

³² 'Yan, gol baguaa xhienaag rajc con tijb yag higo. Chi ma naquie'n xidxan, chi ma caydxib ree xbalagan, lëjt ragbee guial ma zëëd tiamp nalaa. ³³ Ziangajc chi guguaadi ma cayajc ree ni guin, gagbeedi guial ma zidyob gac zi'c rnin lëjt. ³⁴ Diidxliczi rnin lëjt guial gra ree ni guin gac chi gad ree bén naban yan guiët. ³⁵ Guidxliuj në xanyabaa zanijt reen, per da diidxan ad zanijtan.

³⁶ 'Per achut ragbee xhie dxejn në xhie horan gac zian, ni'qui ree anjl yu' xanyabaa, ni'qui Xi'n Dios ad ragbeet. Tijbzi da Dadan Dios ragbee.

³⁷ 'Zi'c goc gulal chi guban Noé, zian gac chi yaguaad Bén guxhaal Dios. ³⁸ Din chi gad Dios guixhiaal guiadoxh loj guidxliuj, bejn ree, raw reeman, ré' reeman, ruxhliaa reeman, rudëë tëë xi'n reeman ruxhliaa, xt chi bidxin dxej guyu Noé lën barcwro' ni beenman. ³⁹ Abi' ad bidxgatczi reeman, dxejlci gol guiadoxh abi' zinë nijs laa reeman, ziangajc gac chi yaguaad Bén guxhaal Dios. ⁴⁰ Dxej guin, lod za' tio'p ree xinguaaw dajn, tijbix yaza, stijbix yaya'n. ⁴¹ Guiaad lod cayojt tio'p ree bëngunaa, tijbaman yaza, stijbaman yaya'n.

⁴² 'Zeel gol guzujsin din ad ragbeetidi xhie dxej yaguaad xDadidi. ⁴³ Gol been xgab, bal tijb bejn ragbee xhie guxhin xhie tëë horan chu' xingubaan lidxaman cwanx, zabejnaaman abi' ad zatiëjbtaman chu' xingubaan guin lidxaman. ⁴⁴ Zianan zeel gol guzujsin, din ad ragbeetidi dxejlci yaguaad Bén guxhaal Dios.

Mojs za'c në mojs guijdx (Lc. 12:41-48)

⁴⁵ 'Chu lëjt naj zi'c tijb mojs rusa'n xpatronx lidxaman din gulenx gra ree mojs, gudëë tëëx ni gaw reeman chi gal hor? ⁴⁶ Xiquilbaa mojs cayüjn dxiin zi'c rayal chi yadxin xpatronx. ⁴⁷ Din diidxliczi rnin lëjt, patron guin zusa'n gra xieenman loj mojs guin. ⁴⁸ Per bal naj mojs guin mojs dxuudx, naladix: "Zaglaari da patronan." ⁴⁹ Zianz suloj gusagzix los demazri ree mojs guin, suloj gawix, gui'è'në tëëx xingu' ree. ⁵⁰ Abi' yadxin xpatronx tijb dxej ni ad ragbeetix ad rbëz tëëtix laaman. ⁵¹ Dxel dád castiro' gudëëd patron guin laax, guixhiaal tëëman laax lod rayal ree bén rusquiee, lod goonx gaw tëë layix.

25

Xcwent chii biinxdüb

¹ Basnuu Jesús rëbaman:

—Loj xgualrniabee Dios gac zi'c guzac ree chii biinxdüb we loj tijb guialruxhliaa cwa' tijbgaj xguij reem bilëz reem xin cuxhliaa guin. ² Gaay reem been xgab xhie güün reem, per za gaay reem ad beent xgab. ³ Biin ad beent ree xgab guin binë xguij reem per ad binët reem mazri sejt ni che'cnë ree guij guin. ⁴ Guiaad ree biin been xgab guin xhie güün reem, binë reem za tib lumejtgaj sejt con xguij reem. ⁵ Abi' guial goglaa badxin xinruxhliaa guin, bi't bacaal loj gra reem, abi' goodyëjs reem. ⁶ Cost garol guiaal, biguien cha' tijb bejn rëbaman: "iLaa xinruxhliaa guin ma ziaad, gol tagchaaglojx!"

⁷ Dxel bixche gra ree biinxdüb guin, abi' beenchaaw xguij reem. ⁸ Abi' gaay ree biin ad beent xgab guin xhie güün reem, rëb reem loj za gaay biin been xgab guin: “Gol baneesii tibda'n xsejtidi, din dux guijn ma cayü' reen.” ⁹ Per badxi' reemin rëb reem: “Yajqui, din dool ad zadaantan par lëjt ni'qui par dunujn. Zagdxeli gol wëj lod rdo'n din siidan par lëjt gajc.” ¹⁰ Abi' la'tgaj zë reem zisii reem sejt, bidxin xinruxhliaa guin, abi' za gaay ree biin been xgab guin guyunë reem laax loj guialruxhliaa guin dxel bida'cw ro' port. ¹¹ Dxel chi badxin za gaay biin bisii ree sejt guin, rëb reem: “iDad, dad, guxhal din yadxu'n!” ¹² Per badxi'xan rëbix: “Diidxliczi rnin, ad nünbeetan lëjt.”

¹³ Dxel basnuu Jesús rëbaman:

—Zeel gol guzusin din ad ragbeetidi goc yaguaaad Bén guxhaal Dios.

Xcwent bén badëéd milia

¹⁴ Dxel rëb tée Jesús:

—Xgualrniabee Dios naj zi'c tijb bén ma grii cheman zijt, abi' gurejdx ree xmojsaman, basa'n xmiliaman loj reeman. ¹⁵ 'Loj tijbaman badëëman gaay mil cintabl, loj zatijbaman badëëman zatio'p milan, guiáad loj zatijbaman badëëman za timilan. Loj tijbgaj reeman badëëdaman ni naladxaman zajc güünnë reeman dxiin, dxel briitaman zëman zijt. ¹⁶ Abi' mojs cwa' gaay mil cintabl guin beennëman laan dxiin abi' beenman gan za ziant gajcan. ¹⁷ Ziangajc been mojs cwa' tio'p milan, beenman gan za tio'p mil gajcan. ¹⁸ Per mojs cwa' timil cintabl guin bitëenman luyuj persi baquie'chaman cintabl guin ni badëéd xpatronman.

¹⁹ 'Gojc xchej da't dxel badxin patron guin abi' babëëman cwent con la reeman. ²⁰ Yaløj bidxin mojs cwa' gaay mil cintabl guin abi' bayüman zagaay milan, rëbaman: “Dad, lüj banee gaay milan lon, yan, laa za gaay milan guie ni benan gan.” ²¹ Dxel rëb patron guin lojman: “Zagdxen, mojsza'c, zagdxee beenl, guial zagdxee beenl con tibda'n ni banen, yan, gunen mazri guial loj ni banen. Guyu, babaa con naj.” ²² Zianz bidxin mojs cwa' zatio'p mil cintabl guin rëbaman: “Dad, lüj banee tio'p milan lon, yan, laa zatio'p milan guie ni benan gan.” ²³ Dxel rëb patron guin lojman: “Zagdxen, mojsza'c, zagdxee beenl, guial zagdxee beenl con tibda'n ni banen, yan, gunen mazri guial loj ni banen. Guyu, babaa con naj.”

²⁴ 'Per chi bidxin mojs cwa' timil cintabl guin, rëb loj xpatronman: “Dad, naj ragbee guial ad rayatil bejn, rabëël guialnaza'c lod ad rgu'til bin, rato'p tée'l guialnaza'c lod ad rtie'chtel bin. ²⁵ Zeel bidxeban abi' biquiechan xmilial lën liuj, yan, laa xmilial guie.” ²⁶ Badxi' patron guinan, rëbaman: “Mojs mal, mojs ploj, bal ragbeel rabën guialnaza'c lod ad rgu'tan bin, ratop tëen guialnaza'c lod ad rtiechtan bin. ²⁷ Adil nilu' da milian lën bancw, din chi naguialan naca'nan con xi'nan ni beenan gan.” ²⁸ Dxel rëb patron guin loj ree bén za' yagaj: “Gol biquied timil cintabl guin lojx, gol badëëdan loj xin rajp chii milan. ²⁹ Din bén rajp zaca'man mazri, abi' gapaman zro' da't, per bén rajp ta'nzi, xt ni rajpaman chiquied lojman. ³⁰ Abi' mojs ad rünjt sirv guin gol bazaalix xchuni lod nacay, lod goonx, lod gaw tée layix.”

Xguialguxtis Jesús

³¹ 'Chi gui't Bén guxhaal Dios, gui'taman con xgualrniabeeman, në con gra ree xianjlanan din cweman lod nabeeman. ³² Dxel gra ree bénguidkliuj yado'p lojman, abi' cweman laa reeman zi'c rünj tijb bén rajp xiil chi rabëëcaman xiil ree loj ree dxib. ³³ Abi' guzujman bén naj ree xbejnman xladbeeman, guiáad ree bén ad najt xbejnman guzujman xladruvejsaman.

³⁴ Dxel guiëb rey guin loj ree bën za' xladbeeman: “Gol guda bën ma nünjle' da Dadan. Gol guyu loj gualrniabee najcchaaw par lëjt, diidz chi go'tchaaw guidxliuj. ³⁵ Din chi gulaanan, baneedi ni gudawan, chi we'can nijs, baneedi ni gu'n, chi bizaan zi'c tijb benzit, baneedi lod baya'nan. ³⁶ Chi byaadx da xaban, lëjt baneë ni go'tan, chi gogxuun, bidgatixlojdi naj, abi' chi guyu'n ladxguiib, bidganajdi naj.” ³⁷ Dxel guiëb ree bën za' ladbee guin: “Dad, ¿goc baguiaan lüj rliaanl, abi' baneen ni gudawil?, ¿o goc baguiaan lüj we'quil nijs, abi' baneen nijs gu'l? ³⁸ ¿Goc baguiaan lüj zizal zi'c tijb benzit, abi' baneen lod baya'nl, o goc biyaadx xabil, abi' baneen ni gotil? ³⁹ ¿Abi' goc baguiaan lüj ragxuul, o guyul ladxguiib, abi' budganajn lüj?” ⁴⁰ Dxel guiëb rey guin loj reeman: “Diidxliczi rnin lojdi, gra yudar beendi da bejn reen majsi ad najt reeman bën lasajc, najn beendi yudar.”

⁴¹ Dxel guiëbaman loj ree bën za' xladruvejsaman: “Gol biquied lon, benmal gol chej loj bajl ni ad yu't dxej yayü' ni ma naj par xindxab në ree xbejnx. ⁴² Din chi gulaanan, ad baneetidi ni niawan, chi we'can nijs, ad baneetidi ni nië'n. ⁴³ Chi bizaan zi'c benzit, ad baneetidi lod naya'nan, chi biyaadx da xaban, ad baneetidi ni nia'cwan. Abi' chi gogxuun në chi guyu'n ladxguiib, ad bidganajti naj.” ⁴⁴ Dxel guiëb reeman lojman: “Dad, ¿goc baguiaan lüj rliaanl o re'quil nijs, o zizal zi'c tijb benzit, o goc baguiaan lüj ryaadx xabil, o ragxuul, o yu'l ladxguiib, abi' ad bayidxga'tan lüj?” ⁴⁵ Abi' yadxi'man laan guiëbaman: “Diidxliczi rnin lëjt, gra ni ad beentidi din nünjdi yudar da bejn reen majsi ad najt reeman bën lasajc, najn ad beentidi yudar.” ⁴⁶ Laa reeman gayal loj casti tiblayaa, guiáad ree bën been zi'c rayal, laa reeman rayal gualnaban tiblayaa con Dios.

26

Baya'n reeman diidx xhienaag guiniaaz reeman Jesús (Mr. 14:1-2; Lc. 22:1-2; Jn. 11 :45-53)

¹ Chi gulox gunee Jesús diidx guin ree, dxel rëb loj ree xbejnman:

² —Lëjt ragbee guial ryaadx zatio'p dxejzi guial guidxin lanij pascw, abi' Bën guxhaal Dios yayü' ree bejn laaman din tiaman loj crüjz.

³ Lën ree dxejzii badxaag lasa' ree bixhioz rniabee ree bixhioz, con xguxtis ree bën Israel, lidx Caifás quijb bixhioz zojbloj. ⁴ Ni baya'n reeman diidx xhienaag gusquiee reeman Jesús din guiniaaz reeman laaman, abi' gugüjt reeman laaman. ⁵ Per rëb reeman:

—Ad zaguieent ree zian loj lanij guin chitëë gac naquie' luguiedx guin.

Ruroob tijb béngunaa perfum guijc Jesús (Mr. 14:3-9; Jn. 12 :1-8)

⁶ Chi za' Jesús luguiedx Betania lidx Simón, bën rniee reeman Leproso, ⁷ bidxin tijb béngunaa ca'man tijb lumejt guidxan perfum ni lasajc wayëjx. Abi' la'tgaj zojz Jesús xan mex, baroobaman perfum guin guijc Jesús. ⁸ Chi baguiaa ree xbejn Jesús ni been béngunaa guin, dád bidxe'ch reeman, abi' rëb reeman:

—¿Chexc zeel bixie' perfum guin? ⁹ Zile' nido'n zro' da't din nünjan yudar bënprob ree.

¹⁰ Chi bigueijn Jesús ni canee reeman, rëbaman loj reeman:

—¿Chexc zeel rdxe'chidi béngunaa guin? Zagdxë naj ni beenman naj. ¹¹ Din bënprob guin ree zianczi za'në reeman lëjt, sa'n naj ad ziantczi gazunë'n lëjt.

¹² Abi' ni baroobaman perfum guin guican, rën guiëban guial ma beenchaaw

xgajman naj par chi guiguie'chan. ¹³ Diidxliczi rnin, bantëëz guin guire'ch xtiidxza'c Dios loj guidxliuj, zü ree bejn gra ni been béngunaa guin por naj, din gusaaladx reeman laaman.

Rayü Judas Jesús

(Mr. 14:10-11; Lc. 22:3-6)

¹⁴ Loj guidxiptio'p ree xbejn Jesús, bén la Judas Iscariote, bigneenëman bixhioz rniabee ree bixhioz, ¹⁵ rëbaman loj reeman:

—¿Plac guneedi din yanen Jesús lojdi?

Abi' badëëd reeman gajlbichii milia plajt lojman. ¹⁶ Diisd dxejzii guzulojman raguiilaman mod xhienaag yayüman Jesús.

Gudawnë ree xbejn Jesús xche

(Mr. 14:12-25; Lc. 22:7-23; Jn.13 :21-30; 1Co.11 :23-26)

¹⁷ Dxej ni guzuloj lanij ni raw ree bejn guiadxtil ni ad yu't levadur, gubig ree xbejn Jesús lojman, rëb reeman:

—¿Ban guin rënl yaguieenchaawan ni yadaaw ree guxhin lanij pascw?

¹⁸ Badxi' Jesúsán rëbaman:

—Gol chej Jerusalén lidx bén guin, gol biguiedx lojman: “Na Mextr: Ma bidxin xihoraman abi' rënman tédaman pascw lidxil con ree xbejnman.”

¹⁹ Dxel been ree xbejnman zi'c rëbaman, been tëë reeman ni gaw reeman guxhin lanij pascw.

²⁰ Chi gure guiaal, zobj Jesús xan mex con guidxiptio'p ree xbejnman.

²¹ Abi' la'tgaj cayaw reeman, rëbaman loj reeman:

—Diidxliczi rnin, tijb gajc lëjt yayü naj.

²² Abi' dád guyunaya reeman, zianz guzuloj rniabdiidx tijbgaj reeman loj Jesús, rëb reeman:

—¿Najn ya, Dad?

²³ Badxi' Jesúsán, rëbaman:

—Bén cayaw loj pliajt ni cayaw gajcan, laaman yayü naj. ²⁴ Walican, Bén guxhaal Dios naj guial sacaman zi'c rëb loj xtiidx Dios. Per jprobza bén yayü laaman!, zagdxeli naj par laaman ad niutaman loj guidxliuj.

²⁵ Dxel Judas bén yayü Jesús, gunabdiidxaman rëbaman:

—Mextr, ¿wen najn ya?

Badxi' Jesúsán, rëbaman:

—Lüjn.

²⁶ La'tgaj cayaw reeman, cwa' Jesús guiadxtil, badëëdaman quixtëë loj Dios. Dxel gula'man guiadxtil guin gudi'saman laan loj ree xbejnman, rëbgajman:

—Gol gudaw guiadxtil guie, laan naj da cuerpan.

²⁷ Dxel cwa'man tib cojp vin, chi gulox badëëdaman quixtëë loj Dios, badëëdaman cojp guin loj reeman, rëbgajman:

—Gol gu' gradi loj cojp guie. ²⁸ Din laan naj da rejnan ni gaxhie'n chi guiëtan por zien ree bénguidxliuj. Din por da guialgüjtan guixal tijb nejz cüb xhienaag gap ree bejn perdon loj Dios por xtol reeman. ²⁹ Abi' diidxliczi rnin lëjt ad yu'tri dxej guië'n vin rajcchaawnë uv, xt chi guidxin dxej guië'në'n lëjt vin cüb lod rniabee da Dadan.

Rëb Jesús guial guiëb Bëd ad nünbeetaman laaman

(Mr. 14:26-31; Lc. 22:31-34; Jn.13 :36-38)

³⁰ Chi gulox biil reeman tijb cant par Dios, dxel zë reeman guijc guia' Olivos. ³¹ Abi' rëb Jesús loj reeman:

—Gradi zabëeladx naj yan guxhin, zi'c ca loj xtiidx Dios lod rëb: “Gugüjtan bën rajp ree xiil, dxel guire'ch ree xiil guin.” ³² Per chi yabanan, yaloj naj ganeed ga gajn Galilea dxelri gui'tidi.

³³ Dxel rëb Bëd lojman:

—Majsi gra reeman cwëeladx lüj per naj ad yu't dxej gabëladxan lüj.

³⁴ Per rëb Jesús lojman:

—Diidxliczi rnin lojl, yan guxhin gajc chi gad guid cwdixa', mal rëbil choon volt guial ad nünbeetil naj.

³⁵ Abi' rëb Bëd lojman:

—Majsi guiëtnë'n lüj, per ad yu't dxej guiën guial ad nünbeetan lüj.

Abi' gra ree xbejn Jesús ziangajc rëb reeman.

Gurejdx gunab Jesús Dios lod la Getsemani

(Mr. 14:32-42; Lc. 22:39-46)

³⁶ Chi bidxin Jesús con ree xbejnman tijb luar la Getsemani, rëbaman loj reeman:

—Gol gurejsii guie, la'tgaj gan ni din gabedx ganaaban Dios.

³⁷ Dxel zinëman Bëd con grop ree xi'n Zebedeo, zianz guzuloj cayunayaman abi' ad nixtri yu' luxdooman. ³⁸ Zianz rëbaman loj reeman:

—Dád yu'naya luxdoon, rulüü ma gugüjt guialyu'naya guin naj. Gol baya'n guie ad gaayëjsidi.

³⁹ Dxel zë Jesús mazri delant abi' gurerulojman gurejdx gunabaman Dios, rëbaman:

—Dad, bal zile' yabëël naj loj guialzi ni gadëëdan, per ad gac zi'c rënan, gac zi'c rënl.

⁴⁰ Dxel baguiajman lod za' ree xbejnman, abi' baguiaaman naga'yëjs reeman, zianz rëbaman loj Bëd:

—¿Wen ni'qui tib hor ad bile't natie'ch xbacaalidi ya, din sunëdi naj? ⁴¹ Gol batië'ch xbacaalidi gol gurejdx gunab tëë Dios, chitéë güün xindxab lëjt gan, din rënquidi güüdi zi'c rayal, per xcuerpidi ad rtiëjbtan.

⁴² Ni barojp volt wejman gurejdx gunabaman Dios, rëbaman:

—Dad, bal id zile' téd guialzi ni naj gadëëdan, bal rüjn naguejgn gadëëdanan gacri zi'c rënl.

⁴³ Chi badxinman lod za' ree xbejnman stijb, laa reeman naayëjs guial dád guidxa baccaal loj reeman. ⁴⁴ Dxel basa'nman laa reeman stijb, zëman, bayon volt cabejdx canabaman Dios con diidx guin gajc ree. ⁴⁵ Chi badxinman lod za' ree xbejnman, rëbaman loj reeman:

—¿Sta naga'yëjsidi ya, cayziiladx tëëdi? Guiáad Bén guxhaal Dios ma bidxin hor yayü reeman laaman loj ree bëndol. ⁴⁶ Gol bixche, yo' ree, gol baguiaa laa bën yayü naj ma zëëd gajxh.

Gunaaz reeman Jesús

(Mr. 14:43-50; Lc. 22:47-53; Jn.18 :2-11)

⁴⁷ Sta caneenë Jesús bën naj ree xbejnman, chi bidxin Judas bën naj gajc tijb xbejn Jesús. Bidxinnëman zien ree bejn, ca' reeman espad në yag. Guxhaal ree bixhioz rniabee ree bixhioz con ree xguxtis ree bën Israel laa reeman. ⁴⁸ Abi' Judas bën bayü laaman mal rëbxgajman loj ree bën guin: “Bën gawan xid xhajg, laaman raguuilidi, gol gunaazaman.” ⁴⁹ Chi bidxin Judas bibigaman loj Jesús, dxel rëbaman:

—jXchan, Mextr!

Laa gudaw gajcaman xid xhajgaman.

⁵⁰ Abi' rëb Jesús lojman:

—Judas, been ni zidguieenl.

Dxel gubig ree b́en guin, gunaaz reeman Jesús persi zinè reeman laaman.

⁵¹ Per tijb ree b́en za'nè Jesús yagaj, gulèè xiespadaman dxel gut'ľman guidiajg xmojs quijb bixhioz zobjloj. ⁵² Dxel rēb Jesús lojman:

—Bagu'chaaw xiespadil xluaran. Din b́en rdil con espad, con espad rējtaman. ⁵³ ¿Wen, id ragbeel ya guial zajc gabedx ganaab da Dadan, abi' laa guixhiaal gajcaman por mil ree xianjľaman din gagnè reeman naj? ⁵⁴ Per ¿xozga gac cumplid zi'c ca loj xtiidx Dios ni rēb guial rŭjn naguiejn gac ree ni cayajc?

⁵⁵ Loj hor guin gajc rēb Jesús loj ree benzien guin:

—¿Chexc zeel zēedidi con espad nē con yag din guiniaazidi naj zi'c tijb xingubaan? Guixie guixie guzunē'n lējt lēn yadooro' Jerusalén balŭn lējt xtiidx Dios, abi' ad gunaaztidi naj. ⁵⁶ Per gra ree ni guie cayajc din gac cumplid ni bacaa ree b́en badēè xtiidx Dios loj ree bejn.

Loj hor guin gajc baxŭn ree xbejn Jesús, guro'nladx reeman laaman.

Za' Jesús loj ree guxtis Israel

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ B́en gunaaz ree Jesús binè reeman laaman lidx Caifás, quijb bixhioz zobjloj, yagaj badxaag lasa' ree mextr rajc ley con ree xguxtis ree b́en Israel.

⁵⁸ Abi' Béd zijt zijt nalaman Jesús, xt lule' lidx bixhioz guin. Dxel guyuman abi' gurejnēman b́en rajp ree lidx bixhioz guin, din guguaaman xhie güünnè ree b́en guin Jesús.

⁵⁹ Guiaad ree bixhioz rniabee ree bixhioz con gra ree guxtis guin raguuil reeman xhie gusquiee reeman din gutedia' reeman Jesús din nabee reeman guiētaman. ⁶⁰ Per ad radxejlt xhienaag gutedia' reeman laaman majsi zien ree b́en basquiee. Dxel bibig zatio'p reeman, ⁶¹ rēb reeman:

—B́en guie rēb: “Zile' yase'nán xyadoo Dios abi' loj choon dxejzi yayŭnanan.”

⁶² Dxel guzuli quijb bixhioz zobjloj guin, rēbaman loj Jesús:

—¿Nid zadxi'ľan ya? ¿Waliqui ni canee ree b́en guin contr ľŭj ya?

⁶³ Per achet rēb Jesús. Dxel rēb bixhioz guin lojman:

—Por Dios b́en naban, rniabeen ľŭj guna diidxli. Guna bal ľŭjn naj Cristo, Xi'n Dios.

⁶⁴ Badxi' Jesúsán rēbaman:

—Waliquil. Rni tēen lējt, zuguaadi B́en guxhaal Dios zobjaman xľadbee Dios b́en rajp guialrniabee abi' zuguaa tēedi gui'taman loj zaj xanyabaa.

⁶⁵ Chi biguiejn bixhioz guin zian, gudixya' xabaman, rēbaman:

—Diosan caneequidx b́en guin. ¿Xhie mazri rŭjn naguiejn yadiil ree testiw? Lējt gajc ma biguiejn guial rnieequidxaman Dios. ⁶⁶ Yan, ¿xhie nadi?

Badxi' ree b́en guinan rēb reeman:

—Ryal guiētix.

⁶⁷ Dxel bacojp xhiejn reeman lojman, gudijn reeman laaman, yu' tēè reeman wēèz ro'man, ⁶⁸ rēb reeman lojman:

—Bal ľŭjn naj Cristo, guneeya' chu gudín ľŭj.

Rēb Béd ad nŭnbeetaman Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ La'tgaj zobj Béd lule' lidx bixhioz guin, gubig tijb biin rŭjn dxiin yagaj, rēbim lojman:

—Nē ľŭj nal Jesús, b́en Galilea.

⁷⁰ Per Béd gurexuuman, rëbaman niz loj gra reeman:

—Ad ragbeetan xhienin rnieel.

⁷¹ Chi zëman niz ro' port baguiaa stijb biin rüjn dxiin yagaj laaman, abi' rëbim loj ree bën riga' yagaj:

—Në bën guin nal Jesús bën Nazaret.

⁷² Per Béd gurexuuman stijb, xt baza'taman Dios, rëbaman:

—Ad nünbeetan bën guin.

⁷³ Dxel ad gojct xchej, gubig ree bën riga' yagaj loj Béd, rëb reeman lojman:

—Laa rguien gajc në lüj naj xbejn reeman, din zi'cgajc rniee reeman rnieel.

⁷⁴ Per Béd baza'taman Dios, rëbaman loj reeman:

—Dios gudëed naj casti bal rusquieen, per ad nünbeetan bën guin.

Hor guin gajc guridxa' tijb guïd. ⁷⁵ Abi' basaaladxaman guial rëb Jesús lojman: “Chi gad guïd cwidxa', mal rëbil choon volt ad nünbeetil naj.” Dxel barii Béd yagaj abi' dád naya biinman.

27

Binë reeman Jesús loj Pilato

(Mr. 15:1; Lc. 23:1-2; Jn.18 :28-32)

¹ Chi bani luyuj, gra ree bixhioz rniabee ree bixhioz con ree guxtis Israel baya'n reeman diidx xhienaag güün reeman din guïet Jesús. ² Dxel guxhii reeman laaman abi' binë reeman laaman loj gobernador Pilato.

Güjt Judas

³ Dxel Judas, bën bayü Jesús, chi baguiaaman guial ma naj guïet Jesús, guyunayaman, abi' bayüman gajlbichii milia plajt guin loj ree bixhioz rniabee con loj ree guxtis Israel, ⁴ rëbaman loj reeman:

—Ma benan dol guial banen tijb bën achet dol rajp.

Badxi' reeman laan rëb reeman:

—Xhieczy yaguieenan, ¡lüt gunaj!

⁵ Abi' bazaal Judas milia guin lën yadooro' Jerusalén zianz bariiman wejman bigxhii yëjnman.

⁶ Dxel bato'p ree bixhioz rniabee guin milia guin, abi' rëb reeman:

—Ad rayalt yadxé' ree milia guin lën lod ru gon, din con laan bio' bën guïet.

⁷ Dxel be reeman diidx, abi' con milia guin guzii reeman xguidxliuj bën rüjn trast bajn ree, din gacan lod guiguie'ch ree benzit. ⁸ Zeel xt yan la guidxliuj guin Yuj Rejn. ⁹ Zian gojc cumplid ni gunee Jeremías, bën badëe xtiidx Dios loj ree bejn, chi rëbaman: “Cwa' reeman gajlbichii milia plajt, prejs ni rëb ree bën Israel lasajcaman, ¹⁰ abi' con milia guin guzii reeman xguidxliuj bën rüjn trast bajn ree, zi'c gunabee Dios naj.”

Rniabdiidx Pilato loj Jesús

(Mr. 15:2-5; Lc. 23:3-5; Jn.18 :33-38)

¹¹ Dxel badxig reeman Jesús loj gobernador Pilato, abi' gunabdiidxaman loj Jesús, rëbaman:

—¿Lüjn naj xrey ree bën Israel ya?

Badxi' Jesúsán, rëbaman:

—Najcan.

¹² Abi' chi cutedia' ree bixhioz rniabee ree bixhioz con ree guxtis Israel laaman, achetczy radxi'man. ¹³ Dxel rëb Pilato lojman:

—¿Nid riguiejnl gra ni canee reeman contr lüt ya?

14 Per Jesús ni'qui tijb diidx ad badxi'taman, zeel dád badxa loj gobernador guin.

Gunabee reeman guiët Jesús

(Mr. 15:6-20; Lc. 23:13-25; Jn.18 :38–19:16)

15 Lën ree dxej lanij, ruslaa gobernador Pilato tijb bën yu' ladxguuib bën guiëb ree bénguiedx guin laa, zi'c naj xcostumbr reeman. 16 Lën ree dxejzii yu' Barrabás ladxguuib, tijb bën nünbee ree bejn niz ni niz guie. 17 Abi' chi badxaag lasa' gra ree bejn, gunabdiidx Pilato loj reeman, rëbaman:

—¿Chu rëndi guslaan? ¿Barrabás ya, o Jesús, bën rëb ree bejn naj Cristo?

18 Rëbaman zian guial gogbeeman ganaxzi guialnadédlojn zeel bayü reeman Jesús.

19 La'tgaj zojb Pilato lod rüjnman guialguxtis, bidxin xruson lacheelaman, rëbaman lojman: “Adxhie günnël bën guin achet dol rajpaman, din dád nadxuudx gune'xchalan laaman nuche.”

20 Per bixhioz rniabee ree bixhioz con ree guxtis Israel, badxe' reeman diidx gra ree bejn persi gunab reeman guslaaman Barrabás, guiáad Jesús guiëtaman. 21 Gunabdiidx Pilato loj reeman stijb, rëbaman:

—¿Chu loj grop reeman rëndi guslaan?

Badxi' reeman laan rëb reeman:

—Barrabás.

22 Abi' rëb Pilato loj reeman:

—¿Xhieza günnë'n Jesús, bën rëb ree bejn naj Cristo?

Badxi' gra reeman laan rëb reeman:

—¡Bacaaman loj crüjz!

23 Abi' rëb Pilato loj reeman:

—¿Xhieza ni mal beenman?

Per laa reeman mazri rejs rbixdiaj reeman, rëb reeman:

—¡Bacaaman loj crüjz!

24 Chi baguiaa Pilato guial achet rile' günnman, al mazri naquie' cayüjn ree bën guin, dxel cwa'man nijs abi' banaaman delant loj gra reeman, rëbaman: —Achet dol ra'pan guial guiët bën guie, xcwentidan.

25 Badxi' gra ree bën guinan rëb reeman:

—¡Du guijcan, nê guijc du xi'n nan cwiban guial guiëtaman!

26 Dxel baslaa Pilato Barrabás, zianz gunabeeman gudijn reeman Jesús abi' bayüman laaman din gucaa reeman laaman loj crüjz.

27 Zianz xsuldad ree gobernador guin binë reeman Jesús lën palas lod bado'p gra ree suldad, gadëd lod za'man. 28 Dxel gulëë reeman xabaman bascajcw reeman laaman tijb lajd xnia. 29 Abi' beenchaaw reeman tijb coron guiëjch badxe' reeman laan guijcaman, zianz бага's reeman tijb yag ladxamaan ladbee. Dxel bazuxib reeman lojman, ruze' reeman laaman, rëb reeman:

—¡Guibanri xrey ree bën Israel!

30 Abi' rucojp xhiejn reeman lojman, laagajc tëë yag ni ca'man rugaz reeman guijcaman. 31 Chi gulox baze' reeman laaman, dxel babëë reeman lajd xnia guin ladaman, bascajcw reeman xabaman, zianz zinë reeman laaman din gucaa reeman laaman loj crüjz.

Cwa Jesús loj crüjz

(Mr. 15:21-32; Lc. 23:26-43; Jn.19 :17-27)

32 Chi zinë reeman Jesús, badxaagloj reeman tijb bën Cirene, laman Simón, abi' been reeman laaman naguejn byaaman xcrüjz Jesús.

³³ Chi bidxin reeman tijb luar la Gólgota (rën guiëban Xluar Calaver), ³⁴ ni badëed reeman vin, no'chan nijs nala da't guië' Jesús. Per chi beenman laan prueb, ad cwëjbtaman nië'man laan.

³⁵ Chi gulox bacaa reeman laaman loj crüjz, dxel gudxijt reeman suert guijc xabaman din yala' reeman laan. ³⁶ Dxel gurej reeman yagaj din gap reeman laaman. ³⁷ Abi' guijc crüjz guin bacaa reeman lejtr ni rëb, chexc zeel cwaman loj crüjz. Rëb lëjtr guin: "BEN GUIE NAJ JESÚS XREY REE BEN ISRAEL."

³⁸ Në tio'p xin gubaan bacaa reeman loj crüjz, tijbix xladbee Jesús stijbix xladruvejsaman. ³⁹ Abi' ree bën rdëd, rnieeguijdx reeman Jesús, runij guijc reeman, ⁴⁰ rëbgaj reeman:

—Lüj rëb, nuse'nl yadooro' abi' loj choon dxejzi nayünlan, baslaa lüj gajc. Bal walil najl Xi'n Dios baguiajt loj crüjz guin.

⁴¹ Ziangajc ree bixhioz rniabee ree bixhioz në ree mextr rajc ley con ree guxtis Israel, ruze' reeman Jesús, rëb reeman:

⁴² —Baslaax ben ren ree, abi' ad rajct ruslaa laagajquix. Bal wali najx xrey ree bën Israel, yaguiajtix loj crüjz guin, din yaliladx reex. ⁴³ Rililadxix Dios. ¡Yan, guslaaza Dios laax, bal wali rënman laax, din rëbix: "Xi'n Dios najx"!

⁴⁴ Abi' nëgajc ree xingubaan ca cwë'man ruze' laaman.

Güjt Jesús

(*Mr. 15:33-41; Lc. 23:44-49; Jn.19 :28-30*)

⁴⁵ Dxel diizd garol dxej bicajy loj guidib guidxliuj, xt raca choon wadxe.

⁴⁶ Loj horzii gurixdiajman rejs da't, rëbaman:

—Elí, Elí, ¿lama sabactani? —rën guiëban: Dios, Dios, ¿chexc zeel gulëeladxil naj?

⁴⁷ Yu' ree bën za' yagaj, chi biguiejn reeman, rëb reeman:

—Laaman cabejdx Elías, bën badëë xtiidx Dios loj ree bejn.

⁴⁸ Laa baxüün gajc tijbaman bicajdxaman tijb xiil loj vinagr, abi' bacaaman laan loj tijb yag zianz badxigaman laan ro' Jesús din guië'man laan. ⁴⁹ Per rëb los demazri reeman:

—Basa'nx, din yaguiaa ree don zidgaslaa Elías laax ya.

⁵⁰ Zianz gurixdiaj Jesús rejs da't stijb, dxel güjtaman. ⁵¹ Loj hor zii goxya' lajd nal lën yadooro' Jerusalén gojcan tio'p lala', diizd guijc guin xt guia' guin goxya'. Abi' guxu, gula' tëë ree guiajro'. ⁵² Guiáad ree baa bixal reen, abi' zien ree bejn bën naj xbejn Dios, bën ma güjt ree baban. ⁵³ Dxel chi baban Jesús, barii lën xbaa reeman, abi' guyu reeman Jerusalén, lod baguiaa zien ree bejn laa reeman.

⁵⁴ Dxel suldad rniabee ree suldad në gra ree suldad za'nëman yagaj canaj reeman Jesús, chi baguiaa reeman caxu në gra ni cayajc, dád bidxeb reeman abi' rëb reeman:

—Walican Xi'n Dios bën guin.

⁵⁵ Zien ree bëngunaa guzanal Jesús diizd Galilea, bën been tëë ree laaman yudar, za' reeman zijt ruguiaa reeman ni cayajc. ⁵⁶ Loj reeman no'ch María Magdalena, në Li xníaa Santiaaw con Xiëb nëtëë xníaa ree xi'ngaan Zebedeo.

Biguie'ch Jesús

(*Mr. 15:42-47; Lc. 23:50-56; Jn.19 :38-42*)

⁵⁷ Chi gure guiaal, bidxin tijb benrijcw laman Xiëb, bën Arimatea, në laaman binal Jesús. ⁵⁸ Wejman loj Pilato, bignabaman xcuerp Jesús. Dxel gunabee Pilato bayü reeman cuerp guin lojman. ⁵⁹ Abi' cwa'man cuerp guin batüübaman tijb lajd naya. ⁶⁰ Dxel biquie'chaman laaman lën tijb baa cüb ni

gudëenman par laagajcaman lën tijb guiaj. Zianz basiaawaman ro' baa guin con tijb guiajro', ziataman. ⁶¹ Abi' zojb María Magdalena con stijb bën la gajc Li, ro' baa guin.

Rajp ree suldad ro' xbaa Jesús

⁶² Chi bareguiaal, dxej raziiladx ree bejn, wej ree bixhioz rniabee ree bixhioz në ree bënfarisew, bigneenë reeman Pilato, ⁶³ rëb reeman lojman:

—Dad, rasaaduladxan, chi ziz naban bën rusquiee ni, rëbaman guial chi gac choon dxej yabanman. ⁶⁴ Zeel gunabee guiyaawdxi'ch ro' baa guin xt chi gac choon dxej, chitëë gui't ree xbejnman guxhin cwan reeman xcuerpaman. Abi' guiëb reeman loj ree bejn guial ma babanman. Abi' mazri gusquiee reeman bejn guial loj ni yaloj.

⁶⁵ Dxel rëb Pilato loj reeman:

—Laa ree suldad za' yagaj. Gol chinë reeman, gol basiaawdxi'ch ro' baa guin zi'c rëndi.

⁶⁶ Abi' zë reeman, dxel basiaawdxi'ch reeman ro' baa guin. Zianz basa'n reeman suldad guin ree cayajp reeman laan.

28

Raban Jesús

(Mr. 16:1-8; Lc. 24:1-12; Jn. 20:1-10)

¹ Chi gudëd dxej raziiladx ree bejn, bareguiaal chidumingw, María Magdalena con stijb bën la gajc Li biquiaa reeman ro' baa guin. ² Dxel bi't tijb xudoxh, guial biguiajt tijb xianjl Dios diidz xanyabaa, dxel bibig anjl guin ro' baa guin biquiedaman guiaj nayaaw ro'n, zianz gurejman guijcan. ³ Dád rliajman bacha' zi'c chi rë'p nijs, guiáad xabaman naquichbëjn. ⁴ Chi baguiaa ree suldad guin anjl guin, binij reeman guial dád bidxeb reeman xt badaj reeman abi' biyajb reeman luyuj. ⁵ Dxel rëb anjl guin loj ree béngunaa guin:

—Ad rdxebidi, ragbeen cayguilidi Jesús bën cwa loj crüzj. ⁶ Per achutri laaman guie, ma babanman zi'c naman. Gol guida nial din guguaadi lod gudixh reeman laaman. ⁷ Yan, gol baxüün gol bicojn ree xbejnman guial ma babanman, ma nedaman lojdi zëgajman Galilea, ni guguaadi laaman. Ni nezan naj ni rugojnan lëjt.

⁸ Dxel cari da't baza reeman ro' baa guin rdxeb reeman rabaa tëë reeman, ruxüün reeman zia reeman zicojn reeman xbejn Jesús. ⁹ La'tgaj zia reeman, balüüloj Jesús loj reeman, bagajpdirozaman laa reeman. Abi' bibig reeman lojman, bazuxib reeman, gudüidx reeman guia'man, ¹⁰ abi' rëbaman loj reeman:

—Ad rdxebidi. Gol chej, gol biguiedx loj ree da bejnan din che reeman Galilea, ni guguaa reeman naj.

Ni rëb ree suldad

¹¹ La'tgaj zia ree béngunaa guin, në tio'p choon ree suldad cayajp ro' baa guin zë luguiedx guin zicojn reeman bixhioz rniabee ree bixhioz gra ni goc.

¹² Dxel wej ree bixhioz rniabee guin bigneenë reeman guxtis Israel ree persi baya'n reeman diidz xhie güün reeman. Abi' dad zro' milia badëed reeman loj ree suldad guin, ¹³ rëb reeman:

—Con gol güjdx loj ree bejn: “Guxhin la'tgaj nadoodyëjsan, bi't ree xbejn Jesús abi' gulan reeman xcuerpaman.” ¹⁴ Abi' bal gagbee gobernador, dunujn yaneenë' laaman chitëë xhie güünnëman lëjt.

¹⁵ Dxel cwa' ree suldad guin milia guin abi' been reeman zi'c rëb reeman. Laan naj diidx ni nare'ch loj ree bén Israel xt yan.

*Rxhiaal Jesús bén naj ree apóstoles
(Mr. 16:14-18; Lc. 24:36-49; Jn.20 :19-23)*

¹⁶ Guidxiptib ree xi apóstoles Jesús, wej reeman Galilea, guijc tijb guia' lod rëb Jesús che reeman. ¹⁷ Abi' chi baguiaa reeman Jesús, bazuxib reeman lojman, majsi yu' reeman ad bililadxza'ct. ¹⁸ Dxel bibig Jesús loj reeman, rëbaman:

—Dios ma banee gra guialrniabee din ganabeen xanyabaa në loj guidxliuj.

¹⁹ Zeel, gol chej guidib guidxliuj, gol biglüü ree bejn din gac reeman da bejnan. Gol baroobnijs reeman por dux Dad ree, por Xi'nman në por xSprijtaman, ²⁰ gol balüü tëë reeman din guzoob reeman diidx gra ni ma rnin lëjt. Abi' naj gazunë' lëjt gradxejczi xt chi nit guidxliuj. Amén.

Xtiidxza'c Jesucrist ni bacaa San Marcw

Rzuloj Waj rulüüman xtiidxza'c Jesucrist
(Mt. 3:1-12; Lc. 3:1-9, 15-17; Jn. 1:19-28)

¹ Ze guzuloj xtiidxza'c Jesucrist, Xi'n Dios.

² Guyu tijb bën badëe xtiidx Dios loj ree bejn brier lajman Isaías, bacaaman xtiidx Dios, rëbaman:
Naj rxhial tijb bën ned lojl,
bën güünchaaw xnejzil.

³ Rguien cha' tijb bën rbidxa' loj yujbidx, rëbaman:
“Gol beenchaaw xnejz dux Dad ree, gol guxhal tijb nejz nali.”

⁴ Zian bi't Waj bën baroobnijs bejn ree, guzujman niz loj yujbidx, abi' rëbaman loj ree bejn guial rayal yayüjn xgab por xtol reeman, yayejc reeman con Dios din gac reeman perdon tiobnijs tëe reeman. ⁵ Gra ree bën zojb niz Judea, në ree bën Jerusalén brier reeman zicaagdiajg reeman ni rniece Waj, abi' rxhioobdol reeman. Zianz ruuroobnijs Waj laa reeman loj guiiw Jordán.

⁶ Guidxlad camell gojcnë xabaman, abi' lënman bixii tijb cinch guid. Gudawaman bi'tsu con dxijn dajn. ⁷ Chi guneenëman bejn ree, rëbaman:

—Xichan zëed tijb bën mazri zojbloj guial lon, ni'qui xgurëchaman ad zajct gaxhiecan guial mazri zojblojman guial lon. ⁸ Naj curobnijs lëjt con nijs, per laaman guroobnijs lëjt con xSprijt Dios.

Rirobnijs Jesús
(Mt. 3:13-17; Lc. 3:21-22)

⁹ Lën ree dxejzii guza Jesús luguiedx Nazaret ni riga' niz Galilea, abi' baroobnijs Waj laaman loj guiiw Jordán. ¹⁰ Chi bariiman loj nijs guin, laa baguiaa gajcaman bixal xanyabaa, zidguiajt xSprijt Dios zi'c tijb palom xt guijcaman. ¹¹ Dxel biguien cha' bejn xanyabaa, rëbaman:

—Lüj naj da Xi'nan, rënan lüj rabaanë' tëen lüj.

Been xinxab Jesús prueb
(Mt. 4:1-11; Lc. 4:1-13)

¹² Dxel binë xSprijt Dios Jesús loj yujbidx. ¹³ Ni guzuman tiuu dxej tiuu guiaal, loj ree bedoxh. Abi' been xinxab laaman prueb chitëe nuzoobaman xtiidx Dios, guiaad ree xianjl Dios gunaj laaman.

Rzuloj Jesús rulüüman bejn ree niz Galilea
(Mt. 4:12-17; Lc. 4:14-15)

¹⁴ Chi mal guyu Waj ladxguuib, wej Jesús niz Galilea bigneeman xtiidxza'c Dios, ¹⁵ rëbaman:

—Ma bidxin dxej zëed xguialrniabee Dios gajxh, zeel gol bayüjn xgab por xtolidi, gol bililadx tëe xtiidxza'caman.

Rbejdx Jesús tajp ree bën gac xbejnman
(Mt. 4:18-22; Lc. 5:1-11)

¹⁶ La'tgaj caza Jesús ro'nijsdoo Galilea, baguiaaman Simón në bijchaman Andrejs, cuzaal xguijxh reeman lojnijs din guiniaaz reeman bëjl. ¹⁷ Abi' rëb Jesús loj reeman:

—Gol tanal naj din gulün lëjt xhienaag guto'pidi bejn par Dios, luar rniaazidi bëjl.

¹⁸ Loj hor guin gajc basa'n guijxh rniaaznë reeman bëjl persi zinal reeman Jesús.

¹⁹ Guzaman zatibda'n, dxel baguiaaman Jacob con Waj Bén naj ree xi'n Zebedeo, yu' reeman loj barcw rayüjnchaaw xguijxh reeman. ²⁰ Dxel gurejdx Jesús laa reeman, abi' basa'n reeman Zebedeo loj barcw guin, Bén naj xdad reeman con ree xmojsaman, guiáad laa reeman zinal reeman Jesús.

Rabëë Jesús xindxab luxdoo tijb bejn
(Lc. 4:31-37)

²¹ Chi bidxin Jesús luguiedx Capernaum. Abi' dxej raziiladx ree bejn guyuman lën xyadoo ree Bén Israel culüüman laa reeman. ²² Dád radxa loj reeman zi'c rnieenëman laa reeman guial rulüüman laa reeman zi'c tijb Bén rniabee, ad rulüütaman zi'c rulüü ree mextr rajc ley. ²³ Lën yadoo guin yu' tijb xin yu' xindxab luxdoo, dxejczy guridxa'x rëbix:

²⁴ —¿Xhie rënl con dunujn, Jesús Bén Nazaret? ¿Zëëdil ya zidganijtil dunujn? Nünbeen lüj, ragbeen guial naya nalil najl xi'n Dios.

²⁵ Dxel gudilë Jesús xindxab guin, rëbaman:

—¡Bacwëéz ro'l, barii luxdoo xin guin!

²⁶ Abi' been xindxab guin xin guin zi'c Bén rëjtya', zianz gurixdiajx rejs, bariix luxdoo xin guin. ²⁷ Graczi ree Bén riga' dád badxaloj reeman, riniab-diidx loj lasa' reeman rëb reeman:

—¿Xhie ree nicüban rulüü Bén guin? ¡Con guialrniabee ni rajpaman xt ree xindxab ruzoob xtiidxaman!

²⁸ Tibrajtzi bire'ch xtiidx Jesús guidib niz Galilea.

Rayüjn Jesús xnasuegr Bëd
(Mt. 8:14-15; Lc. 4:38-39)

²⁹ Bariix reeman lën yadoo guin, binë Jesús Jacob con Waj lidx Simón con Andrejs. ³⁰ Abi' naga' xnasuegr Simón, yu'man xliaadoxh. Dxel bagojn reeman Jesús guial ragxuuman. ³¹ Abi' gubigaman cwë'man gunaazaman yaaman, gulesaman laaman. Loj hor guin gajc bariiman xliaa guin dxel guzuloj cudëëdaman ni gaw reeman.

Rayüjn Jesús zien ree Bénragxuu
(Mt. 8:16-17; Lc. 4:40-41)

³² Chi ma gurej guiaal, binë reeman Bénragxuu ree lod za' Jesús, në ree Bén yu' xindxab luxdoo. ³³ Graczi ree Bén luguiedx guin bido'p ruyu lod za' Jesús. ³⁴ Bayüjn Jesús zien ree Bén rajc ree gadxagayaa guialgujdx, babëë tëëman zien ree xindxab luxdoo ree bejn. Per ad rudëëtaman mod guiniee ree xindxab guin guial nünbee reex laaman.

Rulüü Jesús xtiidx Dios niz Galilea
(Lc. 4: 42-44)

³⁵ Bixche Jesús rsildoo, chi ziiz nacay, briiman luguiedx guin wejman tijb luar lod achutczi bejn zojb, persi gurejdx gunabaman Dios. ³⁶ Abi' Simón con ree xcompniarman bigdiil reeman laaman. ³⁷ Chi badxejl reeman laaman, rëb reeman lojman:

—Gra ree bejn cayguuil lüj.

³⁸ Per rëbaman loj reeman:

—Yo' ree guiedx ni riga' ree gajxh din gulün xtiidxza'c Dios, din par zian zialan.

³⁹ Abi' balüü Jesús xtiidx Dios lën ree xyadoo ree Bén Israel guidib niz Galilea babëë tëëman xindxab luxdoo ree bejn.

*Rayÿjn Jesús tìjb bèn rajc guialguijdx la lepra**(Mt. 8:1-4; Lc. 5:12-16)*

⁴⁰ Tìjb bèn rajc guialguijdx la lepra, gubigaman lod za' Jesús, bazuxibaman lojman rëbaman

—Bal guiën, zajc yayÿjnl naj.

⁴¹ Baya Jesús laaman, baqui'man laaman, rëbgajman:

—Rënan, bayajc.

⁴² Chi gunee Jesús zian, hor guin gajc bayajc bèn guin abi' baya xcuerpaman. ⁴³ Dxel bagu'nejz Jesús laaman, rëbaman lojman:

⁴⁴ —Bacaagdiajg ni ganin lÿj. Achu loj guiëbil guial ma bayajquil. Lojzi bixhioz wej din guguaaman lÿj, binë gon ni rayal chinël loj Dios zi'c gunabee Moisejs, din gagbee gra ree bejn guial ma bayajquil.

⁴⁵ Per bèn guin chi ziaman guzuloj catie'chaman diidx loj gra bejn xhien-aag bayajcaman. Zeel ad bile't contzi niu Jesús luguiedx ree, ganax dajn ree raya'nman lod achut bejn zobj. Per gra lad rza ree bejn rej reeman lod za'man.

2*Rayÿjn Jesús xin nëjt xcuerp**(Mt. 9:1-8; Lc. 5:17-26)*

¹ Chi goc tio'p choon dxej, badxin Jesús luguiedx Capernaum, abi' chi gogbee ree bejn, guial za'man yagaj, ² tibrajtzi bido'p zien da't reeman lod za'man, xt ni'quid rdaant ro' port chu' reeman, guiáad laaman culüüman laa reeman xtiidx Dios. ³ Dxel bidxin tajp ree bejn yagaj lejn reeman tìjb xin nëjt xcuerp. ⁴ Per ad gojct niunë reeman laax lod za' Jesús guial bèn guixiuj guidxa. Abi' guxhal reeman guijc yu lod za'man persi gulet reeman xinragxuu guin guidib ni naga'x loj xt lod za' Jesús. ⁵ Chi baguiaa Jesús guial rililadx reeman laaman, rëbaman loj xinragxuu guin:

—Xi'n, ma benan xtolil perdon.

⁶ Per yagaj zobj tio'p choon ree mextr rajc ley, been reeman xgab naladx reeman: ⁷ “¿Chexc zeel rníee xin guin zian? ¿Chexc zeel rÿjnx mazri xin zobjloj guial loj Dios? Achutczí rajc rÿjn perdon dol tìjbzi Dios.” ⁸ Per gogbee gajc Jesús xgab cayÿjn reeman, dxel rëbaman:

—¿Chexc zeel rÿjndi xgab zian? ⁹ ¿Conin ad nawëëgt gac, guial guiën loj bënragxuu guin ya: “Ma benan xtolil perdon”, o guiën ya: “Bixche, gules ni go'til loj, baguiaj”? ¹⁰ Per yan gulün lëjt guial Bën guxhaal Dios rajpaman guialrniabee loj guidxliuj guie din güünman dol ree perdon. Dxel rëbaman loj xinragxuu guin:

¹¹ —Lÿj rnin, bixche, baca' ni go'til loj baguiaj lidxil.

¹² Loj hor guin gajc bayajc xin guin, bixchex baca' ni go'tix loj, bariix lënü guin guidib loj gra ree bèn riga' yagaj. Abi' gra reeman badxaloj, ruza't reeman Dios zagdex, rëb reeman:

—Ni'qui tìjb ad waguiaat ree zi'c naj ni cayguiaa ree yan.

*Rbejdx Jesús Leví**(Mt. 9:9-13; Lc. 5:27-32)*

¹³ Dxel wej Jesús ro'nijsdoo Galilea zatìjb. Dád zien ree bejn rdxin lod za'man persi rulüüman laa reeman xtiidx Dios. ¹⁴ Chi cadëdaman, baguiaa-man Leví xi'ngaan Alfeo, zobjaman lod ruquiixaman impuest. Dxel rëb Jesús lojman:

—Tanal naj.

Laa bisu gajc Leví binalaman laaman.

¹⁵ Dxel chi cayaw Jesús lidx Leví con zien ree bèn ruquijx impuest në ree bèn ad nabant zi'c rën Dios, gra reeman zojbnë Jesús xan mex con ree xbejnman, guial zinal zien ree bejn laaman. ¹⁶ Chi baguiaa ree bënfarisew con ree mextr rajc ley guial cayawnë Jesús bèn guin ree, rëb reeman loj ree xbejnman:

—¿Chexc zeel rawnë xmextridi bèn ruquijx ree impuest në ree bëndol?

¹⁷ Chi biguiejn Jesús ni rëb reeman, zeel rëbaman:

—Bënnadaan ree ad riaadxt reeman doctor, bënragxuu ree, laa reeman riaadx doctor. Ad zialtan par ree benza'c, zialan par ree bëndol din yayüjn reeman xgab por xtol reeman.

Rniabdiidx reeman loj Jesús xcwent guialrba'n

(Mt. 9:14-17; Lc. 5:33-39)

¹⁸ Lën ree dxej zii guba'n ree xbejn Waj bèn ruoobnijs bejn ree, në ree bënfarisew. Abi' yu' ree bèn gunabdiidx loj Jesús, rëb reeman:

—¿Chexc zeel ad rba'nt ree xbejnl zi'c rba'n ree xbejn Waj con ree bënfarisew?

¹⁹ Badxi' Jesús laan rëbaman:

—Wen, ¿zajc guiba'n ree biooz za' loj guialruxhliaa ya la'tgaj za'në xin cuxhliaa guin laa reeman? La'tgaj za'nëx laa reeman ad zajct guiba'n reeman. ²⁰ Per guidxin dxej chiquiedix loj reeman, abi' chi guidxin dxej guin dxel guiba'n reeman.

²¹ 'Achut bèn rata' lajd cüb loj lajd yojx, din zaxü'n lajd cüb guin abi' mazri quixya'n lajd yojx guin. ²² Ad rgu' tëët bejn vin cüb lën anfr yojx, din zaguixya' vin cüb guin anfr guin, abi' zi'c anfr guin zi'c vin guin zaxin reen. Zeel vin cüb rayal chu'n lën anfr cüb.

Rgui'ch ree xbejn Jesús trigo dxej raziiladx ree bën Israel

(Mt. 12:1-8; Lc. 6:1-5)

²³ Tijb dxej raziiladx ree bën Israel, cadëd Jesús con ree xbejnman loj guiniaa lod yu' trigo, abi' ree xbejnman guzuloj caguil'ch reeman trigo guin chi cadëd reeman. ²⁴ Dxel rëb ree bënfarisew loj Jesús:

—¿Chexc zeel rüjn ree xbejnl ni ad rayalt gac dxej raziiladx ree bejn?

²⁵ Per rëb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman? ²⁶ Tiamp ni goc Abiatar bixhioz rniabee gra ree bixhioz, guyu Davi lën xyadooro' Dios, gudawnë ree xcompniaraman guidxtil ma nagle' abi' bixhiosi ree rayal gaw laa reen.

²⁷ Rëb tëë Jesús:

—Dios badxe' dxej raziiladx bejn, per ad badxe'taman dxej guin par sagdiaj bejn. ²⁸ Abi' naj, guial najn Bén guxhaal Dios, ra'pan guialrniabee dxej raziiladx ree bejn.

3

Rayaic tijb xin naxü'n tibladyaa

(Mt. 12:9-14; Lc. 6:6-11)

¹ Tijb dxej guyu Jesús lën tijb yadoo. Lën yadoo guin za' tijb xin naxü'n tibladyaa. ² Abi' ree bën yu' lën yadoo guin rula'ch reeman Jesús din guidoon zayüjnman laax dxej raziiladx reeman ya, din gac gutedia' reeman Jesús.

³ Dxel rëb Jesús loj xin naxü'n yaa guin:

—Bisu, guzuj galay guin.

⁴ Abi' rëbaman loj ree bën guin:

—¿Xhie rayal güün bejn dxej raziiladx reeman? ¿Ni zagdxe ya o ni mal? ¿Guslaaman xguialnaban bejn ya o gugüjtaman laaman?

Per ad badxi't reeman xtiidxaman. ⁵ Dxel rdxe'ch Jesús ruguiaaman loj gra reeman, dád guyunaya luxdooan guial ad guyënt reeman naya lasa' reeman. Zianz rëbaman loj xin guin:

—Basli yaal.

Abi' basli yaax, loj hor guin gajc bayajcan. ⁶ Chi baza ree bënfarisew guin, zianz baya'n reeman diidx con ree xbejn Herodes din gugüjt reeman Jesús.

Zien ree bejn riga' ro'nijsdoo

⁷ Per Jesús zë gajcaman ro'nijsdoo Galilea con ree xbejnman. Zien da't ree bën Galilea con ree bën Judea binal laaman, ⁸ në ree bën Jerusalén con ree bën Idumea, në ree bën zojb zatiblad ro' guiiwro' Jordán, në ree bën Tiro con ree bën zojb niz Sidón. Dád zien ree bejn wej lod za' Jesús guial gogbee reeman ni rüjnman. ⁹ Zeel rëbaman loj ree xbejnman din guzujsin reeman tijb barcw par laaman chitëë gutëë ree bën guin laaman. ¹⁰ Guial ma bayüjnman zien ree bejn, zeel rbig gra ree bënragxuu lojman din guqui' reeman laaman. ¹¹ Guiáad ree bën yu' xindxab luxdoo chi ruguiaa reeman Jesús, ruzuxib reeman lojman, rbidxa' reeman rëb reeman:

—¡Lüj naj Xi'n Dios!

¹² Per gunabeeman xindxab guin ree chitëë guiëb reex chu laaman.

Rbe Jesús chiptio'p ree apóstoles

(Mt. 10:1-4; Lc. 6:12-16)

¹³ Dxel wë'p Jesús tijb ruguia', abi' gurejdxaman gra ree bën guleman. Zianz wej reeman, ¹⁴ loj gra reeman gulejman chiptio'p reeman din su reeman con laaman zianczi guixhiaal tëëman laa reeman chigtie'ch reeman xtiidx Dios. ¹⁵ Abi' badëëman guialrniabee din yayüjn reeman bënragxuu ree yabëë tëë reeman xindxab luxdoo ree bejn. ¹⁶ Bën guie ree naj guidxiptio'p ree bën gule Jesús: Simón bën gulëëljman Bëd, ¹⁷ Jacob con Waj, bën naj ree xi'n Zebedeo, gunee Jesús laa reeman Boanerges (rën guiëban, xi'n guziaaw); ¹⁸ në Andrejs, Felip, Tol, Matew, Tumajs con Jacob xi'n Alfeo, në Tadeo, nëtëë Simón bën bi'ch loj ree bën Cananistas, ¹⁹ con Judas Iscariote bën bayü Jesús.

Rëb ree bejn ca' Jesús xguialrniabee Beelzebú

(Mt. 12:22-32; Lc. 11:14-23; 12:10)

Chi gulox bacaaabeeman laa reeman dxel badxinnëman laa reeman lod zojbaman. ²⁰ Dád zien ree bejn bido'p yagaj stijb, xt ni'quid bile't niajw Jesús con ree xbejnman. ²¹ Chi gogbee ree xfamil Jesús, dxel bidxin reeman din yaca' reeman laaman guial rëb reeman guijcaman rajc.

²² Abi' ree mextr rajc ley bën zëëd ree Jerusalén rëb reeman:

—Bën guin rabëë xindxab luxdoo ree bejn por xguialrniabee Beelzebú, xin rniabee ree xindxab.

²³ Dxel gurejdx Jesús laa reeman, rëbaman:

—¿Xhienaag yabëë satanás lasa' xindxab gajquix? ²⁴ Bal tijb nacion, ad nadxagt riga' ree gobiarn, zadijl reeman abi' ad zanuut xguialrniabee reeman, ²⁵ ziangajc tijb famil, bal rdilnë lasa' reeman, nayob la' lasa' reeman. ²⁶ Yan, ziangajc bal satanás su contr lasa' xindxabgajquix, zala' lasa' reex abi' wed yagaj lox xguialrniabee reex.

²⁷ 'Abi' achut zajc chu' lidx tijb béngojl da't din cwanman gra xieenman bal id zaxhii xgajman laaman. Zian zile' cwanman ni rajpaman.

²⁸ Naj rni lojdi guial yu' perdon par gra dol ni rüjn bejn, yu' tää perdon par gra diidxguijdx ni rníee bejn chutééz. ²⁹ Per bën guinieeguijdx xSprijt Dios, ad yu't dxej gacaman perdon, ma banijtaman loj Dios.

³⁰ Rëb Jesús zian guial rëb reeman yu' xsprijt xindxab luxdooman.

Xniaa Jesús con ree bijchaman

(Mt. 12:46-50; Lc. 8:19-21)

³¹ Hor guin bidxin xniaa Jesús con ree bijchaman yu lod za'man, per ad bile't niu reeman zeel guxhaal reeman bën chignee laaman. ³² Dxel ree bën zojbnë laaman yagaj bagojn reeman laaman, rëb reeman:

—Laa xniaal con ree bijchil za' lule' guin cayguuil reeman lüj.

³³ Badxi' Jesús xtiidx reeman rëbaman:

—¿Chunin naj da nan con ree da bichan?

³⁴ Dxel baguiaaman bën zojb ree gadëd lod zojbaman, rëbaman:

—Bën guie ree naj da nan con ree da bichan, ³⁵ din graczi ree bën rüjn ni rën Dios, laa reeman naj da bichan, da zanan në da nan.

4

Xcwent bën rtie'ch bin

(Mt. 13:1-9; Lc. 8:4-8)

¹ Zatijb dxej culüü Jesús xtiidx Dios ro'nijsdoo Galilea. Abi' guial dád benzien bido'p lod za'man zeel wë'paman loj tijb barcw yu' lojnijs guin, abi' gurejman lojn guiáad ree bën guin riga' reeman ro' nijs guin. ² Zien ree ni balüüman laa reeman, rüman laan loj reeman zi'c cwent, loj ree ni culüüman laa reeman rëbaman:

³—Gol bacaagdiajg ni ganin lojdi: Tijb bejn briiman bigtie'chaman bin loj xguiniaaman. ⁴ Chi catie'chaman laan, ta'nan biajb lunejz abi' bidxin ree biguijn gudaw reeb laan. ⁵ Zata'nan biajb loj ree guiaj lod ad riga't zien yuj, abi' cari gulejnan guial ad zient yuj riga'. ⁶ Per chi gunan gubijdx, bigoolan abi' guial ad zro't liujn yu', gubidxan. ⁷ Zata'nan biajb loj ree yaquiëjch. Abi' chi guni'san, banidloj yaquiëjch guin laan, abi' ad cwat ladan. ⁸ Per zata'nan biajb loj yuj za'c, abi' dád gojcan, yu' ni cwa gajlbichii, yu' ni cwa gayojn yu' tää ni cwa tibgayuu.

⁹ Rëb tää Jesús loj reeman:

—Bën rën gucaagdiajg, gol bacaagdiajg.

Chexc zeel rulüü Jesús con cwent ree

(Mt. 13:10-17; Lc. 8:9-10)

¹⁰ Chi ma baya'nnë Jesús zata'nz ree bejn con guidxiptio'p ree xbejnman, dxel gunabdiidx reeman xhie rën guiëb cwent guin. ¹¹ Badxi'man laan rëbaman:

—Dios ma basa'n lëjt din chignia'di xhienaag naj xguialrniabeeman ni goc naguie'ch par lëjt, sa'n ree bën ad riladxt xguialrniabeeman, con ganaxzi ree cwent naj guial gulün laa reeman. ¹² Din majsi rani loj reeman, per ad zuguaat reeman, majsi rigueijn reeman, per ad zignia't reeman chitëe yayejc reeman loj Dios abi' guünman perdon xtol reeman.

Rusignia' Jesús xcwent bën rtie'ch bin

(Mt. 13:18-23; Lc. 8:11-15)

¹³ Abi' rëb Jesús loj reeman:

—¿Nid rignia'di ya xhie rën guiëb cwent guin? ¿Xhieza naag chignia'di gra ni ganin lojdi? ¹⁴ Bën gutie'ch bin guin, laaman naj zi'c bën rtie'ch xtiidx Dios.

¹⁵ Bin biajb lunejz, naj zi'c ree bën rigueijn xtiidx Dios, per rdxin gajc xindxab

rquiedix laan luxdoo reeman. ¹⁶ Yu' ree b́en naj zi'c bin biajb loj ree guiaj. Riguiejn reeman xtiidx Dios abi' d́ad nix ru luxdoo reeman riguieln reeman laan. ¹⁷ Per guial naj reeman zi'c tijb cwaan ni ad yu't zro' liuj, chi rzagdiaj reeman o chi rzunal ree bejn laa reeman din gũn reeman laa reeman ni mal por xtiidx Dios, laa rusa'n gajc reeman ni riladx reeman. ¹⁸ Yu' t́ee ree b́en naj zi'c bin ni biajb loj yaquiějch. Riguiejn reeman xtiidx Dios, ¹⁹ per ru reeman xgab por ree ni riga' loj guidxliuj guie. Rusquiee guialnaza'c laa reeman rēn reeman gap rēman graloj. Abi' guial yu' xgab guin guijc reeman, zianz rucwēez rucaagdiajg reeman xtiidx Dios, abi' achet sirv rŭjn ni rucaagdiajg reeman. ²⁰ Per yu' ree b́en naj zi'c bin biajb loj yuj zagdxe, ridxga' reeman laan con guidib luxdoo reeman. Rŭjn reeman zi'c rēn Dios, laa reeman naj zi'c ni cwa gajlbichii o ni cwa gayojn o ni cwa tibgayuu.

Achet ni naguie'ch yu'
(Lc. 8:16-18)

²¹ Abi' rēb Jesús loj reeman:

—Achut b́en ruze'c tijb guij par guta'cwaman laan con tijb caj, o gudxe'man laan xan loon, ruzujman laan ya din gusnin guidib. ²² Din achet ni naguie'ch yu' ni ad zaguiet ad yu' t́eet ni ralan ni ad zagbeet bejn. ²³ B́en rēn gucaagdiajg, gol bacaagdiajg.

²⁴ Rēb t́ee Jesús:

—Gol been xgab por ree diidx ni caguiejndi. Bal ridxga'di xtiidx Dios, mazri gustėdguienman lějt. ²⁵ Din b́en ma rignia' xtiidx Dios, chignia'man mazri. Per b́en ad rignia't, xt ta'n ni rignia'man ad zignia'traman.

Xcwent guial rni's bin

²⁶ Rēb t́ee Jesús loj reeman:

—Xguialrniabee Dios naj zi'c rzajc b́en rxŭbin loj xguiniaaman. ²⁷ Din majsi naga'yějsaman o naga'naaman, majsi radxe o guiaal ya, rliejn bin guin abi' rni'san, ni'quid ragbeetaman xhienaag rajcan. ²⁸ Din yuj guin gajc rusni's laan, yaloj rliejnan najn tijb gui'xhdo, dxel ririin dojn, zianz rtia ladan. ²⁹ Chi ma gojc reen dxel raru' reen guial ma bidxin tiamp yado'p reen.

Xcwent xhaj moxtajs

(Mt. 13:31-32; Lc. 13:18-19)

³⁰ Rēb t́ee Jesús:

—¿Xhienaag ganin naj xguialrniabee Dios, o xhienaag gŭn diidx lojdi din chignia'di xhienaag naj xguialrniabeeman? ³¹ Rnin lojdi guial xguialrniabee Dios naj zi'c naj xhaj moxtajs. Chi rxŭbin reeman laan. Laan naj ni mazri ni doběz loj gra ree bin yu' loj guidxliuj. ³² Per chi ma guxŭbin reeman laan, rni'san rajcan mazri narooob loj gra ree cwaan, xt rajc rŭjn xguixbitia's ree bigujn xidxan.

Baliŭ Jesús con ganax cwent

(Mt. 13:34-35)

³³ Baliŭ Jesús laa reeman xtiidx Dios con ganaxczi cwent zi'c naj ree ni ma beman, xt lodzi bignia' reeman. ³⁴ Ad rulŭtaman laa reeman zezi, bal id zulŭuman con cwent. Per chi ma za'man con ree xbejnman dxel rusignia'man laa reeman zagdxe xhie rēn guieě ree ni rēbaman.

Racwēez Jesús bidoxh

(Mt. 8:23-27; Lc. 8:22-25)

³⁵ Dxej zii, chi gure guiaal, rēb Jesús loj ree xbejnman:

—Yo' ree zatiblad ro' nijs guin.

³⁶ Dxel basa'n reeman b́en riga' ree yagaj, wě'p reeman loj barcw ni yu' Jesús zině reeman laaman con ree barcw ren. ³⁷ Dxel brii bidoxh loj nijs guin, xt guzuloj cadxa nijs loj barcw guin. ³⁸ Per Jesús naga'yějsaman loj barcw guin tijb luar naj xijchan, nucuugaman tijb almoad. Dxel bacwěen reeman laaman rěb reeman:

—¡Mextr! ¿Nid yu'l xgab ya? ¡Ma cayzěeb ree xan nijs!

³⁹ Abi' bixche Jesús, bacwěezaman bidoxh guin rěb těeman loj nijs guin:

—¡Bacwěez, bayajcdxe!

Dxel bayajcdxe bi guin con nijs guin. ⁴⁰ Zianz rěb Jesús loj reeman:

—¿Chexc zeel rdxebidi? ¿Gadzidi chililadx naj ya?

⁴¹ Per laa reeman dád bidxeb reeman abi' rniabdiidx loj lasa' reeman:

—¿Chu b́en guin zeel xt bi con nijs ruzoob xtiidxaman?

5

Rayiın Jesús tijb xin yu' xindxab luxdoo

(Mt. 8:28-34; Lc. 8:26-39)

¹ Chi badxin Jesús con ree xbejnman zatiblad ro' nijsdoo guin, xdajn ree b́en Gadara, ² baguiajtzi Jesús loj barcw guin, tijb xin yu' xindxab luxdoo bigchaaglojx Jesús. Bariix ro' ree baa, ³ guial nabanx ni. Achutczi rajc rixhii laax ni'qui con caden. ⁴ Zien volt ma guxhii reeman yaax ně guia'x con caden, per rüjngajquix gan rurooxix laan. Achut rüjn laax gan. ⁵ Dxejz guiaal rizax niz dajn con ład ree baa, rbixdiajx rguuilguijdx laagajquix con guiaj. ⁶ Zijtri baguiaax Jesús, baxüünx bigchaaglojx laaman abi' bazuxibix lojman.

⁷ Zianz guneex rejs rěbix:

—¿Xhie rěnl con naj Jesús, Xi'n Dios yu' xanyabaa? Rniaaban lojl ad gusagzil naj.

⁸ Rěbix zian, guial cayěb Jesús lojx:

—¡Xindxab, barii luxdoo xin guin!

⁹ Dxel gunabdiidx Jesús lojx rěbaman:

—¿Chu lal?

Badxi'xan rěbix:

—Legión lan din zien nayajcan.

¹⁰ Abi' rěbix lojman chitěe guixhiaalaman xindxab guin ree lood ren.

¹¹ Abi' gajxh yagaj riga' zien ree cüch cayaw reeb. ¹² Zianz rěb ree xindxab guin loj Jesús:

—Guxhaal dunujn lod za' ree cüch guin din yadxu'n lěn reeb.

¹³ Dxel cwějb Jesús barii ree xindxab guin luxdoo xin guin persi bayu reex lěn ree cüch guin. Cost tio'p mil naj reeb. Dxel guzuloj cuxüün reeb, zianz bitidya' reeb ro' bala' xt lojnijs, lod gu' reeb nijs zianz güjt reeb. ¹⁴ Guiáad ree b́en cayajp laa reeb, baxüün reeman bicojn reeman luguiedx ně ree dajn abi' zien ree bejn wej biquiaa ni goc. ¹⁵ Chi bidxin reeman lod za' Jesús, baguiaa reeman xin barii xindxab guin ree luxdoo, zobjix najcw xabix, ma badědguienx. Abi' bidxeb reeman. ¹⁶ Guiáad ree b́en baguiaa gra ni goc con xin guin, ně con ree cüch guin, be reeman diidx loj ree b́en bidxin. ¹⁷ Dxel guzuloj rěb reeman loj Jesús din yazaman niz ladx reeman.

¹⁸ Chi bayu Jesús loj barcw guin, naguiejn rüjn xin barii xindxab guin ree luxdoo din chinalix laaman. ¹⁹ Per ad cwějbt Jesús, rěbaman:

—Baguiaj lidxil, bignaj xfamilil, biguie diidx loj reeman gra ni ma been Dios por lüj, xhie těe naag bayaman lüj.

²⁰ Dxel ziax, guzuloj rëbix loj ree bën zojb niz Decápolis gra ni been Dios por laax, abi' graczi reeman badxaloj.

Rayajc xi'n Jairo në béngunaa bagaal xab Jesús
(Mt. 9:18-26; Lc. 8:40-56)

²¹ Chi badxin Jesús loj barcw stiblad ro' nijs guin, dád zien ree bejn bido'p, persi ro'zi nijs guin baya'nman. ²² Dxel bidxin tijb bën rniabee lën tijb xyadoo ree bën Israel, laman Jairo. Chi baguiaaman Jesús, bazuxibaman lojman, ²³ abi' guzajcaman laaman liaadx, rëbaman:

—Ma cayëjt da xi'nan. Yo'sii din gudxiib yaal guijquim din yayajquim din guibanm.

²⁴ Zinët Jesús bën guin, dád zien bejn zinal laaman xt rixa't reeman laaman. ²⁵ Loj graczi reeman no'ch tijb béngunaa, ma gojc chiptio'p ijz ragxuuman ryajbaman rejn. ²⁶ Dád ma guzagdiajman, ma banijt graczi ni rajpaman guial wejman loj ree doctor, per ad bayajctaman, aal mazri zro' rajcaman. ²⁷ Chi biguiejnman gra ni rüjn Jesús, gudëdaman lad ree bën guin, gubigaman niz xijchaman dxel bagaalaman xabaman. ²⁸ Guial gunaladxaman: “Gugalzan xabaman, ma bayajc gajcan.” ²⁹ Loj hor zii gajc gulëjz biajbaman rejn, abi' gogbeeman ma bayajcaman. ³⁰ Laa gogbee gajc Jesús guial yu' chu ma bayajc por xguialrniabeeman, abi' badxi' lojman loj ree bën guin dxel gunabdiidxaman, rëbaman:

—¿Chu baqui' da xaban?

³¹ Abi' rëb ree xbejnman lojman:

—Awa ruguiaal xt rixa't reeman lüj guiáad lüj rniabdiidxil chu baqui' xabil. ³² Per Jesús ruguiaaman gra lad din guguiaaman chu baqui' laaman.

³³ Abi' guidib rnij béngunaa guin guial rdxebaman, guial gogbeeman ma bayajcaman, bigzuxibaman loj Jesús, beman diidxli ni beenman. ³⁴ Dxel rëb Jesús lojman:

—Xi'n, guial bililadxil naj zeel ma bayajquil. Baguiaj zagdx. Ma bayajquil guialguijdx ni goquil.

³⁵ Sta canee Jesús zian, chi bidxin ree bën guza lidx Jairo, rëb reeman loj Jairo:

—Ma güjt xi'n! Ad ruslenril mextr guin mazri.

³⁶ Per chi biguiejn Jesús ni rëb reeman, rëbaman loj Jairo:

—Ad rdxebil, bililadxzi naj.

³⁷ Ad cwëjbt Jesús ninal gra ree bën riga' laaman, Bëdzi, con Jacob, con Waj bijch Jacob. ³⁸ Chi bidxin reeman lidxaman, baguiaa Jesús cayajc naquie' guial roon rbixdiaj reeman. ³⁹ Dxel guyuman lënü abi' rëbaman loj reeman: —¿Chexc zeel roon rbixdiajdi? Ad güjttim, naga'yëjsim.

⁴⁰ Per baze' reeman laaman. Dxel gunabeeman barii gra reeman, zianz binëman xdadim con xniaam con ree bën zinëman, lod naga' bindo guin.

⁴¹ Dxel gunaazaman yaam rëbaman:

—Talita, cumi —Rën guiëban: Lüj rnin, bindoo, bixche.

⁴² Loj hor ziigajc bixchem guzuloj cazam. Yu'm chiptio'p ijz. Abi' dád badxa loj ree bën riga'. ⁴³ Per gunabee Jesús laa reeman chitëë chu loj guiëb reeman ni goc, gunabee tëëman gudëëd reeman ni gawim.

6

Radxin Jesús Nazaret
(Mt. 13:53-58; Lc. 4:16-30)

¹ Baza Jesús yagaj, badxin ladxaman con ree xbejnman. ² Chi bidxin dxej raziiladx ree bejn, guzuloj culüüman bejn ree lën yadoo. Abi' gra ree bën cucaagdiajg dád badxa loj reeman ni rnieeman, abi' rëb reeman:

—¿Ban basiid bën guin gra ni rnieeman? ¿Ban gulëëman gualrignia' guin abi' chu badëë gualrniabee zeel rüjnman milagr guin ree?

³ ¿Nid laaman naj bën carpinter ya, xi'n Li abi' ree bijchaman naj Jacob, Xiëb, Judas, në Simón? Guiáad ree bizanman zojb luguiedx guie.

Abi' ad bidxga't reeman Jesús. ⁴ Per rëbaman loj reeman:

—Guidibczi rajp reeman respejt tijb bën rudëë xtiidx Dios loj ree bejn. Per ladxaman achut rajp laaman respejt, ni'qui lidxaman, ni'qui ree xfamilaman ad rajt laaman respejt.

⁵ Ad bile't nüjn Jesús zien ree milagr yagaj. Bëlzi ree bënragxuu bayüjnman, badxiib yaaman guijc reeman. ⁶ Dád badxalojman gual ad bililadx reeman laaman. Dxel zëman guiedx naj ree gajxh, zigliüüman bejn ree.

Rexhiaal Jesús guidixptio'p ree xbejnman chigliüü reeman xtiidx Dios (Mt. 10:5-15; Lc. 9:1-6)

⁷ Dxel gurejdx Jesús guidixptio'p ree xbejnman, abi' guxhaalaman tio'p gaj reeman. Badëëman gualrniabee loj reeman din yabëë reeman xindxab ree luxdoo ree bejn. ⁸ Dxel gunabeeman din achetctzi chinë reeman par runejz, ni'qui guijxh, ni'qui gualraw, ni'qui milia, tijbzi yagriidx reeman, ⁹ con xgurëch reeman, con tijbzi lajd najcw reeman. ¹⁰ Dxel rëbaman loj reeman:

—Yu lod guidxindi, tijbzi yagaj yaya'ndi xt guidxin dxej yazadi luguiedx guin. ¹¹ Bal yu' guiedx lod ad rënt reeman lëjt o ad rënt reeman gucaagdiajg reeman ni rnieedi, gol barii yagaj, gol gudxijp guxyuj guia'di zi'c sen gual ad rënt reeman guzoob reeman düidx. Din naj rni lojdi, gual dxej ni yadëëd ree bejn cwent loj Dios mazri casti narooob yayal reeman gual loj ree bën Sodoma në Gomorra.

¹² Zianz brii reeman ziguiedx reeman loj ree bejn gual rayal yayüjn reeman xgab por xtol reeman. ¹³ Abi' rabëë reeman zien ree xindxab luxdoo ree bejn, zien tëë ree bënragxuu gudëëb reeman sejt, abi' bayüjn reeman laa reeman.

Güjt Waj bën baroobnijs bejn ree (Mt. 14:1-12; Lc. 9:7-9)

¹⁴ Chi biguiejn rey Herodes ni rüjn Jesús gual ruza't ree bejn laaman guidibczi, rëb reeman:

—Waj, bën baroobnijs bejn ree ma baban, zeel rajpaman gualrniabee rüjnman milagr ree.

¹⁵ Per yu' reeman rëb:

—Elíasan, bën rudëë xtiidx Dios loj ree bejn.

Yu'za reeman rëb:

—Tijb bën rudëë xtiidx Dios loj ree bejnan lasa' ree bën gocli.

¹⁶ Chi biguiejn Herodes rëb reeman zian, rëbaman:

—Wajn, xin gunabeen biru' yëjn, laaxan ma baban yan.

¹⁷ Rëb Herodes guin zian din laagajcaman gunabee gunaaz reeman Waj, abi' badxe'man laaman ladxguiib por Herodías. Herodías naj xbëngunaa Felip bijch Herodes. Per Herodes cwa'man Herodías. ¹⁸ Abi' gual rëb Waj loj Herodes:

—Ad laat tia' xbëngunaa bijchil.

¹⁹ Zeel bidxe'ch Herodías Waj, guyënman nugüjtaman laaman. Per ad rîle'tan, ²⁰ din rdxeb Herodes gual ragbeeman rüjn Waj ni rën Dios, rüjn

tëeman zi'c rayal, zeel ad cwëjbtaman xhie nÿjnnë Herodías Waj. Majsi ad ragbeet Herodes xhie güünman por ni rëb Waj lojman, per ruladxaman gucaagdiajgaman ni rnieeman.

²¹ Per bidxin dxej been Herodías ni rënman. Chi baza' Herodes ijz, abi' beenman lanij, badxe'man tijb guialraw par bën rniabee ree në par ree bën rniabee ree suldad nëtëë ree bën zojbloj niz Galilea. ²² Dxel guyu xi'n Herodías lod cayajc lanij guin zianz baya'm. Abi' Herodes con ree xbioozaman dád bayuladx reeman zi'c baya'm. Zeel rëb rey guin lojm:

—Gunab ni rëntzil, naj gune laan.

²³ Xt badëë xtiidxaman gudëëman ni guiniabtzim, majsi garol ni rajpaman.

²⁴ Dxel bariim bignabdiidx loj xniaam, rëbim:

—¿Xhie ganaaban?

Badxi'man laan rëbaman:

—Gunab guijc Waj bën ruroobnijs bejn ree.

²⁵ Laa bayugajquim lod za' rey Herodes, rëbim lojman:

—Yan gajc rënan guneel guijc Waj, bën ruroobnijs bejn ree, guneelan loj tijb pliajt.

²⁶ Dád guyu naya Herodes, per mal badëëd xtiidxaman guidib loj ree bën riga', zeel ad bile't nibexuuman nudëëman ni gunabim. ²⁷ Dxel gunabee Herodes tijb suldad din chica'x guijc Waj. ²⁸ Zianz wej suldad guin lën ladxguuib guin, gutü'x guijc Waj badxe'xan loj pliajt binëxan lojm. Dxel bayü loj xniaamin.

²⁹ Chi gogbee ree xbejn Waj guial ma güjtaman, baca' reeman xcuerpaman persi biquie'ch reeman laaman.

*Ruyaan Jesús gaay mil bejn
(Mt. 14:13-21; Lc. 9:10-17; Jn.6:1-14)*

³⁰ Chi bayejc ree xi apóstoles Jesús, be reeman diidx lojman gra ni been reeman në ni balüü reeman. ³¹ Dxel rëb Jesús loj reeman:

—Gol guda, yo' dunujz ree niz lod achut bejn zojb din yaziiladx ree ta'n.

Rëbaman zian guial dád zien ree bën zia zien tëë ree bën zëëd, xt ni'qui guial gaw reeman ad rile'tan.

³² Dxel Jesús con ree bën naj ree apóstoles zë reeman loj barcw tijb luar lod achut zojb. ³³ Per dád zien ree bejn baguiaa guial zë reeman, abi' bayünbee reeman laa reeman zeel zien ree bejn brii luguiedx guin ree ruxüün reeman, abi' yalojl laa reeman bidxin lod zë Jesús con ree xbejnman.

³⁴ Chi baguiajt Jesús loj barcw guin, baguiaaman bën guixiuj riga' yagaj, abi' bayaman laa reeman guial za' reeman zi'c xiil achut rajp. Dxel guzuloj balüüman laa reeman, zien ree ni balüüman laa reeman. ³⁵ Chi ma gudxe, gubig ree xbejnman, rëb reeman lojman:

—Ma gudxe yan, abi' achut bejn zojb niz guie. ³⁶ Güjdx loj ree bën guin din che reeman ranch ree në ree guiedx ni riga' gajxh chisii xhienin gaw reeman.

³⁷ Per rëb Jesús loj reeman:

—Lëjt gol badëëd ni gaw reeman.

Dxel rëb reeman lojman:

—Per zro' da't milia ryaadx din yo' ni gaw ree bën guin, zi'ct ni rÿjn bejn gan loj tio'p gayuu dxej.

³⁸ Abi' rëb Jesús loj reeman:

—¿Bël guiadxtil ca'di? Gol baguiaa don.

Chi baguiaa reeman, dxel rëb reeman:

—Gaay guiadxtil con zatio'p bëjl.

³⁹ Dxel gunabeeman din cwe tibcwaa gaj reeman loj guixya'. ⁴⁰ Zianz gurej reeman zian, yu' lod gure tibgayuu reeman, yu' lod gure tû'pchii reeman. ⁴¹ Abi' cwa' Jesús guigaay guidaxtil guin con grop bëjl guin. Dxel gules lojman xanyabaa, badëëman quixtëë loj Dios, gula'man guidaxtil guin badëëman loj ree xbejnman persi gudi's reeman laan loj ree bën riga', gudi's tëëman grop bëjl guin loj gra reeman. ⁴² Graczi reeman gudaw xt bigdxinladx reeman, ⁴³ abi' staczi bacha reeman chiptio'p dxüm guidaxtil laay con bëjl ni baya'n. ⁴⁴ Loj ree bën gudaw no'ch cost gaay mil xinguaaw.

Rza Jesús loj nijs
(Mt. 14:22-27; Jn.6:16-21)

⁴⁵ Dxel gunabee Jesús guyu ree xbejnman loj barcw din tëdgaj reeman stiblad ro' nijs par guidxin reeman Betsaida, la'tgaj cuzaadiidxnëman benzien guin ree. ⁴⁶ Chi gulox bazaadiidxnëman laa reeman, wejman guijc tijb guia', persi gurejdx gunabaman Dios. ⁴⁷ Chi ma cabej guiaal, ma yu' barcw guin galay nijs guiáad Jesús baya'n xtijbzaman guijc guia' guin. ⁴⁸ Dxel baguiaaman dád cazagdiaj ree xbejnman cusa reeman barcw guin gial rliaj bi niz loj barcw guin. Abi' chi ma cayreguiaal zibig Jesús loj reeman cazaman loj nijs guin, beenman zi'c bën tëdnejz. ⁴⁹ Chi baguiaa reeman cazaman loj nijs guin gunaladx reeman sprijt malan, abi' gurixdiaj reeman. ⁵⁰ Dád cadxeb reeman por ni cuguaa reeman. Per guneeën Jesús laa reeman rëbaman:

—jGol bagu' luxdoodi, ad bal rdxebidi, najn!

⁵¹ Loj guyuman loj barcw guin, zianz gulëjz bi guin. Guiáad laa reeman dád badxa loj reeman, ⁵² din nayaaw xquiargueijn reeman, abi' ad bignia't reeman milagr ni beenman con guidaxtil guin ree.

Rayüjn Jesús bënragxuu ree Genesaret
(Mt. 14:34-36)

⁵³ Chi ma gudëd reeman lojnijs guin bidxin reeman xdajn ree bën Genesaret, yagaj guxhii reeman barcw guin ro' nijs. ⁵⁴ Naabzi baguiajt reeman loj barcw guin, laa bayünbee gajc ree bejn Jesús. ⁵⁵ Abi' gutie'ch reeman diidx guidib niz yagaj. Dxel guzuloj zinë ree bejn bënragxuu ree lod riguejntzi reeman za' Jesús. ⁵⁶ Bantëëz zëman, majsi guiedx narooob o guiedx dobëz o ranch ree, rguijxh reeman bënragxuu guin ree niz lod tädaman. Dxel rzajc reeman laaman liaadx din tiëbaman gugaal reeman majsi guia'z xabaman. Abi' graczi ree bën bagaal xabaman bayajc.

7

Ni rüjn persi rüjn bejn dol
(Mt. 15:1-20)

¹ Tijb dxej, tio'p choon ree bënfarisew con ree mextr rajc ley, bën guza ree Jerusalén, bibig reeman loj Jesús. ² Abi' chi baguiaa reeman gial yu' ree xbejn Jesús cayaw, ad banaat reeman zi'c naj costumbr. Dxel caneeguijdx reeman laa reeman. ³ (Din bënfarisew në gra ree bën Israel zinaldxi'ch reeman xcostumbr xbëngulal reeman gial ad zajct gaw reeman bal id reeman gunaa zi'c naj costumbr guin. ⁴ Në chi raza reeman lugua', ad rawt reeman bal id zunaa reeman zi'c naj costumbr guin. Dád zien ni zinal reeman güün reeman zi'c xhienaag quuib reeman re, con vajs, con ree trast

guiib, në xloon reeman riguiib reeman.) ⁵ Zeel bénfarisew ree con ree mextr guin, gunabdiidx reeman loj Jesús, rëb reeman:

—¿Chexc zeel ad runaat ree xbejnl zi'c naj xcostumbr dux béngulal ree? ¿Chexc zeel raw reeman zianzi?

⁶ Dxel rëb Jesús loj reeman:

—¡Bén rusquiee!, waliqui ni gunee Isaías por lëjt, bén badëë xtiidx Dios loj ree bejn, chi bacaaman:

Bén guie ree, rëbzi reeman guial rën da't reeman naj, per ad rënt reeman naj con guidib luxdoo reeman.

⁷ Xlia'czi rën da't reeman naj,

abi' rulüü reeman bejn ree ganaxzi ni rbëëguijc ree bénguidxliuj.

⁸ Yan, rusa'ndi xtiidx Dios tiblاد persi zinalidi xcostumbr ree bénguidxliuj.

⁹ Rëb tëë Jesús loj reeman:

—Par chitëë nit xcostumbridi zeel rusa'ndi xtiidx Dios tiblاد. ¹⁰ Rëb Moisejs: “Gojp respejt xdadil con xniaal”, abi’ “Bén guzaal diidxmal guijc xdad o xniaa, rayal guiëtaman.” ¹¹ Per lëjt rëbidi guial zile' guiëb bejn loj xDadaman o xniaaman: “Ad zajct gūnan lūj yudar, dīn gra ni ra'pan naj Corbán” (Corbán rën guiëb gran naj par Dios). ¹² Rëbidi, bén guiëb zian, ad zile'tri gūn xdad xniaaman yudar. ¹³ Abi' rbëëladxidi xtiidx Dios persi zinal xcostumbridi ni rulüü lasa'di, në zien ree ni ren rüjndi lasa' ree ni guin.

¹⁴ Dxel gurejdx Jesús bén zien guin ree, rëbaman:

—Gol bacaagdiajg gradi gol bignia' tëë ni ganin: ¹⁵ Ad ni rawt bejn rüjn persi rüjnman dol. Ni ririi ro'man në ni rüjnman, laan rüjn persi rüjnman dol.

¹⁶ ¡Bén rën gucaagdiajg, gol bacaagdiajg!

¹⁷ Chi baza Jesús lod za' ree bén guin bayuman lënü, dxel gunabdiidx ree xbejnman xhie rën guiëb ni rëbaman. ¹⁸ Dxel rëbaman loj reeman:

—¿Në lëjt ad rignia't ni canin ya? ¿Nid ragbeedi ya guial ad ni rawt bejn rüjn persi rüjnman dol, ¹⁹ dīn ni raw bejn ad rejtan luxdooan, rejn lënman, abi' rariin?

Zian basignia'man guial ad rüjnt bejn dol por ni rawzaman. ²⁰ Rëbaman:

—Ni ririi ro' bejn në ni rüjnman, laan rüjn persi rüjnman dol. ²¹ Din guijc bejn zëed galoj xgab mal, guial rüjn ni dxuudx, guialgubaan, guialrugüjt lasa', ²² guial rzunë béngunaa ren o xinguaaw ren, guialrzëëbladx xien ben ren, guial rüjn ni mal, guialrusquiee, guialrajp vijs, guialnadëdloj, guialrbëë xtiidx bejn, guialrüjn benro', në guial rüjn ni ad rayalt. ²³ Graczi ree ni guin zëed guijc bejn, abi' laan rüjn persi rüjnman dol.

Rayajc xi'n tijb bén Sirofenicia (Mt. 15:21-28)

²⁴ Chi baza Jesús niz yagaj, zëman niz Tiro në Sidón. Dxel guyuman tijb lënü guial ad guyëntaman niagbee ree bejn, per ad gojct nuquie'ch lojman.

²⁵ Din gogbee gajc xniaa tijb bindoo yu' xinxxab luxdoo. Abi' wej xniaam lod za' Jesús zianz bazuxibaman lojman. ²⁶ Ad najtaman bén Israel, najman bén Sirofenicia. Dxel guzajcaman liaadx loj Jesús dīn yabëëman xinxxab guin luxdoo bindoo guin. ²⁷ Per rëb Jesús lojman:

—Badëëdxgaj mod gaw yaloj ree xindoo, dīn ad rayalt chiquied bejn guiadxtil loj xi'nman dīn gudëëman laan gaw ree bé'cw.

²⁸ Badxi' bén guinan rëbaman:

—Waliquil, Dad, per në ree bé'cw raw xguiadxtil laay reem ni ryajb xan mex.

²⁹ Dxel rëb Jesús:

—Laaquí guneel. Ma zajc yaguaíjl, ma baríi xindxab guin luxdoo xi'nl.

³⁰ Chi badxin lidx bën guin, baguiaaman laa bindo guin naga' loj loon, ma baríi xindxab guin luxdoo.

Bayajc tijb bën nacwa't ad rniee tēētaman zagdxe

³¹ Baza Jesús niz Tiro, gudēdaman niz Sidón, nē loj ree guiedx riga' Decápolis abi' bidxinman ro'nijsdoo Galilea. ³² Ni bidxinnē reeman tijb xinguaaaw nacwa'tix ad rajc tēēt rnieex zagdxe. Abi' rëb reeman loj Jesús din gudxiib yaaman guijquix. ³³ Zianz binē Jesús laax tiblax, badxe' xbacwēnman lēn guidaiajguix, abi' con xhiejnman bagaalaman lüdxix. ³⁴ Dxel gules lojman xanyabaa, banajlaxaman, rëbaman:

—¡Efata! —rēn guiēban: ¡Baxal!

³⁵ Loj hor zii gajc baxal ree guidaiajg xin guin, baban lüdxix dxel guzuloj caneex zagdxe. ³⁶ Dxel gunabee Jesús laa reeman chitēē chu loj guiēb reeman ni goc. Per guial rëbaman zian, mazri rü reeman laan loj ree bejn. ³⁷ Dád badxa loj reeman rëb reeman:

—Xi zagdxe naj gra ree ni rüjnman, xt rüjnman persi rigueijn ree bën nacwa't, abi' ree bengoc rniee reeman.

8

Ruyaan Jesús tajp mil bejn

(Mt. 15:32-39)

¹ Tijb dxej bido'p zien ree bejn abi' achet ni gaw reeman. Dxel gurejdx ree xbejn Jesús rëbaman loj reeman:

² —Rayan bën guin ree dín ma gojc choon dxej nadxu'nē' reeman guie, abi' ad ca't ni gaw reeman. ³ Abi' bal yaxhalan laa reeman lidx reeman sin guialraw, dool yadaj reeman lunejz, dín yu' reeman zēēd zijt.

⁴ Dxel rëb ree xbejnman:

—Per, ¿ban guin yuca'n ni gaw ree bën guin, achutczí bejn zojb niz guie?

⁵ Dxel gunabdiidxaman loj reeman rëbaman:

—¿Bēl guidaxtil ca'di?

Abi' rëb reeman:

—Gajdxan.

⁶ Dxel gunabeeman gurej ree bën guin luyuj. Zianz cwa'man guigajdx guidaxtil guin, badēēman quixtēē loj Dios, abi' gula'man laa reen badēēd loj ree xbejnman persi gudi's reeman laa reen loj gra ree bën guin. ⁷ Nēgajc tio'p choon ree bējldoo ca' reeman, abi' badēēman quixtēē loj Dios dxel gunabeeman gudi's reeman nē laa reeb loj ree bën guin. ⁸ Graczi reeman gudaw xt bigdxinladx reeman, abi' staczi bacha reeman gajdx dxüm guidaxtil laay nē bējl ni baya'n. ⁹ Bën gudaw ree naj reeman cost tajp mil. Chi gulox gudaw reeman, dxel bazaadiidxnē Jesús laa reeman. ¹⁰ Zianz guyuman loj barcw con ree xbejnman zē reeman niz Dalmanuta.

Rniab ree bēnfarisew tijb milagr loj Jesús

(Mt. 16:1-4; Lc. 12:54-56)

¹¹ Dxel bidxin ree bēnfarisew, guzuloj cadildiidxnē reeman Jesús, abi' par güün reeman laaman prueb, gunab reeman güünman tijb milagr zi'c tijb sen guial por Dios zēēdaman. ¹² Dxel banajlax Jesús, rëbaman:

—¿Chexc zeel rēndi günan tijb milagr? Diidxli ganin, achetczi milagr günan guguiaadi.

¹³ Dxel basa'nman laa reeman, bayuman loj barcw zatijb, zignë ree xbejnman stiblad ro' nijs guin.

Xlevadur ree bénfarisew
(Mt. 16: 5-12)

¹⁴ Bayanladx ree xbejn Jesús ninë reeman guialraw, tijbzi guiadxtil ca' reeman loj barcw guin. ¹⁵ Abi' chi rëbaman loj reeman:

—Gol gojp cudad con xlevadur ree bénfarisew në xlevadur Herodes.

¹⁶ Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

¹⁷ Abi' gogbee Jesús ni canee reeman, zianz rëbaman:

—¿Chexc zeel rëbidi guial ad ca'tidi guiadxtil? ¿Staczi ad rignia'tidi ya? ¿Sta nayaaw xquiarguejndi ya? ¹⁸ Yu' guiaaloidi per rulüü ad ruguaatidi, yu' guidaajguidi per rulüü ad riguejntidi. ¿Nid rusaaladxidi ya? ¹⁹ Chi gudi'san gaay guiadxtil loj gaay mil bejn, ¿bël dxüm ni laay bato'pidi?

Badxi' reeman laan rëb reeman:

—Chiptio'pan.

²⁰ Dxel rëbaman:

—Laadx chi gudi'san gajdx guiadxtil loj tajp mil bejn, ¿bël dxüm guidxa baca'di?

Badxi' reeman laan rëb reeman:

—Gajdxan.

²¹ Dxel rëbaman:

—¿Staczi ad waygnia'tidi ya?

Rayün Jesús tijb bén ad ranit loj

²² Chi bidxin Jesús guiedx Betsaida con ree xbejnman. Binë ree bejn tijb bén ad ranit loj, rëb reeman loj Jesús din gugaalaman guiaaloman.

²³ Dxel gunaaz Jesús yaaman gulëëman laaman luguiedx guin, abi' gudëëb xhiejnman guiaaloman, baqui'man guiaaloman. Zianz gunabdiidxaman rëbaman:

—¿Rajc ruguaal ta'n ya?

²⁴ Dxel guzuloj cuguaaman, abi' rëbaman:

—Ruguan bejn ree, per rulüü naj reeman zi'c yag ni caza.

²⁵ Dxel bagaal Jesús guiaaloman stijb, abi' rëbaman lojman din guguaadx-ijchaman, dxel guzuloj cuguaaman zagdx, naynidxuj ma ruguaaman gra.

²⁶ Abi' baxhaal Jesús laaman lidxaman, rëbaman:

—Ad yayul luguiedx guin achu tëë loj guiëbil xhienaag bayajc lojl.

Rëb Bëd guial Jesús naj Cristo
(Mt. 16:13-20; Lc. 9:18-21)

²⁷ Bazanë ree xbejn Jesús niz Galilea, wej reeman guiedx riga' ree Cesarea de Filipo. Chi zë reeman lunejz gunabdiidx Jesús loj ree xbejnman, rëbaman:

—¿Chu rëb ree bejn najn?

²⁸ Badxi' reeman laan rëb reeman:

—Yu' reeman rëb lüj naj Waj bén baroobnijs bejn ree, yu'za reeman rëb lüj naj Elías, yu' tëë reeman rëb lüj naj tijb ree bén badëëd xtiidx Dios loj ree bejn gocli.

²⁹ Dxel gunabdiidxaman rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo.

³⁰ Per rëb Jesús loj reeman achu loj guiëb reeman zian.

Rugojn Jesús guiëtaman
(Mt. 16:21-28; Lc. 9:22-27)

³¹ Guzuloj Jesús rëb loj ree xbejnman:

—Rayal sagdiaj da't Bén guxhaal Dios. Ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayan dxej yabanman.

³² Zagdxe basignia'man laa reeman. Dxel gulëëcaan Bëd laaman, rëbaman lojman chitëë rëbraman zian. ³³ Per badxi' lojman baguiaa ree xbejnman, dxel gudilëman Bëd rëbaman:

—iBisüd lon, Satanás!, din ad por Diost zëed ree xgab ni rüjnl, rüjnl zi'c naj xixgab bénguidxliuj.

³⁴ Dxel gurejdx ree xbejn Jesús con ree bén riga' yagaj, abi' rëbaman loj reeman:

—Bal chu rën gac da bejnman, ad rayalt güünman zi'c naj xixgabaman. Siibnejzaman guialzi ni tëdzaman abi' guidnalaman naj. ³⁵ Din bén mazri rën guialnaban ni rajpaman loj guidxliuj guie, zadxin dxej gusëëbaman laan, per bén guiët por naj në por da diidxan, zajpaman guialnaban tiblyaa con Dios. ³⁶ ¿Xhie gan güün bejn gapaman gra ni yu' loj guidxliuj bal canijtaman loj Dios? ³⁷ Din ad zile't sii bejn xguialnabanman xanyabaa. ³⁸ Din bén yatunë naj në da diidxan niz loj ree béndol bén ad zinalt ree xnejz Dios, bén riga' ree yan, ziangajc naj, najn Bén guxhaal Dios, yatunë'n laaman chi guialan con xguialrniabee da Dadan con ree xianjlamán.

9

¹ Rëb tëë Jesús loj reeman:

—Diidxliczi ganin, yu' ree bén za' guie, ad zëjtt xt guguaa reeman gui't xguialrniabee Dios.

Bidxaa Jesús loj choon ree xbejnman
(Mt. 17:1-13; Lc. 9:28-36)

² Chi goc xho'p dxej, wej Jesús tijb ruguia'ya, binëman Bëd, Jacob con Waj. Yagaj bidxaa Jesús niz loj reeman. ³ Balaa xabaman bacha', gojcan naquichbëj, achutcsi rguuib lajd zian loj guidxliuj guie. ⁴ Dxel baguiaa reeman Elías në Moisejs cayünë reeman Jesús diidx. ⁵ Abi' rëb Bëd lojman:

—Mextr, jzagdxen nadxu'n guie! Yaguieenan choon ranch, tijban par lüj, tijban par Moisejs, zatijban par Elías.

⁶ Per ad ragbeet Bëd xhienin caneeman guial dád bidxeb reeman. ⁷ Loj hor guin biguiajt tijb zaj beenan bala guijc reeman, abi' loj zaj guin biguien cha' bejn rëbaman:

—Bén guie naj da Xi'nan, bén rën da'tan, gol bazoob xtiidxaman.

⁸ Abi' chi baguiaa reeman gadëd lod za' reeman achutri za'në Jesús, tijbzi laaman za' yagaj. ⁹ La'tgaj cayguiajt reeman ruguia' guin, rëb Jesús loj reeman chitëë chu loj guiëb reeman ni baguiaa reeman, xt yaban Bén guxhaal Dios. ¹⁰ Abi' laaz reeman ragbee ni baguiaa reeman, rniabdiidx tëë loj lasa' reeman xhie rën guiëb guial yabanman loj ree bengüt. ¹¹ Dxel gunabdiidx reeman loj Jesús, rëb reeman:

—¿Chexc zeel rëb ree mextr rajc ley guial yaløj Elías gui't?

¹² Badxi'man laan rëbaman:

—Walican yaløj Elías gui't, laaman guzuxnejz gra. Per, ¿chexc zeel ca loj xtiidx Dios guial Bén guxhaal Dios sagdiaj da'taman ad zën tëët reeman

laaman? ¹³ Naj rni lojdi guial mal bi't Elías, abi' beennë reeman laaman ni guyëntzi reeman zi'c ca loj xtiidx Dios ni rayal sacaman.

Rayüjn Jesús tijb xin yu' xindxab luxdoo

(Mt. 17:14-21; Lc. 9:37-43)

¹⁴ Chi badxin Jesús lod za' sta'n ree xbejnman, baguiaaman dád zien bejn riga', në ree mextr rajc ley za' yagaj cadildiidx reeman con ree xbejnman.

¹⁵ Chi baguiaa reeman zëed Jesús, dád badxa loj reeman abi' baxüün reeman bicajpdioz reeman laaman. ¹⁶ Dxel gunabdiidxaman loj reeman rëbaman:

—¿Chexc zeel cadildiidxidi?

¹⁷ Abi' rëb tijb bën za' yagaj:

—Mextr, zidnë' da xi'nan lojl guial yu' xindxab luxdoox abi' nusa'nx laax gop. ¹⁸ Bantëez guin za'x, chi ru xindxab guin luxdoox rureeyujx laax, abi' rbëëx bichijn ro'x, raw tëë ree layix, dxel ratiaguix. Ma gunaaban loj ree xbejnl din nabëë reeman xindxab guin, per ad gojct reeman.

¹⁹ Zeel rëb Jesús:

—¡Bën ad rliladxt! ¿Xt goc gazunë'n lëjt gadaan tëën lëjt? Gol tanë xinzii guie.

²⁰ Dxel binë reeman laax lojman. Per chi baguiaa xindxab guin laaman, laa bagüjtya'gajquix xin guin, bareeyujx laax abi' rbixtüjpix ririi tëë bichijn ro'x. ²¹ Dxel gunabdiidx Jesús loj xdadix rëbaman:

—¿Goc guzuloj rajquix zian?

Badxi'man laan rëbaman:

—Diizd xindobëzix. ²² Dád zien volt ruzaalix laax loj guij në loj nijs din guiëtix. Zeel bal zajc güünl xhienin por dunujn, gognë dunujn, baya dunujn.

²³ Dxel rëb Jesús lojman:

—¿Chexc zeel nal, “bal zajcan”? Graczan zajc bal chu rliladx naj.

²⁴ Dxel gurixdiaj xdadix rëbaman:

—¡Rliladxan lüj, gognë naj din chililadxan mazri!

²⁵ Chi baguiaa Jesús cado'p zien bejn dxel gudilëman xindxab yu' luxdoo xin guin, rëbaman:

—Xindxab gop nacwa't tëë, rniabeen lüj din yariil luxdoo xin guin. Ad bal yayejcril luxdoox zatijb.

²⁶ Dxel gurixdiaj xindxab guin, abi' bagüjtya'x laax zatijb abi' bariix luxdoox, basa'nx laax zi'c xingüt zeel rëb ree bejn guial ma güjtix. ²⁷ Per gunaaz Jesús yaax gulesaman laax, dxel guzulix.

²⁸ Dxel bayu Jesús lënü con ree xbejnman, abi' gunabdiidx reeman lojman, rëb reeman:

—¿Chexc zeel ad gojct nalëen xindxab guin luxdoo xin guin?

²⁹ Badxi' Jesúsán rëbaman:

—Par yarii lasa' ree xindxab guin, rayal cwedx guiniabidi Dios guiba'n tëëdi.

Rugojn Jesús zatijb guial guiëtaman

(Mt. 17:22-23; Lc. 9:43-45)

³⁰ Chi baza reeman yagaj, gudëd reeman niz Galilea, per ad guyënt Jesús chu niagbee guial cadëdaman niz yagaj, ³¹ guial culüü ree xbejnman, rëbaman:

—Yayü reeman Bën guxhaal Dios loj ree bën gugüjt laaman, per ni gac choon dxej yabanman.

³² Per laa reeman ad bignia't reeman ni rëbaman, abi' bidxeb reeman niniabdiidx reeman lojman.

¿Chu mazri zobjloj?

(Mt. 18:1-5; Lc. 9:46-48)

³³ Dxel badxin Jesús Capernaum con ree xbejnman, abi' badxin reeman yu lod zobj reeman. Dxel gunabdiidxaman loj reeman rëbaman:

—¿Xhie diidxan rüdi lunejz chi zio'p ree?

³⁴ Per achet rëb reeman guial cadildiidx reeman lunejz chu reeman mazri zobjloj. ³⁵ Dxel gurej Jesús, gurejdxaman guidxiptio'p reeman, rëbaman:

—Bal chu bën rën gac mazri bën zobjloj lojdi, rayal güün laagajcaman zi'c tijb bën ad zobjlojt güün tëëman sirv loj gradi.

³⁶ Dxel cwa'man tijb xindoo, bazujman laax galay reeman, zianz gudiidxaman laax, rëbaman:

³⁷ —Bën ridxga' tijb xindoo por naj, najn ridxga'man, guiáad bën ridxga'naj, bën guxhaal najn ridxga'man.

Bén ad za't contr dunuj ree za'man con dunuj ree

(Lc. 9:49-50; Mt. 10 :42)

³⁸ Rëb Waj loj Jesús:

—Mextr, baguiaan tijb bejn rabëëman xindxab luxdoo ree bejn por xguialrniabeel. Per badxoonan guial ad najtaman dux bejn ree.

³⁹ Badxi' Jesúsán rëbaman:

—Ad rudxooni, din bën rüjn milagr por da guialrniabeen, ad zile't guinieeguijdxaman naj. ⁴⁰ Bén ad za't contr dunuj ree, za'man con dunuj ree. ⁴¹ Chutëëz bën gunee majsi tibxijgzi nijs lojdi guial najdi xbejn Cristo, diidxli rnin guial ziangajc yu' ni gudëëd Dios lojman.

Bén ruzaalguiiw bejn din güünman dol

(Mt. 18:6-9; Lc. 17:1-2)

⁴² Chutëëz bën guzaalguiiw tijb bën qui riladxri naj din güünman dol, par laaman zagdxeli naj guixhii reeman tijb guiaj mulin yëjnman guzaal reeman laaman loj nijsdoo. ⁴³ Bal laagajc yaal rusajb lüj loj dol, zagdxeli gutü'n. Mazri zagdxé chu' con tiblodzi yaal xanyabaa, guial che con grop yaal gabijl loj bajl ni ad yu't dxej yayü', ⁴⁴ lod ad rëjtt ree bizog lod ad rayü' tëët bajl. ⁴⁵ Abi' bal laagajc guia'l rusajb lüj loj dol, zagdxeli gutü'n. Mazri zagdxé chu' con tiblodzi guia'l xanyabaa guial che con groplad guia'l gabijl lod yu' bajl ni ad yu't dxej yayü', ⁴⁶ lod ad rëjtt ree bizog lod ad rayü' tëët bajl. ⁴⁷ Bal laagajc guiaalojl rusajb lüj loj dol, zagdxeli gulëën. Mazri zagdxé chu' con tiblodzi guiaalojl xanyabaa guial che con groplad guiaalojl gabijl lod yu' bajl ni ad yu't dxej yayü', ⁴⁸ lod ad rëjtt ree bizog lod ad rayü' tëët bajl.

⁴⁹ Zi'c ru zëd guijc guialraw, ziangajc ree bën riladx naj sagdiaj reeman din gac reeman naya.

⁵⁰ Ni zagdxé naj zëd, per bal id zajcran naxij, ¿xhieza naag yayajcan naxij zatijb? Gol been zi'c rayal chitëë saquidi zi'c zëd ni ad rüjnt sirv, gol gubajnnë tëë lasa'di zagdxé.

10

Rülüü Jesús xcwent guial rala' lasa'

(Mt. 19:1-12; Lc. 16:18)

¹ Chi baza Jesús Capernaum, dxel wejman niz Judea në stiblad ro' guiw Jordan. Abi' lod za'man bido'p ree bejn zatijb, dxel guzuloj culüüman laa reeman zi'c goc xcostumbraman. ² Yu' ree bënfarisew gubig lod za'man. Abi' par güün reeman laaman prueb, gunabdiidx reeman lojman rëb reeman:

—¿Zajc yala' xinguaaw lacheelix ya?

³ Badxi'man laan rëbaman:

—¿Xhie gunabee Moisejs güündi?

⁴ Abi' rëb reeman:

—Cwëjb Moisejs yala' xinguaaw lacheelix, per gudëëdix gui'ch tia'man guial ma bala' reex.

⁵ Dxel rëb Jesús:

—Rëb Moisejs gac zian guial nadidi. ⁶ Per guia'xchej chi gule'cchaaw Dios guidxliuj, “beenman xinguaaw con béngunaa”. ⁷ “Zeel xinguaaw gusa'n xdad xniaax din guibannë lacheelix, ⁸ dxel grop reex ma gac zi'c tijbzi bejn.” Zianan zeel ad najtri reex tio'p, ma naj reex tijbzi. ⁹ Zeel, bénguidxliuj ad rayalt yala'man lasa' ni ma bachajg Dios.

¹⁰ Chi bayu reeman lënü, gunabdiidx ree xbejnman lojman zatijb, xcwent ni guneeman. ¹¹ Abi' rëbaman loj reeman:

—Xin rala' lacheel, abi' rtia'x ben ren dolan cayünx, ¹² ziangajc bal tijb béngunaa yala' lacheelaman abi' tia' xin ren laaman, dolan cayünman.

Rüjnle' Jesús xindoo ree

(Mt. 19:13-15; Lc. 18:15-17)

¹³ Binë ree bejn xindoo ree lod za' Jesús din gudxiib yaaman guijc reex. Per ree xbejnman guzuloj cadilë reeman bën binë ree laa reex. ¹⁴ Chi baguiaa Jesús zian, balenman zeel rëbaman:

—Gol badëëd mod gui't reex lon, ad bal rudxoondi. Din lod rniabee Dios naj par ree bën naj zi'c laa reex. ¹⁵ Diidxliczi rnin, bën ad riladxt xguialrniabee Dios zi'c tijb xindoo, ad zile't chu'man lod rniabee Dios.

¹⁶ Dxel gudiidx Jesús laa reex, badxiib yaaman guijc reex, beenle'man laa reex.

Xcwent tijb xinrijcw

(Mt. 19:16-30; Lc. 18:18-30)

¹⁷ Chi ma gusnuu xnejz Jesús, ruxüün tijb xinguaaw bidxinx abi' bazuxibix lojman, dxel gunabdiidxix rëbix:

—Mextr za'c, ¿xhie rayal gūnan din ga'pan guialnaban tiblayaa con Dios?

¹⁸ Badxi' Jesús laan rëbaman:

—¿Chexc zeel nal lon benza'c? Achut naj benza'c, tijbzi Dios. ¹⁹ Lüy rajc ree mandamient, “Ad gugüjtil bejn, ad sunël béngunaa ren, ad cwanl, ad cwëël xtiidx bejn ad gusquiee tëël, gojp respejt xdad xniaal.”

²⁰ Dxel rëbix loj Jesús:

—Mextr, gra ree ni guin cayūnan diizd xindoon.

²¹ Baguiaa Jesús lojx, bayaman laax, rëbaman:

—Per yu' zatijb ni riaadx güünl: bigto' gra ni rajpil, badëëd milia guin loj ree bënprob, zian gapil guialnaza'c xanyabaa dxel guidnalil naj majsi xhietëëz saquil.

²² Chi biguiejn xin guin zian, ad nixt guyu luxdoox abi' dád yu'nayax ziax guial dád xinrijcwan.

²³ Dxel baguiaa Jesús loj gra reeman, abi' rëbaman loj ree xbejnman:

—¡Dád nawëëg naj chu' benrijcw loj xguialrniabee Dios!

²⁴ Dád badxa loj ree xbejnman ni rëbaman. Per rëbaman loj reeman zatijb:

—Xi'n, ¡bën yu'guijc mazri ni rajpaman, dád nawëëg naj chu'man loj xguialrniabee Dios! ²⁵ Adli nawëëgt téd tijb camell xan gagux guial chu' tijb benrijcw loj xguialrniabee Dios.

²⁶ Chi biguien reeman diidx guin ree, mazri badxa loj reeman, dxel rniabddiidx loj lasa' reeman, rëb reeman:

—¿Chu zajc laa loj xcasti Dios?

²⁷ Baguiaa Jesús loj reeman, abi' rëbaman:

—Par bejn nawëëgan, per par Dios ad nawëëgtan din par Dios graczan zile' gac.

²⁸ Dxel guzuloj rëb Bëd loj Jesús:

—Dunujn basa'nan graczi ni raya'pan persi zudnaalan lüj.

²⁹ Badxi' Jesúsán rëbaman:

—Diidxliczi ganin lëjt, chutéëz bën rusa'n lidx, o bijch, o bizan, o xdad xniaa, o lacheel o xi'n, o guidxliuj ree por naj në por xtiidxza'c Dios, ³⁰ loj guidxliuj guie tia'man tìbgayuu volt mazri guial loj ni basa'nman, bal najn lidxaman, bijchaman, bizanman, xniaman, xi'nman, në xguidxliujman, majsi guidib wazagdiaj, abi' guidxin dxej gapaman guialnaban tiblyaa con Dios. ³¹ Per dád zien ree bën naj bën yaloj yan, gac reeman bën bigra, guiáad ree bën naj bën bigra yan, gac reeman bën yaloj.

Rugojn Jesús zatijb guial guiëtaman

(Mt. 20:17-19; Lc. 18:31-34)

³² Chi zë reeman Jerusalén, ned Jesús loj ree xbejnman, abi' dád radxaloj reeman guial zëman Jerusalén, guiáad ree bën nal laaman rdxeb reeman. Dxel gurejdx guidxiptio'p ree xbejnman lood ren, zianz guzuloj rëbaman ni sacaman:

³³—Rëbaman loj reeman: Lëjt ragbee guial ziyo' ree Jerusalén, abi' naj najn Bën guxhaal Dios, yayü reeman naj loj ree bixhioz rniabee ree bixhioz, në loj ree mextr rajc ley. Abi' nabee reeman guiëtan, yayü tëë reeman naj loj ree bën ad najt bën Israel. ³⁴ Guze' reeman naj, gucojp xhiejn reeman lon, quin reeman gugüt tëë reeman naj, per yayan dxej yabanan.

Ni gunab ree Jacob con Waj

(Mt. 20:20-28)

³⁵ Dxel Jacob con Waj xi'n Zebedeo, gubig reeman loj Jesús rëb reeman:

—Mextr, rayënan güünl tijb favor ni yanaaban lojl.

³⁶ Abi' gunabdiidxaman rëbaman:

—¿Xhie rëndi günan?

³⁷ Badxi' reeman laan rëb reeman:

—Rayënan guial chi ma canabeel, yadxu'n cwë'l, tijb dunujn yadxu' xlad-beel, zatijb dunujn yadxu' xladruvejsil.

³⁸ Badxi'man laan rëbaman:

—Ni'quid ragbeetidi xhie ni guin rniabidi. ¿Wen zajc sagdiajdi zi'c gazaag-diajn ya? ¿Zajc guiëtidi zi'c guiëtan ya?

³⁹ Badxi' reeman laan rëb reeman:

—Zayajcan.

Dxel rëb Jesús:

—Waliquidi sagdiajdi zi'c naj guiët tëëdi zi'c naj, ⁴⁰ per guial cwedi da ladbeen o da ladruvejsan, ad najt rayal gune laan, din ma najn par ree bën rayal laan.

⁴¹ Chi biguien zachii xbejn Jesús ni rëb reeman, dád balen reeman Jacob con Waj, ⁴² per gurejdx Jesús laa reeman rëbaman:

—Lëjt ragbee guial ree bën rniabee loj guidxliuj guie, rniabee reeman bejn ree zi'ctzi rën reeman, guiáad ree bën zobjloj rüjnnë reeman bejn ree zi'ctzi rën reeman por guialrniabee ni rajp reeman. ⁴³ Per con lëjt ad rayalt gac zian.

Din bal chu rën gac bën rniabee lojdi, rayal güünman sirv lojdi, ⁴⁴ guiaad bën rën gac bën zobjloj, rayal güünman sirv loj gradi zi'c bën nado'. ⁴⁵ Din ni'qui naj najn Bén guxhaal Dios, ad zialtan loj guidxliuj par güün ree bejn sirv lon, zialan din günan laa reeman sirv, abi' con da guialnabanan gaguixan por xtol zien ree bénguidxliuj.

Rayajc guiaaloj tijb xin ad ranit loj la Bartimeo

(Mt. 20:29-34; Lc. 18:35-43)

⁴⁶ Bidxin reeman guiedx Jericó, abi' chi ma cayrii Jesús luguiedx guin, con ree xbejnman në ree benzien. Tijb xin ad ranit loj lax Bartimeo, xi'n bën la Timeo, zobjix cwë' nejz rniabix carda. ⁴⁷ Chi biguiejnx cadëd Jesús bën Nazaret niz yagaj, guzuloj cabidxa'x rëbix:

—jJesús, xdiaa Davi, baya naj!

⁴⁸ Dád zien ree bejn ridilë laax din yacwëez ro'x. Per mazri rejs rbidxa'x rëbix:

—jXdiaa Davi, baya naj!

⁴⁹ Dxel guzudxe Jesús rëbaman:

—Gol gurejdxix.

Dxel gurejdx reeman laax, rëb reeman:

—Bagu' luxdool, bisu, lüj caneeman.

⁵⁰ Dxel laa badxe'bi gajc xin guin lajd najcwix luya, xt gutiajsix guzulix bibiguix loj Jesús. ⁵¹ Gunabdiidx Jesús lojx rëbaman:

—¿Xhie rënlon günan por lüj?

Badxi'xan rëbix:

—Mextr, rënan yani lon.

⁵² Dxel rëb Jesús:

—Ma zajc yaguiajl, ma bayajquil guial bililadxil naj.

Loj hor zii gajc bani lojx dxel zinalix Jesús niz yagaj.

11

Ru Jesús Jerusalén

(Mt. 21:1-11; Lc. 19:28-40; Jn. 12:12-19)

¹ Chi ma zë reeman gajxh Jerusalén, niz lod riga' guiedx Betfagé con Beta-
nia, gajxh guia' la Olivos, dxel guxhaal Jesús tio'p ree xbejnman, ² rëbaman:

—Gol chej guiedxdo riga' delant guin. Chi guidxindi guidxaaglojdi tijb burquie'n, caduub achut wabib laab. Gol guxhiequib gol tanëb. ³ Abi' bal chu guiniabdiidx lojdi: “Chexc zeel caxhiequidi laab”, gol güjdx: “Dad Jesús cayaadx laab, doo yaxhaal gajcaman laab.”

⁴ Dxel wej reeman, bidxaagloj gajc reeman burdo guin, caduub runejz ro' tijb port, abi' guxhiee reeman laab.

⁵ Bén baguiaa ree zian gunabdiidx reeman loj reeman, rëb reeman:

—¿Xhie rüjndi? ¿Chexc zeel caxhiequidi burdo guin?

⁶ Badxi' reeman laan zi'c rëb Jesús, abi' cwëjb ree bën guin zinë reeman laab. ⁷ Bidxinnë reeman laab lojman, badxiib xab reeman xijchib, persi gudxibaman laab. ⁸ Zien ree bejn riguijxh xab niz lod rdëdaman, yu' tëë reeman rutüüg zijn persi rguijxh reeman laan niz lod rdëdaman.

⁹ Abi' zi'c ree bën ned, në ree bën nal rbixdiaj reeman, rëb reeman:

—jGagnëman dunuj ree yan! jNagle' bën zëed por Dios! ¹⁰ jNagle' bën zëed nabee zi'c dux béngulal ree rey Davi! jQuixtëë dux Dad ree Dios Bén yu' xanyabaa!

¹¹ Zian guyu Jesús Jerusalén abi' guyuman lèn yadooro' Jerusalén. Chi gulox baguiaaman graczi, dxel zinè guidxiptio'p ree xbejnman Betania guial ma gudxe.

Bazaal Jesús diidx guijc yag higo

(Mt. 21:18-19)

¹² Chi bareguiaal, barii reeman Betania. Dxel guzuloj calaan Jesús. ¹³ Zijtri baguiaaman tijb yag higo ca ree balag lojn. Abi' wejman biquiaaman bal ca higo lojn. Per achet bidxaaglojman, balagzi ree ca lojn din ad xtiampantan.

¹⁴ Dxel rëbaman loj yag higo guin:

—¡Ad yu'tri dxej gaw bejn ninejxh tia lojl!

Abi' biguiejn ree xbejnman ni rëbaman.

Rabëë Jesús bén ruto' ree ro' yadooro' Jerusalén

(Mt. 21:12-17; Lc. 19:45-48; Jn. 2:13-22)

¹⁵ Chi bidxin reeman Jerusalén. Dxel guyu Jesús ro' yadooro' Jerusalén guin, abi' guzuloj caybëëman bén cuto' ree nê ree bén cazii. Barexguiataman xmex ree bén ruchaa milia con xyagxhil ree bén ruto' ree palom, ¹⁶ ad rtiëjtaman xhie chu'nê ree bejn ro' yadoo guin. ¹⁷ Abi' guzuloj culüüman laa reeman, rëbaman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nüjndan zi'c lidx ree xingubaan.

¹⁸ Bixhioz rniabee ree bixhioz con ree mextr rajc ley, chi biguiejn reeman ni rëb Jesús, guzuloj raguuil reeman mod xhienaag gugüjt reeman Jesús, guial rdxeb reeman laaman din gra bejn radxaloy ni ruluüman. ¹⁹ Chi ma caxhin, bazanë ree xbejn Jesús Jerusalén.

Tijb yag higo ni gubidx

(Mt. 21:20-22)

²⁰ Chi bareguiaal rsildoo, badëd reeman niz lod zojb yag higo guin, abi' baguiaa reeman ma gubidx diidx liujn. ²¹ Dxel basaaladx Bëd ni rëb Jesús, abi' rëbaman lojman:

—Mextr, jbaguiaa yag higo ni bazaalil diidx guijc ma gubidxan!

²² Badxi' Jesúsán rëbaman:

—Gol bililadx Dios. ²³ Din diidxliczi ganin, bal chu guiëb loj guia' guin: “Bisüd guie biajb loj nijsdoo”, bal id yu' nawëëg luxdooman, bal rliladxaman, gac ni guneeman. Zian gacan. ²⁴ Zeel rnin lojdi, gra ni rniabidi loj Dios, gol bililadx guial ma cwa'di laan, abi' zaca'dan. ²⁵ Guiáad chi ribejdx rniabidi Dios, bal yu' bén rdxe'chidi, gol beenman perdon din ziangajc xDadidi bén yu' xanyabaa güünman perdon xtolidi. ²⁶ Din bal id züjndi perdon, ziangajc xDadidi Bén yu' xanyabaa ad züjntaman perdon xtolidi.

Xguialrniabee Jesús

(Mt. 21:23-27; Lc. 20:1-8)

²⁷ Chi badxin reeman Jerusalén. Chi caza Jesús niz lèn yadooro' Jerusalén guin, dxel gubig bixhioz rniabee ree bixhioz con ree mextr rajc ley con ree xguxtis ree bén Israel, ²⁸ gunabdiidx reeman loj Jesús, rëb reeman:

—¿Xhie guialrniabee rajpil zeel rüjn ni guin ree? ¿Chu banee guialrniabee lojl güünl zian?

²⁹ Badxi' Jesúsán rëbaman:

—Ziangajc naj yu' ni ganabdiidxan lojdi, bal yadxi'dan dxel ganin chu banee guialrniabee günan ni guin ree. ³⁰ ¿Chu guxhaal Waj bidgaroobnijsaman bejn ree? ¿Dios ya o bénguidxliuj? Gol badxi'n.

³¹ Dxel guzuloj rëb loj lasa' reeman:

—Bal yaguie'ch ree, Dios guxhaal laaman, zanaman: “¿Chexquiza zeel ad bililadxtidi laaman?” ³² Ad zajc tëët yaguie'ch ree, bénguidxliuj guxhaal laaman.

Rëb reeman zian guial rdxeb reeman bejn ree, din graczi reeman riladx guial gojc Waj tijb bën badëë xtiidx Dios loj ree bejn, bën wali gunee xtiidx Dios. ³³ Abi' badxi' reeman laan rëb reeman:

—Ad rayagbeetan.

Zeel rëb Jesús loj reeman:

—Ni'qui naj ad zanitan lojdi chu baneë guialrniabee günan ni guin ree.

12

Xcwent ree mojs guiidx (Mt. 21:33-46; Lc. 20:9-19)

¹ Dxel guzuloj caneenë Jesús laa reeman con ganax ree cwent, rëbaman:

—Tijb bejn guxübinman uv loj xguiniaaman, dxel beenman gurajl gadëd ro'n, beenchaaw tëëman tijb luar lod grii xnijs uv guin, abi' beenman tijb yu ya da't lod guiya'p guiniaa guin.

² Zianz badëëman laan garol loj ree bën güün laan dxiin, breetaman zëman zijt. ³ Chi bidxin dxej yala' reeman uv guin, guxhaal tijb xmojsaman din chigxiiman ni rayalaman. ⁴ Per ree bën rüjn dxiin loj guiniaa guin gunaaz reeman laaman, gudijn reeman laaman abi' badxi' reeman laaman zezi.

⁵ Dxel guxhaal bën naj xguidxliuj laan zatijb xmojsaman, per ziangajc, ba-caagua'j reeman laaman, gula' reeman guijcaman abi' guneeguijdx reeman laaman. ⁶ Guxhaalaman ben ren, per bagüjt reeman laaman. Zien ree ben guxhaalaman, yu' reeman gudijn reeman yu' tëë reeman bagüjt reeman.

⁷ Dxel bën naj xguidxliuj laan stijbzi xi'ngaanman ryaadx guixhiaalaman, xin rën da'taman. Dxel guxhaalaman laax guial gunaladxaman: “Zajp reeman da xi'n nan respejt.” ⁸ Per ree bën guin, rëb loj lasa' reeman: “Xin guin naj xin yaya'nnë guidxliuj guin, yagüjt reex din gacan du xieen ree.”

⁹ Dxel gunaaz reeman laax, bagüjt reeman laax abi' babëë reeman laax loj guidxliuj guin.

¹⁰ Dxel gunabdiidx Jesús loj ree bën caneenëman, rëbaman:

—Yan, ¿xhie naladxidi güün bën naj xguidxliuj laan? Zi'taman din gugüjtaman bën guin ree, dxel gudëëman guidxliuj guin loj ree ben ren.

¹¹ ¿Nid wayoolidi loj xtiidx Dios ya?, lod rëb:

Guiaj ni gulëëgo'n ree bën rüjn yu,

laan goc ni mazri been sirv gojcnë yu guin.

¹² Zian been dux Dad ree Dios, zeel radxaduloj ree.

¹³ Chi biguiejn ree bën rniabee guin ni gunee Jesús, guyën reeman niniaaz reeman laaman guial gogbee reeman laa reeman cuza'taman, per guial rdxeb reeman bejn ree, basa'n reeman laaman, ziat reeman.

Xcwent Impuest (Mt. 22:15-22; Lc. 20:20-26)

¹⁴ Guxhaal reeman tio'p choon ree bénfarisew në tio'p choon ree xbejn Herodes lod za' Jesús, din yaguuil reeman mod guiniee Jesús diidx ni gudxiib reeman guijc din gac cwe'c reeman xguialquiaman. ¹⁵ Abi' rëb reeman:

—Mextr, dunujn rayagbee guial lüj rniee diidxli ad ridxga' tëëtil chu naj bejn. Din par lüj tiblojzi naj bejn, abi' walil rulüül guial xhienaag rën Dios

guiban bejn. Zeel ranabdiidxan lojl: ¿Zagdxen ya radijxan impuest loj César o ad zagdxetan? ¿Zadijxanan ya o ad zadijxtanan?

¹⁵ Per gogbee gajc Jesús guial wed rüjnz reeman, zeel rëbaman:

—¿Chexc zeel rüjndi naj prueb? Gol tanë cintabl din guguianan.

¹⁶ Dxel badëed reeman cintabl guin lojman, abi' rëbaman:

—¿Chu loj ca lojn, chu tëë laj ca lojn?

Badxi' reeman laan rëb reeman:

—Loj César ca lojn në lajman.

¹⁷ Dxel rëb Jesús loj reeman:

—Gol badëecliza loj César ni naj xieen César, guiáad loj Dios gol badëed ni naj xieen Dios.

Dád badxa loj reeman ni rëbaman.

Xcwent guial yaban ree bengüt

(Mt. 22:23-33; Lc. 20:27-40)

¹⁸ Tio'p choon ree bénsaducew bignaj Jesús, laa reeman ad rliladxt guial yaban ree bengüt. Zeel gunabdiidx reeman loj Jesús rëb reeman:

¹⁹ —Mextr, loj xley Moisejs rëb guial bal guiët tijb xinguaaw abi' achut xi'nx guyu con lacheelix, bijch xin güt guin guxhlianë béngunaa bizëjb guin din chu' xi'n reex zi'c gulüü xi'n xingüt guinan. ²⁰ Guyu tijb famil lod goc reex gajdx bijch. Baxhliaa xin yaloj guin, per güjtix abi' ad guyut xi'n reex con lacheelix. ²¹ Dxel bijch barojpax baxhlianë béngunaa guin, per güjt gajquix, ad guyu gajct xi'n reex. Abi' ziangajc guzajc xin bayon guin, ²² abi' zianz baxhlianëman guigajdx reex, zianz bara reex güjt achut xi'n reex guyu con laaman. Ni bigra tëë në béngunaa guin güjt. ²³ Yan, chi yaban ree bengüt, loj guigajdx reex, ¿chu loj gra reex gac xbéngunaa laaman guial gra reex baxhlianë laaman?

²⁴ Badxi' Jesúsán rëbaman:

—Ad laat naj xgab rüjndi guial ad nünbeetidi xtiidx Dios ad ragbee tëëtidi xhienaag naj xguialrniabeeman. ²⁵ Din chi yaban ree bengüt, ad zuxhliatri reeman, ad zudëë tëëtri xi'n reeman guxhliaa, ma gac reeman zi'c ree anjl yu' xanyabaa. ²⁶ Abi' xcwent ni yaban ree bengüt, ¿nid wayoolidi loj xlibr Moisejs ya, lod rëb guial baguiaaman yag ni cayë'c? Yagaj biguien cha' Dios, rëbaman lojman: “Naj naj xDios Abraham, xDios Isaac në xDios Jacob.” ²⁷ Din Dios ad najtaman xDios ree bengüt, najman xDios ree bën naban. Zeel ad laat naj xgab rüjndi.

Mandamient mazri zojbloj

(Mt. 22:34-40)

²⁸ Chi biguiejn tijb mextr rajc ley badxi' Jesús xtiidx reeman zagdxé guial bacaagdiajgaman diidx ni cayü reeman, gubigaman lojman, abi' gunabdiidxaman rëbaman:

—¿Con mandamientan mazri zojbloj loj gra ree mandamient?

²⁹ Badxi'man laan rëbaman:

—Mandamient mazri zojbloj rëban: “Gol bacaagdiajg, bën Israel, dux Dad ree Dios, tijbzi laaman naj Dios. ³⁰ Guyën xDadil Dios guidiblagaa guidib guijc guidib ladxil.” Laan naj mandamient mazri zojbloj. ³¹ Mandamient rarojpp, rëban: “Guyën ree ben ren zi'c rën lüj gajc.” Achet mandamient mazri zojbloj guial loj grop ree mandamient guie.

³² Dxel rëb mextr guin loj Jesús:

—Zagdxequi guneel, Mextr. Waliquil tijbzi Dios yu', achutri ben ren yu'.

³³ Abi' guidib guijc guidib ladx bejn guiënman laaman guidiblagaa, guiën

tëëman ben ren ree zi'c rën laagajcaman. Laan naj ni mazri zobjloj guial loj gra gon ni rudëëd bejn loj Dios.

³⁴ Chi biguien Jesús badxi' mextr guinan zagdxë, rëbaman:

—Ad zijtt za'l par chu'l loj xgualrniabee Dios.

Dxel achutri bayax xhie niniabdiidx lojman.

Chu loj xdiaa za Cristo

(Mt. 22:41-46; Lc. 20:41-44)

³⁵ Chi culüü Jesús bejn ree lën yadooro' Jerusalén, gunabdiidxaman loj reeman rëbaman:

—¿Chexc zeel rëb ree mextr rajc ley guial za Cristo loj xdiaa rey Davi?

³⁶ Awa Davi guin gajc gunee por xSprijt Dios, rëbaman:

Dios rëb loj da Dadan:

“Gurej da ladbeen,

xt gabecan xin rdxe'ch ree lüj guial'.”

³⁷ Yan bal xi'n Davi naj Cristo, ¿chexquiza zeel rëb Davi guin lojman Dad?

Graczi ree bën riga' lën yadoo guin dád nix yu' luxdoo reeman rucaagdiajg reeman xtiidxaman.

Ni rüjn ree mextr rajc ley

(Mt. 23:1-36; Lc. 11:37-54; 20: 45-47)

³⁸ Chi culüü Jesús bejn ree, rëbaman loj reeman:

—Gol gojp cudad con ree mextr rajc ley, din ruladx reeman sa reeman gacw reeman lajd zagdxë, ruladx tëë reeman gugajpdioz ree bejn laa reeman con respejt niz lunejz. ³⁹ Abi' lën ree yadoo ruladx reeman cwe reeman lod rbej ree bën zobjloj, ziangajc rüjn reeman lod ritaw reeman. ⁴⁰ Raca' tëë reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti narooob yayal reeman.

Gon badëëd tijb béngunaa bizëjb

(Lc. 21:1-4)

⁴¹ Tijb dxej zobj Jesús lën yadooro' Jerusalén niz lod za' alcancia ni ru gon, abi' ruguaaman rgu' ree bejn milia lën alcancia guin, në zien ree benrijcw rgu' zro' milia. ⁴² Dxel bidxin tijb béngunaa bizëjb prob, badxe'man tio'p zintabldoo ni lasajc ta'nzi. ⁴³ Abi' gurejdx Jesús bën naj ree xbejnman, rëbaman:

—Diidxli rnin lojdi guial bën bizëjb prob guin mazri lasajc gon badxe'man guial loj gon badxe' gra ree bën guin. ⁴⁴ Din graczi reeman rudxe' ni rüjn laa reeman sobr, per laaman majsi najman bënprob, badxe'man graczi ni rajpaman par guilbannëman.

13

Rëb Jesús guial yaze'n yadooro' Jerusalén

(Mt. 24:1-2; Lc. 21:5-6)

¹ Chi barii Jesús lën yadooro' Jerusalén, rëb tijb ree xbejnman lojman:

—Mextr, jbaguiaa xi nix naj ree guiaj guin nix tëë naj ree yu guin!

² Badxi' Jesúsán rëbaman:

—Zi'c ruguiaal yu narooob guin ree, zadxin dxej, ni'czi tijb guiaj guin ad zaya'nt guijc stijban, gran yaze'n.

Ni gac chi gad guidxliuj nit

(Mt. 24:3-28; Lc. 21:7-24; 17:22-24)

³ Chi zojb Jesús ruguia' la Olivos, ni naj niz lod nudxi' loj yadooro' Jerusalén. Dxel gubig Béd lojman con Jacob, Waj con Andrejs, laaz reeman za'né laaman yagaj, abi' gunabdiidx reeman lojman, rëb reeman:

⁴—Guna, ¿goc gac zian? ¿Xhie sen gac chi ma zidyob gac zian?

⁵ Badxi' Jesús laan rëbaman:

—Gol gojp cudad chitëe chu gusquiee lëjt. ⁶ Din zien ree bën gui't guiëb reeman guial por naj zëed reeman, guiëb tëe reeman: “Naj naj Cristo”, abi' gusquiee reeman zien bejn.

⁷ Per lëjt chi guiguiejndi cayajc wadijl o zëeb diidx gac wadijl, ad guidxe-bidi; din najczi gac zian, per ad por laatan ma bidxin dxej nit guidxliuj. ⁸ Din til nacion con stijb nacion, til tëe bën rajp guialrniabee con stijb bën rajp guialrniabee, gui't tëe ree xudoxh në gubijn niz ni niz guie. Zian gac chi ma sulor ree gualzi ni naj gac.

⁹ Gol gojp cudad, din zadxin dxej yayü ree bejn lëjt loj ree guxtis, abi' quin reeman lëjt lën ree yadoo. Chinë reeman lëjt loj ree gobernador në loj ree rey guial najdi da bejnan, zian gac din chile' güdi da diidxan loj reeman. ¹⁰ Per yalojxgaj rüjn naguiejn guire'ch xtiidza'c Dios loj gra ree nacion, dxelri nit guidxliuj. ¹¹ Chi chinë reeman lëjt loj ree guxtis, ad bal chu'di xgab, ad bal güün tëedi xgab xhie guiëbidi loj reeman. Gol gunee diidx gunee Dios lëjt loj hor guin. Din ad lëjtjan guiniee, xSprijt Diosan guiniee. ¹² Abi' guidxin dxej yayü bejn laagajc bijchaman din guiëtix, ziangajc ree bën naj dad yayü laagajc xi'n reeman, abi' ree bejn yayü xdad xniala reeman par guiët reeman. ¹³ Gra bénguidxliuj guidxe'ch lëjt guial najdi da bejnan, per bën sudxi'ch loj ni rliladxaman naj xt dxej chigra guibanman, laaman yayal xanyabaa.

¹⁴ 'Chi guguaaadi zojb tijb ni dxuudx lën yadooro' Jerusalén, zi'c bacaa Daniel, bën badëe xtiidx Dios loj ree bejn diidz gulal (bën gool ree gui'ch guie, gol bignia'n), guial bën zojb ree niz Judea chigxüün reeman niz dajn. ¹⁵ Guiaad bën yë'p guijc yu lidx dxejzii, ad yayu lënü lidxaman tia' xhie xieenman. ¹⁶ Guiaad bën za' dajn, ad yajejc lidxaman chigxii xabaman. ¹⁷ ;Probza ree béngunaa nüü xi'n o bën ca' ree xindobëz lën ree dxej zii! ¹⁸ Gol gurejdx gunab Dios chitëe yayal gac zian tiamp nayaag, ¹⁹ din dád gualziro' chu' dxejzii ree, zi'c ad wayajctczi diidz chi beenchaaw Dios guidxliuj, ad yu' tëetri dxej gac zian. ²⁰ Bal id zasdop Dios dxej zii ree, ni'czi tijb bejn ad zalaat, per gusdopaman laa reen, por ree bën rënman, bën gulejman par laaman.

²¹ 'Bal chu na lojdi: “Gol baguiaa, laa Cristo za' guie”, o “laaman za' ni”, ad bal chililadxidi. ²² Din gui't zien ree bejn, na reeman guial laa reeman naj Cristo o na reeman laa reeman naj bën rudëe xtiidx Dios loj ree bejn, abi' güün reeman milagr ree në ree graloj ni yadxaloj ree bejn, din gusquiee reeman laa reeman, abi' bal zile'n xt zajc në ree bën gulej Dios gusquiee reeman. ²³ Zeel gol gojp cudad, ma bagojnxgajn lëjt gra ni gac.

Gui't Bén guxhaal Dios zatijb

(Mt. 24:29-35, 42-44; Lc. 21:25-36)

²⁴ 'Per lën ree dxej ni ma gudëd gra ree gualzi guin, zacajy loj gubijdx abi' ad zusnitri bëew, ²⁵ zayaajb ree bajl yu' xanyabaa guiaad gra ree ni yu' xanyabaa guiniib reen. ²⁶ Dxel gugiaa ree bejn Bén guxhaal Dios rdiinman bacha' zëëdaman loj zaj con guialrniabee narooabaman. ²⁷ Abi' guixhiaal ree xianjlaman guidiblagaa guidxliuj din guchajg reeman lasa' ree bën ma naj par Dios.

²⁸ 'Gol badxe'guijc ni ganin lëjt: Chi ma naquie'n xidx yag higo abi' ma caydxib ree xbalagan, lëjt ragbee guial ma zidyob tiamp nalaa. ²⁹ Ziangajc chi guguaadi ma cayajc ree ni guin, gol gogbee guial ma zidyob dxej gac zi'c ma rnin. ³⁰ Diidxli rnin lëjt guial gra ree ni guin gac chi gad ree bën naban lën ree dxej guie guiët. ³¹ Guidxliuj nē xanyabaa zanijt reen, per da diidxan ad zadëdt gacan cumplid.

³² 'Per achut ragbee xhie dxejn xhie tëë horan gac ree ni guin, ni'qui ree anjl yu' xanyabaa, ni'qui Xi'n Dios ad ragbeet, tijbzi dux Dad ree Dios ragbee.

³³ 'Zeel gol gojp cudad, gol guzujsin tëë, gol gurejdx gunab Dios din ad ragbeetidi goc gac zian. ³⁴ Ni guin ree naj zi'c chi ririi tijb bejn rejman zijt. Abi' chi gadaman grii rudëëman dxiin loj tijbgaj ree xmojsaman, rniabee tëëman susin bën rajp ro' port. ³⁵ Yan ziangajc lëjt gol guzujsin, din ad ragbeetidi goc o xhie horan gualan bal chi ma ribej guiaal ya, o garol guiaal, o chi ma rbidxa' guid, o rsildoo. ³⁶ Zeel gol guzusin din bal dxejczj gualan ad guidxaaglojn lëjt ad cayüjntidi zi'c rayal. ³⁷ Abi' ni canin lojdi, loj gradi caninan: Gol guzujsin.

14

Baya'n reeman diidx xhienaag guiniaaz Jesús (Mt. 26:1-5; Lc. 22:1-2; Jn.11 :45-53)

¹ Zatio'p dxej riaadx gal lanij pascw, lanij raw ree bejn guidxtil ni ad yu't levadur. Abi' ree bixhioz rniabee ree bixhioz con ree mext rajc ley, raguiil reeman mod xhienaag gusquiee reeman Jesús, din guiniaaz reeman laaman gugüjt reeman laaman. ² Per rëb reeman:

—Ad zaguieent ree zian loj ree dxej lanij guin, chitëë gac naquie'.

Baroob tijb béngunaa perfum guijc Jesús (Mt. 26:6-13; Jn.12 :1-8)

³ Dxel chi za' Jesús luguiedx Betania lidx Simón, bën guneë reeman leproso, abi' chi zojbaman xan mex cayawaman, bidxin tijb béngunaa ca'man lumejt yu'n perfum ni lasajc wayëjx guial gojcchaawnën ganax nardo, zianz guxhalaan ro' lumejt guin persi baroobaman perfum guin guijc Jesús. ⁴ Abi' yu' ree bën za' yagaj bidxe'ch, rëb loj lasa' reeman:

—¿Chexc zeel guxhie'man perfum guin? ⁵ Awa zajc nido'n choon gayuu denario din nüjnan yudar bënprob ree.

Abi' caneegijdx reeman béngunaa guin.

⁶ Per rëb Jesús loj reeman:

—Gol basa'nman. ¿Chexc zeel ruslendi laaman? Zagdxé naj ni beenman con naj. ⁷ Zianczi sunëdi bënprob ree, abi' zajc güündi laa reeman yudar chi guiëndi, sa'n naj ad ziantczi sunëdi naj. ⁸ Béngunaa guie beenman ni golguzujman, ma beenchaawxgajman da cuerpan par chi guidxin dxej guiguie'chan. ⁹ Diidxliczi rnin lëjt, guial guidib loj guidxliuj bantëëz guin guinieë reeman xtiidzxa'c Dios, zü ree bejn diidx ni been béngunaa guin con naj din gusaaladx reeman laaman.

Baguiil Judas mod xhienaag yayüman Jesús (Mt. 26:14-16; Lc. 22:3-6)

¹⁰ Judas Iscariote, tijb ree xbejn Jesús, wejman bigneenëman bixhioz rniabee ree bixhioz din yayüman Jesús loj reeman. ¹¹ Chi biguiejn ree bixhioz

guin zian, dád babaa reeman. Abi' rëb reeman gudëed reeman milia lojman. Dxel guzuloj raguuilaman mod xhienaag yayüman Jesús.

Gudawnë ree xbejn Jesús xche

(Mt. 26:17-29; Lc. 22:7-23; Jn.13 :21-30; 1Co.11 :23-26)

¹² Dxej ni guzuloj lanij raw ree bën Israel guiadxtil ni ad yu't levadur, chi rugüjt reeman tijb xiildoo par lanij pascw, gunabdiidx ree xbejn Jesús lojman, rëb reeman:

—¿Ban guin rënl yuguieenan ni yadaaw ree guxhin pascw?

¹³ Dxel guxhaal Jesús tio'p ree xbejnman, rëbaman:

—Gol chej Jerusalén. Ni guguaadi tijb xinguaaw ca' re yu' nijs. Gol chinalix. ¹⁴ Abi' lod yayux, gol güjdx loj bën naj lidxan: “Na mextr: ¿Ban lënú gawnë ree xbejnman yan guxhin pascw?” ¹⁵ Dxel gulüüman lëjt tijb lënú narooob ni rarojp cwaa, ma najcchaaw lënú guin. Yagaj gol been ni yadaaw ree xche.

¹⁶ Dxel brii ree xbejnman wej reeman luguiedx guin, abi' bidxaagloj gajc reeman zi'cgajczi rëbaman, zianz been reeman ni gaw reeman guxhin pascw.

¹⁷ Chi gure guiaal, bidxin Jesús con guidxiptio'p ree xbejnman. ¹⁸ Dxel chi zojb reeman xan mex cayaw reeman, rëb Jesús loj reeman:

—Diidxliczi rnin lojdi guial tijb lëjt, bën cayawnë naj, laaman yayü naj.

¹⁹ Dád guyunaya reeman, abi' guzuloj canabdiidx tijb gaj reeman, rëb reeman lojman:

—¿Najn ya?

Abi' rëb stijbaman:

—¿Wa najn ya?

²⁰ Badxi'man laan rëbaman:

—Loj guidxiptio'pidi, tijb lëjtan, bën cugajdx xguiadxtil loj gajc pliajt lod cugajdx da guiadxtilan, laaman. ²¹ Walican guial Bén guxhaal Dios naj sacaman zi'c ca loj xtiidx Dios. Per, ¡prob bën yayü laaman! Zagdxeli naj par laaman ad niutaman loj guidxliuj

²² La'tgaj cayaw reeman, cwa' Jesús guiadxtil abi' badëëman quixtëe loj Dios, dxel gula'man laan badëëman loj reeman, rëbaman:

—Gol gudaw guiadxtil guie, laan naj da cuerpan.

²³ Dxel cwa'man tijb cojp yu' vin, chi gulox badëëman quixtëe loj Dios, badëëman cojp guin loj reeman, abi' gra reeman gu' vin yu' lojn. ²⁴ Zianz rëbaman loj reeman:

—Vin guie naj da rejnan ni gaxhie'n chi guiëtan por zien ree bénguidxliuj, din guixal tijb nejz cüb xhienaag gap ree bejn perdon loj Dios. ²⁵ Naj rni lëjt, ad yu'tri dxej guië'n vin rajcchaawnë uv, xt dxej ni guië'n vin cüb lod rniabee Dios.

Rëb Jesús guial guiëb Bëd ad nünbeetaman laaman

(Mt. 26:30-35; Lc. 22:31-34; Jn.13 :36-38)

²⁶ Chi gulox biil reeman tijb cant par Dios. Dxel zë reeman ruguia' Olivos.

²⁷ Dxel rëb Jesús loj reeman:

—Gracziidi tio'nladx naj yan guxhin, zi'c ca loj xtiidx Dios lod rëb: “Gugüjtan bën rajp ree xiil, abi' guire'ch reeb.” ²⁸ Per chi yabanan, yaloj naj ganeed lojdi gan Galilea.

²⁹ Dxel rëb Bëd lojman:

—Majsi gra reeman tio'nladx lüj, per naj ad zaro'nladxtan lüj.

³⁰ Badxi' Jesúsán rëbaman:

—Naj rni lüj Béd, yan guxhin gajc chi gad gujđ cwidxa' tio'p volt, choon volt mal rëbil guial ad nünbeetil naj.

³¹ Per naguiejn rüjn Béd rëbaman:

—Majsi guiëtnë'n lüj, per ad zëtan guial ad nünbeetan lüj.

Abi' graczi reeman rëb zian.

Rbejdx rniab Jesús Dios lod la Getsemani

(Mt. 26:36-46; Lc. 22:39-46)

³² Chi bidxin reeman tijb luar la Getsemani, dxel rëb Jesús loj ree xbejman:

—Gol gurejsii guie, la'tgaj gabedx ganaaban Dios.

³³ Abi' binëman Béd, Jacob con Waj, dxel guzuloj guyunayaman abi' ad nixtri yu' luxdooan. ³⁴ Zianz rëbaman loj reeman:

—Yu' naya da't luxdon, rulüü ma gugüjtan naj. Gol baya'n guie ad gaayëjsidi.

³⁵ Abi' guzaman zata'n, zianz gurerulojman, gunabaman loj Dios, bal zile' téd ni naj sagdiajman. ³⁶ Chi cabejdx canabaman Dios, rëbaman:

—Dad, graczi zajc güünl. Babëë naj loj ni gazaagdiajn. Per ad gac zi'c rënan, rayal gac zi'c rënl.

³⁷ Dxel ziaman lod baya'n ree xbejman, chi badxinman cwë' reeman laa reeman naga'yëjs, zianz rëbaman loj Béd:

—Simón, ¿naga'yëjsil ya? ¿Ni'qui tib hor ad gojct nibejnaal ya? ³⁸ Gol gurenaa, gol gurejdx gunab Dios chitëë güün xindxab lëjt gan. Din rëndi güündi zi'c rayal, per xcuerpidi ad rtiëjbtan.

³⁹ Dxel zëman zatijb persi gurejdx gunabaman Dios con diidx guin gajc ree.

⁴⁰ Chi badxinman lod riga' reeman, laagajc reeman naga'yëjs zatijb, guial yu' da't bacaal loj reeman, abi' ni'quid radxejlt xhie guiëb reeman lojman. ⁴¹ Ni bayon volt badxinman, rëbaman:

—¿Sta naga'yëjsidi ya? ¿Sta cayziiladxidi ya? Gol batie'ch xbacaalidi din naj, najn Bén guxhaal Dios ma bidxin hor yayü reeman naj loj ree bëndol.

⁴² Gol bixche, yo' ree, laa bén yayü naj ma zëëd gajxh.

Gunaaz reeman Jesús

(Mt. 26:47-56; Lc. 22:47-53; Jn.18 :2-11)

⁴³ Sta caneenë Jesús laa reeman chi bidxin Judas, bén goc tijb ree xbejman. Bidxinëman zien ree bejn ca' reeman espad con yag, guxhaal ree bixhioz rniabee ree bixhioz laa reeman con ree mextr rajc ley con ree guxtis Israel. ⁴⁴ Abi' Judas bén bayü laaman ma bagojnxgajman bén guin ree rëbaman:

—Bén gawan xid, laaman naj bén raguuilidi, gol gunaazaman gol chinëman, gol gojpaman ad guslaadi laaman.

⁴⁵ Chi bidxin Judas dxel gubigaman loj Jesús, rëbaman:

—Mextr, Mextr.

Dxel gudawaman laaman xid. ⁴⁶ Zianz gunaaz ree bén guin laaman din chinë reeman laaman. ⁴⁷ Per tijb bén za' yagaj gulëë xiespadaman, gutü'man guidiajg xmojs bixhioz rniabee gra ree bixhioz. ⁴⁸ Dxel rëb Jesús loj ree bén guin:

—¿Chexc zeel zëëdidi con espad con yag din chinëdi naj zi'c tijb xingubaan?

⁴⁹ Zianczi guzunë'n lëjt lën yadooro' Jerusalén rulün lëjt xtiidx Dios, abi' ad gunaaztidi naj. Per gra ree ni guie cayajc din gac cumplid ni ca loj xtiidx Dios.

⁵⁰ Dxel graczi ree xbejn Jesús baxüün, guro'nladx reeman laaman.

Tijb xin binal Jesús

⁵¹ Per guyu tijb xinguiag binalix Jesús, nadüübix tijbzi lajd. Abi' chi gunaaz ree bën guin laax, ⁵² baslaagajquix lajd guin, zigxüünt ziladix.

Za' Jesús loj ree guxtis

(Mt. 26:57-68; Lc. 22:54-55, 63-71; Jn.18 :12-14, 19-24)

⁵³ Dxel binë reeman Jesús loj bixhioz rniabee gra ree bixhioz, abi' badxaag lasa' ree bixhioz rniabee ree bixhioz con ree guxtis Israel con ree mextr rajc ley. ⁵⁴ Abi' zijt zijt binal Bëd Jesús xt rule' lidx bixhioz guin, dxel gurejman ruděj con ree bën rajp rulidx bixhioz guin,

⁵⁵ Abi' ree bixhioz rniabee ree bixhioz con gra ree guxtis, baguuil reeman mod xhienaag gutedia' reeman Jesús din chile' gugüjt reeman laaman, per ad badxejlt xhienaag nutedia' reeman laaman, ⁵⁶ majsi zien reeman rudxiib diidx rusquiee guijcaman, per garent garen rëb tijb gaj reeman. ⁵⁷ Dxel guzuli tio'p choon reeman guneë reeman diidx rusquiee ree contr laaman, rëb reeman:

⁵⁸ —Dunujn baguiejn rëbix: “Naj guse'n yadooro' Jerusalén ni been ree bejn, abi' choon dxejzi yayünanan sïn xyudar ree bejn.”

⁵⁹ Per ni'qui zian ad guneet reeman tibloj, garent garen guneë reeman.

⁶⁰ Dxel bixhioz rniabee gra ree bixhioz guzuliman galay ree bën riga' yagaj, abi' gunabdiidxaman loj Jesús, rëbaman:

—¿Nid xhie diidx yadxi'l ya? ¿Wali ni canee reeman contr lüj ya?

⁶¹ Per achetczy rëb Jesús, ad badxi'taman diidx, dxel gunabdiidx bixhioz rniabee guin lojman zatijb, rëbaman:

—¿Lüj naj Cristo ya, Xi'n Dios Bén nagle'?

⁶² Badxi' Jesusan rëbaman:

—Walican, najcan. Abi' lëjt zuguiaadi naj najn Bén guxhaal Dios zooban xladbee Dios Bén ca' gra gualrniabee guguaia tëëdi naj guialan loj zaj xanyabaa.

⁶³ Chi biguiejn bixhioz guin zian, gudixya' xabaman, dxel rëbaman:

—Ad rüjntri naguiejn yadiil ree testiw. ⁶⁴ Lëjt ma biguiejn caneeguidxix Dios. Yan, ¿xhie nadi?

Abi' graczi reeman rëb, guiëtaman.

⁶⁵ Yu' reeman rucojpp xhiejn lojman, ruta'cw tëë reeman lojman, dxel riguün reeman laaman, rëb reeman:

—¡Guneeya' chu gudin lüj!

Guiáad ree bën rajp yagaj wëëz reeman lojman.

Rëb Bëd ad nünbeetaman Jesús

(Mt. 26:69-75; Lc. 22:56-62; Jn.18 :15-18, 25-29)

⁶⁶ Chi za' Bëd rule' guin, dxel bidxin tijb béngunaa rüjn dxiin lidx bixhioz rniabee guin. ⁶⁷ Chi baguiaaman zobj Bëd ruděj guin cucha'man, baguiaaman lojman, dxel rëbaman:

—Në lüj za'në Jesús bën Nazaret.

⁶⁸ Per gurexuu Bëd rëbaman:

—Ad nünbeetan laaman, ad ragbeetan xhienin rnieel.

Chi bariiman ro' port guin, dxel guridxa' gujd. ⁶⁹ Dxel baguiaa béngunaa guin Bëd zatijb, zianz guzuloj rëbaman loj ree bën riga' yagaj:

—Në bën guin naj xbejn Jesús.

⁷⁰ Per gurexuu Bëd zatijb. Gojc xchejdoo rëb ree bën riga' yagaj loj Bëd:

—Walican nē lūj naj xbejnɔ din xin Galilea lūj, abi' zi'cgajc rniee reeman rnieel.

⁷¹ Per guzudxi'ch Bēd con ni rēbaman, zianz rēbaman:

—Gudēēd Dios naj casti bal rusquieen, ad nūnbeetan bēn nadi.

⁷² Loj hor zii gajc barojp volt guridxa' guid. Dxel basaaladx Bēd guial rēb Jesūs lojman: “Chi gad guid cwidxa' tio'p volt, mal gojc choon volt rēbil ad nūnbeetil naj.” Chi basaaladxman zian, dxel guzuloj cayoonman.

15

Binē reeman Jesūs loj Pilato

(Mt. 27:1-2, 11-14; Lc. 23:1-5; Jn. 18 :28-38)

¹ Chi bareguiaal rsildoo, badxajg lasa' ree bixhioz rniabee ree bixhioz con ree guxtis Israel nē ree mextr rajc ley con gra ree guxtis, abi' baya'n reeman diidx xhienaag gūūn reeman. Dxel guxhii reeman Jesūs binē reeman laaman loj Pilato. ² Abi' gunabdiidx Pilato loj Jesūs rēbaman:

—¿Lūjn naj xrey ree bēn Israel ya?

Badxi' Jesūs laan rēbaman:

—Najcan.

³ Abi' ree bixhioz rniabee ree bixhioz zien ni rudxiib reeman guijcaman, ⁴ zeel gunabdiidx Pilato lojman zatijb, rēbaman:

—¿Nid xhie diidx yadxi'l ya? Baguiaa dād zien ni rudxiib reeman guijquil.

⁵ Per achetczi badxi' Jesūs, zeel dād badxa loj Pilato

Gunabee reeman guiēt Jesūs

(Mt. 27:15-31; Lc. 23:13-25; Jn. 18 :38–19:16)

⁶ Loj ree dxej lanij pascw, ruslaa Pilato tijb bēn yu' ladxguuib, bēn rēb ree bēn guiedx guin guslaaman. ⁷ Lēn ree dxej zii yu' bēn la Barrabás ladxguuib con ree ben ren, bēn bagūjt ree bejn loj tijb wadijl ni been reeman contr gobiarn. ⁸ Dxel chi bido'p ree bejn, rēb reeman loj Pilato din gūūnman zi'c naj costumbr, ⁹ Abi' rēb Pilato loj reeman:

—¿Rēndi ya guslaan xreydi?

¹⁰ Rēbaman zian guial ragbeeman bayū ree bixhioz guin laaman por guial rdēdlojzi reeman laaman. ¹¹ Per ree bixhioz rniabee guin badxe' reeman bejn ree diidx din guiēb reeman loj Pilato guslaaman Barrabás. ¹² Abi' gunabdiidx Pilato loj reeman rēbaman:

—¿Xhie rēndi gūnnē'n bēn nadi naj xreydi?

¹³ Dxel gurixdiaj reeman rēb reeman:

—¡Bacaax loj crūjz!

¹⁴ Zianz rēb Pilato loj reeman:

—Per ¿xhieza ni mal beenx?

Guiād laa reeman mazri rbixdiaj reeman, rēb reeman:

—¡Bacaax loj crūjz!

¹⁵ Abi' guial rēn Pilato yaya'nman zagdxē loj reeman, zeel baslaaman Barrabás, gunabeeman a Jesūs, dxel bayūman laaman loj reeman din tiaman loj crūjz.

¹⁶ Abi' binē ree xin suldad guin Jesūs xlule' palas, yagaj badxaag lasa' gra reex. ¹⁷ Abi' bascajcw reex laaman tijb lajd murad, dxel been reex tijb coron guiējch badxe' reex guijcaman. ¹⁸ Dxel guzuloj rbixdiaj reex rēb reex:

—¡Guibanri xrey ree bēn Israel!

¹⁹ Zianz rugaz reex var guijcaman, rulaa xhiejn reex lojman, abi' ruzuxib reex lojman. ²⁰ Chi gulox baze' reex laaman, babëe reex lajd murad guin ladaman, bascajcw reex xabczaman, dxel zinë reex laaman din gucaa reex laaman loj crüjz.

Bacaa reeman Jesús loj crüjz

(Mt. 27:32-44; Lc. 23:26-43; Jn. 19:17-27)

²¹ Chi zinë reex Jesús, badxaagloj reeman tijb bën Cirene, laman Simón, xdad Lejandr con Rufo, ziaadaman bazaman dajm. Abi' been ree suldad guin naguiejn biaaman xcrüjz Jesús.

²² Abi' binë reex Jesús luar la Gólgota, rën guiëban Calaver. ²³ Yagaj badëed reex vin no'ch ni la mirra lojman din guië'man laan, per ad gu'taman laan.

²⁴ Chi ma bacaa reex laaman loj crüjz, dxel gudxijt reex suert guijc xabaman din guidoon xhie yaval tijbgaj reex

²⁵ Raca gaa rsil bacaa reex laaman loj crüjz. ²⁶ Guijc crüjz guin bacaa reex lejtr ni rëb chexc zeel bacaa reex laaman loj crüjz, rëban: "Xrey ree bën Israel."

²⁷ Chi bacaa reex laaman loj crüjz, në zatio'p ree xin gubaan bacaa reex loj crüjz, tijbix cwa xladbeeman, zatijbix cwa xladruvejsaman. ²⁸ Zian gojc cumplid ni ca loj xtiidx Dios, lod rëb: "Nayabaman loj ree benmal."

²⁹ Abi' ree bën ridëd yagaj ruze' reeman laaman runij guijc reeman, rëb reeman:

—Conza ni rnieel guial rëbil, yase'nl yadooro' Jerusalén abi' loj choon dxejzi ma bayüjnlan zatijb, ³⁰ yan baslaa lüj gajc baguiajt tëe loj crüjz zii.

³¹ Ziangajc ruze' ree bixhioz rniabee laaman con ree mextr rajc ley, rëb reeman:

—Gognëx ben ren ree, guiáad laax ad rajct ruslaa laagajquix. ³² Yaguaajtix loj crüjz guin, bal laax naj Cristo, xrey ree bën Israel, din yaguaa ree, dxel yaliduladx ree.

Xt në ree xingubaan canëman loj crüjz guneeguidx laaman.

Güjt Jesús

(Mt. 27:45-56; Lc. 23:44-49; Jn. 19:28-30)

³³ Chi gol garol dxej, bicajy guidib guidxliuj xt raca choon wadx. ³⁴ Dxel raca choon guin gurixdiaj Jesús rejs, rëbaman:

—Eloi, Eloí, ¿lama sabactani? —rën guiëban: Diosan, Diosan, ¿chexc zeel gulëeladxil naj? ³⁵ Yu' ree bën za' yagaj biguiejn, abi' rëb reeman:

—Gol bacaagdiajg niad. Laax cabejdx Elías bën badëe xtiidx Dios loj ree bejn.

³⁶ Dxel ruxüün tijbaman, bicajdxaman tijb xiil loj vinagr, bacaaman laan loj tijb yag, abi' bacaaman laan ro' Jesús din guië'man laan, rëbaman:

—Gol basa'nx, yaguaa ree don zi't Elías yalet laax loj crüjz guin ya.

³⁷ Per Jesús dád rejs gurixdiajman, dxel güjtaman. ³⁸ Loj hor zii goxya' lajd nal lën yadooro' Jerusalén, gojcan tio'p lala', diizd guijc guin xt guía' guin goxya'. ³⁹ Dxel suldad rniabee ree suldad guial za'x niz loj Jesús. Chi baguiaax xhienaag güjtaman, rëbix:

—Walican, Xi'n Dios bën guin.

⁴⁰ Në tio'p choon ree béngunaa za' zijt ruguiaa ni cayajc. Loj ree béngunaa guin no'ch Maria Magdalena, në Salomé në Li xníaa Xiëb con Jacob bën naj benguiag loj Xiëb. ⁴¹ Béngunaa guin ree binal Jesús, been tëe reeman laaman yudar chi guzuman Galilea, në zien ree béngunaa ren binal laaman diizd Galilea xt Jerusalén.

*Biguie'ch Jesús**(Mt. 27:57-61; Lc. 23:50-56; Jn.19 :38-42)*

⁴² Chi bidxin dxej rüjn ree bén Israel gra, chi guixiezi naj dxej raziiladx reeman, ma cabej guiaal, ⁴³ bidxin Xiëb bén za guiedx Arimatea. Gojcaman tijb xguxtis ree bén Israel, abi' gojp ree bejn laaman respejt, në laaman rbëz xguialrniabee Dios, abi' guyuman valor wejman loj Pilato, persi banabaman xcuerp Jesús. ⁴⁴ Dád badxa loj Pilato guial ma güjt Jesús, dxel gurejdxaman xin suldad rniabee ree suldad persi gunabdiidxaman bal walin. ⁴⁵ Abi' rëb suldad guin guial walican ma güjtaman, dxel cwëjb Pilato baca' Xiëb cuerp guin. ⁴⁶ Guzii Xiëb tijb lajd, abi' chi baletaman xcuerp Jesús loj crüzj guin dxel batüübaman laaman lajd guin, biquie'chaman laaman lën tijb baa ni bidëen lën tijb guiaj, dxel basiaawaman ro' baa guin con tijb guiajro'. ⁴⁷ María Magdalena con Li xniala Xiëb, baguiaa reeman lod baquie'ch reeman Jesús.

16*Raban Jesús**(Mt. 28:1-10; Lc. 24:1-12; Jn.20 :1-10)*

¹ Chi gudëd dxej raziiladx ree bejn, María Magdalena, në Salomé, në Li xniala Jacob, bisii reeman parfum din chitëeb reeman laan xcuerp Jesús.

² Bareguiaal chidumingw, rsildoo brii reeman wej reeman ro' xbaa Jesús, naabzi rliejn gubijdx. ³ Chi zë reeman lunejz, rëb loj lasa' reeman:

—¿Chuzha chisüd guiaj nayaaw ro' baa guin?

⁴ Per chi bidxin reeman baguiaa reeman ma biniib guiaj za' ro' baa guin ad za'tri loj xluaran. ⁵ Chi guyu reeman lën baa guin, baguiaa reeman tijb xinguiaj zojbix ladbee, najcwix lajd naquich yool, abi' bidxeb reeman. ⁶ Per rëbix loj reeman:

—Ad rdxebidi, raguilidi Jesús bén Nazaret bén cwa loj crüzj. Per ma babanman, achutri laaman guie, gol baguiaa lod gudixh reeman laaman.

⁷ Yan, gol chej gol chiguedx loj Bëd në loj los demazri ree xbejnman guial yaloj Jesús ned cheman Galilea dxel chedi, ni guguaadi laaman zi'c ma naman lojdi.

⁸ Dxel cari da't barii ree béngunaa guin lën baa guin, dád canij reeman cadxeb reeman, abi' achut loj rëb reeman guial rdxeb reeman.

*Balüüloj Jesús loj María Magdalena**(Jn. 20:11-18)*

⁹ Chi ma baban Jesús, chidumingw rsildoo, yaloj loj María Magdalena balüülojman, bén babëëman gajdx xindxab luxdoo. ¹⁰ María Magdalena guin bicojn ree xbejn Jesús, bén yu'naya ree roon tëë reeman por laaman. ¹¹ Chi biguiejn reeman guial naban Jesús baguiaa tëë María Magdalena laaman, ad bililadxt reeman.

*Balüüloj Jesús loj tio'p ree xbejnman**(Lc. 24:13-35)*

¹² Chi gudëd gojc zian, garen balüüloj Jesús loj tio'p ree xbejnman lunejz chi zë reeman niz dajn. ¹³ Dxel bén guin ree bicojn lasa' reeman, per ni'qui laa reeman ad bililadxt reeman.

*Rucaabee Jesús bén naj ree apóstoles**(Mt. 28:16-20; Lc. 24:36-49; Jn.20 :19-23)*

¹⁴ Ni bigratë balüüloj Jesús loj za chiptib ree xbejnman, chi zojb reeman xan mex cayaw reeman, gudilëman laa reeman guial nad reeman, ad rililadxt

reeman b́en baguiaa ree laaman guial ma babanman. ¹⁵ Dxel rēbaman loj reeman:

—Gol chej guidib guidxliuj, gol chigtie'ch xtiidxza'c Dios loj gra ree bejn. ¹⁶ B́en chililadx tiobnijs tēē zajcaman perdon loj Dios. Per b́en ad zaliladxt xtiidxza'c Dios, laaman yayal casti. ¹⁷ Sen guie ree gap ree b́en chililadx naj: Por da guialrniabeen zabēē reeman xindxab luxdoo ree bejn, zanee tēē reeman diidx ren ree, ¹⁸ zanaaz reeman bēēl ree, abi' majsi guiē' reeman ni yu' venen guijc achet gac reeman, chi gudxiib yaa reeman guijc ree b́enragxuu, zayajc reeman.

Bayē'p Jesús xanyabaa

(Lc. 24:50-53)

¹⁹ Chi gulox guneenē Dad Jesús laa reeman, dxel bayē'paman xanyabaa, gurejman xladbee Dios. ²⁰ Guiáad laa reeman b́rii reeman zigtie'ch reeman xtiidxza'c Dios guidibczi. Abi' Dad Jesús gognē laa reeman, b́een reeman milagr ree, persi gogbee ree bejn guial xtiidxqui Dios naj ni rniee reeman. Amén.

Xtiidxa'c Jesucrist ni bacaa San Lujc

Rxhiaal Lujc gui'ch loj Teófilo

¹ Zien ree b́en ma been naguiejn gucaa ni goc con dunuj ree, ² zi'cgajczi balüü ree bejn dunuj ree, b́en baguiaa ree diidz guida'xchej ni been Jesús nê ni guzacaman, gutie'ch tēē reeman xtiidxaman. ³ Naj baguilxnejzchaaw diidz guida'xchejn, dad Teófilo, zeel naladxan zagdxen gucanan xnejz par lüj, ⁴ din chignia'l zagdxe diidxli balüü reeman lüj.

Rugojn tijb anjl gal Waj

⁵ Tiamp gunabee rey Herodes guidib niz Judea, guyu tijb bixhioz brii laj Zacarías, bachajgaman tib cwaa ree bixhioz brii laj xbejn Abías. Xbéngunaa Zacarías brii laj Elisabet, zaman loj xdiaa bixhioz brii laj Aarón. ⁶ Grop reeman gubajn xnejz loj Dios bazoob tēē reeman diidx graczi ni rniabee Dios, abi' achut rile' guiēb guial rajp reeman dol. ⁷ Per achut xi'n reeman guyu guial ad gojct niu xi'n Elisabet, grop reeman ma naj bengol.

⁸ Tijb dxej ni bayal ree bixhioz no'ch Zacarías loj, been reeman sirv loj Dios, ⁹ zi'c naj xcostumbr ree bixhioz guin, gudxijt reeman suert din guidoon chu yayal gudxe' goxyaal lēn yadooro' Jerusalén, abi' bayal Zacarías cu'man goxyaal guin. ¹⁰ La'tgaj cagu'man goxyaal guin, gra ree bejn riga' lule' cabejdx canab reeman Dios. ¹¹ Dxel balüüloj tijb xianjl Dios loj Zacarías, za'liman xladbee altar lod cayu goxyaal guin. ¹² Chi baguiaa Zacarías anjl guin, ad badxejlt xhie nūjnman, dad bidxebaman. ¹³ Per rēb anjl guin:

—Zacarías, ad rdxebil ma bacaagdiajg Dios ni gunabil. Chu' xi'n xbéngunaa Elisabet, gaquix xinguiaw abi' yagu'l laxj Waj. ¹⁴ Yabaa da'til, nê zien ree bejn yabaa chi galix, ¹⁵ guial gaquix xin lasajc loj Dios. Ad zē'tix vin ni'qui ni gusüdx laax. Abi' diidz chi gadix gal mal za'nê xSprijt Dios laax. ¹⁶ Por laax zien ree b́en Israel yayejc loj xDad reeman Dios. ¹⁷ Laax ned lojman, chu' xSprijt Dios luxdoox gap tēēx guialrniabee zi'c Elías, b́en badēē xtiidx Dios loj ree bejn, yabe'cdxex b́en naj ree dad con xi'n reeman, gulüü tēēx b́en ad ruzoobt ree diidz din guzuxnejzix bejn ree guidxga' reeman laaman chi gui'taman.

¹⁸ Dxel rēb Zacarías loj anjl guin:

—¿Xhienaag gagbeen guial gac cumplid ni nal? Din naj con da béngunaan ma nayajcan bengol.

¹⁹ Badxi' anjl guinan rēbaman:

—Naj naj Gabriel, rünan sirv loj Dios, laaman guxhaal naj zidnē'n diidxa'c guie lojl. ²⁰ Per yan guial ad bililadxtil da diidxan, yaya'nl gop ad zajct guinieel xt guidxin dxej gal xindo guin.

²¹ Guiáad ree ben riga' lule' guin cabēz reeman Zacarías yu' nawēēg reeman guial cayaglaaman lēn yadoo guin. ²² Chi bariiman ad rajctri rnieeman, gaz sen rūjnman guial ma baya'nman gop. Dxel gogbee reeman guial yu' xhie baguiaaman lēn yadoo guin.

²³ Zian baza' ree dxej ni been Zacarías sirv lēn yadoo guin, dxel zia lidxaman. ²⁴ Chi gudēd ree dxej guin, guyu xi'n xbéngunaa Elisabet. Gaay bēw tib guyuzaman lēnü, rēbaman: ²⁵ “Ze naj ni beennē Dios naj lēn ree dxej guie chitēē guze'ri ree bejn naj.”

Rugojn tijb anjl Li gal Jesús

²⁶ Ni goc xho'p bëew, guxhaal Dios anjl la Gabriel luguiedx Nazaret ni riga' niz Galilea, ²⁷ din chignajman tijb biinxdüb lam Li. Ma naj tia' tijb xin la Xiëb laam, xin zëed loj xdiaa rey Davi.

²⁸ Guyu anjl guin lod yu' Li abi' rëbaman:

—jXchan Li, Dios ma gulej lüj! Dios za'në lüj, ma beenle' tëëman lüj loj gra ree bëngunaa.

²⁹ Chi baguiaa Li anjl guin dád badxa lojm guial rëbaman zian, abi' gunab-diidxim xhie rën guiëb ree diidx guin. ³⁰ Dxel rëb anjl guin:

—Li, ad rdxe bil din lüj gule Dios beenle' tëëman lüj. ³¹ Chu' xi'n'l, abi' chi galaman yagu'l lajman JESÚS. ³² Laaman gac bën zobjloj, guiniee ree bejn laaman Xi'n Dios bën yu' xanyabaa. Güün dux Dad ree Dios laaman rey zi'c goc xdiaagulalaman Davi, ³³ din nabeeman bën Israel ree xt goctëez, abi' xguialrniabeeman ad yu't dxej loxan.

³⁴ Dxel rëb Li loj anjl guin:

—jXhienaag chu' da xi'n'an awa achut bënguiaaw nabannë'n?

³⁵ Badxi' anjl guinan rëbaman:

—Por xSprijt Dios chu' xi'n'l, abi' xguialrniabee Dios bën yu' xanyabaa gusiaawan guijquil con xbalan. Zeel xi'n'l bën gal, gacaman naya nali abi' guiniee ree bejn laaman Xi'n Dios. ³⁶ Ziangajc lasa'! Elisabet ma yu' xi'nman, majsi ma najman bengol, bën rëb ree bejn ad zajct chu' xi'n, per yan ma gojc xho'p bëew yu' xi'nman. ³⁷ Din Dios graczi zajc güünman.

³⁸ Dxel rëb Li loj anjl guin:

—Dios naj bën rniabee naj, gacza zi'c rënman.

Ziat anjl guin.

Rignaj Li Elisabet

³⁹ Lën ree dxej guin wej Li cari da't tijb guiedx ni riga' lad ree guia' niz Judea, ⁴⁰ dxel guyum lënu lidx Zacarias, bagajpdiozim Elisabet. ⁴¹ Chi biguiejn Elisabet cha'm cugajpdiozim laaman, laa baniib gajc xindobëz yu' lënman, dxel guyu xSprijt Dios luxdooman guidiblagaa. ⁴² Abi' gunee Elisabet rejs, rëbaman:

—jDios ma beenle' lüj loj gra ree bëngunaa, beenle' tëëman bejndobëz yu' lën! ⁴³ jChuzä najn zeel zidganaj xniaa da Diosan naj, bën rniabee? ⁴⁴ Din biguiejnzan cha'! bagajpdiozil naj, laa baniib gajc da bindoon lënan guial babaam. ⁴⁵ Xiquilbaal guial bililadxil, din gac zi'c bagojn Dios lüj.

⁴⁶ Dxel rëb Li:

Ruzatan Dios zagdxe,

⁴⁷ rabaanë' tëën laaman, guial ragnëman naj.

⁴⁸ Guial baguiaaman naj, majsi biin rüjnzi sirv lojman naj.

Abi' diizd yan xt goctëez guza't ree bejn naj, guiëb reeman xiquilbaam.

⁴⁹ Din Dios, bën rniabee, dád zro' naj ni ma beennëman naj.

Naya naliman.

⁵⁰ Ad rbëzt rayaman graczi ree bën ruzoob xtiidxaman.

⁵¹ Zro' naj ni ma beenman con xguialrniabeeman.

Base'nman xixgab ree bën rüjn benro',

⁵² biquiedaman guialrniabee loj ree bën rniabee, guiáad loj ree bën ad zobjlojt badëëman guialrniabee loj reeman.

⁵³ Badëëman guialnaza'c loj ree bën biaadx guialraw,

guiáad ree benrijcw basa'nman laa reeman zezi.

⁵⁴ Gognëman bën Israel ree, xbejnman,
abi' ad bayanladxtaman nayaman laa reeman,

⁵⁵ zi'c rëbaman loj dux bëngulal ree,

Abraham në loj ree xdiaaman.

⁵⁶ Abi' baya'nnë Li Elisabet cost choon bëëw, dxel baguiaj lidxim.

Rajl Waj

⁵⁷ Chi bidxin dxej gojl xi'n Elisabet najx xinguaaw. ⁵⁸ Abi' gogbee ree lasa'man në ree bën zobj gajxh guial baya Dios laaman, dád babaa reeman bignaj reeman laaman. ⁵⁹ Chi ma gojc xindobëz guin toxman, dxel binë reeman laax guyux sen ni ru ree bën Israel. Abi' guyën reeman nagu' reeman lajdoox Zacarías zi'c la xdadix, ⁶⁰ per gunee xniaax, rëbaman:

—Ad zayutan zian. Rayal gaquim Waj.

⁶¹ Dxel rëb reeman lojman:

—¿Chexquiza zeel gaquix Waj? Achut ree lasa'l la zian.

⁶² Abi' con sen gunabdiidx reeman loj xdad xindobëz guin chu rënman grii lajx. ⁶³ Zianz gunabaman tibli'a' tabl abi' bacaaman lojn: “Waj grii lajx.” Dád badxalaj gra ree bën guin. ⁶⁴ Loj hor ziigajc gojc banee Zacarías, abi' guzulaj cuza'taman Dios zagdx. ⁶⁵ Gra ree bën zobjnëman gajxh dád badxa loj reeman, xt gra ree guiedx riga' lãd ree guia' niz Judea gogbee reeman graczi ni goc. ⁶⁶ Guiãad graczi ree bën gogbee zian, rniabdiidx loj lasa' reeman, rëb reeman:

—¿Chu gac xindo guin ya'n chi ni'six?

Rëb reeman zian guial laa rguien gajc ma beenle' Dios laax.

Ni gunee Zacarías

⁶⁷ Zacarías, bën naj xdad xindo guin guyu xSprijt Dios luxdooman guidi-blagaa, zianz guzulaj caneeman, rëbaman:

⁶⁸ Benza'c bendxoon naj Dios, dux Dad ree nayajc ree bën Israel, guial bi'taman bidganajman dunuj ree nayajc ree xbejnman, bidgalëë tëëman dunuj ree loj ni cayza'c ree.

⁶⁹ Guxhaalaman tijb bën rajp gualrniabee din yabëëman dunuj ree loj ni cayza'c ree,

zëëdaman loj xdiaa rey Davi, bën naj xbejn Dios.

⁷⁰ Zi'c been Dios promejs diizd gocli, zian gunee ree bën badëë xtiidxaman loj ree bejn, bën guban ree zi'c rënman:

⁷¹ guial yabëëman dunuj ree loj ree bën ralen dunuj ree, në loj gra ree bën yu'xyajn dunuj ree,

⁷² yaya tëëman dux bëngulal ree,

abi' ad zayanladxtaman promejs ni beenman.

⁷³ Ni ne naj promejs ni beenman loj dux bëngulal ree Abraham:

⁷⁴ guial yabëëman dunuj ree loj ree bën ralen dunuj ree, din chilë' yaguieen ree sirv lojman sin gualrdxëb,

⁷⁵ yabajn ree yaguieen tëë ree zi'c rënman, guidib tiamp ni yabajn ree.

⁷⁶ Guiãad lüj xi'n, guiniee ree bejn lüj bën rudëë xtiidx Dios loj ree bejn, Dios yu' xanyabaa.

Din nedil chiguieenchaawil xnejz bën naj Dad,

⁷⁷ gulüü tëël xbejnman din gagbee reeman xhienaag gac xtol reeman perdon,

laa tëë reeman loj casti.

⁷⁸ Guial raya da't dux Dad ree dunuj ree,

zeel guxhaal xi'nman, b́en naj zi'c xbacha' gubijdx din gusniman du loj ree,
 79 guixhial t́eeman xquiarguejn ree b́en źe loj nejzmal, b́en ad nabant ree
 xnejz zi'c ŕen Dios,
 gulúú t́eeman dunuj ree yadxoo ree loj xnejzaman din yabajn ree zagdx sin
 wadij.

80 Guíaad xindo guin guni'six guyu t́e xquiarguejnx mazri por Dios.
 Guzujx loj yujbidx, xt bidxin dxej guneex xtiidx Dios loj ree b́en Israel.

2

Rajl Jesús *(Mt. 1:18-25)*

1 Ĺen ree dxejzii gunabee rey Ćesar Augusto guiyab gra ree bejn guidib lod
 rniabeeman. 2 Laan naj ni yaloj biyab ree bejn chi goc Cirenio gobernador
 Siria. 3 Graczi ree bejn naj yaguaiaj ladx ladx din guiyab reeman. 4 Zianan
 zeel brii Xiéb luguiedx Nazaret ni riga' niz Galilea, wejman Belén, ni riga'
 niz Judea, lod gol rey Davi din loj xdiaa rey Davi źeéd Xiéb. 5 Wejman
 binéman Li, lacheelaman din guiyab reeman. Ma yu' xi'n Li. 6 Abi' la'tgaj za'
 reeman Belén, bidxin dxej gojl bejndobéz guin. 7 Yagaj gol xi'n yaloj Li, dxel
 batúúbaman bejndobéz guin lajd, gudijxhaman laaman lod ru ni raw ree be,
 guial ad bidxejlt ĺenü naya'n reeman.

Bidxin ree xianjl Dios lod za' ree b́en rajp xiil

8 Gajxh Belén guin za' ree b́en rajp xiil, abi' dajn guin gajc rdéd reeman
 guiaal rajp reeman laa reeb. 9 Dxejczy balúúloj tijb xianjl Dios loj reeman,
 naynidxuj basni xbiani Dios lod riga' reeman abi' dád bidxeb reeman. 10 Per
 ŕeb anjl guin loj reeman:

—Ad rdxebidi din zidn'é'n diidxa'c lojdi, por laan yabaa gra ree bejn.
 11 Yan, ladx rey Davi ma gojl b́en yabéé ĺejt loj ni cazajquidi, laaman naj
 Cristo, laaman naj Dad. 12 Abi' din yayünbeedi laaman; nadúúbaman lajd,
 naga'man lod ru ni raw ree be.

13 Dxejczy balúúloj zien da't ree anjl cw'é' anjl yaloj guin, ruza't reeman Dios
 zagdx, ŕeb reeman:

14 jBenza'c bendxoon naj Dios b́en yu' xanyabaa,
 abi' loj guidxliuj yabe'cdxeman luxdoo b́en ŕujn ree zi'c ŕenman!

15 Chi ma zia ree anjl guin xanyabaa, dxel ŕeb loj lasa' ree b́en rajp ree xiil
 guin:

—Yo' ree Belén yuquiaa ree ni goc ni, zi'c ma bagojn dux Dad ree Dios
 dunuj ree.

16 Dxel cari da't źe reeman, abi' bidxaagloj reeman Li nē Xiéb, nētée
 bejndobéz guin naga'man lod ru ni raw ree be. 17 Chi baguiaa reeman
 laaman, be reeman diidx ni ŕeb anjl guin loj reeman xcwent bejndobéz guin,
 18 abi' graczi ree b́en biguiejn dád badxa loj reeman ni ŕeb ree b́en rajp ree xiil
 guin. 19 Per Li, rgu'chaaw luxdooan gra ni rucaagdiajgaman, ŕujn t́eeman
 laan xgab. 20 Dxel zia ree b́en rajp ree xiil guin, rabaa reeman rudéé t́e
 reeman quixtée loj Dios por gra ni baguiaa reeman biguiejn t́e reeman,
 guial gojc zi'c ŕeb anjl guin loj reeman.

Biné reeman Jesús ĺen yadooro' Jerusalén

21 Chi ma gojc toxman gojl bejndobéz guin, badxe' reeman laaman sen ni
 ru ree b́en Israel, bagu' t́e reeman lajman Jesús zi'c ŕeb anjl guin loj Li chi
 gad Jesús gacxhiej ĺenman.

²² Chi bayaaloj ree dxej ni been Li zi'c rüjn ree béngunaa rajl xi'n, dxel biné reeman bejndobëz guin loj Dios lën yadooro' Jerusalén. ²³ Been reeman zian din loj ley guin ca: "Gra ree xindoniguaaaw rajl yaloj ma naj reex par Dios." ²⁴ Abi' biné reeman gon par Dios zi'c rniabee ley: rayal chiné reeman tio'p gugdo o tio'p palomdo.

²⁵ Tiamp zii zojb bén la Simeón Jerusalén. Najman benza'c rën tëëman Dios, rbëzaman bén gagné bén Israel ree za'né tëë xSprijt Dios laaman. ²⁶ Abi' por Sprijt guin gogbeeman guial ad zëjttaman xt guguaaman Cristo, bén guixhiaalaman. ²⁷ Dxel por xSprijt Dios wejman lën yadooro' Jerusalén. La'tgaj yu'man lën yadoo guin, Xiëb con Li bidxinné reeman Jesús din güün reeman zi'c rniabee ley, ²⁸ zianz gudiidx Simeón bejndobëz guin baza'taman Dios zagdxe, rëbaman:

²⁹ Dad, yanri ma babedxe luxdon.

Ma zajc guslaal naj guïëtan najn xmojsil, ma gojc zi'c nal.

³⁰ Din con quijb guiaalon ma baguian bén gagné dunujn.

³¹ Guial ma bazujl laaman loj gra ree bénguidxliuj.

³² Laaman naj biani par ree bén ad najt bén Israel, naj tëëman bacha' par ree xbén Israelil.

³³ Guiáad Xiëb con xniaa Jesús dád badxa loj reeman ni bigueijn reeman rëb Simeón xcwent bejndobëz guin. ³⁴ Dxel beenle'man laa reeman, zianz rëbaman loj Li xniaa Jesús:

—Li, Dios bacaabee bejndobëz guie din por laaman zien da't ree bén Israel laa loj dol, per zien reeman yaya'n loj xtol. Zidgalüüman bejn ree conin naj ni ruladx Dios, per zien reeman ad zënt laaman. ³⁵ Abi' zian gagbeeman xhienaag naj xixgab tijbgaj bejn, guiáad lüj zi'c tijb espad chëëz luxdool chi gac ree ni guin.

³⁶ Yagaj gajc za' tijb béngunaa yo'xh laman Ana, rudëëman xtiidx Dios loj ree bejn, xdadaman brii laj Fanuel, xdiaagulalaman gojc Aser. Benguiagan chi cwa' xinguaaaw laaman, abi' gajdx ijsi gubajnné lacheelaman. ³⁷ Ma gojc tajpgalbitap ijz baya'nman bizëjb. Zianczi yu'man lën yadooro', rba'nman rbejdx rniab tëëman Dios. ³⁸ Loj hor ziigajc bibigaman lod za'né Xiëb Li con Jesús, guzuloj cudëëdaman quixtëë loj Dios cuza't tëëman bejndobëz guin loj gra ree bén cabëz guixhiaal Dios bén gagné bén Jerusalén ree.

Zia reeman Nazaret

³⁹ Chi ma been reeman graczi ni rniabee xley Dios, dxel zia ladx reeman Nazaret ni riga' niz Galilea. ⁴⁰ Cani's bejndobëz guin, cayuman gojl, cayajcama nasin, cayünle' tëë Dios laaman.

Yu' Jesús lën yadooro' Jerusalén

⁴¹ Gazob ijz rej ree xdad Jesús Jerusalén lanij pascw. ⁴² Chi baza' Jesús chiptio'p ijz, biné ree xdadaman laaman lanij zii zi'c naj xcostumbr reeman.

⁴³ Chi ma gudëd lanij guin, baza ree xdad Jesús ma zia ladx reeman. Ad gogbeet reeman baya'n Jesús Jerusalén. ⁴⁴ Gunaladx reeman ma no'chaman loj ree bén zia. Zian guza reeman tibdxej. Per chi baguüil reeman laaman loj lasa' reeman në loj ree bén nünbee reeman, ⁴⁵ achut laaman naguiee. Dxel bayejc reeman zia reeman Jerusalén zatijb zigdiil reeman laaman.

⁴⁶ Xt ni gocri choon dxej badxejl reeman laaman lën yadooro' Jerusalén, zojbaman galay ree mextr rajc ley, cucaagdiajgaman canabdiidx tëëman laa reeman. ⁴⁷ Gra ree bén caguiejn ni rnieeman caydxaloj reeman guial

rajcaman në ree diidx radxi'man. ⁴⁸ Chi baguiaa ree xdadaman laaman, dád badxaløj reeman, dxel rëb xniaaman:

—Xi'n, ¿chexc zeel basajquil dunujn zian? Xdadil con naj dád nadxu'n xgab caydiilan lüj.

⁴⁹ Badxi' Jesús laan rëbaman:

—¿Chexc zeel raguilidi naj? ¿Nid ragbeedi ya rayal günan xchiin da Dadan?

⁵⁰ Per ad bignia't reeman xhie rën guiëb ni rëbaman.

⁵¹ Dxel bayejcnëman laa reeman zia reeman Nazaret, graczi xtiidx ree xdadaman ruzoobaman, guiáad xniaaman graczan rgu'chaaw luxdooman.

⁵² Zi'cri cani's Jesús cayu tëë mazri xquiarguiejnman. Rabaanë Dios laaman rabaanë tëë ree bejn laaman.

3

Rzuløj Waj rulüüman xtiidx Dios (Mt. 3:1-12; Mr. 1:1-8; Jn. 1:19-28)

¹ Chi goc chiin ijz rniabee rey Tiberio, abi' Poncio Pilato najman gubernador Judea, Herodes najman gubernador Galilea, bijchaman Felip najman gubernador Iturea në Traconite, guiáad Lisania najman gubernador Abilinia. ² Anás në Caifás naj reeman bixhioz rniabee gra ree bixhioz. Lën ree dxej zii gunee Dios Waj, xi'n Zacarías lod naj yujbidx. ³ Dxel gudëd Waj graczi ree guiedx riga' ro' guiiw Jordán, rëbaman loj ree bejn din yayüjn reeman xgab por xtol reeman tiobnijs tëë reeman, din güün Dios xtol reeman perdon. ⁴ Zian gojc cumplid ni bacaa Isaías bën badëë xtiidx Dios loj ree bejn, lod rëbaman:

Rguien cha' tijb bën rbidxa' loj yujbidx, rëbaman:

“Gol beenchaaw xnejz dux Dad ree Dios, gol guxhal tijb nejz nali.

⁵ Gra ree la'ch yadxa reen guiáad ree guia' con ree lom yayajc reen tibloj, në ree nejz volt yayaali yadxa tëë ree lunejz ni ad najt tibloj.

⁶ Gra ree bénguidxliuj guguaa bën guixhiaal Dios gagnë dunuj ree.”

⁷ Chi brii zien ree bejn din guroobnijs Waj laa reeman, rëbaman loj reeman:

—iXi'n xindxab lëjt! ¿Chu bagojn lëjt guial laadi loj castiro' ni zëëd? ⁸ Gol gubajjn zagdxë din guiguen guial waliqui ma bayüjndi xgab por xtolidi, ad guiëb tëë loj lasa'di: “Dunujn zio'p loj xdiaa Abraham”, din naj rni lëjt xt guiaj guie ree zajc yayüjn Dios xdiaa Abraham. ⁹ Abi' ree bën ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn tijb yag chi ad rtiatan, rütüügaman laan din che'can.

¹⁰ Dxel gunabdiidx reeman, rëb reeman:

—¿Xhie rayal yaguieenan?

¹¹ Badxi' Wajn rëbaman:

—Bën yu' tio'p xab, rayal gudëëman tijban loj bën achet rajp. Guiáad bën yu' ni raw, rayal gudëëman ta'nan loj bën ryaadxan.

¹² Në tio'p choon ree bën ruquijx impuest bidxin din tiobnijs reeman. Abi' gunabdiidx reeman loj Waj, rëb reeman:

—Mextr, laadx dunujn, ¿xhie rayal yaguieenan?

¹³ Badxi' Wajn, rëbaman:

—Ad guquijxidi mazri guial loj ni rayal guquijxidi.

14 Yu' tēē ree suldad gunabdiidx lojman rēb reex:

—Laadxza dunujn, ꝑxhie rayal yaguieenan?

Badxi'man laan rēbaman:

—Ad cwēēxuudi xhie xieen bejn, guial guchejbidi laa reeman o gudxiibidi guijc reeman ni ad beent reeman, gol guziibnejz tēē ni rajxidi.

15 Guiaad ree bejn gagbeenejzdoo reeman bal Wajn naj Cristo, 16 per rēbaman loj gra reeman:

—Naj curobnijs lējt con nijs. Per zēēd tijb bēn guroobnijs lējt con xSprijt Dios nē bajl. Laaman rajp mazri guialrniabee guial lon, ni'qui xgurēchaman ad zajct gaxhiecan. 17 Abi' zi'c raya trigo zian günnēman bejn. Din bēn zinal ree xnejz Dios yayal reeman lod rniabeeman, guiaad ree bēn ad zinalt xnejz Dios guixhiaalaman laa reeman loj bajl ni ad yu't dxej yayū'.

18 Zian guneenē Waj laa reeman, nē ree con diidx ren guneenēman laa reeman rulūūman laa reeman xtiidxza'c Dios. 19 Gudilē tēēman rey Herodes guial cwa'man Herodías xbēngunaa bijchaman Filip, nē por graczi ni mal ni ma beenman. 20 Per luar nidxga' Herodes xtiidx Waj aal beenman zatijb ni mal: badxe'man Waj ladxguuib.

Rirobnijs Jesús

(Mt. 3:13-17; Mr. 1:9-11)

21 Chi curoobnijs Waj bejn ree nēgajc Jesús guroobnijs. Abi' la'tgaj cabejdx canabaman Dios, bixal xanyabaa 22 zianz biguiajct xSprijt Dios zi'c tijb palom xt guijcaman. Dxel biguien cha' tijb bejn xanyabaa, rēbaman:

—Lūj naj da xi'n'an, rēnan lūj rabaanē' tēēn lūj.

Bēn goc ree xdiaagulal Jesús

(Mt. 1:1-17)

23 Cost gajlbichii ijz yu' Jesús chi guzuloj beenman xchiin Dios. Naladx ree bejn xi'n Xiēb najman, Xiēb guin gojc xi'n Elí. 24 Elí gojc xi'n Matat, Matat gojc xi'n Leví, Leví gojc xi'n Melqui, Melqui gojc xi'n Jana, Jana gojc xi'n Xiēb, 25 Xiēb gojc xi'n Matatías, Matatías gojc xi'n Amós, Amós gojc xi'n Nahum, Nahum gojc xi'n Esli, Esli gojc xi'n Nagai, 26 Nagai gojc xi'n Maat, Maat gojc xi'n Matatías, Matatías gojc xi'n Semei, Semei gojc xi'n Xiēb, Xiēb gojc xi'n Judá, 27 Judá gojc xi'n Joana, Joana gojc xi'n Resa, Resa gojc xi'n Zorobabel, Zorobabel gojc xi'n Salatiel, Salatiel gojc xi'n Neri, 28 Neri gojc xi'n Melqui, Melqui gojc xi'n Adi, Adi gojc xi'n Cosam, Cosam gojc xi'n Elmodam, Elmodam gojc xi'n Er, 29 Er gojc xi'n Josué, Josué gojc xi'n Eliezer, Eliezer gojc xi'n Jorim, Jorim gojc xi'n Matat, 30 Matat gojc xi'n Leví, Leví gojc xi'n Simeón, Simeón gojc xi'n Judá, Judá gojc xi'n Xiēb, Xiēb gojc xi'n Jonán, Jonán gojc xi'n Eliaquim, 31 Eliaquim gojc xi'n Melea, Melea gojc xi'n Mainán, Mainán gojc xi'n Matata, Matata gojc xi'n Natán, 32 Natán gojc xi'n Davi, Davi gojc xi'n Isaí, Isaí gojc xi'n Obed, Obed gojc xi'n Booz, Booz gojc xi'n Salmón, Salmón gojc xi'n Naasón, 33 Naasón gojc xi'n Aminadab, Aminadab gojc xi'n Aram, Aram gojc xi'n Esrom, Esrom gojc xi'n Fares, Fares gojc xi'n Judá, 34 Judá gojc xi'n Jacob, Jacob gojc xi'n Isaac, Isaac gojc xi'n Abraham, Abraham gojc xi'n Taré, Taré gojc xi'n Nacor, 35 Nacor gojc xi'n Serug, Serug gojc xi'n Ragau, Ragau gojc xi'n Peleg, Peleg gojc xi'n Heber, Heber gojc xi'n Sala, 36 Sala gojc xi'n Cainán, Cainán gojc xi'n Arfaxad, Arfaxad gojc xi'n Sem, Sem gojc xi'n Noé, Noé gojc xi'n Lamec, 37 Lamec gojc xi'n Matusalén, Matusalén gojc xi'n Enoc, Enoc gojc xi'n Jared, Jared gojc xi'n Mahalaleel, Mahalaleel gojc xi'n Cainán,

³⁸ Cainán gojc xi'n Enós, Enós gojc xi'n Set, Set gojc xi'n Adán, guiáad Adán gojc xi'n Dios.

4

Been xindxab Jesús prueb

(Mt. 4:1-11; Mr. 1:12-13)

¹ Yu' xSprijt Dios luxdoo Jesús guidiblagaa. Chi bazaman guiwro' Jordán dxel biné xSprijt Dios laaman lod naj yujbidx. ² Ni guzuman tiuu dxej tiuu guiaal, abi' been xindxab laaman prueb. Achetczi gudawaman dxej zii ree, zianz gulaanman. ³ Dxel rëb xindxab guin lojman:

—Bal wali najl Xi'n Dios, gunabee yayajc guiaj guie guiadxtil.

⁴ Badxi' Jesús laan rëbaman:

—Loj xtiidx Dios rëb: “Ad ganaxtizi guiadxtil guiban bejn, nëgajc gra diidx rniee Dios.”

⁵ Dxel biné xindxab guin laaman tijb guijc guia' ya da't, lod balüüx laaman gra ree nacion riga' loj guidxliuj. ⁶ Abi' rëb xindxab guin lojman:

—Gunen graczi gualrniabee në gualnaza'c ni yu' loj ree nacion guie. Din naj ca' laa reen, zajc gudëdan laa reen loj chutëez bën rënan. ⁷ Bal guzuxibil lon abi' guiën da'til naj, grazcan gac xieenl.

⁸ Badxi' Jesús laan, rëbaman:

—Loj xtiidx Dios rëb: “Tijbzi loj xDadil Dios guzuxibil guiën tëël laaman, abi' tijbzi laaman been sirv.”

⁹ Dxel biné xindxab guin laaman Jerusalén, abi' gulë'pix laaman guijc yadooro' zojb luguiedx guin. Zianz rëbix lojman:

—Bal wali najl Xi'n Dios, gudidya' diidz guie xt luyuj, ¹⁰ din loj xtiidx Dios rëb:

Dios guixhiaal ree xianjlaman din guinia reeman lüj.

¹¹ Yales reeman lüj con yaa reeman,

chitëë quillgujdx guiaj guia'l.

¹² Badxi' Jesús laan rëbaman:

—Rëb tëë loj xtiidx Dios: “Ad güünl prueb xDadil Dios.”

¹³ Chi ad badxejltri xhienaag güün xindxab guin Jesús prueb, dxel biquiedix tiblädëd.

Rzuloj Jesús rulüüman bejn ree niz Galilea

(Mt. 4:12-17; Mr. 1:14-15)

¹⁴ Badxin Jesús niz Galilea, yu' xSprijt Dios luxdooan guidiblagaa, abi' guidibczi niz yagaj bire'ch xtiidxaman. ¹⁵ Rulüüman bejn ree lën ree yadoo guidib niz yagaj, abi' graczi reeman ruza't laaman zagdxë.

Radxin Jesús Nazaret

(Mt. 13:53-58; Mr. 6:1-6)

¹⁶ Badxin Jesús Nazaret luguiedx lod guni'saman. Abi' dxej raziiladx ree bejn guyuman lën yadoo zi'c naj xcostumbraman. Dxel guzuliman persi biilaman xtiidx Dios. ¹⁷ Badëëd reeman gui'ch ni bacaa Isaías bën badëë xtiidx Dios loj ree bejn. Chi bachijlaman loj gui'ch guin, badxejlaman lod rëb:

¹⁸ XSprijt dux Dad ree Dios za'në naj,

din laaman ma beenle' naj din ganen xtiidxza'caman loj ree bënprob.

Guxhaalaman naj din gugojnan bejn ree xhienaag laa reeman loj ni rzajc reeman,

yaxhal tëën loj ree bénlutia'p.

Gün tëën yudar bën rusagzi reeman,

¹⁹ din gugojnjan guial ma bidxin dxej za'cdxoon ni güünle' Dios bejn ree.

²⁰ Dxel batüüb Jesús gui'ch guin bayüman laan loj Bén rüjn yudar lén yadoo guin, zianz gurejman. Graczi ree Bén riga' yagaj ruguiaadxiich laaman.

²¹ Dxel guzuloj caneenëman laa reeman, rëbaman:

—Yan dxej gajc ma gojc cumplid zi'c ca loj xtiidx Dios ni ma bigueiejndi.

²² Graczi reeman cuza't laaman zagdxë caydxa tëë loj reeman di-dixza'cdxoon ni caneeman. Dxel canabdiidx loj lasa' reeman rëb reeman:

—¿Nid laaman naj xi'n Xiëb ya?

²³ Dxel rëb Jesús loj reeman:

—Ma ragbeen guial nadi tijb diidx ni rëb: “Doctor, bayüjn lüj gajc”, na tëëdi: “Ni ma baguejnan beenl Capernaum nëgajc guie beenan najn ladxil.”

²⁴ Rëb tëë Jesús:

—Diidxliczi rnin, ni'czi tijb Bén rudëë xtiidx Dios loj ree bejn, ad rënt reeman laaman ladx gajcaman. ²⁵ Gol basaaladx dád zien ree béngunaa bizëjb zobj Israel lén ree dxej guban Elías Bén badëë xtiidx Dios loj ree bejn, chi ad golt guia choon ijz garol, abi' guyu gubijn guidibczi. ²⁶ Per ad guxhaalt Dios Elías guin loj tijb ree Bén bizëjb zobj Israel, guxhaalaman laaman loj tijb Bén bizëjb zobj guiedx la Sarepta, gajxh Sidón. ²⁷ Në lén ree dxej guban Eliseo Bén badëë xtiidx Dios loj ree bejn, dád zien ree bejn rajc gualguijdx la lepra, per ni'czi tijb reeman ad bayüjntaman, tijbzi Bén Siria bayüjnman laman Naamán.

²⁸ Chi bigueijn gra ree Bén yu' lén yadoo guin ni rëb Jesús, dád balen reeman. ²⁹ Bisu reeman babëë reeman Jesús luguiedx guin, dxel binë reeman laaman ro' tijb bala' ya guial naj guiedx guin guijc tijb guia', din gutedia' reeman laaman. ³⁰ Per gudëd Jesús galay reeman, ziataman.

Rabëë Jesús xindxab luxdoo tijb bejn

(Mr. 1:21-28)

³¹ Wej Jesús guiedx Capernaum ni riga' niz Galilea, yagaj rulüüman bejn ree dxej ni raziiladx reeman. ³² Abi' dád badxaloj reeman ni rulüüman guial rnieenëman laa reeman con gualrniabee.

³³ Lén yadoo guin yu' tijb xin yu' xindxab luxdoo, abi' guridxa' xindxab guin rëbix:

³⁴ —Basa'n dunujn, ¿xhie rënl con dunujn, Jesús Bén Nazaret? ¿Zëëdil ya zidganijtil dunujn? Nünbeen lüj, naya nalil najl xi'n Dios.

³⁵ Dxel gudilë Jesús xindxab guin, rëbaman lojx:

—¿Bacwëëz ro'l, bariü luxdoo xin guin!

Zianz badxe'bi xindxab guin xin guin luyuj guidib niz loj reeman, bariitix luxdoo achetctzi goquix. ³⁶ Graczi reeman badxaloj, rëb loj lasa' reeman:

—¿Xhie ree diidx guin rnieeman? ¿Con gualrniabee ni rajpaman, rniabee-man rarii ree xindxab luxdoo ree bejn!

³⁷ Abi' guidibczi niz yagaj bire'ch xtiidxaman.

Rayüjn Jesús xnasuegr Bëd

(Mt. 8:14-15; Mr. 1:29-31)

³⁸ Dxel bariü Jesús lén yadoo guin, abi' wejman lidx Simón. Ragxuu xnasuegr Simón guin yu'man xliaadoxh zeel guzajc reeman Jesús liaadx din yayüjnman laaman. ³⁹ Zianz basajb loj Jesús lod naga'man gunabeeman yarii xliaa guin, abi' bariin. Loj hor ziigajc bixchëman guzuloj cudëëman ni gaw reeman.

Rayüjn Jesús zien ree bénraxuu

(Mt. 8:16-17; Mr. 1:32-34)

⁴⁰ Chi ma wëez gubijdx, graczi ree bén rajp bénragxuu bén rajc ree gadxagayaa guialguijdx biné reeman laa reeman loj Jesús, persi badxiib yaaman guijc tijb gaj reeman, bayünman laa reeman. ⁴¹ Nè zien ree bénragxuu guin rarii xindxab luxdoo, rbidxa' reex rëb reex:

—iLüj naj Xi'n Dios!

Per gudilëman xindxab guin ree, ad cwëjbtaman niniee reex, guial ragbee reex laaman naj Cristo.

Ruliü Jesús xtiidx Dios niz Galilea

(Mr. 1:35-39)

⁴² Chi bareguiaal, barii Jesús luguiedx guin zëman lod achut bejn zobj. Per raguiil ree bénguedx guin laaman, bidxin reeman lod za'man abi' rëb reeman lojman din yaya'nnëman laa reeman. ⁴³ Per rëbaman loj reeman:

—Nè ree luguiedx ren rayal chinë'n xtiidxza'c Dios guial xhienaag naj xguialrniabeeman, din par zian guxhaalaman naj.

⁴⁴ Zian basnuu guneeman xtiidx Dios lën ree yadoo niz Galilea.

5

Rniaaz reeman zien bëjl

(Mt. 4:18-22; Mr. 1:16-20)

¹ Tijb dxej chi za' Jesús ro' nijs Genesaret, bidxin ree benzien. Xt rxa't reeman laaman guial rën reeman gucaagdiajg reeman xtiidx Dios. ² Dxel baguiaa Jesús tio'p barcw ro' nijs guin; ni basa'n ree bén rniaaz bëjl la'tgaj caguiib xguijxh reeman ni rniaaznë reeman bëjl. ³ Zianz wë'paman loj tijb barcw ni naj xbarcw Simón, abi' rëbaman lojman din gudxigaman laan niz galay nijs guin. Dxel gurejman, guzuloj culüüman bejn ree. ⁴ Chi gulox guneenëman laa reeman, dxel rëbaman loj Simón:

—Binë barcw guin lod mazri naxhit, gol bazaal xguijxhidi din guiniaazidi bëjl.

⁵ Badxi' Simón laan rëbaman:

—Mextr, gudëd guiaalczu baguieenan dxiin, achutczu bëjl wanaazan. Per bal lüj na, yazaalan guijxh guin ree.

⁶ Chi bazaal reeman guijxh guin ree loj nijs guin, bëjl zien da't gunaaz reeman xt guzuloj cayaxya' ree guijxh guin. ⁷ Abi' been reeman sen loj ree xcompniar reeman bén yu' ree loj stijb barcw guin, din chiguieen reeman laa reeman yudar. Dxel wej reeman, abi' bacha reeman bëjl guin ree loj grop barcw guin xt ma nizëëb reen xan nijs. ⁸ Chi baguiaa Simón Bëd ni goc, bazuxibaman loj Jesús rëbaman:

—Biquied lod za'n, Dad, din bëndol naj.

⁹ Guial Simón con ree bén za'nëman badxa loj reeman guial dád zien bëjl gunaaz reeman. ¹⁰ Ziangajc badxaloj ree Jacob con Waj, bén naj ree xi'n Zebedeo, naj tëë reeman xcompniar Simón. Per rëb Jesús loj Simón:

—Ad rdxebil, din diizd yan guto'pil bejn ree par Dios luar guiniaazil bëjl.

¹¹ Dxel babëë reeman barcw guin ree loj nijs guin, basa'n reeman laa reen, zinalt reeman Jesús.

Rayün Jesús tijb bén rajc guialguijdx la lepra

(Mt. 8:1-4; Mr. 1:40-45)

¹² Chi za' Jesús tijb luguiedx, bidxin tijb bén rajc guialguijdx la lepra, guidibczaman ma yu' guialguijdx guin. Chi baguiaaman Jesús laa bazuxib gajcaman, basajb lojman luyuj, rëbaman:

—Dad, bal rēnl, zajc yayüjnl naj.

¹³ Zianz basli yaa Jesús baqui'man laaman, rēbaman:

—Rēnan. Bayajc.

Loj hor ziigajc bayajc bēn guin. ¹⁴ Dxel rēb Jesús lojman:

—Achuczi loj guiēbil guial ma bayajquil. Lojzi bixhioz wej din guguaaman lūj. Binē gon ni rayal chinēl zī'c gunabee Moisejs din gagbee gra bejn guial ma bayajquil.

¹⁵ Per guixie guixie mazri bire'ch xtiidx Jesús por gra ree ni zagdxe rūjman. Abi' dād benzien rdo'p din gucaagdiajg reeman ni rnieeman yayūjn tēēman laa reeman guialguijdx ni rajc reeman. ¹⁶ Guiāad laaman rejman niz lod achut bejn zobj, persi rbejdx rniabaman Dios.

Rayūjn Jesús bēn nējt xcuerp

(Mt. 9:1-8; Mr. 2:1-12)

¹⁷ Tijb dxej culūū Jesús bejn ree, abi' zobj tio'p choon ree bēnfarisew nē ree mextr rajc ley, zēēd reeman guiedxdo ni riga' ree niz Galilea nē niz Judea, nē Jerusalén. Za'nē xguialrniabee Dios laaman persi rayūjnman bēnragxuu ree. ¹⁸ Dxel bidxin tio'p choon ree bejn, bidxinnē reeman tijb xin nējt xcuerp, naga'x loj da. Abi' guyēn reeman niunē reeman laax lēnū guin din niguijxh reeman laax lod za' Jesús. ¹⁹ Per ad badxejlt ban niz niunē reeman laax guial bēn guixiuj riga' yagaj. Dxel wē'p reeman guijc yu guin, abi' biquied reeman tex dxiib guijcan, zianz gulet reeman xinragxuu guin guidib naga'x loj da guin, gudijxh reeman laax galay ree bēn guin lod za' Jesús. ²⁰ Chi baguiaa Jesús guial rliladx reeman laaman; rēbaman loj xinragxuu guin:

—Xi'n, ma benan xtolil perdon.

²¹ Per ree mextr rajc ley con ree bēnfarisew guzuloj cayūjn reeman xgab: “¿Chu xin guin zeel rūjnx mazri xin zobjloj guial loj Dios? Achutczī rajc rūjn perdon dol, tijbzi Dios.”

²² Per gogbee gajc Jesús xgab cayūjn reeman, dxel rēbaman:

—¿Chexc zeel rūjndi xgab zian? ²³ ¿Conin ad nawēēgt gac, guial guiēn ya: “Ma naj xtolil perdon”, o guiēn: “Bixche guza tēē”? ²⁴ Per yan, gulūn lējt guial Bēn guxhaal Dios rajpaman guialrniabee loj guidxliuj guie din gūnman perdon dol ree.

Dxel rēb Jesús loj xinragxuu guin:

—¡Bixche, baca' ni go'til loj! Baguiaj lidxil.

²⁵ Loj hor guin gajc bixchex guidibloj gra ree bēn riga' yagaj balesix ni go'tix loj, zianz zia lidxix ruza'tix Dios zagdxe. ²⁶ Graczi reeman badxaloy ruza't tēē reeman Dios zagdxe abi' dād bidxeb reeman, rēb reeman:

—¡Ni'qui tijb ad waguiaat ree zi'ct naj ni cayugiaa ree yan!

Rbejdx Jesús Leví

(Mt. 9:9-13; Mr. 2:13-17)

²⁷ Chi gudēd gojc zian, baguiaa Jesús tijb bēn ruquijx impuest, laman Leví, zobjaman lod ruquijxaman. Abi' rēbaman lojman:

—Tanal naj.

²⁸ Dxel bisu Leví, guro'nladxaman gran zinaltaman Jesús.

²⁹ Abi' been Leví lanijro' lidxaman par Jesús, nē zien ree bēn ruquijx impuest zobj nētēē ree ben ren zobjnē reeman xan mex. ³⁰ Per ree bēnfarisew ree nē ree mextr rajc ley, bēn nuchajg gajc ree bēnfarisew guin, guzuloj caneeguijdx reeman xbejn ree Jesús, rēb reeman:

—¿Chexc zeel rē' rawnēdi bēn ruquijx ree impuest nē ree bēndol?

³¹ Badxi' Jesús laan rëbaman:

—Bénnadaan ree ad riaadxt reeman doctor, bénragxuu ree laa reeman riaadx Doctor. ³² Ad zialtan par ree benza'c, zialan par ree béndol din yayüjn reeman xgab por xtol reeman.

Rniabdiidx reeman loj Jesús xcwent gualrba'n

(Mt. 9:14-17; Mr. 2:18-22)

³³ Bénfarisew ree në ree mextr rajc ley, rëb reeman loj Jesús:

—Xbejn Waj, në ree xbejn ree bénfarisew dád zien volt rba'n reeman rbejdx rniab tëë reeman Dios, guiáad ree xbejnl ganax rë' raw reeman.

³⁴ Badxi' Jesús laan rëbaman:

—¿Wen zajc güüнди naguejn ya guiba'n ree biooz za' loj gualruxhliaa, la'tgaj za'në xin cuxhliaa guin laa reeman? ³⁵ Per guidxin dxej chiquiedix, dxel guiba'n reeman.

³⁶ Rëb tëëman loj reeman:

—Achut bén rutüüg ta'n lajd cüb din yata'man laan loj lajd yojx. Bal güünman zian, zaguixya' lajd cüb guin lajdyojx guin, nëtëë yan ad zuguaatan zagdxe loj lajdyojx guin. ³⁷ Ad rgu' tëët bejn vin cüb lën anfr yojx, din bal güünman zian, zaguixya' vin cüb guin anfr guin, abi' zi'c anfr guin zi'c vin guin zaxin reen. ³⁸ Zeel vin cüb rayal chu'n lën anfr cüb din ni'qui tijb reen ad zaxint. ³⁹ Abi' tijb bén ma gu' vin yu' gocli ad rë'taman vin cüb, din rëbaman: “Vin yu' gocli mazri ni zagdxen.”

6

Rgui'ch ree xbejn Jesús trigo dxej raziiladx ree bén Israel

(Mt. 12:1-8; Mr. 2:23-28)

¹ Tijb dxej raziiladx ree bén Israel, la'tgaj cadëd Jesús con ree xbejnman loj tijb guiniaa lod yu' trigo. Guzuloj cagui'ch reeman trigo guin, dxel cuxho'p reeman laan cayaw reeman. ² Abi' yu' ree bénfarisew rëb loj reeman:

—¿Chexc zeel rüjndi ni ad rayalt güüнди dxej raziiladx ree bejn?

³ Badxi' Jesús laan, rëbaman:

—¿Gadidi gool loj xtiidx Dios ya ni been Davi chi gulaanman con ree xcompniaraman? ⁴ Guyuman lën xyadoo Dios, cwa'man guiadxtil ma nagle' ree gudawaman con ree xcompniaraman, ni ad rayalt niajw reeman bixhiosi ree rayal gaw laa reen.

⁵ Rëb tëë Jesús loj reeman:

—Bén guxhaal Dios rajpaman gualrniabee dxej raziiladx ree bejn.

Rayaic tijb xin naxü'n tibladyaa

(Mt. 12:9-14; Mr. 3:1-6)

⁶ Zatiib dxej raziiladx reeman, guyu Jesús lën tijb yadoo abi' guzuloj culüüman bejn ree. Yagaj za' tijb xin naxü'n yaa ladbee. ⁷ Abi' ree mextr rajc ley në ree bénfarisew rzunal reeman din guidoon zayüjn Jesús laax dxej raziiladx reeman ya, din gac gutedia' reeman Jesús. ⁸ Per laaman ragbee gajcaman xhie xgab cayüjn reeman, zeel rëbaman loj xin naxü'n yaa guin:

—Bisu, guzuli galay guin.

Dxel guzulix, guzujx galay guin. ⁹ Dxel rëb Jesús loj reeman:

—Ganabdiidxan lëjt: ¿Xhie rayal güün bejn dxej raziiladx reeman, ni zagdxe ya o ni mal? ¿Guslaaman xguialnaban bejn ya o gugüjtaman laaman?

¹⁰ Dxel baguiaa Jesús gra ree bén riga' yagaj, abi' rëbaman loj xin guin:

—Basli yaal.

Dxel beenx zi'c rëbaman, abi' bayajc yaax. ¹¹ Per laa reeman dád bidxe'ch reeman, guzuloj rëb loj lasa' reeman xhienaag güünnë reeman Jesús.

Rbe Jesús chiptio'p ree apóstoles
(Mt. 10:1-4; Mr. 3:13-19)

¹² Lën ree dxej zii wej Jesús tijb ruguia' persi gurejdx gunabaman Dios, abi' gudëd guiaalczi gurejdx gunabaman Dios yagaj. ¹³ Chi bareguiaal, gurejdxaman bën nal ree laaman, dxel gulejman chiptio'p reeman loj reeman, abi' guneeman laa reeman apóstoles. ¹⁴ La reeman: Simón, bën gulëëljajman Bëd, Andrejs bijch Simón, Jacob, Waj, Felip, Tol, ¹⁵ Matew, Tumajs, Jacob xi'n Alfeo, Simón, bën bi'ch loj ree bën cananistas, ¹⁶ Judas xi'n Jacob, në Judas Iscariote bën bayü Jesús.

Rulüü Jesús zien ree bejn
(Mt. 4:23-25)

¹⁷ Baguiajt Jesús ruguia' guin con guidxiptio'p ree xbejnman, badxin reeman lod naj tijb la'ch. Yagaj bado'p zien ree xbejnman në ree ben ren, bën zëed ree niz Judea në Jerusalén në ree bën zëed Tiro con Sidón, guiedx riga' ree gajxh ro' nijsdoo. Bidxin reeman din gucaagdiajg reeman xtiidx Jesús din yayüjn tëëman laa reeman guialguijdx ni rajc reeman. ¹⁸ Në ree bën yu' xindxab luxdoo bayajc. ¹⁹ Zeel graczi ree bejn rën guqui' laaman, guial rayüjnman laa reeman con xguialrniabeeman.

Xiquilbaa ree bejn
(Mt. 5:1-12)

²⁰ Dxel baguiaa Jesús loj ree xbejnman, abi' rëbaman:

—Xiquilbaadi bënprob, din lëjt rayal loj xguialrniabee Dios.

²¹ 'Xiquilbaadi bën rliaan ree yan, din Dios guneë ni gawidi xt chigdxin-ladxidi.

'Xiquilbaadi bën roon ree yan, din zadxin dxej guxijdxidi.

²² 'Xiquilbaadi chi rdxe'ch bejn lëjt, chi rabëëca reeman lëjt, rnieeguijdx tëë reeman lëjt, naladx reeman najdi bendxuudx guial rliadxidi Bën guxhaal Dios. ²³ Gol habaa gol badxe' tëë luxdoodi zagdx chi güünnë reeman lëjt zian, din zro' ni tia'di yu' xanyabaa, din ziangajc beennë xbëngulal reeman bën badëë ree xtiidx Dios loj ree bejn.

²⁴ 'Per probza lëjt benrijcw, din ma guyuxgaj luxdoodi nix.

²⁵ 'Probza lëjt bën raw xt rigdxinladx yan, din zadxin dxej guiliaandi.

'Probza lëjt bën ruxijdx yan, din zadxin dxej goondi guial chu'nayadi.

²⁶ 'Probza lëjt, bën ruladx ree guilies bejn xvalor, din zian beennë ree xbëngulal reeman bën goc ree bën rusquiee, rëb reeman rudëë reeman xtiidx Dios loj ree bejn.

Guyën bën rdxe'ch lüj
(Mt. 5:38-48; 7:12)

²⁷ 'Per ganin lëjt bën rucaagdiajg ree da diidxan: Gol guyën bën ralen lëjt, gol gojc benza'c con ree bën yu'xyajn lëjt, ²⁸ gol bazaal diidxa'c guijc ree bën ruzaal diidxmal guijquidi, gol gurejdx gunab Dios por ree bën rnieeguijdx lëjt. ²⁹ Bal chu chëëz tiblad xhajguil, badëëd zatibloran, bal chu cwëëxuu xchamarri, ad cwexuul chinëman në xmanguil. ³⁰ Chutëëz bën rniab xhienin lojl, badëëdan. Bal chu rquied xhie xieen, ad bal yanabilan. ³¹ Gol beennë ree bejn zi'c rëndi güünnë reeman lëjt.

³² 'Bal rëndi ganaxzi bën rën lëjt, çxhieza ni zagdxen cayüjndi? Din xt bëndol ree rüjn zian, rën reeman bën rën laa reeman. ³³ Abi' bal rüjndi wen ganaxzi bën rüjn lëjt wen, çxhieza ni zagdxen cayüjndi? Din xt bëndol ree rüjn zian. ³⁴ Ziangajc bal rudëedidi ni rgui'n ganaxzi bën naladxidi zajc yaguijx lojdi, çxhieza ni zagdxen cayüjndi? Din xt në ree bëndol rudëed rgui'n ree bën naladx reeman zajc yaguijx loj reeman. ³⁵ Per lëjt gol guyën bën ralen lëjt, gol been reeman wen. Gol badëed qui'n reeman, ad cwëzidi xhie tia'di guijcan. Zian tia'di zro' guialnaza'c ni gunee Dios bën yu' xanyabaa, gac tëedi xi'nman, din laaman naj benza'c con ree bën ad rudëet quixtëe lojman në con ree benmal. ³⁶ Gol baya bejn zi'c raya dux Dad ree Dios bejn.

Xcwent guialrula'ch

(Mt. 7:1-5)

³⁷ 'Ad gula'chidi, ad gudxiib tëedi ni mal guijc ree bejn chitëe saquidi zian, gol been perdon din gaquidi perdon. ³⁸ Gol badëed ni riaadx ree bejn, Dios mazri zro' naj ni gunee man zi'c tijb bols guidxadi. Din zi'c rudëedidi loj ree bejn, ziant gajc naj ni gunee Dios lojdi.

³⁹ Rëb Jesús loj reeman zatijb diidx:

—çWen zajc chinë bénlutia'p zatijb bénlutia'p ya? çNid zayajb grop reeman ro' bala' ya? ⁴⁰ Tijb bën cusiid, ad mazt rajcaman guial loj xmextraman. Guiáad chi ma gulox basiidaman rajcaman zi'ctgajc rajc xmextraman.

⁴¹ 'Ad gula'chil ben ren por faltdobëz ni rajpaman, zagdxeli guyu xgab por falt narooob ni rajpil. ⁴² Abi' bal mazri falt narooob rajpil, çxoza guiëbil loj zatijb bejn: "Ad laat naj ni rüjnl"? ;Bën rusquiee! yalojxgaj been zi'c rayal, chi ma beenl zian dxel ma zile' guiëbil loj zatijb bejn: "Ad laat naj ni rüjnl".

Por ni rtia loj yag rayünbee bejn xhie yagan

(Mt. 7:17-20; 12:33-35)

⁴³ 'Ad yu't yag zagdxë rtia ni guijdx loj, ad yu' tëët yag guijdx rtia ni zagdxë loj. ⁴⁴ Din tijbgaj yag rayünbee bejn xhie yagan por ni rtia lojn. Ad raru't higo loj yaquie'jch, ad raru' tëët uv loj gui'xh. ⁴⁵ Benza'c rnieeman diidxza'c din laan yu' luxdoooman, guiáad benmal rnieeman diidxmal din laan yu' luxdoooman. Din ni yu' luxdoo bejn laan rnieeman.

Tio'ploj cimiant

(Mt. 7:24-27)

⁴⁶ ;Chexc zeel rnieedi naj, "Dad, Dad", abi' adza rüjntidi ni rnin? ⁴⁷ Ganin lojdi chu naj zi'c bën ri't lon, riguijnjman ni rën, abi' rüjnjman laan: ⁴⁸ laaman naj zi'c tijb bën been yu, yaloj xgaj gudëenman naxhit xt chi bila loj guiaj, dxel gulesaman xcimiantan guijc guiaj guin. Abi' chi bi't nijsro' majsi gulajn lad yu guin, per ni'quid baniibtan laan guial naj cimiant guin guijc guiaj. ⁴⁹ Per bën riguijnj da diidxan abi' ad rüjntaman laan, najman zi'c tijb bën been yu ni ad yu't xcimiant. Abi' chi bi't nijsro' gulajn lad yu guin, balenxanan laan, tiblayaazi base'nan laan.

7

Rayaç xmojs tijb suldad rom xin rniabee ree suldad

(Mt. 8:5-13)

¹ Chi gulox guneenë Jesús bejn ree, dxel zëman Capernaum. ² Yagaj zojb tijb suldad Rom xin rniabee ree suldad. Yu' tijb xmojsix xin rën da'tix, ragxuu mojs guin ma rulüücüzi guiëtix. ³ Chi biguijnj suldad rniabee guin ruza't ree bejn Jesús, guxhaalix tio'p choon ree bën rniabee Israel lojman din chisajc

reeman liaadx yayünman xmojsix. ⁴ Abi' bidxin reeman loj Jesús guzajc reeman liaadx, rëb reeman:

—Gagnësiil suldad rniabee guin, ⁵ din rën x bën duladx ree, në yan por laax gojc dux yadoo ree.

⁶ Dxel binë Jesús laa reeman. Per chi ma cadxin reeman gajxh lidix, guxhaal tio'p choon ree xmiwix loj Jesús biguiedx reex lojman:

—Dad, ad chu'l xgab, din ad rayaltan chu'l lënü lidxan, ⁷ zeel ad bayaxtan nial quijb naj nidgadilan lüj. Per con gunee diidz lod za'l din yayajc da mojsan. ⁸ Din zi'c naj yu' ree bën rniabee naj, ziangajc naj yu' ree da suldadan xin rniabeen. Chi rën loj tijb reex: “Wej”, rejx. Chi rën loj zatijbix: “Guda”, ri'tix. Abi' chi rën loj da mojsan: Been ni guin, rüjgajquixan.

⁹ Chi biguejn Jesús zian, dád badxa lojman ni rëb suldad guin, abi' badxi' lojman loj gra ree bën zinal laaman, rëbaman:

—Diidxliczi rnin, ni'qui Israel ad wadxaaglojtan tijb bën rliladx da't Dios zi'c rliladx xin guin Dios.

¹⁰ Chi badxin ree xin guxhaal suldad rniabee guin lidix, baguiaa reex ma bayajc mojs guin.

Rasban Jesús xi'n tijb béngunaa bizëjb

¹¹ Chi gudëd gojc zian, wej Jesús tijb luguiedx la Naïn binë ree xbejnman, në zien ree ben ren. ¹² Chi bidxinman gajxh ro' guiedx guin, baguiaaman ziquie'ch reeman tijb xingüt, tijbzi laax naj xi'n xniaax, najman bën bizëjb. Zien da't ree bénluguiedx guin zinal laaman. ¹³ Chi baguiaa Dad Jesús laaman, bayaman laaman, dxel rëbaman lojman:

—Ad roonl.

¹⁴ Abi' bibig Jesús baqui'man xcaj xingüt guin, dxel guzudxe ree bën zinë laax. Zianz rëbaman lojx:

—Xi'n, naj rni lojl: jBixche!

¹⁵ Dxel gureli xin guin, guzuloj caneex, zianz bayü Jesús laax loj xniaax.

¹⁶ Chi baguiaa reeman zian, graczi reeman bidxeb guzuloj cuza't reeman Dios zagdxe, rëb reeman:

—Du loj ree ma gules Dios tijb bën zobjloj, bën rudëë xtiidx Dios loj ree bejn.

Rëb tëë reeman:

—Ma bi't Dios din gagnë ree xbejnman.

¹⁷ Abi' guidib niz Judea në ree guiedx riga' niz yagaj gogbee ree bejn ni been Jesús.

Bigneenë ree xbejn Waj Jesús

(Mt. 11:2-19)

¹⁸ Gogbee Waj gra ree ni cayün Jesús, guial bagojn ree xbejnman laaman. Abi' guneeman tio'p reeman, ¹⁹ dxel guxhaalaman laa reeman loj Jesús din chignabdiidx reeman bal laacaman naj Cristo bën naj diidx gui't, bën cabëz reeman, o cwëz reeman ben ren ya. ²⁰ Abi' bibig reeman, guneenë reeman laaman, rëb reeman lojman:

—Waj bën ruroobnijs bejn ree guxhaal dunujn lojl zudganabdiidxan bal lüjcan naj Cristo bën naj diidx gui't, bën caylëzjan o yalëzjan ben ren ya.

²¹ Hor ziigajc bayün Jesús zien da't ree bénraxuu, në ree bën rdoob, nëtëë ree bën yu' xindxab luxdoo, baxhal tëëman loj ree bénlutia'p. ²² Dxel badxi' Jesús xtiidx ree bën guxhaal Waj, rëbaman:

—Gol chej, gol chiguiedx loj Waj ni cuguiaadi në ni caguiejndi. Gol güjdx lojman guial ma ruguiaa ree bénlutia'p, ma rajc rza ree bencoj, ma rayajc

tëe ree bën goc guialguijdx la lepra, ma rigueijn ree bën nacwa't, guiáad ree bengüt ma baban reeman, abi' ree bënprob ma cagueijn reeman xtiidxza'c Dios. ²³ ¡Xiquilbaa ree bën ad zucwëëzt chililadx naj!

²⁴ Chi baza ree bën guxhaal Waj, guzuloj Jesús caneeman xcwent Waj loj ree bejn, rëbaman:

—¿Chu naladxidi naj bën biquiaadi loj yujbidx? ¿Naladxidi ya najman zi'c tijb biqui runiib bi? ²⁵ ¿O chu biquiaadi? ¿Tijb bën najcw lajd zagdxex ya? Lëjt ragbee guial bën rajcw ree lajd zagdxex, në ree bën naban zagdxex, lën palas zobj reeman. ²⁶ ¿Chu biquiaadi? ¿Tijb bën rudëë xtiidx Dios loj ree bejn ya? Per diidxliczi rnin lojdi, biquiaadi tijb bën mazri zobjloj guial loj tijb bën rudëë xtiidx Dios loj ree bejn. ²⁷ Waj naj bën ruza't xtiidx Dios, lod rëb: Naj rxhial tijb bën ned lojl,

bën güünchaaw xnejzil.

²⁸ Rnin lëjt, loj graczi ree bënguidxliuj ad wayut bën rudëë xtiidx Dios loj ree bejn, bën mazri zobjloj guial loj Waj. Per majsi zian, bën ad zobjlojt loj xguialrniabee Dios, laaman mazri zobjloj guial loj Waj.

²⁹ Gra ree bejn, në ree bën ruquijx impuest bën baroobnijs Waj, chi bigueijn reeman ni rëb Jesús bignia' reeman guial rüjn Dios zi'c rayal. ³⁰ Per ree bënfarisew con ree mextr rajc ley ad cwëjbt reeman nuroobnijs Waj laa reeman, zian ad guyënt reeman ni rën Dios par laa reeman.

³¹ Rëb tëe Jesús:

—¿Xhienaag ganin lëjt naj ree bën riga' loj guidxliuj guie yan? ¿Chu naj zi'c laa reeman? ³² Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: “Bacwejdixan par nuya'di, per ad baya'tidi, badoolan ni naya ree, per ad biintidi.” ³³ Din bi't Waj bën baroobnijs bejn ree, ad rawtaman ad rë' tëtëaman vin, abi' rëbidi xindxab yu' luxdooman.

³⁴ Yan bi't Bén guxhaal Dios, rawaman rë' tëëman vin, abi' rëbidi guial dád nalaman ruladxaman guié'man, ruchajg tëëman bëndol ree con ree bën ruquijx impuest. ³⁵ Per xguialrignia' Dios, rguienan por ree xbejnman.

Rej Jesús lidx tijb bënfarisew la Simón

³⁶ Tijb bënfarisew rëb loj Jesús din chitaw Jesús guin lidxaman. Abi' bidxinman lidxaman gurejman xan mex. ³⁷ Dxel tijb bëngunaa dxuudx zobj gajc luguiedx guin. Chi gogbeeman cayaw Jesús lidx bënfarisew guin, bidxinnëman tijb lumejt yu' perfum. ³⁸ Dxel roonman gurejman lod nuzuj gua' Jesús, guzuloj caxhie' nijs carii lojman gua' Jesús. Abi' cucwiidxnë guidxguijcaman laan, cayawaman xid gua'man curoob tëëman laan perfum guin. ³⁹ Chi baguiaa bënfarisew guin zian, beenman xgab: “Balgui zian wali bën guin najman bën rudëë xtiidx Dios loj ree bejn, zagbeeman chunin cuqui' laaman xhie tëë naag naban bëngunaa guin, najman bendxuudx.”

⁴⁰ Dxel rëb Jesús loj bënfarisew guin:

—Simón, yu' tijb ni ganin lüj.

Badxi' bënfarisew guinan rëbaman:

—Gunan, mextr.

⁴¹ Abi' rëb Jesús lojman:

—Tijb bën rudëëd milia rgui'n ree bejn, ral tio'p ree bejn lojman. Tijbaman nuzëëb gaaygayuu denario, zatijbaman nuzëëb tü'pchiin. ⁴² Grop reeman ad beent gan naguijx lojman, per bën badëëd milia guin rëbaman loj reeman guial ad zaguijxt reeman ni nuzëëb reeman. Yan guna, ¿chu loj grop reeman mazt guiën laaman?

⁴³ Badxi' Simón laan, rëbaman:
—Par naj, bën bazëeb mazri zro' guin.

Dxel rëb Jesús:
—Waliquil.

⁴⁴ Zianz baguiaa Jesús loj béngunaa guin, abi' rëbaman loj Simón:

—¿Ruguaal béngunaa guie ya? Chi guyu'n lidxil ad baneetil nijs niëd guia'n. Guiáad laaman gudiibaman guia'n con nijs brier lojman, abi' bacwiidxaman laan con guidxguijcaman. ⁴⁵ Ad gudawtil naj xid, guiáad laaman diidz chi guyu'n ad rbëzt rawaman xid guia'n. ⁴⁶ Achet sejt badxe'l guican, per laaman ma badxe'man perfum guia'n. ⁴⁷ Zeel rnin lüj, gra ree xtolaman ma gojc perdon guial rën da'taman naj. Per bën yu' ta'nz xtol abi' rajcaman perdon, ta'nz rënman naj.

⁴⁸ Dxel rëb Jesús loj béngunaa guin:

—Ma naj gra xtolil perdon.

⁴⁹ Guiáad ree bën zojbnëman yagaj guzuloj canabdiidx loj lasa' reeman, rëb reeman:

—¿Chu bën guin zeel xt në ree dol rüjnman perdon?

⁵⁰ Per rëb Jesús loj béngunaa guin:

—Ma najl perdon guial rliladxil naj, baguiaj zagdx ad ruril xgab.

8

Béngunaa been ree Jesús yudar

¹ Chi gudëd gojc zian, wej Jesús gra ree guiedx narooob në ree guiedx dobëz bicojnman biglúü tëëman xhiënaag naj xguialrniabee Dios. Në guidxiptio'p ree apóstoles binëman, ² nëtëë tio'p choon ree béngunaa, bën babëëman xindxab luxdoo, në ree bën bayünman gualguijdx ni rajc reeman. Loj reeman no'ch María Magdalena, bën babëë Jesús gajdx xindxab luxdoo. ³ Në Xuan, lacheel Cuza, Cuza guin goc bën nulen xchiin Herodes. Në Susan nëtëë zien ree béngunaa ren, been reeman yudar Jesús con ni rajp reeman.

Xcwent bën rtie'ch bin

(Mt. 13:1-9; Mr. 4:1-9)

⁴ Zien ree bejn brier loj ree guiedx ziquiaa reeman Jesús. Chi bido'p ree benzien, beman tijb cwent loj reeman rëbaman:

⁵ —Tijb bejn zëman zigtie'chaman bin. Chi catie'chaman laan, ta'n nan biajb lunejz abi' balëë ree bejn guijcan gudaw tëë ree biguijn laan. ⁶ Zata'n nan biajb loj ree guiaj, chi gulejn reen gubidx reen guial ad yu' xcojpt loj ree guiaj guin. ⁷ Zata'n nan biajb loj ree yaquiëjch. Abi' chi guni's reen tijbzi, banidloj yaquiëjch guin laa reen. ⁸ Zata'n nan biajb loj yujza'c abi' dád gojcan, cwa xt tibgayuu bin loj tijbgajn.

Chi gulox gunee Jesús zian, dxel guneeaman rejs rëbaman:

—Bën rën gucaagdiajg, gol bacaagdiajg.

Chexc zeel rulüü Jesús con cwent ree

(Mt. 13:10-17; Mr. 4:10-12)

⁹ Dxel gunabdiidx ree xbejn Jesús lojman, rëb reeman:

—¿Xhie rën guiëb cwent guin?

¹⁰ Badxi' Jesús laan rëbaman:

—Lëjt, Dios ma basa'n lëjt din chignia'di xhiënaag naj xguialrniabeeman. Per loj gra reeman rünan zi'c cwent din majsi rani loj reeman, per ad zuguiaaf reeman, majsi riguiëjn reeman, per ad zignia't reeman.

*Rusignia' Jesús xcwent bén rtie'ch bin**(Mt. 13:18-23; Mr. 4:13-20)*

¹¹ Ni ne rën guiëb xcwent bén rtie'ch bin: Bin guin naj zi'c xtiidx Dios, ¹² guiáad bin biajb runejz naj zi'c ree bén rigueijn xtiidx Dios; per rdxin gajc xindxab rquiedix laan luxdoo reeman chitée chililadx reeman laan abi' gac reeman perdon. ¹³ Guiáad bin biajb loj ree guiaj, naj zi'c ree bén rigueijn xtiidx Dios, abi' dád nix ru luxdoo reeman rigueijn reeman laan, per guial naj reeman zi'c cwaan ni ad yu't liuj, rliladx reeman laan tibladedé abi' chi rzagdiaj reeman laa rusa'n gajc reeman ni rliladx reeman. ¹⁴ Guiáadza bin biajb loj ree yaquiëjch, naj zi'c ree bén rigueijn xtiidx Dios; per ru reeman xgab por gra ree guialnaza'c riga' loj guidxliuj guie rüjn tëë reeman ni rëntzi reeman, abi' zianz rucwëëz rucaagdiajg reeman xtiidx Dios ad rüjn tëët reeman ni rënman. ¹⁵ Guiáad bin biajb loj yujza'c, laan naj zi'c ree bén rucaagdiajg xtiidx Dios, rucaagdiajg reeman laan con guidib luxdoo reeman za'dxi'ch tëë reeman loj xnejzaman, zianczi rüjn reeman ni rënman.

*Achet ni naguie'ch yu'**(Mr. 4:21-25)*

¹⁶ Achut bén ruze'c tijb guij dxel ruta'cwaman laan, ad rudxe' tëëtaman laan xan lon, ruzujman laan ya din gusnin loj ree bén chu' lënü. ¹⁷ Achet ni naguie'ch yu' ni ad zagüent ad yu' tëët ni ralan ni ad zagbeet bejn, zadxin dxej gagbee bejn laan.

¹⁸ Zeel gol bacaagdiajg zagdxé, bén ma rignia' gusnuu chignia'man mazri, per bén ad rignia't, xt ta'n ni naladxaman rignia'man ad zignia'traman.

*Xniaa Jesús con ree bijchaman**(Mt. 12:46-50; Mr. 3:31-35)*

¹⁹ Xniaa Jesús con ree bijchaman bidxin reeman lod za'man, per ad gojct nibig reeman lojman guial dád zien bejn riga'. ²⁰ Abi' yu' bén bagojn Jesús rëbaman:

—Laa xniaal con ree bijchil za' lule' guin rën reeman guinieenë reeman lüj.

²¹ Badxi' Jesús laan rëbaman:

—Bén rucaagdiajg ree xtiidx Dios rüjn tëë reeman zi'c rënman, laa reeman naj da nan laa tëë reeman naj da bichan.

*Racwëëz Jesús bidoxh**(Mt. 8:23-27; Mr. 4:35-41)*

²² Tijb dxej guyu Jesús loj barcw con ree xbejnman, abi' rëbaman loj reeman:

—Yo' ree zatiblad ro' nijs guin.

Zianz zë reeman. ²³ La'tgaj cadéd reeman loj nijs guin, goodyëjs Jesús. Dxel guzuloj cabi' bidoxh loj nijs guin, abi' cadxa nijs loj barcw guin, ma cazëëbczi barcw guin xan nijs. ²⁴ Dxel bacwëën reeman Jesús, rëb reeman:

—¡Mextr! ¡Mextr! ¡Ma cayzëëb ree xan nijs!

Abi' bixche Jesús gunabeeman bacwëëz bidoxh guin në xtüjp nijs guin, zianz gulëjz reen dxel bayajcdxe. ²⁵ Abi' rëbaman loj reeman:

—¿Conza xguialrliladxidi?

Per laa reeman dád bidxeb reeman badxa tëë loj reeman, abi' canabdiidx loj lasa' reeman rëb reeman:

—¿Chu bén guin zeel rniabeeman bi në nijs, abi' ruzoob reen xtiidxaman?

*Rayüjn Jesús tijb xin yu' xindxab luxdoo**(Mt. 8:28-34; Mr. 5:1-20)*

²⁶ Dxel badxin Jesús con ree xbejnman xdajn ree bén Gadara, ni riga' zatiblad ro' nijs Galilea. ²⁷ Chi barii Jesús loj barcw guin, bibig tijb xin luguiedx guin lojman. Ma gojc xchej da't yu' xindxab luxdoox. Ad rajcwt xabix, ad nabantix lénü, ganaxzi ro' ree baa nabanx. ²⁸ Chi baguiaax Jesús bazuxibix lojman, guneex rejs rëbix:

—¿Xhie rënl con naj, Jesús, Xi'n Dios yu' xanyabaa? Rniaaban lojl ad gusagzil naj.

²⁹ Rëbix zian guial ma canabee Jesús din yarii xindxab guin luxdoox. Ma gojc xchej naaz xindxab guin laax. Abi' ma guxhii ree bejn yaax në guia'x con caden chitéë ban chex, per rutüguia'gajquix caden guin abi' rulaagdxa xindxab guin laax niz lod achut bejn zobj.

³⁰ Gunabdiidx Jesús lojx rëbaman:

—¿Chu la?

Badxi'xan rëbix:

—Legión lan.

Rëbix zian guial zien da't ree xindxab yu' luxdoox. ³¹ Rëb ree xindxab guin loj Jesús chitéë guixhiaalaman laa reex gabijl. ³² Dajn guin riga' zien ree cüch cayaw reeb. Zeel rëb ree xindxab guin lojman din gudëëman mod chu' reex lën ree cüch guin, dxel cwëjbaman. ³³ Zianz barii reex luxdoox bayu reex lën ree cüch guin, abi' guzuloj cuxüün reeb zianz bitidia' reeb ro' bala' xt loj nijs, lod gu' reeb nijs abi' güjt reeb.

³⁴ Chi baguiaa ree bén cayajp ree cüch guin ni goc, baxüün reeman bicojn reeman bejn ree luguiedx në ree dajn. ³⁵ Dxel wej reeman biquiaa reeman ni goc. Chi bidxin reeman lod za' Jesús, baguiaa reeman xin barii xindxab guin ree luxdoo, zobjix guia'man ma najcw xabix, ma badëdguienx abi' bidxeb reeman. ³⁶ Guiáad ree bén baguiaa ni goc, be reeman diidx loj reeman xhienaag bayajquix. ³⁷ Graczi ree bén zobj Gadara gunab loj Jesús din yazaman yagaj guial dád rdxeb reeman. Dxel bayé'paman loj tijb barcw, ziataman. ³⁸ Guiáad xin barii xindxab guin ree luxdoo rëbix lojman din chinalix laaman, per ad cwëjbtaman, rëbaman lojx:

³⁹ —Baguiaj lidxil, biguiedx graczi ni been Dios por lüj.

Dxel ziax luguiedx guin abi' bex diidx loj gra ree bejn ni been Jesús por laax.

*Rayajc xi'n Jairo në béngunaa bagaal xab Jesús**(Mt. 9:18-26; Mr. 5:21-43)*

⁴⁰ Chi badxin Jesús zatiblad ro' nijs guin, dád rabaa gra ree bén za' yagaj guial badxinman din mal cabëz reeman laaman. ⁴¹ Dxel bidxin bén la Jairo, laaman rniabee lën tijb xyadoo ree bén Israel. Bazuxibaman loj Jesús, rëbaman lojman din cheman lidxaman, ⁴² guial yu' tijb xi'nman biin chiptio'p ijz, ma guiëtczim. Chi zë Jesús dád zien ree bejn zinal laaman xt rixa't reeman laaman.

⁴³ Abi' tijb béngunaa no'ch loj reeman, ma gojc chiptio'p ijz ragxuuman ryajbaman rejn. Ma banijtaman graczi ni rajpaman guial wejman loj ree doctor, per ni'qui tijbaman ad gojct nayüjn laaman. ⁴⁴ Bibigaman niz xijch Jesús abi' bagaalaman guia' xabaman. Loj hor ziigajc bayajcaman.

⁴⁵ Dxel gunabdiidx Jesús rëbaman:

—¿Chu baqui' naj?

Abi' graczi reeman rëb guial ad laat reeman baqui' laaman. Zianz rëb Bëd loj Jesús:

—Mextr, graczi ree bejn xt rixa't reeman lüj cucadxaa tëë reeman lüj, abi' rniabdiidxil chu baqui' lüj.

⁴⁶ Per rëb Jesús zatijb:

—Yu' chu baqui' naj din gogbeen yu' tijb bën ma bayajc con da guialrniabeen.

⁴⁷ Chi gogbee béngunaa guin guial ma gogbee gajc Jesús ni beenman, guidib rniyman bigzuxibaman loj Jesús. Dxel rëbaman lojman guidibloj ree bën guin chexc zeel baqui'man xabaman abi' loj hor guin gajc bayajcaman. ⁴⁸ Dxel rëb Jesús lojman:

—Xi'n, ma bayajquil guial bililadxil naj, baguiaj zagdxe.

⁴⁹ Sta caneenë Jesús béngunaa guin, chi bidxin tijb bën guza lidx Jairo, bën rniabee lën xyadoo ree bën Israel, rëbaman loj Jairo:

—Mal güjt xi'nl, ad ruslenril Mextr guin.

⁵⁰ Per chi biguiejn Jesús zian, rëbaman loj Jairo:

—Ad rdxebil, bililadxzi, zayajcqui xi'nl.

⁵¹ Chi bidxin reeman lidxaman, ad cwëjbt Jesús niu ree ben ren, Bëdzi con Waj, con Jacob, con ree xdad xniala bindo guin. ⁵² Graczi ree bën riga' yagaj cayoon, yu'naya tëë reeman por laam. Per rëb Jesús loj reeman:

—Ad roondi, ad güjttim, naga'yëszim.

⁵³ Graczi reeman baze' laaman guial ma ragbee reeman güjtim. ⁵⁴ Dxel gunaaz Jesús yaam, guneeman rejs, rëbaman:

—Bindoo, bixche.

⁵⁵ Loj hor ziigajc babann, bixchem. Dxel gunabee Jesús badëëd reeman ni gudawim. ⁵⁶ Dád badxa loj ree xdadim, per rëb Jesús loj reeman achu loj guieëb reeman ni goc.

9

Rxhiaal Jesús guidxiptio'p ree xbejnman chigliüü reeman xtiidx Dios (Mt. 10:5-15; Mr. 6:7-13)

¹ Gurejdx Jesús guidxiptio'p ree xbejnman, abi' badëëman guialrniabee loj reeman din yabëë reeman graloj xindxab luxdoo ree bejn yayüjn tëë reeman bënragxuu ree. ² Guxhaalaman laa reeman chigliüü reeman xhienaag naj xguialrniabee Dios, yayüjn tëë reeman bënragxuu ree. ³ Rëbaman:

—Ad chinëdi xhienin par runejz: ni'qui yagriadxidi, ni'qui guijxh, ni'qui guialraw, ni'qui milia, ni'qui stibnejz xabidi. ⁴ Chutëëz lidx guidxindi, tib gol baya'nzi xt chi yazadi luguiedx guin. ⁵ Bal yu' guiedx lod ad rënt reeman lëjt, gol baza yagaj, gol gudxijp guxyuj guia'di zi'c tijb sen guial ad rënt reeman guzoob reeman xtiidx Dios.

⁶ Dxel brii reeman zë reeman tijbgaj guiedx zigtie'ch reeman xtiidxza'c Dios, rayüjn tëë reeman bënragxuu ree.

Riguiejn Herodes ni cayüjn Jesús (Mt. 14:1-12; Mr. 6:14-29)

⁷ Chi gogbee rey Herodes graczi ni cayüjn Jesús. Guyunawëëgaman guial yu' ree bejn rëb, Waj bën baroobnijs bejn ree ma baban, ⁸ yu' tëë reeman rëb Eliasan bën badëë xtiidx Dios loj ree bejn ma balüüloj, yu'za reeman rëb, tijb ree bën badëë xtiidx Dios loj ree bejn gocli ma baban. ⁹ Per rëb Herodes:

—Naj gajc gunabee biru' yëjn Waj. ¿Chuza bënan riguejnan ruza't ree bejn xcwent ni cayüjnman?

Zianan zeel rüjn Herodes naguiejn guguaaman Jesús.

Ruyaan Jesús gaay mil bejn
(Mt. 14:13-21; Mr. 6:30-44; Jn. 6 :1-14)

¹⁰ Chi badxin ree xi apóstoles Jesús, be reeman graczi ni biguieen reeman. Dxel binëman laa reeman lod achutczi bejn zojb, gajxh guiedx Betsaida.

¹¹ Per chi gogbee ree bejn, dxel zinal reeman laaman lod zëman. Abi' balüüman laa reeman xcwent xguialrniabee Dios bayüjn tëëman bënragxuu ree.

¹² Chi ma cadxe, bibig guidxiptio'p ree apóstoles lojman rëb reeman:

—Güjdx loj gra ree bën guin din yaguiaj reeman chitiil lod yaya'n reeman luguiedx doo ree në ree ranch, chitiil tëë ni gaw reeman din lod nadxu' ree achetczi yu'.

¹³ Dxel rëbaman loj reeman:

—Lëjt gajc gol badëëd ni gaw reeman.

Abi' rëb reeman:

—Per gaayzi guiadxtil naca'n con zatio'p bëjl, bajtëë bal yo'n yusiin ni gaw gra reeman.

¹⁴ Abi' cost gaay mil ree xinguaaw riga' yagaj. Per rëb Jesús loj ree xbejnman:

—Gol güjdx loj reeman din cwe tü'pchii gaj reeman.

¹⁵ Abi' bagojn reeman laa reeman persi gurej gra reeman zian. ¹⁶ Dxel cwa'man guigaay guiadxtil guin con zatio'p bëjl guin. Gules lojman xanyabaa, badëëman quixtëë loj Dios, zianz gula'man laa reen badëëman loj ree xbejnman din qui's reeman laan loj ree bën guin. ¹⁷ Graczi reeman gudaw xt bigdxinladx reeman. Abi' bato'p reeman chiptio'p dxüm nilaay baya'n.

Rëb Bëd guial Jesús naj Cristo
(Mt. 16:13-19; Mr. 8:27-29)

¹⁸ Tijb dxej cabejdx canab Jesús Dios, za'në ganaxzi ree xbejnman. Gunabdiidxaman loj reeman, rëbaman:

—¿Chu rëb ree bejn najn?

¹⁹ Badxi' reeman laan rëb reeman:

—Yu' reeman rëb lüj naj Waj bën baroobnijs bejn ree, yu'za reeman rëb lüj naj Elías bën badëë xtiidx Dios loj ree bejn, yu' tëë reeman rëb lüj naj tijb ree bën badëë xtiidx Dios loj ree bejn gocli, bën ma baban.

²⁰ Dxel gunabdiidx Jesús zatijb, rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo. Lüj naj Xi'n Dios.

Rugojn Jesús guiëtaman
(Mt. 16:20-28; Mr. 8:30-9:1)

²¹ Rëb Jesús loj reeman achuczi loj guiëb reeman zian, ²² rëb tëëman:

—Rayal sagdiaj Bén guxhaal Dios: ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

²³ Dxel rëbaman loj gra reeman:

—Bal chu rën gac da bejnan ad rayalt güünman zi'c naj xixgabaman, siibnejzaman guialzi ni tëdzaman guixie guixie abi' guidnalaman naj. ²⁴ Din bën mazri rën guialnaban ni rajpaman loj guidxliuj guie, zadxin dxej gusëëbaman laan, per bën guiët por naj, zajpaman guialnaban tiblyaa con Dios. ²⁵ ¿Xhie

gan güün bejn gapaman gra ni yu' loj guidxliuj abi' nitaman loj Dios? ²⁶ Bal chu ratu guza't naj në da diidxan, ziangajc naj najn Bén guxhaal Dios, yatunè'n laaman chi gualan con da gualrniabeen loj xbiani da Dadan nètèè loj xbiani ree xianjlaman. ²⁷ Per diidxliczi rnin lojdi, yu' ree bén za' guie ad zéjtt xt guguaa reeman xgualrniabee Dios.

Bidxaa Jesús loj choon ree xbejnman
(Mt. 17:1-8; Mr. 9:2-8)

²⁸ Chi gudèd cost xhujn dxej ni gunee Jesús diidx guin ree, wejman persi gurejdx gunabaman Dios tijb guijc guia', binèman Bèd con Waj con Jacob. ²⁹ La'tgaj cabejdx canabaman Dios, bidxaa lojman guiáad xabaman gojcan naquichbèj bidiin tèèn bacha'. ³⁰ Dxejczy gulentie tio'p ree bejn, caneenè reeman laaman. Tijbaman naj Moisejs zatijbaman naj Elías. ³¹ Yu' reeman galay biani cayü reeman diidx guial guièt Jesús Jerusalén. ³² Majsj yu' bacaal loj Bèd në loj ree xcompniaraman, batie'ch xbacaal reeman persi baguaa reeman xbiani Jesús con zatio'p ree bén za'nèman. ³³ Chi ma baza ree bén caneenè Jesús, rëb Bèd lojman:

—Mextr; jzagdxen nadxu' ree guie! Zajc yaguieenan choon ranch, tijban par lüj, tijban par Moisejs zatijban par Elías.

Per ad ragheet Bèd xhienin caneeman. ³⁴ La'tgaj caneeman zian, biguiajt tijb zaj xt guijc reeman, chi ma yu' reeman lèn zaj guin dád bidxeb reeman. ³⁵ Dxel loj zaj guin biguien cha' bejn, rëbaman:

—Bén guie naj da Xi'nan bén rën da'tan. Gol bacaagdiajg xtiidxaman.

³⁶ Chi gulox biguien cha'man loj zaj guin, baguaa reeman xtijbzi Jesús za'man. Abi' ad gutie'cht reeman diidx. Lèn ree dxej zii achutczy loj rëb reeman ni baguaa reeman.

Rayün Jesús tijb xin yu' xinxab luxdoo
(Mt. 17:14-21; Mr. 9:14-29)

³⁷ Bareguiaal, chi baguiajt reeman guijc guia' guin, dád benzien brii bigchaagloj Jesús. ³⁸ Abi' tijb bén no'ch loj reeman guridxa', rëbaman lojman: —jMextr!, been wen baguaa da xi'nan din tijbzi laax ra'pan. ³⁹ Tijb xinxab ru luxdoox abi' rucwixdiajx laax, rugüjtya'x laax rbèè tèèx bichijn ro'x. Dád rusaadiajx laax ad rëntix guslaax laax. ⁴⁰ Ma gunaaban loj ree xbejn din nabèè reeman xinxab guin, per ad gojct reeman.

⁴¹ Badxi' Jesús laan rëbaman:

—jBenguijdx, bén ad rliladxt! ¿Xt goc gazunè'n lèjt gadaan tèèn lèjt? Tanè xi'nl guie.

⁴² Chi cabig xin guin basajb xinxab guin laax luyuj, bagüjtya'x laax zatijb. Per gunabee Jesús barii xinxab guin, bayünman laax dxel bayüman laax loj xdadix. ⁴³ Graczy reeman badxaloj gualrniabee ni rajp Dios.

Rugojn Jesús zatijb guial guiètaman
(Mt. 17:22-23; Mr. 9:30-32)

La'tgaj caydxa loj reeman ni cayün Jesús, rëbaman loj ree xbejnman:

⁴⁴—Gol bacaagdiajgchaaw ni ganin lèjt: yayü reeman Bén guxhaal Dios loj ree bejn.

⁴⁵ Per laa reeman ad bignia't reeman ni rnieeman guial ad badèètaman mod nignia' reeman, abi' bidxeb reeman niniabdiidx reeman lojman xhie rën guièb ni rëbaman.

¿Chu mazri zobjloj?
(Mt. 18:1-5; Mr. 9:33-37)

⁴⁶ Dxel guzuloj ree xbejnman rëb loj lasa' reeman chu loj gra reeman mazri zobjloj. ⁴⁷ Per gogbee Jesús xgab ni cayüjn reeman abi' cwa'man tijb xindoo, bazujman laax cwë'man, ⁴⁸ dxel rëbaman loj reeman:

—Bén ridxga' tijb xindoo por naj, najn ridxga'man, guiáad bén ridxga' naj, bén guxhaal najn ridxga'man. Din bén rüjn sirv lojdi, laaman mazri zobjloj lojdi.

Bén ad za't contr dunuj ree za'man con dunuj ree
(Mr. 9:38-40)

⁴⁹ Rëb Waj loj Jesús:

—Mextr, baguiaan tijb bejn rabëëman xindxab luxdoo ree bejn por xguial-rniabeel. Per badxoonan guial ad najtaman dux bejn ree.

⁵⁰ Per rëb Jesús lojman:

—Ad rudxoondi, din bén ad za't contr dunuj ree, za'man con dunuj ree.

Gudilë Jesús Jacob con Waj

⁵¹ Chi ma cadxin dxej yayë'p Jesús xanyabaa, dxel beenman xgab guial rüjn naguejn cheman Jerusalén. ⁵² Guxhaalaman bén guned ree, wej reeman tijb guiedxdo nulen Samaria bitiil reeman lod yaya'n reeman. ⁵³ Per ad cwëjbt ree bén Samaria guin nudëed reeman lod naya'nman guial gogbee reeman cheman Jerusalén. ⁵⁴ Chi baguiaa Waj con Jacob zian, rëb reeman lojman:

—Dad, ¿rënl ya yanabeen guiat bajl xanyabaa din gunijtan bén guin ree zi'c been Elías bén badëë xtiidx Dios loj ree bejn?

⁵⁵ Dxel badxi' loj Jesús loj reeman, abi' gudilëman laa reeman rëbaman:

—¿Nid ragbeedi ya guial loj xindxab zëed ni rnieedi? ⁵⁶ Naj, Bén guxhaal Dios, ad zialtan din gunijtan xguialnaban bejn loj Dios, zialan din yabën laa reeman loj dol.

Dxel zë reeman zatijb guiedx.

Bén rën chinal Jesús
(Mt. 8:19-22)

⁵⁷ Chi zë reeman lunejz, tijb bejn rëb loj Jesús:

—Dad, rënan guidnaalan lüj bantëéz guin chel.

⁵⁸ Badxi' Jesús laan rëbaman:

—Cuyojt ree yu' xguiajbiliaa reeb guiáad ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

⁵⁹ Rëb Jesús loj ben ren:

—Tanal naj.

Per badxi'man laan rëbaman:

—Dad, banee mod gabenë' da Dadan xt chi guiëtaman.

⁶⁰ Abi' rëb Jesús lojman:

—Basa'n xdadil con ree bén ad rënt guidnal naj, laa reeman guquie'ch laaman. Sa'n lüj bigtie'ch diidx xhienaag naj xguialrniabee Dios.

⁶¹ Dxel rëb zatijb bén guin:

—Dad, rënan guidnaalan lüj, per yalojxgaj banee mod chigzadiidxnë' ree da familan.

⁶² Per rëb Jesús:

—Bén guiniaaz guia' garad abi' gudxi' lojman niz xijchaman, ad zile't guilia'man yuj zagdex. Ziangajc bén rën guidnal naj, bal id zusa'nman graczi tiblax ad zile't chu'man loj xguialrniabee Dios.

10

Rxhiaal Jesús gayojnchii bejn

¹ Chi gudëd gaj ree ni guin, gulej Dad Jesús gayojnchii bejn, abi' guxhaalaman tio'p gaj reeman luguiedx ree në ree ranch din ned reeman che gaj reeman lod naj cheman. ² Rëbaman loj reeman:

—Diidxliczi, zien bejn rën gucaagdiajg xtiidx Dios, per ad zient bën gulüü laa reeman yu'. Zeel gol gurejdx gunab Dios din guixhiaalaman mazri zien bën gulüü laa reeman. ³ Gol chej, naj rxhial lëjt zi'c rej ree xiil galay ree cuyojt. ⁴ Ad chinëdi guijxh, ni'qui milia, ni'qui zatib nejz xgurëchidi, ad sudxedi guinieenëdi bejn ree runejz. ⁵ Bantëez lënü chu'di, yalojxgaj gol güjdx: “Dios yabe'cdxe luxdoodi.” ⁶ Abi' bal lënüzi yu' ree bën rayal guialnaza'c guin, zaya'n nan yagaj. Guiáad bal id rayal reeman laan zayejcan con lëjt. ⁷ Yagaj gol baya'n, gol gudaw, gol gu' ni guneee reeman. Din bën rünj dxiin rayal gaxaman. Yagajzi gol baya'n ad bal yaya'ndi lood ren. ⁸ Chi guidxindi tijb guiedx lod yaca' reeman lëjt, gol gudaw ni guneee reeman. ⁹ Gol bayüjn ree bënragxuu yu' ree luguiedx guin, gol güjdx tëë loj reeman: “Ma zëed xguialrniabee Dios gajxh par lëjt.” ¹⁰ Per bal guidxindi tijb guiedx lod ad rënt reeman yaca' reeman lëjt, gol brii lunejz, gol güjdx loj reeman: ¹¹ “Xt xgoxyuj ladxidi ni cwa du guia'n, radxiippan zi'c tijb sen guial ad bidxga'tidi dux tiidxan. Per gol gogbee, guial ma zëed xguialrniabee Dios gajxh par lëjt.” ¹² Naj rni lëjt guial dxej yadëed ree bejn cwent loj Dios, mazri casti narooob yayal reeman guial loj ree bën gure guiedx Sodoma.

*Bën ad bazoobt ree xtiidx Dios
(Mt. 11:20-24)*

¹³ Rëb tëë Jesús:

—¡Probza lëjt bën Corazín! ¡Probza lëjt bën Betsaida! Din bal guiedx Tiro në guiedx Sidón niajc gra ree milagr ni goc ladxidi, diidz gocli nayüjn reeman xgab por xtol reeman, niajcw reeman lajd ya's nuroob tëë cobdëj guijc reeman zi'c tijb sen guial ma bayüjn reeman xgab por xtol reeman. ¹⁴ Per rnin lojdi guial dxej yadëed ree bejn cwent loj Dios, mazri casti narooob yayalidi guial loj ree bën Tiro në ree bën Sidón. ¹⁵ Guiáad lëjt, bën Capernaum, ad naladxidi yayalidi xanyabaa, lëjt yayal gabijl.

¹⁶ Dxel rëb Jesús loj ree xbejnman:

—Bën ridxga' lëjt, najn ridxga'man, per bën ad ridxga't lëjt, najn ad ridxga'taman. Guiáad bën ad ridxga't naj, bën guxhaal najn ad ridxga'taman.

Badxin ree bën gayojnchii guxhaal Jesús

¹⁷ Chi badxin ree bën gayojnchii guxhaal Jesús, dád rabaa reeman rëb reeman lojman:

—Dad, xt ree xindxab ruzoob dux tiidxan chi raza'tan lajl.

¹⁸ Abi' rëb Jesús loj reeman:

—Waliquidi, naj baguia, zi'czi rë'p nijs basëeb xguialrniabee xindxab.

¹⁹ Naj banee lëjt guialrniabee din gulëedi guijc ree bëel në guijc ree nixüb, në par güündi gan loj xguialrniabee xindxab sin guial güünx lëjt xhienin. ²⁰ Per ad rabaadi guial ruzoob ree xindxab guin xtiidxidi, gol babaa guial ca lajdi loj libr yu' xanyabaa.

*Rabaa Jesús
(Mt. 11:25-27; 13:16-17)*

²¹ Loj hor ziigajc babaa da't Jesús por xSprijt Dios, abi' rëbaman:

—Ruzatan lüj zagdxe, Dad, lüj rniabee xanyabaa në loj guidxliuj, din ni baquie'chil loj ree bën rajc në loj ree bën rignia', laan ma balüül loj ree bën ad rajcza'ct. Zian gojcan Dad, din zian guyën.

²² 'Da Dadan banee gra lon. Abi' achut nünbee Jesucrist Xi'n Dios, tijbzi Dios, achu tētē nünbee Dios, tijbzi Jesucrist xi'nman con ree bën rēnman güünbee Dios.

²³ Dxel baguiaaman loj ree xbejnman, abi' rēbaman lojzi reeman:

—Xiquilbaa ree bën guguaa ni cuguaadi. ²⁴ Din naj rni lojdi, zien ree bën badēē xtiidx Dios loj ree bejn në ree rey guyën nuguaa ni cuguaadi, per ad baguiaat reeman laan. Guyën reeman nucaagdiajg reeman ni cucaagdiajguidi, per ad bacaagdiajgt reeman laan.

Xcwent tijb bēn Samaria

²⁵ Tijb mextr rajc ley guzuliman guneenēman Jesús. Abi' din güünman laaman prueb, gunabdiidxaman lojman rēbaman:

—Mextr, ¿xhie rayal günan din ga'pan gualnaban tiblyaya con Dios?

²⁶ Badxi' Jesús laan rēbaman:

—¿Xhie ca loj ley badēē Dios loj Moisejs? ¿Xhienaag rignia'lan?

²⁷ Abi' rēb mextr guin:

—“Guyën xDadil Dios guidib guiyc guidib ladxil guyën tēē ben ren zi'c rēn lüj gajc.”

²⁸ Badxi' Jesús laan, rēbaman:

—Zagdxequi badxi'lan. Bal güünl zian zajpil gualnaban tiblyaya con Dios.

²⁹ Per guyën mextr guin naya'nman zagdxe, gunabdiidxaman loj Jesús, rēbaman:

—¿Chu bēnan guiēnan zi'c rēn naj gajc?

³⁰ Dxel be Jesús tijb cwent lojman, rēbaman:

—Tijb bēn Israel briiman Jerusalén zēman guiedx Jericó. Abi' gunaaz ree xingubaan laaman, gudijn reex laaman gulan tēē reex gra ni ca'man xt në xabaman, basa'n reex laaman ma güjtczaman. ³¹ Dxel gudēd tijb bixhioz niz yagaj, per chi baguiaaman bēn guin, zijt bicaaman volt, zētaman. ³² Në tijb bēn Levita bēn rüjn yudar bixhioz ree, gudēd niz yagaj, chi baguiaaman bēn guin, zijt bicaaman volt, zētaman. ³³ Per tijb bēn Samaria gudēd niz yagaj, chi baguiaaman bēn guin, bayaman laaman, ³⁴ dxel gubigaman lod naga'man, badxe'man sejt con vin lod nadxeelguijdxaman dxel guxhiiman laan con lajd. Zianz badxiibaman laaman xburaman binēman laaman lēnü lod raya'n ree bejn. Yagaj gunajman laaman. ³⁵ Chi bareguiaal, chi ma yaguiaj bēn Samaria guin, gulēeman milia xieen tio'p dxex dxiin badēēman laan loj bēn naj lidxan, rēbaman lojman: “Gunaj bēn guie, bal gunijtil mazri, naj yaguix laan chi yaye'can.”

³⁶ Dxel rēb Jesús loj mextr guin:

—Yan, loj guiyon ree bēn guin, ¿chu bēnan guyën bēn gudin ree xingubaan guin?

³⁷ Badxi' mextr guinan rēbaman:

—Bēn baya laaman.

Dxel rēb Jesús lojman:

—Baguiaj, been ziangajc con ben ren.

Rignaj Jesús Mart në Li

³⁸ Basnuu Jesús zëman abi' bidxinman tijb guiedxdoo, yagaj wejman lidx tijb biin la Mart. ³⁹ Yu' tijb xbëlim lam Li. Gurej Li guin guia' Jesús cucaagdiajguim ni caneean. ⁴⁰ Per Mart guin mazri ruquiejnne gra xmandadim, abi' bibiguim loj Jesús rëbim:

—Dad, ¿nid rul xgab ya guial rusa'n da bëlan naj con gra mandad guin? Gùjdx lojm din güünm naj yudar.

⁴¹ Badxi' Jesús laan rëbaman:

—Mart, Mart, dád rul xgab guial yu' da't xmandadil. ⁴² Per tijbzi ni mazri zobjloj yu'. Li gulejm ni mazri zobjloj, abi' achut zajc chiquiedan lojm.

11

Rulüü Jesús xhienaag cwedx guiniab bejn Dios

(Mt. 6:9-15; 7:7-11)

¹ Tijb dxej cabejdx canab Jesús Dios. Abi' chi gulox gurejdx gunabaman Dios, rëb tijb xbejnman lojman:

—Dad, balüü dunujn yarejdx yanaaban Dios, zi'c balüü ree xbejn Waj bën baroobnijs bejn ree.

² Abi' rëb Jesús loj reeman:

—Chi cwedx guiniabidi Dios, gol güjdx:

Dad, lüj yu' xanyabaa,

rayal yaya'p da'tan lajl respejt.

Gac zi'c rniabeel.

Gac zi'c rën loj guidxliuj, zi'c rajc xanyabaa.

³ Bazaladx ni yadaawan guixie guixie.

⁴ Been dunujn perdon gra ree ni mal ma baguieenan, zi'c raguieenan perdon bën rüjn ree dunujn ni mal.

Ad tiëbil güün xindxab dunujn gan yaguieenan dol, babëë dunujn loj gra ni mal.

⁵ Abi' rëb Jesús loj reeman:

—Yaguie'ch ree, tijb lëjt yu' xmiw abi' garol guiaal chedi lidxix, guiëbidi: “Miw, baneesii choon guiadxtil gagui'nán, ⁶ din bi't tijb da miwan abi' achet ra'pan gudëdan lojx.” ⁷ Dxel nax diizd lëñü guin: “Ad ruslenl naj. Ma nayaaw ro' da portan. Ma naga'yë'snë' ree da xi'nán. Ad zile't chixchejn gunen laa reen.” ⁸ Per rnin lëjt, majsi bal id zixchex din guneex ni ryaadxidi guial rajc xmiwidi laax. Per züjnx naguiejn chixchex din guneex ni ryaadxidi chitëë guslenridi laax. ⁹ Zeel rnin lëjt: Gol gunab loj Dios, laaman guneë ni rniabidi. Gol baguuilaman, zadxejlidi laaman. Gol gurejdx gunabaman, zidxga'man lëjt. ¹⁰ Din bën rniab, zaca'man. Abi' bën rguiil, zadxejlaman guiáad bën rbejdx rniab laaman zidxga'man laaman.

¹¹ ¿Lëjt najdi dad, wen zudëëdi tijb guiaj loj xi'ndi ya chi guiniabix guiadxtil?, ¿o zudëëdi tijb bëël ya chi guiniabix bëjl? ¹² ¿o zudëëdi nixüb ya chi guiniabix dxijt? ¹³ Nacli lëjt najdi bëndol rajc rudëëdi ni zagdxe loj xi'ndi. ¡Diidxgui xDadidi bën yu' xanyabaa, nid zudëë xSprijtaman loj ree bën rniab laaman ya!

Rëb ree bejn ca' Jesús xguialrniabee Beelzebú

(Mt. 12:22-30; Mr. 3:19-27)

¹⁴ Caybëë Jesús tijb xindxab basa'n tijb bejn gop. Abi' chi barii xindxab guin guzuloj canee bën guin. Dxel dád badxaløj ree bejn. ¹⁵ Per yu' reeman rëb:

—Bén guin rabëë xindxab luxdoo ree bejn por xguialrniabee Beelzebú, xin rniabee ree xindxab.

¹⁶ Yu'za reeman par güün reeman laaman prueb, rëb reeman lojman din güünman milagr zëéd xanyabaa. ¹⁷ Per Jesús ragbee gajcaman xgab cayüjn reeman, abi' rëbaman:

—Gra nacion bal id nadxag riga' bejn por wadijl, rlia' lasa' reeman, ziangajc tijb famil bal id nadxag riga' reeman por wadijl, rlia' lasa' reeman.

¹⁸ Ziangajc bal Satanás xin rniabee ree xindxab su contr lasa' xindxab gajquix, nayob nit xguialrniabeex. Canin zian guial rëbidi por xguialrniabee Beelzebú rabën xindxab luxdoo ree bejn. ¹⁹ Per bal rabën xindxab luxdoo ree bejn por xguialrniabee Beelzebú, ¿chuza rudëéd guialrniabee loj ree xbejndi din yabëë reeman xindxab? Zeel laagajc reeman ruluü guial ad laat rnieedi.

²⁰ Per por xguialrniabee Dios rabën xindxab luxdoo ree bejn, laan rën guiëb guial ma za'në xguialrniabee Dios lëjt.

²¹ 'Bal tijb béngojl da't ca' xguiibaman, rajp lidxaman. Ad zajct cwan bejn ni rajpaman. ²² Per bal guidxin bén mazri gojl guial lojman güünman laaman gan abi' chisüdaman guilb ni ca'man tia' téeman gra ni rajpaman.

²³ 'Bén ad za't con naj, za'man contr naj, guíaad bén ad ruto'pt bejn par naj rtie'chaman laa reeman.

Xindxab rayejc

(Mt. 12:43-45)

²⁴ 'Chi rarii tijb xindxab luxdoo tijb bejn, abi' rza xindxab guin niz loj yujbidx rguuilix lod yaziiladxix. Chi ad rdxejlt lod yaziiladxix, dxel rüjnx xgab naladxix: “Zagdxeli yaye'can lod bariin.” ²⁵ Abi' chi rayejquix ruguiaax luxdoo bén guin, najn zi'c tijb lënü lod bilioob lod najcchaaw tëë. ²⁶ Dxel rica'x zagajdx ree xindxab naj mazri xinmal guial lojx. Abi' ru gra reex luxdoo bén guin. Dxel piorli raya'nman guial zi'c gocaman yaloj.

Xiquilbaa ree bén ruzoob xtiidx Dios

²⁷ La'tgaj canee Jesús diidx guin ree, gurixdiaj tijb béngunaa no'ch loj ree benzien guin, rëbaman:

—¡Xiquilbaa béngunaa bazuj lüj loj guidxliuj, bén baslaa tëë lüj!

²⁸ Per badxi' Jesús laan rëbaman:

—¡Mazri xiquilbaa ree bén rucaagdiajg xtiidx Dios ruzoob tëë reeman xtiidxaman!

Rniab ree bejn güün Jesús tijb milagr

(Mt. 12:38-42; Mr. 8:12)

²⁹ Zi'cri cado'p ree bejn lod za' Jesús, abi' guzuloj rëbaman loj reeman:

—Bén riga' ree loj guidxliuj yan, naj reeman benmal. Abi' rniab reeman tijb milagr, per achet guguiaa reeman, tijbzi zi'c guzac Jonás bén badëë xtiidx Dios loj ree bejn. ³⁰ Zi'c goc Jonás tijb sen par ree bén gure guiedx Nínive, ziangajc Bén guxhaal Dios najman tijb sen par ree bén naban yan. ³¹ Abi' bén goc reina guiedx Sabá, zabanman chi yadëéd ree bejn cwent loj Dios dxel guiëbaman guial ree bén riga' yan, yayal reeman xcasti Dios. Din laaman dád zijt guzaman bicaagdiajgaman xguialrajc rey Salomón. Abi' yan, naj za'në'n lëjt, mazri lasajcan guial loj rey Salomón. ³² Ziangajc ree bén guban guiedx Nínive, zaban reeman chi yadëéd ree bejn cwent loj Dios abi' guiëb reeman guial ree bén riga' yan, yayal reeman xcasti Dios. Din bén Nínive ree bayejc reeman loj Dios chi bacaagdiajg reeman xtiidxaman ni gunee Jonás. Abi' yan, naj za'në'n lëjt mazri lasajcan guial loj Jonás.

*Guiaaloj bejn naj zi'c biani
(Mt. 5:15; 6:22-23)*

³³ Achut rucaaguij tijb guij par sun lod naguie'ch, achu tēet ruta'cw laan lēn tijb yagalm. Rayal sun lod guiguienan din gusnin loj bēn chu' lēnū.
³⁴ Guiaaloj bejn naj zi'c tijb biani par xcuerpaman. Bal por ni ruguiaal rūjnł ni zagdxe, guidib xcuerpil naj biani. Per bal por ni ruguiaal rūjnł ni mal, guidib xcuerpil naj zi'c lod nacay. ³⁵ Gojp cudad chitēē chinē guiaalojł lūj loj nejz mal luar loj nejz zagdxe. ³⁶ Abi' bal ni'qui tibda'n xcuerpil ad rūjnt ni mal, guidibczan gac nayni zi'c chi rusni guij con xbacha'n.

*Ni rūjn ree mextr rajc ley nē ree bēnfarisew
(Mt. 23:1-36; Mr. 12:38-40; Lc. 20:45-47)*

³⁷ Chi gulox guneenē Jesús laa reeman, tijb bēnfarisew rēb loj Jesús din chitaw Jesús lidxaman. Chi guyuman, zianz gurejman xan mex. ³⁸ Abi' bēnfarisew guin badxalojman chi baguiaaman ad banaat Jesús chi ma gawaman zi'c naj xcostumbr reeman. ³⁹ Per rēbaman loj reeman:

—Najdi zi'c tijb vajs con pliajt ni naya xijch, rguienti benza'c, per luxdoodi yu' da't guialgubaan nē ni mal. ⁴⁰ ¡Bennad! ¿Nid bēn been gajc xcuerpidi been luxdoodi ya? ⁴¹ Zeel gol been yudar bēn achet rajp din guiguien guial najquidi benza'c.

⁴² ¡Probza lējt bēnfarisew! Rbēēcadi ni naj par Dios, rūjndi chii lala' ni rajpidi zi'c bidxtil nē rud nē graloj ni rxūbindi abi' rudēēdi tijban loj Dios. Per ad rūjntidi zi'c rayal ad rēn tēētidi Dios. Gol bidxga' Dios ad gucweēz tēē gudēēdi ni rudēēdi lojman.

⁴³ ¡Probza lējt, bēnfarisew! guial ruladxidi cwedi lod rbej ree bēn zojbloj lēn ree yadoo, ruladx tēēdi gugajpdioz ree bejn lējt zagdxe niz lunejz.

⁴⁴ ¡Probza lējt, mextr rajc ley nē lējt bēnfarisew, bēn rusquiee!, din najdi zi'c baa ni ad rguient, abi' ad ragbeet ree bejn rē'p reeman guijcan.

⁴⁵ Dxel guneey tijb mextr rajc ley, rēbaman loj Jesús:
—Mextr, nē dunujn caneeguijdxil guial rēbil zian.

⁴⁶ Badxi' Jesús laan rēbaman:

—¡Ziangajc lējt mextr rajc ley, probza lējt!, guial rniabeedi bejn ree gūin reeman ni nawēēgda't abi' rniabeezidi gūin bejn zian guiáad lējt ni'qui ta'n ad rūjntidi laa reeman yudar din gūin reeman zi'c rēndi.

⁴⁷ ¡Probza lējt!, guial rūjnchaawidi xbaa ree bēn badēē xtiidx Dios loj ree bejn, bēn bagūjt gajc ree xbēngulalidi. ⁴⁸ Zian ragbee ree bejn guial ruladxidi ni been ree xbēngulalidi. Laa reeman bagūjt ree bēn badēē ree xtiidx Dios loj ree bejn, guiáad lējt rayūjnchaawidi xbaa reeman.

⁴⁹ Zeel Dios guial ragbeeman gra ni gac, rēbaman: “Gaxhalan bēn rudēē ree xtiidx Dios loj ree bejn, nē ree apóstoles, yu' reeman gugūjtidi yu' tēē reeman sunalidi din gūundi laa reeman xhienin.” ⁵⁰ Abi' bēn naban ree yan, laa reeman yadēēd cwent loj Dios por rejn ni guxhie' ree bēn badēē xtiidx Dios loj ree bejn, bēn gūt ree diizd chi go'tchaaw guidxliuj, ⁵¹ diizd xrejn Abel xt xrejn Zacarías bēn bagūjt reeman ro' yadooro' Jerusalén. Zeel rnin lējt guial ree bēn naban yan, laa reeman quix por gra reeman.

⁵² ¡Probza lējt, mextr rajc ley!, guial ad rtiējbtidi chu' ree bejn loj xnejz Dios, ni'quiza lējt ad rūjnt naguiejn chu'di loj xnejz Dios abi' rudxoondi chu' ree bejn loj xnejzaman.

⁵³ Chi gunee Jesús zian, dád bidxe'ch ree bénfarisew guin nē ree mextr rajc ley. Abi' guzuloj zien ree ni rniabdiidx reeman lojman, ⁵⁴ din guidoon xhie guiëbaman din chile' gutedia' reeman laaman.

12

Xlevadur ree bénfarisew

¹ La'tgaj canee Jesús zian, guzuloj cado'p por mil bejn, abi' guial zien da't reeman xt rxa't lasa' reeman. Dxel guzuloj Jesús rëbaman yaloy loj ree xbejnman:

—Gol gojp cudad con xlevadur ree bénfarisew, rën guiëban gapidi cudad con ni rusquiee reeman. ² Din achet ni naguie'ch yu' ni ad zaguient, ad yu' tēēt ni ralan ni ad zagbeet bejn. ³ Zeel gra diidx ni ma guneedi lod nacay, zaguiejn ree bejn laan lod nayni. Guiáad ree diidx ni ma guneedi ralan lēnū, yu' chi cwidxa' reeman guiniee reeman diidx guin ree diizd guijc ree yu.

Chu rayal guidxeb bejn (Mt. 10:28-31)

⁴ 'Rnin lējt, ad ridxebidi bēn rën ree gugūjt lējt din zile' gugūjt reeman xcuerpidi, sa'n xsprijtidi ad zile't gugaal reeman laan. ⁵ Ganin lējt chu rayal guidxebidi: gol bidxeb Dios bēn rajp guialrniabee guial chi ma biquiedaman xguialnabandi zajc guzaalaman lējt gabijl. Zeel gol bidxebaman.

⁶ 'Lējt ragbee guial biguijndoo ree ad lasajct reeb wayējx, per Dios ad rayanladxtaman ni'qui tijb reeb. ⁷ Guiáad lējt xt guidxguijquidi, graczan nayab loj Dios. Zeel ad rdxebidi din mazri lasajquidi guial loj zien da't ree biguijndoo.

Bén rēb loj ree bejn guial najman xbejn Jesucrist (Mt. 10:32-33; 12:32; 10:19-20)

⁸ 'Rnin lējt, chutēēz bēn guiëb loj ree bejn guial najman da bejnman, ziangajc naj najn Bēn guxhaal Dios guiën loj ree xianjl Dios guial da bejnman najman. ⁹ Per bēn guiëb loj ree bejn guial ad najtaman da bejnman, ziangajc guiën loj ree xianjl Dios guial ad najtaman da bejnman.

¹⁰ 'Chutēēz bēn guinieeguijdx Bēn guxhaal Dios zajcaman perdon, sa'n bēn guinieeguijdx xSprijt Dios, ad zajctaman perdon.

¹¹ 'Chi chinē reeman lējt lēn ree yadoo o loj ree juejs nē loj ree guxtis, ad aal chu'di xgab xhienaag yadxi'di xtiidx reeman. ¹² Din chi guidxin hor ni guinieedi, xSprijt Dios gunee diidx guinieedi.

Xcwent tijb xinrijcw

¹³ Tijb bēn no'ch loj ree benzien guin rēb loj Jesús:

—Mextr; gūjdx loj da bichan din guneex ni rayalan.

¹⁴ Per rēb Jesús lojx:

—¿Chu bazuj naj gūnan guialguxtis o gagui'san ni tia'di?

¹⁵ Rēb tēēman loj reeman:

—Gol gojp cudad; ad sēēbladxidi gapidi ni rajp ree ben ren, din ad ni rajpt bejn runee guialnaban.

¹⁶ Dxel beman tijb cwent loj reeman, rëbaman:

—Guyu tijb xinrijcw, dád gojc xguiniaax. ¹⁷ Dxel beenx xgab naladxix: “¿Xhienaag gūnan? Ad ra'ptan lod gagu'chaawan guialnaza'c guin ree.” ¹⁸ Abi' gunaladxix: “Ma ragbeen xhienaag gūnan. Guse'nan yu lod rgu'chaawan da guialnaza'can din gūnan mazri yu narooob ree lod gagu'chaawan laa reen, nē graczi ni ra'pan. ¹⁹ Dxel guiën, dád zien guialnaza'c ra'pan par zien ijz,

yaziiladxan, gawan, guië'n yabaa tëën.” ²⁰ Per rëb Dios lojx: “Xin tont, yanguxhin gajc guiëtil, laadx ni nagu'chaawil, ¿chu yaya'nnë laan?”

²¹ Zian rzajc bën rgu'chaaw ni za'c par laagajcaman, per loj Dios achet rajpaman.

Achetczy rayal chu' bejn xgab

(Mt. 6:25-34)

²² Dxel rëb Jesús loj ree xbejnman:

—Naj rni lëjt: Ad chu'di xgab por ni gawidi par guibandi ni'qui por lajd ni gacwidi. ²³ Guialnaban mazri lasajcan guial loj guialraw, guiáad xcuerp bejn mazri lasajcan guial loj xabaman. ²⁴ ¡Gol baguiaa balo ree! Ad rxübint reeb ad rato'p tëët reeb guialnaza'c, ad rajp tëët reeb lod yagu'chaaw reeb guialnaza'c guin, per Dios rudëëd ni raw reeb. ¡Abi' mazri lasajquidi guial loj reeb! ²⁵ ¿Wen guial ru da'tidi xgab ma güün lëjt gajc mazri ziool ya? ²⁶ Abi' bal ni'qui zian ad zile't güündi, ¿xhieczy gan rudi xgab por ni ren ree?

²⁷ ¡Gol baguiaa xhienaag rini's ree guiaa dajn! Ad rüjnt reen dxiin ad rguib tëët reen. Per ni'qui rey Salomón ad guzujchaawt zi'c za'chaaw ree guiaa guin, majsi mast guzujchaawaman. ²⁸ Abi' bal gui'xh dajn ruzujchaaw Dios yan, majsi guixiezi che'can. ¡Diidxgui lëjt, bën ad rliladxza'ct ree laaman nid zuneeman ni gacwidi ya! ²⁹ Zeel ad rudi xgab xhie gawidi o xhie guië'di, ad bal tib yu'zidi laan xgab. ³⁰ Din bën ad nünbeet ree Dios rüjn zian. Laa reeman ru xgab por gra ree ni guin. Per lëjt yu' xDadidi, laaman ragbeechaaw xhienin riaadxidi. ³¹ Per yalojxgaj gol baguuil güündi zi'c rniabee Dios, laaman gunee gra ni ryaadxidi.

Guialnaza'c yu' xanyabaa

(Mt. 6:19-21)

³² Lëjt najdi da bejnman, ad rdxebidi. Ta'nzi najdi, per xDadidi Dios ma beenman xgab nabënëdi laaman. ³³ Gol bato' ni rajpidi din gudëëdan loj ree bënprob. Gol been naguiejn güündi gan guialnaza'c ni ad rarat ni yu' xanyabaa, lod ad zut xingubaan cwan laa reen lod ad zacabe tëët reen. ³⁴ Din lod rajpidi guialnaza'c guin, yagaj za' xquiarguejndi.

Gol guzujsin

³⁵ Gol guzujsin zi'c bën ma najcw xab ca' tëë xguijman par griiman. ³⁶ Gol been zi'c ree mojs cabëz yadxin xpatron reex, bën zë loj guialruxhliiaa, din diob guixhial reex ro' port yayuman chi gucaaman. ³⁷ ¡Xiquilbaa ree mojs naga'naa cabëz xpatron reex! Naj rni lëjt, laagajc patron guin cwe'c laa reex xan mex, dxel chicchaa xabaman din gudëëman ni gaw reex. ³⁸ Xiquilbaa reex bal guidxaagloj xpatron reex laa reex naga'naa reex, majsi yadxinman garol guiaal o chi ma cayreguiaal ya. ³⁹ Gol been xgab, bal tijb bejn ragbeeman xhie hor chu' xingubaan lidxaman cwanx, ad zatiëjbtaman chu'x lidxaman. ⁴⁰ Zianan zeel gol guzujsin din ad ragbeetidi dxejczy gui't Bën guxhaal Dios.

Mojs za'c në mojs guiidx

(Mt. 24:45-51)

⁴¹ Dxel gunabdiidx Bëd loj Jesús, rëbaman:

—Dad, ¿par dunuzjan bel cwent guin ya o par gra ree bejn?

⁴² Badxi' Jesús laan, rëbaman:

—¿Chu lëjt naj zi'c tijb mojs za'c, nazobdiidx, rusa'n xpatronx laax lidxaman persi rulenx gra ree mojs rudëë tëëx ni raw reex chi rajl hor?

⁴³ Xiquilbaa mojs cayüjn dxiin zagdx chi yadxin xpatronx. ⁴⁴ Din diidxliczi

rnin lëjt, zusa'n gra xieen patron guin loj mojs guin. ⁴⁵ Per bal naladx mojs guin: “Zaglaari yaguaaad da patronan”, zianz sulojx gusagzix gra ree bën rüjn dxiin yagaj, zi'c béngunaa zi'c xinguaaaw, dxel suloj gawix, guié'x südx tēēx, ⁴⁶ abi' yadxin xpatronx tijb dxej ni ad rbéztix nē tijb hor ni ad ragbeetix. Dxel dád casti narooob gudēēd patron guin laax, guixhiaalaman laax lod rayal ree bën ad ruzoobt diidx.

⁴⁷ 'Din tijb mojs ragbee ni rēn xpatronx güünx, abi' ad za'tix porvinid ad ruzoob tēētix diidx, dád casti narooob tēdix. ⁴⁸ Per mojs ad ragbeet ni rēn xpatronx güünx abi' güünx ni rayal casti, ta'nz tēdix casti. Din bën badēēd Dios quiarguejn, mazri zien ni rayal güünman por quiarguejn ni badēēd Dios lojman. Ziangajc bën badēēd Dios guialrniabee, mazri zien ni rayal güünman por guialrniabee ni badēēd Dios lojman.

*Por Jesús rlia' lasa' ree bejn
(Mt. 10:34-36)*

⁴⁹ 'Zialan loj guidxliuj zi'c tijb bën zidgacaaguij xhienin, abi' jma rēn nejzdoon tiaguijn! ⁵⁰ Gazaagdiajn guiēt tēēn, abi' j dád yu'nayan diizd yan xt chi gacan cumplid! ⁵¹ Ad naladxidi zialan loj guidxliuj par yabecdxcn luxdoo bejn, zialan dīn guial guililadx reeman naj chu' wadijl. ⁵² Din diizd yan, lod naj reeman gaay loj tijb famil, til choonman contr tio'paman, tio'paman contr choonaman. ⁵³ Dad su contr xi'nman guiáad xi'nman su contr laaman; na su contr xi'ndxa'paman guiáad laam su contr laaman; abi' nasuegr su contr xwalidxaman guiáad laam su contr laaman.

*Sen rguien xanyabaa
(Mt. 16:1-4; Mr. 8:11-13)*

⁵⁴ Rēb tēē Jesús loj ree benzien guin:
—Chi ruguiaadi ririi zaj niz lod rēēz gubijdx, rēbidi: zal guia, abi' rajc gajc zian. ⁵⁵ Abi' chi ririi bi niz sur, rēbidi: gac nalaa, abi' rajc gajc zian. ⁵⁶ jBēn rusquiee! Ragbeedi xhie rēn guiēb sen rguien xanyabaa nē loj guidxliuj, ¿chexquiza zeel ad ragbeetidi xhie rēn guiēb ni cayajc loj guidxliuj yan?

*Babey zagdxe con bēn rdxe'ch lūj
(Mt. 5:25-26)*

⁵⁷ ¿Chexc ad rüjnt lējt gajc xgab conin naj ni zagdxe? ⁵⁸ Bal chu bēn rudēēd lūj loj guxtis, been naguiejn baya'nnēman diidx zagdxe la'tgaj yu' tiamp, chitēē yayūman lūj loj guxtis, abi' guxtis guin yayū lūj loj ree bēn cu' lūj ladxguuib. ⁵⁹ Naj rni lūj, ad zariitil ladxguuib guin xtczi quixil gra ni na guxtis guin.

13

Gol bayüjn xgab por xtolidi

¹ Lēn gajc ree dxejzii wej tio'p choon ree bejn biguie reeman diidx loj Jesús guial bagüjt Pilato tio'p choon ree bēn Galilea, abi' bago'chaman xrejn reeman con xrejn ree be bagüjt reeman par gudēēd reeman loj Dios zi'c gon. ² Dxel rēb Jesús:

—Ad bal naladxidi guzajc ree bēn Galilea guin zian guial naj reeman mazri bēndol guial loj gra ree bēn Galilea. ³ Din naj rni lējt guial ad ziantan. Abi' bal id zayüjndi xgab por xtolidi ziangajc saquidi. ⁴ Ad bal naladxidi bēn chiinbichoon güt ree chi guxa't torre ni la Siloé laa reeman, naj reeman

mazri béndol guial loj gra ree bèn zojb Jerusalén. ⁵ Naj rni lèjt guial ad ziantan. Abi' bal id zayüjndi xgab por xtolidi ziangajc saquidi.

Xcwent yag higo ni ad rtiat

⁶ Dxel be Jesús tijb cwent loj reeman, rëbaman:

—Tijb bejn gojpaman yag higo lod nagu'man uv, abi' biquiaaman bal ca higo lojn, per achetcki bidxaaglojman. ⁷ Dxel rëbaman loj bèn rajp guidxliuj guin: “Baguiaa, ma gojc choon ijz rialan rguilan higo loj yag guin, abi' achetcki rdxaaglojn. Batüügan din nawëgzi rüjnan loj guidxliuj guie.” ⁸ Per rëb bèn rajp guidxliuj guin: “Dad, basa'nsiin zatib ijz, yabeclaan yuj xanan gagu' tëënan abon. ⁹ Rupent zian tian, per bal id zacan dxel tügan.”

Bayüjn Jesús tijb béngunaa ca bëw xijch

¹⁰ Tijb dxej raziiladx ree bejn, culüü Jesús bejn ree lèn tijb yadoo, ¹¹ yagaj za' tijb béngunaa ma gojc chiinbichoon ijz ragxuuman, tijb xindxab basa'n laaman con tijb bëw xijchaman, ad rilet'ctzi yaliman. ¹² Chi baguiaa Jesús laaman, gurejdxaman laaman, rëbaman:

—Na, ma bayajquil gualguijdx ni goquil.

¹³ Dxel badxiib yaaman guijcaman; abi' loj hor guin gajc baliman, zianz guzuloj cuza'taman Dios zagdx. ¹⁴ Per bèn rniabee lèn yadoo guin dad bidxe'chaman guial bayüjn Jesús bèn guin dxej raziiladx ree bejn, dxel rëbaman loj ree bejn:

—Xho'p dxej yu' guial güün bejn dxiin, loj ree dxej guin gol guida din yayajquidi, per ad dxej raziiladxt bejn.

¹⁵ Badxi' Dad Jesús laan rëbaman:

—Bèn rusquiee, ¿nid rxhiee xgo'ndi o xburidi dxej raziiladx ree bejn ya par chiquië'di laa reeb nijs? ¹⁶ Béngunaa guie zëëdaman loj xdiaa Abraham, ma gojc chiinbichoon ijz naxhii xindxab laaman con gualguijdx guie. ¿Wen id zajc yayajcaman dxej raziiladx ree bejn ya?

¹⁷ Chi rëb Jesús zian, gra ree bèn rdxe'ch laaman baya'n xtu; per graczi ree bejn rabaa guial ruguiaa reeman gra ree ni zagdx ni rüjnman.

Xcwent xhaj moxtajs

(Mt. 13:31-32; Mr. 4:30-32)

¹⁸ Rëb tëë Jesús:

—¿Xhienaag ganin naj xgualrniabee Dios o xhiee gulün lojdi din chignia'di xhienaag naj xgualrniabeeman? ¹⁹ Laan naj zi'c xhaj moxtajs ni rxübin bejn loj xguiniaaman, rni'san xt rajcan yag narooob. Abi' guial narooob da't rajcan xt rüjn xguixbitia's ree biguijn xidxan.

Xcwent levadur

(Mt. 13:33)

²⁰ Rëb Jesús zatijb:

—¿Xhienaag ganin naj xgualrniabee Dios? ²¹ Laan naj zi'c levadur ni rugo'ch tijb béngunaa choon midid harin persi rusaaguijn gra cob guin.

Port nadëë

(Mt. 7:13-14, 21-23)

²² Chi zë Jesús Jerusalén, rulüüman bejn ree luguiedx narooob ree në ree luguiedx dobëz niz lod rdëdaman. ²³ Abi' tijb bejn gunabdiidx lojman rëbaman:

—Dad, ¿ta'nz ree bèn gac perdon ya?

Badxi' Jesús laan rëbaman:

24 —Gol been nagueijn din chu'di niz ro' port nadëe, din naj rni lëjt, zien ree bën rën chu', per ad zile't chu' reeman. 25 Din chi chisu bën naj lidxan gusiaawaman ro' port guin, lëjt guial yaya'ndi xchu, gucaadi ro' port guin guiëbidi: “Dad, guxhal.” Per yadxi'man xtiidxidi naman: “Ad ragbeetan ban zadi.” 26 Dxel suloj guiëbidi: “Tijbzi badaaw ree, tijbzi badü' ree, niz lad dux nejzan balüül dunujn.” 27 Per naman lojdi: “Ma rnin, ad ragbeetan ban guzadi. Gol biquied lon bëndol.” 28 Ni goondi gaw tëe layidi chi guguaadi Abraham, Isaac, Jacob, në gra ree bën badëe xtiidx Dios loj ree bejn, za' reeman lod rniabee Dios, guiáad lëjt yariicadi. 29 Din gui't ree bën sa gra lad guidiblagaa guidxliuj din cwe reeman gaw reeman lod rniabee Dios. 30 Abi' zien ree bën bigra yan, laa reeman gac bën yaløj nadxel. Guiáad ree bën naj bën yaløj yan, laa reeman gac bën bigra.

Roon Jesús por Jerusalén
(Mt. 23:37-39)

31 Hor guin gajc bidxin tio'p choon ree bënfarisew, abi' rëb reeman loj Jesús: —Baguiaj, baza niz guie, ðin rën rey Herodes gugüjtaman lüj.

32 Badxi' Jesús laan rëbaman:

—Gol chej gol chiguiedx loj bën rusquiee zii: “Yan, në guixie yabën xindxab yayün tëen bënragxuu ree, abi' widx gulooxan.” 33 Per naj rayal gusnuu da nejzan yan në guixie në widx, din ad najt guial guiet tijb bën rudëe xtiidx Dios loj ree bejn luguiedx ren bal id najn Jerusalén.

34 ‘iBén Jerusalén, bën Jerusalén, rugüjtidi bën rudëe ree xtiidx Dios loj ree bejn rucaaguaiaj tëedi gra ree bën rxhiaal Dios lojdi! iBëlczí volt guyënan nuchagan lasa'di zi'c rüjn tijb guid ruchajg lasa' ree xi'nb lën xhiilib, per ad cwëjbtidi! 35 Zianan zeel yaya'n ladxidi zi'c tijb guiedx lod achut zøjb. Abi' rnin lëjt, diizd yan ad zuguaatrudi naj xt chi guidxin dxej guiëbidi: “iNünjle' Dios bën zëed por laaman!”

14

Rayüjn Jesús tijb bën rzaaguuj

1 Tijb dxej raziiladx ree bejn wej Jesús bitawaman lidx tijb bënfarisew rniabee. Yu' ree bënfarisew guin cula'ch laaman xhie güünman, 2 guial za' tijb xinragxuu lojman rzaaguujx. 3 Dxel gunabdiidx Jesús loj ree mextr rajc ley në loj ree bënfarisew guin, rëbaman:

—iZajc yayüjn bejn bënragxuu dxej raziiladx ree bejn ya o ad zajctan?

4 Per laa reeman achetçzi rëb reeman. Dxel gunaaz Jesús xinragxuu guin bayüjnman laax, abi' rëbaman lojx din yaguaiajx. 5 Dxel rëbaman loj ree bënfarisew guin:

—iBal tijb xburidi o tijb xgo'ndi yab lën tijb bizë, nid zabëedi laab ya, majsi naj dxej raziiladx bejn?

6 Abi' achet gojc nadxi' reeman.

Bën rej ree loj guialruxhliaa

7 Chi baguiaa Jesús rbe ree biooz luar lod rbej ree bën mazri zøjbloj, rëbaman loj reeman:

8 —Bal chu guiniee lüj chel loj tijb guialruxhliaa, ad cwel luar rbej ree bën mazri zøjbloj. Din zajc guidxin zatijb biooz mazri zøjbloj guial lojl, 9 abi' gui't bën gunee gropidi naman lojl: “Badëed lod zøjbil cwe bën guie.” Dxel rayal chel guidib ratul chisobil loj yagxhil bigra. 10 Zeel chi guiniee reeman lüj,

zagdxeli bisob loj yagxhil bigra, din chi gui't bèn gunee lüğ naman lojl: “Miw, badèd loj tijb luar mazri zojbloy.” Zian, gra ree bèn zojbnèl xan mex guza't lüğ zagdxè. ¹¹ Din bèn rlies xvalor gajc, yaya'nxtuman. Guiáad bèn rüğn naya zajs xvaloraman.

¹² Dxel rëb Jesús loj bèn gunee laaman:

—Bal goc cu'l guialraw, ad guinee xmiwil, ni'qui lasa'l, ni'qui bijchil, ni'qui benrijcw zojbnèl gajxh. Din laa reeman yu' dxej guinee reeman lüğ, abi' zian yanee reeman ni gudaw reeman lidxil. ¹³ Zagdxeli naj, chi güünl tijb lanij, gunee bènprob ree, nè ree bèn ad nadaant yaa, nè ree bencoj con ree bénlutia'p. ¹⁴ Xiquilbaal bal güünl zian, din laa reeman ad zajct yanee ni badèèdil. Per chi guidxin dxej yaban ree bèn bazoob xtiidx Dios, Dios yaguijx laan lojl.

Xcwent bèn been tijb lanij

¹⁵ Chi biguiejn tijb bèn zojbnè Jesús xan mex ni rëbaman, rëbaman loj Jesús:

—iXiquilbaa ree bèn yayal gaw lod rniabee Dios!

¹⁶ Dxel rëb Jesús lojman:

—Tijb bejn badxe' guialraw par xche, abi' guneeman zien da't ree bejn.

¹⁷ Chi ma gojl hor gaw reeman xche, guxhaal xmojsaman din chex chiguedix loj ree bioox guin: “Gol guda din graczi ma najcchaaw.” ¹⁸ Per graczi reeman guzuloj caynab perdon. Bèn yaloj guin, rëbaman: “Yan gajczi guzin tijb guidxliuj, rayal chiquianan; been wen güjdx lojman din güünman naj perdon.” ¹⁹ Zatijbaman rëb: “Guzin gaay nejz go'n, yan chiguienan laa reeb prueb guidoondon rajc rüğn reeb dxiin ya; been wen güjdx lojman din güünman naj perdon.” ²⁰ Zatijbaman rëb: “Yan gajczi baxhlian zeel ad zile't guialan.” ²¹ Chi badxin mojs guin bagojn xpatronx gra ni rëb ree bèn guin, dád balenman, dxel rëbaman lojx: “Baquiejn wej niz galay ni, nè niz lad ree nejz, tanè gra ree bènprob nè ree bèn ad nadaant yaa, nè ree bencoj con ree bénlutia'p.” ²² Chi ma been mojs guin zian, dxel rëbix lojman: “Dad, ma benan ni nal, per sta yu' gajc luar lidxil.” ²³ Dxel rëbaman lojx: “Wej niz loj carreter nè niz loj ree nejz la's, been naguiejn ben ren ree din gui't reeman din cha lènü lidxan. ²⁴ Din naj rni lojdi, ni'czi tijb ree bèn gunen yaloj ad zajwt guialraw benchaawan par xche.”

Ni rayal güün ree bèn rën gac xbejn Jesús

²⁵ Dád zien ree bejn zinal Jesús; abi' badxi' lojman loj reeman rëbaman:

²⁶ —Bal chudi rën guidnal naj, rayal guiëndi naj mazri guial loj xdadidi, guial loj xniaadi, guial loj lacheelidi, nè guial loj xi'ndi, o bijchidi o bizandi, rayal tèè guiëndi naj mazri guial loj xguialnabandi, din bal id züğndi zian ad zajct gaquidi da bejnan. ²⁷ Bèn ad rënt sagdiaj guidnal tèëman naj, ad zajct gacaman da bejnan.

²⁸ Bal chu rën güün tijb yu narooob, ¿nid yalojxgaj cweman ya din cwëëman cwent zadaan xmiliaman ya din gulooxaman laan? ²⁹ Din bal sulojman xcimiantan abi' ad zulooxtaman laan, graczi ree bèn guguaa laan guze' laaman, ³⁰ guiëb reeman: “Guzuloj cayüğn bèn guin yu abi' ad gojct nulooxaman laan.”

³¹ O bal tijb rey güün wadjil contr zatiyb rey, ¿nid yalojxgaj cweman ya güünman xgab züğn chii mil xsuldadaman gan loj stijb rey zidnè gajl mil suldad ya? ³² Per bal naladxaman ad züğntaman gan loj rey guin, la'tgaj sta za' rey guin zijt, guixhiaalaman bèn chinè ree xrusonman din yaya'n reeman

diidx ad zut wadijl. ³³ Yan, ziangajc rnin lojdi, chutëez lëjt bal id zusa'n gra ni rajpidi din guidnalidi naj, ad zajct gaquidi da bejanan.

Bal id zajcni zëd naxij

(Mt. 5:13; Mr. 9:50)

³⁴ Dxel rëb Jesús:

—Ni zagdxe naj zëd. Per bal id zajcran naxij, çxhieza naag yayajcan naxij zatijb? ³⁵ Ad rüjntan sirv par luyuj ni'qui par loj abon, rzëëbzan. ¡bén rën ree gucaagdiajg, gol bacaagdiajg!

15

Xcwent xiil gunit

(Mt. 18:10-14)

¹ Gra ree bën ruquijx impuest në gra ree bëndol, bibig reeman lod za' Jesús din gucaagdiajg reeman ni rnieeman. ² Guiáad ree bënfarisew con ree mextr rajc ley rnieeguijdx reeman laaman, rëb reeman:

—Ruchajg bën guin bëndol ree rawnë tëëman laa reeman.

³ Dxel rëb Jesús loj reeman:

⁴ —Bal tijb bejn rajp tibgayuu xiil abi' rniyt tijbib, çnid rusa'nman zatajpagljchiinbitapib dajn ya abi' rigdiilaman xiil gunit guin xt lodzi radxejlaman laab? ⁵ Abi' chi radxejlaman laab rabaaman, rudxiibaman laab dxidyëjnman.

⁶ Dxel chi radxin lidxaman, ruto'p ree xmiwaman në ree bën zojbnëman gajxh abi' rëbaman loj reeman: “Gol babaa zi'c rabaan, din ma badxejlan da xiilan be gunit.” ⁷ Yan, rnin lëjt, ziangajc rabaanë Dios tijb bën rayüjn xgab por xtol guial loj tajpgajlchiinbitap benza'c ad ryaadxt yayüjn xgab por xtol.

Xcwent milia ni bizëëb

⁸ O bal tijb bëngunaa rajpaman chii milia plajt abi' rusëëbaman tijban, çnid ruze'caman guij ya ruloob tëëman lënü abi' raguiilaman laan zagdxe da't xt lodzi radxejlan? ⁹ Abi' chi radxejlaman laan, ruto'p ree xmiwaman në ree bën zojbnëman gajxh, abi' rëbaman loj reeman: “Gol babaa zi'c rabaan din ma badxejlan milia basëban.” ¹⁰ Yan, naj rni lojdi, ziangajc rabaan ree xianjl Dios por tijb bëndol rayüjn xgab por xtol.

Xcwent bën rüjn pardon xi'n

¹¹ Rëb tëë Jesús loj reeman:

—Tijb bejn yu' tio'p xi'nman. ¹² Abi' xin naj mazri xinguiag, rëb loj xdadix: “Dad, baneë ni rayal gaca'n.” Dxel badëëman ni rayal tijbgaj reex. ¹³ Ad gojct xchej ni cwa' reex ni rayal reex, xin naj xinguiag guin bato'gajquix graczi ni badëëd xdadix lojx, abi' con milia guin wejx zijt bignijt xlia'x graczi xmiliax guial beenx ni rëntzix. ¹⁴ Per chi ma banijtx gran, dxel guyu gubijn niz lod za'x abi' guzuloj biaadx ni gawix. ¹⁵ Dxel wejx bignabix dxiin loj tijb bën zojz yagaj, abi' guxhaalaman laax chigajpix cüch ree dajn. ¹⁶ Guial tant rliaanx xt guyënx nijwix ni raw ree cüch guin, per achut rudëë laan. ¹⁷ Dxel beenx xgab naladxix: “¡Zien ree xin rüjn dxiin lidx da Dadan xt sobr rüjn ni raw reex, guiáad naj guie ma guiëtan bëjz! ¹⁸ Yan, yazaan yaya' lidx da dadan din guiën lojman: Dad, ma benan dol loj Dios në lojl. ¹⁹ Ad rayaltri guinieel naj xi'n; been naj xcwent zi'c tijb ree xmojsil.” ²⁰ Dxel bayunejzix zia lidx xdadix.

²¹ Per zijtri ziaadix chi baguiaa xdadix laax dxel bayaman laax, zianz ruxüünman bigchaaglojman laax, abi' gudiidxaman laax gudaw tëëman laax xid. ²¹ Dxel rëbix lojman: “Dad, ma benan dol loj Dios në lojl, ad rayaltri guinieel naj xi'n.” ²² Per rëb xdadix loj ree xmojsaman: “Gol baquiejn gol

tanë lajd zagdxe, gol bascajcwixan, gol badxe' tijb guiibnil yaax gol baslëë tëex gurëch, ²³ gol chica' go'n mazri nadaan, gol bagüjtib din yadaaw ree yaguieen ree lanij. ²⁴ Din par naj ma güjt da xi'n'an abi' yan ma babanx, gunijtix abi' ma badxeljix." Dxel guzuloj cayüjn reeman lanij.

²⁵ La'tgaj xi'nman xingol guin cayüjnx dxiin dajn. Chi badxinx gajxh lidx xdadix, biguiejnx cucwejdx reeman cuya' tëë reeman. ²⁶ Dxel gurejdxix tijb xmojs xdadix, gunabdiidix xhienin cayajc lidxix. ²⁷ Badxi' mojs guinan rëbix: "Guial baguiaad bijchil zeel gunabee xdadil güjt tijb go'n mazri nadaan guial nadaanx baguiaadix." ²⁸ Per dád bidxe'ch xingol guin, abi' ad guyëntix nayux. Zeel wej xdadix biguiedxaman lojx din yayux. ²⁹ Dxel rëb loj xdadix: "Lüj ragbee ma gojc xchej cayünan xchiinl, zianczi ruzoban xtiidxil; per ni'czi tijb ad waneetil tijb dxidobëz din günnë' ree da miwan lanij. ³⁰ Guiáad yan baguiaad xi'n'l, xin ma bignijt xlia' mialial con ree béngunaa dxuudx, abi' gunabeel güjt go'n mazri nadaan par laax."

³¹ Dxel badxi' xdadix laan rëbaman: "Xi'n, zianczi za'l con naj, graczi ni ra'pan naj xieenl. ³² Per yan rayal yaguieen ree lanij yabaa tëë ree, din bijchil xin ma güjt par naj, ma babanx, gunijtix abi' ma badxeljix."

16

Xcwent tijb mojs rniabee ree mojs

¹ Rëb tëë Jesús loj ree xbejnman:

—Guyu tijb henrijcw, nuzujman tijb mojs guinia graczi ni rajpaman. Abi' biguiedx ree ben ren lojman guial cunijt xlia' mojs guin ni naj xieenman.

² Dxel gurejdxaman laax rëbaman lojx: "¿Xhie rën guiëb ni riguiejnan cayüjnl? Baneë cwent lon xcwent xchiinl, din achetri dxiin gunen lojl." ³ Dxel guzuloj beenx xgab gunaladxix: "¿Xhienaag günan yan ma gusa'n da patronan naj sin dxiin? Ad yu'tan gojl günan dxiin dajn, ratu tëen ganaaban carda. ⁴ Ma ragbeen xhienaag günan din guiën ree bejn naj chi ad züntran dxiin." ⁵ Dxel gurejdxix tijb gaj ree bën ral loj xpatronx, rëbix loj bën bidxin yaloj: "¿Plac ralil loj da patronan?" ⁶ Abi' rëbaman: "Ralan tibgayuu barril sejt lojman." Dxel rëbix: "Cwa' gui'ch guie lod ca ni ralil lojman, been zatijban bacaa lojn ralil tü'pchiian." ⁷ Dxel gunabdiidix loj zatijbaman rëbix: "Laadx lüj, ¿plac ralil?" Abi' rëbaman: "Tib gayuu ingujch trigo." Zianz rëbix: "Cwa' gui'ch guie lod ca ni ralil lojman, been zatijban bacaa lojn ralil tajpgajlan." ⁸ Dád badxalój patron guin guial nasin mojs mal guin por ni beenx. Din mazri nasin ree bën ad zinalt xnejz Dios con lasa' reeman guial loj ree bën zinalt xnejz Dios.

⁹ Rnin lojdi, gol beennë dxiin ni rajpidi loj guidxliuj guie par gagnëdi bejn din chu' xmiwidi, din chi yaran ma yu' bën yaca' lëjt lod gapidi guialnaban tiblayaa.

¹⁰ Bal chu rüjn zi'c rayal con ta'n ni rudëed bejn lojman, züjnman zi'c rayal con zro'n. Ziangajc bën ad rüjnt zi'c rayal con ta'n ni rudëed bejn lojman, ad züjn gajctaman zi'c rayal con zro'n. ¹¹ Yan, ziangajc bal id züjndi zi'c rayal con ni za'c yu' loj guidxliuj guie, ¿chu gap lëjt confianz con guialnaza'c yu' xanyabaa? ¹² Bal id züjndi zi'c rayal con ni ad najt xieendi, ¿chu gunee lëjt ni rayalidi?

¹³ Ni'qui tijb mojs ad zajct güünx sirv loj tio'p patron; din zadxe'chix tijbaman abi' zënx zatijbaman; o zajquix xinza'c con tijbaman abi' züjnx tiblad zatijbaman. Zeel ad zajct güündi sirv loj Dios, në loj milia.

¹⁴ Abi' ree bénfarisew guial mazri rën reeman milia, chi bigueijn reeman ni rëb Jesús guzuloj cuze' reeman laaman. ¹⁵ Dxel rëb Jesús loj reeman:

—Rüjndi benza'c niz loj ree bejn, per Dios nünbee luxdoodi; abi' majsi loj bejn lasajc da'tidi, per loj Dios achet lasajquidi.

Xley Moisejs con xguialrniabee Dios

¹⁶ Xley Moisejs në ni bacaa ree bën badëe xtiidx Dios loj ree bejn, naga'loj been reen dxiin xt chi bi't Waj bën baroobnijs bejn ree. Abi' diizd nadxel guzuloj rire'ch xtiidxza'c Dios xhienaag naj xguialrniabeeman, abi' zien ree bejn rüjn naguiejn chu' loj xguialrniabeeman.

¹⁷ Adli nawëëgt nit xanyabaa në guidxliuj, guial yaya'n tijb diidx zëed loj ley guin guial ad zajctan cumplid.

Rulüü Jesús xcwent guial rala' lasa'

(Mt. 19:1-12; Mr. 10:1-12)

¹⁸ Bal tijb xinguaaw rala' lacheelix abi' rtia'x ben ren, dolan cayüjnx. Ziangajc xin rtia' tijb béngunaa bala' lacheel, dolan cayüjnx.

Xinrijcw con Lazr

¹⁹ Basnuu Jesús, rëbaman:

—Guyu tijb xinrijcw, guzujchaawix con ganaxczi lajd zagdx, abi' guixie guixieci rüjnx lanijro'. ²⁰ Guyu tëë tijb xinprob brii lajx Lazr, rbejx ro' xport xinrijcw guin abi' guidiblagaa ca guiadx. ²¹ Rën nejzdoo Lazr guin gawix ni riyaj xan xmex xinrijcw guin. Abi' xt ree bë'cw rbig rlie' reeb loj ree guiadx ni cax.

²² Chi bidxin dxej güjt Lazr dxel bigné ree xianjl Dios laax lod naj nix da't, lod za' Abraham. Në xin rijcw guin güjt, abi' biguie'chix. ²³ Chi ma cazagdiaj xin rijcw guin gabijl, gules lojx abi' zijtri baguiaax za' Lazr cwë' Abraham.

²⁴ Dxel gurixdiajx rëbix: “Dad Abraham, baya naj, guxhaal Lazr din gugajdx lupunt xbacwënx din gui'tix yasiaalyujx lüdxan, din dád cazaagdiajn loj bajl guie.” ²⁵ Per badxi' Abraham xtiidxix rëbaman: “Xi'n, basaaladx guial dád nix guyu luxdool chi gubanl loj guidxliuj, guiáad Lazr dád naya gubajnx. Yan, rayalix lod yabaax guiáad lüj rayalil lod sagdiajl. ²⁶ Nëtëë yan bën za' ree guie ad zajct tëd reeman yagaj, ni'qui ree bën za' yagaj ad zajct tëd reeman guie, din za' bala'ro' du galay ree.”

²⁷ Dxel rëb xinrijcw guin lojman: “Rniaaban lojl dad, been wen guxhaal Lazr lidx da dadan, ²⁸ lod zojb gaay ree da bichan din chicojnx laa reex chitëë në laa reex gui't luar guie, lod yu' zro' casti.” ²⁹ Per rëb Abraham lojx: “Ma rajp reex gui'ch ni bacaa Moisejs con ree bën badëe xtiidx Dios loj ree bejn, laan rayal guidxga' reex.” ³⁰ Abi' rëb xinrijcw guin: “Walil, dad Abraham, per ad zaliladxt reex, sa'n bal yaban tijb bën ma güjt chigneenëman laa reex, zayüjn reex xgab por xtol reex.” ³¹ Per rëb Abraham lojx: “Bal id ridxga' reex xtiidx Moisejs në xtiidx ree bën badëe xtiidx Dios loj ree bejn, ad zaliladxt reex majsi yaban tijb bën ma güjt.”

17

Bën ruzaalguiiw bejn din güünman dol

(Mt. 18:6-7, 21-22; Mr. 9:42)

¹ Rëb Jesús loj ree xbejnman:

—Zianczi yu' ree ni ruzaalguiiw bejn din güünman dol, per i'proba naj bën ruzaalguiiw zatijb bejn guial güünman dol! ² Par laaman zagdxeli naj guixhii reeman tijb guiaj mulin yëjnman din guzaal reeman laaman loj nijsdoo, luar

guzaalguiiwaman tijb b́en qui rliladxri naj din güünman dol. ³ ¡Gol gojp cudad!

'Bal xhie tijb ni mal güün tijb lasa'l, guneenëman. Abi' bal bayüjnman xgab por ni beenman, beenman perdon. ⁴ Majsí gajdx volt loj tibdxej güünman xhienin contr lüj, abi' bal gui'taman lojl gajdx volt naman: "Been naj perdon ad züntran zian", rayal güünl laaman perdon.

Guialrniabee në guialrliladx

⁵ Dxel rëb ree xi apóstoles Jesús lojman:

—Banee dunujn mazri guialrliladx.

⁶ Abi' rëb Jesús loj reeman:

—Bal naj xguialrliladxidi majsí zi'czi naj xhaj moxtajs, zile' guiëbidi loj yagro' guin: "Bia'xh guie, bisob loj nijsdoo", zuzooban xtüidxidi.

Ni rayal güün tijb mojs

⁷ 'Bal tijb lëjt rajp tijb mojs, abi' chi yaguaad mojs guin bigla'x yuj o bigajpix begui'xh ree ya, ¿wen zëjbidi lojx ya: "Guyu, gurej din gawil"? ⁸ Ad zëjbtidi zian, guiëblidi: "Bachaa xabil, been ni gawan, guda'n. Chi lox gawan guië' tēen dxel ma zajc gawil guië' tēél." ⁹ Abi' wed ni'qui quixtēē ad zudëetidi lojx din cayüjnzi x ni rayal güünx. ¹⁰ Ziangajc lëjt chi loox güündi gra ni gunabee Dios dxel guiëbidi: "Nayajcan mojs ni ad rüjnt sirv, din baguieenzan ni rayal yaguieenan."

Rayüjn Jesús chii ree b́en rajc guialguijdx la lepra

¹¹ Chi ma cadxin Jesús Jerusalén, gudëdaman guiedx riga' ree niz Samaria në niz Galilea. ¹² Abi' chi cayuman tijb luguiedx dobëz, bigchaagloj chii ree b́en rajc guialguijdx la lepra laaman. Per zijt guzuj reeman, ¹³ rbixdiaj reeman, rëb reeman:

—¡Jesús, Mextr, baya dunujn!

¹⁴ Chi baguiaa Jesús laa reeman, rëbaman loj reeman:

—Gol chej loj ree bixhioz din guguaaa reeman lëjt.

Abi' la'tgaj zë reeman, baya xcuerp reeman guialguijdx ni rajc reeman.

¹⁵ Dxel tijbaman chi gogbeeman ma bayajcaman, bayejcaman, rbixdiajman rudëëman quixtëē loj Dios. ¹⁶ Abi' bazuxibaman loj Jesús, basajb lojman xt luyuj persi badëëman quixtëē lojman. Abi' najman b́en Samaria. ¹⁷ Dxel rëb Jesús:

—¿Nid chii naj ree b́en bayajc ya? ¿Con zagaa reeman? ¹⁸ ¿Tijbzi benzit guie bayejc ya rudëëman quixtëē loj Dios?

¹⁹ Dxel rëbaman loj b́en guin:

—Bisu. Baguij, ma bayajquil guial bililadxil naj.

Xhienaag gui't xguialrniabee Dios

(Mt. 24:23-28, 36-41)

²⁰ Gunabdiidx ree b́enfarisew loj Jesús goc gui't xguialrniabee Dios, abi' rëbaman:

—Xguialrniabee Dios ad najtan ni guguaaa bejn. ²¹ Abi' achut guiëb: "Laan za' guie", o "Laan za' ni" ya, din xguialrniabee Dios mal za'n galaydi.

²² Dxel rëbaman loj ree xbejnman:

—Zadxin dxej guiëndi guguaadi Bén guxhaal Dios majsí tibdxejzi, per ad zuguaatidi laaman. ²³ Abi' yu' reeman na lëjt: "Laaman za' guie", o "Laaman za' ni" ya, ad bal chinalidi laa reeman. ²⁴ Din zi'c chi rë'p nijs rulaan bacha' guidib xanyabaa, zian gac chi gui't Bén guxhaal Dios loj guidxliuj. ²⁵ Per yalojxgaj sagdiajman abi' ad zënt ree b́en riga' yan laaman. ²⁶ Zi'c goc gulal

chi guban Noé, zian gac chi gui't Bén guxhaal Dios. ²⁷ Din nadxel gudaw ree bejn, gu' reeman, baxhliaa reeman badëë tëë xi'n reeman baxhliaa xt chi bidxin dxej guyu Noé lën barcwro' ni beenman, abi' guzuloj guiadoxh ni bagüjt gra reeman. ²⁸ Ziangajc gojc chi guban bén brii laj Lot, gudaw ree bejn, gu' reeman, bato' reeman, guzii reeman, guxübin reeman been tëë reeman yu ree. ²⁹ Per chi brii Lot luguiedx Sodoma, guzuloj biyajb guij xanyabaa në azufre, abi' güjt gra reeman. ³⁰ Ziangajc gac dxej ni gui't Bén guxhaal Dios.

³¹ Dxej ni gac zian, bén yë'p guijc yu ad zaguiajttaman chiglëë ni nagu'man lënü. Abi' bén za' dajn, ad zayejct lidxaman. ³² Gol basaaladx ni guzac lacheel bén brii laj Lot. ³³ Bén mazri rën guialnaban rajpaman loj guidxliuj guie, zadxin dxej gunijtaman laan, per bén guiët por naj, zajpaman guialnaban tiblyyaa con Dios.

³⁴ Naj rni lëjt, guxhinzii lod naga' tio'p bejn tijbzi loj loon, tijbaman sa zatijbaman yaya'n. ³⁵ Guiáad lod cayojt tio'p ree béngunaa, tijbaman sa zatijbaman yaya'n. ³⁶ Abi' lod za' tio'p ree xinguaaw dajn, tijbix sa zatijbix yaya'n.

³⁷ Chi biguiejn ree xbejnman zian, rëb reeman:

—¿Ban guin, Dad?

Badxi'man laan rëbaman:

—Laa guiguien gajc ban guinan, zi'c chi rado'p ree golbich laa rguien gajc naga' tijb begüt.

18

Xcwent tijb béngunaa bizëjb në tijb juejs

¹ Be Jesús tijb cwent loj ree xbejnman, persi balüüman laa reeman guial zianczi rayal cwedx guiniab reeman Dios ad zadxagtczi reeman. ² Abi' rëbaman loj reeman:

—Guyu tijb guiedx lod guyu tijb juejs, ad rdxebtaman Dios ad ridxga' tëtaman bejn ree. ³ Luguiedx ziigajc zojb tijb béngunaa bizëjb, rniabaman loj juejs guin dín güünman guialguxtis gagnëman laaman loj bén rdxe'ch laaman.

⁴ Xchej ad bidxga't juejs guin béngunaa bizëjb guin, per zianz laagajcaman been xgab naladxaman: “Majsi ad rdxebtan Dios ad ridxga' tëtan bejn ree, ⁵ per béngunaa guie ad rucwëëzt ruslenman naj. Zagdxeli naj günan laaman yudar chitëë ri'traman naga gad da pacensan chigra.”

⁶ Dxel rëb Jesús loj reeman:

—Zian gunee juejs mal guin. ⁷ Diidxgui Dios, ¿nid zagnëman bén guleman ya bén rbejdx rniab ree laaman dxej guiala? ¿Wen zaglaa gagnëman laa reeman ya? ⁸ Naj rni lëjt guial ad zaglaat gagnëman laa reeman. Per chi gui't Bén guxhaal Dios, ¿chuj ni zadxaaglojraman bén rliladx Dios loj guidxliuj ya?

Xcwent bénfarisew con bén ruquijx impuest

⁹ Be Jesús zatijb cwent par ree bén naladx tijbzi laa reeman naj benza'c guial loj ree ben ren, rëbaman:

¹⁰ —Tio'p ree xinguaaw wej lën yadooro' Jerusalén persi gurejdx gunab reex Dios, tijbix naj xinfarisew, zatijbix naj xin ruquijx impuest. ¹¹ Xin farisew guin, za'lix cabejdx canabix Dios, rëbix: “Quixtëë runen lojl, Dad, guial ad najtan zi'c ree ben ren, naj reeman béngubaan, benmal, bén za'në béngunaa ren, ni'qui zi'c naj bén ruquijx impuest guin. ¹² Rba'nán tio'p volt lën xuman, abi' gra ni rünan gan rünanan chii lala' persi runen tijban lojl.” ¹³ Per xin ruquijx impuest guin, zijt za'x abi' ni'quid rayaxtix guilies lojx,

rga'p luxdoox rëbgajx: “iDios, baya naj najn tijb xindoll!” ¹⁴ Naj rni lëjt guial xin ruquijx impuest guin ma been Dios laax perdon chi bayejc lidxix, per xin farisew guin ad beentaman laax perdon. Din bën rlies xvalor gajc achet lasajcaman loj Dios, guiáad bën rüjn naya laaman mazri lasajc loj Dios.

Rüjnle' Jesús xindoo ree

(Mt. 19:13-15; Mr. 10:13-16)

¹⁵ Binë ree bejn xindoo ree lod za' Jesús din gudxiib yaaman guijc reex, per chi baguiaa ree xbejnman guzuloj cadilë reeman bën zinë ree laa reex. ¹⁶ Per gurejdx Jesús laa reeman, rëbaman loj reeman:

—Gol badëë mod gui't reeb lon, ad bal rudxoondi, din lod rniabee Dios naj par ree bën naj zi'c laa reex. ¹⁷ Din naj rni lëjt, bën ad rlladxt xguialrniabee Dios zi'c tijb xindoo, ad zile't chu'man loj xguialrniabee Dios.

Xcwent tijb xin rijcw

(Mt. 19:16-30; Mr. 10:17-31)

¹⁸ Tijb xin rniabee, gunabdiidx loj Jesús rëbix:

—Mextrza'c, çxhie rayal günan din ga'pan guialnaban tiblyaa con Dios?

¹⁹ Badxi' Jesús laan, rëbaman:

—çChexc zeel nal lon benza'c? Achut naj benza'c, tijbzi Dios. ²⁰ Lüy rajc ree mandamient: “Ad sunël bëngunaa ren, ad gugüjtil bejn, ad cwanl, ad cwëël xtiidx bejn, gojp respejt xdad xnial.”

²¹ Dxel rëbix loj Jesús:

—Gra ree ni guin cayünan diizd xindoon.

²² Chi bigueijn Jesús zian, rëbaman:

—Yu' zatijb ni ryaadx güünl: bigto' gra ni rajpil dxel gudëël milia guin loj ree bënprob. Zian gapil guialnaza'c xanyabaa, dxel gui'til guidnalil naj.

²³ Chi bigueijn xin guin zian, dád guyunayax guial dád xinrijcwan. ²⁴ Chi baguiaa Jesús guial dád yu'nayax, rëbaman:

—iDád nawëëg naj chu' benrijcw loj xguialrniabee Dios! ²⁵ Adli nawëëgt téd tijb camell xan gagux, guial chu' tijb bën rijcw loj xguialrniabee Dios.

²⁶ Abi' ree bën bigueijn ni rëb Jesús, rëb reeman:

—çChu za zajc laa loj xcasti Dios?

²⁷ Dxel rëbaman loj reeman:

—Yu' ni ad zajct güün bënguidxliuj, per Dios graczan zajc güünman.

²⁸ Dxel rëb Bëd lojman:

—Dad, ma basa'nan graczi ni raya'pan persi zudnaalan lüy.

²⁹ Zianz rëb Jesús:

—Diidxliczi rnin lojdi, chutëëz bën rusa'n lidx, lacheel, bijch, o xdad, o xnial, o xi'n guial rüjnman zi'c rniabee Dios, ³⁰ mazri zien ni tia'man loj guidxliuj guie. Abi' zajpaman guialnaban tiblyaa con Dios.

Rugojn Jesús zatijb guial guiëtaman

(Mt. 20:17-19; Mr. 10:32-34)

³¹ Gurejdx Jesús guidxiptio'p ree xbejnman tiblax, abi' rëbaman loj reeman:

—Yan, ziyo' ree Jerusalën lod gac zi'c bacaa ree bën badëë xtiidx Dios loj ree bejn xcwent Bën guxhaal Dios. ³² Yayü reeman laaman loj ree benzit, guze' reeman laaman, guiniee reeman laaman ni rëntzi reeman, abi' gucojp xhiejn reeman lojman. ³³ Quin reeman laaman dxel gugüjt reeman laaman, per ni yayan dxej yabanman.

³⁴ Per laa reeman ad bignia'tczi reeman ni rëbaman, ad ragbee tëët reeman chexc zeel rëbaman zian din ad bile't nignia' reeman xhie rën guiëb ni guneeman.

Rayajc guiaaloy tijb bénlutia'p
(Mt. 20:29-34; Mr. 10:46-52)

³⁵ Chi ma cadxin Jesús gajxh guiedx Jericó, tijb bénlutia'p, zojbaman cwë' nejz rniabaman carda. ³⁶ Chi gogbeeman cadëd zien ree bejn, gunabdiidxaman xhie cayajc. ³⁷ Abi' rëb reeman lojman guial Jesús bën Nazaret cadëd niz yagaj. ³⁸ Dxel gurixdiajman rëbaman:

—jJesús, xdiaa Davi, baya naj!

³⁹ Bén ned ree rdilë reeman laaman din gucwëëz ro'man, per mazri rbixdiajman, rëbaman:

—jXdiaa Davi, baya naj!

⁴⁰ Dxel guzudxe Jesús abi' gunabeeman bica' reeman laaman. Chi bidxinman gajxh lojman, gunabdiidxaman lojman, rëbaman:

⁴¹ —¿Xhie rënl gūnan por lūj?

Badxi'man laan rëbaman:

—Dad, rënan yani lon.

⁴² Dxel rëb Jesús lojman:

—jMa zile' guguaal! Ma bayajquil guial bililadxil naj.

⁴³ Hor guin gajc bani loj bën guin, abi' binalaman Jesús rudëëman quixtëë loj Dios. Në gra ree bën baguiaa ni goc rudëë quixtëë loj Dios.

19

Wej Jesús lidx Zaqueo

¹ Guyu Jesús luguiedx Jericó abi' guzuloj cadëdaman luguiedx guin. ² Yagaj zojb tijb benrijcw laman Zaqueo. Laaman rniabee ree bën ruquijx impuest.

³ Rën Zaqueo guin güünbeeman Jesús, per ad rilet' guguaaman laaman guial dád zien ree bejn abi' laaman najman bendop. ⁴ Zeel ruxüünman gunedaman, abi' din chile' guguaaman Jesús, wë'paman loj tijb yagro' zojb gajxh lod tëd Jesús. ⁵ Chi gudëd Jesús yagaj, gules lojman abi' rëbaman lojman: —Zaqueo, cari baguiajt, din yandxej naj yaya'nan lidxil.

⁶ Dxel cari da't baguiajt Zaqueo, abi' dád rabaaman zignëman Jesús. ⁷ Chi baguiaa ree bejn zian, gra reeman guzuloj caneeguijdx Jesús rëb reeman zigya'nman lidx tijb bëndol. ⁸ Dxel guzuli Zaqueo, abi' rëbaman loj Jesús:

—Dad, gagui's garol ni ra'pan loj ree bënprob. Abi' bal yu' bën baquijxan mazri guial loj ni naj quixaman, yayünan tajp volt mazri guial loj ni gulaanan.

⁹ Dxel rëb Jesús lojman:

—Yandxej ma been Dios perdon gra ree bën zojb lidx Zaqueo guial rliladxaman Dios zi'cgajc Abraham. ¹⁰ Din Bén guxhaal Dios zëëdaman zidgadiilaman bën ad zët ree loj xnejz Dios din laa reeman loj xcasti Dios.

Xcwent milia

¹¹ Bén cucaagdiajg ree ni canee Jesús, beman tijb cwent loj reeman guial ma zë reeman gajxh Jerusalén abi' laa reeman naladx reeman guial hor guin guidxin xguialrniabee Dios. ¹² Dxel rëbaman loj reeman:

—Guyu tijb bejn, zëëdaman loj tijb famil zojbloj. Zëman zijt lod tia'man guialrniabee din gacaman rey dxel yayejcaman nabee ladxaman. ¹³ Chi gadaman grii gurejdxaman chii xmojsaman abi' loj tijbgaj reex badëëman

zro' milia, zianz rëbaman loj reex: “Gol beennë milia guin dxiin xt chi guidxin dxej yagualan.” ¹⁴ Per ree bën ladxaman guial rdxe'ch reeman laaman, guxhaal reeman tibcwaa ree bën zinal laaman persi biguiedx reeman guial ad rënt reeman gac bën guin xrey reeman. ¹⁵ Per laaman bazuj reeman gacaman rey, abi' bayej ladxaman. Chi badxinman dxel gunabeeman bignee reeman mojs badëëman milia guin din gagbeeman plac ma been tijbgaj reex gan. ¹⁶ Mojs bidxin yaloj rëbix: “Dad, milia ni baneel ma beenan gan chii volt mazri.” ¹⁷ Dxel rëb rey guin lojx: “Zagdxen mojsza'c, ma beenl zi'c rayal. Abi' guial beenl zi'c rayal con ta'nzi ni banen, yan guzun lüj nabeel chii guiedx.” ¹⁸ Chi bidxin mojs barojp guin, rëbix: “Dad, milia ni baneel lon ma beenan gan gaay volt mazri.” ¹⁹ Ziangajc rëb rey guin loj mojs guin: “Lüj nabee gaay guiedx.” ²⁰ Dxel bidxin zatijb mojs guin abi' rëbix: “Dad, laa xmilial guie, badxe'chaawanan lën tijb baydoo, ²¹ din bidxeban lüj guial ad rayatil bejn. Raca'l ni ad najt xieenl abi' rato'pil gualnaza'c lod ad guxübintil.” ²² Dxel rëb rey guin: “Mojs guiidx por xtiidxgajquil rayalil casti. Bal ragbeel guial ad rayatan bejn, abi' raca'n ni ad najt da xieenan ratop tëen gualnaza'c lod ad guxübintan. ²³ ¿Chexc ad badëëtäl da milian nigui'n bejn din chi nagualan naca'nan con guidib xi'nan?” ²⁴ Dxel rëb rey guin loj ree bën za' yagaj: “Gol baca' milia zii lojx, gol badëëdan loj xin ca' mazran.” ²⁵ Abi' rëb reeman loj rey guin: “Dad, per ma ca'x zro'n.” ²⁶ Badxi'man laan rëbaman: “Bën rajp zro', zaca'man mazri, per bën rajp ta'nzi, xt ta'n ni rajpaman chiquied lojman. ²⁷ Abi' ree bën rdxe'ch naj bën ad guyënt ree niajcan rey, gol tanë reeman guie, gol bagüjt reeman lon.”

Ru Jesús Jerusalén

(Mt. 21:1-11; Mr. 11:1-11; Jn. 12 :12-19)

²⁸ Chi gulox rëb Jesús zian, dxel basnuu zëman Jerusalén. ²⁹ Chi bidxinman gajxh guiedx Betfagë con Betania, në gajxh guia' la Olivos, dxel guxhaal tio'p ree xbejnman, ³⁰ rëbaman loj reeman:

—Gol chej guiedxdo riga' guin, chi guidxindi guidxaaglojdi tijb burquie'n, caduub, achut wabib laab. Gol guxhiequib gol tanëb. ³¹ Abi' bal chu guiniabdiidx lojdi chexc zeel rxhiequidi laab, gol güjdx Dad Jesús cayaadx laab.

³² Wej ree bën guxhaalaman bidxaagloj gajc reeman zi'cgajczi rëb Jesús loj reeman. ³³ Abi' chi caxhiee reeman bur guin, gunabdiidx ree bën naj xbur laab, rëb reeman:

—¿Chexc zeel caxhiequidi bur guin?

³⁴ Badxi' reeman laan, rëb reeman:

—Din Dad Jesús cayaadx laab.

³⁵ Dxel binë reeman bur guin lod za' Jesús, zianz badxiib xab reeman xijchib abi' been reeman laaman yudar persi gudxibaman laab. ³⁶ Abi' ree bejn rguijxh xab reeman lunejz lod zë Jesús. ³⁷ Chi ma zë reeman gajxh laguiajt ni naj guia' la Olivos, gra ree bën zinal Jesús guzulob rbiidxiaj reeman guial dád rabaa reeman abi' ruza't reeman Dios zagdxë por gra ree milagr ni ma baguiaa reeman. ³⁸ Rëb reeman:

—¡Nünjle! Dios bën zëëd por laaman! ¡Yu' gualrabaa xanyabaa! ¡Benza'c bendxoon naj Dios bën yu' xanyabaa!

³⁹ Dxel ree bënfarisew no'ch loj ree bën zinal laaman, rëb reeman lojman:

—Mextr; gudilë ree bën guin chitëe rniece reeman zian.

⁴⁰ Per badxi'man laan rëbaman:

—Naj rni lëjt, bal yacwëez ro' reeman, guiaj ree cwixdiaj zian.

⁴¹ Chi bidxinman gajxh Jerusalén, dxel baguiaaman guiedx guin, zianz biinman por laan. ⁴² Rëbaman:

—jBén Jerusalén, xi nix majsi yandxejzi yayagbeedi chu yabe'cdxe luxdoodi! Per yan naguie'ch najn par lëjt, ad zile't chignia'di laan. ⁴³ Din guidxin dxej ni güün ree bén rdx'e'ch lëjt tijb ze' gadë ladxidi, abi' gra lad gusiaaw reeman lëjt, ⁴⁴ gugüjt reeman lëjt. Dxel gunijt reeman ladxidi, ni'qui tijb guiaj ad zaya'nt guijc stijb guiaj, din ad bidxga'tidi hor ni bidgana' Dios lëjt.

Rabëë Jesús bén ruto' ree ro' yadooro' Jerusalén
(Mt. 21:12-17; Mr. 11:15-19; Jn.2 :13-22)

⁴⁵ Chi bidxin Jesús ro' yadooro' Jerusalén, guzuloj caybëëman bén cuto' ree në ree bén cazii, ⁴⁶ rëbaman loj reeman:

—Loj xtiidx Dios rëb: “Lidxan naj yu lod rbejdx rniab bejn Dios.” Per lëjt nüjndan zi'c lidx ree xingubaan.

⁴⁷ Guixie guixie rulüü Jesús bejn ree lën yadooro' Jerusalén, per ree bixhioz rniabee ree bixhioz con ree mextr rajc ley, në ree guxtis luguedx guin raguiil reeman mod din gugüjt reeman laaman. ⁴⁸ Per ad radxejlt xhienaag güün reeman, din graczi ree bejn rucaagdiaj chaaw ni rulüüman laa reeman.

20

Xguialrniabee Jesús
(Mt. 21:23-27; Mr. 11:27-33)

¹ Lën ree dxej ni za' Jesús lën yadooro' Jerusalén, culüüman bejn ree xtiidx Dios, bidxin ree bixhioz rniabee ree bixhioz, con ree mextr rajc ley, në ree guxtis Israel, ² abi' rëb reeman lojman:

—Guna, ¿chu na güün ni guin ree? ¿Chu banee guialrniabee lojl?

³ Badxi' Jesús laan, rëbaman:

—Ziangajc naj yu' tijb ni ganabdiidxan lojdi. Gol badxi'n: ⁴ ¿chu guxhaal Waj bidgaroobnijsaman bejn ree, Dios ya o bénguidxliuj?

⁵ Dxel guzuloj rëb loj lasa' reeman:

—Bal yaguie'ch ree Dios guxhaal laaman, zanaman. “¿Chexquiza zeel ad bililadxtidi laaman?” ⁶ Abi'za bal yaguie'ch ree bénguidxliuj guxhaal laaman, zugüjt ree bejn dunuj ree con guiaj din gra reeman riladx guial Waj gojc bén badëë xtiidx Dios loj ree bejn.

⁷ Abi' badxi' reeman laan rëb reeman guial ad ragbeet reeman chu guxhaal Waj bidgaroobnijsaman bejn ree. ⁸ Dxel rëb Jesús loj reeman:

—Ni'qui naj ad zanitan lojdi chu banee guialrniabee günan ni guin ree.

Xcwent ree mojs guijdx
(Mt. 21:33-44; Mr. 12:1-11)

⁹ Dxel guzuloj cayü Jesús tijb cwent loj ree bejn, rëbaman:

—Guyu tijb bejn guxübinman uv ree loj xguiniaaman, dxel badëëman laan garol loj ree bén güün dxiin lojn, zëtaman zijt. ¹⁰ Chi bidxin dxej yala' reeman uv guin, guxhaalaman tijb xmojsaman chigxiix ni rayalaman, per ree bén rüjn dxiin loj guiniaa guin gudijn reeman mojs guin abi' badxi' reeman laax zezi. ¹¹ Dxel guxhaalaman mojs ren, per nëgajc mojs guin gunee reeman ni rëntzi reeman, gudijn reeman laax abi' badxi' reeman laax zezi. ¹² Zianz guxhaalaman zatijbix, per gudiilguijdx reeman laax abi' babëë reeman laax loj guiniaa guin.

13 'Dxel rëb bën naj xguidxliuj laan: "¿Xhienaag gūnan yan? Gaxhal da xi'nan xin rën da'tan, wed zajp reeman laax respejt." 14 Per chi baguiaa ree bën guin laax, rëb loj lasa' reeman: "Xin guinan naj xin yaya'nnë guidxliuj guin. Yagüjt reex din gacan du xieen ree." 15 Dxel babëë reeman laax loj guidxliuj guin, bagüjt reeman laax.

Zianz gunabdiidx Jesús loj ree bën caneenëman, rëbaman:

—Yan, ¿xhie naladxidi günnë bën naj xguidxliuj laan bën guin ree? 16 Naj rni lojdi guial zi'taman din gugüjtaman bën guin ree dxel gudëëman guidxliuj guin loj ree ben ren.

Chi biguejn reeman zian dxel rëb reeman:

—¡Gagnë Dios ad zajct zian!

17 Per Jesús baguiaaman loj reeman, abi' rëbaman:

—Bal id zajc zian ¿xhieza rën guiëb ni ca loj xtiidx Dios? Lod rëb:

Guiaj ni gulëëgo'n ree bën rüjn yu,

laan naj ni mazri been sirv gojcnë yu guin.

18 Chutëëz bën yab guijc guiaj guin, gacaman zi'c tijb ni riroox, guiáad bal yab guiaj guin guijcaman, gacaman zi'c tijb ni ryüüdëj.

Xcwent impuest

(Mt. 21:45-46; 22:15-22; Mr. 12:12-17)

19 Bixhioz rniabee ree bixhioz con ree mextr rajc ley, hor guin gajc guyën reeman niniaaz reeman Jesús guial gogbee reeman cuza'taman laa reeman, per bidxeb reeman bejn ree. 20 Abi' guxhaal reeman bën zigla'ch ree laaman din güünzi reeman guial guluü naj reeman benza'c, din yaguiil reeman mod guinee Jesús diidx ni gudxiib reeman guijc, din chile' yayü reeman laaman loj gubernador Rom. 21 Dxel gunabdiidx reeman lojman, rëb reeman:

—Mextr, dunujn rayagbee guial rnieel rulüü tëël zi'c rayal, din par lüj tiblojzi naj bejn, abi' walil rulüül guial xhienaag rën Dios guiban bejn.

22 ¿Zagdxen ya radijxan impuest loj rey César, o ad zagdxetan?

23 Per gogbee gajc Jesús xgab mal ni cayüjn reeman abi' rëbaman loj reeman:

24 —Gol balüü tijb cintabl lon. ¿Chu loj ca lojn chu tëë laj ca lojn?

Badxi' reeman laan, rëb reeman:

—Loj rey César ca lojn në lajman.

25 Dxel rëbaman loj reeman:

—Gol badëëcliza loj rey César ni naj xieen César, guiáad loj Dios gol badëë ni naj xieen Dios.

26 Abi' gra ni guneeman niz loj ree bejn, achetri badxejl nudxiib reeman guijc din niniaaz reeman laaman. Badxali loj reeman ni guneeman abi' achetri rëb reeman.

Xcwent guial yaban ree bengüt

(Mt. 22:23-33; Mr. 12:18-27)

27 Tio'p choon ree bënsaducev bignaj Jesús, bënsadusev guin ree ad rliladxt reeman guial yaban ree bengüt, zeel rëb reeman loj Jesús:

28 —Mextr, loj xley Moisejs rëb guial bal guiët tijb xinguaaw abi' achut xi'nx guyu con lacheelix, bijch xingüt guin guxhlianë béngunaa bizëjb guin din chu' xi'n reex zi'c guluü xi'n xin güt guinan. 29 Guyu tijb famil lod goc reex gajdx bijch. Baxhliaa xin yaløj guin, per güjtix abi' ad guyut xi'n reex con lacheelix. 30 Dxel bijch barojpax baxhlianë béngunaa guin, per güjtgajquix ad guyu gajct xi'n reex. 31 Zianz baxhlianë xin bayon guin béngunaa bizëjb guin, zianz baxhlianëman guigajdx reex abi' gra reex güjt achut xi'n reex

guyu con laaman. ³² Ni bigratë në béngunaa guin güjt. ³³ Yan, chi yaban ree bengüt, ¿chu loj guigajdx reex gac xbéngunaa laaman gual gra reex baxhliaanë laaman?

³⁴ Dxel rëb Jesús loj reeman:

—Loj guidxliuj guie ruxhliaa ree bejn abi' rudëed xi'n reeman ruxhliaa.

³⁵ Per ree bën yaban zatijb, bën rayal ree gap guialnaban tiblyaa con Dios, ad zuxhliaatri reeman ad zudëe tëetri xi'n reeman guxhliaa, ³⁶ din ad zëjtri reeman, gac reeman zi'c ree xianjl Dios. Gac tëe reeman xi'n Dios gual ma baban reeman. ³⁷ Abi' xcwent ni yaban ree bengüt, xt Moisejs rëb zian tiblajt loj xtiidx Dios lod rëbaman gual baguiaaman yag ni caye'c. Yagaj rëb Dios lojman gual Dios naj xDios Abraham, xDios Isaac, në xDios Jacob. ³⁸ Din Dios ad najtaman xDios ree bengüt, najman xDios ree bën naban, din par laaman gra ree bejn naban.

³⁹ Dxel yu' ree mextr rajc ley, rëb lojman:

—Mextr, zagdxequi guneel.

⁴⁰ Abi' achetri bayax reeman niniabdiidx reeman lojman.

Chu loj xdiaa zëed Cristo

(Mt. 22:41-46; Mr. 12:35-37)

⁴¹ Rëb Jesús loj ree bejn:

—¿Chexc zeel rëb ree bejn gual zëed Cristo loj xdiaa rey Davi? ⁴² Awa Davi guin gajc guneel loj libr Salmos, rëbaman:

Dios rëb loj dux Dad ree:

“Gurej da ladbeen,

⁴³ xt gabecan xin rdxe'ch ree lüj guia'l.”

⁴⁴ Yan, bal xi'n Davi naj Cristo. ¿Chexquiza zeel rëb Davi guin lojman Dad?

Ni rüjn ree mextr rajc ley

(Mt. 23:1-36; Mr. 12:38-40; Lc. 11:37-54)

⁴⁵ La'tgaj cucaagdiajg gra ree bejn ni rëb Jesús, rëb loj ree xbejnman:

⁴⁶ —Gol gojp cudad con ree mextr rajc ley. Din ruladx reeman sa reeman gacw reeman lajd zagdxeruladx tëe reeman gugajpdioz ree bejn laa reeman con respetj niz lunejz, abi' lën ree yadoo ruladx reeman cwe reeman lod rbej ree bën zobjloj, ziangajc rüjn reeman lod ritaw reeman. ⁴⁷ Raca' tëe reeman lidx ree béngunaa bizëjb, abi' din guiëb ree bejn gual benza'c naj reeman, dád xchej rbejdx rniab reeman Dios. Per laa reeman mazri casti naroo yayal reeman.

21

Gon badëed tijb béngunaa bizëjb

(Mr. 12:41-44)

¹ Chi culüü Jesús bejn ree lën yadooro' Jerusalén, dxel gules lojman baguiaaman cagu' ree benrijcw gon lën alcancia. ² Baguiaa tëeman tijb béngunaa bizëjb prob, cagu'man tio'p cintabldoo lën alcancia guin. ³ Dxel rëb Jesús loj ree xbejnman:

—Diidxli rniin lojdi gual bën bizëjb prob guin mazri lasajc gon badxe'man gual loj gon badxe' gra ree bën guin. ⁴ Din graczi reeman rudxe' ni rüjn laa reeman sobr, per laaman majsi najman bënprob, badxe'man graczi ni rajpaman par guibannëman.

Rëb Jesús gual yaze'n yadooro' Jerusalén

(Mt. 24:1-2; Mr. 13:1-2)

⁵ Tio'p choon ree xbejn Jesús cayü reeman diidx xcwent ree guiaj zagdxe najcchaawnë yadooro' Jerusalén, në ree ni lasajc ni rudëed ree bejn par suchaaw yadoo guin. Dxel rëb Jesús loj reeman:

⁶ —Gra ni cuguaadi yan, zadxin dxej ni'qui tijb guiaj ad zaya'nt guijc stijban, gran yaze'n.

Ni gac chi gad guidxliuj nit
(Mt. 24:3-28; Mr. 13:3-23)

⁷ Dxel gunabdiidx reeman lojman rëb reeman:

—Mextr, ¿goc gac zian? ¿Xhie ree sen gac chi ma zidyob gac zian?

⁸ Zianz rëb Jesús loj reeman:

—Gol gojp cudad achu gusquiee lëjt. Din zien ree bën gui't guiëb reeman guial por naj zëed reeman guiëb tëë reeman: “Naj naj Cristo”; o “Ma zidyob dxej gui'taman.” Per ad chililadxidi laa reeman. ⁹ Abi' chi guiguiejndi cayajc wadijl o chas ree bejn contr xguxtis reeman, ad guidxebidi din yaloj gac zian. Per ad por laatan ma bidxin dxej nit guidxliuj.

¹⁰ Rëb tëë Jesús loj reeman:

—Til nacion con stijb nacion, til tëë bën rajp guialrniabee con stijb bën rajp guialrniabee, ¹¹ gui't tëë xudoxh, në gubijn, në guialgujdxdoxh niz ni niz guie abi' xanyabaa guiguieen ree ni nadxeb.

¹² Per chi gad gra ree ni guin gac, guiniaaz ree bejn lëjt din gusagzi reeman lëjt, chinë reeman lëjt lën ree yadoo din gudëed reeman lëjt casti, cu' reeman lëjt ladxguuib chinë tëë reeman lëjt loj ree rey në loj ree gubernador guial najdi da bejnan. ¹³ Zian gac din chile' güdi da diidxan loj reeman. ¹⁴ Ad aal chu'di xgab xhie guiëbidi loj reeman. ¹⁵ Din naj gune diidx ni guinieedi gune tëën quiargueijn. Abi' ni'qui tijb bën rdxe'ch lëjt ad züjnt gan loj xtiidxidi ad zanee tëët reeman contr lëjt. ¹⁶ Per lëjt xt xdadidi o xniaadi, o bijchidi o xfamilidi o xmiwidi yayü reeman lëjt, abi' yu'di gugüjt reeman. ¹⁷ Gra bénguidxliuj guidxe'ch lëjt guial najdi da bejnan. ¹⁸ Per ni'qui tijb guidxguijquidi ad zanijtt por zian. ¹⁹ Abi' bal sudxi'chidi loj xnejz Dios, zajpdi guialnaban tiblyayaa con Dios.

²⁰ Chi guguiaadi nayaw ree suldad Jerusalén, ma qui nit guiedx guin.

²¹ Dxejzii ree, bën za' ree niz Judea, gol bigxüün niz dajn ree, abi' ree bën za' guiedx Jerusalén gol brii luguiedx guin, guiaad ree bën za' dajn ad bal yayudi luguiedx guin. ²² Din dxej guin ree gudëed Dios bejn ree casti din gac cumplid zi'c ca loj xtiidxaman. ²³ iProbza ree béngunaa nüü xi'n o béngunaa ca' ree xindobëz lën ree dxejzii! Din dád sagdiaj ree bejn abi' dád casti narooob yayal ree bénluguiedx guin. ²⁴ Yu' ree bën guiët loj wadijl yu' tëë reeman guiniaaz reeman chinë naguiejn reeman laa reeman nacion rent nacion ren ree. Abi' ree benzit zanabee reeman Jerusalén xt yayaaloj dxej ni tiëb Dios nabee reeman yagaj.

Gui't Bén guxhaal Dios zatijb
(Mt. 24:29-35, 42-44; Mr. 13:24-37)

²⁵ Dxel gac sen loj gubijdx, con loj bëëw, con loj ree bajl xanyabaa. Abi' loj guidxliuj gagdxa ree bejn guidxeb tëë reeman guial gac naquie' loj nijsdoo gac tëë naquie' por xtüjp nijs. ²⁶ Abi' ree bejn xt yadaj reeman guial guidxeb reeman chi güün reeman xgab ni gac loj guidxliuj, guiaad ree ni rguieen xanyabaa guiniib reen. ²⁷ Abi' guguiaa reeman Bén guxhaal Dios, rdiinman bacha' zëedaman loj zaj con xguialrniabeeman. ²⁸ Chi suloj gac ree ni guin,

gol bagu' luxdoodi zagdxe gol gules tëë lojdi din ma zidyob dxej ni laadi loj casti.

²⁹ Rëb tëë Jesús loj reeman:

—Gol baguiaa yag higo o xhietëez zatijb yagan. ³⁰ Chi ma caydxib ree xbalagan, lëjt ragbee guial ma zëëd tiamp nalaa. ³¹ Ziangajc chi guguaadi ma cayajc ree ni guin, zagbeedi guial ma zëëd xgualrniabee Dios gajxh.

³² Diidxli rnin lojdi guial gra ree ni guin gac chi gad gra ree bën naban yan guiet. ³³ Guidxliuj në xanyabaa zanijt reen, per da diidxan ad zadëdt gacan cumplid.

³⁴ Gol gojp cudad ad güün graloj ni riga' loj guidxliuj guie lëjt gan, zi'c guial rzüdx, në guial ru xgab por ni ryaadxidi par guibandi din chi guialan zatijb, ad gac dxej guin par lëjt ³⁵ zi'c tijb tramp. Din zian gac dxej guin par gra ree bënguidxliuj. ³⁶ Gol guzuzsin, guixie guixie gol gurejdx gunab Dios din gac laadi loj gra ree ni gac loj guidxliuj din chile' tëë sudi loj Bën guxhaal Dios.

³⁷ Radxe rulüü Jesús bejn ree lën yadooro' Jerusalén guiáad guxhin raya'nman ruguia' la Olivos. ³⁸ Abi' rsildoo rej gra ree bejn lën yadoo guin ricaagdiajg reeman ni rnieeman.

22

Baya'n reeman diidx xhienaag guiniaaz reeman Jesús
(Mt. 26:1-5, 14-16; Mr. 14:1-2, 10-11; Jn.11 :45-53)

¹ Chi ma zidyob lanij pascw, chi raw reeman guiadxtil ni ad yu't levadur. ² Bixhioz rniabee ree bixhioz con ree mextr rajc ley, raguiil reeman mod xhienaag gugüjt reeman Jesús guial rdxeb reeman bejn ree.

³ Dxel guyu xindxaw luxdoo tijb ree xi apóstoles Jesús, bën la Judas Iscariote.

⁴ Judas guin bigneenë bixhioz rniabee ree bixhioz con ree bën rniabee bën rajp ree yadooro' Jerusalén, abi' benëman laa reeman diidx xhienaag yayüman Jesús loj reeman. ⁵ Dád babaa reeman abi' rëb reeman guial gudëëd reeman milia lojman. ⁶ Zianz cwëjbaman, dxel guzuloj raguiilaman mod xhienaag yayüman Jesús, guial ad zagbeet ree bejn.

Gudawnë ree xbejn Jesús xche
(Mt. 26:17-29; Mr. 14:12-25; Jn.13 :21-30; 1Co.11 :23-26)

⁷ Chi bidxin lanij pascw, tijbgaj yu raw ree bejn guiadxtil ni ad yu't levadur rugüjt tëë reeman tijb xiil, ⁸ dxel guxhaal Jesús Bëd con Waj, rëbaman loj reeman:

—Gol biguieen ni yadaaw ree guxhin pascw.

⁹ Abi' gunabdiidx reeman lojman rëb reeman:

—¿Ban guin rën'l yuguieenan laan?

¹⁰ Zianz rëb Jesús loj reeman:

—Chi chu'di luguiedx guin, guguaadi tijb xinguaaw ca'x tijb re yu' nijs. Gol chinalix xt lod yayux, ¹¹ gol güjdx loj bën naj lidxan: “Na mextr: ¿Con lënü gawnë ree xbejnman guxhin pascw?” ¹² Dxel gulüüman lëjt tijb lënü ni rarojp pijs, ma najcchaaw lënü guin. Yagaj gol been ni yadaaw ree xche.

¹³ Zianz wej reeman abi' bidxaagloj reeman gra zi'cgajczi rëb Jesús loj reeman. Dxel been reeman guialraw guin ni gaw reeman guxhin pascw.

¹⁴ Chi bidxin hor, Jesús con ree bën naj apóstoles gurej reeman xan mex.

¹⁵ Dxel rëbaman loj reeman:

—¡Diizd gocli rēnan gawnē'n lējt pascw guie, chi gad dxej guidxin gazaagdi-
ajn abi' guiētan! ¹⁶ Din naj rni lējt guial ad yu'tri dxej gawnē'n lējt, xt chi ma
canabee Dios guidiblagaa.

¹⁷ Dxel cwa'man tijb cojp yu' vin, chi gulox badēēman quixtēē loj Dios,
rēbaman loj reeman:

—Gol cwa' vin guie, gol gudi'san loj gradi. ¹⁸ Din diidxli rnin lējt, ad yu'tri
dxej guiē'n vin xt chi ma canabee Dios guidiblagaa.

¹⁹ Dxel cwa'man guidaxtil badēēman quixtēē loj Dios, zianz gula'man laan,
gudi'saman laan loj reeman, rēbgajman:

—Guiadxtil guie naj da cuerpan ni ma bayūn din guiētan por lējt. Chi
güūdi zian, gol been zian guial rusaaladxidi naj.

²⁰ Abi' ziangajc beenman con cojp ni yu' vin guin, chi gulox gudawaman
xche, rēbaman:

—Vin guie naj da rejnan ni gaxhie'n chi guiētan din guixal tijb nejz cūb
xhienaag gap ree bejn perdon loj Dios.

²¹ 'Per yan bēn yayū naj, laa yaaman xoob loj mex lod xoob gajc yan.
²² Per Bēn guxhaal Dios, naj sagdiajman abi' guiētaman. Per ¡probza bēn yayū
laaman!

²³ Dxel guzuloj rniabdiidx loj lasa' reeman chu reeman yayū laaman.

Chu mazri zojbloj

²⁴ Dxel guzuloj reeman cadildiidx reeman chu loj gra reeman naj mazri
bēn zojbloj. ²⁵ Per rēb Jesús loj reeman:

—Bēn naj ree rey loj guidxliuj guie rniabee reeman bēn ladx reeman
zi'ctzi rēn reeman, abi' ree bēn rniabee, rēb reeman guial rūjn reeman ni
zagdxe. ²⁶ Per lējt ad rayalt güūdi zian, bēn mazri zojbloj lojdi rayal güün
laagajcaman zi'c tijb bēn ad zojblojt. Guíaad bēn rniabee lojdi rayal güün
laagajcaman zi'c tijb mojs. ²⁷ ¿Chu naj mazri bēn zojbloj loj guidxliuj guie?
¿Bēn rbej xan mex par gaw ya o bēn rbe'c guialraw? ¿Nid bēn rbej xan
mex guin naj mazri bēn zojbloj ya? Guíaad naj za'n lojdi zi'c tijb bēn rbe'c
gualraw.

²⁸ 'Lējtci za'nē naj loj ree dxej cazaagdiajn. ²⁹ Zeel gunen guialrniabee
lojdi zi'c bānee da Dadanan lon, ³⁰ abi' gawidi loj da mexan lod ganabeen cwe
tēēdi loj ree yagxhil lod güūdi guialguxtis loj gra ree bēn za loj guidxiptio'p
xdiaa Israel.

Rēb Jesús guial guiēb Bēd ad nūnbeetaman laaman

(Mt. 26:31-35; Mr. 14:27-31; Jn.13 :36-38)

³¹ Rēb tēē Jesús:

—Simón, Simón, ma gunab xindxab lējt din güünx lējt prueb zi'c rbijb bejn
trigo. ³² Per naj ma guredx gunaaban Dios por lūj chitēē cwēz chililadxil
naj. Guíaad lūj chi yazudxi'chil loj ni rililadxil naj zatijb, gognē ree lasa'l din
sudxi'ch reeman loj ni rililadx reeman naj. ³³ Dxel rēb Bēd lojman:

—Dad, ad zaro'nladxtan lūj majsí gayu'nē'n lūj ladxguiib o xt guiētnē'n lūj.

³⁴ Abi' rēb Jesús:

—Naj rni lūj Bēd, yan guxhin gajc chi gad guid cwidxa', choon volt mal rēbil
ad nūnbeetil naj.

Zidyob dxej sagdiaj Jesús

³⁵ Dxel gunabdiidx Jesús loj ree xbejnman rēbaman:

—Chi guxhalan lējt sin bols, sin milia, nē sin gurēch, ¿yu' ni biaadxidi ya?

Badxi' reeman laan rēb reeman:

—Achet.

³⁶ Dxel rëbaman loj reeman:

—Sa'n yan bën rajp milia në bols, gol cwa'n. Guiáad bën ad rajpt espad, gol bato' xabidi din siidi tijban. ³⁷ Din naj rni guial rüjn naguiejn gac zi'c rëb loj xtiidx Dios por naj, lod rëb: “Abi' nayabaman loj ree benmal.” Gra ni ca loj xtiidx Dios por naj, naj gacan cumplid.

³⁸ Dxel rëb reeman lojman:

—Dad, guie naca'n tio'p espad.

Badxi'man laan rëbaman:

—Zajquican.

Rbejdx rniab Jesús Dios lod la Getsemani

(Mt. 26:36-46; Mr. 14:32-42)

³⁹ Dxel brii Jesús zi'c naj xcostumbraman zëman ruguia' Olivos, abi' binal ree xbejnman laaman. ⁴⁰ Chi bidxin reeman yagaj, rëbaman loj reeman:

—Gol gurejdx gunab Dios, chitëë güün xindxab lëjt gan.

⁴¹ Abi' wejman zijt zi'ct lod rucaa bejn tijb guiaj, zianz bazuxibaman gurejdx gunabaman Dios, ⁴² rëbaman:

—Dad, bal tiëbil, babëë naj loj ni gazaagdiajn per ad gac zi'c rënan, rayal gac zi'c rën.

⁴³ Dxel balüüloj tijb anjl guza xanyabaa lojman persi badëëman laaman gojl. ⁴⁴ Abi' chi cazagdiaj da'taman, mazri con gan cabejdx canabaman Dios ryajb tée ree xnijs ragneeyaman luyuj zi'c rejn.

⁴⁵ Chi bisuman lod cabejdx canabaman Dios, bignaj ree xbejnman abi' chi badxinman cwë' reeman laa reeman naga'yëjs, guial yu'naya reeman.

⁴⁶ Zianz rëbaman loj reeman:

—¿Chexc zeel naga'yëjsidi? Gol bixche, gol gurejdx gunab Dios chitëë güün xindxab lëjt gan.

Gunaaz reeman Jesús

(Mt. 26:47-56; Mr. 14:43-50; Jn.18 :2-11)

⁴⁷ Sta caneenë Jesús bën naj ree xbejnman chi bidxin ree benzien. Në bën brii laj Judas, bën goc tijb ree xbejn Jesús, nedaman loj ree bën guin abi' bibigaman loj Jesús gudawaman laaman xid. ⁴⁸ Dxel rëb Jesús lojman:

—Judas, ¿wen con tijb xid rayül Bén guxhaal Dios ya?

⁴⁹ Chi baguiaa ree bën za'në Jesús ni cayajc, rëb reeman lojman:

—Dad, ¿zalëë dux espadan ya?

⁵⁰ Abi' tijb xbejnman gudiilgujdxaman xmojs bixhioz rniabee gra ree bixhioz, gutü'man guidiajg ladbeeman. ⁵¹ Per rëb Jesús loj reeman:

—Guzujr ree bënan. Ma gojczí.

Dxel baqui' Jesús guidiajg mojs guin abi' bayüjnman laan. ⁵² Zianz rëb Jesús loj ree bixhioz rniabee ree bixhioz, con ree bën rniabee ree bën rajp yadooro' Jerusalén con xguxtis ree bën Israel, bën bidxin ree par chinë laaman:

—¿Chexc zeel zëëdidi con espad con yag din chinëdi naj zi'c tijb xingubaan?

⁵³ Guixie guixie guzunë'n lëjt lën yadooro' Jerusalén abi' ad gunaaztidi naj. Per yan ma bidxin xihoridi, hor ni nabee xindxab.

Rëb Bëd ad nünbeetaman Jesús

(Mt. 26:57-58, 69-75; Mr. 14:53-54, 66-72; Jn.18 :12-18, 25-27)

⁵⁴ Dxel gunaaz reeman Jesús zinë reeman laaman lidx bixhioz rniabee gra ree bixhioz, binal Bëd laaman zijt zijt. ⁵⁵ Yagaj gule'c ree bën guin guij galay lule', abi' gurej reeman rudëj guin. Në Bëd gurejnë laa reeman. ⁵⁶ Per

tijb béngunaa rüjn dxiin yagaj, chi baguiaaman Béd zojbaman ruděj guin, baguiaaman lojman, abi' rëbaman:

—Në bén guin za'në Jesús.

⁵⁷ Per gurexuu Béd, abi' rëbaman loj bén guin:

—Ad nünbeetan laax.

⁵⁸ Ad gojct xchej chi baguiaa zatijb bejn laaman, rëbaman lojman:

—Në lüj naj xbejn Jesús.

Badxi' Bédan rëbaman:

—Yajqui dad, ad xbejtix naj.

⁵⁹ Gudéd cost tib hor, dxel rëb zatijb bejn:

—Nëczi bén guie za'në laaman din nëman naj Bén Galilea.

⁶⁰ Zianz rëb Béd:

—Ad ragbeetan xhienin rnieel.

Hor ni canee gajc Béd zian guridxa' tijb gujd. ⁶¹ Dxel badxi' loj Jesús baguiaaman loj Béd, abi' basaaladx Béd guial rëb Jesús lojman: “Yan guxhin gajc chi gad gujd cwidxa', choon volt mal rëbil ad nünbeetil naj.” ⁶² Dxel barii Béd yagaj, abi' dád naya biinman.

Baze' reeman Jesús gudijn tëë reeman laaman

(Mt. 26:67-68; Mr. 14:65)

⁶³ Bén cayajp ree Jesús, baze' reeman laaman gudijn tëë reeman laaman.

⁶⁴ Guxhii reeman lojman abi' gudijn reeman laaman, dxel rëb reeman lojman:

—iGuneeya' chu gudin lüj!

⁶⁵ Abi' zien ree diidxgujdx rëb reeman lojman.

Za' Jesús loj ree guxtis Israel

(Mt. 26:59-66; Mr. 14:55-64; Jn.18 :19-24)

⁶⁶ Chi bareguiaal, badxajg lasa' ree guxtis Israel, në ree bixhioz rniabee ree bixhioz con ree mextr rajc ley, abi' binë reeman Jesús lod radxaag lasa' gra ree xguxtis reeman, dxel rëb reeman lojman:

⁶⁷ —Guna du lojn, ¿lüj naj Cristo ya?

Badxi'man laan rëbaman:

—Bal ganinan ad zaliladxtidi. ⁶⁸ Abi' bal xhie ganabdiidxan lojdi, ad zadxi'tidan. ⁶⁹ Per diidz yan, Bén guxhaal Dios cweman xladbee Dios, bén ca' gra guialrniabee.

⁷⁰ Dxel rëb gra reeman lojman:

—¿Lüjn naj Xi'n Dios ya?

Badxi'man laan, rëbaman:

—Waliquidi najcan.

⁷¹ Zianz rëb reeman:

—¿Xhie mazri rüjn naguiejn yadiil ree testiw? Dunuj gajc ree ma baguiejn ni nax con quijb xtiidxix.

23

Binë reeman Jesús loj Pilato

(Mt. 27:1-2, 11-14; Mr. 15:1-5; Jn.18 :28-38)

¹ Dxel wajs gra reeman binë reeman Jesús loj Pilato. ² Yagaj guzuloj cutedia' reeman Jesús lojman, rëb reeman:

—Badxaaglojn xin guie cusquieex Bén du ladx ree, rëbix guial ad rayalt yadijx ree impuest loj rey César, rëb tëëx guial laax naj Cristo, naj tëëx rey.

³ Dxel gunabdiidx Pilato lojman rëbaman:

—¿Lüjn naj xrey ree bën Israel ya?

Badxi! Jesús laan, rëbaman:

—Waliquil, najcan.

⁴ Dxel rëb Pilato loj ree bixhioz rniabee ree bixhioz në loj gra ree bën riga' yagaj:

—Achet xfalt xin guie radxejlan.

⁵ Per laa reeman naguejnczi rüjn reeman, rëb reeman:

—Cusqueeex bejn ree guidib niz Judea con ree ni rulüüx laa reeman. Guzulojx niz Galilea abi' yan cayüjnx zian niz guie.

Binë reeman Jesús loj Herodes

⁶ Chi biguejn Pilato baza't reeman Galilea, gunabdiidxaman loj reeman bal niz Galilea naj ladx Jesús. ⁷ Abi' chi rëb reeman guial najman bën Galilea, guxhaalaman laaman loj Herodes bën rniabee Galilea, guial lën ree dxej guin në Herodes za' Jerusalén. ⁸ Chi baguiaa Herodes Jesús dád babaaman guial diizd gocli rënman guguaaaman laaman guial bacaagdiajgaman ruza't ree bejn laaman, abi' rbëzaman guguaaaman güünman tijb milagr. ⁹ Zien ree ni gunabdiidxaman lojman, per Jesús achetczi badxi'man. ¹⁰ Në ree bixhioz rniabee ree bixhioz za' yagaj con ree mextr rajc ley, ad rucwëëzt rutedia' reeman laaman. ¹¹ Dxel Herodes con ree xsuldadaman xhiernarajc beennë reeman laaman, baze' reeman laaman, bascajcw reeman laaman lajd zagdxe lasa' ni rajcw ree rey. Zianz baxhaal Herodes guin laaman loj Pilato zatijb. ¹² Abi' dxejzii bazuloj baneenë Herodes Pilato zagdxe, din gocli rdxe'ch lasa' reeman.

Gunabee reeman guiët Jesús

(Mt. 27:15-26; Mr. 15:6-15; Jn. 18 :39–19 :16)

¹³ Dxel bachajg Pilato lasa' ree bixhioz rniabee ree bixhioz con ree guxtis, con ree bën luguiedx guin, ¹⁴ abi' rëbaman loj reeman:

—Bidnëdi xin guie nadi cusqueeex bejn ree. Per niz lojdi ma gunabdiidxan lojx abi' achet xfaltix radxejlan zi'c nadi. ¹⁵ Ni'qui Herodes ad badxejlt xfaltix, zeel baxhaalaman laax lon zatijb. Ma baguiaalojdi achet ni mal beex din guiëtix. ¹⁶ Yan, gudëdan laax casti dxel guslaan laax.

¹⁷ Lën ree dxej lanij guin ruslaa Pilato tijb bën yu' ladxguiib zi'c goc xcostumbr reeman. ¹⁸ Per graczi reeman guzuloj rbixdiaj, rëb reeman:

—¡Bagüjt xin guin! ¡Baslaa Barrabás!

¹⁹ Badxe' reeman Barrabás guin ladxguiib guial beenman tijb wadijl Jerusalén, guial guzujman contr ree suldad rom, në guial bagüjtaman bejn.

²⁰ Guneenë Pilato laa reeman zatijb guial guyënman nuslaaman Jesús, ²¹ per laa reeman gurixdiaj reeman mazri rejs, rëb reeman:

—¡Bacaax loj crüjz! ¡Bacaax loj crüjz!

²² Ni bayon volt rëb Pilato loj reeman:

—¿Xhieza ni mal been xin guin? Achet xfaltix radxejlan din guiëtix. Gudëdan laax casti dxel guslaan laax.

²³ Per laa reeman mazri rbixdiaj reeman, rëb reeman loj Pilato din gucaaman laaman loj crüjz. Abi' guial tant rbixdiaj reeman con ree bixhioz rniabee ree bixhioz, been reeman gan gojc zi'c rën reeman. ²⁴ Dxel cwëjb Pilato beenman zi'c rën reeman. ²⁵ Abi' baslaaman Barrabás bën guyu ladxguiib por wadijl në guial bagüjtaman bejn, guiáad Jesús bayüman laaman loj reeman persi beennë reeman laaman zi'ctzi rën reeman.

Bacaa reeman Jesús loj crüjz
(Mt. 27:32-44; Mr. 15:21-32; Jn.19 :17-27)

²⁶ Chi zinë reeman Jesús din gucaa reeman laaman loj crüjz, gunaaz reeman tijb bén za Cirene laaman Simón. Ziaadaman bazaman dajn, gunabee reeman laaman güüman xcrüjz Jesús din chinalaman laaman.

²⁷ Zien da't bejn zinal laaman, abi' zien ree béngunaa roon rbixdiaj guial raya reeman laaman. ²⁸ Per baguiaa Jesús loj reeman abi' rëbaman:

—Béngunaa Jerusalén ad roondi por naj, gol biin por lëjt gajc në por xi'ndi.

²⁹ Din zadxin dxej guiëbidi: “Xiquilbaa ree béngunaa ad rajct ru xi'n, në ree béngunaa ad gojlt xi'n con ree béngunaa ad ca't bindobëz.” ³⁰ Dxel suloj guiëb ree bejn loj ree guia': “Gol guxa't du guijcan”, guiáad loj ree lom guiëb reeman: “Gol baquie'ch dunujn.” ³¹ Yan, nacli naj rüjnnë reeman zian, diidxgui lëjt, wed xhieczinin güünnë reeman lëjt.

³² Abi' në tio'p ree xingubaa zinë reeman din tia reex loj crüjz con Jesús.

³³ Chi bidxin reeman lod la Calaver, bacaa reeman Jesús loj crüjz, con grop ree xingubaa guin: tijbix cwa ladbee zatijbix cwa ladruvejs. ³⁴ Abi' chi cucaa reeman Jesús loj crüjz, rëbaman:

—Dad, been reeman perdon, din ad ragbeet reeman xhienin rüjn reeman.

Dxel gudxijt ree suldad suert guijc xabaman din yala' reex laan. ³⁵ Zien ree bejn riga' yagaj cuguaa reeman, abi' xt ree guxtis ruze' laaman, rëb reeman: —Baslaax ben ren ree, yan guslaa laagajquix bal walix laax naj Cristo.

³⁶ Në ree xin suldad ruze' laaman, rbig reex rudëed reex vinagr guië'man,

³⁷ rëb reex lojman:

—Bal lüj naj xrey ree bén Israel, baslaa lüj gajc.

³⁸ Abi' guijc crüjz guin bacaa reex lëjtr con diidx grieg, diidx latin, në diidx hebreo, rëban: “Bén guie naj xrey ree bén Israel.”

³⁹ Tijb xingubaa ni ca loj crüjz guin guneex diidxguijdx loj Jesús, rëbix:

—Bal lüj naj Cristo, baslaa lüj gajc, baslaa tëë dunujn.

⁴⁰ Per zatijbix gudilë xcompniarix, rëbix lojx:

—¿Staczi ad rdxebtil Dios ya majsi lasa'gajc casti guin cadëdi? ⁴¹ Dunuj rayalczi cayzaagdaj din zian caydijx ni baguieen. Per bén guie achetctzi ni mal wayüjnman.

⁴² Dxel rëbix loj Jesús:

—Basaaladx naj chi ma canabeel.

⁴³ Abi' rëb Jesús lojx:

—Diidxli rnin lojl guial yandxej gajc sunël naj lod naj nix, lod gan.

Güjt Jesús
(Mt. 27:45-56; Mr. 15:33-41; Jn.19 :28-30)

⁴⁴ Chi gol garol dxej, bicajy guidibczi guidxliuj xt raca choon wadxe.

⁴⁵ Bicajy logbijdx guiáad lajd nal lën yadooro' Jerusalén goxya'n, gojcan tio'p lala'. ⁴⁶ Dxel gurixdiaj Jesús, rëbaman:

—Dad, lojl rusa'n da sprijtan.

Chi gulox guneeman zian, dxel güjtaman.

⁴⁷ Chi baguiaa suldad rniabee ree suldad ni goc, baza'tix Dios zagdx, rëbix:

—Walican achet xtol bén guin yu'.

⁴⁸ Chi baguiaa gra ree bén za' yagaj ni goc, dád gyunaya reeman zia reeman riga'pgaj luxdoo reeman. ⁴⁹ Per gra ree bén nünbee Jesús, con ree béngunaa nal laaman diidz Galilea, zijt guzuj reeman baguiaa reeman gra ree ni goc.

*Biguie'ch Jesús**(Mt. 27:57-61; Mr. 15:42-47; Jn.19 :38-42)*

⁵⁰ Guyu tijb bejn, brii lajman Xiëb, gojcaman benza'c, beenman zi'c rayal. Gojc ladxaman guiedx Arimatea tijb guiedx naaz Judea. Gojc tēeman tijb xguxtis ree bēn Israel. ⁵¹ Nēman rbēz nabee Dios, abi' ad nētaman bachajg xixgab ree bēn bagijt Jesús. ⁵² Wejman loj Pilato bignabaman xcuerp Jesús. ⁵³ Chi gulox baletaman xcuerp Jesús loj crūjz guin, cwa'man laaman batüübaman tijb lajd, dxel biquie'chaman laaman lēn tijb baa ni bidēen lēn guiaj lod achutczi waguie'ch. ⁵⁴ Dxej guin rüjn reeman porvinid gra par dxej raziiladx ree bejn. Zamer suloj dxej guin chi biquie'ch reeman Jesús.

⁵⁵ Abi' ree bēngunaa zidnē Jesús diidz Galilea, nē reeman binal abi' baguiaa reeman xbaa Jesús baguiaa tēē reeman xhienaag gudijxh reeman xcuerpaman. ⁵⁶ Chi bayejc reeman, zianz beenchaaw reeman parfum nē zaj ni rliaa nejxh ni guidēebaman. Dxel baziiladx reeman dxej raziiladx ree bejn zi'c rniabee ley.

24*Raban Jesús**(Mt. 28:1-10; Mr. 16:1-8; Jn.20 :1-10)*

¹ Chi dumingw rsildoo, wej ree bēngunaa guin ro' xbaa Jesús binē reeman parfum ni beenchaaw reeman. ² Chi bidxin reeman yagaj, baguiaa reeman guiaj ni bida'cw ro' baa guin ad naga'tri xluaran. ³ Abi' guyu reeman, per ad bidxaaglojtri reeman xcuerp Dad Jesús. ⁴ La'tzi cadxeb reeman ni'quid radxejlt xhie güün reeman, dxejczy baguiaa reeman tio'p ree bejn za'li reeman gajxh lod za' reeman, najcw reeman lajd bacha'. ⁵ Abi' guial tant bidxeb reeman, basajb loj reeman xt luyuj, dxel rēb ree bēn guin loj reeman;

—¿Chexc zeel raguiilidi tijb bēn naban loj ree bengüt? ⁶ Achutri laaman guie din ma babanman. Gol basaaladx ni naman lojdi chi guzuman niz Galilea. ⁷ Naman lojdi guial yayü reeman Bēn guxhaal Dios loj ree bēndol din gucaa reeman laaman loj crūjz, abi' ni yayon dxej yabanman.

⁸ Dxel basaaladx reeman diidx ni rēb Jesús loj reeman, ⁹ abi' chi baza reeman ro' baa guin, bicojn reeman guidxiptib ree xi apóstoles Jesús nē los demazri ree xcompniar reeman gra ni baguiaa reeman. ¹⁰ María Magdalena, con Xuan, con Li xniaa Jacob con ree bēngunaa ren, laa reeman bignē ruson guin loj ree xi apóstoles Jesús. ¹¹ Per laa reeman ad bililadxt reeman ni rēb ree bēngunaa guin, gunaladx reeman wed rēbzi reeman.

¹² Per Bēd baxüünman biquiaaman lēn baa guin, abi' chi baguiaaman lēn baa guin, lajd ni bidüübzi Jesús baguiaaman, zianz ziaman dād radxalojman por ni goc.

*Balüüloj Jesús loj tio'p ree xbejnman**(Mr. 16:12-13)*

¹³ Dxej guin gajc, tio'p ree xbejn Jesús zē tijb guiedx la Emaús, raya'nan zi'ct chiptib kilometro par Jerusalén. ¹⁴ Chi zē reeman lunejz cayü reeman diidx xcwent gra ree ni goc. ¹⁵ La'tgaj cayü reeman diidx, gubig Jesús cwē' reeman abi' guzuloj cazanēman laa reeman. ¹⁶ Per majsi cuguaa reeman laaman, yu' ni badxoon nayünbee reeman laaman. ¹⁷ Dxel gunabdiidx Jesús loj reeman, rēbaman:

—¿Xhie diidxan rüdi la'tgaj cazadi? ¿Chexc zeel yu'nayadi?

¹⁸ Badxi' tijb bēn la Cleofas laan, rēbaman:

—Gra ree bejn ragbee ni goc Jerusalén lèn ree dxej guie. ¿Wen tijbzi lüj naj bèn guzu Jerusalén ad gogbeetil ni goc ya?

¹⁹ Dxel rëbaman loj reeman:

—¿Xhie goc?

Abi' rëb reeman:

—Ni beennë reeman Jesús bèn Nazaret, laaman goc tijb bèn badëë xtiidx Dios loj ree bejn, bèn gop guialrniabee zi'c ni beenman nè ree diidx ni guneeman niz loj Dios nè niz loj ree bejn. ²⁰ Në guial bayü ree bixhioz rniabee ree bixhioz laaman nè ree dux guxtis ree din guiëtaman, abi' bacaa reeman laaman loj crüjz. ²¹ Par dunujn laaman naj bèn yabëë ree bèn Israel loj ree bèn rom, per yan gojc choon dxej ni goc ree ni guin. ²² Majsi tio'p choon ree béngunaa no'ch du lojn bachejb reeman dunujn, guial rsildoo wej reeman ro' baa guin, ²³ abi' guial ad baguiaat reeman xcuerpaman, bayejc reeman rü reeman diidx guial balüüloj ree anjl loj reeman, rëb ree anjl guin loj reeman guial naban Jesús. ²⁴ Laa biquiaa gajc ree tio'p choon ree dux compniaran ro' baa guin abi' baguiaa reeman zi'cgajczi rëb ree béngunaa guin, per ad baguiaat reeman Jesús.

²⁵ Dxel rëb Jesús loj reeman:

—¡Xi nawëëg naj chignia'di abi' xi raglaa par chililadxidi gra ni gunee ree bèn badëë xtiidx Dios loj ree bejn! ²⁶ ¿Wen id naj ya guial sagdiaj Cristo, dxelri yayë'paman xanyabaa?

²⁷ Dxel guzuloj cusignia'man laa reeman ni rën guiëb ni ca loj xtiidx Dios xcwentaman. Guzulojman con ree xlibr Moisejs abi' basnuuman con gra ree libr ni bacaa ree bèn badëë xtiidx Dios loj ree bejn.

²⁸ Chi bidxin reeman guiedx lod zë reeman, been Jesús zi'c bèn che mazri zijt. ²⁹ Per laa reeman been reeman naguiejn din yaya'nnëman laa reeman, rëb reeman lojman:

—Baya'n con dunujn, din ma gudxe yan abi' ma cabej guiaal.

Dxel guyu Jesús persi baya'nnëman laa reeman. ³⁰ Abi' chi zojbnëman laa reeman xan mex, cwa'man guiadxtil abi' chi gulox badëëman quixtëë loj Dios, gula'man laan persi badëëman laan loj reeman. ³¹ Hor guin gajc guzajc reeman zi'c bèn baxal guiaaloj, abi' bayünbee reeman laaman. Per laa gunidloj gajcaman, ³² zianz rëb loj lasa' reeman:

—¡Ze'cliza dád nix yu' du luxdoo chi zudnë'man lunejz, chi cusignia'man dunuj ni rëb loj xtiidx Dios!

³³ Abi' ni'quid gulëjzt reeman, laa bayunejz gajc reeman zia reeman Jerusalén lod riga' guidxiptib ree xi apóstoles Jesús con ree xcompniar reeman. ³⁴ Rëb reeman loj grop ree bèn guin:

—Walican ma baban Dad Jesús, ma balüülojman loj Simón.

³⁵ Zianz be reeman diidx ni guzac reeman chi zë reeman lunejz xhie tëë naag bayünbee reeman Jesús chi gula'man guiadxtil.

Balüüloj Jesús loj ree xbejnman

(Mt. 28:16-20; Mr. 16:14-18; Jn. 20 :19-23)

³⁶ Sta cayü reeman diidx xcwent ree ni guin, chi balüüloj Jesús galay reeman, rëbaman:

—Yabe'cdxe Dios luxdoodi.

³⁷ Dád badxaloj reeman abi' bidxeb reeman guial gunaladx reeman anman cugiaa reeman. ³⁸ Per rëb Jesús loj reeman:

—¿Chexc zeel rdxebidi? ¿Chexc zeel yu'nawëëg luxdoodi? ³⁹ Gol baguiaa yan në guia'n. Naj gajcan, gol baqui' naj gol baguiaa tëë naj, din tijb anm ad yu'taman dxijt ad ca tëëtaman bëël zi'c ruguiaadi naj.

⁴⁰ Chi rëbaman zian, balüü yaaman në guia'man. ⁴¹ Per laa reeman staczi ad rliladxt reeman guial tant rabaa reeman radxa tëë loj reeman, abi' rëbaman loj reeman:

—¿Rajpidi ta'n guialraw ya?

⁴² Dxel badëë reeman tiblia' bëjl biguie', ⁴³ abi' cwa'man laab gudawaman niz loj reeman. ⁴⁴ Zianz rëbaman loj reeman:

—Ni ma guza'can naj ni rnin lojdi chi sta za'n con lëjt: Guial naj gac gra ree ni ca loj xlibr Moisejs ni gaza'can, në xlibr ree bën badëë xtiidx Dios loj ree bejn, në loj libr salmos.

⁴⁵ Dxel guxhalaman xquiarguejn reeman persi bignia' reeman ni ca loj xtiidx Dios, ⁴⁶ abi' rëbaman loj reeman:

—Loj xtiidx Dios rëb guial Cristo, naj guial guiëtaman, abi' ni yayon dxej yabanman. ⁴⁷ Abi' diizd Jerusalén suloj guire'ch xtiidxaman xt guidib loj guidxliuj guial yu' perdon par gra ree bën yayüjn xgab por xtol guililadx tëë reeman naj. ⁴⁸ Lëjt naj testiw xcwent gra ree ni guin. ⁴⁹ Naj gaxhal par lëjt ni ma na da Dadan. Per gol guzuzsii luguiedx Jerusalén xt tia'di guialrniabee ni gui't diizd xanyabaa.

Bayë'p Jesús xanyabaa
(Mr. 16:19-20)

⁵⁰ Dxel briinë Jesús laa reeman luguiedx Jerusalén binëman laa reeman gajxh Betania, zianz gules yaaman beenle'man laa reeman. ⁵¹ Abi' la'tgaj cayüjnle'man laa reeman, wajsaman ziaman xanyabaa. ⁵² Chi gulox bazuxib reeman badëë reeman quixtëë lojman, dxel zia reeman Jerusalén, dád rabaa reeman. ⁵³ Abi' guixie guixie yu' reeman lën yadooro' Jerusalén ruza't reeman Dios zagdxë rudëed tëë reeman quixtëë lojman.

Xtiidxza'c Jesucrist ni bacaa San Juan

Bi't Xi'n Dios loj guidxliuj

¹ Diizd guia'xchej chi gad guidxliuj gacchaaw, mal yu' b́en naj xtiidx Dios. Laaman za'ně Dios abi' laagajcaman naj Dios. ² Laaman mal za'ně Dios diizd guia'xchej. ³ Laaman been graczi ni yu'. Achetzi ni yu' niajc bal id laaman. ⁴ Laaman rajp guialnaban, guiáad guialnaban guin naj bajl par gra bénguidxliuj. ⁵ Bajl guin rusni b́en nacay xquiarguejn, abi' ad rajct rutěe guialnacay guin loj bajl guin.

⁶ Guyu tijb b́en brii laj Waj, Dios guxhaal laaman, ⁷ bidgaguieman diidx xcwent b́en naj xbajl Dios, din gac chililadx gra ree bejn laaman. ⁸ Per ad Wajt goc bajl guin, bi'tzaman bidgaguieman diidx xcwent bajl guin. ⁹ Din b́en naj quijb bajl guin, laaman rusni xquiarguejn gra bénguidxliuj, abi' ma bi'taman loj guidxliuj.

¹⁰ Laaman guzu loj guidxliuj, abi' majsi laaman been guidxliuj, per ree bénguidxliuj ad bayagbeet reeman laaman. ¹¹ Bi'taman loj ree b́en Israel, abi' majsi gojcaman b́en Israel, per ad bidxga't reeman laaman. ¹² Per, gra ree b́en bidxga' laaman bililadx těe reeman laaman, beenman laa reeman xi'n Dios. ¹³ Abi' naj reeman xi'n Dios, ad zi'c rut xi'n bejn loj guidxliuj por xixgab bejn o guial rěn bejn chu' xi'nman, por guial rliladx reeman ma naj reeman xi'n Dios.

¹⁴ Jesús, b́en naj xtiidx Dios, laaman goc bejn abi' gubajnman loj guidxliuj con dunuj ree, abi' dád guyěnman bejn ree gunee těeman ganax diidxli. Dunujn baguiaa xguialrniabeeman, guialrniabee ni ca'man guial tijbzi laaman naj Xi'n Dios. ¹⁵ Chi be Waj xtiidxaman loj ree bejn, gunee man rejs, rěbaman:

—Jesús guie naj b́en ruzatan, chi rnin guial b́en zěed xichan mazri lasajcaman guial lon, din diizd gocli mal yu'man guial lon.

¹⁶ Dád rěnman dunuj ree, gra dxejczy raca' dugra ree xguialnaza'caman. ¹⁷ Por Moisejs bane Dios xleyaman duloj ree, per por Jesucrist bayagbee ree xhienaag rěn Dios dunuj ree xhie těe naag naj xtiidxliman. ¹⁸ Ad yu't dxej waguiaa bejn Dios. B́en naj tijbzi xi'nman. B́en nabanně laaman balüü duloj ree xhienaag naj Dios.

Waj b́en baroobnijs rěbaman chu naj Jesús (Mt. 3:11-12; Mr. 1:7-8; Lc. 3:15-17)

¹⁹ Diizd Jerusalén guxhaal ree xguxtis ree b́en Israel bixhioz ree con ree b́en naj ree levitas persi bignabdiidx reeman loj Waj chu najman.

²⁰ Dxel be Waj diidxli loj reeman, rěbaman:
—Ad najtan naj Cristo.

²¹ Abi' gunabdiidx reeman lojman stijb rěb reeman:

—¿Chuza najl? ¿Lüjn naj Elías ya, b́en baděe xtiidx Dios loj ree bejn?
Badxi' Wajn rěbaman:

—Ad najtan.

Dxel gunabdiidx reeman stijb rěb reeman:

—O, ¿lüjn naj b́en naj diidx gui't ya, b́en guděe xtiidx Dios loj ree bejn?

Badxi'man laan rěbaman:

—Ad najtan.

²² Abi' rëb reeman:

—¿Chuza najl? Din rayal yugnë'n ruson loj ree bën guxhaal dunujn. Guna chu najl.

²³ Dxel rëb Waj loj reeman:

—Naj naj tijb bën rbidxa' loj yujbidx: “Gol guxhal tijb nejz nali par bën ca' guialrniabee” —zi'c rëb Isaías bën badëë xtiidx Dios loj ree bejn.

²⁴ Abi' ree bën guxhaal ree bënfarisew din guinieenë reeman Waj,

²⁵ gunabdiidx reeman lojman, rëb reeman:

—Bal id lüjn naj Cristo, ni'qui Elías, ni'qui bën naj diidx gui't, bën gudëë xtiidx Dios loj ree bejn, ¿chexquiza zeel ruroobnijsil bejn?

²⁶ Badxi' Waj laan rëbaman:

—Naj rurobnijs con nijs, per lojdi no'ch tijb bën ad wayünbeetidi.

²⁷ Laaman naj bën zëed xichan, ni'qui xgurëchaman ad rayalt gaxhiecan guial najman bën mazri lasajc guial lon.

²⁸ Gra niguie gojc lod la Betábara, ni naj stiblad ro' guiw Jordán, lod baroobnijs Waj bejn ree.

Jesús naj Xi'n Dios

²⁹ Chi bareguiaal, baguiaa Waj zibig Jesús lod za'man, dxel rëbaman:

—Gol baguiaa, bën guin naj bën bacaabee Dios din guiëtaman zi'c xiildoo por xtol ree bénguidxliuj. ³⁰ Laaman bazatan lojdi chi rnin: “Xichan zidnal bën mazri lasajc guial lon, din laaman mal yu' diidx gocli guial lon.” ³¹ Ni'qui naj ad gogbeetan guial laaman naj bën gui't, per naj zialan din gurobnijsan bejn ree con nijs din chile' güünbee ree bën Israel laaman.

³² Rëb tëë Waj loj reeman:

—Naj baguia biguiajt xSprijt Dios diidx xanyabaa zi'c tijb palom xt guijcaman. ³³ Majsi ad nünbeetan laaman, per bën guxhaal naj baroobnijsan con nijs, laaman na lon: “Chi guguiaal guiat xSprijt Dios xt guijc tijb bejn, laaman naj bën runee xSprijt Dios.” ³⁴ Naj ma baguia laaman, abi' ragbeechaawan guial laaman naj Xi'n Dios.

Bën binal ree Jesús yaloj

³⁵ Chi bareguiaal, za' Waj yagaj stijb, za'në tio'p ree xbejnman. ³⁶ Abi' chi baguiaaman cadëd Jesús, dxel rëbaman loj reeman:

—Gol baguiaa, bën guinan naj zi'c xi xiildoo Dios din guiëtaman por xtol bénguidxliuj.

³⁷ Chi biguiejn reeman rëb Waj zian, dxel binal reeman Jesús. ³⁸ Chi badxi' lojman, baguiaaman zinal reeman laaman, abi' rëbaman loj reeman:

—¿Xhie rguilidi?

Badxi' reeman laan rëb reeman:

—Mextr, ¿ban zojbil?

³⁹ Dxel rëb Jesús loj reeman:

—Gol guda din guguiaadi.

Dxel wej reeman biguiaa reeman lod zojbaman, abi' baya'nnë reeman laaman dxej guin, guial ma gojl cost raca tajp wadxe.

⁴⁰ Tijb ree xbejn Waj bën binal Jesús, bën bacaagdiajg ni rëb Waj, laaman brie laj Andrejs, bijch Simón Bëd. ⁴¹ Andrejs guin, yalojxgaj bijchaman Simón bigdiilaman, abi' rëbaman lojman:

—Ma badxaaglojn bën naj Mesías —rën guiëban Cristo.

⁴² Dxel binë Andrejs Simón lod za' Jesús, chi baguiaa Jesús laaman, rëbaman:

—Lüj naj Simón, xi'n Jonás, per yan grii lajl Cefas —rën guiëban Bëd.

Gurejdx Jesús Felip në Natanael

⁴³ Chi bareguiaal been Jesús xgab cheman niz Galilea, abi' badxaagaman Felip, zianz rëbaman:

—Tanal naj.

⁴⁴ Ladx Felip guin naj guiedx Betsaida, ni gajc naj ladx Andrejs con Bëd.

⁴⁵ Dxel bigdiil Felip Natanael, abi' rëbaman lojman:

—Ma badxaaglojn bën ruza't Moisejs loj xlibr xleyaman, bën ruza't ree bën badëë xtiidx Dios loj ree bejn loj ni bacaa reeman. Laaman naj Jesús, xi'n Xiëb, bën Nazaret.

⁴⁶ Dxel rëb Natanael lojman:

—¿Wen yu' benza'c Nazaret ya?

Badxi' Felipan rëbaman:

—Yo' din guguiaal.

⁴⁷ Chi baguiaa Jesús zëed Natanael, rëbaman:

—Guie zëed tijb bën naj quijb bën Israel, abi' ad rusquietaman.

⁴⁸ Dxel gunabdiidx Natanael lojman, rëbaman:

—¿Xoza nünbeel naj?

Badxi' Jesúsán rëbaman:

—Chi gad Felip cwedx lúj, chi za'l xan yag higo, dxel baguian lúj.

⁴⁹ Zianz rëb Natanael lojman:

—Mextr, lúj naj Xi'n Dios, lúj naj rey Israel.

⁵⁰ Badxi' Jesús laan rëbaman:

—¿Rliladxil naj ya guialzi rnin baguian lúj xan yag higo? Per mazri naj ree ni guguiaal guial loj ni ma baguiaal.

⁵¹ Rëb tëëman:

—Naj ragbeechaaw, zuguaadi zøjbyal xanyabaa, abi' zuguaadi xianjl ree Dios yayé'p reeman xanyabaa yaguiajt tëë reeman xt guijc Bën guxhaal Dios loj guidxliuj.

2

Wej Jesús loj tijb guialruxhliaa

¹ Ni goc choon dxej guyu tijb guialruxhliaa luguiedx Caná, ni riga' niz Galilea. Dxel në xniaa Jesús za' yagaj, ² abi' në Jesús con ree xbejnman gunee reeman persi wej reeman loj lanij guin. ³ Chi babidx vin, dxel rëb xniaa Jesús lojman:

—Achetri vin rajp reeman.

⁴ Badxi' Jesúsán rëbaman:

—Na, ¿chexquiza zeel nal lon zian? Ad wadxint da horan günan ni rayal günan.

⁵ Per xniaaman rëb gajcaman loj ree bën cayüjn mandad yagaj:

—Gol been gra ni naman.

⁶ Yagaj za' xho'p ree guiajs guiaj, ni ru nijs ni rüjnnë ree bën Israel dxiin chi rusia laa reeman zi'c naj xcostumbr reeman. Abi' lën tijbgaj reen ru cost tibgayuu lijtr. ⁷ Abi' rëb Jesús loj ree bën rüjn mandad guin:

—Gol bacha ree guiajs guie nijs.

Dxel bachadi reeman laa reen, ⁸ abi' rëbaman loj reeman:

—Yan gol gulëë ta'nan, gol bigdëen loj bën canabee loj lanij guie.

Dxel bigdëë reeman laan lojman, ⁹ abi' bën canabee loj lanij guin beenman prueb nijs bayajc vin guin, sin guial niagbeeman ban guzan, bën cayüjnz ree

mandad guin ragbee, din laa reeman bica' nijs guin. Dxel gurejdxaman xin cuxhliaa guin, ¹⁰ rëbaman lojx:

—Graczi bejn rgui's yaloj vin zagdxe, abi' chi ma gu' reeman zilan, dxel rgui'saman vin corrient. Per lüj badxe'chaawil vin zagdxe guin persi cagui'silan yan.

¹¹ Ni guin naj milagr yaloj been Jesús, beenman milagr guin Caná, guiedx riga' niz Galilea. Zian balüü guialrniabee ni rajpaman abi' bililadx ree xbejnman laaman.

¹² Chi gulox gojc zian dxel zë reeman guiedx Capernaum, con xniaaman, con ree bijchaman con në ree xbejnman. Ni guzu reeman tio'p choon dxej.

Babëë Jesús bën ruto' ree ro' yadooro'

(Mt. 21:12-13; Mr. 11:15-18; Lc. 19:45-46)

¹³ Chi ma zidyob pascw xlanij ree bën Israel, wej Jesús Jerusalén. ¹⁴ Abi' ro' yadooro' bidxaaglojman bën cuto' ree go'n, con ree xiil con ree palom, në ree bën zojb xan mex ruchaa reeman xmilia ree bën ziaad lood ren.

¹⁵ Chi baguiaa Jesús zian, dxel beenchaawaman tijb duu persi babëëman gra reeman, con gra ree xgo'n reeman në ree xiil. Gutie'chaman xmilia ree bën ruchaa milia guin barexgiat tëëman xmex reeman. ¹⁶ Dxel rëbaman loj ree bën cuto' palom:

—¡Gol babëë reeb guie! ¡Ad rüjnnëdi lidx da Dadan zi'c luguia'!

¹⁷ Dxel basaaladx ree xbejnman ni ca loj xtiidx Dios lod rëb: “Dád ralenan ruguian ni rüjn reeman lidxil.”

¹⁸ Zianz rëb ree bën Israel lojman:

—¿Xhie milagr gulüül du lojn din yayagbeen guial rajpil guialrniabee güünl zian?

¹⁹ Badxi' Jesús laan rëbaman:

—Gol base'n yadoo guie, naj yayün laan loj choon dxejzi.

²⁰ Dxel rëb ree bën Israel guin lojman:

—Tiuubixho'p ijz goglaa reeman been reeman yadoo guie, ¿guiáad lüj ya yayüjnlan choon dxejzi?

²¹ Per Jesús xcuerp gajcaman ruza'taman chi ruza'taman yadoo guin.

²² Zeel chi babanman loj ree bengüt, basaaladx ree xbejnman ni rëbaman, abi' bililadx reeman xtiidxaman bililadx tëë reeman ni ca loj xtiidx Dios.

Jesús nünbee xixgab gra bejn

²³ Chi guzu Jesús Jerusalén pascw, zien ree bejn bililadx laaman, chi baguiaa reeman milagr ree ni beenman. ²⁴ Per laaman ad rëbtaman loj reeman chu najman, din laaman nünbeechaaw xhienaag naj xixgab reeman.

²⁵ Ad bиаadxtaman chu niëjb lojman xhienaag naj bejn, din laaman rag-beecheaaw xhienaag naj xixgab tijbgaj bejn.

3

Bigneenë Nicodemo Jesús

¹ Guyu tijb bënfarisew brii lajman Nicodemo, gojcaman tijb guxtis loj ree bën Israel. ² Abi' wejman bignajman Jesús tijb guxhin, dxel rëbaman lojman:

—Mextr, rayagbeen guial Dios guxhaal lüj din gulüül dunujn, din achutczizaj güün lasa' ree milagr ni rüjn bal id za'në Dios laaman.

³ Dxel rëb Jesús:

—Diidxliczi rnin lüj, bën ad zajlt stijb, ad zajct guguaaman xguialrniabee Dios.

⁴ Abi' rëb Nicodemo lojman:

—Per, ¿xhienaag gal bejn stijb chi ma najman bengol? ¿Wen zajc yayu lën xnïaaman ya abi' galaman stijb?

⁵ Badxi' Jesús laan rëbaman:

—Diidxliczi rnin, bën ad rirobnijst ad nabannë tëëtaman xSprijt Dios ad zile't yayuman loj xguialrniabee Dios. ⁶ Bén naban zi'c naj xixgabaman, lojzi guidxliuj guie rajpaman guialnaban, per bën nabannë xSprijt Dios, por Sprijt guin rajpaman stijb guialnaban. ⁷ Ad bal radxa lojl guial rnin: “Rüjn naguiejn gal bejn stijb.” ⁸ Din zi'c rbi' bi gradal abi' majsi rigueijnl chi rbi'n, per ni'quid ragbeetil ban zëedan o ban zën. Ziangajc naj xSprijt Dios con gra ree bën nabannë laaman.

⁹ Dxel rëb Nicodemo lojman:

—¿Xhienaag rajc zian?

¹⁰ Badxi' Jesús an rëbaman:

—¿Lüj, naj mextr loj ree bën Israel, ad rignia'til gra ree ni guin ya?

¹¹ Diidxliczi rnin lojl, raneen ni rayagbeen ni baguiaa tëen, per lëjt ad rliadxtidi ni ranan. ¹² Bal id rliadxidi chi rnin xcwent ree ni loj guidxliuj guie, ¿xhienaag chilladxidi bal ganin xcwent ree ni xanyabaa?

¹³ Achut wayej xanyabaa, tijbzi bën biguiat diidz xanyabaa, Bén guxhaal Dios loj guidxliuj. ¹⁴ Abi' zi'c bacaa Moisejs bëël guuib loj yag niz loj yujbidx, ziangajc Bén guxhaal Dios loj guidxliuj, gucaa reeman laaman loj crüzj, ¹⁵ din gra bën chilladx laaman ad zanijtt reeman loj Dios, gap reeman guialnaban tiblyaa con laaman.

Rën Dios bejn

¹⁶ Guial tant rën Dios bénguidxliuj, majsi tijbzi xi'nman, per guxhaalaman laaman loj guidxliuj, din graczi bën chilladx laaman ad zanijtt reeman loj Dios, gap reeman guialnaban tiblyaa con laaman. ¹⁷ Din Dios ad guxhaalt xi'nman loj guidxliuj din gudëëdaman bejn casti, guxhaalaman laaman din gap ree bejn perdon loj Dios.

¹⁸ Bén rliadx Xi'n Dios ad rayaltaman xcasti Dios. Per bën ad rliadxt, laaman ma rayal casti guial ad rliadxtaman Xi'n Dios, bën naj tijbzi xi'nman. ¹⁹ Bén ad rliadxt ree rayal reeman casti, din yan ni bi't bën naj xbajl Dios, mazri bayuladx reeman nejz mal, guial rüjn reeman ganax ni mal. ²⁰ Graczi ree bën rüjn ni mal ad ruladxtczi reeman bajl guin, ad rbigt reeman lojn, chitëë guiguien ni mal cayüjn reeman. ²¹ Per ree bën naban zi'c rayal loj Dios, laa reeman rbigt loj xbajlaman din guiguien guial graczi ni cayüjn reeman naj ni rën Dios.

Waj bën baroobnijs ruza'taman Jesús stijb

²² Chi gudëd gojc zian, Jesús con ree xbejnman wej reeman niz Judea, lod guzunëman laa reeman tio'p choon dxej, ni baroobnijs reeman bejn ree. ²³ Nëgajc Waj curoobnijs bejn ree luguiedx la Enón, ni riga' gajxh guiedx Salim, guial yu' zil nijs ni. Abi' rej ree bejn persi rirobnijs reeman. ²⁴ Laan goc chi gad Waj chu' ladxguuib.

²⁵ Per bëlzi ree xbejn Waj, con za tio'p choon gajc ree bën Israel guzuloj cadildiidx reeman por xcostumbr reeman guial xhienaag gac reeman naya.

²⁶ Dxel biguiedx reeman loj Waj:

—Mextr, bën guzunël stiblad ro' guiiv Jordán, bën bel xtiidx du lojn, në laaman curoobnijs bejn ree abi' gra reeman zinal laaman.

²⁷ Badxi' Waj laan rëbaman:

—Acht zajc gap gualrniabee bal id Dios gudëe laan. ²⁸ Lëjt ragbee gual biguiejndi rën gual ad najtan naj Cristo, naj guneed lojman zidgagojnan por laaman. ²⁹ Dunuj ree rayagbee gual loj gualruxhliaa, xin za'në biingunaa guin, laaxan cuxhliaa, guiáad xmiwix xin za' con laax rabaanë da'tix laax chi riguiejnx rnieex. Ziangajc naj dád rabaanë'n laaman. ³⁰ Abi' laaman gusnuu gacaman mazri bën zobjloj, guiáad naj gusnuu gacan bën ad lasajc gual lojman.

Bén zëed xanyabaa

³¹ 'Din bën zëed diizd xanyabaa, laaman naj bën rniabee loj gra. Per bénguidxliuj, bénguidxliujzi najman abi' ganax ni yu' loj guidxliuj ruza'taman. Per Bén zëed diizd xanyabaa laaman rniabee gra, ³² abi' rüman ni ma baguiaaman ni ma biguiejn tēeman, per acht rliiladx ni rnieeman. ³³ Bal yu' bën rliiladx xtiidxaman, zian rguien gual ni diidxli naj xtiidx Dios. ³⁴ Abi' bën zëed por Dios, laaman rü xtiidx Dios gual guidiblagaa badëed Dios xSprijtaman lojman. ³⁵ Dios rën Xi'nman abi' basa'nman gra lojman. ³⁶ Abi' chutëez bën rliiladx Xi'nman, laaman rajp gualnaban tiblyayaa loj Dios. Per bën ad rtiëjbt chililadx, ad rajptaman gualnaban guin, laaman rayal xcasti Dios.

4

Jesús con béngunaa Samaria

¹ Gogbee ree bënfarisew gual mazri zien bejn ma zinal Dad Jesús mazri zien tēe bejn ruroobnijsaman gual loj Waj, ² majsi diidxliczi ad Jesústan ruroobnijs bejn ree, bën naj ree xbejnman ruroobnijs. ³ Chi gogbeeman zian dxel briiman niz Judea zëman niz Galilea stijb.

⁴ Per chi zëman niz Galilea been naguiejn gudëdaman niz Samaria. ⁵ Abi' bidxinman tijb guiedx la Sicař, ni nulen Samaria, gajxh lod naga' yuj ni badëe Jacob loj xi'nman Xiëb. ⁶ Yagaj naj tijb bizëduu rniee reeman laan xbizë Jacob. Abi' gual ma badxag Jesús cazaman, dxel gurejman ro' bizë guin. Ma zidyob garol dxej. ⁷⁻⁸ Guiáad ree xbejnman zë reeman luguiedx guin zisii ni gaw reeman. Hor guin bidxin tijb béngunaa Samaria ro' bizë guin din tia'man nijs, dxel rëb Jesús lojman:

—Bazaladx ta'n xnijsil guië'n.

⁹ Per gual ad rnieenët lasa' ree bën Israel zagdx con ree bën Samaria, badxi' béngunaa guinan rëbaman:

—¿Chexquiza zeel rniabil nijs lon najl bën Israel awa bën Samaria naj?

(Din bën Israel ree ad rnieenët reeman bën Samaria ree zagdx.) ¹⁰ Badxi' Jesús laan rëbaman:

—Bal zian ragbeel ni rën Dios guneeman lüj, chutëe bénan canab nijs lojl, zanabil nijs lon abi' naj zunen nijs runee gualnaban.

¹¹ Dxel rëb béngunaa guin loj Jesús:

—Dad, ni'quid ca'til ni cwëenël nijs, abi' bizë guin dád naxhitan. ¿Ban chica'l nijs runee gualnaban? ¹² Dux béngulalan Jacob basa'nnë dunuj bizë guie, lod gu'man nijs con ree xi'nman con ree xbegui'xhaman. ¿Wen mazri najl gual lojman ya?

¹³ Badxi' Jesús laan rëbaman:

—Graczi ree bën rë' nijs guie re'c reeman nijs stijb. ¹⁴ Per bën guië' nijs gudëdan, ad yu'tri dxej che'caman nijs. Din nijs gudëdan gacan luxdooan zi'c lod ad rbëzt rajch nijs, abi' nijs guin gudëe gualnaban tiblyayaa.

¹⁵ Dxel rëb béngunaa guin lojman:

—Dad, banee nijs guin lon, chitée che'cran nijs ad zial tée'tran guidca'n nijs guie.

¹⁶ Rëb Jesús lojman:

—Bignee lacheelil, dxel yaguaaadil guie.

¹⁷ Badxi' béngunaa guinan rëbaman:

—Achut da bénguiaawan yu'.

Dxel rëb Jesús:

—Waliquil achut lacheelil yu', ¹⁸ din ma gojc gaay xinguaaw rtia' lüj, abi' yan xin zojbnël ad lacheeltlan. Zeel waliqui ni nal.

¹⁹ Chi biguiejnman ni rëb Jesús, dxel rëbaman:

—Dad, ma ragbeen guial lüj naj Bén rudëe xtiidx Dios loj ree bejn. ²⁰ Dux béngulalan gunajchi' reeman Dios ruguia' guie, per léjt najdi Bén Israel rëbidi guial Jerusalén naj lod guiniajchi' bejn laaman.

²¹ Badxi' Jesúsán rëbaman:

—Na, zagdxe rnin guial guidxin dxej guiniajchi'di dux Dad ree Dios, ad zi'ttridi ruguia' guie ad zej tée'tridi Jerusalén. ²² Léjt ni'quid ragbeetidi chunin rnijachi'di, per dunujn rayagbeen chunin ranajchi'n, din loj ree Bén Israel grii Bén güün bejn ree perdon. ²³ Abi' ma bidxin dxej ni gra ree Bén diidxli rnijachi' Dios, guiniajchi' reeman laaman zi'c rayal por xSprijtaman. Din zian rën dux Dad ree Dios güün ree Bén rnijachi' laaman. ²⁴ Dios naj Sprijt, abi' Bén rnijachi' ree laaman rayal guiniajchi' reeman laaman con guidib luxdoo reeman por xSprijtaman.

²⁵ Dxel rëb béngunaa guin lojman:

—Naj ragbee gui't Bén naj Mesías, Bén la gajc, Cristo. Abi' chi gui'taman, laaman gusignia' dunuj ree gran.

²⁶ Abi' rëb Jesús:

—Najn naj Bén zii, laaman caneenë lüj.

²⁷ Loj hor guin badxin ree xbejn Jesús, abi' dád badxaloj reeman guial cayünëman tijb béngunaa diidx. Per ni'qui tijb reeman ad gunabdiidx lojman xhie rënman o xhie diidxan cayü reeman. ²⁸ Guiáad béngunaa guin basa'n xreman ro' bizë guin, dxel ziaman luguiedx guin, abi' rëbaman loj ree bejn:

²⁹ —Gol taquiaa tijb Bén na na graczi ni ma benan. ¿Nid laaman naj Cristo ya?

³⁰ Dxel brii reeman luguiedx guin zë reeman lod za' Jesús. ³¹ Per la'tgaj zia béngunaa guin luguiedx guin, rëb ree xbejn Jesús lojman:

—Mextr, gudaw.

³² Per rëbaman loj reeman:

—Laa da guialrawan yu', ni ad nünbeetidi.

³³ Dxel guzuloj canabdiidx loj lasa' reeman rëb reeman:

—¿Ni yu' chu bidné ni gudawaman ya'n?

³⁴ Dxel rëb Jesús loj reeman:

—Da guialrawan naj günan zi'c rën Dios, Bén guxhaal naj abi' guloox günan ni naman. ³⁵ Léjt rëb: “Ryaadx zatajp bëëw din gac ni yu' loj guiniaa.” Per naj rni léjt: Gol gules lojdi, gol baguiaa loj ree guiniaa, ma naj reen din yado'p reen. ³⁶ Abi' Bén rato'p loj guiniaa guin, rtia'man ni rayalaman por dxiin ni rüjnman. Guiáad ni rato'paman naj par lod yu' guialnaban tiblyaya. Dxel zi'c Bén rxübin zi'c Bén rato'p, rabaa reeman tiblojzi. ³⁷ Waliqui ni rëb ree bejn: “Ben ren rxübin, ben ren rato'p guialnaza'c.” ³⁸ Naj guxhal léjt din chigto'pidi

guialnaza'c lod ad beentidi dxiin. Ben ren ree been dxiin, guiáad lëjt gaz bigto'pidi guialnaza'c lod ad beentidi dxiin.

³⁹ Zien ree bën Samaria bililadx Jesús guial be búngunaa guin diidx loj reeman rëbaman: “Ma gunaman graczi ni benan.” ⁴⁰ Zeel chi bidxin reeman lod za' Jesús, guzajc reeman laaman liaadx din yaya'nnëman laa reeman. Dxel baya'nnëman laa reeman tio'p dxej. ⁴¹ Abi' mazri zien reeman bililadx laaman chi biguiejn reeman ni rnieeman, ⁴² dxel rëb reeman loj búngunaa guin:

—Bajy yan ad por ni natzil raliduladxan laaman, nëgajc dunujn ma baguiejn ni rnieeman, abi' rayagbeen walican laaman naj Cristo, bën yabëë búnguidxliuj loj dol.

Bayün Jesús xi'n xbejn tijb rey

⁴³ Chi goc tio'p dxej guin, baza Jesús niz Samaria abi' zëman niz Galilea, ⁴⁴ majsi laagajcaman rëb guial ni'qui tijb bën rudëë xtiidx Dios loj ree bejn ad rajpt reeman laaman respejt ladx gajcaman. ⁴⁵ Per chi badxinman niz Galilea, bën niz ni ree baca' reeman laaman zagdx. Din në laa reeman nej lanij pascw Jerusalén, abi' baguiaa reeman gra ni beenman ni. ⁴⁶ Chi za'man niz ni wejman Caná stijb, lod bayünman nijs vin. Abi' luguiedx Capernaum guyu tijb xbejn rey ragxuu xi'nman. ⁴⁷ Chi gogbee bën guin baza Jesús niz Judea badxinman niz Galilea, wejman lod za' Jesús bisajcaman laaman liaadx din cheman yayünman xi'nman guial zamer guiëtix. ⁴⁸ Abi' rëb Jesús lojman:

—Lëjt, bal id zuguaadi xhie ree sen o milagr ree, ad zaliladxtidi.

⁴⁹ Per rëb bën guin:

—Dad, yo' yan gajc, naga gad da xi'nan guiët.

⁵⁰ Dxel rëb Jesús lojman:

—Baguiaj lidxil, ma bayajc xi'nl.

Bililadx bën guin ni rëb Jesús, abi' zia lidxaman. ⁵¹ La'tgaj ziaman, bigchaagloj ree xmojsaman laaman, abi' rëb reeman:

—Ma bayajc xi'nl.

⁵² Dxel gunabdiidxaman loj reeman, rëbaman:

—¿Xhie hor guzuloj banaa da xi'nan?

Abi' rëb reeman lojman:

—Nieey cost raca tijb wadx bariix xliaa.

⁵³ Dxel basaaladx bën guin guial hor ziin rëb Jesús lojman: “Ma bayajc xi'nl.” Abi' laaman në gra bën zojb lidxaman bililadx reeman Jesús. ⁵⁴ Ni ne naj milagr barojp ni been Jesús niz Galilea chi bazaman niz Judea.

5

Bayün Jesús tijb bën ad rajct rza

¹ Chi gudëd gojc zian, guyu tijb xlanij ree bën Israel, abi' wej Jesús Jerusalén. ² Jerusalén guin, gajxh ro' port la xport ree Xiil, naj tijb tanc ro', diidx hebreo lan Betesda, yu' gaay xcurduran. ³ Yagaj riga' zien ree bënragxuu, zi'c ree bën lutia'p, në ree bencoj con ree bën ad rajctczi rza, cabëz reeman guiniib nijs yu' lën tanc guin. ⁴ Din gocli goc rguiajt tijb xianjl Dios runiibaman nijs guin, abi' bën ru lojnijs guin yaloj chi caniiban, rayajcaman xhietëez gualgüidjxan rajcaman. ⁵ Dxel loj ree bën guin no'ch tijb bejn, ma gojc zi'ctiubichoon ijz ragxuuman. ⁶ Chi baguiaa Jesús laaman naga'man yagaj, abi' gogbeeman guial gocli ragxuuman dxel gunabdiidxaman lojman rëbaman:

—¿Rën! ya yayajquil?

⁷Badxi' bénragxuu guinan rëbaman:

—Dad, achut ra'pan gudxe' naj loj nijs guin chi riniiban. Beegaj chi rënan gayu'n, yalojl ben ren ru.

⁸Dxel rëb Jesús lojman:

—Bixche, baca' ni naal loj, baguiaj.

⁹Loj hor guin gajc bayajc bën guin, baca' ni naaman loj abi' guzuloj cazaman. Per guial dxej zii naj dxej raziiladx ree bën Israel, ¹⁰zianz bën Israel zinal ree ley rëb reeman loj bën bayajc guin:

—Yandxej naj dxej raziiladx bejn, ad zajct yaca' ni go'til loj.

¹¹Badxi' bën guinan rëbaman:

—Bën bayüjn naj naman: “Baca' ni naal loj, baguiaj.”

¹²Dxel gunabdiidx reeman lojman rëb reeman:

—¿Chu na lojl: “Baca' ni naal loj, baguiaj”?

¹³Per bën guin ad ragbeetaman chunin bayüjn laaman guial bi'ch Jesús loj ree benzien riga' yagaj. ¹⁴Chi badxaag Jesús laaman lën yadooro' Jerusalén, abi' rëbaman lojman:

—Baguiaa ma bayajquil, ad güünril dol chitëë gaquil mazri guial loj ni goquil.

¹⁵Dxel zia bën guin abi' biguiedxaman loj ree bën Israel guial Jesús naj bën bayüjn laaman. ¹⁶Zeel guzunal reeman Jesús din gugüjt reeman laaman, guial rüjnman milagr guin ree dxej raziiladx bejn. ¹⁷Per rëb Jesús loj reeman:

—Da Dadan Dios ad rbëzt rüjnman ni rayal güünman, zeel nëgajc naj rün zi'c rüjnman.

¹⁸Zianan zeel mazri rejs guzuj reeman din gugüjt reeman laaman, ad guialzi rüjntaman ni ad najt gac dxej raziiladx bejn, në guial rüjn laagajcaman zi'c Dios chi rnieeman guial quijb xDadaman naj Dios.

Xguialrniabee Xi'n Dios

¹⁹Rëb Jesús loj reeman:

—Diidxliczi rnin, achet zajc güün Xi'n Dios por xixgabzaman, rüjnman ni ruguiaaman rüjn xDadaman. Din graczi ni rüjnman rüjn gajc xi'nman. ²⁰Din Dios rën xi'nman abi' rulüüman laaman gra ree ni rüjnman. Abi' mazri naj ni gulüü loj xi'nman ni yadxa da't lojdi. ²¹Din zi'c rashan Dios bengüt ree rudëë tëëman guialnaban loj reeman, ziangajc rudëë xi'nman guialnaban loj ree bën nünjman xgab. ²²Abi' ad Diost rüjn guialguxtis, bazuj xi'nman din güünman guialguxtis, ²³din gap gra ree bejn xi'nman respejt zi'cgajc rajp reeman laaman respejt. Bën ad rajpt Xi'n Dios respejt, ad rajp gajctaman respejt xDadaman Dios, bën guxhaal laaman.

²⁴Diidxliczi rnin: Bën ruzoob da diidxan rliadx tëëman Dios, bën guxhaal naj, laaman ma rajp guialnaban tiblyaa lojman. Abi' ad rayaltraman casti din ad najtraman zi'c bengüt par Dios, rajpaman guialnaban lojman.

²⁵Diidxliczi rnin ma bidxin hor, abi' yandxej gajcan, bën naj ree zi'c bengüt loj Dios gucaagdiajg reeman cha' xi'nman. Abi' ree bën guzoob xtiidxaman zajp reeman guialnaban tiblyaa con Dios. ²⁶Din zi'c rajp Dios guialnaban, lasa'gajc guialnaban guin ma badëë loj xi'nman, ²⁷abi' badëëman guialrniabee lojman din güünman guialguxtis, din laaman naj Bën guxhaal Dios loj guidxliuj. ²⁸Ad bal radxa lojdi ni rnin, din zadxin dxej guien gra ree bengüt cha' Xi'n Dios, ²⁹abi' yarii reeman lën baa. Dxel bën been ree ni ruladx Dios,

yaban reeman, din gap reeman guialnaban tiblyaa con laaman. Guíaad ree b́en been ni mal, yaban reeman din yayal reeman casti ni rayal reeman.

Ni rultüü guialrniabee rajp Jesús

³⁰ 'Achet zajc gúnan por da xgabzan, rúnan guialguxtis zi'c rniabee da Dadan. Abi' rúnan guialguxtis zi'c rayal, din ad rúntanan zi'c naj da xgaban, rúnanan zi'c ŕen da Dadan b́en guxhaal naj. ³¹ Bal gü da diidx gajcan, achet lasajcan. ³² Per yu' ben ren rú da diidxan, abi' ragbeechaawan guial diidxlin. ³³ Ĺejt guxhaal b́en bignabdiidx ree loj Waj, abi' laaman ganax ni diidxli gunaman. ³⁴ Majsi ad ryaadxt yadxi'n ni gunee ree bejn por naj, per canin lojdi ni guna Waj din chililadxidi gap t́eédi perdon. ³⁵ Waj goc zi'cgajczi tijb bajl ni re'c abi' rusnin, guíaad ĺejt dád babaadi bidxga'di tijb tiamp ni balüüman ĺejt. ³⁶ Per naj mazri naj ni gulún ĺejt guial loj ni balüü Waj ĺejt por naj. Din ni na da Dadan Dios gúnan, laanan cayúnan yan din guiguien guial diidxli laaman guxhaal naj. ³⁷ Ńe da Dadan b́en guxhaal naj, laagajcaman be da diidxan, majsi ad waguiejntidi cha'man ad waguiaa t́eéti laaman. ³⁸ Ad yu'guic t́eéti xtiidxaman zeel ad ŕiladxtidi b́en guxhaalaman. ³⁹ Ĺejt con cudad da't roolidi loj xtiidx Dios, guial ragbeedi con laan gapidi guialnaban tiblyaa con Dios. Abi' majsi loj xtiidx gajcaman ruza't naj, ⁴⁰ per ad ŕentidi chililadxidi naj din gapidi guialnaban guin.

⁴¹ 'Naj ad raguiltan guilies ree bejn da valoran. ⁴² Abi' ragbeechaawan guial ad walit ŕendi Dios. ⁴³ Naj zial por da Dadan abi' ad ridxga'tidi naj. Per bal stíjb bejn gui't por laagajcaman, laaman guidxga'di. ⁴⁴ ¿Xoza chililadxidi naj? Awa mazri nagueijn ŕjndi guilies ree bejn xvaloridi luar yaya'ndi zagdxo loj b́en naj tijbzi Dios. ⁴⁵ Ad bal naladxidi naj gabec xguialquiadi loj Dios, din b́en cwe'c xguialquiadi naj Moisejs, b́en rb́ezidi güün ĺejt yudar. ⁴⁶ Bal bililadxidi ni ŕeb Moisejs, ńe naj zaliladxidi, din Moisejs bacaa loj xtiidx Dios lod ruza't naj. ⁴⁷ Per bal id ŕiladxtidi ni bacaaman, ¿xoza chililadxidi ni rnin ĺejt?

6

Bayaan Jesús gaay mil bejn (Mt. 14:13-21; Mr. 6:30-44; Lc. 9:10-17)

¹ Chi gudéd gojc zian, dxel źe Jesús stiblad ro'nijsdoo riga' niz Galilea, nijsdoo la gajc Tiberias. ² B́enguixiuj binal laaman, guial ruguiaa reeman milagr ree ni ŕjnmán rayüjnman b́enragxuu ree. ³ Dxel ẃe'paman tijb ruguia' abi' gurené ree xbejnman. ⁴ Dxejzii ree ma zidyob pascw, xlanij ree b́en Israel. ⁵ Chi gules loj Jesús, abi' baguiaaman źeéd ree b́enguixiuj lod za'man, dxel ŕebaman loj Felip:

—¿Ban yusii ree ni gaw gra ree b́en guin?

⁶ Per ŕebzaman zian din guidoon xhie guiéb Felip, din Jesús mal ragbeeman xhie güünman. ⁷ Dxel badxi' Felipan ŕebaman:

—Ni'qui ni ŕjñ bejn gan loj xhujñ b́eew ad zadaant yo' guiadxtil din gaw tijbgaj reeman majsi tiblya'dogajzan.

⁸ Dxel gunee stíjb xbejn Jesús, b́en la Andrejs bijch Simón Béd, ŕebaman:

⁹ —Laa tijb xindo ca' gaay guiadxtil con zatio'p b́ejl za' guie. Per, ¿t́e'czi taan ni guin par gra b́en guin?

¹⁰ Dxel ŕeb Jesús:

—Gol güjdx loj gra reeman din cwe reeman.

Abi' guial yu' da't guixya' yagaj, dxel gurej reeman. Naj reeman cost gaay mil xinguaaw. ¹¹ Dxel cwa' Jesús guiadxtil guin ree. Chi gulox badëeman quixtëe loj Dios, badëeman laa reen loj ree xbejnman persi gudi's reeman laa reen loj gra ree bén zobj yagaj. Ziangajc beenman con ree bëjl guin, badëeman laa reen zi'ctzi güyën reeman. ¹² Chi ma bixienladx reeman, dxel rëbaman loj ree xbejnman:

—Gol bato'p gra ree ni laay baya'n, chitëe xhie guizëëb.

¹³ Zianz bato'p reeman laa reen, abi' bacha reeman chiptio'p dxüm nilaay baya'n ree loj gaay guiadxtil guin. ¹⁴ Chi baguiaa ree bejn milagr narooob ni been Jesús, rëb reeman:

—Walican bén guin naj bén rudëe xtiidx Dios loj ree bejn, bén naj gui't loj guidxliuj.

¹⁵ Per gogbee Jesús guial rën reeman chinë naguiejn reeman laaman din güün reeman laaman rey, dxel bazaman yagaj, wë'paman mazri ladya guijc guia' guin, lod su xtijbaman.

Rza Jesús lonijsdoo

(Mt. 14:22-27; Mr. 6:45-52)

¹⁶ Chi ma cabej guiaal, biguiajt ree xbejn Jesús ro'nijsdoo, ¹⁷ guyu reeman loj tijb barcw, abi' cadëd reeman loj nijs guin din guidxin reeman Capernaum. Ma bicajy, guiáad Jesús gadaman yadxin. ¹⁸ Dxel guzuloj cabi' bidoxh abi' wajs xtüjp nijs guin. ¹⁹ Chi ma gojc zi'c gaay o xho'p kilometro zë reeman, baguiaa reeman caza Jesús lojnijs guin cabigaman lod zë barcw guin, dád bidxeb reeman. ²⁰ Per rëbaman loj reeman:

—¡Najn, ad rdxebidi!

²¹ Dxel güyën reeman niuman loj barcw guin, per hor guin gajc bidxin reeman lod zë reeman.

Bigdiil ree bén bayaan Jesús laaman

²² Chi bareguiaal, bén riga' ree stiblad ro' nijs guin, ragbee reeman guial tijbzi barcw guzu yagaj, abi' gogbee reeman, lojn zë ree xbejn Jesús per ad nët laaman. ²³ Loj hor zii bidxin ree barcw ren za guiedx Tiberias, gajxh lod gudaw reeman guiadxtil chi gulox badëëd Jesús quixtëe loj Dios. ²⁴ Chi baguiaa reeman achutri Jesús za' yagaj ni'qui ree xbejnman, dxel wë'p reeman loj ree barcw guin, zë reeman Capernaum zigdiil reeman laaman.

Jesús naj bén rudëëd guialnaban

²⁵ Chi bidxin reeman Capernaum, badxejl reeman Jesús, abi' gunabdiidx reeman lojman, rëb reeman:

—Mextr, ¿goc bi'til guie?

²⁶ Badxi' Jesúsán rëbaman:

—Ragbeechaawan, raguilidi naj guial gudawidi xt bigdinxladxidi, ad guial baguiaatidi milagr ree ni rünan. ²⁷ Ad chu'di xgab guialraw rara, gol guyu xgab guialraw runee guialnaban tiblyaa con Dios. Din laan naj ni runee Bén guxhaal Dios loj guidxliuj guial ma bacaabee Dios laaman.

²⁸ Dxel gunabdiidx reeman lojman rëb reeman:

—¿Xhie rayal yaguieenan din chile' yaguieenan ni rën Dios?

²⁹ Badxi' Jesús laan rëbaman:

—Ni rën Dios güündi naj guial chililadxidi bén guxhaalaman loj guidxliuj.

³⁰ Dxel rëb reeman lojman:

—¿Xhie gulüül dunujn din yaliduladxan lüj? ¿Xhietëe ree milagr rüjnl?

³¹ Dux béngulal ree gudaw reeman mana chi guzu reeman niz loj yujbidx, zi'c

rëb loj xtiidx Dios: “Badëëman guidxtil biajb xanyabaa loj reeman gudaw reeman.”

³² Badxi' Jesús laan rëbaman:

—Naj rni lojdi: Ad Moisejst badëëd guidxtil guin, da Dadan naj bën runeë quijb guidxtil za xanyabaa. ³³ Guidxtil runeë Dios, laan bi't diizd xanyabaa abi' runeë guialnaban loj bénguidxliuj.

³⁴ Abi' rëb reeman lojman:

—Dad, baneë guidxtil guin du lojn zianczi.

³⁵ Rëb Jesús loj reeman:

—Naj naj guidxtil runeë guialnaban guin. Bén gui't lon, ad yu't dxej guiliaanman, ziangajc bën chililadx naj, ad yu't dxej che'caman nijs. ³⁶ Per zi'c rnin lojdi, majsi ma baguiaadi naj, ad rliladxtidi naj. ³⁷ Gra ree bën ma baneë da Dadan lon, gui't reeman lon, abi' bën gui't lon, ad zasiejctan laaman. ³⁸ Din naj zial diizd xanyabaa, zidgaguienan zi'c rën da Dadan bën guxhaal naj, ad par güntan zi'c rënan. ³⁹ Da Dadan bën guxhaal naj, ni rënman naj guial gra ree bën baneëman lon ni'qui tijb reeman ad zunijttan, rënman yasbanan laa reeman chi nit guidxliuj. ⁴⁰ Din rënman guial gra ree bën yayagbee Xi'nman chililadx tée reeman laaman, gap reeman guialnaban tiblayaa con laaman, guiáad naj yasban laa reeman chi nit guidxliuj.

⁴¹ Dxel guzuloj ree bën Israel caneeguidx reeman Jesús, guial rëbaman: “Naj naj guidxtil ni biguiajt diizd xanyabaa.” ⁴² Abi' rëb reeman:

—¿Nid laaxan naj Jesús ya, xi'n Xiëb? Dunuj ree naguieenbee xdadix con xniaax. Yan, ¿chexc zeel nax xanyabaa biguiajtitx?

⁴³ Dxel rëb Jesús:

—Gol bacwëëz rnieeguidxidi naj loj lasa'di. ⁴⁴ Dios naj bën guxhaal naj. Achut zile' gui't lon bal id zëëdaman por da Dadan, abi' naj yasban laaman chi nit guidxliuj. ⁴⁵ Loj ree libr ni bacaa ree bën badëë xtiidx Dios loj ree bejn, rëb: “Dios gulüü gra ree bejn.” Zeel gra ree bën rucaagdiajg xtiidxaman, rusiid tée reeman ni ruluüman laa reeman, laa reeman zëed lon.

⁴⁶ Achutdzi waguiaa da Dadan Dios, tijbzi bën guxhaalaman loj guidxliuj ma baguiaa laaman. ⁴⁷ Diidxliczi rnin, bën rliladx naj rajpaman guialnaban tiblayaa con Dios. ⁴⁸ Naj naj guidxtil ni runeë guialnaban. ⁴⁹ Xbéngulalidi gudaw mana loj yujbidx, per ni'czi zian güjt gajc reeman. ⁵⁰ Per naj canin lojdi xcwent guidxtil za xanyabaa, bën gaw laan gapaman guialnaban tiblayaa con Dios. ⁵¹ Naj naj guidxtil naban ni biyajb diizd xanyabaa. Bén gaw guidxtil guie zajpaman guialnaban tiblayaa con Dios. Guidxtil ni rudëdan, laan naj quijb da cuerpan, gudëdanan din gap ree bénguidxliuj guialnaban.

⁵² Dxel guzuloj ree bën Israel guin cadildiidx reeman, rëb reeman:

—¿Xhienaag gunee xin guin xcuerpix yadaaw ree?

⁵³ Abi' rëb Jesús loj reeman:

—Naj rni lëjt, bal id zajwidi xcuerp Bén guxhaal Dios, bal id zë' tëëdi xrejnman, ad zajptidi guialnaban. ⁵⁴ Per bën gaw da cuerpan guië' tëëman da rejnman, zajpaman guialnaban tiblayaa con Dios, abi' naj yasban laaman chi nit guidxliuj. ⁵⁵ Din da cuerpan naj quijb guialraw, guiáad da rejnman naj quijb ni guië' bejn. ⁵⁶ Abi' bën raw da cuerpan rë' tëëman da rejnman, laaman nabannë naj, guiáad naj nabannë' laaman. ⁵⁷ Da Dadan bën guxhaal naj, rajpaman guialnaban, abi' naj nabanman por laaman. Ziangajc bën gaw da cuerpan, zajpaman guialnaban tiblayaa con Dios por naj. ⁵⁸ Naj cani xcwent guidxtil ni biguiajt xanyabaa. Abi' guidxtil guie ad najtan zi'c naj mana ni

gudaw xbéngulalidi, din laa reeman majsi gudaw reeman mana guin, per güjt gajc reeman. Guiáad bén gaw guiadxtil guie zajpaman guialnaban tiblyaa con Dios.

⁵⁹ Zian balüü Jesús bejn ree lén yadoo Capernaum.

Diidx runee guialnaban tiblyaa

⁶⁰ Chi gulox bacaagdiajg reeman ni balüü Jesús laa reeman, zien ree bén zinal laaman rëb:

—Nawëëg da't naj yayignia' ree ni naman. ¿Chu zajc guidxga' laaman?

⁶¹ Chi gogbee Jesús ni canee reeman, gunabdiidxaman loj reeman, rëbaman:

—¿Rüjmmaa ni rnin lëjt ya? ⁶² ¿Xhieza güündi bal guguaadi Bén guxhaal Dios yayë'paman lod guzuman gocli? ⁶³ Tijbzi por xSprijt Dios rajp bejn guialnaban tiblyaa, bejn ad zile't güün laazaman xhienin. Abi' naj por xSprijt Dios zëëd ree diidx ni gunen lojdi, por ree diidx guin rajp bejn guialnaban. ⁶⁴ Per lëjt yu'di ad waliladxt.

Rëb Jesús zian guial ragbeechaawaman diizd yaløj chu ree ad rliladxt laaman chu tëë yayü laaman. ⁶⁵ Rëb tëëman loj reeman:

—Zeel ma rnin lojdi guial achut zile' gui't lon bal id zëëdaman por da Dadan Dios.

⁶⁶ Diizd nadxel, zien ree bén zinal Jesús guro'nladx laaman, abi' ad guzanëtri reeman laaman. ⁶⁷ Dxel rëb Jesús loj guidxiptio'p ree xbejnman:

—¿Në lëjt rën yaguiay ya?

⁶⁸ Per badxi' Simón Bëd laan, rëbaman:

—Dad, ¿chu loj yo'n? Awa xtiidxil zidnë guialnaban tiblyaa con Dios.

⁶⁹ Dunujn ma baliduladx rayagbee tëën guial lüj naj Cristo, Xi'n Dios naban.

⁷⁰ Dxel rëb Jesús loj reeman:

—¿Nid naj gule guidxiptio'pidi ya? Abi' yan tijb gajqui lëjt naj zi'c xindxab.

⁷¹ Rëb Jesús zian por Judas Iscariote, xi'n Simón, din Judas guin naj Bén bayü laaman, majsi tijb gajc xbejnman najman.

7

Ad rliladxt ree bijch Jesús laaman

¹ Chi gudëd gojc zian, wej Jesús loj ree guiedx riga' niz Galilea. Ad guyëntaman niejman niz Judea, guial cayguuil ree Bén Judea guin laaman din gugüjt reeman laaman. ² Per guial ma zidyob lanij ni rüjn ree Bén Israel, chi rbej reeman lën ranch, ³ rëb ree bijch Jesús lojman:

—Brii, wej niz Judea, din në ree xbejnl Bén riga' ree niz ni guguaaa milagr rüjnl. ⁴ Din chi chu rën ragbee bejn ni rüjnman, ad rayalt güünman laan ralan. Yan zi'c rüjnl milagr ree, beenan loj gra ree bejn.

⁵ Gunee ree bijch Jesús zian, guial ni'qui laa reeman ad rliladxt laaman.

⁶ Dxel rëb Jesús loj reeman:

—Ad wadxint da horan, per par lëjt xhietëëz horan naj zagdxe. ⁷ Ad zajct guidxe'ch bënguidxliuj lëjt, sa'n naj rdxe'ch reeman naj guial rën loj reeman ad laat naj ni rüjn reeman. ⁸ Gol wej lanij guin, sa'n naj ad zazaagajtan, din ad wadxint hor ni gazaan.

⁹ Chi gulox rëbaman loj reeman zian, baya'nman Galilea.

Wej Jesús xlanij ree Bén Israel

10 Chi ma zë ree bijch Jesús, dxel nëman zë lanij guin, per ralanzi zëman chitëe chu gagbee. 11 Per yu' ree bën Israel raguiil laaman loj lanij guin, rëb reeman:

—¿Con bën guin ya'n?

12 Loj gra ree benzien we lanij guin, zienloj ni rniee reeman Jesús. Yu' reeman rëb: “Benza'can”, yu'za reeman rëb: “Ad benza'ctan, rusquieeman bejn ree.”

13 Per achutczi ruza't laaman loj gra bejn, guial rdxeb reeman guxtis Israel ree.

14 Chi gurol xuman ni cayajc lanij guin, guyu Jesús lën yadooro' Jerusalén, abi' guzuloj culüüman bejn ree. 15 Guiáad ree bën Israel badxaloy reeman, rëb reeman:

—¿Chexc ya'n contzi gra ragbeex, awa ni'quid basiiditx?

16-17 Dxel rëb Jesús loj reeman:

—Ad guictan carii ni culün lëjt, zëedan por Dios, bën guxhaal naj. Bal chu rën güün zi'c rënman, zignia'man bal ni carii guicanan culün lëjt o zëedan por Dios ya. 18 Bën rulüü ganaxzi ni rbëëgujcaman, rüjnman laan din guilies ree bejn xvaloraman. Per bën rüjn mazri din guilies bejn xvalor Dios, bën guxhaal laaman, laaman rniee ni diidxli, ad rusquieetaman bejn.

19 Yan, majsi basa'nnë Moisejs lëjt ley, per ni'qui tijbidi ad rüjnt zi'c rëb ley guin. ¿Chexquiza zeel rëndi gugüjtidi naj?

20 Badxi' ree bën guinan, rëb reeman:

—Xindxab yu' luxdool. ¿Chuczi rën gugüjt lüj?

21 Abi' rëb Jesús loj reeman:

—Por tijbzi milagr ni benan radxaloydi. 22 Abi' lëjt gunabee Moisejs lëjt guial gra ree xinguaaw chu' sen, (majsi ad por Moisejst ru bejn sen guin, mal rüjn ree dux bengol gulal ree zian), abi' lëjt rgu'di bejn ree sen, majsi dxej raziiladx bejn. 23 Yan, bal chitëe gusaglojdi ley ni basa'nnë Moisejs lëjt, rgu'di sen bejn ree majsi dxej raziiladx bejn. ¿Chexquiza zeel ralendi guial bayünan tijb bënragxuu dxej raziiladx bejn? 24 Ad rüjndi xgabmal por ni ruguiaazidi rüjn bejn, yaloy xgaj gol gogbee zagdxe xhie cayüjnman.

Rëb Jesús ban zaman

25 Yu' ree bën Jerusalén guzuloy rniabdiidx loj lasa' reeman, rëb reeman:

—¿Nid bën guinan cayguiil reeman ya din gugüjt reeman laaman? 26 Abi' yan laaman canee niz loj ree bejn, abi' ni'qui chut xhie rëb lojman. ¿Ni ma bililadx ree guxtis ya'n guial laaman naj Cristo? 27 Per dunuj ree rayagbeechaaw ban zaman, guiáad chi gui't Cristo, achut gagbee ban saman.

28 Chi biguiejn Jesús zian, la'tgaj culüüman bejn ree lën yadooro' Jerusalén, dxel guneeman rejs rëbaman:

—¿Lëjt rëb nünbeedi naj abi' ragbeedi ban guzaan! Per ad zialtan por naj gajc, zialan por quijb bën rniabee bën ad nünbeetidi. 29 Per naj nünbee laaman guial zialan diidz lod za'man, laa tēeman guxhaal naj.

30 Chi biguiejn reeman zian, guyën reeman niniaaz reeman laaman, per achut gunaaz laaman, guial gad hor gal guiniaazaman. 31 Loj ree bénguixiuj za' yagaj zien reeman bililadx laaman, abi' rëb reeman:

—Chi gui't Cristo, ¿wen mazri zien ree milagr güünman guial loj bën guin ya?

³² Biguiejn ree b́enfarisew ni rniee ree bejn Jeśus. Abi' laa reeman con ree bixhioz rniabee, guxhaal reeman b́en rajp ree ro' yadooro' Jerusalén din guiniaaz reeman Jeśus. ³³ Dxel ŕeb Jeśus:

—Ad xchejtri gazuné'n léjt, dxel yaya'n lod za' b́en guxhaal naj.

³⁴ Yaguilidi naj, per ad zadxejltidi naj, din ad zile't gui'tidi lod gazun.

³⁵ Abi' ree b́en Israel guin guzuloj rniabdiidx loj lasa' reeman, ŕeb reeman:

—¿Banczi zajc che b́en guin din ad zadxejltaman? ¿Ni zejman lod zojb ree b́en Israel loj ree benzit ya, chiglúüman laa reeman nê ree b́en ad najt b́en Israel? ³⁶ ¿Xhie ŕen guié'b guial naman: “Yaguilidi naj per ad zadxejltan, din ad zile't gui'tidi lod gazun”?

Nijs runee guialnaban

³⁷ Dxej rliox lanij guin naj mazri dxej zojbloj, dxejzii guzuli Jeśus guneeman rejs, ŕebaman:

—Bal chu léjt re'c nijs, gol guda lon din guié'dan. ³⁸ Din b́en rliiladx naj zi'c ca loj xtiidx Dios, lén luxdooman gach nijs runee guialnaban.

³⁹ Chi guneé Jeśus zian, ŕen guié'b xtiidxaman guial gra ree b́en chililadx laaman zabajnnê reeman xSprijt Dios. Din nadxel ad wayi'tt xSprijt Dios guial ad waguiajt Jeśus lod canabeeman.

Gula' lasa' ree bejn

⁴⁰ Yu' ree b́en no'ch loj ree benzien guin, chi bacaagdiajg reeman ni guneé Jeśus, ŕeb reeman:

—Walican, b́en guin naj gui't guidgadéë xtiidx Dios loj ree bejn.

⁴¹ Yu'za reeman ŕeb:

—B́en guin naj b́en bacaabee Dios.

Per yu' reeman ŕeb:

—Ad laataman naj Cristo, din ad niz Galileat naj griiman. ⁴² Loj xtiidx Dios ca guial loj xdiaa rey Davi grii Cristo, abi' Belén galaman ladx gajc rey Davi.

⁴³ Zian gojc dxel gula' lasa' reeman por Jeśus. ⁴⁴ Zien reeman guyén niniaaz laaman, per achut bayax niniaaz laaman.

Ad bililadxt ree guxtis Jeśus

⁴⁵ Chi bayejc ree b́en rajp ro' yadoo guin lod za' ree b́enfarisew guin con ree bixhioz rniabee guin. Ŕeb reeman loj reeman:

—¿Chexc zeel ad bidnétidi laax?

⁴⁶ Dxel ŕeb ree b́en rajp ro' yadoo guin:

—¡Ad goct wayu b́en guinee zi'c rnieex!

⁴⁷ Abi' ŕeb ree b́enfarisew guin:

—¿Nê léjt ma cwéjb basquieex léjt ya? ⁴⁸ ¿Wen yu' ree dux guxtis ree, o b́enfarisew ree ma bililadx laax ya? ⁴⁹ ¿Nid ragbeedi ya guial zien ree b́en guin banijt loj Dios guial ad núnbeet reeman ley?

⁵⁰ Per b́enfarisew la Nicodemo b́en bignaj Jeśus tijb guxhin, ŕebaman loj reeman:

⁵¹ —Loj dux ley ree ca guial ad zile't yaguie'ch ree xhie casti rayal tijb bejn, chi gad dunuj ree yacaagdiajg xtiidxaman, din chile' yayagbee ree xhie beenman.

⁵² Badxi' reeman laan ŕeb reeman:

—¿Wen nê lúj za'nê ree b́en Galilea ya? Basiid zagdxe loj xtiidx Dios din gagbeel ad goct warii b́en rudéë xtiidx Dios loj ree bejn niz Galilea.

⁵³ Dxel bare'ch reeman zia lidx lidx reeman.

8

Béngunaa banaaznë xinguaaw ren

1 Per Jesús zëman ruguia' Olivos. 2 Chi bareguiaal, rsil badxinman lën yadooro' Jerusalén stijb. Zien ree bejn bido'p lod za'man, dxel gurejman guzuloj culüüman laa reeman. 3 Abi' mextr rulüü ree ley con ree bénfarisew bidxinnë tijb béngunaa banaaznë tijb xinguaaw, dxel bazuj reeman laaman galay ree bén guin, 4 zianz rëb reeman loj Jesús:

—Mextr, banaaz béngunaa guie loj mer hor ni yu'nëman xinguaaw ren.

5 Abi' loj ley basa'nne Moisejs dunuj ree ca guial lasa' béngunaa guie rayal guiëtaman con guiaj. ¿Laadx lüj xhie nal?

6 Gunabdiidx reeman zian din guidoon xhie guiëbaman din gac gutedia' reeman laaman. Per con basajb lojman abi' guzulojman cucaaman luyuj con xbacwënman. 7 Per guial laa reeman canabdiidxzi canabdiidx reeman lojman, abi' babejlman, rëbaman loj reeman:

—Chutëez bén ad wayüjnt dol, yaløj laaman gucaaguiaj béngunaa guie.

8 Dxel basajb lojman stijb, basnuu bacaaman luyuj guin. 9 Chi bigueijn reeman ni guneeman, guzuløj cayza tijbgaj reeman, diizd mazri bengol xt bara reeman baza. Tijbzi béngunaa guin baya'n con Jesús loj ree bén riga' yagaj. 10 Dxel babejlman, rëbaman loj béngunaa guin:

—¿Con ree bén bidnë lüj? ¿Ni'qui tijb reeman achut xhie been lüj ya?

11 Dxel rëb béngunaa guin:

—Dad, ni'qui tijbaman.

Abi' rëb Jesús:

—Ni'qui naj achet günan lüj. Baguiaj yan, ad güünril dol.

Jesús naj bajl par bénguidxliuj

12 Dxel gunee Jesús stijb, rëbaman loj ree bén riga' yagaj:

—Naj naj bajl rusni bénguidxliuj. Abi' bén guzoob da diidxan, zani xquiar-gueijnman xhienaag gapaman guialnaban tiblayaa con Dios, ad yu' tëet dxej guicajy xquiar-gueijnman.

13 Abi' ree bénfarisew rëb reeman lojman:

—Lüj gajc ruza't lüj, abi' achet lasajc xtiidxil.

14 Dxel rëb Jesús loj reeman:

—Lasajc da diidxan, majsi naj gajc cane por naj, din naj ragbee ban zialan ban tëe gan, sa'n lëjt ad ragbeetidi ban zialan ban tëe gan. 15 Lëjt rnieedi bejn zi'ctizi naj xixgabidi, sa'n naj achut ruzatan. 16 Abi' bal guzatan bejn, ganen diidxli, din ad zanetan zi'c naj da xgaban, në da Dadan bén guxhaal naj ragbee guial diidxli naj ni ganen. 17 Abi' loj xleydi ca guial chi yu' tio'p bén rniee tiblojzi, diidxliqui naj ni rniee reeman. 18 Yan, naj gajc naj tijb bén rniee por naj, abi' da Dadan bén guxhaal naj, naj stijb bén rniee por naj.

19 Gunabdiidx reeman lojman rëb reeman:

—¿Con xdadil?

Badxi'man laan rëbaman:

—Lëjt ad nünbeetidi naj, ad nünbee tëetidi da Dadan, din bal nünbeedi naj, ziangajc nünbeedi da Dadan.

20 Zian gunee Jesús la'tgaj rulüüman bejn ree lën yadooro' Jerusalén, niz lod za' ree ni rgu' reeman gon. Per achut gunaaz laaman, din ad wadxint hor guiniaazaman.

Lod gan ad zile't gui'tidi

21 Gunee Jesús stijb, rëbaman:

—Chi ma gan, zaguulidi naj, per zëjtnë xtolidi, din lod gan ad zile't gui'tidi.

²² Dxel rëb ree bën Israel guin:

—¿Wen ni laagajcaman gugüjt laaman ya, zeel naman guial ad zajct yo' ree lod cheman?

²³ Abi' rëb Jesús loj reeman:

—Lëjt naj bën ladguiajt guie, sa'n naj ladya ni zialan. Lëjt naj bénguidxliuj, sa'n naj ad bénguidxliujt naj. ²⁴ Zeel rnin, zëjtnë xtolidi. Din bal id zaliladxidi guial naj naj bën najn, zëjtnë xtolidi.

²⁵ Dxel gunabdiidx reeman lojman, rëb reeman:

—¿Chuzi lüj?

Badxi'man laan rëbaman:

—Ma rnin lojdi diizd yaloj. ²⁶ Zien ni ra'pan gulün lëjt ni ganenë' tëen lëjt. Per naj, ni canen loj bénguidxliuj naj ni rucagdiagan rniee bën guxhaal naj, abi' ni rnieeman naj diidxli.

²⁷ Per laa reeman ad gogbeet guial Diosan ruza'taman. ²⁸ Zeel rëbaman loj reeman:

—Chi ma beendi zi'ctizi rëndi con Bén guxhaal Dios, dxel gagbeedi najcan, gagbee tëedi guial achetctzi rünan por da xgabzan, naj rnie ni ma balüü da Dadan naj. ²⁹ Din laaman guxhaal naj, laaman za' con naj, abi' ad yu't dxej cwëeladxaman naj, guial zianctzi rünan ni rayuladxaman.

³⁰ Chi rëb Jesús zian, zien ree bejn bililadx laaman.

Bén wali naj xbejn Dios

³¹ Rëb Jesús loj ree bën Israel bililadx laaman:

—Bal gusunuu guzoobidi da diidxan, waliqui najdi da bejn, ³² abi' züjnbeedi conin naj diidxli, abi' por diidxli guin zalaadi.

³³ Badxi' reeman laan rëb reeman:

—Dunujn zio'p loj xdiaa Abraham, abi' ad yu't dxej wayajcan zi'c bën nado'. ¿Chexquiza zeel nal du lojn, guial por diidxli zalaan?

³⁴ Dxel rëbaman loj reeman:

—Diidxli rnin lojdi, guial graczi bën rüjn ganaxzi dol, laa reeman naj zi'c bën nado' loj dol. ³⁵ Abi' tijb bën nado' loj bejn, ad zile't guiëbaman xfamilaman naj xpatronman, sa'n xi'n patron guin zile' guiëbix xfamilixan.

³⁶ Zeel bal Xi'nman guslaa lëjt, ad najtridi zi'c bën nado'. ³⁷ Ma qui ragbeen guial loj xdiaa Abraham zëedidi, per lëjt rën gugüjt naj guial ad rayuladxtidi da diidxan. ³⁸ Naj rni ni ma balüü da Dadan naj, sa'n lëjt rüjndi zi'c na xDadidi güündi.

³⁹ Badxi' reeman rëb reeman:

—Dux Dadan naj Abraham.

Dxel rëb Jesús loj reeman:

—Bal niajquidi xi'n Abraham, züjndi zi'c beenman. ⁴⁰ Per yan, majsi ma rnin lëjt diidxli zi'c balüü Dios naj, lëjt rëndi gugüjtidi naj. ¡Abi' Abraham ad yu't dxej nüjnman zian! ⁴¹ Sa'n lëjt rüjndi zi'cgajc rüjn xDadidi.

Abi' rëb reeman loj Jesús:

—Dunujn achut mazri xi'n nayaajcan. Tijbzi Dios naj dux Dadan.

⁴² Dxel rëb Jesús loj reeman:

—Bal walidi Dios naj xDadidi, guiëndi naj, din por laaman zialan loj guidxliuj. Ad zialtan por naj gajc, zialan por Dios bën guxhaal naj. ⁴³ Abi' ad rignia'tidi ni rnin, guial ad rëntidi gucaagdiajguidi da diidxan. ⁴⁴ xDadidi naj xinxab, abi' rüjndi zi'c rënx güündi, din diizd yaloj ruladx xinxab guin gugüjtix bejn. Ad yu't dxej chinalix ni naj diidxli, din ad rnieetix

diidxli. Chi rnieex diidx rusquiee, achet naladxix, din laax naj xin rusquiee naj tēex xdad gualrusquiee. ⁴⁵ Per guial naj rni lējt ganax diidxli, ad rliładxtidi naj. ⁴⁶ ¿Chu lējt zajc na guial yu' xhie dol ma benan? Abi' bal diidxli naj ni canen, ¿chexquiza zeel ad rliładxtidi naj? ⁴⁷ Bén naj xbejn Dios rucaagdiajgaman xtiidxaman, per lējt ad xbejntaman najdi, zeel ad rucaagdiajgtidi xtiidxaman.

Mal yu' Jesús chi gad Abraham gal

⁴⁸ Dxel rēb ree bén Israel guin loj Jesús:

—Waliqúi ni ranan guial xindxab yu' luxdool naj tēel bén Samaria.

⁴⁹ Badxi'man laan rēbaman:

—Achut xindxab yu' luxdon, naj cuzob xtiidx da Dadan, per lējt ganax diidxguijdx rnieedi naj. ⁵⁰ Naj ad raguiltan guilies ree bejn da valoran, majsi yu' bén rēn güün bejn zian, abi' laaman rüjn xguialguxtis. ⁵¹ Diidxli rnin lējt, bén guzoob da diidxan, ad yu't dxej guiētaman.

⁵² Dxel rēb ree bén Israel guin lojman:

—Yanri ma rayagbeechaawan guial xindxabqui yu' luxdool. Abraham nē gra ree bén badēē xtiidx Dios loj ree bejn, güjt reeman, guiáad lüj nal: “Bén guzoob da diidxan, ad yu't dxej guiētaman.” ⁵³ ¿Wen mazri lasajquil ya guial loj dux béngulal ree Abraham? Güjtaman, güjt tēē ree bén badēē xtiidx Dios loj ree bejn. ¿Laadx lüj chu naladxil najl?

⁵⁴ Abi' rēb Jesús loj reeman:

—Bal naj gajc gales da valoran, achet lasajc ni ganen por naj. Per bén rlies da valoran naj da Dadan, bén nagajquidi naj xDiosidi. ⁵⁵ Lējt ad nünbeetidi laaman, sa'n naj nünbeen laaman. Abi' bal ganin ad nünbeetan laaman, nēgajc naj ma naj bén rusquiee zi'cgajc lējt. Per nünbeen laaman abi' ruzoban xtiidxaman. ⁵⁶ Xbéngulalidi Abraham, babaaman guial guguaaman dxej ni guialan. Abi' chi baguaaaman dxej guin, mazri babaaman.

⁵⁷ Dxel rēb ree bén Israel guin lojman:

—Ni'qui gadil chu' tü'pchii ijz, ¿guiáad lüj ya nal baguaaal Abraham?

⁵⁸ Abi' gunee Jesús rēbaman:

—Diidxli rnin lojdi, mal nabanan chi gad Abraham chu'.

⁵⁹ Dxel gules reeman guiaj din nucaa reeman laan Jesús. Per laa guzēēb gajcaman galay ree bejn, abi' gudēdaman galay reeman bariiman lēn yadoo guin, laa zia gajcaman.

9

Rayüjn Jesús tijb xin ad ranit loj

¹ Chi cadēd Jesús tiblajt, baguaaaman tijb xin ad ranit loj diizd chi golix.

² Dxel gunabdiidx ree xbejnman lojman, rēb reeman:

—Mextr, ¿chexc zeel ad ranit loj bén guin diizd chi golaman? ¿Por xtol ree xDadaman ya, o por xtol gajcaman?

³ Badxi' Jesúsán, rēbaman:

—Najman zian ad por xtoltaman ad por xtol tēēt ree xDadaman. Gojlaman zian din chi yayajcaman, guguaa ree bejn xguialrniabee narooob Dios. ⁴ Yan, la'tgaj yu' tiamp, rüjn naguiejn yaguieen ree ni na bén guxhaal naj, din ma yayaaloj tiamp ni achetri zajc gac. ⁵ Abi' la'tgaj za'n loj guidxliuj guie, naj naj bajl rusni bénguidxliuj.

⁶ Chi gulox guneeman zian, guxhie' xhiejnman luyuj, abi' beennēman laan bajn, persi gudēēbaman laan guiaaloj xin guin. ⁷ Abi' rēbaman lojx:

—Bitiib lojl ro' tanc Siloé —Siloé rën guiëb ni guxhaalaman.

Dxel bitiib lojx, abi' chi bayejquix, ma rani lojx. ⁸ Dxel bën zobj ree gajxh lod zobjix con ree bën ragbee guial laax rniab carda, rëb reeman:

—¿Nid xin guinan rbej rniab carda ya?

⁹ Yu' reeman rëb:

—Laaquixan.

Yu'za reeman rëb:

—Ad laatixan, rguienzix zian.

Per laax rëb:

—Najcan.

¹⁰ Dxel gunabdiidx reeman lojx, rëb reeman:

—¿Xhieza naag gojc bani lojl?

¹¹ Badxi'xan, rëbix:

—Bën la Jesús been bajn, gudëëbaman guiaalon abi' naman: “Wej bitiib lojl ro' tanc Siloé.” Dxel wan, chi gulox gudiib lon, max bani lon.

¹² Abi' rëb reeman lojx:

—¿Conzaman yan?

Zeel rëbix:

—Ad ragbeetan.

Gunabdiidx ree bënfarisew loj xin guin xhienaag guzuloj rani lojx

¹³ Loj hor zii binë reeman xin bayajc guiaaloj guin loj ree bënfarisew, ¹⁴ din dxej been Jesús bajn persi bayüjnman guiaaloj xin guin, dxej guin raziiladx ree bejn. ¹⁵ Dxel gunabdiidx ree bënfarisew guin lojx xhienaag guzuloj rani lojx. Abi' rëbix loj reeman:

—Jesús gudëëb bajn guiaalon, dxel bitiib lon, yan ma ranin.

¹⁶ Yu' ree bënfarisew guin rëb:

—Bën bayüjn guiaalojl ad xbejnt Diosan, din ad rajptaman respejt dxej raziiladx bejn.

Per yu'za reeman rëb:

—¿Xhienaag güünman milagr guie ree, bal najman bëndol?

Garent garen rëb reeman. ¹⁷ Abi' gunabdiidx reeman loj xin bayajc guin zatijb, rëb reeman:

—¿Laadx lüj xhie nal chu naj bën bayüjn guiaalojl?

Badxi'xan rëbix:

—Naj rni guial laaman naj bën rudëë xtiidx Dios loj ree bejn.

¹⁸ Per bën Israel guin ree ad rliladxt reeman, din ad banit lojx abi' yan ma ranin, dxel gurejdx reeman xdadix con xnixaax, ¹⁹ abi' gunabdiidx reeman loj reeman, rëb reeman:

—¿Xin guien naj xi'ndi ya, xin rëbidi ad ranit loj diizd gojljix? Yan, ¿xhienaag gojc zeel ma ruguiaax?

²⁰ Badxi' reeman laan rëb reeman:

—Dunujn rayagbee guial du xi'nanan, rayagbee tëen guial diizd chi golix ad ranit lojx. ²¹ Per ad rayagbeetan xhienaag gojc zeel rani lojx, ad rayagbee tëetan chu bayüjn guiaalojx. Gol gunabdiidx lojx, ma najx xingol, ma zajc na laagajquix lojdi xhienaag gojc.

²² Rëb ree xdadix zian guial rdxeb reeman xguxtis ree bën Israel, din ma baya'reeman diidx, chutëëz bën guiëb guial Jesús naj Cristo, ad zatiëjbtri reeman chu'man lën yadoo. ²³ Zianan zeel rëb reeman: “Gol gunabdiidx lojx, ma najx xingol.”

²⁴ Dxel gurejdx reeman laax zatijb, abi' rëb reeman:

—Laa Dios ruguiaa, guna diidxli, din dunujn rayagbee guial béndol naj bén bayüjn lüj.

²⁵ Badxi'xan rëbix:

—Ad ragbeetan bal bëndolan o ad bëndoltan ya. Tijbzi ni ragbeen naj guial ad banit lon, abi' yan ma ruguian.

²⁶ Dxel gunabdiidx reeman lojx stijb, rëb reeman:

—¿Xhienaag beennëman lüj? ¿Xhienaag beenman persi rani lojl?

²⁷ Badxi'xan rëbix:

—Ma rnin lojdi, abi' lëjt ad rliladxtidi naj. ¿Chexc zeel rëndi ganin zatijb xhienaag beenman? ¿Wen në lëjt rën gac xbejnman ya?

²⁸ Dxel gudilë reeman laax rëb reeman:

—Lüj bal najl xbejnman, sa'n dunujn xbejn Moisejs nayajcan. ²⁹ Din dunujn rayagbee Dios gunee Moisejs, per bén guin ni'quid rayagbeetan ban zaman.

³⁰ Badxi'xan rëbix:

—¿Xhiechalin zeel ad ragbeetidi ban zaman! Guiáad naj por laaman ma rani lon. ³¹ Dunuj ree rayagbee chaaw guial ad ridxga't Dios xtiidx ree béndol, ridxga'man xtiidx ree bén ruzoob xtiidxaman rüjn tëë reeman zi'c rënman.

³² Ad goct wacaagdiajg ree guial chu' bén yayüjn loj bén ad ranit loj diizd gojlaman. ³³ Yan, bal id por Dios zëed bén guin, achetczi nile' nünman.

³⁴ Dxel rëb reeman lojx:

—Lüj gojl con dol, ¿wed lüj guluü dunujn?

Abi' babëë reeman laax yagaj.

Bililadx xin bayajc guin Jesús

³⁵ Gogbee Jesús ni guzac xin bayüjnman, dxel chi badxaagaman laax, rëbaman lojx:

—¿Rliladxil bén guxhaal Dios loj guidxliuj ya?

³⁶ Badxi'xan rëbix:

—Dad, guna chunin, din chililadxan laaman.

³⁷ Dxel rëbaman lojx:

—Ma baguiaal laaman, laaman naj bén caneenël.

³⁸ Abi' bazuxib xin guin lojman, rëbix:

—Rliladxan lüj, Dad.

³⁹ Zianz rëb Jesús:

—Bialan loj guidxliuj guie din gūnan guialguxtis, din por naj yani loj ree bén ad ranit loj, guiáad ree bén rani loj, ad zanit loj reeman.

⁴⁰ Yu' ree bënfarisew za'në laaman. Chi biguiejn reeman rëbaman zian, rëb reeman:

—¿Wen në dunujn ad ranit duloj ya?

⁴¹ Dxel rëb Jesús loj reeman:

—Bal id rani lojdi, achet dol rajpidi. Per guial nadi rani lojdi, rajpidi dol por ree xtolidi.

10

Bén rniaj xiil

¹ Rëb tëë Jesús:

—Diidxliczi rnin lojdi, bén ad rut niz ro' xgurajl ree xiil, bén ru niz lood ren, laaman naj bëngubaan. ² Per bén ru niz ro' xgurajl reeb, laaman naj bén rniaj laa reeb. ³ Abi' rxhial bén rajp ro' xgurajl reeb persi ru bén rniaj laa reeb, abi' chi rbejdxaman tijbgaj reeb, rayünbee reeb cha'man. Zianz rbëëman laa reeb

lën gurajl guin. ⁴ Abi' chi ma brier gra reeb, dxel rnedaman loj reeb, guiáad laa reeb rnal laaman, guial nünbee reeb cha'man. ⁵ Per ad rnalt reeb tijb bën ad nünbeet reeb, ruxüünl reeb lojman, guial ad nünbeet reeb cha'man.

⁶ Chi gulox gunee Jesús zian, ad bignia't ree bën riga' yagaj xhie rën guiëb ni guneeman.

Jesús naj zi'c bën rniaj xiil ree zagdxe

⁷ Rëb Jesús loj reeman zatijb:

—Diidxliczi rnin, naj naj zi'c ro' xgurajl ree xiil, lod ru reeb. ⁸ Gra ree bën bi't chi gad naj guial naj reeman zi'c bëngubaan, rban reeman rusagzi tëë reeman. Per ree bën naj da bejnan ad bidxga't reeman laa reeman. ⁹ Naj naj ro' port, abi' bën ru ro' port guie zajpaman perdon, dxel ma zile' chu'man yariü tëëman zi'cgajczi tijb xiil abi' zian rdxejl ni rawib.

¹⁰ Bëngubaan ri'tzaman din cwanman, gugütaman gunijt tëëman, sa'n naj zialan din gapidi guialnaban, gap tëëdi zro' da'tan. ¹¹ Naj naj zi'c tijb bën rniaj xiil ree zagdxe. Abi' bën rniaj xiil ree zagdxe xt xguialnabanman rudëëman por laa reeb. ¹² Per bën rniaj laa reeb por milia, chi ruguiaaman zëëd cuyojt, laa ruxüün gajcaman, rbëëladxaman xiil guin ree guial ad najt reeb xi xiilaman në guial ad najtaman bën rniaj ree xiil, dxel rniaaz cuyojt guin laa reeb abi' rtie'chib laa reeb. ¹³ Laaman rbëëladx laa reeb, din por miliazi rniajman laa reeb abi' achet naladxaman por laa reeb.

¹⁴⁻¹⁵ 'Naj naj zi'c bën rniaj xiil ree zagdxe. Abi' zi'c nünbee da Dadan naj, zian nünbeen laaman, ziangajc nünbee ree da xiilan, guiáad laa reeb nünbee naj. Abi' xt da guialnabanman gudëdan por laa reeb. ¹⁶ Ra'p tëën stibcwa ree xiil ad yu't lën gurajl guie. Në laa reeb ryaadx chigxin, laa reeb guzoob da diidxan, yadxaag grop cwa reeb gac reeb tijbzi, abi' tijbzi bejn gap laa reeb.

¹⁷ 'Da Dadan Dios rënman naj guial naj gajc rudë naj guiëtan par yabanan stijb. ¹⁸ Achut zajc gugüt naj bal id naj gatiëëb. Naj ra'p guialrniabee par gatiëëban guiëtan në par yabanan stijb, din laan naj guialrniabee ni banee da Dadan lon.

¹⁹ Chi biguiejn ree bën Israel guin ni rëbaman, gojc reeman tio'p lala' stijb.

²⁰ Zien reeman rëb:

—¿Chexc zeel ridxga'di laaman? Awa xindxab yu' luxdooman rajc tëë guijcaman.

²¹ Per yu' reeman rëb:

—Ni'qui tijb bën yu' xindxab luxdoo ad rnieet zian. ¿Wen zajc yaxhal xindxab guiaaloj ree bën ad ranit loj ya?

Jesús con xDadaman Dios naj reeman tijbzi

²² Tiamp nayaag, chi cayünj ree bën Israel lanij ni rünj reeman gazobijz par yadooro' Jerusalén. ²³ Wej Jesús lën yadoo guin. Chi cazaman niz ro' curdur ni rniee reeman xcurdur Salomón. ²⁴ Dxel biyaw ree bën Israel laaman, rëb reeman lojman:

—¿Xt goc naga'loj cu'nawëëguil dunujn? Guna du lojn bal lüj naj Cristo.

²⁵ Badxi' Jesúsán rëbaman:

—Ma rnin lojdi, per lëjt ad rliladxtidi naj. Abi' ree ni rünan con xguialrniabee da Dadan Dios, laa reen rulüü chu najn. ²⁶ Per ad rliladxtidi, guial ad najtidi da bejnan. ²⁷ Bën naj ree da bejnan, nünbee reeman rzanal naj. ²⁸ Naj rudë guialnaban tiblyaa loj reeman, ad yu't dxej nit reeman. Abi' achut zajc chiquied laa reeman lon. ²⁹ Din da Dadan, bën banee laa reeman lon, rajpaman mazri

gualrniabee gual loj gra. Achut zajc chiquied laa reeman lojman. ³⁰ Da Dadan con naj, nayajcan tijbzi.

³¹ Dxel cwa' ree bën Israel guin guiaj din gucaaguaiaj reeman Jesús. ³² Per rëbaman loj reeman:

—Por xgualrniabee da Dadan, zien ni zagdxe ma benan niz lojdi. ¿Con pornin gucaaguaiajdi naj?

³³ Badxi' reeman laan rëb reeman:

—Ad por ree ni zagdxe ni beentilan yacaaguaiajn lüj, yacaaguaiajn lüj gual ad rajtül Dios respejt, din bénguidxliuji lüj, abi' rüjn lüj gajc zi'c Dios.

³⁴ Dxel rëb Jesús:

—Loj xleydi rëb: “Naj rni gual lëjt naj dios.” ³⁵ Dunuj ree rayagbee gual ad ni rusquieet naj ni ca loj xtiidx Dios. Abi' laaman gulëëlaaj dios bën basa'nnë ree xtiidxaman, bën gojp ree gualrniabee loj ree bën Israel. ³⁶ Yan, bal da Dadan Dios gulëëca naj persi guxhaalaman naj loj guidxliuj, ¿chexquiza zeel nadi ad ra'ptan laaman respejt gual rnin, xi'nman naj? ³⁷ Bal id cayünan zi'c na da Dadan, ad chililadxidi naj. ³⁸ Per bal cayünan zi'c naman, majsi ad zaliladxtidi naj, per gol bililadx gual por laaman zëëd ni rünan din gagbeedi gual da Dadan za'në naj, guiáad naj za'në'n laaman.

³⁹ Dxel guyën reeman niniaaz reeman Jesús, per gulaaman loj reeman.

⁴⁰ Abi' zëman zatiblad ro' guiiw Jordán, lod baroobnijs Waj bejn ree yaloj, yagaj baya'nman. ⁴¹ Abi' zien ree bën bidxin yagaj rëb:

—Walín, majsi achet milagr been Waj, per gra ni guneeman xcwent bën gue naj diidxl.

⁴² Dád zien reeman bililadx Jesús yagaj.

11

Güjt Lazr

¹ Guyu tijb bënragxuu, brier lajman Lazr. Laaman con re bizanman Li con Mart, naj ladx reeman Betania. ² Abi' Li bizan Lazr, laam baroob perfum guia' Jesús abi' bacwiidximin con guidxguijqum. ³ Dxel grop bël reem guxhaal ruson loj Jesús, rëb reem:

—Dad, ragxuu xmiwil Lazr.

⁴ Chi biguiejn Jesús zian, rëbaman:

—Gualguijdx guin ad zëëdtan par gugüjtan, zëëdan din gac guguaiaa bejn xgualrniabee Dios në par guguaiaa reeman xgualrniabee Xi'n Dios.

⁵ Majsi rën da't Jesús Mart con Li në Lazr, ⁶ per chi cwa'man ruson ragxuu Lazr, sta goglaaman zatio'p dxej lod za'man. ⁷ Dxel rëbaman loj ree xbejnman: —Yo' ree niz Judea zatijb.

⁸ Abi' rëb reeman lojman:

—Mextr, ad wayajct xchej guyën ree bën zojb niz ni nucaaguaiaj reeman lüj. ¿Abi' chel ni zatijb ya?

⁹ Dxel rëb Jesús:

—Lëjt ragbee gual chiptio'p hor yu' tibdxej. Abi' bën rza radxe, achet rirejl guia'man, din yu' bajl rusni loj guidxliuj guie. ¹⁰ Per bën rza guxhin, yu' ni rirejl guia'man, din achet bajl guin rajpaman.

¹¹ Rëb tëë Jesús loj reeman:

—Ma naga'yëjs dux miw ree Lazr, per chicwëënan laax.

¹² Dxel rëb ree xbejnman:

—Dad, bal naayëjsix, rën guiëban yayajquix.

13 Per ni rëb Jesús rën guiëban guial ma güjt Lazr, guiáad ree xbejnman gunaladx reeman rëbaman naga'yëjsizix. 14 Dxel bagojn Jesús laa reeman, rëbaman:

—Ma güjt Lazr. 15 Rabaan por lëjt guial ad guzutan ni din chililadxidi naj. Yan, yo' ree yugnaj reex.

16 Dxel Tumajs, bën rníee reeman cwajch, rëbaman loj los demazri xbejn Jesús:

—Yo' ree yunë' reeman, din lod guiëtaman, yayëjtnë' reeman.

Jesús naj bën rusban bejn runee tëëman guialnaban

17 Chi bidxin Jesús Betania, ma gojc tajp dxej biguie'ch Lazr. 18 Betania guin raya'nan gajxh Jerusalén, zi'ct choon kilometro. 19 Abi' zien ree bën Israel bignaj Mart con Li din yagu' reeman luxdoo reem guial güjt bizan reem.

20 Chi gogbee Mart ma zëëd Jesús gajxh, briim bigchaaglojm laaman, guiáad Li baya'nm lënü. 21 Dxel rëb Mart loj Jesús:

—Dad, bal nizujl guie, ad ziant niëjt da zanan. 22 Per naj ragbee guial ni'qui yan zunee Dios ni guiniabil lojman.

23 Dxel rëb Jesús:

—Naj rni yaban bizanl.

24 Badxi'min rëbim:

—Ma qui ragbeen, yabanm dxej yaban gra ree bengüt. Chi guidxin dxej güün xguialguxtis Dios.

25 Abi' rëb Jesús:

—Naj naj bën rusban ree bengüt rudë tëën guialnaban loj ree bejn. Bën chililadx naj, majsí guiëtaman, per zajpaman guialnaban loj Dios. 26 Guiáad gra bën naban rliladx tëë naj, zajpaman guialnaban loj Dios. ¿Rliladxil ni canin lüj ya?

27 Dxel rëbim lojman:

—Rliladxanan Dad. Rliladxan lüj naj Cristo, Xi'n Dios, bën naj gui't loj guidxliuj.

Biin Jesús ro' xbaa Lazr

28 Chi gulox rëb Mart zian, dxel bignee xbëlim Li, rëbim ralan:

—Ma bi't Jesús, abi' caneeman lüj.

29 Biguiejnzi Li zian, laa bisugajquim bigchaaglojm Jesús. 30 Abi' Jesús gadzaman chu' luguiedx guin, stá za'man lod bigchaagloj Mart laaman.

31 Guiáad ree bën Israel zojbnë Li ragu' reeman luxdoo, chi baguiaa reeman cari da't bisum zëm, binal reeman laam. Gunaladx reeman ro' xbaa Lazr ziguaaann.

32 Chi bidxinm lod za' Jesús, bazuxibim lojman rëbim:

—Dad, bal nizujl guie, ad ziant niëjt da zanan.

33 Chi baguiaaman roon Li con ree bën Israel nal laam, dád gognaa luxdooan guyu naya tëëman. 34 Dxel gunabdiidxaman rëbaman:

—¿Ban biquie'chidi laax?

Abi' rëb reeman:

—Dad, guda nial din guguaal.

35 Dxel biinman. 36 Abi' rëb ree bën Israel guin:

—Gol baguiaa nial dád guyënman laax.

37 Per yu' reeman rëb:

—Bën guinan baxhal guiaaløj tijb bën ad ranit loj. Yan, ¿niche niajc nüjnman ya'n chitëë niëjt Lazr?

Basban Jesús Lazr

³⁸ Dád guyu naya luxdoo Jesús stijb, chi gubigaman ro' xbaa Lazr. Najn tijb guiajbiliaa, nada'cw tijb guiaj ro'n. ³⁹ Dxel rëbaman:

—Gol biquied guiaj guin.

Per Mart, bizan xingüt guin, rëbim:

—Dad, ma rliaam nadxuudx, din ma gojc tajp dxej ni gütim.

⁴⁰ Badxi' Jesúsán rëbaman:

—¿Nid rnin ya, bal rililadxil, guguaial xguialrniabee Dios?

⁴¹ Dxel bisüd reeman guiaj guin. Zianz gules loj Jesús xanyabaa rëbaman:

—Dad, quixtëë lüj guial ma bacaagdiajguil ni rnin. ⁴² Naj ragbeechaaw guial zianczi rucaagdiajguil ni rnin. Per rnin zian por ree bën riga' guie, din chililadx reeman guial lüj guxhaal naj.

⁴³ Chi gulox rëbaman zian, dxel guridxa'man rëbaman:

—¡Lazr, barii yagaj!

⁴⁴ Dxel barii Lazr lën baa guin nalüüb vend yaax con guia'x, guiaad lojx nayaaw lajd. Dxel rëb Jesús loj reeman:

—Gol baxhiequix, gol baslaax yaguaiajx.

Baya'n reeman diidx xhienaag guiniaaz Jesús

(Mt. 26:1-5; Mr. 14:1-2; Lc. 22:1-2)

⁴⁵ Dád zien ree bën binal Li bililadx Jesús, guial baguiaa reeman milagr beenman. ⁴⁶ Per yu' reeman bicojn bënfarisew ree ni been Jesús. ⁴⁷ Dxel bënfarisew ree në ree bixhioz rniabee, bachajg lasa' reeman con los demazri ree guxtis, rëb reeman:

—¿Xhienaag yaguieen ree ya'n, din dád zien milagr cayüjn xin guin? ⁴⁸ Bal yadëéd ree mod, graczi bejn guililadx laax, dxel guxtis Rom ree guidganijt reeman dux yadoo ree në dux nación ree.

⁴⁹ Per loj reeman yu' bën la Caifás, bixhioz zobjloj rniabee loj ijzsii, rëbaman loj reeman:

—¿Nid ragbeedi ya, ⁵⁰ nid rignia' tëedi ya, zagdxe naj guiët tijbzi bejn por gra bën Israel, luar nit dux nación ree?

⁵¹ Per Caifás guin ad ni naladxtzaman rëbaman. Guial najman bixhioz zobjloj rniabee loj ijzsii, zeel badëéd Dios ni guneeaman, guial guiët Jesús por gra ree bën Israel. ⁵² Abi' ad por laatzi reeman, par gac reeman tijbzi con gra ree xbejn Dios, bën riga' ree guidib guidxliuj. ⁵³ Zeel diidz dxejzii baya'n reeman diidx gugüjt reeman Jesús.

⁵⁴ Zianan zeel ad contzi ruluülojtraman loj ree bën Israel, bazaman yagaj ziaman guiedx la Efraín, najn gajxh yujbidx, yagaj guzunë ree xbejnman.

⁵⁵ Dxejzii ree ma zidyob pascw, lanij rüjn ree bën Israel, dád zien ree bën guiedx ree zë Jerusalén din güün reeman zi'c naj xcostumbr reeman par gac reeman naya loj Dios chi gad pascw gal. ⁵⁶ Dxel raguuil reeman Jesús, abi' rniabdiidx loj lasa' reeman lën yadooro' Jerusalén, rëb reeman:

—¿Xhie nadi? ¿zi'taman lanij ya o ad zi'ttaman?

⁵⁷ Bënfarisew ree con ree bixhioz rniabee, gunabee reeman bal chutëöz bën ragbee ban za' Jesús, gugojnman din chile' guiniaaz reeman laaman.

12*Baroob Li perfum guia' Jesús*

(Mt. 26:6-13; Mr. 14:3-9)

¹ Za xho'p dxej riaadx gal pascw, chi we Jesús Betania, lod zobj Lazr, xin basbanman. ² Ni been reeman tijb guialraw par xche ni gudawnë

reeman Jesús. Mart gule'c guialraw guin, guiáad Lazr naj tijb b́en gurené laa reeman xan mex. ³ Dxel cwa' Li cost garol lijtr perfum ni lasajc wayéjx, najcchaawnén ganax nardo, baroobimin guia' Jesús abi' bacwiidxné guidxguijquimin. Guidibczi lénü guin baree nejxh. ⁴ Dxel Judas Iscariote, xin naj tijb ree xbejn Jesús, xin bayü laaman, rëbix:

⁵ —¿Chexc ad gudo't perfum guin? Zagdxeli nido'n zi'ct rüjn tijb bejn gan tib ijz, din nüjnan yudar b́enprob ree.

⁶ Ad guial yu'tix xgab b́enprob guin ree zeel rëbix zian, rëbix zian guial najx xin gubaan. Abi' guial laax naaz bols yu' milia, rbanx ni rudëe reeman rgu'chaawix. ⁷ Dxel rëb Jesús lojx:

—Guzujr biinan. Ma badxe'xgajm naj perfum guin par chi guidxin dxej guiguie'chan. ⁸ Din b́enprob guin ree zianczi za'në reeman lëjt, per naj ad ziantczi gazunë'n lëjt.

Baya'n reeman diidx gugüjt reeman Lazr

⁹ Bén guixiuj b́en Israel gogbee za' Jesús Betania, abi' wej reeman yagaj, ad par guguaatzi reeman Jesús, në par guguaa reeman Lazr, xin basbanman.

¹⁰ Zeel baya'n ree bixhioz rniabee diidx guial në Lazr gugüjt reeman. ¹¹ Din por laax dád zien ree bejn cayrii loj reeman, abi' caliladx reeman Jesús.

Bagajpdioz ree bejn Jesús zi'c rey

(Mt. 21:1-11; Mr. 11:1-11; Lc. 19:28-40)

¹² Chi bareguiaal, zien da't ree b́en zë lanij pascw Jerusalén gogbee guidxin Jesús yagaj, ¹³ dxel cwa' reeman zijn, brii reeman bigchaagloj reeman laaman, rbidxa' reeman rëb reeman:

—¡Benza'c bendxoon naj Dios! ¡Nüjnle'man Bén guxhaalaman! ¡Nüjnle'man b́en naj rey Israel!

¹⁴ Bidxaagloj Jesús tijb burdoo, abi' gudxibaman laab, persi gojc zi'c ca loj xtiidx Dios lod rëb:

¹⁵ Bén Sión, ad rdxebidi.

Gol baguiaa, laa xreydi zëed, dxiibaman tijb burdoo.

¹⁶ Yaloj ad bignia't ree xbejn Jesús ni cayajc. Per chi ma bayë'paman xanyabaa, dxel bignia' reeman guial zian ca loj xtiidx Dios xcwentaman, zeel gojc zian.

¹⁷ Bén guzu ree con Jesús chi guredxaman Lazr din yariix lën baa, basban tëeman laax loj ree bengüt, rusnuu rü reeman diidx loj ree bejn ni baguiaa reeman. ¹⁸ Zeel zien ree bejn brii bigchaagloj laaman, guial gogbee reeman milagr beenman. ¹⁹ Dxel rëb loj lasa' ree b́enfarisew:

—Gol baguiaa nial graciai bejn zinal laax, achetri zajc yaguieen ree.

Yu' ree b́en grieg raguiil Jesús

²⁰ Loj gra ree b́en we lanij bignajchi' reeman Dios Jerusalén, no'ch bëlzi ree b́en grieg, ²¹ gubig reeman loj Filip, b́en za guiedx Betsaida, ni riga' niz Galilea, guzajc reeman liaadx rëb reeman:

—Dad, rayënan yaneenë'n Jesús.

²² Abi' wej Filip biguiedxaman loj Andrejs, dxel wej grop reeman bicojn reeman Jesús. ²³ Badxi' Jesúsán rëbaman:

—Ma bidxin hor par Bén guxhaal Dios, guiëtaman abi' yabanman.

²⁴ Diidxliczi rnin, zi'c tijb xob bal idan chu' luyuj najz najn tijbzi, per bal chu'n luyuj zajcxhiejn. ²⁵ Bén ru mazri xgab naabzi por guialnaban yu' loj guidxliuj guie, yu' dxej gunijtaman laan, per b́en ru mazri xgab güünman

zi'c rën Dios, xhietëez sacaman, zajpaman guialnaban tiblayaa con laaman.
²⁶ Bal chu rën güün ni rënan guidnalaman naj, lod gazun, nëgajcaman su. Bén güün ni rënan, guiën da Dadan laaman.

Rugojn Jesús guial guiëtaman

²⁷ Rëb tëë Jesús:

—Dád yu'n xgab. ¿Xhie guiën? ¿Zën ya: “Dad, babëë naj loj ni gazaagdiajn”?
 Per ad zëtan zian, din par zian zialan. ²⁸ Dad, balüü xguialrniabeel.

Dxel biguien cha' bejn xanyabaa rëbaman:

—¡Ma balü da guialrniabeen, per gulünan stijb!

²⁹ Riguiëjn ree bén riga' yagaj, zeel rëb reeman:

—Guziaawan guridxa'.

Per yu' reeman rëb:

—Tijb anjlan gunee laaman.

³⁰ Dxel rëb Jesús:

—Ad por najtan biguien cha' bejn, por lëjtan. ³¹ Ma bidxin dxej gac guialguxtis loj guidxliuj, yan yarii bén rniabee lojn. ³² Per chi guilies reeman naj ya loj guidxliuj guie, dxel gui't graløj bejn lon.

³³ Zian basignia'man xhienaag guiëtaman. ³⁴ Badxi' ree bén guinan rëb reeman:

—Dunujn rayagbee rëb loj ley, Cristo guiban tiblayaa. ¿Chexc zeel nal, rayal guilies reeman Bén zëëd xanyabaa? ¿Chunin naj Bén zëëd xanyabaa?

³⁵ Rëb Jesús loj reeman:

—Ad zien dxejtri sunë bajl guie lëjt. Gol guza la'tgaj za'nëdi bajl guie, chitëë guiniaaz guiaal lëjt. Din bén rza loj xcaj, ad ragbeetaman ban cheman. ³⁶ Gol bililadx bajl guie, la'tgaj za'nëdan, din gaquidi bejman.

Chi gulox gunee Jesús zian, dxel baquie'chlojman loj reeman.

Ad bililadxt ree bejn Jesús

³⁷ Majsi been Jesús zien da't milagr baguiaa reeman, ad bililadxt reeman.

³⁸ Zian gojc cumplid ni bacaa Isaías bén badëë xtiidx Dios loj ree bejn, rëban: Dad, ¿chu ma bililadx ruson radëëdan?

¿Chu loj ma balüü Dios xguialrniabeeman?

³⁹ Zianan zeel ad gojct nililadx reeman, din në ze bacaa Isaías:

⁴⁰ Dios basiaaw guiaaløj reeman,

bascajy tëëman xquiarguiëjn reeman,

chitëë guguaa reeman chignia' tëë reeman,

chitëë yadxi' loj reeman lon, abi' ad zayüntan laa reeman.

⁴¹ Rëb Isaías zian guial baguiaaman xbiani Jesús, zeel baza'taman laaman.

⁴² Per ni'czi zian, dád zien ree bén zøjbloj bililadx Jesús. Per ad rëbt reeman loj ree bejn zian, guial rdxeb reeman yabëë ree bënfarisew laa reeman lod ricaagdiajg reeman xtiidx Dios, ⁴³ din mazri rën reeman guiën ree bejn laa reeman, guial guiën Dios laa reeman.

Rniee Jesús zi'c rniabee xDadaman

⁴⁴ Gunee Jesús rejs rëbaman:

—Bén rliladx naj, ad najtzan rliladxaman, në da Dadan bén guxhaal naj.

⁴⁵ Bén ruguiaa naj, në bén guxhaal naj ruguiaaman. ⁴⁶ Naj naj bajl, bialan loj guidxliuj guie, chitëë yaya'n ree bén rliladx naj loj xcaj. ⁴⁷ Bal chu guien da diidxan abi' ad zuzoobtaman laan, ad najt gudëd laaman casti, din ad bialtan din gudëdan casti, bialan din yabën laa reeman loj dol. ⁴⁸ Bén ad rënt naj ad rucagdiajg tëëtaman da diidxan, mal yu' ni gudëëd laaman casti: diidx ni

rën, laan gudëed laaman casti chi guidxin dxej. ⁴⁹ Din ad ni rbëguictan rnien. Da Dadan, Bén guxhaal naj rniabee ni ganen ni gulü tēen, ⁵⁰ zeel ragbeen, ni rniabee da Dadan runee guialnaban tiblyaa. Zianan zeel ni rnin rulūnan zi'c rniabeeman.

13

Gudiib Jesús guia' ree xbejnman

¹ Guixiezi gal lanij pascw. Ma ragbee Jesús guial ma bidxin hor gusa'nman guidxliuj guie din yaguij loj xDadaman. Zianczi guyën ree xbejnman, bén riga' ree loj guidxliuj, rënman laa reeman goctëez. ²⁻⁴ Chi gad reeman gaw xche, mal badxe' xindxab ni mal luxdoo Judas, xi'n Simón Iscariote, ma rüjnx xgab yayüx Jesús loj ree bén gugÿjt laaman. Ragbee Jesús guial badëed xDadaman gra gualrniabee lojman, laa tēeman guxhaal laaman, zeel yaguijman lod za'man. La'tgaj cayaw reeman, bisuman xan mex, gulëeman tijb lajd najcwaman luya, dxel cwa'man tijb tuay guxhii xizaman. ⁵ Abi' badxe'man nijs loj tijb xijg, guzulojman caguiibaman guia' ree xbejnman, cucwiidx tēeman laan con tuay naxii xizaman. ⁶ Chi bayal quiibaman guia' Simón, bén rniee reeman Bëd, rëbaman loj Jesús:

—Dad, ¿luj quiib guia'n ya?

⁷ Badxi'man laan rëbaman:

—Ad rignia'til ni cayūnan yan, per qui chignia'rilan.

⁸ Zeel rëb Bëd lojman:

—Ad zatiëëbtan quiibil guia'n.

Abi' rëb Jesús:

—Bal id zaguiiban guia'l, ad zile'tri gaquil da bejnan.

⁹ Zeel rëb Bëd lojman:

—Dad, ad bal guia'zan quiibil, gudiib në yan con guican.

¹⁰ Badxi'man laan rëbaman:

Bén goznejz guia'zaman riaadx chëd, din guidibaman naya. Abi' lëjt ma nayadi, majsi ad gratidi.

¹¹ Ma ragbeeman chu yayü laaman, zeel rëbaman: “Ad gratidi naya.”

¹² Chi gulox gudiibaman guia' reeman, bayajcw xabaman, gurejman xan mex guin zatijb, dxel rëbaman:

—¿Bignia'di ni benan ya? ¹³ Rnieedi naj Mextr në Dad, waliquidi najn.

¹⁴ Bal najn Mextr në Dad, gudiiban guia'di, ziangajc quiib guia' lasa'di. ¹⁵ Ma balün lëjt, din güündi zi'c benan. ¹⁶ Diidxliczi ganin, achut mojs naj mazri guial loj bén rniabee laaman, achut bén ri't naj mazri guial loj bén rxhiaal laaman. ¹⁷ Bal rignia'di nine güün tēedan, yabaanë Dios lëjt.

¹⁸ “Ad gratidi ruzatan ragbeen chu reenin gulen. Per rayal gac cumplid ni ca loj xtiidx Dios, rëban: “Bén rawnë'n tijbzi, bayejcaman contr naj.” ¹⁹ Ma rugojnan lëjt din gagbeedi chi gac zian, din chililadxidi chu najn. ²⁰ Diidxliczi ganin, bén rucaagdiajg ni rëb bén rxhialan, najn rucaagdiajgaman, guiáad bén rucaagdiajg da diidxan, xtiidx bén guxhaal najn rucaagdiajgaman.

Bagojn Jesús chu yayü laaman

(Mt. 26:20-25; Mr. 14:17-21; Lc. 22:21-23)

²¹ Chi gulox gunee Jesús zian, dád guyunayaman, dxel rëbaman loj reeman zagdxe:

—Diidxliczi ganin, tijb lëjt yayü naj loj ree bén gugÿjt naj.

²² Dxel guzuloj ree xbejnman ruguiaa loj lasa' reeman, ni'quid ragbeet reeman chunin ruza'taman. ²³ Tijb bén guyën da'taman zojb cwë'man, hor zii

chi cayaw reeman xche, ²⁴ dxel been Béd sen lojman din guiniabdiidxaman chunin ruza't Jesús. ²⁵ Zeel mazri gubigaman cwé' Jesús gunabdiidxaman, rëbaman:

—Dad, ¿chunin?

²⁶ Badxi' Jesúsán rëbaman:

—Gugajdxan ta'n guiadxtil, din loj xin gudëdanan, laaxan yayü naj.

Dxel bagajdxaman ta'n guiadxtil badëëman laan loj Judas, xi'n Simón Iscariote. ²⁷ Chi gudawixan, laa guyu gajc xindxab luxdoox. Zeel rëb Jesús lojx:

—Ni güünl, cari beenan.

²⁸ Per achutczí ree bën zojb xan mex guin bignia' chexc zeel rëbaman zian.

²⁹ Guial ca' Judas bols ni yu' milia, zeel naladx garol reeman rëb Jesús lojx din chisiix ni gaw reeman lanij guin o gudëëdix ta'n nan loj ree bën rzagdiaj ya. ³⁰ Chi ma gudawix guiadxtil guin, dxel briix, ma guxhin.

Gunabee Jesúsú tijb nicüb

³¹ Chi ma brii Judas, rëb Jesús loj ree xbejnman:

—Yan guien xguiarlriabee Bén guxhaal Dios din gagbee ree bejn xhien-aag naj guialriabee gudëë Dios lojman. ³² Din bal gulüü Bén guxhaal Dios xguiarlriabee Dios, ziangajc gulüü Dios xguiarlriabeeman, zeel ma gudëëdaman laan. ³³ Xi'n, ad zien dxejtri gazunë'n lëjt, yaguilidi naj, per zi'cgajc rën loj ree bejn, ziangajc ganin lojdi yan: Ad zajct chedi lod gan. ³⁴ Ganin tijb nicüb ganabeen: Gol guyën lasa'di zi'c rënan lëjt. ³⁵ Bal guien lasa'di, zian gagbee gra bejn guial najdi da bejnman.

Guiëb Béd ad nünbeetaman Jesús

(Mt. 26:31-35; Mr. 14:27-31; Lc. 22:31-34)

³⁶ Gunabdiidx Béd loj Jesús rëbaman:

—Dad, ¿ban chel?

Zeel rëb Jesús:

—Ad zajct guidnalil naj lod gan yan, per zadxin dxej guidnalil naj.

³⁷ Zeel rëb Béd:

—Dad, ¿chexc zeel ad zajct guidnaalan lüj yan? Xt zajc guiëtan por lüj.

³⁸ Badxi' Jesúsán rëbaman:

—¿Walil ya rënl guiëtil por naj? Diidxliczi ganin, chi gad guid cwidxa', mal rëbil choon volt, ad nünbeetil naj.

14

Jesús naj nejz guidxinnë bejn loj Dios

¹ Rëb tëë Jesús:

—Ad rudi xgab. Gol bililadx Dios, gol bililadx tëë naj. ² Lidx da Dadan dád zien luar lod guiban bejn yu'. Bal iche yu', ad ziant ganin lojdi, chiguienchaawan xluaridi. ³ Chi ma benchaawan luar guin, dxel yaguialan guidgaxin lëjt din sudi lod gazun. ⁴ Ma nünbeedi nejz zë lod gan.

⁵ Zeel rëb Tumajs lojman:

—Dad, ad rayagbeetan ban chel, ¿xhienaag yaguieenbeen nejz guin?

⁶ Badxi'man laan rëbaman:

—Naj naj nejz, najn diidxli, naj tëën guialnaban. Tijbzi naj zajc chinë' bejn ree loj da Dadan. ⁷ Bal nünbeedi naj, në da Dadan güünbeedi. Per ma nünbeedi laaman diidz yan, din ma baguiaadi laaman.

⁸ Dxel rëb Felip:

—Dad, banee mod majsi yaguaaazan b́en naj xDadil.

⁹Badxi'man laan ŕebaman:

—Felip, ma gojc xchej za'ně'n lějt. ¿Nid wayünbeel naj ya? Din b́en ruguiaa naj, da Dadanan ruguiaaman. ¿Chexc zeel nal gunen mod guguaal da Dadan? ¹⁰¿Nid ŕililadxil ya, naj za'ně' da Dadan, guíaad laaman za'ně naj? Ni rnin lojdi, ad rběguictanan. Da Dadan, b́en nabanně'n, laaman ŕijn dxiin guin. ¹¹Gol bililadx naj za'ně' da Dadan, guíaad laaman za'ně naj. Balgui majsi ni rúnzan gol bililadx. ¹²Diidxliczi ganin: B́en ŕililadx naj, nęgajcaman güün ni rúnan, güünman ni mazri narooob, din naj yaya' lod za' da Dadan. ¹³Graczi ni guiniabidi lojman por naj, gúnanan din gulún xguialrniabeeman. ¹⁴Gúnan xhietěez ni guiniabidi.

Guixhiaal Jesús xSprijtaman

¹⁵'Bal ŕendi naj, gucaagdiajguidi ni balún. ¹⁶Din guiě loj da Dadan guixhiaalaman Sprijt suně lějt, ¹⁷Sprijt gulüü diidxli, din zianczi suněman lějt. B́en ad ŕililadxt ree Dios ad zajct tia' reeman Sprijt guin, din ad ruguiaat reeman ad núnbee t́et reeman laaman. Per lějt núnbee laaman, din suněman lějt yaya'n t́eeman luxdoodi tiblyaya. ¹⁸Ad zusa'ntan xtijbidi, yaguialan stijb guidganan lějt. ¹⁹Sta'nz riaadx ad zuguaatri ree b́enguidxliuj naj, per lějt guguaadi naj, guibandi din nabanán. ²⁰Dxej zii ree, gagbeedi za'ně' da Dadan, lějt za'ně naj, guíaad naj za'ně'n lějt zianczi. ²¹B́en rucaagdiajg ni rniabeen ŕijn t́eeman laan, walicaman ŕenman naj. Guiěn da Dadan b́en ŕen naj, nę naj guiěn laaman din güünbeeman naj.

²²Gunabdiidx Judas (ad b́en bayüt Jesús) ŕebaman:

—Dad, ¿chexc zeel dunujzan yayagbee chu lúj, guíaad ree b́enguidxliuj ad zagbeet reeman?

²³Badxi' Jesúsán ŕebaman:

—B́en guiěn naj guzoobaman da diidxan, guiěn da Dadan laaman, guíaad naj guidnė' da Dadan din yabajnně'n laaman. ²⁴B́en ad zěnt naj ad zuzoobtaman da diidxan, din diidx cucaagdiajguidi yan ad da diidxtanán, xtiidx da Dadanan b́en guxhaal naj.

²⁵'Canin lojdi gra nine, la'tgaj za'ně'n lějt. ²⁶Per xSprijt Dios, b́en suně lějt zianczi, b́en guixhiaal da Dadan por naj, graczi gulüüman lějt din gusaaladxidi ni canin.

²⁷'Chi yaya'n, yabecdxcen luxdoodi, gunen gualnaza'c lojdi, ad zi'c runeet ree b́enguidxliujn, ad bal ru nayadi ad rdxeb t́eedi. ²⁸Ma rnin lojdi, yaya'n, dxeel yaguialan zatijb. Bal walidi ŕendi naj, chu' luxdoodi zagdxe, guial gagbeedi yaya' loj da Dadan, din mazri zobjblojman guial lon. ²⁹Ma rugojnan lějt, din chi gac zian, chililadxidi.

³⁰'Ad zro'tri ganeně'n lějt, din ma zěed xin rniabee guidxliuj, majsi ad nęt naj rniabeex. ³¹Per zian gac din gagbee ree b́enguidxliuj, ŕenán da Dadan, zeel rúnán ni rniabeeman. Gol bisu, yo' ree yan.

15

Rěn Jesús yadxu'ně' reeman zianczi

¹Basnuu ŕeb Jesús:

—Naj naj zi'c yag rtia ni nejxh zagdxe, guíaad da Dadan naj zi'c b́en rxübin laan. ²Da bejn reen naj zi'c ree xidx yag guin. Bal id rtia reen gutüüg da Dadan laa reen. Per bal rtia reen, gusiaman laa reen din tia reen mazri. ³Lějt

ma nayadi, guial basia diidx rnin lëjt. ⁴ Gol gubajnnë naj zi'c nabannë'n lëjt. Ad zajct tia xidx yag, bal id najnën yag guin tijbzi. Ziangajc lëjt ad zajct güündi ni rën Dios bal id za'nëdi naj.

⁵ Naj naj zi'c yag rtia ni nejxh, guiáad lëjt naj zi'c xidxan. Bén sunë naj zianczi nuchajgaman naj, guiáad naj nuchagan laaman, zeel rüjnman ni rën Dios. Din bal ichu naj, achet zajc güündi. ⁶ Bén ad zazuñët naj guizëëbaman zi'c yagbidx ruto'p reeman, din che'can.

Rëb tëë Jesús:

⁷ —Bal za'nëdi naj tijbzi ruzoob tëëdi da diidxan, gol gunab ni rëntzidi, din tia'dan. ⁸ Bal güündi ni rën da Dadan, gaquidi quijb da bejnan, din guza't ree bejn laaman zagdx. ⁹ Rënan lëjt zi'c rën da Dadan naj, gol basaaladx rënan lëjt. ¹⁰ Bal guzoobidi da diidxan, gusaaladxidi rënan lëjt, zi'cgajc ruzoban xtiidx da Dadan, ragbeen rënman naj.

¹¹ 'Rnin lojdi zian din chu' luxdoodi zagdx. ¹² Gol guyën lasa'di zi'c rënan lëjt, laan rniabeen güündi. ¹³ Achut rën xmiw mazri guial loj Bén rëjt por laa reeman. ¹⁴ Lëjt naj da miwan bal güündi ni rënan. ¹⁵ Ad zanetran lëjt mojs, din mojs ad ragbeetaman xhie rüjn Bén rniabee laaman. Ganen lëjt miw, din balün lëjt graczi ni na da Dadan lon. ¹⁶ Ad lëjtt gule naj, naj gule lëjt. Zeel rnin lojdi, chedi chiglüüdi bejn ree ni rën da Dadan, din gusnuu güün reeman ni rënman, din guneeman graczi ni guiniabidi por naj. ¹⁷ Rniabeen: Guiën lasa'di.

Ralen ree bejn Jesús con ree xbejnman

¹⁸ Rëb tëë Jesús:

—Bal ralen ree bénguidxliuj lëjt, gol basaaladx, yaloj naj balen reeman. ¹⁹ Bal niajquidi bénguidxliuj, niën reeman lëjt zi'c rën lasa' reeman. Per naj gule lëjt loj reeman, zeel ralen reeman guial ad najtidi bénguidxliuj. ²⁰ Gol basaaladx ni rnin: “Achut mojs naj mazri guial loj Bén rniabee laaman.” Bal basagzi reeman naj, ziangajc gusagzi reeman lëjt, bal bazoob reeman da diidxan, ziangajc guzoob reeman xtiidxidi. ²¹ Graczi nine güünnë reeman lëjt por naj, din ad nünbeet reeman Bén guxhaal naj.

²² 'Achut xtól reeman niu, bal idan nial ninienë'n laa reeman, per yan yu' xtól reeman. ²³ Bén ralen naj, nëgajc da Dadan ralenman. ²⁴ Achet xtól reeman niu, bal idan nün ree ni benan loj reeman ni achutzi wayüjn, per ma baguiaa reeman laa reen, majsí zian ralen gajc reeman naj në da Dadan. ²⁵ Per rajc zian din gac cumplid ni ca loj xley reeman, rëban: “Achut rünan ralen reeman naj.”

²⁶ Per chi gui't Sprijt gaxhalan din sunëman lëjt gulüü tëëman diidxli, Sprijt zëed loj da Dadan, laaman gü da diidxan. ²⁷ Nëgajc lëjt gü laan, din diidx yaloj za'nëdi naj.

16

¹ 'Rnin zian, din ad zabëjzt chililadxidi naj. ² Yabëë reeman lëjt lod ricaagdiajg reeman xtiidx Dios, zadxin dxej, chutëëz Bén gugüjt lëjt naladx reeman Dios cayüjn reeman wen. ³ Güün reeman zian din ad nünbeet reeman naj ni'qui da Dadan. ⁴ Per ma rnin lëjt, din chi guidxin dxej guin gusaaladxidi guial ma bagojnman lëjt.

Ni rüjn xSprijt Dios

'Ad rnitan lojdi zian diidz yaloj, din naj guzunë' lëjt. ⁵ Per yan yaya'n loj bën guxhaal naj. Achutzidi rniabdiidx ban gan, ⁶ aal yu'nayadi guial canin zian. ⁷ Per diidxliczi rnin: zagdx najn yaya'n. Din bal idan yaya', ad zi'tt xSprijt Dios sunë lëjt, per bal yaya'n, naj gaxhal laaman. ⁸ Chi gui'taman, laaman gulüü ree bénguidxliuj ni naj dol, ni naj ni zagdx, në xguialguxtis Dios. ⁹ Gagbee reeman yu' txl reeman, guial ad rlladxt reeman naj. ¹⁰ Ni zagdx guin naj guial yaya' loj da Dadan din ad zguaatridi naj. ¹¹ Guiáad Dios ma been xguialguxtisaman con xindxab rniabee guidxliuj.

¹² Yu'ri ni rënan ganin, per dád zien gacan par lëjt. ¹³ Chi gui't Sprijt gulüü lëjt diidxli, din ad züt xtiidx gajcaman, guinieeman graczi ni guienman, laaman gulüü lëjt ni gac. ¹⁴ Guza'taman naj zagdx, din naj gudëd ni gulüüman lëjt. ¹⁵ Graczi ni rajp da Dadan naj par naj, zeel rnin, Sprijt guin tia' ni gudëdan din gulüüman laan lëjt.

Guguaa ree xbejn Jesús laaman zatijb

¹⁶ Ma guidxin dxej ad zguaatridi naj, per ad zajct xchej, guguaadi naj stijb.

¹⁷ Chi rëb Jesús zian, dxel guzuloj ree xbejnman canabdiidx loj lasa' reeman, rëb reeman:

—¿Chexc zeel naman, ma guidxin dxej ad zaguaatri reeman, per ad zajct xchej, yaguaa reeman stijb, din yaguiaj loj xDadaman? ¹⁸ ¿Chexc zeel naman: “Ad zajct xchej”? Ad rayignia't ree ni caneeman.

¹⁹ Gogbee Jesús guial rën reeman guiniabdiidx reeman, zeel rëbaman:

—Ma rnin lojdi, ma guidxin dxej ad zguaatridi naj, per ad zajct xchej, guguaadi naj stijb. ¿Ni nen canabdiidxidi ya? ²⁰ Diidxli ganin, goondi chu' tēë luxdoodi naya, guiáad ree bénguidxliuj yabaa reeman. Per majsi chu' luxdoodi naya, guidxin dxej yabaadi. ²¹ Chi gal xi'n béngunaa, rdëdaman tarbajw, din ma bidxin hor guin. Per chi ma gojl xi'nman, dxel rayanladxaman tarbajw guin, ru luxdooan zagdx, guial ma gojl xi'nman. ²² Ziangajc lëjt cadëdidi tarbajw yan, per chi guguian lëjt zatijb, chu' luxdoodi zagdx, achutzci zajc yabëë laan luxdoodi.

²³ Dxel achetri guiniabdiidxidi lon. Diidxliczi ganin, graczi ni guiniabidi loj da Dadan por naj, guneeman. ²⁴ Guiáad yan achet wanabidi por naj, gol gunaban din tia'dan, din chu' luxdoodi zagdx tiblyaa.

Yaguiaj Jesús lod guzaman

²⁵ Rëb tēë Jesús:

—Rnin nine ree zi'c cwent, per zadxin dxej ad zulütran zian, gusignia'n lëjt zagdx xcwent da Dadan. ²⁶ Dxej zii ree guiniabidi loj da Dadan por naj, ad rüjnt naguiejn ganaaban por lëjt lojman, ²⁷ din rënman lëjt, rënman lëjt guial rëndi naj rlladx tēëdi guial laaman guxhaal naj. ²⁸ Briin lod za' da Dadan persi bialan loj guidxliuj guie, yan gusa'nman laan din yaya'n lojman.

²⁹ Dxel rëb ree xbejnman:

—Yanri ma cusignia'l zagdx. ³⁰ Rayagbeen rajquil graczi, ad rüjnt naguiejn chu guiniabdiidx lojl. Zianan zeel raliduladxan guxhaal Dios lüj.

³¹ Badxi' Jesús laan rëbaman:

—¿Ma rlladxidi yan ya? ³² Gol gogbee, ma bidxin hor yare'chidi, tijb gajdi yaguiaj lidx, gusa'ndi da xtijban. Per ad za't da xtijban, da Dadan za'në naj. ³³ Rnin gra nine din cwedi zagdx guial nuchajguidi naj. Loj guidxliuj sagdiajdi, per ad guidxebidi, din ma benan gan loj guidxliuj.

17

Gurejdx gunab Jesús xDadaman por ree xbejnman

¹ Chi gulox rëb Jesús zian loj ree xbejnman, dxel baguiaaman xanyabaa rëbaman:

—Dad, ma bidxin hor, balüü da gualrniabeen din gulün xgualrniabeel. ² Baneel gualrniabee lon din ganabeen gra bejn gudëd tëen gualnaban tiblayaa loj gra bën baneel. ³ Guiban reeman tiblayaa bal güünbee reeman lüj, tjbzi lüj naj quijb Dios, güünbee tëë reeman najn guxhaalil.

⁴ 'Naj bazat lüj zagdxe loj guidxliuj; yan ma gulox benan ni nal. ⁵ Yan, Dad, yaguialan lojl, din yaneel gualrniabee ca'n gocli, diizd chi gad guidxliuj gacchaaw.

⁶ Rëb tëë Jesús:

—Bën gulel loj guidxliuj baneel lon, ma balün laa reeman chu lüj. Gojc reeman xbejnl, per baneel laa reeman lon, ma bazoob reeman xtiidxil. ⁷ Yan ma gogbee reeman gual gra ni benan gra tëë ni balün naj xieenl. ⁸ Gunen xtiidxil ni baneel, zeel bacaagdiajg reeman laan, gogbee reeman, walian lojl guzaan, bililadx tëë reeman lüj guxhaal naj.

⁹ 'Rbedx rniaaban lüj por laa reeman, gual naj reeman xbejnl baneë tëël laa reeman lon, ad rbedx rniaabtan por ree bénguidxliuj. ¹⁰ Gra ni ca'n naj xieenl, guiáad gra ni ca'l naj da xieenan, ma rguien da gualrniabeen por ree bën baneel.

¹¹ 'Ad zazutran loj guidxliuj, per laa reeman suri reeman guie, guiáad naj yazaan din yaguialan lod za'l. Dad, lüj naj bën naya nali, gunaj reeman con gra gualrniabee ca'l ni baneë tëël lon, din gac reeman tjbzi zi'c nayajc. ¹² Chi guzunë'n laa reeman loj guidxliuj, gunan laa reeman con xgualrniabeel ni baneel. Achut reeman bizëëb, tjbzi xin ma naj diidx bizëëb, din gac cumplid ni ca loj xtiidxil.

¹³ 'Yan yaguialan lod za'l, per canen zian la'tgaj za'n loj guidxliuj guie, din chu' luxdoo reeman zagdxe, zi'c yu' luxdon zagdxe. ¹⁴ Ma balün laa reeman xtiidxil, zeel ralen ree bénguidxliuj laa reeman gual ad najt reeman bénguidxliuj, zi'cgajc ad najtan bénguidxliuj. ¹⁵ Ad rniaabtan yabëel laa reeman loj guidxliuj, rënan guinial laa reeman, chitëë güün reeman ni mal. ¹⁶ Ad najt reeman bénguidxliuj, zi'cgajc naj. ¹⁷ Basia reeman con xtiidxil, din laan naj ni diidxli. ¹⁸ Zi'c guxhaalil naj loj ree bénguidxliuj, ziangajc rixhial ree da bejnan loj reeman. ¹⁹ Por laa reeman rudëd da gualnabanan din gac reeman xbejnl diidxliczi.

²⁰ Basnuu Jesús, rëbaman:

—Ad por laatzi reeman rbedx rniaaban lüj, në por ree bën chililadx chi gucaagdiajg reeman ni guiniee reeman. ²¹ Rniaaban lojl din guchajg lasa' reeman din yayajcnë' reeman tjbzi, Dad, zi'c za'nël naj ziangajc za'në'n lüj, ziangajc sunë' lasa' reeman. Din chililadx ree bejn lüj guxhaal naj. ²² Badëdan gualrniabee baneel loj reeman, din gac reeman tjbzi zi'c nayajc, ²³ naj za'në' laa reeman, guiáad lüj za'nël naj. Zeel gac reeman tjbzi din gagbee ree bejn, lüj guxhaal naj rën tëël laa reeman zi'c rënl naj.

²⁴ 'Dad, lüj baneë laa reeman lon, zeel rënan su reeman lod gazun din guguaa reeman biani baneel lon, din guyënl naj diizd chi gad guidxliuj gacchaaw. ²⁵ Dad, lüj rüjn gualguxtis zagdxe. Ad nünbeet ree bénguidxliuj lüj, sa'n naj nünbeen lüj, në ree da bejnan ragbee lüj guxhaal naj. ²⁶ Balün laa reeman chu najl, gulüran laa reeman mazri, din gagbee reeman rënl laa reeman zi'c rënl naj, gazunë' tëën laa reeman.

18

*Bayü Judas Jesús**(Mt. 26:47-56; Mr. 14:43-50; Lc. 22:47-53)*

¹ Chi gulox guneé Jesús zian, dxel briinè ree xbejnman, zè reeman stiblad ro' guiiw la Cedrón, bidxin reeman lod yu' ree yag. ² Nè Judas, xin yayü laaman, nünbee yagaj, guial zien volt binèman laa reeman ni. ³ Zeel bidxinnèx tibcwaá ree suldad nè ree bèn rajp ro' yadoo, guxhaal quijb ree bixhioz laa reeman nè ree bénfarisew, ca' reeman bajl rusni ree, nè ree espad con ree lans. ⁴ Per ma ragbee Jesús gra ni gac, briiman gunabdiidxaman loj reeman, rëbaman:

—¿Chu raguuilidi?

⁵ Badxi' reeman laan rëb reeman:

—Jesús bèn Nazaret.

Abi' rëbaman loj reeman:

—Najn.

Judas xin bayü laaman bidxinnè laa reeman. ⁶ Chi rëbaman loj reeman: “Najn”, dxel baguiadruxan reeman biajb reeman luyuj. ⁷ Gunabdiidxaman zatijb rëbaman:

—¿Chu raguuilidi?

Rëb reeman:

—Jesús bèn Nazaret.

⁸ Zeel rëbaman:

—Ma rnin, najn. Bal naj raguuilidi, gol baslaa ree bèn guie yaguij reeman.

⁹ Zian gojc cumplid ni rëb loj xDadaman: “Achut ree bèn baneel lon bizëëb.”

¹⁰ Dxel gulëë Béd espad, gutü'man guidiajg ladbee xin la Malco, najx xmojs quijb bixhioz zobjloj. ¹¹ Dxel rëb Jesús loj Béd:

—Bagu'chaaw espad zii. Bal rën da Dadan gazaagdiajn zian, gaza'canan.

*Biniaaz Jesús**(Mt. 26:57-58; Mr. 14:53-54; Lc. 22:54)*

¹² Suldad guin ree con xin rniabee laa reex con ree bèn rajp ro' yadoo gunaaz reeman Jesús, guxhii reeman laaman. ¹³ Dxel binè reeman laaman yaløj lidx bèn la Anás, din laaman naj xdadsuegr Caifás quijb bixhioz zobjloj loj ijz zii. ¹⁴ Laagajcaman rëb loj gabilt, mazri zagdxe guiët tijbzi bejn por gra ree bèn Israel.

*Rëb Béd ad najtaman xbejn Jesús**(Mt. 26:69-70; Mr. 14:66-68; Lc. 22:55-57)*

¹⁵ Tio'p ree xbejn Jesús binal laaman. Tijbaman la Simón, bèn rniece reeman Béd, stijbaman naj bèn nünbee quijb bixhioz zobjloj, zeel guyunèman Jesús lënü guin, ¹⁶ guiaad Béd baya'nman lule!. Zeel barii bèn nünbee bèn rniabee ree bixhioz, guneenèman biin rajp ro' port guin, persi guyu Béd lënü.

¹⁷ Gunabdiidxim lojman rëbim:

—¿Nid lüjn naj tijb xbejn bèn guin ya?

Badxi'man laan rëbaman:

—Ad najtan.

¹⁸ Per guial dád nayaag, zeel bèn naj ree mojs con ree bèn rajp ro' yadoo nabe'c reeman guij rucha' reeman. Négajc Béd cucha'nè reeman ruděj guin.

*Gunabdiidx Anás loj Jesús**(Mt. 26:59-66; Mr. 14:55-64; Lc. 22:66-71)*

¹⁹ Guzuloj bèn la Anás canabdiidxaman loj Jesús xcwent ree xbejnman nè xcwent ni rulüüman. ²⁰ Zeel rëb Jesús:

—Gunen loj gra ree bejn. Zianczi balün lod rucaagdiajg ree xtiidx Dios në lën dux yadooro' ree, lod rado'p dugra ree. Achet ni gunen ralan. ²¹ ¿Chexc zeel rniabdiidxil lon? Gunabdiidx loj ree bën bacaagdiajg ni rën, laa reeman na xhie gunen, laa reeman ragbee.

²² Chi rëbaman zian, tijb bën rajp ro' yadoo guin wëez ro'man, rëbaman:

—¿Zian yadxi'l xtiidx bën rniabee guin ya?

²³ Badxi' Jesús laan rëbaman:

—Bal xhie ni mal rën, guna xhienin. Per bal gunen zagdxe, ¿chexc zeel rguinl naj?

²⁴ Dxel guidib naxiiman guxhaal Anás laaman loj Caifás, bën naj quijb bixhioz zobjloj.

Rëb Bëd stijb ad nünbeetaman Jesús

(Mt. 26:71-75; Mr. 14:69-72; Lc. 22:58-62)

²⁵ Per Bëd sta za'man cucha'man ruděj guin. Abi' gunabdiidx reeman lojman, rëb reeman:

—¿Nid në lüj naj tijb ree xbejn bën guin ya?

Badxi' Bëd laan rëbaman:

—A'n, ad xbejntaman naj.

²⁶ Dxel tijb xmojs bixhioz zobjloj guin, bën naj lasa' bën gutü' Bëd guidiajg, rëbaman loj Bëd:

—¿Nid lüjn baguian ya za'nël laaman guia' ree yag olivos?

²⁷ Rëb Bëd stijb guial ad nünbeetaman Jesús, loj hor zii gajc guridxa' tijb guid.

Binë reeman Jesús loj Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Chi bani luyuj, bazanë reeman Jesús lidx Caifás, zinë reeman laaman lën xpalas gubernador Pilato. Per ree bën Israel guin ad guyut reeman lën palas guin, din par laa reeman bal niu reeman, ad nayatri reeman loj Dios, abi' ad nile't niajw reeman xche guialraw ni raw reeman pascw. ²⁹ Zeel brii Pilato persi guneenëman laa reeman, rëbaman:

—¿Xhie been xin guie zeel zidnëdi laax guie?

³⁰ Badxi' reeman laan rëb reeman:

—Bal najman benza'c, ad ziant nudnë'n laaman lojl.

³¹ Dxel rëb Pilato:

—Gol bignëx, gol been guialguxtis zi'c naj xleydi.

Abi' rëb reeman:

—Per ad naca'tan guialrniabee yanabeen guiët bejn.

³² Zian gojc cumplid xtiidx Jesús chi bagojnman xhienaag guiëtaman.

³³ Bayu Pilato lën palas guin, dxel gurejdxaman Jesús, gunabdiidxaman lojman rëbaman:

—¿Lüj naj xrey ree bën Israel ya?

³⁴ Badxi' Jesús an rëbaman:

—¿Lüjczy rniabdiidx lon ya o yu' ree ben ren na lojl zian?

³⁵ Badxi' Pilato laan, rëbaman:

—¿Wen bën Israel naj ya? Bën ladx gajc reel con ree bixhioz rniabee bidnë lüj lon. ¿Xhie beenl?

³⁶ Badxi' Jesús an rëbaman:

—Guialrniabee ni ra'pan ad lojt guidxliuj zan, din bal loj guidxliuj zan, nia'pan bën nidijl ree chitëë niniiaz ree ben Israel naj. Per yan ad lojt guidxliuj guie za da guialrniabeen.

³⁷ Dxel rëb Pilato lojman:

—¿Zë loj diidxan ya rey najl?

Badxi' Jesús laan rëbaman:

—Reyqui naj, zi'c nal. Par zian goolan par zian tëë zialan loj guidxliuj guie zidgaguien ni naj diidxli, graczi ree bën zinal ni diidxli rucaagdiajg reeman ni rniën.

³⁸ Dxel rëb Pilato:

—¿Xhiezanin naj diidxli?

Gunabee reeman guiët Jesús

(Mt. 27:15-31; Mr. 15:6-20; Lc. 23:13-25)

Chi gulox rëb Pilato zian, dxel briiman bigneenëman bën Israel ree stijb, rëbaman:

—Achet xgualquia xin guin radxejlan. ³⁹ Per lëjt, xcostumbridi naj guial loj lanij pascw laa tijb bën yu' ladxguiib. Yan, ¿rëndi ya guslaan xreydi?

⁴⁰ Dxel gurixdiaj ree bën Israel guin, rëb reeman:

—¡Ad laataman guslaal! ¡Zagdxeli baslaa Barrabás!

Abi'za Barrabás guin bëngubaanan.

19

¹ Dxel gunabee Pilato gudijn ree suldad Jesús. ² Abi' beenchaaw reeman coron gujëjch, badxe' reeman laan guijcaman, bascajcw reeman laaman tijb lajd xniaya's. ³ Dxel gubig reeman lojman, rëbgaj reeman:

—¡Guibanri xrey ree bën Israel!

Dxel rëëzgjaj reeman lojman.

⁴ Brii Pilato stijb, abi' rëbaman loj ree bën Israel guin:

—Gol baguiaa, gabën laax din gagbeedi, achet xgualquiay radxejlan.

⁵ Dxel brii Jesús, yu' coron gujëjch guin guijcaman, najcw tëëman lajd xnia guin. Abi' rëb Pilato:

—Laax guie.

⁶ Dxel bixhioz rniabee ree në ree bën rajp ro' yadooro' Jerusalén, chi baguiaa reeman laaman, guzuloj rbixdiaj reeman, rëb reeman:

—¡Bacaax loj crüjz! ¡Bacaax loj crüjz!

Rëb Pilato loj reeman:

—Gol chinëx, lëjt gol bacaax loj crüjz, achet xtolix radxejlan.

⁷ Badxi' reeman laan rëb reeman:

—Laa tijb dux leyan yu', rëb lojn ryal guiëtix, guial nax najx Xi'n Dios.

⁸ Chi biguienman ni rëb reeman, mazri bidxebaman. ⁹ Bayuman lën palas guin zatijb, gunabdiidxaman loj Jesús rëbaman:

—¿Ban xin lüj?

Per ad badxi't Jesús laan. ¹⁰ Zeel rëb Pilato:

—¿Nid zadxi'l ni rniën ya? ¿Nid ragbeel ya ca'n gualrniabee din gucan lüj loj crüjz o guslaan lüj ya?

¹¹ Dxel rëb Jesús:

—Achetczi gualrniabee nitia'l bal id Dios nunee laan. Zianan zeel mazri zien xtol bën bidnë naj guie yu' guial lojl.

¹² Diidz hor zii gajc raguuil Pilato mod, xhienaag guslaaman Jesús, per rbidxa' ree bën riga' yagaj, rëb reeman:

—¡Bal guslaal laax, ad najtil xmiw bën naj César! ¡Din chutëëz bën rajc rey rzuj contr César!

¹³ Chi biguien Pilato rëb reeman zian, gunabeeman babëë reeman Jesús, dxel gurej lod rniabeeman, lod la Gabata con diidx hebreo, rën guiëban Lod

yu' ree guiaj. ¹⁴ Chi guixiez gal lanij pascw, cost garol dxej rëb Pilato loj ree bén Israel:

—¡Laa xreydi guie!

¹⁵ Per rbidxa' reeman rëb reeman:

—¡Guiëtix! ¡Guiëtix! ¡Bacaax loj crüjz!

Gunabdiidx Pilato loj reeman, rëbaman:

—¿Wen gucan xreydi loj crüjz ya?

Badxi' ree bixhioz rniabee laan, rëb reeman:

—Achut dux reyan yu', tijbzi César.

¹⁶ Dxel bayü Pilato Jesús loj ree suldad din gucaa reex laaman loj crüjz, dxel zinë reex laaman.

Cwa Jesús loj crüjz

(Mt. 27:32-44; Mr. 15:21-32; Lc. 23:26-43)

¹⁷ Briinë reex Jesús, nüüman crüjz, binë reex laaman lod la Calaver, diidx hebreo lan Gólgota. ¹⁸ Ni bacaa reex laaman loj crüjz con zatio'p ree bejn, tijb gaj reeman ca cwë'man. ¹⁹ Gunabee Pilato cwa lejtr guijc crüjz guin, rëban: “Jesús bén Nazaret, xrey ree bén Israel.” ²⁰ Dád zien ree bén Israel biil lejtr guin, guial naj luar zii gajxh loj ciuda, guiáad lejtr guin can con diidx hebreo, diidx latin nê diidx grieg. ²¹ Rëb ree bixhioz rniabee ree bixhioz loj Pilato:

—Ad rucaal: “Xrey ree bén Israel”, bacaa: “Bén rëb naj xrey ree bén Israel.”

²² Badxi' Pilato laan rëbaman:

—Ni ma bacan yaya'nan zian.

²³ Chi gulox bacaa ree suldad guin Jesús loj crüjz, baca' reex xabaman, gudixya' reexan tajp la', dxel cwa' reex tib la' gajn. Nê stijb xabaman cwa' reex, ad nadiibtan, najcchaaw diidx yëjnan xt guia'n, najn tijbzi lajd. ²⁴ Zeel rëb loj lasa' reex:

—Ad zarooxt reen, yadxi't ree suert din guidoon chu yayal laan.

Zian gojc cumplid ni ca loj xtiidx Dios, rëban: “Bala' reeman da xaban, gudixijt téé reeman suert guijcan.” Zeel been ree xinsuldad guin zian.

²⁵ Gajxh cwë' crüjz ca Jesús za' xniaaman con xbël xniaaman con Li xbéngunaa Cleofas con Li bén gunee reeman Magdalena. ²⁶ Chi baguiaa Jesús xniaaman, za' tijb ree xbejnman cwë'man, bén rën da'taman, rëb loj xniaaman:

—Na, laa xi'nl yagaj.

²⁷ Dxel rëb loj xbejnman:

—Laa xniaal yagaj.

Diidx dxej zii bignëman xniaa Jesús lidxaman.

Güjt Jesús

(Mt. 27:45-56; Mr. 15:33-41; Lc. 23:44-49)

²⁸ Chi gulox rëb Jesús zian, gogbeeman ma gojc gran cumplid. Per din gac cumplid ni ca loj xtiidx Dios, rëbaman:

—Re'can nijs.

²⁹ Yagaj za' tijb re yu'n vin no'chan vinagr, zeel bagajdx reex tijb xiil loj vin guin, bacaa reexan loj tijb yag, dxel badxig reexan ro'man. ³⁰ Chi ma gu'man laan, dxel rëbaman:

—Ma gojc gran cumplid.

Dxel basajb lojman luyuj, güjtaman.

Guliiz tijb suldad guuib cwë'lën Jesús

³¹ Ma cayüjn ree bën Israel porvinid din guixiez gal lanij pascw. Zeel ad guyënt reeman naya'n ree cuerp guin loj crüzj dxej raziiladx reeman, din dád rajp reeman dxej guin respejt. Zeel biguiedx reeman loj Pilato din nabeeman qui'ch ree suldad guin xdxijt ree bën ca loj crüzj din guiët reeman yalet tée reex laa reeman. ³² Zeel wej reex. Yaloj gudi'ch reex xdxijt bën ca cwë' Jesús, dxel gudi'ch reex xdxijt bën ca stiblad cwë'man. ³³ Chi gubig reex lod ca Jesús, baguiaa reex ma güjtaman, zeel ad gudi'cht reex xdxijtaman.

³⁴ Per tijb suldad guin guxhal ladaman con guuib ca'x, dxel briin rejn con nijs. ³⁵ Bén rü diidx guie baguiaaman, zeel ragbeeman najn diidxli, rüman laan din në lëjt chililadx. ³⁶ Gra nine gojc din gac cumplid ni ca loj xtiidx Dios, rëban: “Ad rayalt gach xdxijt xiildoo.” ³⁷ Stibljajt rëb: “Guguaia reeman bën guxhalnë reeman guuib lad.”

Biguie'ch Jesús

(Mt. 27:57-61; Mr. 15:42-47; Lc. 23:50-56)

³⁸ Chi gulox gojc zian, wej Xiëb, bën zëed guiedx la Arimatea, bignabaman diidxbee loj Pilato din yaletaman xcuerp Jesús din chiquie'chaman laaman. Në bën la Xiëb bililadx Jesús, per ralanzi, guial bidxebaman bejn ree. Badëed Pilato diidxbee, zeel wej Xiëb bigxiiman xcuerp Jesús. ³⁹ Në Nicodemo wej, bën bigneenë Jesús tijb guxhin, bidxinnëman cost gajlbichii quil ni la mirra, no'chan aloe, rureen nejxh. ⁴⁰ Bagajdxnë reeman laan lajd batüüb reeman laaman, zi'c rüjn ree bën Israel chi ruquie'ch reeman bengüt. ⁴¹ Lod cwa Jesús loj crüzj naga' tijb guidxliuj lod yu' ree yag. Yagaj naj tijb baa cüb lod achutczu waguie'ch. ⁴² Yagaj gudixh reeman xcuerpaman, guial najn gajxh, guial ma suloj tée dxej raziiladx reeman.

20

Achetri xcuerp Jesús badxejl

(Mt. 28:1-10; Mr. 16:1-8; Lc. 24:1-12)

¹ Chidumingw chi sta nacayri, wej María Magdalena ro' xbaa Jesús, abi' baguiaaman ma bisüd guiaj nayaaw ro' baa guin. ² Dxel ruxüünman wejman lod za' Simón Bëd con zatijb xbejn Jesús, bën rën da'taman, abi' rëbaman loj reeman:

—Ma zinë reeman xcuerp Dad Jesús, banczi bigsa'n reeman laaman, achutri laaman yu' lën baa guin.

³ Abi' brii Bëd con bën guin, zë reeman ro' baa guin. ⁴ Grop reeman ruxüün zë reeman. Per bën guin mazri ruxüünman guial loj Bëd, abi' yaloj laaman bidxin ro' baa guin. ⁵ Dxel gudixlojman baguiaaman vend bidüüb Jesús, per ad guyutaman. ⁶ Dxelri bidxin Simón Bëd, abi' guyuman lën baa guin. Nëgajcaman baguiaa vend guin ⁷ Baguiaa tëëman lajd bidüüb guijc Jesús, nadüüban naga'n lood ren, ad naga'tan tijbzi con vend guin. ⁸ Dxel guyu bën bidxin ro' baa guin yaloj, baguiaaman ni goc, zianz bililadxaman, ⁹ guial gocli ad bignia't reeman ni ca loj xtiidx Dios guial yaban Jesús loj ree bengüt. ¹⁰ Dxel zia ree xbejn Jesús lidx reeman.

Baliüüloj Jesús loj María Magdalena

(Mr. 16:9-11)

¹¹ Per Li baya'nman ro' baa guin cayoonman. La'tgaj cayoonman gudixlojman lën baa guin, ¹² abi' baguiaaman tio'p ree anjl, najcw reeman lajd naquich, zojb reeman lod go't xcuerp Jesús, tijbaman lod go't guijcaman,

zatijbaman lod go't guia'man. ¹³ Dxel gunabdiidx ree anjl guin lojman, rëb reeman:

—Na, ¿chexc zeel roonl?

Badxi'man laan rëbaman:

—Guial zinë reeman xcuerp Dad Jesús, abi' banczi guin bigsa'n reeman laaman.

¹⁴ Guloxzi rëbaman zian, badxi' lojman baguiaaman za' Jesús yagaj, per ad bayünbeetaman laaman. ¹⁵ Dxel gunabdiidx Jesús lojman, rëbaman:

—Na, ¿chexc zeel roonl? ¿Chu raguuilil?

Gunaladx Li, bën rajp lod yu' ree yagnejxh guinan, abi' rëbaman:

—Dad, bal lüj binë xcuerpaman, guna ban bigsa'nl laaman din chigxin laaman.

¹⁶ Zianz rëb Jesús lojman:

—jLi!

Dxel badxi' loj Li, rëbaman lojman con diidx hebreo:

jRabuni! —rën guiëban Mextr.

¹⁷ Rëb Jesús lojman:

—Ad guqui'l naj, din gadan yaya' loj da Dadan. Per baguiaj biguiedx loj ree da bejnan guial yaya' loj da Dadan bën naj gajc xDadidi, loj da Diosan bën naj gajc xDiosidi.

¹⁸ Dxel wej María Magdalena bicojnman xbejn ree Dad Jesús guial baguiaaman laaman, bagojn tëeman laa reeman gra ni rëbaman lojman.

Balüüloj Jesús loj ree xbejnman

(Mt. 28:16-20; Mr. 16:14-18; Lc. 24:36-49)

¹⁹ Chidumingw zii gajc chi ma caxhin, bado'p ree xbejn Jesús, nayaaw ro' port yu' reeman guial rdxeb reeman guxtis Israel ree. Dxel balüüloj Jesús galay reeman, rëbaman loj reeman:

—Yabe'cdxe Dios luxdoodi.

²⁰ Chi ma gulox rëbaman zian, balüü yaaman loj reeman në cwë'lënman, abi' laa reeman dád babaa reeman baguiaa reeman Dad Jesús. ²¹ Dxel rëbaman loj reeman zatijb:

—Yabe'cdxe Dios luxdoodi. Zi'c guxhaalaman naj, ziangajc rxhialan lëjt.

²² Dxel balüjbaman guijc reeman, rëbaman:

—Gol gubajnnë xSprijt Dios. ²³ Bën güündi perdon xtol, chiquied xtol reeman, guiáad bën ad züjntidi perdon xtol, yaya'nnë xtol reeman.

Baguiaa Tumajs Jesús

²⁴ Tumajs, bën rníee reeman Cwajch, achut laaman za' chi balüüloj Jesús loj ree xbejnman. ²⁵ Chi rëb reeman loj Tumajs:

—Ma baguiaa Dad Jesús.

Dxel rëbaman:

—Bal id zuguian yaaman lod wëéz clav, abi' bal id zagu' da bacwënan lod wëéz clav guin, bal id zagu' tëe yan cwë'lënman lod bidxeelguidx, ad zaliladxtan.

²⁶ Chi goc xhujn dxej, badxajg lasa' ree xbejn Jesús zatijb, per dxel në Tumajs za'në laa reeman, nayaaw ruyu yu' reeman. Per balüüloj Jesús galay reeman, rëbaman loj reeman:

—Yabe'cdxe Dios luxdoodi.

²⁷ Dxel rëbaman loj Tumajs:

—Badxe' xbacwënl guie, baguiaa ree yan, banee yaal guie badxe'n cwë'lënan. Ad runawëëgril, bililadx.

²⁸ Dxel rëb Tumajs lojman:

—¡Da Dadan, da Diosan!

²⁹ Abi' rëb Jesús lojman:

—Rliladxil guial ma baguiaal naj. Xiquilbaa ree bën rliladx, majs ad waguiaat reeman naj.

Chexc zeel cwa gui'ch guie

³⁰ Zienri ree milagr been Jesús loj ree xbejnman, ni ad cwat ree loj gui'ch guie. ³¹ Sa'n nine ree cwa reen din chililadxidi guial Jesús naj Cristo, Xi'n Dios, abi' guial chililadxidi laaman guibandi tiblyyaa con Dios.

21

Baliüloj Jesús loj ree xbejnman ro' nijs

¹ Chi gudëd gojc zian, baliüloj Jesús loj ree xbejnman zatijb, ro' nijs naj gajxh guiedx Tiberias. Ze baliülojman: ² Chi nadxag lasa' ree Simón Bëd con Tumajs bën rniee reeman Cwajch, në Natanael bën za Caná guiedx riga' niz Galilea, con ree xi'n Zebedeo, nëtëë zatio'p xbejn Jesús, ³ dxel rëb Bëd loj reeman:

—Gan chignaazan bëjl.

Badxi' reeman laan rëb reeman:

—Në dunujn yadxoo.

Abi' wë'p reeman loj barcw zë reeman, per guxhin zii achutctzi bëjl gunaaz reeman. ⁴ Chi ma cayreguiaal, bidxin Jesús ro' nijs guin, per ad bayünbeet reeman laaman. ⁵ Dxel gunabdiidxaman loj reeman rëbaman:

—Xi'n, ¿nid chu bëjl wanaazidi ya?

Badxi' reeman laan rëb reeman:

—Achutctzi.

⁶ Abi' rëb Jesús loj reeman:

—Gol bazaal xguijxhidi xladbee barcw guin din guiniaazidi bëjl.

Zian been reeman, abi' ad rajctri rabëë reeman guijxh guin, guial dád zien bëjl yu' lojn. ⁷ Dxel xbejn Jesús, bën rën da'taman, rëbaman loj Bëd:

—¡Dad Jesúsán!

Bigueijnzi Simón Bëd zian, laa got gajc xabaman ni gulëëman, abi' guti-ajsaman lojnijs guin. ⁸ Guiáad zaxho'p xbejn Jesús loj barcw guin badxin reeman ro' nijs guin, coobyuj reeman guijxh guin, guidxan bëjl, guial zi'ctzi tibgayuu mejtr ryaadx yadxin reeman ro' nijs guin. ⁹ Chi baguiajt reeman, baguiaa reeman laa guij ma riga', dxiib tijb bëjl lojn, në guiadxtil riga' yagaj.

¹⁰ Dxel rëb Jesús loj reeman:

—Gol tanë tio'p choon bëjl gunaaz nejzidi.

¹¹ Dxel wë'p Bëd loj barcw guin, guxoobyujman guijxh guin guidxan bëjl narooob ree, xt ro' nijs guin. Tibgayuu tü'pchiibichoon bëjl yu' lojn. Abi' majsi zienb, per ad goxya'tan. ¹² Zian rëb Jesús loj reeman:

—Gol guda din gawidi rsiiil.

Abi' ni'qui tijb reeman ad rayaxt guiniabdiidx chu bénan, guial ragbee reeman Dad Jesúsán. ¹³ Dxel gubigaman cwa'man guiadxtil badëëman loj reeman, ziangajc beenman con bëjl guin. ¹⁴ Ni ne bayon volt baliüloj Jesús loj ree xbejnman chi babanman loj ree bengüt.

Guneeñe Jesús Bëd

¹⁵ Chi gulox gudaw Jesús con ree xbejnman, gunabdiidxaman loj Simón Bëd, rëbaman:

—Simón, xi'n Waj, ¿walil ya rënl naj mazri guial loj ree bën guie?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiildoon.

¹⁶ Abi' rëb Jesús zatijb:

—Simón, xi'n Waj, ¿walil ya rënl naj?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiilan.

¹⁷ Bayon volt gunabdiidx Jesús rëbaman:

—Simón, xi'n Waj, ¿rënl naj ya?

Dád guyunaya Bëd, guial ma gojc choon volt gunabdiidx Jesús bal rënman laaman. Zianz rëb Bëd:

—Dad, lüj ragbee graczi, ragbeel rënan lüj.

Zeel rëb Jesús:

—Gunaj ree da xiilan. ¹⁸ Diidxiczi ganin, chi goquil xinguiag, rajcw xabil persi rejł lod rënl. Per chi ma najł bengol, gusli xu'quil din guscajcw ben ren xabil din chinë reeman lüj lod ad rëntil chel.

¹⁹ Rëb Jesús zian guial basignia'man xhienaag guiët Bëd, din güünbee ree bejn Dios. Dxel rëb Jesús:

—Tanal naj.

Ni ne bacaa xbejn Jesús bën guyën da'taman

²⁰ Chi badxi' loj Bëd, baguiaaman laa bën rën da't Jesús zinal laa reeman. Laaman gure cwë' Jesús chi gudaw reeman xche, gunabdiidx tēëman loj Jesús rëbaman: “Dad, ¿chu yayü lüj?” ²¹ Chi baguiaa Bëd laaman, gunabdiidxaman loj Jesús rëbaman:

—Dad, laadxza xin guin, ¿xhie saquix?

²² Badxi' Jesúsán rëbaman:

—Bal rënan guibanx xt yaguialan, ¿xhie güünł? Lüj tanal naj.

²³ Zianan zeel bire'ch diidx loj ree xbejnman guial ad zëjtt bën guin. Per ad ziantan rëb Jesús, rëbaman: “Bal rënan guibanx xt yaguialan, ¿xhie güünł?”

²⁴ Bën guin gajcan rü diidx xcwent ree nine, laa tēëman bacaa laan, rayagbee tēë ree rüman diidxli. ²⁵ Dád zien ree ni been Jesús, bal nitia tijb gajn, wed ad zadaant loj guidxliuj niu ree libr ni niajc.

Ni been ree xi Apóstoles Jesucrist

¹ Rugajpdiozan lüj dad Teófilo: Loj da gui'ch yalojn rnin graczi ni been Jesús ni balüü tēēman chi guzuloj xchiinman ² xt chi ziaman xanyabaa. Chi gadaman yaguiaj, gunabeeman bēn naj ree apóstoles, bēn guleman, ni rayal güün reeman, zi'c rēb xSprijt Dios lojman. ³ Chi mal guzagdiaj da'taman loj xguialgütaman, babanman loj ree bengüt. Loj tiuu dxej balüülojman zien volt loj bēn naj ree apóstoles, persi gogbee reeman nabancaman. Dxej zii ree guneenēman laa reeman xcwent xguialrniabee Dios.

⁴ Chi ziz za'nēman laa reeman, guneenēman laa reeman ad yaza reeman Jerusalén, rēbaman:

—Gol gulējz gac cumplid ni na da Dadan zi'c ma rnin lojdi. ⁵ Walican baroobnijs Waj con nijs, per ma zidyob dxej gui't xSprijt Dios guibannē lējt, laan gac zi'c gualrirobnis par lējt.

Zia Jesús xanyabaa

⁶ Lēn ree dxej zii chi badxaag lasa' reeman con Jesús, gunabdiidx reeman lojman rēb reeman:

—Dad, ¿yanan yayül gualrniabee loj ree bēn Israel ya?

⁷ Badxi' Jesúsán rēbaman:

—Ad lējtít rayal gagbee xhie dxejn o xhie horan gac zian. Tijbzi da Dadan ragbee laan dín laaman ca' gualrniabee. ⁸ Per chi ma nabannēdi xSprijt Dios, tia'di gualrniabee. Dxel griidi chiguedi diidx loj ree bēn Jerusalén chu najn, nē gra ree guedx riga' niz Judea nē niz Samaria, xt ree guiedx ren ni riga' ree zijt da't.

⁹ Gulox guneeaman, ruguiaa reeman laaman dxejlczi wajsaman ziaman xanyabaa, abi' biguiajt tijb bēj bata'cwan laaman, dxel ad baguiaatri reeman laaman. ¹⁰ La'tgaj ruguiaa reeman ziaman xanyabaa, gulentie tio'p ree bēn najcw lajd naquich lod za' reeman, ¹¹ abi' rēb reeman loj ree apóstoles guin:

—Bēn Galilea, ¿chexc zeel sta ruguiaadi xanyabaa? Jesús, bēn baguiaadi zia xanyabaa, laagajcaman yaguiaad stijb, zi'cgajc baguiaadi ziaman.

¹² Chi baza ree xi apóstoles Jesús ruguia' la Olivos, guza reeman zi'ct rza reeman dxej raziiladx reeman, persi badxin reeman Jerusalén. ¹³ Chi badxin reeman, wē'p reeman lēnü ladya lod zojb reeman. Brii laj reeman Bēd, Waj, Jacob, Andrejs, Felip, Tumajs, Tol, Matew, Jacob xi'n Alfeo, Simón (bēn guzunē ree bēn cananistas), nē Judas xi'n Jacob. ¹⁴ Gra reeman rüjn tijbzi xgab, radxaag lasa' reeman dín cwedx guiniab reeman Dios, con ree bijch Jesús con Li xniaaman, con ree bēngunaa ren.

Gulej reeman bēn baya'n xluar Judas

¹⁵ Lēn ree dxej zii bado'p ree bēn rililadx Jesús, naj reeman cost tibgayuu gajl bejn, dxel guzuli Bēd galay reeman, rēbaman loj reeman:

¹⁶ —Compniar raliduladx ree Jesucrist, ganin lojdi, gojc cumplid ni bacaa rey Davi loj xtiidx Dios por xSprijtaman xcwent Judas, xin balüü Jesús loj ree bēn gunaaz laaman, ¹⁷ gojquix tijb dux compniaran, nē laax been lasa' dxiin raguieenan. ¹⁸ Per con milia ni gudix reeman laax por ni mal beenx, bio' guidxliuj lod gudidya'x, bazuj gui'quix, goxya'x abi' brii gra xziix. ¹⁹ Chi gogbee gra ree bēn Jerusalén ni goc, gunee reeman guidxliuj zii Acéldama, rēn guiēban guidxliuj rejn. ²⁰ Dín rēb loj libr la Salmos:

Yaya'n dējch lidxix,
 achutziri cwe lēnan.
 Rēb tēē lojn:
 Yayu ben ren guia'x.

²¹ Zeel loj gra ree bēn za'nē dunuj ree guidib tiamp ni guzunē Jesús dunuj ree, ²² diidz chi baroobnijs Waj laaman xt chi ziaman xanyabaa. Loj gra reeman rayal grii tijbaman din güünman dunuj ree yudar yaguie'ch ree loj ree bejn guial walican babanman loj ree bengüt.

²³ Dxel gulej reeman tio'p reeman: tijb bēn la Xiēb (rniee reeman laaman Barsabás, rniee tēē reeman laaman Justo), gulej tēē reeman bēn la Matías.

²⁴ Dxel gurejdx gunab reeman Dios, rēb reeman:

—Dad, lūj nūnbee luxdoo gra ree bejn. Balüü chu loj grop reeman gulejl ²⁵ din gacaman apóstol luar Judas, din banijitix delant lojl por dol ni beenx abi' ziax luar ni rayalix.

²⁶ Dxel baguiaa reeman chu yayal suert guin, abi' bayal Matías laan. Loj hor zii gajc bayuman loj zachibtib ree apóstoles.

2

Biguiajt xSprijt Dios diidz xanyabaa

¹ Chi bidxin dxej gojl lanij la Pentecostés, gra ree bēn rliladx Jesucrist bado'p tijbzi luar. ² Dxejlczi gojc naquie' xanyabaa zi'c bidoxh xt bayu bilēnū lod riga' reeman, ³ abi' gulentie zi'c bajl dobēz ree, biguiajt reen guijc tijb gaj reeman. ⁴ Zianz guyu xSprijt Dios luxdoo graczi reeman, dxel guzuloj canee reeman diidz ren ree zi'c cusnee Sprijt guin laa reeman.

⁵ Lēn ree dxej zii za' zien ree bēn Israel Jerusalén, baza reeman gra ladci din cwedx guiniab reeman Dios. ⁶ Chi biguiejn reeman cayajc naquie', bado'p reeman persi biquiaa reeman. Dxel chi biguiejn reeman rniee gra ree bēn rliladx Jesús xtiidz tijb gaj reeman, ad badxejlt xgab nūjn reeman. ⁷ Dád badxa loj reeman xt ni'quid badxejlt xhie nūjn reeman, abi' gunabdiidx loj lasa' reeman rēb reeman:

—¿Nid bēn Galilea gra ree bēn canee guin ya? ⁸ ¿Chexc zeel raguiejn ree rniee reeman dux tiidz ree? ⁹ Du loj ree no'ch ree bēn zēēd guiedx riga' ree niz Partia, Media, Elam, Mesopotamia, Judea, Capadocia, Ponto, Asia Menor, ¹⁰ bēn zēēd tēē ree guiedx riga' ree niz Frigia, Panfilia, Egipto, nē ree guiedx nulen Libia ni riga' ree gajxh Cirene, nē ree bēn zēēd Rom, yu' reeman gojl Israel per naban reeman Rom, yu' tēē reeman naj quijb ben Rom per rliladx reeman ni rliladx ree bēn Israel. ¹¹ Nē ree bēn zēēd niz Creta nētēē ree bēn zēēd guiedx riga' ree niz Arabia no'ch du loj ree. ¡Per dugraczi ree caycaagdiajg con dux tiidz ree niza'cdxoon rūjn Dios!

¹² Graczi reeman badxa da't loj xt ni'quid badxejlt xgab nūjn reeman, abi' guzuloj canabdiidx loj lasa' reeman rēb reeman:

—¿Xhie rēn guiēb gra ni guie'?

¹³ Per garol reeman baze' laa reeman, rēb reeman:

—Rē' reeman.

Ni rēb Bēd loj ree bejn

¹⁴ Dxel guzuli Bēd con zachibtib ree apóstoles guin, guneeman rejs rēbaman: —Lējt bēn Judea nē graczi ree bēn zojb Jerusalén, gol bacaagdiajg gol bignia' tēē ni ganin. ¹⁵ Ad rē't ree bēn guin zi'c naladxidi, din qui gojlri raca gaa rsil. ¹⁶ Guie cayajc cumplid ni guneē bēn brii laj Joel, bēn badēē xtiidz Dios loj ree bejn, chi rēbaman:

¹⁷ Na Dios, guidxin dxej gaxhal da Sprijtan luxdoo gra ree bejn, abi' xi'ndi xinguaaw con biingunaa gudëed reex da diidxan, zien ree ni gulüüloj loj ree xinguiag, guiáad ree bengol zien ree ni guinie'xhaal reeman.

¹⁸ Dxej zii ree gaxhal da Sprijtan luxdoo ree bén rüjn da dxiinan, xinguaaw ree në ree béngunaa, abi' gudëed reeman da diidxan.

¹⁹ Gulün sen ree xanyabaa ni yadxa lojdi, guiáad loj guidxliuj gulün sen ree zi'c rejn në bajl nëtëé go'xh.

²⁰ Guicajy loj gubijdx, guiáad bëew yayajcan zi'c rejn. Chi ma gojc zian, dxej guidxin quijb dxej guin, dxej za'cdxoon gui't Dios bén rniabee, dxej guiguien guidib xbianiman.

²¹ Abi' graczi ree bén cwedx guiniab laaman güünman laa reeman perdon.

²² Rëb tëé Bëd loj reeman:

—Yan, gol bacaagdiajg ni ganin lëjt bén Israel: Lëjt ragbee guial Jesús bén Nazaret najman bén guxhaal Dios, been tëeman milagr ree në ree ni radxa loj ree bejn zi'c sen din gagbeedi guial Dios guxhaal laaman. ²³ Diizd gocli mal nüjn Dios xgab guial zian güünnëdi Jesús, gunaazidi laaman bayüdi laaman loj ree benmal, din gugüjt reeman laaman loj crüjz. ²⁴ Per basban Dios laaman stijb, babëeman laaman loj gualgüjt, din ad gojct nutëé guialgüjt guin laaman. ²⁵ Chi gunee rey Davi xcwent Jesús, rëbaman: Zianczi baguian dux Dad ree Dios za'nëman naj. Za'man da ladbeen, achetzi zajc guchejb naj.

²⁶ Zeel yu' luxdon nix, ruzat tëen Dios zagdxe. majsi guiëtan ad rdxebtan,

²⁷ din ad zusa'n'til naj lën baa, ad zatiëjbtal xhin xcuerp xi'n'l bén naya nali.

²⁸ Balüül naj nejz runee guialnaban, chu' tëé luxdon zagdxe guial guibannël naj.

²⁹ Basnuu gunee Bëd, rëbaman:

—Ganin loj gradi compniar, diidxliczi dux béngulal ree Davi güjtaman biguie'ch tëeman, abi' laa xbaaman sta raguiaa ree yan. ³⁰ Per gojcaman bén badëé xtiidx Dios loj ree bejn, abi' gogbeeman been Dios promejs guial loj xdiaaman grii Cristo bén nabee. ³¹ Rulüü ma cuguaaman gra ni gac, rëbaman guial yaban Cristo loj ree bengüt, ad zaya'ntaman lën baa ad zaxin tëët xcuerpaman. ³² Yan ma basban Dios Jesús, dugran nayajc testiw guial walican babanman. ³³ Zia tëeman xanyabaa zisobaman xladbee Dios, persi badëé xSprijt Dios lojman zi'c ma rëbaman, yan ma guxhaal Jesús Sprijt guin loj guidxliuj, por laaman cayaic ni cuguaadi caguiejn tëedi. ³⁴ Ad Davitan zia xanyabaa, din laagajcaman rëb:

Rëb dux Dad ree Dios loj bén rniabee naj:
“Gurej da ladbeen,

³⁵ xt gabecan xin rdxe'ch ree lüj guia'l.”

³⁶ 'Gradi bén Israel gol gogbee guial Jesús bén bacaadi loj crüjz, Dios bacaabee laaman din gacaman Dad, bén nabee dunuj ree.

Bachajg zien ree bejn bén riladx ree Jesús

³⁷ Chi biguiejn ree b́en riga' yagaj ni rēb Béd, dád guyu naya luxdoo reeman. Abi' gunabdiidx reeman lojman nē loj los demazri ree apóstoles guin, rēb reeman:

—Dad, gol guna, ¿xhie rayal yaguieenan?

³⁸ Dxel rēb Béd loj reeman:

—Gol bayagbee xtolidi, gol badxi' tēē lojdi loj Dios, gol gurobnijs por xgualrniabee Jesucrist din gac xtolidi perdon, zian chu' xSprijtaman luxdoodi. ³⁹ Din promejs guin naj par lējt nē par ree xi'ndi nē par gra ree b́en riga' zijt, par gra ree b́en cwe Dios par laaman.

⁴⁰ Con ree diidx guie nē mazri ree diidx ren guneenē Béd laa reeman, rēbaman:

—¡Gol bariica loj ree b́en rŭjn ni mal!

⁴¹ Zian gojc, graczi b́en bazoob diidx ni rēbaman gurobnijs. Dxej zii gajc bachajg cost choon mil bejn b́en rililadx ree Jesús. ⁴² Graczi reeman binal ni balüü ree xi apóstoles Jesús laa reeman, gubajnnē lasa' reeman zagdxe, gurejdx gunab reeman Dios abi' rado'p reeman persi raw reeman guiadxtil tijbzi zi'c gunabee Jesucrist güün reeman.

Ze gubajn ree b́en bililadx Jesús yaloj

⁴³ Graczi ree bejn radxa da't loj milagr nē los demazri ree ni been ree apóstoles guin. ⁴⁴ Graczi ree b́en bililadx Jesucrist gubajnnē lasa' zagdxe, rgui's tēē ni rajp reeman loj lasa' reeman. ⁴⁵ Ruto' xguidxliuj reeman nē gra ni rajp reeman, persi rgui's reeman milia guin loj lasa' reeman zi'ctzi naj ni riaadx tijb gaj reeman. ⁴⁶ Guixie guixie rado'p reeman lēn yadooro' Jerusalén, dxel raguiaj reeman lidx xcompniar reeman rtaw reeman, dád nix yu' luxdoo reeman rēn tēē lasa' reeman, ⁴⁷ ruza't reeman Dios zagdxe, guiáad gra bejn guyēn laa reeman. Guixie guixie ragnē Dios din gacxhiej mazri b́en rililadx Jesucrist, persi gojc xtol reeman perdon.

3

Bajajc tijb b́en ad rajct rza

¹ Tijb dxej zē ree Béd con Waj lēn yadooro' Jerusalén raca choon wadxe, hor zii naj hor ni rbejdx rniab reeman Dios. ² Ro' xport yadoo guin zojb tijb b́en ad rajct rza diizd gojlaman. Zianczi rbe'c reeman laaman ro' port guin, ni la Port Za'cdxoon, din guiniabaman carda loj ree b́en ru lēn yadoo guin. ³ Chi baguiaaman Béd con Waj ma chu' reeman lēn yadoo guin, gunabaman carda loj reeman. ⁴ Baguiaa reeman lojman, dxel rēb Béd lojman:

—Baguiaa du lojn.

⁵ Chi biguiejnman rēb Béd zian, dxel baguiaaman loj reeman, naladxaman milia nudēēd reeman lojman. ⁶ Per rēb Béd:

—Ad ra'ptan plajt ni'qui or par gunen lojl, per ni zajc günan por lŭj günanan: Por xgualrniabee Jesucrist b́en Nazaret, guzuli, guza.

⁷ Dxel gunaazaman yaaman ladbee, bazuliman laaman. Loj hor zii gajc guyu ree guia'man gojl, ⁸ abi' gutiajsaman, guzuliman guzuloj cazaman. Dxel guyunēman laa reeman lēn yadoo guin, cazaman, catiajsaman cuza't tēēman Dios zagdxe. ⁹ Graczi ree b́en cuguaa laaman cazaman cuza't tēēman Dios zagdxe, ¹⁰ dád badxa loj reeman bidxeb tēē reeman guial gojc zian guial nŭnbee reeman b́en guin, ragbee tēē reeman laaman rbej ro' xport yadoo guin ni la Port Za'cdxoon, rniabaman carda.

Gunee Béd loj ree bejn lod la xcurdur Salomón

¹¹ Ad ro' nladxt Bén bayajc guin Béd con Waj. Dád badxa loj ree bejn, abi' baxüün reeman wej reeman lod la xcurdur Salomón lod za' ree Béd con Waj.

¹² Chi baguiaa Béd zian, rëbaman loj reeman:

—Bén Israel, ¿chexc zeel radxa lojdi ni goc? Ad naladxidi por dunujn rza Bén guie guial naca'n guialrniabee o guial nayajc naya delant loj Dios ya. ¹³ XDios dux béngulal ree Abraham, Isaac në Jacob, laaman badëë guialrniabee loj Jesús, Bén bayüdi loj guxtis. Abi' chi guyën Pilato nuslaaman laaman, ad cwëjbtidi. ¹⁴ Luar niniabidi nuslaa Pilato Bén naya nali, Bén rüjn zi'c rayal, gunabidi baslaaman tijb xin bagüjt bejn. ¹⁵ Zian bagüjtidi Bén runee guialnaban. Per basban Dios laaman stijb, abi' dunujn nayajc testiw guial babanman. ¹⁶ Bén guie, Bén ruguiaadi nünbee tëëdi, guyu gojl guia'man por xguialrniabee Jesucrist, bayajcaman guial baliduladxan, zi'c ruguiaa gracziidi.

¹⁷ Ganin lëjt compniar, ragbeen guial lëjt con ree Bén rniabee lëjt ni'quid gogbeetidi xhienin beendi chi bagüjtidi Jesús. ¹⁸ Per zian been Dios persi gojc cumplid ni rëbaman loj ree Bén badëë xtiidxaman loj ree bejn diizd gocli guial sagdiaj Cristo. ¹⁹ Zeel gol bayagbee xtolidi gol badxi' tëë lojdi loj Dios din güünman xtolidi perdon. Dxel yayaalyuj luxdoodi, ²⁰ guixhiaal tëëman Jesús stijb, Bén naj Cristo diizd gocli par lëjt, ²¹ majsi yan rayalri suman xanyabaa, xt ma bazuxnejz Dios gra, zi'c rëbaman loj ree Bén badëë xtiidxaman loj ree bejn diizd gocli, Bén gubajn ree naya delant lojman. ²² Abi' rëb Moisejs loj ree dux béngulal ree: “Loj xdiaadi cwëë Dios tijb Bén gudëë xtiidxaman loj ree bejn zi'c naj, gol bazoob xtiidxaman graczi ni naman lojdi, ²³ din graczi ree Bén ad zuzoobt xtiidxaman nit reeman, ad zajc tëëtri reeman cwent zi'c xbejn Dios.”

²⁴ Gra ree Bén badëëd xtiidx Dios loj ree bejn, diizd Samuel con los demazri ree Bén badëë xtiidx Dios diizd gulal, mal bagojn reeman ni cayajc ree lën ree dxej guie. ²⁵ Lëjt naj xdiaa reeman, lojdi gac cumplid ni cwëb Dios loj ree dux béngulal ree chi rëbaman loj Abraham: “Por xdiaal güñle'n gra ree bénguidxliuj.” ²⁶ Abi' chi basban Dios xi'nman Jesucrist, yaloj lojdi guxhaalaman laaman din güünle'man lëjt din yabëëcaman gradi loj ni mal rüjndi.

4

Bazuj reeman Béd con Waj loj ree guxtis

¹ Sta canee ree Béd con Waj loj ree bejn, chi bidxin ree xbixhioz ree Bén Israel në suldad rniabee suldad rniaj ree ro' yadooro' Jerusalén, nëtëë ree bénsaducew. ² Dád ralen reeman guial culüü ree Béd con Waj bejn ree, rëb reeman guial yaban ree bejn loj ree bengüt, din laan ma baguiaa reeman chi baban Jesucrist. ³ Zeel gunaaz reeman laa reeman, per guial ma gudxe, zeel badxe' reeman laa reeman ladxguuib la'tgaj rareguiaal. ⁴ Per dád zien ree Bén bacaagdiajg ni rëb ree Béd con Waj bililadx xtiidx Dios, gojc reeman cost gaay mil xinguaaaw xcwentqui ree béngunaa.

⁵ Chi bareguiaal, guxtis Jerusalén në ree bengol në ree mextr rulüü ley, bado'p reeman loj ciuda guin. ⁶ Në Anás bidxin yagaj, Bén naj bixhioz mazri zobjbloj rniabee graczi ree bixhioz, bidxin tëë bixhioz la Caifás në Waj në Lejandr, nëtëë gra ree Bén naj lasa' ree bixhioz rniabee guin. ⁷ Gunabee reeman bica' reeman Béd con Waj, abi' bazuj reeman laa reeman galay lod riga' reeman, dxel gunabdiidx reeman loj reeman, rëb reeman:

—¿Chu banee diidxbee o chu por rüjndi ni guin?

⁸ Per guial yu' xSprijt Dios luxdoo Béd dád gognëman laaman, zeel rëbaman:

—Gol bacaagdiajg ni ganin lëjt bengol në lëjt guxtis. ⁹ rniabdiidxidi dunujn xhienaag baguieenan béngogxuu guin yudar, xhie tëë naag gojc zeel bayajcaman. ¹⁰ Yanan lojdi din gagbeedi gagbee tëë gra bën Israel xhienaag bayajc bën za' lojdi. Bayajcaman por xguialrniabee Jesucrist bën Nazaret, bën bacaadi loj crüjz abi' basban Dios laaman stijb. ¹¹ Beennëdi laaman zi'c rüjn ree bën rüjn yu chi rbëëgo'n reeman tijb guiaj, dxel qui ragbeeri reeman guial guiaj guin naj ni mazri lasajc par gacné yu guin. ¹² Achut ben ren rüjn dux tol ree perdon, tijbzi Jesús, din achut mazri guxhaal Dios loj guidxliuj din güünman dunuj ree perdon.

¹³ Chi baguiaa ree guxtis guin ad rdxebt ree Béd con Waj guial rniee reeman, abi' gogbee reeman ad bën basiidt ree mazran achu tëët naj reeman, badxa loj reeman bayünbee tëë reeman laa reeman guial bën binal ree Jesús. ¹⁴ Abi' yagaj gajc za' bën bayajc guin, zeel ad bile'tri xhie niëjb reeman contr laa reeman. ¹⁵ Dxel gunabee ree guxtis guin barii ree Béd con Waj din yaya'n laaz reeman din gü reeman diidx. ¹⁶ Rëb reeman:

—¿Xhienaag yaguieennë' ree xin guin ree? Graczi ree bën Jerusalén ma ragbee milagr been reex. Abi' ad zajct yarexuu ree. ¹⁷ Per chitëë guire'ch xtiidx Jesús, yachejb reex din diidz yan achutziri loj guza't reex laax.

¹⁸ Dxel gurejdx reeman laa reeman gunabee reeman chitëë churi loj guza't reeman Jesús, ad gulüü tëëri reeman xtiidxaman. ¹⁹ Per badxi' Béd con Waj laan, rëb reeman:

—Lëjt gajc gol been xgab: ¿Zagdxe naj yazooban xtiidxidi luar yazooban xtiidx Dios ya? ²⁰ Per ad zajct yacwëëz yaguie'chan gra ni baguiaan baguiejn tëën.

²¹ Dxel bachejb ree guxtis guin laa reeman stijb, dxelri baslaa reeman laa reeman zia reeman guial ad badxejlt xhienaag nudëëd reeman laa reeman casti, din graczi ree bejn ruza't Dios zagdxe por ni goc. ²² Nadëd tiuu ijz yu' bën bayajc guin.

Rbejdx ree bën rliadx Jesús Dios

²³ Chi baslaa ree guxtis guin Béd con Waj, baguiaj reeman lod riga' xcompniar reeman bën rliadx ree Jesucrist, abi' be reeman diidx ni rëb ree bixhioz rniabee ree bixhioz në ree bengol rniabee. ²⁴ Chi gulox bacaagdiajg reeman diidx ni be reeman, graczi reeman guzuloj cabejdx canab Dios, rëb reeman:

—Dad lüj rniabee gra, lüj naj bën been xanyabaa në guidxliuj nëtëë nijsdoo con gra ni yu' loj reen. ²⁵ Por xSprijt tëël gunee rey Davi diidx guie ree, chi rëbaman:

¿Chexc zeel ridxe'chnë ree bénguidxliuj Dios?

¿Chexc zeel rüjn reeman xgab ni ad rüjnt wen?

²⁶ Bado'p ree rey në gra ree guxtis

din su reeman contr dux Dad ree Dios në contr Cristo.

²⁷ 'Abi' zian ma gojc, Herodes con Poncio Pilato con ree bën Israel nëtëë ree bën ad najt bën Israel, badxajg lasa' reeman luguiedx guie persi guzuj reeman contr xi'nl Jesús, bën naya nali, bën bacaabeel. ²⁸ Zian gojc, been reeman zi'c ma beenl xgab diidz gocli. ²⁹ Abi' yan Dad, baguiaa yan ruchejb reeman dunujn. Gognë dunujn nayajcan xbejnl din gac yatie'chan xtiidxil sin gualrdxeb, ³⁰ në con xguialrniabeeel yasiajcan bënragxuu ree, yaguieen tëën milagr ree por xguialrniabee xi'nl Jesús, bën naya nali.

³¹ Chi gulox gurejdx gunab reeman Dios, guzuloj canij luar lod riga' reeman, dxel guyu xSprijt Dios luxdoo gra reeman, abi' guzuloj catie'ch reeman xtiidx Dios sin guialrdxeb.

Ragnë lasa' ree bën rliadx Jesús

³² Graczi ree bën rliadx Jesucrist bidxajg gubajn reeman, rüjn reeman tijbz xgab, ni'qui tijb reeman ad rëbt guial xieenzij reeman naj ni rajp reeman, din najn par gra reeman. ³³ Gognë Dios apóstoles guin ree persi basnuu be reeman diidxli guial baban Dad Jesús loj ree bengüt. Dád beenle' Dios laa reeman. ³⁴ Ni'czi tijb reeman ad biaadxt xhienin, din graczi ree bën rajp guidxliuj o bën rajp yu ya ruto' reeman laan, abi' milia guin ³⁵ rayü reeman loj ree apóstoles guin, persi laa reeman rgui's laan loj gra reeman zi'ctzi naj ni riaadx tijb gaj reeman. ³⁶ Loj reeman no'ch tijb bën brier laj Xiëb, najman xdiaa bën brier laj Leví, zëedaman yuj la Chipre ni riga' loj nijsdoo. Gunee ree apóstoles guin laaman Bernabé, rën guiëban Bén ragu' luxdoo ree bejn zagdex. ³⁷ Gojpaman tijb guidxliuj, abi' bato'man laan persi badëëman milia guin loj ree apóstoles guin din qui's reeman laan.

5

Dol ni been ree Ananías con Safira

¹ Per guyu stijb bën brier laj Ananías, xbéngunaaman brier laj Safira. Bato' tijb xguidxliuj reeman, ² per baya'nnë xbéngunaaman diidx persi baya'nnëman ta'n milia guin. Sta'nan badëëman loj ree apóstoles guin, rëbaman laan naj gran. ³ Abi' rëb Bëd lojman:

—Ananías, ¿chexc zeel cwëjbil gunabee xindxab lüj? ¿Chexc zeel guyënl nusquieel loj xSprijt Dios, din naya'nnël ta'n milia ni bato' xguidxliuj? ⁴ ¿Wen nid xguidxliujl gojcan ya? Abi' chi bato'lan, ¿nid xmilialan ya? ¿Chexc zeel balablaxdil beenl zian? Loj Diosan nuyënl nusquieel, ad lojt bejnan.

⁵ Chi biguiejn Ananías ni rëbaman, bjaibaman abi' güjtaman. Graczi ree bën gogbee ni guzacaman dád bidxeb reeman. ⁶ Dxel bibig bëlzi ree xinguiag, batüüb reex laaman lajd persi biquie'ch reex laaman.

⁷ Chi gudëd cost choon hor, dxel bidxin xbéngunaa Ananías, ad ragbeetaman ni goc. ⁸ Dxel gunabdiidx Bëd lojman rëbaman:

—Guna, ¿bato' xguidxliujdi zi'c na lacheelil ya?

Abi' rëbaman:

—An, zianqui bato'nan.

⁹ Dxel rëb Bëd lojman:

—¿Chexc zeel baya'ndi diidx persi nuyëndi nusquieedi xSprijt Dios? Laa ree xin biquie'ch lacheelil ziaad ni, yan nëgajc lüj chiquie'ch reex.

¹⁰ Loj hor zii gajc bjaib Safira lod za' Bëd, abi' güjtaman. Chi bayu ree xin guin baguiaa reex ma güjtaman, dxel bales reex laaman biquie'ch reex laaman cwë' lacheelaman. ¹¹ Graczi ree bën rliadx Jesucrist në gra ree bën gogbee ni goc, dád bidxeb reeman.

Zien ree milagr been ree apóstoles

¹² Zien ree milagr narooob been ree apóstoles guin loj ree bejn. Graczi ree bën rliadx Jesucrist radxajg lasa' ro' curdur lod nree reeman xcurdur Salomón. ¹³ Zagdex ruza't ree bën luguiedx guin laa reeman, per ad rayaxt reeman guchajg reeman laa reeman. ¹⁴ Abi' guixie guixie cayajcxhieje ree bën rliadx Dad Jesús, zi'c xinguiaw zi'c béngunaa. ¹⁵ Xt rbëë reeman bënragxuu ree lunejz, rguijxh reeman laa reeman loj ree loon në loj ree da, din chi téd

Béd, majsi xbalazaman téd guijc reeman. ¹⁶ Nē ree bēn zobj guiedx riga' ree gajxh Jerusalén, zien reeman bidxin Jerusalén, bidxinnē reeman bēnragxuu ree nē ree bēn yu' xindxab luxdoo, abi' graczi reeman bayajc.

Gunaaz ree guxtis Béd con Waj

¹⁷ Bixhioz mazri zobjloj rniabee graczi ree bixhioz nē ree bénsaduGew za'nē laaman, guyu guialnadēdoj luxdoo reeman, ¹⁸ abi' gunabee reeman biniaaz ree apóstoles guin persi badxe' reeman laa reeman ladxguuib. ¹⁹ Per guxhin zii tijb xi anj' Dios guxhal ro' ree xport ladxguuib guin, abi' babēēman laa reeman, rēbaman:

²⁰ —Gol chej lēn yadooro', gol biguiedx loj ree bejn xhie naag gap reeman guialnaban tiblayaa con Dios.

²¹ Chi biguiejn reeman ni rēb anj' guin, bareguiaal rsildoo wej reeman lēn yadoo guin, guzuloj culūū reeman bejn ree xtiidx Dios.

Guiaad bixhioz zobjloj guin con ree bēn za'nē laaman, bato'p reeman guxtis con gra ree bengol Israel. Abi' gunabee reeman suldad ree din chica' reex apóstoles guin ree lēn ladxguuib guin. ²² Per chi bidxin reex ro' ladxguuib guin, achutri ree apóstoles guin ree yu'. Dxel bicojn reex guxtis guin ree, ²³ rēb reex:

—Chi badxinan, baguiaan nayaaw ro' ladxguuib guin zagdxē, laa ree suldad rajp ro' ladxguuib guin za', per chi baxhalan, achutczu yu' lēnan.

²⁴ Dxel bixhioz zobjloj guin con suldad rniabee ree suldad rniaj ro' yadoo guin, con ree bixhioz rniabee ree bixhioz, chi biguiejn reeman zian, guzuloj rēb loj lasa' reeman, ¿ban xt guin chigdiblagaa rēd ni guie?

²⁵ Loj hor zii gajc bidxin tijb xin rēb loj reeman:

—Laa ree bēn badxe'di ladxguuib yu' lēn yadoo culūū reeman bejn ree.

²⁶ Dxel wej suldad rniabee guin con ree xsuldadix bica' reex apóstoles guin ree, per ad beennaat reex laa reeman guial rdxeb reex gucaaguaiaj ree bejn laa reex. ²⁷ Chi badxinnē reex laa reeman, bayū reex laa reeman loj guxtis. Dxel rēb bixhioz zobjloj guin loj reeman:

²⁸ —¿Nid ranan ya guial ad zajctri gulūūdi bejn ree xtiidx Jesús? Abi' yan graczi loj ree bēn Jerusalén ma gutie'chidi xtiidxix, nētēē yan rēndi gudxiibidi du guijcan guial dunujn bagūjt laax.

²⁹ Abi' badxi' Bēdan nē gra ree apóstoles guin, rēb reeman:

—Rayaal yazooban xtiidx Dios luar yazooban xtiidx ree bēnguidxliuj.

³⁰ XDios dux bēngulal ree bashan Jesús, bēn bacaadi loj crūjz. ³¹ Abi' nūjn Dios laaman bēn zobjloj, nabe'caman laaman xladbeeman, laaman naj bēn rniabee rabēē tēēman bejn ree loj xtol reeman, abi' zian guxhalaman nejz par ree bēn Israel din cwēēladx xtol reeman yadxi' tēē loj reeman loj Dios din gūūnman laa reeman perdon. ³² Dunujn nē xSprijt Dios bēn rudēēman loj ree bēn ruzoob xtiidxaman, rayagbeen guial gra ree ni guin naj diidxli.

³³ Chi biguiejn ree guxtis guin ni rēb reeman, dād balen reeman abi' guyēn reeman nugūjt reeman laa reeman. ³⁴ Per loj ree guxtis guin no'ch tijb bēnfarisew laman Gamaliel, najman mextr rulūū ley abi' graczi ree bejn rajp laaman respejt. Guzuliman abi' gunabeeman barii ree apóstoles guin xchu tibrajt. ³⁵ Dxel rēbaman loj ree guxtis guin:

—Bēn Israel, gol been xgab xhienin gūūnnēdi bēn guin ree. ³⁶ Gol basaal-adx, guyu tijb xin brii laj Teudas, rēbix yu' chu najx abi' cost tajp gayuu ree bejn binal laax. Per chi bagūjt ree bejn laax, bire'ch gra ree bēn binal laax, yagaj gulox gra ni beenx. ³⁷ Abi' tēē lēn ree dxex gunabee gobiarn biab ree bejn, guyu tijb xin brii laj Judas, gojqquix xin Galilea, ziangajc dād zien ree

bejn binal laax. Per chi bagüjt ree bejn laax, gra ree bén binal laax bire'ch. ³⁸ Zeel rnin lojdi, ad bal chu'ridi con ree bén guin, gol baslaa reeman. Din bal bénguidxliuj rniabee ni rüjn reeman, zadxin dxej loxan. ³⁹ Per bal por Dios cayüjn reeman ni guin ree, ad zajct gutëedi loj ni cayüjn reeman. Gol gojpc cudad ad niad chi gagbeedi contr Diosan za'di.

⁴⁰ Beencwënt ree guxtis guin xtiidx Gamaliel, dxel gurejdx reeman apóstoles guin ree, gudiñ reeman laa reeman abi' rëb reeman loj reeman ad guttie'chri reeman xtiidx Jesús, dxel baslaa reeman laa reeman zia reeman. ⁴¹ Per laa reeman dád nix yu' luxdoo reeman barii reeman lod za' ree guxtis guin guial baslaa Dios guzagdiaj reeman por Jesús. ⁴² Abi' ad rucwëézt rulüü reeman rniee tëe reeman xtiidx Jesús, gra dxejczzi rulüü reeman lën yadooro' Jerusalén nëtëe lidx lidx ree bejn.

6

Bibee gajdx ree bén güün yudar

¹ Lën ree dxej zii chi canuu cayajcxhiey ree bén rliladx Jesús, guzuloj cabe'c ree bén rniee diidx grieg xguialquia ree bén rniee diidx hebreo, rëb reeman guial gra dxejczzi chi rië's ni raw ree béngunaa bizëjb, ta'ndoon rtia' ree bén rniee diidx grieg guial loj ree bén rniee diidx hebreo.

² Dxel guidxibtio'p ree apóstoles guin bato'p reeman graczi ree bén rliladx Jesucrist, abi' rëb reeman:

—Ad zagdxtet naj guial yacwëéz yalüün xtiidx Dios par yadi'san ni gaw ree bejn. ³ Zeel yanan lëjt compniar raliduladx ree Jesucrist, gol gudiil entr lojdi gajdx ree bén ragbeedi naban zi'c rayal, bén yu' xSprijt Dios luxdoo, bén yu' tëe ree xquiarguejn, din yazuj reeman güün reeman dxiin guin. ⁴ Guiáad dunujn yasnuu yarejdx yanaaban Dios, yalüü tëen xtiidxaman.

⁵ Graczi reeman cwëjb ni rëb reeman, abi' gulej reeman bén la Esteban, laaman rliladx Jesucrist guidib luxdooan, rniabee tëe xSprijt Dios luxdooan guidiblagaa. Gulej tëe reeman Felip, Prócoro, Nicanor, Timón, Parmenas në Nicolás bén zëed Antioquía, nëman bililadx ni rliladx ree bén Israel chi gadaman chililadx Jesucrist. ⁶ Dxel binë reeman laa reeman loj ree apóstoles guin, persi gurejdx gunab reeman Dios por laa reeman badxiib tëe yaa reeman guijc reeman.

⁷ Canuu care'ch xtiidx Dios, abi' Jerusalén cayajcxhiey ree bén rliladx Jesucrist, në zien ree bixhioz Israel bililadx laaman.

Biniaaz Esteban

⁸ Dád gognë Dios Esteban badëe tëeman guialrniabee persi rüjnman zien loj milagr delant loj ree bejn. ⁹ Abi' bëlzi ree bén yadoo ni la Libertados në ree bén Cirene con ree bén Alejandría con ree bén niz Cilicia nëtëe ree bén zëed niz Asia, guzuloj cadildiidxnë reeman Esteban, ¹⁰ per ad gojct nadxi' reeman xtiidxaman guial cayagnë xSprijt Dios laaman. ¹¹ Dxel gudijx reeman bëlzi ree bejn din guiëb reeman, bacaagdiaj reeman rniee Esteban contr Dios në contr Moisejs. ¹² Zian been reeman persi bidxe'ch ree bén luguiedx guin, në ree bengol në ree mextr rulüü ley. Dxel gunaa reeman Esteban, binë reeman laaman loj guxtis. ¹³ Gudiil tëe reeman bén basquiee ree persi rëb reeman loj ree guxtis guin:

—Ad rucwëézt rnieeguijdx xin guie xley Moisejs në xyadoo Dios. ¹⁴ Dunujn ma bacaagdiaj rëbix guial Jesús xin Nazaret guse'nx dux yadooro' ree, guchaa tëex costumbr basa'n Moisejs du loj ree.

¹⁵ Abi' guxtis guin ree në gra ree bën riga' yagaj, chi baguiaa reeman loj Esteban, baguiaa reeman najn zi'c tijb loj anjl.

7

Ni rëb Esteban loj ree guxtis

¹ Dxel bixhioz mazri zojbloy rniabee graczi ree bixhioz, gunabdiidxaman loj Esteban, rëbaman:

—¿Walin ya rëbil zian?

² Badxi' Esteban laan, rëbaman:

—Dad guxtis, në lëjt compniar, gol bacaagdiajg ni ganin. Dios bën yu' xanyabaa balüüloj loj dux búngulal ree Abraham, chi gureman niz Mesopotamia chi gadaman chisob guiedx Harán. ³ Abi' rëb Dios lojman: “Basa'n ladxil në gra ree lasa'l, wej loj yuj ni gulün lüj.” ⁴ Dxel brieri Abraham ladx ree bën Caldea bisobaman Harán. Chi güt xDadaman, dxel bidnë Dios Abraham loj guidxliuj guie lod nadxu' ree yan. ⁵ Per chi bi't Abraham guie, achetczi guidxliuj badëed Dios lojman, ni'czi tibda'n'an ad badëetaman. Per beenman promejs loj Abraham guial gudëeman guidxliuj guie lojman, dxel chi guiëtaman tia' ree xdiaaman laan, majsi chi rëb Dios zian, ad wayut xi'n Abraham. ⁶ Rëb tëë Dios lojman guial xdiaaman chisob zi'c ree benzit nacion ren, lod gugüjn da't reeman laa reeman dxiin gusagzi tëë reeman laa reeman loj tajp gayuu ijz. ⁷ Per rëb tëë Dios lojman: “Gudëdan gra ree bën gusagzi laa reeman casti, gac xchej yarii reeman yagaj abi' guie güün reeman sirv lon zi'c rayal.” ⁸ Chi guneeën Dios Abraham, baya'n reeman diidx guial royal chu' gra ree xinguaaw sen. Zeel chi gol Isaac xi'n Abraham, gojc xhujn dxej, dxel badxe'man laax sen. Ziangajc beennë Isaac xi'nman Jacob, ziangajc beennë Jacob guidxiptio'p ree xi'nman, bën goc ree dux búngulal ree.

⁹ Bën goc ree dux búngulal ree gudëdloj reeman Xiëb bën naj bijch reeman, abi' bato' reeman laaman loj ree bën zë Egipto, per ad guro'nladxt Dios laaman, ¹⁰ gognëman laaman loj ni guzagdiajman badëë tëëman xquiar-guiejnman, gognë tëëman laaman persi biajb rey guin laaman zagdxe, abi' beenman laaman gobernador Egipto, bazuj tëëman laaman din nabeeman gra ni rajp rey guin.

¹¹ Chi guyu gubijn guidibczi Egipto në niz Canaán, dxel guzagdiaj da't ree dux búngulal ree guial achet ni gaw reeman. ¹² Per chi gogbee Jacob guial yu' trigo Egipto, guxhaal ree xi'nman bën naj dux búngulal ree, dxel wej reeman Egipto. ¹³ Chi barojp volt wej reeman, rëb Xiëb guial laaman naj bijch reeman, dxel gogbee rey Egipto xhie diaa zëedaman. ¹⁴ Dxel rëb Xiëb loj ree bijchaman din chigxii reeman xDadaman në gra ree lasa'man din chisob reeman Egipto. Gojc reeman gayojnchiin bejn. ¹⁵ Zianan zeel bisob Jacob Egipto, ni gütaman ni gajc güt ree xi'nman, dux búngulal ree. ¹⁶ Gojc xchej dxel bignë reeman xdxijt ree dux búngulal ree guiedx Siquem, persi biguie'ch reen lën baa guzii Abraham loj ree xi'n Hamor.

¹⁷ Chi ma zidyob tiamp gac ni rëb Dios loj Abraham, zien ree bën Israel ma gojcxhiey Egipto. ¹⁸ Abi' guzuloj gunabee rey ren Egipto, bën ad beenbeet Xiëb. ¹⁹ Rey zii basagzi bën du ladx ree, gunabeeman chigsëëb reeman xindo niguaaw golnejz ree din guiët reex. ²⁰ Abi' tiamp zii gojl Moisejs, tijb xindo bayuladx Dios. Gunaj ree xdadix laax choon bëëw. ²¹ Chi bidxin dxej bigsa'n reeman laax lod bigsëëb reeman laax, xi'n gajc rey guin baca' laax, persi baslaaman laax zi'c xi'nman. ²² Basiid Moisejs gra ni rajc ree bën Egipto, abi' lasajc ni guneex ni been tëëx.

²³ 'Chi guyu Moisejs tiuu ijz, bidyajb guijcaman bignaj lasa' Bén Israela-man. ²⁴ Abi' chi baguiaaman caguin tijb Bén Egipto tijb Bén Israel, balajman laaman, bagüjtaman Bén Egipto guin. ²⁵ Naladx Moisejs niagbee ree Bén Israel guial por laaman yabëë Dios laa reeman loj ree Bén Egipto, per ad gogbeet reeman. ²⁶ Chi bareguiaal, bidxaagloj Moisejs tio'p ree Bén Israel caga'p reeman, abi' guyënnan nabe'cdxeman laa reeman, rëbaman: "¿Chexc zeel rdilidi? Awa Bén Israel naj gropidi." ²⁷ Abi' Bén caguin Bén zatijb guin bacadxaaman Moisejs, rëbaman: "¿Chu bazuj lüj din nabeel dunujn, din na tëël ni rayal yaguieenan?" ²⁸ ¿Wen rënl ya gugüjtil naj zi'c bagüjtil Bén Egipto ni nieey?" ²⁹ Chi biguiejn Moisejs ni rëb Bén guin, baxüünman wejman niz Madián. Ni gureman zi'c benzit, abi' cwa'man bëngunaa, zianz guyu tio'p ree xi'ngaanman.

³⁰ 'Chi gudëd tiuu ijz, dxel balüüloj tijb xi anjl Dios loj Moisejs loj xbajl tijb yag ni cayazbajl lod naj yujbidx, gajxh guia' la Sinaí. ³¹ Dád badxa loj Moisejs guial baguiaaman bajl guin. Abi' chi bibigaman din guguaaaman laan mazri zagdx, biguiejnman cha' Dios rëbaman lojman: ³² "Naj naj xDios xbéngulal reel, Abraham, Isaac në Jacob." Dxel guzuloj canij Moisejs guial bidxebaman, ad bayaxtaman nuguaaaman bajl guin. ³³ Dxel rëb Dios lojman: "Gulëë xgurëchil, din nagle' lod za'l. ³⁴ Naj cuguia xhienaag cazagdiaj ree da bejnan Egipto, rigujejnan roon reeman zeel biguia'tan din yabën laa reeman. Yan, guda din gaxhalan lüj Egipto."

³⁵ 'Abi' majsi ad guyënt ree Bén Israel nuzoob reeman xtiidx Moisejs yaloj, rëb reeman lojman: "¿Chu bazuj lüj din nabeel dunujn na tëël ni yaguieenan?" Per por anjl balüüloj loj bajl guin, badëëd Dios guialrniabee lojman, abi' guxhaalaman laaman din güünman laa reeman yudar yarii reeman Egipto, zi'c rëb anjl balüüloj lojman loj yag caye'c. ³⁶ Moisejs guin naj Bén babëë dux béngulal ree Egipto, been tëëman milagr ree niz Egipto, në niz ro' nijsdoo ni la Nijs Xnia, në loj yujbidx lod guzu reeman tiuu ijz. ³⁷ Laagajc tëëman rëb loj ree Bén Israel: "Loj gajquidi cwe Dios tijb Bén gudëëd xtiidxaman loj ree bejn zi'c guleman naj. Gol bazoob xtiidxaman." ³⁸ Dxel chi guzunë Moisejs dux béngulal ree niz loj yujbidx, laaman naj Bén guneenë xi anjl Dios ruguia' la Sinaí, persi badëëman xtiidx Dios loj reeman, abi' diidx guin ree naj ni basa'n reeman duloj ree yan.

³⁹ 'Per dux béngulal ree ad bazoobt reeman xtiidx Moisejs. Ad guyënt reeman niniabeeman laa reeman, tib guyuguijci reeman nayejc reeman Egipto. ⁴⁰ Dxel rëb reeman loj Aarón: "Been dios ree, din ned reeman du loj ree, din ad rayagbeet ree gonczy Moisejs Bén babëë dunuj ree Egipto." ⁴¹ Dxel been reeman tijb go'ndobëz din gaquib xdios reeman. Bagüjt reeman be ree persi badëëd reeman laa reeb zi'c gon loj ni been reeman, been reeman lanij guial babaanë reeman ni been gajc reeman. ⁴² Dxel guro'nladx Dios laa reeman, baslaaman guyën reeman gubijdx con bëëw con bajl yu' ree xanyabaa. Din zian ca loj xtiidx Dios ni bacaa ree Bén badëëd xtiidxaman loj ree bejn, lod rëb:

Bén Israel, loj tiuu ijz ni guzudi loj yujbidx,
¿wen bagüjtidi be ree ya din guneedi laa reeb lon zi'c gon?

⁴³ Per mazri guyëndi xdxandi Moloc biaa tëëdi lidxan,
në xbajl dxan Refán, dxan been gajquidi din guzuxibidi loj reen.
Zeel gaxhalan lëjt mazri zijt guial Babilonia.

⁴⁴ 'Abi' chi guzu ree dux béngulal ree loj yujbidx, gojp reeman tijb yu been laa reeman sirv zi'c yadoo, lod guyuchaaw ree guiaj ni ca xley Dios. Been

reeman yadoo guin zi'c gunabee Dios Moisejs, chi rëbaman lojman guial güünman laan zi'c ma baguiaaman. ⁴⁵ Chi gü't Moisejs, baya'nnë ree dux béngulal ree yadoo guin. Chi baya'n Josué xluar Moisejs, dxel bidné reeman yadoo guin chi gudil reeman guijc guidxliuj con ree bén ren, abi' gognë Dios laa reeman persi been reeman gan baya'nnë reeman guidxliuj guin ree. Zian guzunë reeman yadoo guin xt bidxin dxej guzuloj gunabee rey Davi. ⁴⁶ Guyën Dios rey Davi, abi' laaman guyënman nünjman tijb yadoo par Dios, bén naj dux Dios ree nayajc ree bén Israel. ⁴⁷ Per rey Salomón naj bén been laan, ⁴⁸ majsi Dios bén yu' xanyabaa ad rbejtaman lën yadoo ni rünj ree bejn, zi'c rëb bén badëed xtiidx Dios loj ree bejn diizd gocli, chi rëbaman:

⁴⁹⁻⁵⁰ Xanyabaa naj lod zooban par ganabeen,

guiáad loj guidxliuj naj lod ruzu guia'n.

¿Xhienaag gac yu güündi par naj?

¿O xhienaag naj lod yaziiladxan?

¿Id naj ben graczi ree ni guie ya?, rëb Dios.

⁵¹ Per lëjt —rëb Esteban —dád nadidi, ad rëntidi guzoobidi xtiidx Dios, ad rën tëtidi chignia'di, zianczi za'di contr xSprijt Dios, zi'cgajc been ree xbéngulalidi. ⁵² ¿Chu bén badëed xtiidx Dios loj ree bejn ad beennaat ree xbéngulalidi? Xt bagüjt reeman bén badëed ree xtiidx Dios bén rëb ree guial gui't tijb bén naya nali. Abi' yan ma bi'taman, bayüdi laaman loj ree bén rniabee, gunabee tëedi güjtaman. ⁵³ Majsi cwa'di xley Dios loj ree xi anjlaman, per ad rüjntidi zi'c rëb loj ley guin.

Bagüjt reeman Esteban

⁵⁴ Chi biguiejn reeman ni rëb Esteban, xt raw lay reeman tant balen reeman laaman. ⁵⁵ Per guial yu' xSprijt Dios luxdoo Esteban, chi gules lojman xanyabaa, dxel baguiaaman xbiani Dios baguiaa tëëman Jesús za'man xladbee Dios. ⁵⁶ Dxel rëb Esteban:

—¡Gol baguiaa! Ruguian naxal xanyabaa, ruguia tëën Bén guxhaal Dios za'man xladbee Dios.

⁵⁷ Per chi biguiejn reeman zian, bata'cw guidiajg reeman, dxel gurixdiaj reeman zignaaz reeman Esteban. ⁵⁸ babëë reeman laaman loj ciuda guin, bicüjt reeman laaman con guiaj, guiáad xab reeman basa'nsii reeman loj xinguiag la Saulo persi canajxan. ⁵⁹ La'tgaj cucaaguaiaj reeman Esteban, rëbaman:

—Dad Jesús, baca' da sprijtan.

⁶⁰ Dxel bazuxibaman guridxa'man rejs, rëbaman:

—Dad Jesús, ad güüncwentil dol cayünj ree bén guin yan.

Naabczi gulox rëbaman zian, laa gü't gajcaman.

8

Guzunal Saulo bén rliladx ree Jesucrist

¹ Baya'n Saulo conform guial bagüjt reeman Esteban. Abi' dxej zii gajc guzuloj rzunal reeman bén Jerusalén ree bén rliladx ree Jesucrist, dxel bire'ch reeman guidib niz Judea në niz Samaria, bén najzi ree apóstoles baya'n. ² Guyu bëlzi ree xinza'c, laa reex biquie'ch Esteban, abi' dád biin reex guijcaman. ³ Guiáad Saulo rzunalaman bén rliladx ree Jesucrist, ruman yu yu din cwëë naguiejnman laa reeman, zi'c xinguiaw zi'c béngunaa, persi rgu'man laa reeman ladxguuib.

Bacaagdiajg ree bén Samaria xtiidx Dios

⁴ Per b́en b́rii ree Jerusalén, lod zétzi reeman rtie'ch reeman xtiidx Dios. ⁵ Zi'c been Felip, wejman guiedx Samaria, guzuloj caneeman xtiidx Jesucrist loj ree bejn. ⁶ Dád zien ree bejn rdo'p, graczi reeman rucaagdiajg chaaw ni rēb Felip, ruguiaa tēe reeman milagr ree ni rúnman. ⁷ Zien ree b́en nējt tib lajt xcuerp bayún Felip, nē ree b́en ad rzat zagdx, bayún tēēman b́en yu' ree xindxab luxdoo abi' rbixdiaj reex rarii reex. ⁸ Zianan zeel babaa da't ree b́en luguiedx zii.

⁹ Per luguiedx zii guyu tijb b́en b́rii laj Simón, diizd gocli rúnman guialbidxaa persi rusquieeman b́en Samaria ree, rúnman b́en lasajc. ¹⁰ Graczi reeman rucaagdiajg chaaw ni rēbaman, diizd mazri ree xinguiag xt mazri ree bengol, abi' rēb reeman:

—Naroob naj xguialrniabee Dios ni rajp b́en guie.

¹¹ Bidxga' reeman laaman guial ma gojc xhej cusquieeman laa reeman con guialbidxaa ni rúnman. ¹² Per chi bililadx reeman ni rēb Felip xcwent xguialrniabee Dios nē xcwent Jesucrist, zi'c ree xinguaaaw zi'c ree b́engunaa gurobnijs reeman. ¹³ Xt nē Simón billiladx gurobnijs tēēman, abi' ad riro'nladxtaman Felip radxa tēe lojman graloj ree milagr ruguiaaman rún Felip.

¹⁴ Chi gogbee ree apóstoles riga' Jerusalén guial ma bililadx ree b́en Samaria xtiidx Dios, dxel guxhaal reeman Béd con Waj ni. ¹⁵ Chi bidxin reeman, gurejdx gunab reeman Dios por ree b́en Samaria b́en ma rliladx ree xtiidx Dios din chu' xSprijt Dios luxdoo reeman, ¹⁶ din ni'qui tijb reeman ad wayut Sprijt guin luxdoo, gurobnijsi reeman por Dad Jesús. ¹⁷ Dxel guxhoob yaa ree Béd con Waj guijc reeman, abi' guyu xSprijt Dios luxdoo reeman.

¹⁸ Chi baguiaa Simón cayu xSprijt Dios luxdoo ree b́en guin guial caxhoob yaa ree apóstoles guin guijc reeman, dxel guyēnman nudēēman milia loj reeman, ¹⁹ rēbaman:

—Nē lon gol baneē guialrniabee guin din chi gaxhob yan chutéēz guijc b́enan, nē luxdooman chu' xSprijt Dios.

²⁰ Dxel badxi' Béd xtiidxaman rēbaman:

—Nítel con guidib xmilial, din rúnjl xgab guial zajc siil guialrniabee razaladx Dios. ²¹ Ad rayalt ad zajc tēēt güünl zi'c raguieenan, din ni'quid zinaltil xnejz Dios. ²² Bayún xgab por ni mal beenl, gurejdx gunab tēe Dios, rupent güünman lúj perdon por ree xixgabmalil, ²³ din ragbeen ganax gualralen yu' luxdool, abi' dol guin naj ni rniabee lúj.

²⁴ Dxel badxi' Simón xtiidxaman, rēbaman:

—Gol gurejdx gunab Dios por naj, chitéē gaza'can ni'qui tijb ni ma nadi.

²⁵ Chi gulox gunee ree apóstoles guin xtiidx Dios loj ree b́en guin, dxel badxin reeman Jerusalén, abi' graczi ree guiedx riga' niz Samaria lod gudēd reeman gutie'ch reeman xtiidxza'c Jesucrist.

Felip con b́en Etiopía

²⁶ Chi ma gudēd gojc zian, gunee tijb xi anjl Dios Felip rēbaman:

—Wej niz sur nejz ni zē Jerusalén xt lod la Gaza, niz lod naj ganax yujbidx.

²⁷ Dxel b́rii Felip zēman. Runejz guin banaazaman tijb b́en Etiopía, najman b́en zobjbloj guial laaman rgu'chaaw xmilia Candace, b́en naj reina Etiopía. Wejman Jerusalén bignajchi'man Dios, ²⁸ abi' ma bayunejzaman zia ladxaman, zobj lēn xcarrejt zagdxeman, roolaman loj gui'ch ni bacaa Isaias, b́en badēēd xtiidx Dios loj ree bejn. ²⁹ Dxel rēb xSprijt Dios loj Felip:

—Bibig gajxh cwē' carrejt guin.

³⁰ Chi bibigaman, bigueijnman cayool b́en guin loj gui'ch bacaa Isaías. Dxel gunabdiidxaman lojman ŕebaman:

—Dad, ¿rignia'l ni cayoolil ya?

³¹ Badxi' b́en guinan ŕebaman:

—¿Xoza chignia'n'an? Awa achut gusignia' naj.

Dxel ŕebaman loj Felip din ch́e'paman loj carrejt guin, cweman cwé'man.

³² Loj xtiidx Dios lod cayool b́en guin ŕeban:

Zi'c riné reeman tijb xiil,

biné reeman laaman lod gugújt reeman laaman.

Abi' achet ŕebaman,

zi'c tijb xiil ma za' loj ree b́en gugaj guidxladib.

³³ Chi beenné reeman laaman zi'ctzi ŕen reeman,

achut been guialguxtis por laaman.

Yan achut guza't xdiaaman,

din ma bisúd reeman laaman loj guidxliuj.

³⁴ Ŕeb b́en guin loj Felip:

—Guna sii, ¿chu xcwent rniee b́en bacaa diidx guie ree? ¿Xcwent gajcaman ya o xcwent ben renan?

³⁵ Dxel guzuloj Felip cusignia'man laaman xtiidx Dios ni cayoolaman, zian beman xtiidxza'c Jesucrist lojman. ³⁶ Abi' chi gudéd reeman lod yu' nijs, dxel ŕeb b́en guin loj Felip:

—Guie yu' nijs. ¿Nid zajc garobnijsan guie ya?

³⁷ Zeel ŕeb Felip lojman:

—Bal rliladxil guidib luxdool, zajcan.

Badxi' b́en guinan ŕebaman:

—Rliladxan guial Jesucrist naj Xi'n Dios.

³⁸ Dxel gunabeeman guzudxe xcarrejtaman. Abi' baguiajt grop reeman, dxel guyu reeman lojnijs guin persi baroobnijs Felip laaman. ³⁹ Chi barii reeman lojnijs guin, loj hor zii gajc gunidloj Felip biné xSprijt Dios laaman, abi' ad baguiaatri b́en guin laaman, per dád rabaaman zinal xnejzaman.

⁴⁰ Chi gogbee Felip, ma za'man xt guiedx Azoto, dxel źeman guiedx guiedx zigtie'chaman xtiidxza'c Jesucrist xt bidxinman Cesarea.

9

Bililadx Saulo Dad Jesucrist

(Hch. 22:6-16; 26:12-18)

¹ Guíaad Saulo ad rucwéét rdxe'chaman b́en rliladx ree Jesucrist, ŕebaman gugújtaman laa reeman. Zeel wejman bigneenéman bixhioz mazri zojbloj rniabee graczi ree bixhioz, ² din gac tijb gui'ch din gac cheman lén ree yadoo Damasco chigdiilaman b́en rliladx ree Jesucrist, zi'c ree xinguaaaw zi'c ree béngunaa, din chignéman laa reeman ladxguuib Jerusalén. ³ Per chi ma cadxinman gajxh guiedx Damasco, dxejlczi barii tijb guij xanyabaa balaan bacha' lod źeman. ⁴ Abi' bireeyujman, chi naga'man luyuj guin bigueijnman cha' b́en ŕeb:

—Saulo, Saulo, ¿chexc zeel rzunalil naj?

⁵ Abi' gunabdiidxaman ŕebaman:

—¿Chu lúj, Dad?

Badxi'man laan ŕebaman:

—Naj naj Jesús b́en rzunalil. Per ganin lúj, lúj gajc rguuil xguialnaal zi'c rújn tijb go'n rudxegua' loj yag ni rulaagné reeman laab.

⁶ Rnijs Saulo guial tant bidxebaman, abi' ŕebaman:

—Dad, ¿xhie rēnl gūnan?

Dxel rēb Dad Jesucrist lojman:

—Bixche, wej guiedx Damasco, ni na reeman ni rayal gūnln.

⁷ Abi' ree bēn nē Saulo dád bidxeb reeman guial biguiejn reeman cha' bejn, per achutzi baguiaa reeman. ⁸ Chi bixcheman luyuj guin, baxhal lojman, ad rajctri ruguiaaman. Dxel gunaaz reeman yaaman bignē reeman laaman Damasco. ⁹ Ni guzuman choon dxej, ad rajct ruguiaaman, achetctzi rawaman ache teētctzi rē'man.

¹⁰ Damasco gure tijb bēn rlliladx Dad Jesucrist, brii lajman Ananías. Balüüloj Jesucrist lojman, rēbaman:

—¡Ananías!

Badxi'man laan rēbaman:

—Laa naj guie Dad.

¹¹ Dxel rēb Jesucrist lojman:

—Bisu, wej call ni la nali. Chi guidxinl lidx Judas, gunabdiidx por tijb xin zēed Tarso, lax Saulo. Din laax cabejdx canab naj, ¹² abi' zi'c rulüü cane'xhchaalix, baguiaax guyu tijb bēn la Ananías guxhoob yaaman guiquix persi baguiaax stijb.

¹³ Chi biguien Ananías zian, dxel rēbaman:

—Dad, zien da't ree bejn ruza't xin zii, nē ree ni mal rüjnnēx bēn rlliladx ree lüj Jerusalén. ¹⁴ Yan zēēdix guie con xguialrniabee ree bixhioz rniabee ree bixhioz, din guiniaazix gra ree bēn rlliladx lüj.

¹⁵ Dxel rēb Jesucrist lojman:

—Wej, din naj gule laax din chiguiex da diidxan loj ree bēn ad najt bēn Israel, nē loj ree rey, con nēgajc loj ree bēn Israel. ¹⁶ Guiēn lojx guial sagdiaj da'tix guial najx da bejnan.

¹⁷ Dxel zē Ananías lēnū lod za' Saulo. Chi guyuman, guxhoob yaaman guijcaman, rēbaman:

—Bijch Saulo, Dad Jesús bēn balüüloj lojl runejz lod zēēdil, laaman guxhaal naj din yaguaaal, chu' tēē xSprijt Dios luxdool.

¹⁸ Loj hor gajc zi'c rulüü yu' xhie biquied guiaalojman abi' baguiaaman stijb. Dxel guzuliman gurobnijsaman, ¹⁹ gudaw tēēman persi bayuman gojl. Dxel guzujman Damasco tio'p choon dxej con ree bēn rlliladx Jesucrist.

Gunee Saulo xtiidx Dios Damasco

²⁰ Dxel guzuloj gunee Saulo xtiidx Dios lēn ree yadoo, rēbaman guial Jesucrist naj Xi'n Dios. ²¹ Graczi ree bēn biguien ni rēbaman badxa loj reeman abi' rēb reeman:

—¿Nid bēn guien rzunal bēn rlliladx ree Jesucrist Jerusalén ya? ¿Nid laagajcaman zēēd guie ya, din guiniaazaman bēn rlliladx ree Jesucrist chignē tēēman laa reeman loj ree bixhioz rniabee ree bixhioz?

²² Per Saulo guixie guixie mazri cariiiman guialrdxeb rnieeman xtiidx Dios, rulüüman guial Jesús naj Cristo, din yabēēman bejn ree loj dol. Xt ragdxa ree bēn Israel zojb ree Damasco chi rucaagdiajg reeman ni rēbaman.

Baxüün Saulo guiedx Damasco

²³ Ad xchejt gojc, baya'n ree bēn Israel diidx din nugüjt reeman Saulo, ²⁴ per laa gogbee gajcaman ni rēn reeman gūn reeman. Dxej guiaal rbēz reeman laaman ro' ree port ni rarij ro' ciuda guin din nugüjt reeman laaman. ²⁵ Per ree bēn rlliladx Jesucrist, guxhin badxe' reeman laaman lēn dxüm narooob, abi' gulet reeman laaman niz xijch ze' nusiaaw ciuda guin, zian baxüünman Damasco.

Badxin Saulo Jerusalén

²⁶ Chi badxin Saulo Jerusalén, guyënman nuchajgaman Bén riladx ree Jesucrist, per graczi reeman bidxeb laaman guial ad riladxt reeman nëman ma riladx Jesucrist. ²⁷ Dxel binë Bernabé laaman loj ree apóstoles guin, bagojnman guial baguiaa Saulo dux Dad ree Jesucrist, guneeñ tëëman laaman chi zëman Damasco, bagojn tëëman guial Damasco gunee Saulo xtiidx Jesucrist sin gualrdxeb. ²⁸ Zian baya'n Saulo Jerusalén abi' nayuman laa reeman. ²⁹ Ad rdxebtaman ruza'taman Dad Jesús, abi' xt gudijldiidxnëman Bén Israel rníee ree diidx grieg, per guyën reeman nugÿjt reeman laaman. ³⁰ Chi gogbee ree Bén riladx Jesucrist zian, binë reeman laaman guiedx Cesarea. Yagaj baxhaal reeman laaman guiedx Tarso.

³¹ Dxel bagedxe luxdoo ree Bén riladx Jesucrist, Bén zojb ree niz Judea në niz Galilea nëtëë niz Samaria, chigagaj beenbee reeman mazri xhienaag naj xnejz Dios, bazoob tëë reeman xtiidxaman, abi' cayagnë xSprijt Dios cayajcxhiey reeman.

Bayajc Eneas

³² Chi biza Bëd bitixlojman Bén riladx ree Jesucrist, dxel wej gajcaman bitixlojman Bén riladx ree Jesucrist guiedx Lida. ³³ Ni bidxaaglojman tijb xinguaaw la Eneas. Ma gojc xhujn ijz naga'x, ragxuux, ad rajct rzax. ³⁴ Abi' rëb Bëd lojx:

—Eneas, ma bayÿjn Jesucrist lÿj. Bixche, bales ni go'til loj.

Loj hor zii gajc bixchex. ³⁵ Chi baguiaa gra ree Bén zojb guiedx Lida në ree Bén zojb niz Sarón guial ma bayajc Eneas, dxel në reeman bililadx Jesucrist.

Baban Dorcas

³⁶ Loj tiamp zii guyu tijb béngunaa riladx Jesucrist luguiedx Jope, laman Tabita, diidx grieg laman Dorcas. Laaman been ni za'c ree, been tëëman yudar bënprob ree. ³⁷ Lën ree dxej zii gogxuu Dorcas abi' gÿjtaman. Chi gulox bagajz reeman laaman, dxel bitixh reeman laaman lënü ladya. ³⁸ Abi' gajxh guiedx Jope raya'n guiedx Lida lod za' Bëd. Chi gogbee ree Bén riladx Jesucrist guial za'man ni, guxhaal reeman tio'p ree xinguaaw bisajc reex Bëd liaadx, rëb reex:

—Been wen yo' ree Jope yan gajczi.

³⁹ Laa zinë gajcaman laa reex. Chi bidxinman, binë reeman laaman lënü lod naga' xcuerp Dorcas. Ni riga' zien ree béngunaa bizëyb roon reeman, abi' bibig reeman loj Bëd culüü reeman gra lajd ni been Dorcas chi sta nabanman. ⁴⁰ Dxel gunabee Bëd bariü gra reeman, abi' bazuxibaman gurejdx gunabaman Dios. Dxel baguiaaman bengüt guin, rëbaman:

—jTabita, bixche!

Laa guxhal gajc lojman. Chi baguiaaman Bëd, gureliman, ⁴¹ dxel gunaaz Bëd yaaman persi guzuliman. Abi' gurejdxaman Bén riladx ree Jesucrist con ree Bén bizëyb guin, persi baguiaa reeman guial ma baban Dorcas. ⁴² Guidibczi guiedx Jope gogbee reeman ni goc, abi' zien da't reeman bililadx Jesucrist por zian. ⁴³ Guiáad Bëd baya'nman mazri dxej luguiedx guin, lidx Simón Bén rÿjnchaaw guid.

10

Wej Bëd lidx Cornel

¹ Luguiedx Cesarea gurej tijb Bén brii laj Cornel. Laaman goc suldad gunabee tibcwaa ree suldad brii laj Italiano. ² Gojcaman benza'c, laaman

në gra ree bën zojb lidxaman guyën reeman Dios, abi' dád beenman yudar bën Israel ree, bën naj ree bënprob, në zianczi rbejdx rniabaman Dios. ³Tijb dxej cost raca choon wadxe, guzajcaman zi'c rulüü cane'xhchaalaman. Zagdxeczi baguiaaman guyu tijb xi anjl Dios lënü lod za'man, abi' rëb anjl guin lojman:

—¡Cornel!

⁴Baguiaaman loj anjl guin, abi' dád bidxebaman, rëbaman:

—¿Xhienin, Dad?

Abi' rëb anjl guin:

—Ma biguiejn Dios xtiidxil ma baguiaa tëëman xhienaag rüjnl yudar bënprob ree. ⁵Guxhaal ree bën che luguiedx Jope din chica' reeman Simón, bën la gajc Bëd. ⁶Zojbaman lidx tijb bën la gajc Simón, bën rüjnchaaw guid, bën zojb gajxh ro' nijsdoo. Bëd guin na ni rayal güünl.

⁷Chi zia anjl gunee Cornel, gurejdxaman tio'p ree xmojsaman, zatijb suldad rajpaman confians rliladx tëëman Dios. ⁸Gulox beman diidx loj reeman ni guzacaman, dxel guxhaalaman laa reeman Jope.

⁹Chi bareguiaal, la'tgaj cadxin reeman gajxh Jope, cost garol dxej wë'p Bëd guijc yu lod zojbaman din cwedx guiniabaman Dios. ¹⁰Dád gulaanman, guyënman niawwaman, per la'tgaj cayün reeman ni gawaman guzajcaman zi'c rulüü cane'xhchaalaman. ¹¹Baguiaaman bixal xanyabaa abi' caguiajt zi'c tijb lajd narooob xt lod za'man, naxii guidap xquinan. ¹²Loj lajd guin yu' gra loj ree be yu' tajp guia', në ree bëël, nëtëë ree be rzuj. ¹³Dxel biguiejnman cha' bën rëb:

—Bëd, bisu, bagüjt be gawil.

¹⁴Per badxi' Bëd laan rëbaman:

—Yajqui, Dad. Ad wayawtczan nidxuudx ni ad rayalt gaw bejn.

¹⁵Abi' rëb cha' bën guin zatijb:

—Ni ma basia Dios ad rnieelan nidxuudx.

¹⁶Choon volt gojc zian, dxel bayë'p lajd guin xanyabaa stijb. ¹⁷La'tgaj cayün Bëd xgab xhie rën guiëb ni baguiaaman, loj hor zii gajc bidxin ree bën guxhaal Cornel rulidx Simón, guial ma gunabdiidx reeman banguin naj lidxaman. ¹⁸Chi bidxin reeman, gunabdiidx reeman bal ni zojb Simón bën la gajc Bëd.

¹⁹Guiáad Bëd sta cayünman xgab ni baguiaaman, chi rëb xSprijt Dios lojman:

—Laa choon ree xinguaaw raguuil lüj. ²⁰Bisu, biguiajt binë reex, ad chu' luidool tio'p, din naj guxhal laa reex.

²¹Dxel baguiajt Bëd lod za' ree bën guxhaal Cornel, abi' rëbaman loj reeman:

—Naj naj bën raguuilidi, ¿chexquiza zeel raguuilidi naj?

²²Dxel badxi' reeman laan rëb reeman:

—Guxhaal bën la Cornel dunujn, bën rniabee tibcwaa ree suldad, najman benza'c, rdxebaman Dios, abi' graczi ree bën Israel rën laaman. Tijb xi anjl Dios rëb lojman, guial rayal guixhiaalaman dunujn yudca'n lüj din yo' ree lidxaman, din gucaagdiajgaman ni rayal guiëbil.

²³Dxel badxe' Bëd laa reeman lënü, ni gudëd reeman guiaal. Chi bareguiaal, binëman laa reeman. Në bëlzi ree bën zojb Jope bën rliladx ree Jesucrist binë laaman.

²⁴Chi bareguiaal bidxin reeman Cesarea lod zojb Cornel. Abi' bato'p Cornel gra ree lasa'man në ree xmiwaman, din cwëz reeman guidxin reeman.

²⁵Chi bidxin Bëd lidx Cornel, laa brii gajc Cornel bigchaaglojman laaman,

dxel bazuxibaman loj Béd persi gojpaman laaman respejt. ²⁶ Per bazuli Béd laaman, rëbaman:

—Guzuli, din lasa' bejn gajcan lüj.

²⁷ La'tgaj cadxin reeman ruyü guin cayü reeman diidx. Abi' chi guyu reeman, baguiaa Béd zien da't ree bejn riga' ni. ²⁸ Dxel rëb Béd loj reeman:

—Ma qui ragbeedi xhienaag naj xley ree bën Israel, guial ad zajct go'ch reeman loj ree bën ad najt bën Israel o chu' reeman lidx reeman. Per ma balüü Dios naj guial achutczi rayal ganen bendxuudx, bën nabixhladx. ²⁹ Zeel chi bidca' reeman naj, laa bial gajcan achet guiyc badxiban. Yan rënan gagbeen, ¿chexquiza zeel gurejdxidi naj?

³⁰ Badxi' Cornelan rëbaman:

—Ma gojc tajp dxej cost hor guie gajc, chi zoob lidxan, raca choon wadxe, cabedx canaabän Dios, loj hor zii balüüloj tijb bejn lon najcwaman lajd nayni. ³¹ Abi' naman lon: “Cornel, ma bigueijn Dios xtiidxil, yu'guijc tëëman xhienaag rüjnl yudar bënprob ree. ³² Zeel guxhaal ree xin che luguiedx la Jope din chica' reex Simón, bën la gajc Béd. Zojbaman lidx tijb bën la gajc Simón, bën rüjnchaaw guid, bën zojb gajxh ro'nijsdoo. Béd guin na ni rayal güünl.” ³³ Zianan zeel laa guxhal gajcan xin bidgadiil ree lüj. Zagdxe beenl bi'til. Abi' yan dugraczan nadxu' delant loj Dios yu' xanyabaa, din yacaagdiajgan gra ni gunabee Dios lüj nal du lojn.

Ni gunee Béd lidx Cornel

³⁴ Dxel guzuloj canee Béd, rëbaman:

—Ma ragbeen yan guial tiblojzi ruguiaa Dios bejn. ³⁵ Din Dios, chutëëz bénguidxliuj ridxga' laaman rüjn tëëman zi'c rayal, nëgajc Dios ridxga' laaman. ³⁶ Dios ma gunee bën Israel ree, ma bagojnman guial por Jesucrist rabedxe luxdoo bejn, bën naj Dad par gra ree bénguidxliuj. ³⁷ Lëjt ragbee xhienaag baza't reeman Jesús diidx niz Galilea xt guidib niz Judea, chi gulox bagojn Waj bejn ree xcwent gualrirobnijs. ³⁸ Ragbee tëëdi guial ma badëë Dios xSprijtaman con xgualrniabeeman loj Jesús bën Nazaret, abi' bizaman bigueienman ni zagdxe, bayünman gra ree bën cazagdiaj por xindxab. Gojc beenman zian guial za'në Dios laaman. ³⁹ Abi' dunujn baguiaa gra ni been Jesús guidib niz Judea, në niz Jerusalén. Dxelri bagüjt reeman laaman, bacaa reeman laaman loj crüjz. ⁴⁰ Per Dios basban laaman ni bayon dxej, abi' cwëjb Dios bidgalüülojman du lojn. ⁴¹ Ad balüülojtaman loj gra ree bejn, tijbzi du lojn nayajan bën gule Dios diidx yaloj din yaguiiaan graczi ni beenman. Abi' dunujn badaawnë' laaman badü'në' tëën laaman chi babanman stijb. ⁴² Dxelri guxhaal Jesús dunujn din yatie'chan xtiidxaman loj ree bejn, guial Dios ma gulej laaman din güünman gualguxtis chi guidxin dxej yadëëd gra ree bejn cwent loj Dios, zi'c ree bën naban zi'c ree bën ma güjt. ⁴³ Nëtëë diidx gocli graczi ree bën badëëd xtiidx Dios loj ree bejn, gunee reeman xcwent Jesús, rëb reeman guial graczi ree bën chililadx laaman, gac xtol reeman perdon.

Guyu xSprijt Dios luxdoo ree bën ad najt bën Israel

⁴⁴ Sta canee Béd, chi guyu xSprijt Dios luxdoo gra ree bën cucaagdiaj ni cayëbaman. ⁴⁵ Dxel bën Israel riladx ree Jesucrist, bën binë ree Béd, dád badxa loj reeman guial në ree bën ad najt ree bën Israel guyu xSprijt Dios luxdoo, ⁴⁶ guial rigueijn reeman ma rniece ree bën guin graloj ree diidx, abi' ruza't reeman Dios zagdxe. ⁴⁷ Dxel rëb Béd loj reeman:

—¿Chu zajc gudxoon tiobnijs ree b́en guie, bal ma yu' xSprijt Dios luxdoo reeman zi'cgajc dunuj ree?

⁴⁸ Abi' gunabeeman tiobnijs reeman por Jesucrist. Dxelri guzajc reeman liaadx loj Béd din sunëman laa reeman za tio'p choon dxej mazri.

11

Guyu xSprijt Dios luxdoo ree b́en ad najt b́en Israel

¹ Bén naj ree xi apóstoles Jesús con ree b́en Judea, b́en rliadx ree laaman, gogbee reeman guial nē ree b́en ad najt b́en Israel billadx xtiidx Dios. ² Abi' chi badxin Béd Jerusalén, b́en Israel ma rliadx ree Jesucrist, b́en sta zinal ree ley, gudilē reeman Béd. ³ Rēb reeman lojman:

—¿Chexc zeel bichu'l lidx ree b́en ad najt b́en Israel abi' gudawnēl laa reeman?

⁴ Dxel guzuloj cayū Béd diidx diidz guia'xchej xhienaag gojc zeel wejman lidx ree b́en guin abi' rēbaman loj reeman:

⁵ —Chi za'n luguiedx Jope, la'tgaj cabedx canaaban Dios, guza'can zi'c rulüü cane'xhchalan. Baguian zi'c tijb lajd narooob naxii guidap xquinan caguiajtan diidz xanyabaa xt lod za'n. ⁶ Chi baguian zagdxe xhie yu' loj lajd guin, baguian bedoxh ree nē ree be yu' tajp guia' nē ree bēel con ree be rzuj. ⁷ Dxel biguiejnan cha' bejn, naman: “Béd, guzuli, bagūjt be gawil.”

⁸ Per badxi'nan rēn: “Yajqui, Dad, dín ad goctczi wayawan nidxuudx, ni ad rayalt gaw bejn.” ⁹ Abi' guneeman diidz xanyabaa stijb, naman: “Ni ma basia Dios, ad rnieelan nidxuudx.” ¹⁰ Choon volt gojc zian, dxel bayē'p gra ni guin xanyabaa. ¹¹ Loj hor zii gajc bi't choon ree xinguaaw lod guren, zēed reex diidz Cesarea, cayguuil reex naj. ¹² Abi' na xSprijt Dios lon guial chinē'n laa reex, ad chu' ludson tio'p. Nē guixo'p ree b́en guie b́en naj dux compniar ree binē'n. Abi' dugraczan badxu' lidx b́en guin. ¹³ Dxel beman diidz du lojn xhienaag balüüloj tijb xi anjl Dios lojman lidxaman, rēb anjl guin lojman: “Guxhaal ree b́en che luguiedx Jope dín chica' reeman Simón, b́en la gajc Béd, ¹⁴ laaman na xhienaag gac ree xtolil perdon, con gra ree b́en zobj lidxil.” ¹⁵ Chi guzuloj canenē'n laa reeman, guyu xSprijt Dios luxdoo reeman zi'cgajc guyuman du luxdoo ree yaloj. ¹⁶ Dxel basaadxan xtiidx Dad Jesucrist chi naman: “Walican baroobnijs Waj con nijs, per lējt chu' xSprijt Dios luxdoodi.” ¹⁷ Abi' yan bal ma guxhaal Dios xSprijtaman par laa reeman zi'cgajc guxhaalaman laaman du loj ree chi baliladx ree Dad Jesucrist, ¿chu najn dín gudxonan ni rŷjn Dios?

¹⁸ Chi biguiejn ree b́en guin ni rēb Béd, dxel achetri rēb reeman lojman abi' baza't reeman Dios zagdxe, rēb reeman:

—¡Ma rayagbee ree yan guial nē ree b́en ad najt b́en Israel ma balüü Dios guial rayal yayŷjn xgab por xtol reeman yadxi' tēē loj reeman lojman dín gap reeman guialnaban tiblayaa delant lojman!

Bililadx ree b́en Antioquía Jesucrist

¹⁹ Chi mal bagūjt ree bejn Esteban, dxel guzuloj rzunal reeman b́en rliadx ree Jesucrist persi bire'ch gra ree b́en rliadx guin niz Fenicia, niz Chipre nē Antioquía. Abi' gutie'ch reeman xtiidxza'c Jesucrist, per ganaxzi loj ree b́en Israel. ²⁰ Per loj reeman no'ch bēlzi ree b́en Chipre nē ree b́en Cirene. Laa reeman we luguiedx Antioquía abi' gutie'ch reeman xtiidx Dad Jesucrist loj ree b́en ad najt b́en Israel. ²¹ Gognē Dios laa reeman, dád zien ree bejn bililadx ni rēb reeman abi' bililadx reeman Jesucrist.

²² Chi gogbee ree bèn Jerusalén rliiladx Jesucrist ni goc, guxhaal reeman Bernabé xt guiedx Antioquía. ²³ Chi bidxinman ni, dád babaaman chi baguiaaman xhienaag cayagnè Dios bèn guin ree. Dxel guneenèman gra reeman din con guidib luxdoo reeman gusnuu chinal reeman xtiidx Jesucrist. ²⁴ Benza'c gojc Bernabé, dád gognè xSprijt Dios laaman abi' bililadxaman Jesucrist con guidib luxdooan. Zeel dád zien ree bejn bililadx Jesucrist.

²⁵ Dxelri wej Bernabé guiedx Tarso bigdiilaman Saulo. ²⁶ Chi badxejlaman laaman, dxel binèman laaman xt Antioquía. Ni guzunè reeman bèn rliiladx ree Jesucrist tibijz, dád zien ree bejn balüü reeman. Abi' luguedx Antioquía naj lod gulèelaj reeman bèn rliiladx ree Jesucrist, cristian.

²⁷ Lèn ree dxej zii bëlzi ree bèn badèè xtiidx Dios loj ree bejn, guza Jerusalén wej reeman Antioquía. ²⁸ Tijb reeman la Agabo, laaman guzuli loj ree bejn abi' por xSprijt Dios bagojnman guial chu' gubijn guidibczi guidxliuj. Laan gojc loj tiamp gunabee rey Claudio. ²⁹ Abi' ree bèn rliiladx Jesucrist luguedx Antioquía, baya'n reeman diidx din guido'p reeman zi'ctzi ni galguzuj gudèèd tijb gaj reeman, din gagnè lasa' reeman, bèn rliiladx ree Jesucrist, bèn zojb ree niz Judea. ³⁰ Abi' zian been reeman. Dxel guxhaalnè reeman laan Saulo con Bernabé din gudèèd reeman laan loj ree bèn rniabee ree bèn rliiladx Jesucrist niz Judea.

12

Guyu Bèd ladxguuib

¹ Lèn ree dxej zii guzuloj rey Herodes cusagziman bëlzi ree bèn rliiladx Jesucrist. ² Abi' gunabeeman bagüjt reeman Jacob bijch Waj, con espad. ³ Chi baguiaaman bayuladx ree bèn Israel ni beenman, dxel gunabeeman gunaaz reeman Bèd. Ni ne goc lèn ree dxej lanij pascw chi raw reeman guiadxtil ad yu't levadur. ⁴ Chi gunaaz reeman Bèd, badxe' reeman laaman ladxguuib abi' gunabee rey Herodes tajp cwaa ree suldad din guinia reeman ro' ladxguuib guin, tib cwaa gaj reeman naj tajp suldad. Din beenman xgab nuzujman Bèd loj ree bèn guiedx guin chi nidèd pascw. ⁵ Zian guyu Bèd ladxguuib, gojp da't reeman laaman. Per gra ree bèn rliiladx Jesucrist ad rucwèèzt rbejdx rniab reeman Dios por laaman.

Babèè Dios Bèd ladxguuib

⁶ Guxhin zii gajc chi yareguiaal cwèè Herodes Bèd loj ree bèn guiedx guin, naga'yèjs Bèd galay tio'p ree suldad, naxiiman con tio'p ree caden, guiáad los demazri ree suldad guin cayajp ro' ladxguuib guin. ⁷ Dxejczy bidxin tijb xi anjl Dios abi' basni tijb guij lèn ladxguuib guin, dxel baqui' anjl guin cwè'lèn Bèd persi bacwèènman laaman, rëbaman lojman:

—¡Cari bixche!

Loj hor zii gajc biajb ree caden naxii yaa Bèd, ⁸ abi' rëb anjl guin lojman:

—Guxhiidxi'ch lèn! balèè tèè xgurèchil.

Chi ma been Bèd zian dxel rëb anjl guin:

—¡Gojt xcajpil, tanal naj!

⁹ Laa barii gajc Bèd nalaman anjl guin, per ad ragbeetaman bal diidxli naj ni cayüjn anjl guin, gunaladxaman cane'xhchaalzaman. ¹⁰ Abi' gudèd reeman loj tibcwaa ree suldad guin, dxel gudèd reeman loj stibcwaa reeman. Chi bidxin reeman ro' portguuib ni rarii runejz guin, dxel xtijbzan bixal abi' barii reeman. Abi' chi bidxin reeman tijb xquin, yagaj basa'n anjl guin Bèd.

¹¹ Dxel gogbee Bèd guial ni diidxliqui naj ni cazajcaman, abi' rëbaman:

—Yanri ma ragbeen guial guxhaal xi anjl Dios persi babëeman naj loj Herodes, con loj gra ni nūjnnë ree bën Israel naj.

¹² Chi bayagbee Bëd ni guzacaman, dxel baguiajman lidx Li, xniaa Waj, bën la gajc Marcw, lod riga' zien ree bejn cabejdx canab reeman Dios. ¹³ Chi gulajw Bëd ro' port, dxel brii tijb biin la Rode ziquiaam chunin. ¹⁴ Per chi bayünbeem cha' Bëd, dád babaam, dxel luar nixhialim ro' port guin, baxüünn bicojnm guial za' Bëd ro' port guin. ¹⁵ Abi' rëb reeman lojm:

—iRajc guijquil!

Per za'dxi'chczim guial waliqui ni rëbim. Dxel rëb reeman lojm:

—Ad laataman, wed xi anjlaman.

¹⁶ Per Bëd cabajwzi cabajwaman ro' port guin. Dxel chi guxhal reeman dád bidxeb reeman baguiaa reeman laaman. ¹⁷ Abi' been Bëd sen loj reeman din yacwëez ro' reeman, dxel beman diidx xhienaag babëë Dios laaman ladxguuib. Abi' rëbaman loj reeman:

—Gol be ni guie loj Jacob në loj gra ree bën rliladx Jesucrist.

Dxelri briiman yagaj zëman lood ren.

¹⁸ Chi bareguiaal, ad radxejlt xhie güün ree suldad guin guial ad ragbeet reeman xhienaag barii Bëd ladxguuib guin. ¹⁹ Dxel gunabee Herodes chigdiiil reeman Bëd, per ad badxejlt reeman laaman. Abi' chi gulox gunabdiidx Herodes loj ree suldad guin xhienaag gojc, gunabeeman gugüjt reeman laa reeman. Dxel brii Herodes Judea abi' bisobaman luguiedx Cesarea.

Güjt rey Herodes

²⁰ Balen Herodes bën Tiro në ree bën Sidón, per baya'n ree bën guin diidx din chigdeenë reeman laaman. Chi been reeman gan guneenë reeman bën brii laj Blasto zagdxe, tijb bën naj xbejn rey Herodes, dxel gunee Blasto por laa reeman loj rey guin din lox til reeman, din guidibczi lod rniabee rey guin zëed ni raw reeman. ²¹ Bazuj Herodes xhie dxej guinienëman laa reeman abi' dxej zii gojt xab zagdxeman, gurej loj xyagxhilaman lod rniabeeman, zianz guzuloj guneenëman laa reeman. ²² Dxel guzuloj gurixdiaj ree bën guin, rëb reeman:

—iAd bejntan canee, tijb diasan!

²³ Loj hor zii gajc badëë tijb xi anjl Dios tijb guialguijdx loj Herodes. Gudaw bizog laaman abi' güjtaman guial bayuladxaman baza't ree bejn laaman zagdxe luar nuza't reeman Dios zagdxe.

²⁴ Per xtiidx Dios care'chzi care'chan gra ladczi abi' gra ladczi cayajcxhie ree bën rliladx laaman.

²⁵ Chi ma badëëd ree Bernabé con Saulo ni guxhaal ree bën Antioquía, dxel baza reeman Jerusalén, binë reeman Waj, bën la gajc Marcw.

13

Guzuloj Bernabé con Saulo bigtie'ch reeman xtiidx Dios

¹ Loj ree bën rliladx Jesucrist, bën zojb ree Antioquía, no'ch ree bën rudëëd xtiidx Dios loj ree bejn në ree bën rulüü xtiidxaman. La reeman Bernabé, Simón bën rniee reeman Benya's, Lucio bën Cirene, Saulo con Manaén bën guni'snë Herodes tijbzi, bën gunabee Galilea. ² Tijb dxej chi naba'n reeman, la'tgaj cabejdx canab reeman cuza't tëë reeman Dios zagdxe, rëb xSprijt Dios loj reeman:

—Gol bacaabee Bernabé në Saulo din güün reeman dxiin rënan güün reeman.

³ Chi gulox guba'n reeman gurejdx tëë reeman Dios, dxel guxhoob yaa reeman gujic Bernabé con Saulo din gagnë Dios laa reeman abi' bazaadiidxnë reeman laa reeman.

Bernabé con Saulo wej reeman Chipre

⁴ XSprijt Dios naj bën guxhaal Bernabé con Saulo, zë reeman Seleucia, ni guyu reeman loj barcw, zë reeman yuj la Chipre, ni riga' loj nijsdoo. ⁵ Chi bidxin reeman niz Chipre, dxel luguiedx Salamina guzuloj gutie'ch reeman xtiidx Dios lën ree xyadoo ree bën Israel. Në Waj binë reeman din güünman laa reeman yudar. ⁶ Chi biza reeman guidib niz Chipre, dxel bidxin reeman Pafos. Ni bidxaagloj reeman tijb bën Israel laman Barjesús, rajcaman guialbidxaa, rusquieeman bejn ree, rëbaman guial laaman naj bën rudëëd xtiidx Dios loj ree bejn. ⁷ Barjesús guin rnieenëman Sergio Paulo zagdxë, bën naj gobernador Chipre, rignia' da'taman. Gurejdx gobernador guin Bernabé con Saulo guial rënman gucaagdiajgaman xtiidx Dios. ⁸ Per bënbidxaa guin (con diidx grieg laman Elimas) guyënman nudxoonman guial nililadx Sergio Paulo xtiidx Dios. ⁹ Abi' Saulo, bën la gajc Pab, rniabee xSprijt Dios luxdooman guidiblagaa, baguiaadxijchaman loj bënbidxaa guin, ¹⁰ rëbaman:

—xi'n xindxab lüj, ganax rusquieel, ganax niguijdx rüjnl, ad rëntczil ni zagdxë! ¿Xt goc gudëël mod chinal ree bejn xnejz nali Dios? ¹¹ Yan gudëëd Dios lüj casti: ad zanit lojl abi' xchej ad zuguaatil xbacha' gubijdx.

Loj hor zii gajc gurexcajy Elimas abi' ad gojctri nuguaaman, dxel raguilaman chu guiniaaz yaaman guial ad rajctri ruguaaman. ¹² Chi baguiaa gobernador guin zian, dxel bililadxaman abi' dad badxa lojman ni balüü reeman xcwent Dad Jesús.

Bidxin Pab con Bernabé niz Pisidia

¹³ Chi ma gudëd gojc zian, guyu Pab con ree xcompniaraman loj barcw luguiedx Pafos abi' zë reeman luguiedx Perge ni riga' niz Panfilia. Ni basa'n Waj laa reeman bayejcaman Jerusalén. ¹⁴ Dxel barri reeman guiedx Perge, zë reeman luguiedx Antioquia ni riga' niz Pisidia. Abi' dxej raziiladx ree bën Israel, guyu reeman lën xyadoo ree bën Israel zianz gurej reeman. ¹⁵ Dxel chi gulox biil bën biil tib lajt loj libr bacaa Moisejs në loj libr bacaa ree bën badëë xtiidx Dios loj ree bejn, gunee ree bën rniabee lën yadoo guin, rëb reeman loj Pab con Bernabé:

—Bal xhie guiëbidi loj ree bën riga' guie din gudëëdi consejw loj reeman, zajc guiëbidan yan.

¹⁶ Dxel guzuli Pab, beenman sen loj reeman din yacwëëz ro' reeman, dxel rëbaman:

—Bën Israel, në gra ree bën rdxeb Dios, gol bacaagdiajg: ¹⁷ Dux Dios ree, nayajc ree bën Israel, gulejman dux bëngulal ree abi' laaman been persi gojcxhiey reeman, chi sta zojb reeman zi'c benzit niz Egipto. Dxel con xguialrniabeeman babëëman laa reeman Egipto. ¹⁸ Abi' baslejnguijcaman laa reeman loj tiuu ijz ni guzu reeman niz lod naj ganax yujbidx, ¹⁹ banijt tëëman gajdx ree nacion ni gure Canaán persi badëëman guidxliuj guin ree loj dux bëngulal ree. ²⁰ Zian gojc loj tajp gayuu garol ijz, dxelri bacaaabee Dios juejs ree persi gunabee reeman laa reeman. Abi' Samuel bën badëëd xtiidx Dios loj ree bejn gojc xjuejs bigra reeman. ²¹ Dxel gunab reeman din chu' tijb rey nabee laa reeman, abi' bazuj Dios rey Saúl xi'n Cis, bën zëëd loj xdiaa Benjamín persi gunabeeman laa reeman tiuu ijz. ²² Chi bisüd

Dios rey Saúl, dxel bazujman rey Davi. Abi' rëbaman: “Ma baguian guial Davi xi'n Isaí, nabanx zi'c rënan, gūün tēēx cumplid da diidxan guial gūünx gra zi'c rënan.” ²³ Abi' yan zi'c gajczi rëb Dios, loj gajc xdiaa rey Davi, brii Jesús bën guxhaalaman din yabëëman bën Israel ree loj dol. ²⁴ Chi gad Jesús gui't, Waj bën baroobnijs bejn ree, bagojnman gra ree bën Israel guial raval yayūjn reeman xgab por xtol reeman tiobnijs tēē reeman. ²⁵ Chi ma zidyob yadiblagaa xguialnaban Waj, dxel rëbaman: “Ad najtan bën naladxidi, qui gui'traman, laaman mazri lasajc guial lon, ni'quid rayalt gaxhiecan xgurechaman.”

²⁶ Yan, dugra ree nayajc ree xdiaa Abraham nē gra los demazri ree bën rdxeb Dios, par dunuj ree naj xtiidxaman ni rugojn reeman dunuj ree, xhienaag rabëë Jesucrist dunuj ree loj dol. ²⁷ Per ree bën Jerusalén con ree xguxtis reeman ad bayagbeet reeman Jesús. Ad gogbee tēēt reeman xhie rën guiëb xtiidx Dios ni bacaa ree bën badëëd ree xtiidxaman loj ree bejn, ni rool reeman lën yadoo dxej raziiladx ree bejn, dxel laagajc reeman bagūjt Jesús, zian gojc cumplid ni ca loj xtiidx Dios. ²⁸ Abi' majsi achetczy xtol Jesús guyu, per ni'czi zian rëb gajc reeman loj Pilato guial nabeeman guiëtaman. ²⁹ Chi gulox been reeman gra zi'c ca loj xtiidx Dios xcwent Jesús, balet reeman laaman loj crūjz abi' baquie'ch reeman laaman. ³⁰ Per Dios basban laaman, ³¹ dxel loj zien dxej balüülojman loj ree bën binë laaman chi briiman niz Galilea zëman Jerusalén, abi' yan laa reeman naj bën rniece por laaman loj ree bejn.

³² Zeel caygojnman lëjt diidxza'c guin ree, guial promeys been Dios loj ree dux bëngulal ree, ³³ ma beenman laan cumplid con dunuj ree guial zio'p ree loj xdiaa reeman. Beenman cumplid xtiidxaman chi basbanman Jesús zi'c ca loj Salmo barojp, lod rëb: “Lūj naj da xi'n'an abi' diidz yan ma rajpil guialrniabee zi'cgajc naj.” ³⁴ Dios rëb guial yasbanman Jesús abi' ad zaxint xcuerpaman zi'c gajczi ca loj xtiidx Dios lod rëb: “Naj gūnle' lëjt zi'c benan promeys loj Davi.” ³⁵ Abi' rëb tēē stib lajt loj xtiidxaman: “Ad zatiëjbtil xhin xcuerp xi'n'l, bën naya nali.” ³⁶ Yan diidxliczi diidx guin ree ad rnieet reen xcwent Davi, din chí gulox gunabeeman bejn ree xtiampaman zi'c rëb Dios nabeeman, dxel güjtaman, biguie'chaman abi' guxin xcuerpaman. ³⁷ Per xcuerp Jesús bën basban Dios, ad guxintan. ³⁸ Zeel caygojnman lëjt compniar din gageedi guial por laaman ma yu' perdon par dux tol ree. ³⁹ Graczy bën rliiladx Jesucrist ma gojc perdon gra xtol reeman ni ad gojct niajc perdon por ley badëë Dios loj Moisejs. ⁴⁰ Zeel gol gojp cudad chitëë saquidi zi'c bacaa ree bën badëë xtiidx Dios loj ree bejn, lod rëb:

⁴¹ Gol bacaagdiajg, lëjt bën ruze' ree da diidxan, gol badxalojdi gol gunidloj tēē.

Din loj ree dxej nabandi gūn reen ni xt ni'quid zaliladxtdi, majsi chu na laa reen lojdi.

⁴² Chi barii Pab con Bernabé lën xyadoo ree bën Israel guin, gunab reeman favor loj Pab, din chi guidxin stijb dxej raziiladx ree bejn chiguieman mazri diidx loj reeman xcwent ni beman dxej zii. ⁴³ Chi barii ree bën guin lën yadoo guin, zien da't reeman binal Pab con Bernabé, zi'c ree bën Israel zi'c ree bën ad najt bën Israel, bën rën ree Dios zi'cgajc ree bën Israel. Abi' rëb Pab con Bernabé loj reeman din sudxi'ch reeman loj nejz zagdx guredx Dios laa reeman guial rënman laa reeman.

⁴⁴ Chi bidxin dxej ni raziiladx ree bejn, gra bën luguiedx guin bado'p din gucaagdiajg reeman xtiidx Dios. ⁴⁵ Per chi baguiaa ree bën Israel zien da't

ree bejn riga' yagaj, dxel guyu guialnadédloj luxdoo reeman abi' guzuloj caneeguijdx reeman canee tée reeman diidxguijdx loj Pab. ⁴⁶ Dxel sin guialrdxeb badxi' Paban con Bernabé loj reeman, rëb reeman:

—Yaloj lëjt rayal yagojnan xtiidxza'c Dios, lëjt najdi bën Israel, per yan ad rëntidi gucaagdiajguidi laan, dxel lëjt gajc culüü guial ad zajct yayalidi guialnaban tiblyaa con Dios. Yan ma yugtie'chan diidxza'c guin ree loj ree bën ad najt bën Israel. ⁴⁷ Din zian gunabee dux Dad ree Dios dunujn, chi rëbaman tib lajt loj xtiidxaman:

Nuzun lüj zi'c guij par gra ree nacion,
din chel guidibchicniaa loj guidxliuj chicojnl
xhienaag gac ree bejn perdon.

⁴⁸ Chi biguejn ree bën ad najt bën Israel zian, dxel babaa reeman, guzuloj rëb reeman guial zagdxe naj xtiidx Dios, abi' graczi bën ma naj yayal guialnaban tiblyaa con Dios, bililadx reeman xtiidxaman. ⁴⁹ Zianan zeel bire'ch xtiidxza'c Dios guidib niz ni. ⁵⁰ Per ree bën Israel batiaalguiiw reeman bəngunaa rej ree laydoo zianczi naj tée reeman bën zobjbloj luguiedx zii, nē ree xinguaaw naj gajc xin zobjbloj, din sunal reeman Pab con Bernabé xt yabëë reeman laa reeman ni. ⁵¹ Dxel Pab con Bernabé gudxiyp guxyuj guia' reeman zi'c tijb sen guial ad bazoobt ree bën guin diidx, dxel zē reeman Iconio. ⁵² Per ree bën bililadx Jesús niz ni, ma rniabee xSprijt Dios luxdoo reeman guidiblagaa abi' dád rabaa reeman.

14

Bidxin Pab con Bernabé Iconio

¹ Luguiedx Iconio, Pab con Bernabé guyu reeman lən xyadoo ree bën Israel. Abi' zi'c balüü reeman xtiidxza'c Jesucrist, zien da't reeman bililadx, zi'c ree bën Israel zi'c ree bën ad najt bën Israel. ² Per ree bën Israel ad bililadxt batiaalguiiw reeman bën ad najt ree bën Israel persi guzuloj been reeman xgab mal por ree bën rililadx Jesucrist. ³ Per ni'czi zian, xchej da't guzuj ree apóstoles guin ni, abi' sin guialrdxeb gunee reeman xtiidx Dios guial rililadx reeman Jesucrist, laaman badëéd gualrniabee loj reeman persi been reeman zien da't ree milagr nē mazri ree ni ren, persi balüü Jesucrist guial diidxli naj ni rëb reeman xcwent Dios. ⁴ Per ree bën luguiedx zii gojc reeman tio'p lala', garol reeman guzunē ree bën Israel zagarol reeman guzunē apóstoles guin ree. ⁵ Dxel zi'c ree bën Israel zi'c ree bën ad najt bën Israel, baya'n reeman diidx con ree guxtis din tilē reeman Pab con Bernabé gucaaguij tée reeman laa reeman. ⁶ Abi' chi gogbee Pab con Bernabé zian, laa zia gajc reeman Listra con Derbe, guiedx riga' ree niz Licaonia, nē gra ree guiedx riga' niz ni, ⁷ gunee reeman xtiidxza'c Jesucrist.

Bacaaguij reeman Pab Listra

⁸ Luguiedx Listra guyu tijb xinguaaw ad rajct rza, ad guzatczix guial naxin guia'x diidz chi golix abi' zobjix ⁹ cucaagdiajguix ni rëb Pab. Chi baguiaa Pab laax, gogbeeman guial rililadxix par yayajquix. ¹⁰ Abi' gunee man rejs, rëbaman:

—jBisu, guzuli zagdxe!

Loj hor zii gajc gutiajs xin guin, guzulix abi' guzuloj cazax. ¹¹ Chi baguiaa ree bejn ni been Pab, guzuloj canee reeman rejs diidx Licaonia, rëb reeman:

—Dios naj ree zi'c bejn ma biguiajt lod nadxu' ree.

¹² Abi' rëb reeman guial Bernabé naj dios Júpiter, guiáad Pab naj dios Mercurio guial laaman naj bën rníee loj reeman. ¹³ Abi' ro' guiedx guin niz lod ru bejn naj xyadoo Júpiter, dxel bixhioz yu' lën yadoo guin binëman go'n ree con ree guíaa, abi' laaman con ree bën guin guyën reeman nugÿjt reeman go'n guin ree din niën reeman apóstoles guin ree zi'c xdios reeman. ¹⁴ Per chi gogbee Pab con Bernabé zian, gudixya' xab reeman, guzëëb reeman lað ree bën guin, rbixdiaj reeman rëb reeman:

¹⁵ —Gol bacaagdiajg, çchexquiza zeel rÿjndi zian, awa bejn gajc dunujn zi'cgajc lëjt? Awa par zianclan zio'pan din yanan lojdi din yasa'ndi ni rÿjndi, din achetzi lasajc reen. Mejorli gol binal xnejz Dios naban, bën been xanyabaa në guidxliuj nëtëë nijsdoo con gra ni yu' loj reen. ¹⁶ Tiamp gulal Dios baslaa been ree bejn ni guyëntzi reeman. ¹⁷ Per ni'czi zian, zianczi balüüman chu najman por ree ni zagdxé ni rÿjnmán. Din laaman naj bën razaladx guia con guialnaza'c abi' razaladxaman ni radaaw ree din chu' du luxdoo ree zagdxé. ¹⁸ Chi rëb Pab con Bernabé zian, con ree diidx guin penz been reeman gan badxoon reeman guial nugÿjt ree bën guin go'n guin ree din niën reeman laa reeman zi'c xdios reeman.

¹⁹ Per bëlzi ree bën Israel zojb Antioquía në Iconio, chi bidxin reeman luguiedx Lистра been reeman gan batiaalguiiw reeman bën luguiedx guin ree. Dxel bacaaguij reeman Pab abi' gunaladx reeman ma gÿjtaman abi' guxoobyuj reeman laaman, babëë reeman laaman luguiedx guin. ²⁰ Per chi bido'p ree bën rliladx Jesucrist gadëd lod naga'mán, dxel bixchëman, bayuman luguiedx guin stijb. Chi bareguiaal briinëman Bernabé zë reeman luguiedx Derbe.

²¹ Chi gulox gutie'ch reeman xtiidxza'c Jesucrist luguiedx Derbe lod been reeman gan bililadx zien ree bejn laan, dxel bayejc reeman luguiedx Lистра në Iconio nëtëë Antioquía. ²² Luguiedx zii ree badxe' reeman luxdoo ree bën rliladx Jesucrist. Rëb reeman loj reeman din sudxi'ch reeman loj ni rliladx reeman laaman, din dád sagdiaj reeman din yayu reeman lod rniabee Dios. ²³ Abi' tëë loj tijb gaj ree guiedx guin bacaabee reeman bengol nabee ree loj ree bën rliladx Jesucrist. Zianz chi gulox guba'n reeman gurejdx tëë reeman Dios, dxel basa'n reeman laa reeman con Dad Jesús bën ma bililadx reeman.

Badxin ree Pab con Bernabé Antioquía ni riga' niz Siria

²⁴ Chi baza ree Pab con Bernabé niz Pisidia, bidxin reeman niz Panfilia. ²⁵ Abi' guneë reeman xtiidx Dios luguiedx Perge, dxel zë reeman guiedx Atalia. ²⁶ Ni guyu reeman loj barcw zë reeman Antioquía, luguiedx lod basa'n ree los demazri ree bën rliladx Jesucrist laa reeman con Dios din gagnëman Pab con Bernabé din gutie'ch reeman xtiidxaman. Abi' dxiin guin naj ni ma baloox reeman. ²⁷ Dxel chi bidxin reeman Antioquía, bato'p reeman bën rliladx ree Jesucrist, persi be reeman diidx loj reeman gra ni been Dios con laa reeman, xhie tëë naag guxhalaman nejz din chililadx ree bën ad najt bën Israel Jesucrist. ²⁸ Ni guzu Pab con Bernabé xchëj, guzunë reeman bën Antioquía rliladx ree Jesucrist.

15

Guyu gabilt Jerusalén

¹ Lën ree dxej zii bidxin bëlzi ree bën Judea luguiedx Antioquía. Abi' guzuloj rëb reeman loj ree bën rliladx Jesucrist, guial bal id zu reeman sen zi'c gunabee Moisejs, ad zajct giün Dios xtol reeman perdon. ² Dxel Pab con

Bernabé dád zro' gudijldiidx reeman con ree b́en guin. Dxel bacaabee ree b́en rililadx Jesús Pab nē Bernabé, nē ree ben ren din che reeman Jerusalén chigneenē reeman apóstoles guin ree, con ree bengol rniabee loj ree b́en rililadx Jesucrist din guguaa reeman xhienaag güün reeman xcwent sen guin.

³ Abi' badxe'nejz ree b́en Antioquía rililadx ree Jesucrist laa reeman persi zē reeman. Chi zē reeman gudēd reeman niz Fenicia nē niz Samaria abi' bagojn reeman b́en rililadx ree Jesucrist, b́en zobj ree niz ni guial ma rililadx ree b́en ad najt ree b́en Israel xtiidx Dios. Abi' graczi b́en ma rililadx Jesucrist niz ni, dád babaa reeman chi biguiejn reeman zian.

⁴ Chi bidxin Pab con Bernabé Jerusalén, dxel baca' ree b́en rililadx Jesucrist laa reeman, con ree apóstoles, con ree bengol rniabee loj ree b́en rililadx Jesucrist. Abi' be ree Pab diidx con Bernabé gra ni been Dios con laa reeman.

⁵ Per yu' ree b́en farisew ma rililadx Jesucrist, guzuli reeman abi' rēb reeman: —B́en ad najt ree b́en Israel abi' ma rililadx reeman Jesucrist, rijn naguiejn chu' reeman sen ru ree b́en Israel, gagbee tēē reeman guial rayal chinal reeman xley Moisejs.

⁶ Dxel badop' ree xi apóstoles Jesús con ree bengol rniabee loj ree b́en rililadx Jesucrist din guidoon xhienaag güün reeman. ⁷ Guial tant canee reeman por zian, dxel guzuli Béd, rēbaman loj reeman:

—Gradi compniar raliduladx ree Jesucrist, lējt ragbee guial diizd gocli gulej Dios naj lojdi din chignen xtiidxza'c Jesucrist loj ree b́en ad najt b́en Israel din chililadx reeman laaman. ⁸ Abi' Dios b́en nūbee luxdoo graczi ree bejn, balüüman guial naj reeman xbejnman guial ma badēē xSprijtaman loj reeman zi'cgajc baneeman du loj ree. ⁹ Zi'c ruguaa Dios dunuj ree ziangajc ruguaaman laa reeman, din zi'c basiaman du luxdoo ree ziangajc basiaman luxdoo reeman guial ma rililadx reeman Jesucrist. ¹⁰ Yan, ¿chexc zeel ad ridxga'tidi ni ma been Dios abi'za rniabeedi chinal ree b́en rililadx Jesucrist ley ni ni'qui dunuj ree ni'qui dux b́engulal ree ad gojt naguieen ree zi'c rniabee ley guin? ¹¹ Dunuj ree rayagbee guial por ni zagdxē ni been Dad Jesucrist, been Dios dux tol ree perdon zi'cgajc laa reeman.

¹² Dxel bacwēēz ro' gra reeman abi' bacaagdiajg reeman ni cayü ree Bernabé con Pab, xcwent gra ree xmilagr Dios ni been reeman loj ree b́en ad najt b́en Israel. ¹³ Chi gulox guneē reeman, dxel nēgajc Jacob rēb:

—Gradi compniar raliduladx ree Jesucrist, gol bacaagdiajg: ¹⁴ Simón Béd be diidx duloj ree xhienaag guzuloj gulej Dios b́en ad najt ree b́en Israel din gac reeman xbejnman. ¹⁵ Gra ni ma gojc naj zi'c ni bacaa ree b́en badēē xtiidx Dios loj ree bejn loj xtiidxaman lod rēb:

¹⁶ Chi ma gojc zian, yayünxhiey ree da bejnan mazri zi'c goc chi naban Davi, gacxhiey reeman por ree b́en sta naban, zi'c guban ree bejn xtiamp Davi abi' por laa reeman yayajcxhiey ree da bejnan.

¹⁷ Din yaguiil ree los demazri ree bejn guial guiēn reeman naj, gra ree b́en nacion ren, yaguiil guial guiēn reeman naj, b́en ma gule reen din gac reeman da bejnan, b́en guiguiejn ree guza't ree bejn naj.

¹⁸ Zian na Dios, b́en cugojn bejn ree gra ree nine diizd tiamp gual.

¹⁹ 'Zeel naladxan ad rayalt chu güün naguiejn b́en ad najt ree b́en Israel par chinal reeman ley, laa reeman guial ma basa'n xcostumbr reeman par

chinal reeman xnejz Dios. ²⁰ Yan con yaxhaal ree tijb gui'ch loj reeman guial ad rayalt gaw reeman ni ragle' loj ni naj xdios reeman, ad rayal tēet sunē reeman ben ren bēn ad najt lacheel reeman, ad rayalt gaw reeman bēēl rberejn ni'qui rejn. ²¹ Zian yaguie'ch ree loj reeman, din diizd tiamp gulal tijb gaj guiedx yu' bēn ruluū laa reeman xhie rēn guiēb xley Moisejs ni rool reeman lēn ree yadoo dxej raziiladx ree bejn.

²² Dxel apóstoles guin ree con ree bengol rniabee loj ree bēn rliiladx Jesucrist, con los demazri ree bēn rliiladx Jesucrist, rēb reeman gucaabee reeman bēn guixhiaalnē reeman Pab con Bernabé din che reeman Antioquía. Abi' bacaabee reeman Judas, bēn la gajc Barsabás, nē Silas, laa reeman rajp guialrniabee loj ree bēn rliiladx Jesucrist. ²³ Abi' guxhaalnē reeman laa reeman tijb gui'ch ni rēb:

“Dunujn nayajcan xi apóstoles Jesús, con ree bengol rniabee loj ree bēn rliiladx laaman, nē los demazri ree bēn rliiladx laaman. Ragajpdiozan lējt bēn ad najt ree bēn Israel, per nayajc ree compniar raliduladx ree Jesucrist, lējt zobjidi Antioquía, nē los demazri ree bēn zobj ree niz Siria nētēē niz Cilicia. ²⁴ Ma bayagbeen guial yu' ree bēn duladxan brii sin dux tiidxbeen, abi' cagu'nawēēg reeman lējt con xtiidx reeman persi ad radxejlt xhie güündi guial na reeman lojdi rayal chu'di sen ni ru ree bēn Israel güün tēēdi zi'c rniabee xley Moisejs, per ad dunujtan baxhaal laa reeman. ²⁵ Zeel bado'pan abi' raguie'chan guial zagdxē naj yacaabee bēlzi dux compniaran din guidganaj reeman lējt, guidnē tēē reeman tio'p dux compniaran, Bernabé con Pab, bēn rayēn da'tan. ²⁶ Zien ree ni guiidx cuhaagloj reeman guial cayūjn reeman sirv loj Dad Jesucrist. ²⁷ Dxel cayxhaalnē'n laa reeman Judas con Silas, laa reeman na lojdi gra con quijb xtiidx reeman. ²⁸ Abi' zi'c naj xgab bazaladx xSprijt Dios du lojn, dxel achetri naguiejn rüjn yanabeen lējt ni güündi, ni rayalzi cu'guijquidi naj guial, ²⁹ ad gawidi xbēēl ree be ni rbe'c ree bejn loj ni naj xdios reeman, ad gaw tēēdi bēēl rberejn, ni'qui rejn, ad sunēdi ben ren bēn ad najt lacheelidi. Bal gapidi cudad ad zūjntidi gra ree nine, zagdxequi güündi. Gagnē Dios lējt.”

³⁰ Zian gojcan, gui'ch guin naj ni guxhaalnē reeman guidap ree bēn guin par luguiedx Antioquía. Ni bato'p reeman bēn rliiladx ree Jesucrist abi' bayü reeman gui'ch guin loj reeman. ³¹ Chi biil reeman laan, dád nix guyu luxdoo reeman por ree diidx zagdxē ni zēēd lojn. ³² Abi' Judas con Silas guial nēgajc reeman rajp quiarguejn par gudēēd reeman xtiidx Dios, dxel zien naj ni guneenē reeman bēn rliiladx ree Jesucrist, bagu' reeman luxdoo reeman con xtiidx reeman. ³³ Chi ma gudēd zien dxej za' ree Judas con Silas ni, bazaadiidxnē ree bēn rliiladx Jesucrist laa reeman din yaguiaj reeman lod za' ree bēn guxhaal laa reeman, rēb reeman loj reeman: “Chignē Dios lējt zagdxē.” ³⁴ Per Silas beenman xgab baya'nman ni mazri. ³⁵ Abi' Pab con Bernabé baya'n reeman Antioquía mazri, laa reeman con ree ben ren basnuu balüü reeman gutie'ch tēē reeman xtiidxza'c Jesucrist loj ree bejn ni.

Ni barojp volt brii Pab biglūüman xtiidx Dios guiedx ren ree

³⁶ Chi gudēd tio'p choon dxej, dxel rēb Pab loj Bernabé:

—Yo' stijb yugnaj dux compniar ree bēn rliiladx ree Jesucrist, graczi ree luguiedx lod ma bugtie'ch xtiidx Dios, din yuquiaa xhienaag za' reeman.

³⁷ Bernabé guyēn ninē reeman Waj, bēn la gajc Marcw. ³⁸ Per Pab ad cwējbt ninē reeman laaman, din chi we reeman niz Panfilia guro'nladxaman laa

reeman, ad binëtraman laa reeman. ³⁹ Abi' ni'qui tijbaman ni'qui zatijbaman ad baya'nt conform, zianz gula' lasa' reeman. Dxel binë Bernabé Marcw, guyu reeman loj barcw zë reeman yuj la Chipre ni riga' loj nijsdoo, ⁴⁰ dxel gulej Pab Silas din chinëman laaman abi' rëb los demazri ree bën rlliladx Jesucrist loj reeman guial chinë Dios laa reeman zagdxe. ⁴¹ Zianz gudëd reeman niz Siria në niz Cilicia, ragu' reeman luxdoo ree bën rlliladx Jesucrist niz ni.

16

Bine ree Pab con Silas Timoteo

¹ Chi bidxin Pab con Silas guiedx Derbe në guiedx Lистра abi' Lистра bidxaagloj reeman tijb bën rlliladx Jesucrist, laman Timoteo, xniaaman naj bën Israel, nëman rlliladx Jesucrist guiáad xdadaman naj bën grieg. ² Graczi ree bën rlliladx Jesucrist, bën zobj ree guiedx Lистра në Iconio ruza't laaman zagdxe. ³ Dxel rëb Pab chinëman Timoteo, per yaloj badxe'man laaman sen ni ru ree bën Israel, chitëe xhie guiëb ree bën Israel riga' niz ni, din gra reeman ragbee guial naj xDadaman bën grieg. ⁴ Graczi ree guiedx ni gudëd reeman bagojn reeman bën rlliladx ree Jesucrist ni rayal güün reeman zi'c ma rëb ree apóstoles, con ree bengol rniabee loj ree bën rlliladx laaman Jerusalén. ⁵ Zianan zeel guzudxi'ch ree bën niz ni loj guialrlliladx reeman Jesucrist, abi' guixie guixie gojcxhiey mazri ree bën rlliladx laaman.

Baliüloj tijb bën Macedonia loj Pab

⁶ Chi ma gojc zian ad baslaat xSprijt Jesús nignee reeman xtiidx Dios niz Asia. Dxel gudëdzinejz reeman niz Frigia në niz Galacia ⁷ abi' bidxin reeman niz Misisa. Ni been reeman xgab nej reeman niz Bitinia, per ad cwëjb gajct xSprijt Dios nej reeman niz ni. ⁸ Dxelri gudëdzinejz reeman niz Misisa, bidxin reeman guiedx Troas. ⁹ Yagaj, guxhinzii guzajc Pab zi'c rulüü cane'xhchaalaman. Baguiaaman tijb xinguiáaw zëëd niz Macedonia, za'lix rzajquix liaadx loj Pab, rëbix:

—Guda niz Macedonia, taguieen dunujn yudar.

¹⁰ Guloxzi baguiaa Pab zian, laa baguieen gajcan porvinid din yo'n niz Macedonia guial bayagbeen Diosan naj bën cabejdx dunujn niz ni par yatie'chan xtiidxza'c Jesucrist.

Bidxin ree Pab con Silas Filipos

¹¹ Badxu'n loj barcw luguedx Troas abi' bio'n naliduu Samotracia. Chi bareguiaa badxin guiedx Neápolis. ¹² Yagaj badxoon bio'n Filipos, guiedx mazri zobjloj niz Macedonia, per Rom rniabee guiedx zii, ni badxu'n bëlzi ree dxej. ¹³ Abi' tijb dxej raziiladx ree bejn, bariin luguedx guin bio'n tijb ruguiwro', lod rayagbeen rado'p ree bën Israel par cwedx reeman Dios. Abi' badxu'n baneen xtiidxza'c Jesucrist loj ree béngunaa bado'p yagaj. ¹⁴ Tijb ree béngunaa guin la Lidia, najman bën Tiatira, ruto'man lajd zagdxe ni culor murad. Diidxli rdxebaman Dios abi' cucaagdiajgaman. Dios guxhal xquiarguiejnman din gucaagdiajgaman zagdxe gra ni rëb Pab. ¹⁵ Abi' gurobnjnsaman con gra xfamilaman. Dxel gunabaman favor du lojn, naman:

—Bal walidi rlliladxidi guial ma rlliladxan Jesucrist, gol baya'n lidxan.

Dxel beenman naguiejn baya'n nan lidxaman.

¹⁶ Dxel tib volt, chi zio'n lod rej ree bejn par cwedx guiniab reeman Dios, badxaaglojn tijb biingunaa, yu' xinxab luxdoo, abi' por xguialrniabee

xindxab guin rnieeya'm guíaad ree b́en guzii laam dád zro' milia rún reeman gan por dxiin guin. ¹⁷ Dxel bidnalim Pab con dunujn, rbidxa'm rēbim:

—B́en guie ree rún xchiin Dios yu' xanyabaa, laa reeman gugojn lējt xhienaag gaquidi perdon.

¹⁸ Zien dxej da't beenm zian, xt chi balenya' Pab, dxel bayejcaman rēbaman loj xindxab yu' luxdoom:

—Por xguialrniabee Jesucrist, rniabeen lūj din yariil luxdoo biin guie.

Loj hor zii gajc barii xindxab guin luxdoom.

¹⁹ Per chi gogbee ree b́en guzii laam guial ad zajctri güünm gan milia par laa reeman, dxel gunaaz reeman Pab con Silas, biné reeman laa reeman roylay loj guxtis. ²⁰ Chi bayü reeman laa reeman loj ree guxtis guin, rēb reeman:

—Xin Israel guie ree rbēē reex wadijl du ladx ree, ²¹ abi' ruluü reex costumbr ree ni ad zatiēēbt ree yaguieen ree ad zajc tēēt yaguieen ree, din ben Rom dunuj ree.

²² Dxel wajs gra ree b́en guin contr laa reeman, abi' gunabee ree guxtis guin gulēē xab Pab con Silas din quin reeman laa reeman con var. ²³ Chi gulox gudijn da't reeman laa reeman, dxel bilu' reeman laa reeman ladxguuib abi' gunabee reeman b́en rajp ro' ladxguuib guin din gapdxi'chaman laa reeman.

²⁴ Chi biguejn b́en rajp ro' ladxguuib guin zian, dxel bilu'man laa reeman xt lēn cuart bigra yu' lēn ladxguuib guin, guxhiiman guia' reeman loj tabl naal con caden.

²⁵ Per garol guiaal, la'tgaj cabejdx canab Pab con Silas Dios, cayool tēē reeman cant par laaman, dxel cucaagdiajg los demazri ree b́en yu' ladxguuib guin. ²⁶ Dxel tijbzi golp guzuloj xudoxh, niz ni niz guie rurliā xcimiant ladxguuib guin. Loj hor zii gajc bixal gra ree xportan abi' baxiec ree caden naxii gra ree b́en yu' lēnan. ²⁷ Chi baban b́en rajp ro' ladxguuib guin abi' baguiaaman zojbyal gra ree xportan, gulēē xi espadaman din nugūjt laagajcaman guial gunaladxaman gra ree b́en yu' ladxguuib guin ma baxüün.

²⁸ Dxel gurixdiaj Pab, rēbaman lojman:

—Ad güünnaa lūj gajc, laa dugran nadxu' guie.

²⁹ Laa gunab gajc b́en guin tijb guij, dxel ruxüünman guyuman, rnijman guial rdxebaman, bigzuxibaman loj Pab nē loj Silas. ³⁰ Dxel babēēman laa reeman, gunabdiidxaman loj reeman, rēbaman:

—Dad, gol guna, ¿xhie rayal günan din güün Dios naj perdon?

³¹ Badxi' reeman laan, rēb reeman:

—Bililadx Dad Jesucrist, zian gaquil perdon con xfamilil.

³² Abi' be reeman xtiidx Dios lojman con loj gra ree b́en zojb lidxaman.

³³ Zianx guxhin zii gajc gudiibaman lod nadxeelguijdx reeman, dxel gurobnijsaman con gra xfamilaman. ³⁴ Abi' bignēman laa reeman lidxaman, dxel badēēman ni gudaw reeman. Guíaad laaman dád nix yu' luxdooman con gra xfamilaman Guial ma rliadx reeman Dios.

³⁵ Chi bareguiaal, guxhaal ree guxtis guin suldad ree persi biguiedx reeman loj b́en rajp ro' ladxguuib guin guial guslaaman Pab con Silas. ³⁶ Abi' rēb b́en rajp ro' ladxguuib guin loj Pab:

—Ma na ree guxtis guial guslaan lējt. Yan ma zajc yaguiajdi ad chu'di xgab.

³⁷ Per rēb Pab loj ree suldad guin:

—Nayajcan quijb ben Rom abi' gudijn reeman dunujn delant loj ree b́en guiedx, ni'quid baneet reeman mod nadēēdan cwent loj reeman con badxe' reeman dunujn ladxguuib. Abi' yan, ¿guslaa reeman dunujn ralan ya? ¡Ad zajctan zian! Gui't quijb laa reeman guidgalēē reeman dunujn.

³⁸ Abi' bicojn ree suldad guin guxtis guin ree zian, dxel dád bidxeb reeman chi biguejn reeman guial ben Rom naj Pab con Silas. ³⁹ Dxel wej reeman bignab reeman perdon loj Pab con Silas babëë tée reeman laa reeman, rëb reeman loj reeman din yaza reeman luguiedx guin. ⁴⁰ Chi barii reeman ladxguib, wej reeman lidx Lidia. Zianz chi gulox guneenë reeman los demazri ree bën rliiladx ree Jesucrist din chu' luxdoo reeman sudxi'ch reeman loj ni rliiladx reeman, dxel baza reeman.

17

Bidxin ree Pab con Silas Tesalónica

¹ Chi zë Pab con Silas, gudéd reeman niz Anfípolis nè niz Apolonia zianz bidxin reeman luguiedx Tesalónica lod yu' tijb xyadoo ree bën Israel. ² Abi' zi'c goc xcostumbr Pab, wejman lën yadoo guin, choon dxej raziiladx ree bejn. Wejman bigneenëman laa reeman xtiidx Dios. ³ Bagojnman balüü tée'man laa reeman loj xtiidx Dios lod rëb guial naj sagdiaj Cristo, abi' chi ma güjtaman yabanman stijb. Rëbaman loj reeman:

—Jesús ruzat gajcan lojdi, laagajcaman naj Cristo din yabëëman dunuj ree loj dol.

⁴ Yu' ree bën Israel guin bililadx abi' bachajg reeman Pab con Silas. Në zien ree bën grieg rën Dios bililadx, nètëë zien ree béngunaa zojbloj bililadx Jesús. ⁵ Per ree bën Israel ad bililadxt Jesucrist, gudédloj reeman abi' bato'p reeman benmal ziza ree lunejz persi gulëë reeman wadjil luguiedx guin, abi' guyu reeman lidx Jasón, raguuil reeman Pab con Silas din cwëë reeman laa reeman guzuj reeman laa reeman loj ree bën guiedx guin. ⁶ Per guial ad badxejlt reeman laa reeman yagaj, dxel guxoobyuj reeman Jasón nè ree ben ren bën rliiladx Jesucrist, binë reeman laa reeman loj guxtis, rbixdiaj reeman, rëb reeman:

—Tio'p ree xin cabëë wadjil guidib guidxliuj, ma bi't reex guie, ⁷ abi' lidx Jasón zojb reex. Laa reex con gra ree bën nuchajg laa reex, ad cayüjnt reex zi'c rniabee xley rey César, din rëb reex guial yu' zatijb rey la Jesús.

⁸ Chi biguejn ree guxtis guin zian con ree bejn, gra loj xgab been reeman. ⁹ Per Jasón con los demazri ree bën guyu ladxguib guin gudijx reeman loj ree guxtis guin, dxel baslaa reeman laa reeman.

Bidxin Pab con Silas Berea

¹⁰ Guxhinzii gajc, guxhaal ree bën rliiladx Jesucrist Pab con Silas luguiedx Berea. Chi bidxin reeman ni, wej reeman lën xyadoo ree bën Israel. ¹¹ Mazri benza'c naj ree bën Israel guin guial loj ree bën Israel zojb Tesalónica. Con gan bacaagdiajg reeman ni rëb Pab. Abi' guixie guixie rusiid reeman xtiidx Dios, din gagbee reeman waliqui ni rëb Pab ya. ¹² Zeel dád zien reeman bililadx Jesucrist, nètëë zien bën grieg bililadx laaman zi'c ree xinguaaw zi'c ree béngunaa zojbloj niz ni. ¹³ Chi gogbee ree bën Israel zojb Tesalónica guial catie'ch Pab xtiidx Dios luguiedx Berea, dxel wej reeman ni bigtiaalguiiw reeman bejn ree din guidxe'ch reeman Pab. ¹⁴ Per ree bën rliiladx Jesucrist ad goglaat reeman, laa guxhaal gajc reeman Pab niz ro' nijsdoo. Guiáad Silas con Timoteo baya'n reeman mazri Berea. ¹⁵ Abi' ree bën biglu'nejz Pab, xt Atenas binë reeman laaman. Chi baza reeman ni, bignë reeman xruson Pab din diob che Silas con Timoteo chinal reeman laaman.

Bidxin Pab Atenas

¹⁶ La'tgaj cabëz Pab guidxin Silas con Timoteo luguiedx Atenas, guyunayaman guial baguiaaman zien da't ni rajp ree bejn niz ni zi'c dios. ¹⁷ Zeel

weyman lèn xyadoo ree bèn Israel bigneenëman laa reeman në los demazri ree bèn rën Dios zi'c ree bèn Israel, guixie guixie rnieenëman chutëez bèn rdxaaglojman niz galay guiedx guin. ¹⁸ Guneenë tëëman garol ree bèn zinal ni balüü bèn brii laj epicureo, në za garol ree bèn estoicos. Abi' yu' reeman rëb:

—¿Xhienin rniee xin guin zeel rniee da'tix?

Yu' tëë reeman rëb:

—Rulüü xtiidx dios ren ree bèn ad naguieenbeet ree catie'chix.

Rëb reeman zian guial caneenë Pab laa reeman xtiidxza'c Jesucrist në xcwent guial babanman stijb. ¹⁹ Dxel binë reeman Pab tijb luar la Areópagó, lod rado'p reeman. Abi' gunabdiidx reeman lojman, rëb reeman:

—¿Zajc nal ya xhie ree nicüb guin zidgalüül niz guie? ²⁰ Din rül diidx du lojn ni ad rayagbeetan, zeel rayënan yayagbeen xhie rën guiëban.

²¹ Graczi ree bèn Atenas, con los demazri ree benzit zojb ni, zianczi za' reeman zian. Ruladx reeman téd reeman dxej, gucaagdiajg reeman o gü reeman ni naj ree nicüb.

²² Dxel guzuli Pab galay reeman lod la Areópagó, rëbaman:

—Bèn Atenas, por graczi ni ma baguian, ma gogbeen guial dád zien ree xdiosidi. ²³ Abi' chi zizaan ziquian luar lod rbejdxidi xdiosidi, badxejlan tijb luar lod ca ree diidx ni rëb: “Par Dios ad naguieenbeet ree.” Yan, Dios rbejdxidi sin guial ad nünbeetidi laaman, xtiidxaman naj ni zidguien lojdi.

²⁴ 'Dios guin been guidxliuj con graczi ni yu' lojn, laaman rniabee xanyabaa në loj guidxliuj. Ad za'taman lèn yadoo ni rüjn ree bejn. ²⁵ Ad rixaadx tëëtaman chu güün xhienin par laaman, din laaman naj bèn razaladx bi nabajnnë' ree, laaman razaladx guialnaban duloj ree në ree ni rayaadx ree.

²⁶ 'Por tijb bejn been Dios din chu' zienloj bejn loj guidxliuj din cwe reeman guidib loj guidxliuj. Abi' ma naj xhie tiamp guiban reeman ban tëë cwe reeman. ²⁷ Din yaguiil reeman Dios majsi zi'c chi rgan bejn chi raguillaman xhienin, zian güün reeman din yadxejlaman. Majsi diidxliczi ad zijtt za'man par gra bejn. ²⁸ Din por Dios nabajn ree, por laaman raniib ree radxoo tëë ree, por laaman nadxu' ree loj guidxliuj. Zi'c rëb tëë ree xbénrignia'di, chi rëb reeman: “Dunuj ree nayajc xi'n Dios.” ²⁹ Zeel bal nayajc ree xi'n Dios, ad rayalt yaguieen ree xgab guial Dios najné or, o plajt, o guiaj ya zi'c naj ni rüjn ree bejn zi'c naj xixgab reeman. ³⁰ Tiamp gulal cwëjb Dios been ree bejn zi'c naladx reeman guial achetczi ragbee reeman, per yan gra ladczi canabeeman gra ree bejn din yayüjn reeman xgab por xtol reeman.

³¹ Din Dios ma gulej tijb dxej ni yadëéd ree bejn cwent lojman, dxej ni güün guialguxtisaman. Ma gulej tëëman Jesucrist din güünman guialguxtis guin, abi' din guiguieen guial gulejman laaman par zian, basbanman laaman chi güütaman.

³² Chi biguiejn reeman rëb Pab guial baban Jesucrist loj ree bengüt, yu' reeman baze' laaman, yu' tëë reeman rëb:

—¡Zatijb dxej yasnuu yacaagdiajgan ni canal!

³³ Dxel baza Pab lod za' reeman. ³⁴ Per yu' reeman bachajg laaman, abi' bililadx reeman xtiidx Dios. Loj reeman no'ch tijb bèn zojbloj lèn Areópagó laman Dionisio, në stijb béngunaa la Dámaris në ree ben ren.

¹ Dxel brii Pab Atenas zëman Corinto. ² Yagaj bidxaaglojman tijb bën Ponto laman Aquila, zëedaman diaa Israel. Aquila con xbéngunaaman Priscila qui bazari reeman niz Italia guial gunabee rey Claudio yarii gra ree bën Israel Rom. Dxel wej Pab bitixlojman laa reeman. ³ Abi' guial lasa'gajc dxiin ni rünjman rünj reeman, rünjchaaw reeman guid ni rajc ree carp, dxel baya'nnëman laa reeman persi been reeman dxiin guin. ⁴ Abi' beegaj dxej raziiladx ree bën Israel, rej Pab rigneeman xtiidx Dios lën xyadoo ree bën Israel, zi'c ree bën naj ree bën Israel zi'c ree bën ad najt bën Israel raguuilaman mod din chililadx reeman ni rëbaman.

⁵ Chi baza ree Silas con Timoteo niz Macedonia, bidxin reeman Corinto, dxel achetri ni ren been Pab, ganaxzi xtiidx Dios gunee loj ree bejn, balüü tëmëman bën Israel ree guial Jesús naj Cristo bën cabëz reeman. ⁶ Per guzuloj bidxe'ch reeman Pab abi' gunee reeman diidxguijd contr laaman. Dxel gudxijp xabaman zi'c tijb sen guial ad ruzoobt reeman diidx, abi' rëbaman loj reeman:

—Lëjt gajc rajp dol guial guizëëbidi delant loj Dios, ad najt ra'p dol. Diizd yan chiguien xtiidx Dios loj ree bën ad najt bën Israel.

⁷ Dxel bariiman lën yadoo guin wejman lidx bën la Justo, rën bën zii Dios, gajxh gajc yadoo guin naj lidxaman. ⁸ Abi' Crispo, tijb bën rniabee lën xyadoo ree bën Israel, bililadxaman Dad Jesucrist con gra xfamilaman. Në zien ree bën Corinto bililadx chi biguiejn reeman xtiidx Jesucrist abi' gurobnij reeman. ⁹ Tijb guxhin balüüloj Dios loj Pab, rëbaman lojman:

—Ad rdxe bil, basnuu gunee da diidxan, ad gucwëëzil, ¹⁰ naj za'në' lüj, achutczzi zajc güün lüj xhienin, din luguiedx guie zien da't bejn naj par naj.

¹¹ Zianan zeel baya'n Pab Corinto tibijz garol, balüüman bën guin ree xtiidx Dios.

¹² Per chi goc Galión gobernador Acaya, bën Israel ree bachajg lasa' reeman persi gunaaz reeman Pab binë reeman laaman loj gobernador guin, ¹³ rëb reeman loj gobernador guin:

—Xin guie ziza cayüjnx gan bejn ree guial guiën reeman Dios zi'c tijb mod ni ad najt loj ley.

¹⁴ Ma niniee Pab, chi gunee Galión rëbaman loj ree bën Israel guin:

—Bal niajcan tijb falt o tijb gualquia narooob beenman zeel zidnëdi laaman, züncwentan lëjt. ¹⁵ Per najn por ree diidx në por laj ree bejn nëtëë por xleydi, zeel lëjt gajc gol gunaj xhienaa güündi, ad rëntan gūnan gualguxtis xcwent ree ni guin.

¹⁶ Abi' laa babëë gajcaman laa reeman roylay guin. ¹⁷ Dxel yagaj gajc gunaaz gra reeman Sóstenes, bën rniabee lën xyadoo ree bën Israel abi' gudijn reeman laaman, per ni'quid beencwentt gobernador guin laa reeman.

Badxin Pab Antioquía

¹⁸ Zienri ree dxej baya'n Pab Corinto. Dxel bazaadiidx nëman los demazri ree bën rililadx Jesucrist, abi' bazanëman Priscila con Aquila, guyu reeman loj barcw zë reeman niz Siria. Per chi gad reeman grii Céncrea bagaj guijc Pab, por tijb promisej ni beenman. ¹⁹ Chi bidxin reeman Efeso, ni basa'n Pab Priscila con Aquila, abi' wejman lën xyadoo ree bën Israel zobj ree ni, bigneenëman bën Israel rado'p ree lën yadoo guin. ²⁰ Abi' guyën reeman niaglaa Pab ni mazri, per ad cwëjbtaman. ²¹ Rëbaman loj reeman:

—Ma yaya'n, bal gagnë Dios naj, guidganan lëjt stijb.

Dxel guyuman loj barcw bazaman Éfeso. ²² Chi bidxinman Cesarea, dxel wejman Jerusalén bicajpdiozaman bèn rliiladx ree Jesucrist, dxelri zëman Antioquia. ²³ Chi ma gojc xchej za'man Antioquia, dxel briiman zatijb. Wejman tijb gaj ree guiedx riga' niz Galacia nê niz Frigia, ragu'man luxdoo gra ree bèn rliiladx Jesucrist.

Gutie'ch Apolos xtiidx Dios Éfeso

²⁴ Tiamp zii bidxin tijb bèn Israel luguiedx Éfeso, laman Apolos, gojlaman Alejandria. Dád radxelaman diidx par guinieeman abi' dád rajcaman xtiidx Dios. ²⁵ Basiidaman xtiidx Dios, dxel con gan balüüman bejn ree, zagdxe tēē rüman xtiidx Jesús loj reeman, majsi ad ragbeetaman par xhieri mazri rirobnijs bejn, tijbzi xcwent xguial waroobnijs Waj ragbeeman. ²⁶ Abi' Apolos, sin gualrdxeb guzuloj caneeman xtiidx Dios loj ree bèn Israel lën xyadoo reeman, zianz chi biguiejn Priscila con Aquila ni rëbaman, dxel bignë reeman laaman lidx reeman. Ni balüü reeman laaman persi basnuu basiidaman mazri xtiidx Dios. ²⁷ Chi been Apolos xgab cheman niz Acaya, gra ree bèn rliiladx Jesucrist bèn za'në laaman, badxe' reeman luxdooan din cheman, abi' guxhaal reeman tijb gui'ch loj ree bèn rliiladx Jesucrist bèn zojb ree niz Acaya din yaca' reeman laaman zagdxe chi guidxinman niz ni. Chi bidxinman niz Acaya dád beenman yudar bèn ma rliiladx ree Jesucrist guial gognë Dios laa reeman. ²⁸ Din delant loj gra ree bejn rëbaman guial ad laat zë ree bèn Israel, abi' achutczu gojc nadxi' xtiidxaman guial graczi ni rëbaman naj diidxli, balüü tēēman loj xtiidx Dios gra luar lod rëb guial Jesús naj Cristo bèn gulëjz reeman.

19

Bidxin Pab Éfeso

¹ La'tgaj za' Apolos Corinto, wej Pab guiedx riga' ree niz ruguia', abi' bidxinman Éfeso, yagaj bidxaaglojman bëlzi ree bèn rliiladx Jesucrist. ² Abi' gunabdiidxaman loj reeman rëbaman:

—¿Guyu xSprijt Dios luxdoodi ya chi bililadxidi?

Badxi' reeman laan rëb reeman:

—Ni'quid waguiejntan guial yu' xSprijt Dios.

³ Dxel rëb Pab loj reeman:

—¿Xhieza naag gurobnijsidi?

Badxi' reeman laan rëb reeman:

—Barobnijsan zi'c balüü Waj bejn ree.

⁴ Dxel rëb Pab loj reeman:

—Walican baroobnijs Waj bejn, bèn bayüjn ree xgab por xtol reeman. Per rëbaman guial rayal chililadx reeman bèn zëéd xijchaman abi' laaman naj Jesús, bèn naj gajc Cristo.

⁵ Chi biguiejn reeman zian, dxel gurobnijs reeman por Dad Jesús. ⁶ Abi' chi guxhoob yaa Pab guijc reeman, dxel guyu xSprijt Dios luxdoo reeman, zianz guzuloj canee reeman diidx ren ree. Dxel guzuloj cudëéd reeman xtiidx Dios loj ree bejn. ⁷ Loj gra reeman naj cost chiptio'p xinguaaw.

⁸ Choon bëew wej Pab lën xyadoo ree bèn Israel zojb ni. Sin gualrdxeb guneeñman laa reeman xtiidx Dios, guneeñman laa reeman abi' beenman nagueijn din güünman gan chililadx reeman xhienaag naj xguialrniabee Dios. ⁹ Per garol reeman gojc nad ad guyënt reeman nililadx reeman, al guzuloj gunee reeman diidxguijdx por xtiidx Jesucrist delant loj ree bejn.

Dxel bariica Pab loj reeman con ree bén ma rliadx Jesucrist, binëman laa reeman lën tijb xzcuel bén la Tiranno. Ni balüüman laa reeman guixie guixie, ¹⁰ loj tio'p ijz beenman zian. Abi' graczi ree bén zojb niz Asia, zi'c ree bén Israel zi'c ree bén ad najt bén Israel, bacaagdiajg reeman xtiidx Dad Jesucrist. ¹¹ Abi' por xgualrniabee Dios been Pab milagr narooob ree, ¹² xt ree xbay Pab në ree lajd rtia lojman zi'c lantar rignë reeman loj ree bénragxuu, abi' rayajc reeman gualguijdx ni rajc reeman, rarii tëë ree xindxab yu' luxdoo reeman.

¹³ Per guyu bëlzi ree bén Israel ziza rabëë reeman xindxab luxdoo ree bejn, abi' guyën reeman nÿjnnë reeman dxiin laj Dad Jesucrist dxel rëb reeman loj ree xindxab guin:

—jPor Jesús bén ruza't Pab, rniabeen lëjt, gol barii!

¹⁴ Zian naj ni been gajdx ree xi'ngaan tijb bén Israel la Esceva, bén goc tijb bixhioz rniabee ree bixhioz. ¹⁵ Per tib volt tijb ree xindxab guin badxi' xtiidx reeman rëbaman:

—Nünbeen Jesús ragbee tëen chunin naj Pab, per lëjt ni'quid nünbeetan lëjt.

¹⁶ Abi' bén yu' xindxab guin luxdoo guzuloj caguinman laa reeman, con gojl ni yu'man beenman laa reeman gan. Dád gudijnman laa reeman abi' baxüün reeman barii reeman lënü guin, ziladzi reeman nadxeelguijdx tëë reeman. ¹⁷ Graczi ree bén zojb Éfeso, zi'c ree bén Israel zi'c ree bén ad najt bén Israel, gogbee reeman gojc zian, dxel dád bidxeb reeman abi' baza't reeman Dad Jesús zagdxe.

¹⁸ Në zien ree bén rliadx Jesucrist bidxin abi' delant loj gra ree bejn baneero' reeman gra ni mal ma been reeman. ¹⁹ Nëtëë zien ree bén been gualbidxaa bidxinnë xlibr reeman abi' baze'c reeman laa reen delant loj gra ree bejn. Chi babëë reeman cwent plac lasajc ree libr guin dxel cost tü'pchiü mil milia plajt lasajc reen. ²⁰ Abi' zian bire'ch xtiidx Jesucrist biguien tëë xgualrniabeeman.

²¹ Chi ma gudëd gojc zian, been Pab xgab cheman niz Macedonia në niz Acaya xt yadxinman Jerusalén. Rëb tëëman gual chi ma wejman Jerusalén dxelri cheman në Rom. ²² Abi' guxhaalaman tio'p bén rÿjn laaman yudar, Timoteo con Erasto, persi wej reeman niz Macedonia la'tgaj baya'nman mazri niz Asia.

Gojc nadxeb Éfeso

²³ Lën ree dxej zii been ree bén Éfeso nadxeb por xtiidx Jesús. ²⁴ Din Demetrio, bén rÿjn ree ni plajt, rÿjnman figur plajt ni naj ree form xyadoo dios la Diana, ragbeeman gual dád rÿjnman gan con ree bén rÿjnnëman dxiin. ²⁵ Dxel bato'paman laa reeman con ree ben ren bén rÿjn gajc ree lasa' dxiin guin, abi' rëbaman loj reeman:

—Gol bacaagdiajg, lëjt ragbee gual loj dxiin guie raguieen ree gan milia ro'. ²⁶ Per yan lëjt ruguiaa rigueijn tëëdi, Pab ziza cayëbix gual dios ni rÿjn ree bejn ad diost reen. Abi' zian cayujnx gan caliladx zien ree bejn laax, ad tijbtizi luguiedx guie, në guidib niz Asia. ²⁷ Dxel nadxeb yasëëb dux chiin ree, abi' ad tijbtizi dux chiin ree, në xyadoo dios Diana ad zayagbeetri ree bejn laan zi'c nünbee reeman laan yan abi' achutri guidxga' xgualrniabee dios Diana, bén rën ree bejn guidib niz Asia në guidib loj guidxliuj.

²⁸ Chi biguiejn reeman zian, bidxe'ch reeman abi' gurixdiaj reeman rëb reeman:

—jBén zojbloj naj Diana, xdios ree bén Éfeso!

²⁹ Abi' gurixdiaj ree b́en guiedx guin wajs reeman, gunaaz reeman tio'p ree b́en Macedonia, Gayo nē Aristarco, b́en rzanē ree Pab. Dxel guxoobyuj reeman laa reeman, binē reeman laa reeman lod rajc xgabilt ree b́en guiedx. ³⁰ Guyēn Pab niuman yagaj din ninieenēman bejn ree, per ad cwējbt ree xcompniaraman, b́en ma rliładx ree Jesucrist. ³¹ Nētēē loj ree guxtis Asia guin no'ch b́elzi ree xmiw Pab, laa reeman guxhaal ruson lojman guial mejorli ad chu'man ni. ³² Zianz gurixdiaj ree b́en guin rēb reeman ni rent ni ren, been reeman nadxeb abi' zien reeman ni'quid ragbeet par xhie bado'p reeman yagaj. ³³ Dxel galay ben zien guin babēē ree b́en Israel tijb xcompniar reeman b́en la Lejandr din guinieenēman b́en guin ree. Dxel beenman sen loj ree b́en guin din yacwēēz ro' reeman din guinieeman por ree b́en Israel delant loj ree b́en guiedx guin. ³⁴ Per chi gogbee reeman guial najman b́en Israel, tiblazujzi gurixdiaj reeman cost tio'p hor, rēb reeman:

—¡B́en zobjloj naj Diana, xdios ree b́en Éfeso!

³⁵ Dxel chi been squiarban luguiedx guin gan bacwēēz ro' reeman, dxel rēbaman:

—B́en Éfeso, gra b́enguidxliuj ragbee guial luguiedx guie zianczi rnaij ree bejn xyadoo dios Diana abi' rēn tēē ree bejn dios Diana biajb xanyabaa.

³⁶ Lējt ragbee guial laan naj ni diidxli, zeel ad rayalt güündi zian, ad gontzi güündi xhienin sin xgab. ³⁷ Din b́en bidnēdi achet ni mal been reeman yadoo guin, ad wanee tēēt reeman diidxguijdx dux dios ree. ³⁸ Bal Demetrio con ree xcompniaraman b́en rijnnēman dxiin rajp reeman wadijl con ree ben ren, laa roylay naj, laa ree guxtis yu', ni che reeman chitawquia reeman. ³⁹ Per bal xhieri mazri rēndi, chi gac xgabilt b́en guiedx dxel gacan reglad. ⁴⁰ Yan, por ni ma gojc, nadxeb na gobiarn guial dunuj ree caylu' ree bejn diidx din güün reeman wadijl guin, ¿abi' xhieza yaguie'ch ree loj reeman bal guiniabdixd reeman duloj ree xcwent ree ni cayajc?

⁴¹ Chi gulox rēbaman zian, dxel bare'ch reeman.

20

Wej Pab Macedonia nē Grecia

¹ Chi babedxe ree b́en Éfeso, gurejdx Pab b́en rliładx ree Jesucrist persi bagu'man luxdoo reeman. Dxelri bazaadiidxnēman laa reeman abi' zēman niz Macedonia. ² Bitixlojman b́en rliładx ree Jesucrist guidib niz ni, dád bagu'man luxdoo reeman con xtiidxaman, dxelri bidxinman Grecia ³ lod guzuman choon b́ēēw. Ma niuman loj barcw din niejman Siria, chi gogbeeman guial nuyēn ree b́en Israel nūjn reeman laaman xhienin. Dxel mejorli beenman xgab bayejcaman niz Macedonia. ⁴ Binēman Sópater, b́en Berea, xi'ngaan Pirro, nē Aristarco con Segundo, b́en Tesalónica ree, nētēē Gayo, b́en Derbe, con Timoteo, nē Tíquico con Trófimo, b́en niz Asia ree. ⁵ Gra reeman guned abi' gulējz reeman Pab con naj Lujc guiedx Troas. ⁶ Guiáad dunujn chi gudēd lanij ni raw ree b́en Israel guiadxtil ni ad yu't levadur, dxel badxu'n loj barcw badxoon Filipos, abi' ni goc gaay dxej badxinan guiedx Troas lod za' reeman. Ni badxu'n gajdx dxej.

Basban Pab Eutico

⁷ Chi bidxin chidumingw, badxajg du lasa'n din yadaawan guiadxtil tijbzi, abi' guial mal been Pab xgab guial yareguiaal griiman, chi bidxin garol guiaal sta caneenēman bejn ree, ⁸ guiáad lēnü ladya lod rado'pan dád zien ree guij re'c. ⁹ Tijb xinguiag zobj ro' ventan lax Eutico. Guial xchej da't guneenē

Pab laa reeman, dxel xt garej gunaaz bacaal xin guin, abi' gudidya'x diizd yu bayon guin xt luyuj, ma güjtix chi bales reeman laax. ¹⁰ Dxel biguiajt Pab lod naga'x, bazuxibaman abi' gudiidxaman laax, dxel rëbaman loj reeman:

—Ad rdxebidi, nabanquix.

¹¹ Dxel bayë'p Pab zatijb, gula'man guiadxtil abi' gudaw reeman, dxel basnuu guneenëman laa reeman xt bareguiaal. Chi bareguiaal bayunejzaman ziaman. ¹² Abi' xin gudidya' ro' ventan guin, nabanx zigné reeman laax, dxel dád nix yu' luxdoo reeman.

Wej Pab Mileto

¹³ Dxel dunujn badxu'n loj barcw baneedan bio'n par luguiedx Asón, lod baya'nan diidx yaca'n Pab, din beenman xgab niej guia'man ni. ¹⁴ Chi badxajg du lasa'n con laaman luguiedx Asón, dxel badxu'në'n laaman loj barcw bio'n lod la Mitilene. ¹⁵ Ni badxoon, chi bareguiaal badüüdan niz lod la Quío. Chi bareguiaal stijb badxinan lod la Samos. Dxel chi bareguiaal stijb badxinan Mileto, per chi gad yagaj guidxin badxu'dxen lod la Trogilio. ¹⁶ Been Pab xgab ad zejtaman Éfeso, ad guyëntaman niaglaaman niz Asia guial nuyënman diob nadxinman Jerusalén, din xixgabaman naj guial bal zajc yadxinman lanij Pentecostés.

Bazaadiidxnë Pab bejn ree Mileto

¹⁷ Chi nadxu'n Mileto, gunabee Pab bi't ree bën rniabee loj ree bën rliladx Jesucrist, bën zobj ree Éfeso. ¹⁸ Chi bidxin reeman dxel rëbaman loj reeman: —Diizd dxej yaloy ni bialan niz Asia xt yan, lëjt ragbee xhienaag cayünan. ¹⁹ Loj guidib tiamp ni za'në'n lëjt cayünan sirv Jesucrist con pasens, majsi xt ronan abi' gra loj guialzi ma gudëédan por ni rën ree bën Israel güünnë reeman naj. ²⁰ Per majsi zian ad bacwëézt rnin lojdi ni naj ni zagdxe par lëjt, tant delant loj ree bejn në lidixidi balün lëjt. ²¹ Abi' zi'c ree bën Israel në ree bën ad najt bën Israel, ma rën loj reeman din yayüjn reeman xgab por xtol reeman yadxi' tëë loj reeman loj Dios chililadx tëë reeman Dad Jesucrist. ²² Yan ma yaya'n Jerusalén lod caxhaal xSprijt Dios naj, ad ragbeetan xhie cabëz naj ni. ²³ Tijbzi ni ragbeen naj guial guidib lod ran rugojn xSprijt Dios naj guial ladxguuib në zro' da't guialzi naj ni cabëz naj. ²⁴ Per par naj achet güünan por zian, majsi güiëtan per con nix yu' luxdon cayünan ni rayal günan xt lod gactizan, gün tëën mandad ni banee Dad Jesús naj guial gatiechan xtiidxza'caman xhienaag rën Dios dunuj ree.

²⁵ Yan naj ragbee guial ni'qui tijbidi bën ma ben diidx loj xhienaag naj xguialrniabee Dios, ad zuguiaatrudi naj. ²⁶ Zeel ganin lojdi yan guial ad achetri dol ra'pan bal id nabandi xnejz. ²⁷ Din ma bagojnan lëjt gra xhienaag naj xixgab Dios achetctzi baquiechan. ²⁸ Yan, gol gojp lëjt gajc, gol gojp tëë ree bën rliladx Jesucrist, bën ma banee xSprijt Dios lojdi din guiniadi laa reeman zi'c tijb bën rajp xiil ree, din Jesucrist con xrejnman ma gudijxaman por xtol reeman. ²⁹ Naj ragbee guial chi yazaan gui't ree ben ren zi'c gajczi rtie'ch cuyojt xiil ree, zian naj xixgab reeman güünnë reeman bën rliladx ree Jesucrist. ³⁰ Loj gajquidi grii ree bën gulüü ganax ni rusquiee, din güün reeman gan güüncwent ree bën rliladx Jesucrist xtiidx reeman luar güüncwent reeman xtiidx Dios. ³¹ Zeel gol guzujsin, gol gojp cudad, gol basaaladx, loj choon ijz ad bacwëézt gunenë'n lëjt xt ronan banen lëjt consejw.

³² 'Yan, compniar raliduladx ree Jesucrist, gusa'nan lëjt con Dios con xtiidxza'caman. Laan rajp guialrniabee par gagnën lëjt, din gusnuu gagbeedi xhienaag rënman guibandi guneë tēëman lojdi ni ma rëbaman gudëëdaman loj ree bën ma naj xbejnman. ³³ Achut xmilia achu tēët xab rzëëbladnan. ³⁴ Lëjt ragbee zagdxe guial con quijb yan benan dxiin persi gudawnë'n bën guzu ree con naj. ³⁵ Abi' balün lëjt guial zian rayal güün bejn dxiin din güünman yudar bën ryaadx ree xhienin. Gol basaalex xtiidx Dad Jesús chi rëbaman: "Mazri nix yu' luxdoo bën razaladx guial loj bën rtia'."

³⁶ Chi gulox rëb Pab zian, dxel bazuxibaman gurejdx gunabaman Dios con gra reeman. ³⁷ Gra reeman biin, gudiidx reeman Pab abi' gudaw reeman laaman xid. ³⁸ Dád guyunaya reeman por ni rëbaman loj reeman guial ad zuguaatri reeman laaman. Dxel biglu'nejz reeman laaman xt lod za' barcw.

21

Wej Pab Jerusalén

¹ Ni basa'nan laa reeman, abi' badxu'n loj barcw bio'n tibli niz Cos, yuj riga' loj nijsdoo. Chi bareguiaal badxinan niz Rodas nëgajcan riga' loj nijsdoo, abi' ni badxoon bio'n guiedx Pátara. ² Ni badxaaglojn tijb barcw ni ma che niz Fenicia zianz badxu'n lojn. ³ Chi zio'n dxel dux lad ruvejsan baguiaan lod la Chipre, basnuu bio'n niz Siria. Abi' guial naj lat barcw guin luguiedx Tiro dxel badxu'n luguiedx guin. ⁴ Ni badxaaglojn beë rriladx ree Jesucrist abi' badxu'në'n laa reeman gajdx dxej. Bën guin ree por xSprijt Dios rëb reeman loj Pab guial ad bal cheman Jerusalén. ⁵ Per chi baza' gajdx dxej guin, dxel badxoon luguiedx guin, dxel gra reeman con xbëgunaa reeman con xi'n reeman, biglu'nejz reeman dunujn xt ro' nijsdoo. Ro' nijs guin badxu'xiban barejdx banaaban Dios. ⁶ Dxel bazaadiidxnë'n laa reeman abi' badxë'pan loj barcw guiaad laa reeman zia lidx reeman.

⁷ Chi badxoon luguiedx Tiro bio'n luguiedx Tolemaida, ni gulox dux viajn loj barcw, bio' tēën bugneenë'n bën zojb ree ni, bën rriladx ree Jesucrist abi' baya'nan con laa reeman tib dxej. ⁸ Chi bareguiaal, dunujn con Pab badxoon Tolemaida bio'n Cesarea lod bio'n lidx Felip, bën rtie'ch xtiidx Jesucrist. Felip guin naj tijb ree bën gajdx cwabee din qui's reeman ni rayal tia' ree bënprob abi' baya'nan lidxaman. ⁹ Yu' tajp xi'ndxa'paman biinxtijb ree abi' laa reem rudëëd xtiidx Dios loj ree bejn. ¹⁰ Ma gojc zian dxej nadxu'n lidx Felip, chi bi't tijb bën la Agabo nëgajcan rudëëd xtiidx Dios loj ree bejn, zëëdaman niz Judea. ¹¹ Chi bi'taman cwa'man xcinch Pab guixhiü guia' gajcaman con yaaman, abi' naman:

—XSprijt Dios na guial Jerusalén ze guixhii ree bën Israel bën naj xcinch ni guie, abi' yayü reeman laaman loj ree bën ad najt bën Israel.

¹² Chi baguiejnan zian, dunujn con ree bën rriladx Jesucrist luguiedx guin baguieenan naguiejn loj Pab ad cheman Jerusalén. ¹³ Per badxi'man laan, naman:

—¿Chexc zeel roondi abi' rgu' nayadi naj? Par naj achet güünan majsi guixiin o majsi guietan Jerusalén por Dad Jesús.

¹⁴ Chi bayagbeen guial ad zaguieentan gan yadxoonan laaman chitëë cheman, achetri baguie'chan lojman, tijbzi ni raguie'chan lojman:

—Gac zi'c rniabee Dios.

¹⁵ Chi gudëd ree dxej guin dxel baguieenan purvinid bio'n Jerusalén. ¹⁶ Bunë'n bëlzi ree bën Cesarea rriladx ree Jesucrist, laa reeman binë dunujn

lod baya'nan lidx tijb b́en Chipre, ma gojc xchej rililadxaman Jesucrist, laman Mnason.

Bignaj Pab Jacob

¹⁷ Abi' ree b́en Jerusalén rililadx Jesucrist dád nix guyu luxdoo reeman baca' reeman dunujn. ¹⁸ Chi bareguiaal bunë'n Pab bugnajn Jacob, ni riga' gra ree b́en rniabee loj ree b́en rililadx Jesucrist. ¹⁹ Chi gulox bagajpdiotan laa reeman, dxel bagojn Pab laa reeman tijb gaj ni beenman por xguialrniabee Dios delant loj ree b́en ad najt b́en Israel. ²⁰ Chi biguiejn reeman zian, baza't reeman Dios zagdx, zianz rëb reeman loj Pab:

—Lúj ragbee guial entr loj ree b́en Israel zien da't reeman ma bililadx Jesucrist, abi' gra reeman rëb guial rúnj naguiejn güün bejn zi'c rniabee xley Moisejs. ²¹ Ma biguiejn tée reeman guial lúj culüü b́en Israel ree, b́en ad zojbt ree loj nacion Israel guial ad zúnjcwentt reeman xley Moisejs, rëb téeł loj reeman guial ad rúnjt naguiejn chu' xi'n reeman sen ru ree b́en Israel ad zinal téeł reeman dux costumbr ree. ²² Yan, ¿xhienaag gac? Laa reeman guchajgczi lasa' reeman chi gagbee reeman guial ma bi'til. ²³ Zeel mejorli güünl ze: Yu' tajp ree xin no'ch du lojn xin rayal ree güün cumplid ni cwëb reex loj Dios. ²⁴ Binë reex, gol been zi'c rëb loj ley din gaquidi naya, gudijx tée por laa reex din gac ya guijc reex. Zian gagbee gra bejn guial rúnjquil zi'c rniabee ley, guial ad wali téeł ni biguiejn reeman xcwentil. ²⁵ Abi' por ree b́en ad najt b́en Israel, b́en ma bililadx ree Jesucrist, ma baxhaalan tijb gui'ch loj reeman zi'c baguieenan xgab guial ad rayalt chu' reeman xgab por xley Moisejs. Per ad rayalt gaw reeman ni rbej loj ni naj ree xdios reeman, ad gaw tée reeman rejn ni'qui bëł rberejn, ad sunë tée reeman ben ren b́en ad najt lacheel reeman.

Gunaaz ree b́en Israel Pab

²⁶ Dxel binë Pab guidap ree b́en guin, abi' chi bareguiaal been reeman zi'c rniabee ley par gac reeman naya. Dxel guyu reeman lën yadooro' Jerusalén din gugojn reeman goc yayaaloj dxej güün reeman zi'c rniabee ley, dxej rayal chinë tijb gaj reeman tijb be guiet zi'c tijb gon par Dios.

²⁷ Chi ma yayaaloj gajdx dxej ni naj güün reeman zi'c rniabee ley, yu' ree b́en Israel zëed niz Asia, baguiaa reeman Pab lën yadooro' Jerusalén abi' gurixdiaj reeman wajs reeman, gunaaz reeman laaman, ²⁸ rëb reeman:

—¡B́en Israel, gol been yudar! Xin guie naj xin ziza gra lad caneeguijdx b́en Israel ree në dux yadoo ree, rëb téeł loj ree bejn guial ad güün reeman zi'c rniabee dux ley ree. Abi' ad tijbtzi laan, në ma badxe'x b́en ad najt ree b́en Israel lën dux yadoo ree ni naj ni nada par dunuj ree ma beenx laan zi'c tijb luar ad rúnjt sirv.

²⁹ Rëb reeman zian guial baguiaa reeman Pab zizaman ni con tijb b́en Éfeso b́en la Tróximo, zeel gunaladx reeman binë Pab laaman lën yadooro' Jerusalén.

³⁰ Dxel been reeman nadxeb guidib luguiedx guin, ruxüün ree bejn bidxin reeman. Abi' gunaaz reeman Pab, guxoobyuj reeman laaman babëe reeman laaman lën yadoo guin laa basiaaw gajc reeman port guin ree. ³¹ Za mer nugújt reeman laaman, chi bidxin ruson guin loj suldad rniabee ree suldad guial gra ree b́en Jerusalén cayün nadxeb. ³² Laa bato'p gajc suldad rniabee guin xsuldadix në za tio'p choon ree suldad rniabee, baxüün reex wej reex lod riga' ree b́en guin. Chi baguiaa ree b́en guin bidxin suldad rniabee guin con ree xsuldadix, dxel bacwëz gudijn reeman Pab. ³³ Dxel gubig suldad

rniabee guin, gunaazix Pab gunabeex guxhii reex laaman con tio'p caden. Abi' gunabdiidix chu laaman xhie tēē beenman. ³⁴ Per gurixdiaj reeman rēb reeman garent garen, guial rbixdiaj da't reeman achet gojc niagbeex, dxel gunabeex bignē reex Pab lod yu' ree suldad. ³⁵ Chi bidxin reex loj ree sliar lod yu' ree suldad guin, gulejn reex Pab guial dād nadoxh rūjn ree bēn zien nal laa reex, ³⁶ abi' gra reeman rbixdiaj, rēb reeman:

—iGol bagūjtix!

Gunee Pab loj ree bejn

³⁷ Chi ma chu'nē reex Pab lod yu' ree suldad guin, gunabdiidxaman loj suldad rniabee guin, rēbaman:

—¿Zajc ganenē'n lūj ya?

Badxi' suldad guinan rēbix:

—¿Rajc rnieel diidx grieg ya? ³⁸ ¿Nid lūj naj xin Egipto guzu contr gobiarn ya, abi' laa bigxūūn gajquil niz loj yujbidx con tajp mil ree xbejnl, bēn bagūjt ree bejn?

³⁹ Dxel rēb Pab lojx:

—Bēn Israel naj. Goolan luguiedx Tarso tijb ree guiedx zojbloj ni riga' niz Cilicia. Baneesii mod ganenē'n bēn guie ree.

⁴⁰ Dxel cwējb suldad guin, abi' guzuli Pab loj ree sliar guin beenman sen loj ree bēn guin con yaaman din yacwēēz ro' reeman. Chi bacwēēz reeman, dxel guneenēman laa reeman diidx hebreo, rēbaman:

22

¹—Lējt bengol nē los demazridi, gol bacaagdiajg ni ganin por naj.

² Chi biguejrn reeman caneenēman laa reeman diidx hebreo, mazri bacwēēz reeman. Abi' basnuuman rēbaman loj reeman:

³—Bēn Israel naj. Goolan luguiedx Tarso tijb guiedx riga' niz Cilicia, per Jerusalén guie guni'san. Abi' mextr Gamaliel balütü naj gra zi'c naj xley dux bēn gulal ree. Guiáad naj guidib luxdon benan xgab güūnan sirv Dios zi'cgajc lējt yan. ⁴ Dxel guzunaalan bēn rliladx ree Jesucrist, xt bagūjtān laa reeman abi' zi'c ree bēngunaa zi'c ree xinguaaw gunaazan badxe'n ladxguuib. ⁵ Bixhioz mazri zojbloj rniabee graczi ree bixhioz nē gra ree guxtis Israel ragbee guial najn ni wali. Din laa reeman banee tijb gui'ch par gulūn loj du lasa' bēn Israel ree, bēn zojb ree luguiedx Damasco din chile' yaguilan bēn rliladx ree Jesucrist luguiedx guin, ganaaz tēēn laa reeman guidnē'n laa reeman Jerusalén din tēd reeman casti.

Be Pab diidx xhienaag bililadxaman Jesucrist

(Hch. 9:1-19; 26:12-18)

⁶ Per chi za'n lunejz par Damasco, chi ma cadxinan ni cost garol dxej, dxejczy brii tijb guij xanyabaa balaan bacha' guidibczy lod cazaan, ⁷ abi' breeyujn. Dxel biguejrnān cha' bēn na: “Saulo, Saulo, ¿chexquiza zeel rzunalil naj?” ⁸ Abi' gunabdiidxan rēn: “¿Chu lūj Dad?” badxi'mān laan naman: “Naj naj Jesús, bēn Nazaret, bēn rzunalil.” ⁹ Bēn zinē' reen baguiaa reeman bacha' guin abi' bidxeb reeman, per ad bignia't reeman ni na cha' bēn gunee naj. ¹⁰ Dxel gunabdiidxan rēn: “¿Xhie rayal günan Dad?” Abi' na Dad Jesucrist lon: “Bixche, basnuu xnejzil wej Damasco. Ni na reeman gra ni rayal güūnl.” ¹¹ Abi' guial bascajy bacha' guin lon, dxel bēn zinē' reen gunaaz reeman yan, binē reeman naj luguiedx Damasco.

12 'Ni zojb tijb bén la Ananías, rüjnman cumplid gra zi'c rniabee xley Moisejs. Abi' gra ree bén Israel zojb luguedx Damasco nünbee laaman guial nabanman xnejz. 13 Ananías guin bidganaj naj, chi bi'taman naman lon: "Saulo, ma zajc yaguaal stijb." Loj hor guin gajc baguian stijb abi' baguian laaman. 14 Dxel naman lon: "XDios dux béngulal ree ma bacaabee lüj din gagbeel xhie rënman güünl, abi' guguiaal Jesucrist guien tëël cha'man, bén rüjn zi'c rayal. 15 Din chigneel xtiidxaman loj gra ree bénguidxliuj, gü tëël diidx loj reeman ni baguiaal ni biguiejn tëël. 16 Yan, ad rbëzil mazri, guzuli gurobnijs tëë gurejdx gaj Dad Jesucrist din chisüdaman xtölil."

Be Pab diidx xhienaag wejman loj ree bén ad najt bén Israel

17 'Chi baguialan Jerusalén, wan lën yadooro' persi guredx gunaaban Dios, abi' guza'can zi'c ruluü cane'xhchalan. 18 Baguian Dad Jesús naman: "Baquiejn. Cari barii Jerusalén, din ad züjncwentt reeman ni guiëbil por naj." 19 Abi' rën lojman: "Dad, laa reeman ragbee guial naj wa gra lën ree yadoo gunaazan bén rliadx ree lüj, badxe'n laa reeman ladxguuib gudin tëën laa reeman. 20 Në chi bagüjt reeman Esteban, bén gunee xtiidxil, laagajc naj za' ni rën zagdx naj guiëtaman abi' xt gunan xab ree bén bagüjt laaman." 21 Per na Dad Jesús lon: "Wej, naj gaxhal lüj zijt loj ree bén ad najt bén Israel."

Badxe' reeman Pab lod yu' ree suldad

22 Xt quintzi naga'loj bacaagdiajg reeman ni rëb Pab dxel guzuloj gurixdiaj reeman rëb reeman:

—¡Ad rayalt guiban xin guin! ¡Gol bagüjtix!

23 Abi' guial cabixdiajz cabixdiaj reeman, ruzaal xab reeman niz ladia ruzaal tëë reeman yuj niz ladia. 24 Dxel gunabee suldad rniabee guin cu' reeman Pab lod yu' ree suldad abi' gunabeex qui'n reex laaman din yaneero'man chexc zeel rbixdiaj ree bén guin zian contr laaman. 25 Per chi guxhii reex Pab din quin reex laaman, rëbaman loj tijb ree suldad rniabee za' ni:

—¿Zajc quindi tijb bén Rom ya, chi gadidi gagbee xhie beenman?

26 Chi biguiejn suldad rniabee guin zian, dxel bicojnx suldad rniabee ree suldad guin, rëbix lojx:

—Gojp cudad ni güünnël xin guin, din xin Roman.

27 Dxel wej suldad rniabee guin lod za' Pab, abi' gunabdiidxix lojman rëbix:

—¿Walin ya xin Rom lüj?

Badxi' Paban rëbaman:

—Walican.

28 Abi' rëb suldad rniabee guin lojman:

—Naj zro' milia gudixan par gacan xin Rom.

Abi' badxi' Paban rëbaman:

—Per naj diizd goolan najn bén Rom.

29 Chi biguiejn ree suldad niguin Pab, guial bén Rom najman, laa bisüd gajc reex. Xt në suldad rniabee guin bidxeb chi gogbeex guial ben Rom naj Pab guial gunabeex guxhii reex laaman.

Bazuj reeman Pab loj ree guxtis

30 Chi bareguiaal, guyën suldad rniabee guin niagbeechaawix chexc zeel za' ree bén Israel contr Pab. Abi' baxhiequix Pab, dxel gunabeex bado'p ree bixhioz rniabee ree bixhioz në ree guxtis. Abi' babëex Pab bazujx laaman loj gra reeman.

23

1 Baguiaa Pab loj ree guxtis guin, abi' rëbaman:

—Compniar Israel, loj guidib ni nabanen xt yan, achet naladnan delant loj Dios din naj ragbee xhienaag nabanen.

2 Dxel Ananías, bixhioz mazri zobbloj rniabee graczi ree bixhioz, gunabee-man bën za' ree gajxh cwë' Pab din ca'p reeman ro'man. 3 Per badxi' Paban rëbaman loj bixhioz guin:

—iZiangajc ca'p Dios ro'l, bën rusquiee! ¿Id zobbil yagaj ya par güünl guialguxtis zi'c rniabee ley? Abi' ¿chexquiza zeel rüjn zi'c ad rniabeet ley, rniabeel ca'p reeman ro'n?

4 Abi' ree bën za' yagaj rëb reeman lojman:

—¿Zian rusaglojl xbixhioz zobbloj Dios ya?

5 Dxel rëb Pab:

—Gol been pardon, ad gogbeetan guial laaman naj bixhioz mazri zobbloj. Din loj xtiidx Dios rëb: “Ad gusaglojl bën rniabee ladxil.”

6 Chi gogbee Pab guial garol reeman naj bénsaducew za garol reeman naj bënfarisew, dxel guneeman rejs rëbaman:

—Naj naj bënfarisew, xi'n bënfarisew naj. Abi' guial rliadnan yaban ree bengüt zeel za' ree bejn contr naj.

7 Chi rëbaman zian, guzuloj cadildiidx ree bënfarisew con ree bénsaducew abi' gojc reeman tio'p lala'. 8 Din bénsaducew ree ad rliadnt reeman guial yaban ree bengüt, ad rliadx tët reeman guial yu' ree anjl në ree sprijt, per ree bënfarisew rliadnx reeman gra ree ni guin. 9 Abi' been reeman naquie' yagaj. Dxel guzuli bëlzi ree bënfarisew naj mextr rulüü ley, rëb reeman:

—Achet ni mal wayüjn bën guie. Wed tijb sprijt o tijb anjl gune laaman, gol gojp cudad ad niad contr Diosan nadxu' ree.

10 Chi baguiaa suldad rniabee guin mazri cadildiidx reeman, dxel bidxebix nuroox reeman Pab. Abi' gunabeex bi't ree suldad din yabëë reex laaman galay ree bën guin, chinë tëë reex laaman lod yu' ree suldad stijb.

11 Chi gure guiaal stijb, balüüloj Jesucrist loj Pab, rëbaman lojman:

—Bagu' luxdool Pab, din zi'c guneel por naj luguiedx Jerusalén guie, ziangajc guinieel por naj luguiedx Rom.

Been reeman xgab gugüjt reeman Pab

12 Chi bareguiaal, garol ree bën Israel baya'n reeman diidx din gugüjt reeman Pab, rëb tëë reeman guial achet gaw reeman achet tët guie' reeman xt gugüjt reeman laaman. 13 Nadëd tiuu naj ree bën rëb zian. 14 Abi' wej reeman bigneenë reeman bixhioz ree bën rniabee ree bixhioz në ree xhengol ree bën Israel, rëb reeman loj reeman:

—Dunujn ma raguie'ch guial achetdzi yadaawan xt chi ma bagüjtan Pab.

15 Yan lëjt con gra ree guxtis, gol gunab loj suldad rniabee guin din guidnëx laax lojdi guixie, con gol badxiib guijc guial rëndi gagbeechaawidi xhienaag naj xcwentix. Abi' dunujn ma yadxu'sinan din yagüjtan laax chi gadix gui't guie.

16 Per xi'ngaan bizan Pab biguiejnx guial cayëb reeman zian, dxel wejx lod yu' ree suldad bicojnx Pab. 17 Zianz gune Pab tijb ree suldad rniabee guin, rëbaman lojx:

—Binësi' xin guie loj suldad rniabee din gudëëx tijb ruson lojman.

18 Binë xin suldad guin laax loj suldad rniabee guin, rëbix lojx:

—Pab, xin yu' ladxguuib guredx naj abi' gunabix guidnë'n xin guie lojl din guneex tijb ruson lojl.

¹⁹ Abi' sultad rniabee guin gunaazix yaa xin guin, binëx laax tblad, gunabdiidix lojx rëbix:

—¿Xhie rën! nal lon?

²⁰ Abi' rëb xin guin lojx:

—Bén Israel ree ma baya'n reeman diidx din guiniab reeman lojl guixie din chinël Pab loj ree guxtis, con gudxiib reeman guijc guial rën reeman gagbeechaaw reeman xhienaag naj xcwentaman. ²¹ Per ad bal chililadxil laa reeman, din nadëd tiuu naj ree bën cwëz laaman guquie'chloj reeman lunejz, abi' ma rëb reeman guial achet gaw reeman ache tëët guié' reeman xt gugÿjt reeman laaman. Yan za'sin reeman cabëz reeman ni guiëbil.

²² Dxel rëb sultad guin loj xin guin:

—Baguij. Achu loj guiëbil ni ma nal lon.

Guxhaal reeman Pab loj gobernador Félix

²³ Dxel guneë sultad rniabee guin tio'p ree xsuldadix, abi' gunabeex laa reex din güün reex porvinid tio'p gayuu sultad che guia', në za gayojnchii ree sultad cwib way, zatio'p gayuu ree sultad tia' lans din che reex Cesarea raca gaa guxhin. ²⁴ Abi' gunabee tëëx güün reex porvinid way cwib Pab, rëbix loj reex guial guinia reex Pab din guidxinman zagdxë loj gobernador Félix.

²⁵ Abi' guxhaalnëx laa reex tijb gui'ch ni rëb:

²⁶ “Naj Claudio Lisias, rugajpdiozan lÿj gobernador Félix, lÿj guial najl bën zobjloj. ²⁷ Bén Israel ree gunaaz xin guie ma nugÿjt reeman laax. Per chi gogbeen guial xin Roman, dxel wan con ree da suldadan buglëen laax loj reeman. ²⁸ Abi' guial rënan gagbeen xhie rÿjn x zeel rdxe'ch reeman laax, dxel bazun laax loj ree guxtis Israel. ²⁹ Dxel gogbeen guial por xcwent xley reeman zeel rdxe'ch reeman laax, per ad najtan ni rayal guiëtix ni'qui guial chu'x ladxguuib. ³⁰ Në guial ma gogbeen guial xixgab ree bën Israel naj gugÿjt reeman laax, zeel cayxhalan laax lojl. Abi' ma rën loj ree bën rdxe'ch laax guial con lÿj güün reeman reglad ni rajp reeman contr laax. Laanan rugojnan lÿj.”

³¹ Been ree sultad guin zi'c gunabee sultad rniabee guin abi' guxhin binë reex Pab luguiedx Antípatris. ³² Chi bareguiaal sultad zë ree guia' bayejc reex lod yu' ree sultad, guiáad ree sultad dxiib way zinë reex laaman luguiedx Cesarea. ³³ Chi bidxin reex Cesarea, badëed reex gui'ch guin loj gobernador guin, bayü tëë reex Pab lojman. ³⁴ Chi gulox biil gobernador guin gui'ch guin, gunabdiidixaman loj Pab ban zaman. Dxel chi gogbeeman guial Cilicia zëedaman, ³⁵ dxel rëbaman lojman:

—Chi gui't ree bën za' ree contr lÿj, dxel gucagdiagan ni nal.

Abi' gunabeeman gap reex Pab lën xpalas Herodes.

24

Ni guneë Pab loj gobernador Félix

¹ Chi goc gaay dxej, Ananías, bixhioz mazri zobjloj rniabee graczi ree bixhioz, bidxinman Cesarea con tio'p choon ree guxtis Israel në tijb licenciad laman Tértulo. Abi' wej reeman loj gobernador guin din cwe'c reeman xguialquia Pab. ² Chi bidxinnë reex Pab, guzuloj Tértulo caneeman contr laaman, rëbaman loj gobernador guin:

—Quixtëë lÿj dad gobernador, por lÿj nadxu'dxen, në por xguialrajquil zien ree ni rÿjn sirv cayajc du ladxan. ³ Gra ladczi za' ree bejn conform por gra ni cayÿjnl dad gobernador Félix, lÿj naj bën zobjloj, quixtëëczi lÿj.

4 Per chitëe günlaan lüj mazri, rniaaban lojl din gucaagdiajguil ni yanan lojl tibrajtoczi. 5 Dunujn bayagbeen xin guie naj zi'c tijb gualguijdx loj ree bën Israel, guidibczi guidxliuj zizax rustijlix laa reeman abi' laax rniabee loj tib cwaa ree bën rniee reeman nazaren. 6 Abi' guyën tëex nüjnx dux yadooro'n zi'c tijb luar ad rüjnt sirv, zeel banaazan laax bayënan naguieenan gualguxtis zi'c naj dux leyan. 7 Per laa bi't gajc suldad Lisias con ree xsuldadix, babëëxuu reex laax du lojn. 8 Abi' rëb suldad rniabee guin gual lojl gui't ree bën rbe'c xgualquia Pab, yan lüj gajc zajc guiniabdiidx lojx din gagbeel zagdxe gual walican ni ranan xcwentix.

9 Abi' ree bën Israel za' ni rëb reeman gual waliqi gra ni guin. 10 Dxel been gobernador guin sen loj Pab din guinieeman, abi' rëb Pab:

—Gual ragbeen diizd gocli rniabeel nacion Israel, zeel ad yu'nawëëgtan yadxi'n ni rudxiib reeman guican. 11 Abi' lüj gajc zajc cwe'quil rusion din gagbeel gual qui gojcri chiptio'p dxej badxinan Jerusalén din ganajchi'n Dios. 12 Abi' achut banaaznë reeman naj cadildiidxnë'n, ni'qui gual gabën wadijl lën yadooro' Jerusalén, ni'qui lën yadoo ren ree ni yu' ree ni, ni'qui luguiedx guin. 13 Bën guie ree ad zajct na reeman lojl gual ni diidxli naj ni rudxiib reeman guican. 14 Per ni naj diidxli naj gual rliladxan Jesucrist, nejzcüb guin naj ni zinaalan, cayünan sirv loj xDios dux bëngulalan, abi' na ree bën guie gual ad xnejzt Diosan, per cayünan zian gual rliladxan gra ni zëed loj ley në ni bacaa ree bën badëed xtiidx Dios loj ree bejn. 15 Abi' zi'cgajc rliladx ree bën guie Dios, ziangajc rliladxan laaman gual yaban ree bengüt stijb, zi'c ree bën goc benza'c në ree bën goc benmal. 16 Zeel rünan naguiejn gabajnan zagdxe chitëe xhie ganaladxan delant loj Dios ni'qui delant loj ree bejn.

17 'Ma gojc zien ijz nariin, xt yan baye'c ladxan bidganë'n ni baxhaal ree bejn par ree bënprob, bidganë' tëen gon ni rayal gudëdan loj Dios. 18 Laan naj ni cayünan lën yadooro' Jerusalén chi bi't ree bën Israel za niz Asia baguiaa reeman naj, per mal benan zi'c rniabee ley din gacan naya. Abi' ad zient bejn riga', ad cabë tëetan wadijl. 19 Yan, bën gunaaz ree naj, laa reeman naj bën rayal su guie din na reeman xhie rünan xhie pornin rdxe'ch reeman naj. 20 O balguiza, bën za' ree guie na reeman xhie da dolan badxejl reeman chi guzun loj gra ree guxtis Israel. 21 Tijbzi ni benan chi za'n galay reeman gurixdiajn rën: “Gual rliladxan yaban ree bengüt, zeel za' ree bejn contr naj yan.”

22 Chi biguiejn gobernador Félix zian, abi' gual ragbeeman xhienaag naj xnejz cüb Jesucrist, dxel basa'nman gualquia guin par stijb dxej, rëbaman loj reeman:

—Chi gui't suldad Lisias, dxel gagbeen zagdxe xhienaag naj xcwentidi.

23 Dxel gunabee gobernador guin tijb ree suldad rniabee guin din gusnuu guinia reex Pab, per guslaa reex güünman ni rënman ad gudxoon tëe reex chignaj ree xmiwaman laaman.

24 Chi goc tio'p choon dxej, bidxin gobernador Félix stijb con lacheelaman Drusila, laaman naj bën Israel. Dxel gunabee gobernador guin bidxin Pab, abi' bacaagdiajg reeman ni rëbaman xcwent gualrliladx bejn Jesucrist. 25 Per chi guzuloj cayëbaman gual rayal guiban ree bejn xnejz, gucwëez tëe xixgab mal reeman, gual guidxin tëe dxej yadëed ree bejn cwent loj Dios, dxel dád bidxeb gobernador guin abi' rëbaman loj Pab:

—Baguiaj. Ganetan lüj chi chu'n luar stijb.

26 Per Félix në milian rbëzaman gudëed Pab lojman din guslaaman laaman, zeel gurejdxaman laaman zien volt din guinieenëman laaman. 27 Zian gudëd

tio'p ijj abi' barii Félix guial gobernador, dxel bayu Porcio Festo xluaraman. Abi' guial guyèn Félix naya'nman zagdxe loj ree bèn Israel, zeel basa'nman Pab ladxguuib.

25

Gunee Pab loj Festo

¹ Chi goc choon dxej ni bidxin Festo Cesarea par chu'man guial gobernador, dxel wejman Jerusalén. ² Yagaj, bixhioz rniabee ree bixhioz con ree bèn Israel mazri zojbloj, wej reeman lojman bile'c reeman xguialquia Pab, ³ abi' gunab reeman lojman din guixhiaalaman Pab Jerusalén. Zian guyèn reeman din xixgab reeman naj gugijt reeman Pab runejz. ⁴ Per badxi' Festo xtiidx reeman rëbaman guial Cesarea nayaaw Pab guiáad laaman nayob yaguijman ni, ⁵ abi' rëbaman loj reeman:

—Bén rajp ree guialrniabee lojdi, laa reeman sa Cesarea, abi' bal xhie ni mal been xin guin, ni na reeman xhienin beenx.

⁶ Cost xhujn o chii dxej guzuj Festo Jerusalén, dxelri ziaman Cesarea. Chi bareguiaal, gurej loj xyagxhilaman lod rniabeeman, abi' gunabeeman chica' reex Pab. ⁷ Chi bidxinnë reex laaman, bèn Israel gaza ree Jerusalén, gubig reeman abi' zien ree niguijdx badxiib reeman guijcaman, majsi ni'qui tijb ni rëb reeman ad gojct nulüü reeman guial najn ni wali. ⁸ Dxel badxi' Pab xtiidx reeman, rëbaman:

—Naj, achet ni mal wayünan xley ree bèn Israel, ni'qui yadooro' Jerusalén, ni'qui rey César.

⁹ Per Festo guyènman naya'nman zagdxe loj ree bèn Israel, dxel gunabdiidxaman loj Pab, rëbaman:

—¿Rënl ya chel Jerusalén? Ni yanajn bal rajpil dol o ad rajtil dol ya ni rudxiib reeman guijquil.

¹⁰ Badxi' Paban rëbaman:

—Loj ree guxtis Roman za'n, lod rayal gac reglad xhienin benan. Lÿj ragbee zagdxe guial achet ni mal wayünan bèn Israel ree. ¹¹ Bal xhie tijb ni mal benan ni rayal guiëtan, ad zabexuutan guiëtan. Per bal id wali ni na reeman benan, achut rajp derejch yayü naj loj reeman. Zagdxe ni naj gadëëdan loj rey César.

¹² Dxel chi gulox guneenë Festo bèn naj ree xbejnman, bèn rëb ree ni rayal gac, rëbaman loj Pab:

—Lÿj na tëdil loj rey César, yan lojman tëdil.

Za' Pab loj rey Agripa

¹³ Chi gudëd tio'p choon dxej, rey Agripa con xbéngunaaman Berenice bidxin reeman Cesarea bitixloj reeman gobernador Festo. ¹⁴ Abi' guial zien dxej da't guzuj reeman ni, dxel be Festo diidx loj rey Agripa xcwent Pab, rëbaman:

—Guie yu' tijb xin basa'n Félix ladxguuib. ¹⁵ Chi wan Jerusalén, bixhioz rniabee ree bixhioz con ree bèn rniabee loj ree bèn Israel gule'c reeman xguialquiax, gunab reeman ganabeen guiëtit. ¹⁶ Per naj rën loj reeman guial guxtis Rom ree ad najt xcostumbr reeman nabee reeman guiët tijb bejn chi gadaman su loj ree bèn cabe'c xguialquiaman din guiëbaman walin ya o ad walitan ni rudxiib reeman guijcaman. ¹⁷ Zeel chi bi't ree bèn Israel guin guie, achet guial niaglaan, bareguiaal gajc gure loj da yagxhilan, abi' gunabeen bidnë reex xin guin. ¹⁸ Per ree bèn bi't gule'c xguialquiax, achet ni nadxeb na reeman zi'c gunaladxan ninia reeman por laax. ¹⁹ Tijbzi xguialquiax ni

gule'c reeman naj por xcostumbr reeman në por tijb bën la Jesús, bën ma güjt, per Pab rëb naban Jesús guin. ²⁰ Abi' guial ad ragbeetan xhie gūnan por zian, dxel gunabdiidxan loj Pab bal rēnx chex Jerusalén din gac reglad ni guin ree ni. ²¹ Per laax gunab tēd loj rey César din gac reglad ni rëb reeman por laax, zeel gunabeen yaawsix xt chile' yaxhalan laax loj rey César.

²² Dxel rëb rey Agripa loj Festo:

—Bal zian chile'n, nēgajc naj rēn gucagdiag laax.

Abi' badxi' Festo laan rëbaman:

—Guixie gucaagdiaguil laax.

²³ Chi bareguiaal, dád zagdxē ca' xab rey Agripa con Berenice bidxin reeman con ree bēn rniabee sultad con los demazri ree bēn zojbloy luguedx guin, bidxin reeman guyu reeman lēnū lod gucaagdiagj reeman ni guieb Pab. Dxel gunabee Festo bica' reex Pab. ²⁴ Abi' rëb Festo:

—Rey Agripa në los demazridi dad za'nēdi dunujn guie. Bēn ruguiaadi guie, gra bēn Israel, zi'c Jerusalén zi'cgajc guie ma bi't reeman bidganaj reeman naj rniab reeman guiētix. ²⁵ Naj, achet xfaltix radxejlan guial rayal guiētix. Guiaad laax gunab tēd loj César Augusto lod gac reglad xcwentix, abi' ma benan xgab yaxhalan laax. ²⁶ Per ad radxejltan ni gucan por laax loj gui'ch ni yaxhalan loj rey César, bēn rniabee naj. Zeel nuzun laax lojdi zi'c naj quijb lojl rey Agripa, din chi ma gulox gunabdiidxidi ni rayal guiniabdiidxidi lojx dxel ma yu' ni gucan por laax. ²⁷ Din naj rullū ad xnejzt naj yaxhalan tijb bēn yu' ladxguiib loj rey César abi' ad zētān xhie beenman.

26

Ni gunee Pab loj rey Agripa

¹ Dxel rëb rey Agripa loj Pab:

—Ma zajc guinieel por lūj.

Abi' gules yaa Pab guzuloj rëbaman:

² —Dád nix yu' luxdon guial bile' za'n lojl yan rey Agripa, par ganen lojl yadxi' tēēn gra ni rudxiib ree bēn Israel guican. ³ Din lūj ragbee zagdxē gra xcostumbr ree bēn Israel, në conin rūjn persi rdildiidx reeman. Zeel rniabān lojl gapil pasens gucaagdiaguil ni ganin.

Zi'c guban Pab gocli

⁴ Gra ree bēn Israel ragbee xhiēnaag gubajnan con laa reeman zi'c ladxan zi'c Jerusalén, diidz xindoon. ⁵ Ragbee tēē reeman abi' zajc na reeman laan bal rēn reeman, guial diidz xindoon najn bēnfarisew, abi' ree bēnfarisew naj bēn mazri zinal xley ree bēn Israel. ⁶ Abi' yan za'n guie, badēēd reeman naj loj ree guxtis guial rliladxan yasban Dios bengüt ree zi'c beenman promejs loj ree dux bēngulal ree. ⁷ Gra guidxiptio'p cwa' ree bēn Israel cabēz dxej güūn Dios zian, zeel rēn reeman laaman rūjn tēē reeman sirv lojman dxej guiaal. Abi' yan guial rliladxan laan zeel rbe'c ree bēn Israel da guialquian, rey Agripa. ⁸ ¿O naladxidi ya nawēēg yasban Dios bengüt ree?

Be Pab diidx xhiēnaag guzunalaman bēn rliladx ree Jesucrist

⁹ Guia'xchej benan xgab rayal gūnan xhienin bēn rliladx ree Jesús, bēn Nazaret, ¹⁰ abi' zian benan Jerusalén. Con xtiidx ree bixhioz rniabee ree bixhioz, zien ree bēn rliladx Jesucrist badxe'n ladxguiib. Abi' chi rugüt reeman laa reeman, në naj rē guiētri reeman. ¹¹ Zien volt benan laa reeman xhienin din gūnan nagueijn gusa'n reeman guialrliladx reeman Jesucrist.

Zian benan lën gra ree yadoo, abi' guial tant rdxe'chan laa reeman dxel guzunaalan laa reeman xt luguiedx ren ree.

Be Pab diidx stijb xhienaag bililadxaman Jesucrist
(Hch. 9:1-19; 22:6-16)

¹² 'Abi' par zian za'n Damasco, con quijb xtiidx ree bixhioz rniabee ree bixhioz. ¹³ Per ganin lüj rey Agripa, lunejz baguian tijb xbacha' xanyabaa zi'c garol dxej, per mazri naynin guial loj ni rusni gubijdx, abi' basnin guidib lod za'n con ree bën zin'é'n. ¹⁴ Abi' dugraczan bareeyuj, dxel biguiejnan cha' bën gunee naj con diidx hebreo, naman: "Saulo, Saulo, ¿chexc zeel rzunalil naj? Lüj gajc rguuil xguialnaal zi'c go'n rudxegua' loj yag rulaagnè reeman laab." ¹⁵ Dxel rën: "¿Chu lüj Dad?" Badxi'man laan naman: "Naj naj Jesús bën rzunalil. ¹⁶ Per bixche, guzuli, din balülön lojl par güünl naj sirv gü tēēl diidx ni baguiaal yan nē ni gulün lojl. ¹⁷ Naj gaxhal lüj loj ree bën Israel nē loj ree bën ad najt bën Israel, abi' naj gagnè' lüj chitēē xhie güün reeman lüj. ¹⁸ Gaxhalan lüj loj reeman din guixhialil loj reeman gusa'n reeman nejz mal, chinal reeman nejz zagdx. Ad tiēbri reeman nabee xindxab laa reeman, chinal tēē reeman xnejz Dios. Abi' chililadx reeman naj din gac xtol reeman perdon yayal tēē reeman ni rayal gra ree xbejn Dios, bën ma naya ree delant lojman."

Bazooob Pab diidx ni balüüloj lojman

¹⁹ 'Zian gojc, rey Agripa, bazoban diidx benan ni na Jesucrist lon chi gunee-man naj diidx xanyabaa. ²⁰ Yaløj luguiedx Damasco gutiechan xtiidxaman, dxelri Jerusalén nē guidib niz Judea nē loj ree bën ad najt bën Israel. Rën loj reeman din yaytijn reeman xgab por xtol reeman, rladxi' loj reeman loj Dios güün tēē reeman ni rayal güün reeman din guiguien guial ma bidxaa mod naban reeman. ²¹ Abi' por zian, gunaaz ree bën Israel naj lën yadooro' Jerusalén, guyën reeman nugüjt reeman naj. ²² Per con xyudar Dios laa naj guie xt yan cusnuu cayün xtiidxaman loj gra ree bejn, zi'c ree bën zøjbloj zi'c ree bën ad zøjblojt. Abi' gra ni rën loj reeman naj ganax ni bacaa ree bën badēē xtiidx Dios loj ree bejn nē ni bacaa Moisejs xhienaag naj ni gac, ²³ guial Cristo naj guial tēdaman gualzi, guiētaman. Per chi ma güjtaman yaløj laaman naj bën yaban loj ree bengüt, abi' gugoijnman bën Israel ree nē ree bën ad najt bën Israel xhienaag gap reeman perdon.

Nuyën Pab nililadx Agripa Jesucrist

²⁴ Chi cayëb Pab zian, dxel gudidxa' Festo rëbaman:

—¡Rajcguijquil Pab! guial tant rusiidil ma rajc guijquil.

²⁵ Per badxi' Pab laan rëbaman:

—Ad guictan rajc, gobernador Festo. Ni canin najn xnejz nē diidxli. ²⁶ Laa rey Agripa za' guie, laaman ragbee ni canin, zeel sin guialrdxeb canen delant lojman. Naj ragbee chaaw guial laaman ragbee gra ni canin, din ad canitan ni goc ralan lod achut zajc gagbee laan. ²⁷ ¿Rililadxil ni rëb ree bën badēēd xtiidx Dios loj ree bejn ya, rey Agripa? Naj ragbee guial rladiladil.

²⁸ Dxel badxi' rey Agripa laan rëbaman:

—Sta'nczi nüjnl naj gan nililadxan Jesús.

²⁹ Abi' rëb Pab:

—Majsi sta'nz o majsi ryaadxri, na Dios guial ad tijbtzi lüj, nē gra ree bën cucaagdiajg ni canin yan, guidxin dxej chililadixidi Jesús zi'c naj, majsi ad nēt ree caden guie.

³⁰ Dxel bisu rey Agripa con gobernador Festo con Berenice në gra ree bën zojbnë laa reeman ni. ³¹ Chi bariica reeman tibladd guzuloj cayünë lasa' reeman diidx, rëb reeman:

—Achet wayüjn xin guie ni rayal guiëtix, o chu'x ladxguuib.

³² Dxel rëb rey Agripa loj Festo:

—Zile' naslaa reex, balidix niniab tëdix loj rey César.

27

Baxhaal reeman Pab Rom

¹ Chi rëb reeman ma yaxhaal reeman dunujn Italia, dxel bayü reeman Pab con sta'n ree bën yu' ladxguuib loj tijb suldad rniabee la Julio, laax rniabee tib cwaar ree suldad la Augusto. ² Abi' Cesarea badxu'n loj tijb xbarcw ree bën Adramitio, barcw ni ma grii chen guiedx riga' ree niz Asia. Në Aristarco bunë'n, bën Tesalónica, guiedx riga' niz Macedonia. ³ Chi bareguiaal, badxinan Sidón, lod goc Julio xinza'c da't con Pab, cwëjbix bitixloj ree xmiw Pab luguiedx guin abi' badëed reeman ni ryaadxaman. ⁴ Chi badxoon Sidón badiaawan Chipre yuj riga' loj nijsdoo, basa'nanan dux ladruvejsan chitëe yachaaglojn zro' bi, din niz du lojn rliaj bi guin. ⁵ Badüüdan loj nijsdoo gajxh Cilicia në Panfilia abi' badxinan Mira, tijb guiedx nulen Licia.

⁶ Ni bidxaagloj suldad rniabee guin tijb barcw Alejandria ni che Italia, zianz nax yadxu'n lojn. ⁷ Loj zien dxej bio'n chaawladx, con guidib tarbajw badxinan niz lod la Gnido. Abi' guial sta rliaj bi niz du lojn, dxel zagdxeli badüüdan niz Salmón, badiaawan lod la Creta yuj riga' loj nijsdoo. ⁸ Gadëd ro' yuj guin zio'n loj nijsdoo, per con guidib tarbajw, xt badxinan tijb luar la Buenos Puertos, gajxh niz lod naj guiedx la Lasea.

⁹ Abi' zi'ct ma bayaglaan, ma naj nadxeb yasnuu yo'n loj nijsdoo, din ma zidyob tiamp nayaag. Zeel gunee Pab, ¹⁰ rëbaman loj reeman:

—Dad, ad zagdxet yo' ree bal yasnuu yo' ree, din nadxeb guize'n barcw guin abi' guire'ch gra ni yu' lojn loj nijs guin, xt në dunuj ree nadxeb yayëjt ree.

¹¹ Per suldad rniabee guin mazri beencwentix bën rusa barcw guin në bën naj xbarcw laan, guial loj ni rëb Pab. ¹² Abi' guial ad zagdxë tëet naj yagaj par yadüüdan tiamp nayaag, dxel mazri zien reeman been xgab zagdxeli naj yariin yagaj, yagüieenan naguiejn yadxinan Fenice, tijb guiedx nulen Creta lod ad rbi' tëet bi, ni yadüüdan tiamp nayaag.

Gubi' tijb bidoxh loj nijsdoo

¹³ Dxel guzuloj cabi' tijb bi chaawladx ni zëed lad sur, abi' gunaladx reeman ma bile' zi'c naj xixgab reeman, zeel bariin bio'n loj nijsdoo gadëd ro' yuj Creta. ¹⁴ Per ad wayajct xchej zio'n chi birii tijb bidoxh la Euroclidón loj nijs guin. ¹⁵ Abi' guzuloj bi guin culadxaan barcw guin. Në guial niz du lojn zëed bi guin dxel ad gojctri nusnuu barcw guin niejn niz lod rayal niejn, abi' baslaa reeman binë barcw guin dunujn niz lod cucadxa bi guin laan. ¹⁶ Dxel badüüdan xijch tijb yujdobëz la Clauda riga'n loj nijs, lod ad rbi'tri bidoxh guin, abi' canu naxii xan barcw guin con guidib tarbajw balë'panan loj barcw guin. ¹⁷ Dxel chi gulox balë'pan canu guin loj barcw guin, batiejl reeman duu lad barcw guin chitëe yaze'nan. Abi' guial rdxeb reeman chëëztiej barcw guin lën üx la Sirte, dxel gulet reeman xlon ree barcw guin din cwentzi chinë barcw guin dunujn niz lod rucadxa bi guin laan. ¹⁸ Chi bareguiaal, ziangajc rbi' bidoxh loj nijs guin, zianz guzuloj cuzaal reeman ni nüü barcw guin loj nijs guin. ¹⁹ Ni bayon dxej, cwa' reeman gra

ree ni rüjnnë barcw guin dxiin bazaal reeman loj nijs guin. ²⁰ Zien dxej ad biguient gubijdx ni'qui ree bajl xanyabaa por bidoxh gubi' loj nijs guin, dxel dunujn ad naguientri du luxdoon yalaan loj nijs guin.

²¹ Abi' guial ma gojc zien dxej ni achetczi wadaawan, dxel guzuli Pab galay reeman, rëbaman:

—Dad, zagdxeli nucaagdiajguidi da diidxan ad nariit ree Creta, zian ad nadüüdt ree tarbajw guie achet tēet nasēēb ree. ²² Per achet güünan, ad rdxebidi din ni'qui tijbidi ad zējtt, tijbzi barcw guin yaze'n. ²³ Din Dios rniabee naj, bën cayūnan sirv guxhaal tijb xi anjlaman balüüloj lon yan guiaal. ²⁴ Abi' na anjl guin lon: “Pab, ad rdxebil, din rayal sul loj rey César, abi' por lüj ni'qui tijb ree bën zēēd loj barcw guie ad zuslaat Dios guiēt reeman.”

²⁵ Zeel yan dad, gol badxe' luxdoodi zagdxē, din naj rlliladxan Dios, ragbee tēēn zagdxē guial gac zi'c na anjl guin lon. ²⁶ Per gag barcw guie niz ro' tijb yuj riga' loj nijsdoo.

²⁷ Chi goc chiin gubijdx ni zio'n loj nijs guin, guxhinzii badxinan niz loj nijsdoo la Adriatico, nız ni niz guie zē barcw guin loj nijs guin por bi guin. Abi' ree bën nulen barcw guin, guxhinzii zi'ct garol guiaal gogbee reeman guial zamer yadxinan loj yuj. ²⁸ Dxel bare'xh reeman plact naxhit nijs guin, najn zi'ctiubitib mejtr naxhit. Mazri delant bare'xh reeman laan zatijb ma najn gajlbiadx mejtr naxhit. ²⁹ Abi' bidxeb reeman laro' barcw guin guiaj ree, dxel niz xijch barcw guin bazaal reeman tajp ganch guuib loj nijs guin din chile' sudxe barcw guin, abi' ma rēn nejzdo reeman yareguiaal. ³⁰ Bën nulen ree barcw guin, been reeman bën sta cuzaal ree ganch guuib guin loj nijs guin niz loj barcw guin, naabzi par calet reeman canu chu' reeman par guxüün reeman. ³¹ Per bagojn Pab suldad rniabee con ree xsuldadix, rëbaman loj reex:

—Bal id ree bën guin yaya'n loj barcw guie, ad zalaatridi.

³² Dxel batüüg ree suldad guin ni naxii canu guin persi zinē nijs canu guin. ³³ Chi ma cayni luyuj, rëb Pab loj reeman din gaw reeman, rëbaman loj reeman:

—Ma gojc chiin gubijdx ni ad raayjstidi achet tēet wayawidi. ³⁴ Naj rni lējt, gol gudaw din guibandı, din gradi ni'qui tijb guidxguijguidi ad zusēēbtidi.

³⁵ Chi rëb Pab zian, cwa'man tijb guiadxtıl, abi' badēēman quixtēē loj Dios niz loj gra reeman, dxel gula'man guiadxtıl guin guzuloj cayawaman. ³⁶ Dxel bayu luxdoo gra reeman, guzuloj nēgajc laa reeman cayaw. ³⁷ Tio'pgayuu gayojnchiibixho'p nayajc dugran zio'pan loj barcw guin. ³⁸ Chi gulox gudaw reeman xt bixienladx reeman, dxel bazaal reeman trigo loj nijs guin persi bacha barcw guin.

Bize'n barcw loj nijsdoo

³⁹ Chi bareguiaal, bën nulen ree barcw guin, ad bayünbeet reeman yuj badxin reeman. Per baguiaa reeman tıbda'n nijsdoo guin riga' üx gadēēd ro'n, abi' been reeman xgab badxig reeman barcw guin yagaj. ⁴⁰ Dxel batüüg reeman ni naxiinē ree ganch guuib guin ni rüjn yudar par sudxe barcw guin loj nijs, basa'n reeman ganch guin ree loj nijs guin, abi' baxhiec reeman yag ni rüjn yudar par sa barcw guin din suloj san. Dxel gules reeman lon ni naj niz lucwaj barcw guin din guiniaazan bi, zianz guzuloj cayriica barcw guin niz ro' nijs guin. ⁴¹ Per wēēztiejn loj üx zien lod bigagan. Niz guijcan wēēz lēn üx abi' ni'quid rniibtan, guiáad niz xan guin guzuloj cayze'nan con gojl rliaj nijs guin ladan. ⁴² Dxel nuyēn ree suldad guin nugüjt reex bën prejs guin ree, chitēē nixoojnijs reeman abi' nuxüün reeman. ⁴³ Per suldad rniabee guin

ad cwëjbtix niajc zian guial ad rëntix niëjt Pab, dxel gunabeex guial bén rajc rxoobnijs ree, yaløj laa reeman chu' loj nijs guin güün reeman nagueijn yarii reeman ro' nijs guin. ⁴⁴Dxelri ma guidnal gra reeman loj ree tabl o loj ree yag ni baze'n barcw guin. Zian balaan, dugran badxin ro' nijs guin.

28

Bidxin Pab Malta

¹ Chi gulox barii dugran lon nijs guin, dxel bayagbeen yuj lod badxinan lan Malta riga'n galay nijs. ² Bén naj ree bén ni, dád benza'c gojc reeman con dunujn. Been reeman tijb bajl guial nayaag nētēē guial cayal guia, abi' na reeman du lojn din yubiigan cwë' bajl guin. ³ Dxel bato'p Pab ta'n yagbidx, zianz chi cudxe'man laan loj bajl guin briyaal tijb bël lēn yag guin por xi xliaa bajl guin, abi' gudawya'b yaa Pab nalbëztib yaaman. ⁴ Chi baguiaa ree bén Malta guin nalbëz bëël guin yaa Pab, dxel rëb loj lasa' reeman:

—Xin guie bejn bagüjtix, zeel majsi gulaax loj nijsdoo, per guiëtczix por ni beenx.

⁵ Per gudxijp yaa Pab abi' białb bëël guin loj bajl guin, guiáad laaman achet gocaman. ⁶ Gra reeman cabëz saaguıj yaaman, o dxejlczı yabaman guiëtaman. Per chi gojc xchej, chi baguiaa reeman achet gocaman, bachaa xıxgab reeman abi' guzuloj rëb reeman guial tijb dios najman.

⁷ Gajxh lod badxu'n naga' ree xguidxliuj tijb bén zobjloj loj yuj riga' loj nijs guin, laman Publio. Naman du lojn yo'n lidxaman, ni badxu'n choon dxej, dád benza'c tēē gojcaman con dunujn. ⁸ Nadxel naga' xdadaman, ragxuuman, yu'man xliaa rajc tēēman yoobrejn. Abi' guyu Pab lod naga'man, zianz chi gulox gurejdx gunabaman Dios por laaman, dxel guxhoob yaaman guıjcaman abi' bayajcaman. ⁹ Chi gogbee ree bénragxuu zobj ni ni goc, bi't reeman lod za' Pab persi bayüjnman laa reeman. ¹⁰ Dxel dád zien ni bazaladx reeman du lojn por zian. Abi' chi badxu'n loj barcw par yadxoon yagaj, banee reeman gra ni rayaadxan lunejz.

Bidxin Pab Rom

¹¹ Choon bëēw badxu'n loj yuj zii, dxelri badxu'n loj tijb barcw Alejandría, ni bitéd ni tiamp nayaag. Nız lucwaj barcw guin ca tio'p ree dxan bén la ree Cástor nē Pólux. ¹² Dxel badxinan tijb guiedx la Siracusa, yagaj badxu'n choon dxej. ¹³ Abi' yagaj badxoon bio'n gadéd ro' nijsdoo xt badxinan guiedx la Regio. Chi bareguiaal, chi badxoon yagaj, brii tijb bi lad sur dxel ni barojp dxej badxinan luguiedx la Puteoli. ¹⁴ Yagaj badxaagan tio'p choon ree bén naj ree bén ni nē reeman rliladx Jesucrist, dxel na reeman du lojn yaya'nné'n laa reeman abi' baya'nné'n laa reeman toxman. Zian gojc, dxelri zio'n Rom. ¹⁵ Guiáad ree dux compniaran bén rliladx ree Jesucrist, bén zobj ree Rom, ma ragbee reeman guial yadxinan yagaj. Dxel brii reeman bidgachaagloj reeman dunujn xt lod la Foro de Apio nē luguiedx la Tres Tabernas. Chi baguiaa Pab laa reeman, babaaman abi' badēēman quixtēē loj Dios. ¹⁶ Chi badxinan Rom, dxel bayü suldad rniabee guin bén prejs guin ree loj tijb ree suldad rniabee ni. Per cwëjb reeman gurej Pab stijb yu ren lod gojp tijb suldad laaman.

Gunee Pab xtiidx Jesucrist Rom

¹⁷ Chi goc choon dxej badxinan Rom, gurejdx Pab bén Israel zobjloj ree ni. Chi badxajg lasa' reeman, dxel rëbaman loj reeman:

—Compniar Israel, achet wayünan contr ree bén Israel ni'qui contr xcostumbr ree dux béngulal ree. Guiáad laa reeman gunaaz reeman naj Jerusalén,

bayü reeman naj loj ree guxtis Rom. ¹⁸ Abi' ree bén Rom guin chi gulox badëdan cwent loj reeman, dxel nuyën reeman nuslaa reeman naj, guial gogbee reeman achet benan par guiëtan. ¹⁹ Per ree bén Israel guin badxoon reeman abi' zagdxeli gunaaban gadëëdan loj rey César, per ad guial ra'ptan xhienin contr ree bén Israel. ²⁰ Zeel guredxan lëjt, din guidganajdi naj din ganin lojdi guial por ni rliladxan guial yaban ree bengüt zi'cgajc rliladx gra ree du lasa' bén Israel ree, zeel naxiin con ree caden guie.

²¹ Dxel rëb reeman lojman:

—Dunuyn ni'qui tijb xtiidx ree bén Judea ad waca'tan lod na reeman xcwentil, në ni'qui tijb bén duladx ree bén raza ree Judea achet wana reeman du lojn contr lüj. ²² Per rayënan yaguieynan xhienaag naj xixgabil, din dunujn rayagbee guial gra ladcki rniee reeman contr religion cüb guin.

²³ Dxel bazuj reeman tijb dxej ni yadxajg lasa' reeman. Chi bidxin dxej guin, dád zien bejn bido'p lod zojb Pab. Abi' diizd rsil xt wadxë guneenëman laa reeman xhienaag naj xguialrniabee Dios. Beenman naguiejn chililadx reeman Jesús, baza't tëëman lod rniee xcwent Jesús loj xlibr ley Moisejs në ni bacaa ree bén badëë xtiidx Dios loj ree bejn. ²⁴ Yu' reeman bililadx ni rëb Pab, per yu' reeman ad bililadxt. ²⁵ Abi' guial ad rdxaagt gü reeman diidx, guzuloj bare'ch reeman. Dxel rëb Pab loj reeman:

—Waliqi ni rëb Isaías bén badëëd xtiidx Dios loj ree dux béngulal ree guial rëb xSprijt Dios:

²⁶ Wej, güjdx loj ree bén guin:

Majsi riguejn reeman, per achetcki chignia' reeman,
abi' majsi ruguiaa reeman, per rulüü ad ruguiaat reeman.

²⁷ Din been luxdoo reeman gojl,
abi' rüjn reeman zi'c rulüü ad ruguiaat reeman,
ad riguejn tëët reeman, chitëë guguiaa reeman,
abi' guien reeman chignia' tëë reeman.
Din ad rënt reeman gui't reeman con naj,
abi' gūnan laa reeman perdon.

²⁸ Zeel gol gogbee guial diizd yan, loj ree bén ad najt bén Israel guire'ch diidx xhienaag gap reeman xperdon Dios, abi' laa reeman zaliladx reeman diidx guin ree.

²⁹ Chi gulox rëb Pab zian, dxel zia ree bén Israel guin, cadildiidxnë lasa' reeman.

³⁰ Tio'p ijz gurej Pab ni, yu lod gudixaman. Ni rnieenëman gra ree bén rtixloj laaman. ³¹ Sin guialrdxeb rëbaman loj reeman xhienaag naj xguialrniabee Dios, abi' guneeman xtiidx Dad Jesucrist loj reeman sin guial chu nudxoon.

Gui'ch ni guxhaal San Pabl loj ree bén Rom rliladx Jesucrist

Rxhial San Pabl xtiidx Dios

¹ Naj Pab, cayünan sirv loj Jesucrist, Dios gule naj din gacan xi apóstol Jesucrist, din gatiechan xtiidxza'caman.

² Diizd gocli mal rëb Dios diidxza'c guin ree, ni zëed loj xtiidxaman zi'c bacaa ree bén badëë xtiidx Dios loj ree bejn, ³ diidx guin ree ruza't, dux Dad ree Jesucrist guial zi'c bi'taman loj guidxliuj zi'c bênguidxliuj, loj xdiaa rey Davi zaman. ⁴ Per por xSprijt Dios laaman naj Xi'n Dios guial babanman loj ree bengüt, abi' guidiblagaa rajpaman guialrniabee. ⁵ Abi' par yaza't reeman, zeel bacaabeeman naj din gacan apóstol din guidiblagaa guidxliuj chu' bén chililadx laaman, bén guzoob tëë xtiidxaman. ⁶ Abi' në lëjt ma nayab loj ree bén gule Dios din gaquidi xbejn Jesucrist.

⁷ Zeel caxhalan gui'ch guie lojdi bén rën ree Dios, bén zojb ree Rom, lëjt ma gulej Dios din gaquidi xbejnman. Dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rën Pab cheman Rom

⁸ Yalojxgaj por Jesucrist rudën quixtëë loj Dios por gradi, guial guidibczi ruza't reeman lëjt xhienaag rliladxidi Jesucrist. ⁹ Abi' zi'c cayünan sirv loj Dios, guidib guic guidib ladxan catiechan xtiidxza'c Xi'nman Jesucrist, abi' laaman ragbee guial ad rucwëëzt rbedx rniaaban laaman por lëjt. ¹⁰ Ad rucwëëz tëët rbedx rniaaban Dios din guneeaman mod guidganan lëjt, zi'c naj da xgaban diizd gocli. ¹¹ Din yu'czan gan guidganan lëjt din günan lëjt yudar con xtiidx Dios din sudxi'chidi lojn. ¹² Din güün tëëdi naj yudar zian yaguieen du lasa' ree yudar loj guialrliladx ni raya'p ree, din chile' yalu' du luxdoo du lasa' ree.

¹³ Compniar raliduladx ree Jesucrist, rënan gagbeedi guial zien volti da't ma benan xgab guidganan lëjt, din gacxhiey ree bén chililadx xtiidx Dios, zi'c ma gojc zien ree luar ni ma wan, per xt yan ad wayajct gan guidganan lëjt. ¹⁴ Par naj naladxan da cwentan naj guial gulün chutëëz benan xtiidx Dios, bal najman bén ciuda o najman bén guiedxdoo ya, bal rignia'man o ad rignia'taman. ¹⁵ Zeel rënnejzdoon guidganan lëjt din gatiechan xtiidx Dios Rom.

Xguialrniabee xtiidxza'c Dios

¹⁶ Ad ratunë'tan xtiidxza'c Jesucrist. Din por diidxza'c guin ree zëed xguialrniabee Dios, din gra ree bén chililadx laan laa reeman loj dol, zi'c ree bén Israel zi'c ree bén ad najt bén Israel. ¹⁷ Din por xtiidxza'c Jesucrist ragbee ree bejn guial por guialrliladx reeman laaman ma naj reeman cwent sin dol: achet por stijb ni ren tijbzi por guialrliladx. Zian ca loj xtiidx Dios lod rëb: "Bén naban zi'c rën Dios, guidib tiamp ni nabanman rliladxaman laaman."

Dol ni rajp bejn

¹⁸ Dunuj ree rayagbee guial diizd xanyabaa zëed xcastiro' Dios par ree bén ad ridxga't laaman, bén ad rüjnt ree zi'c rayal, abi' zi'c naban reeman ruquie'ch reeman xtiidxli Dios. ¹⁹ Din ragbeechaaw reeman guial yu' Dios, abi' laagajcaman balüü bejn ree guial yu'caman. ²⁰ Majs ad ruguiaat bejn

Dios, per diidz chi go'tchaaw guidxliuj raguiaa ree ni beenman, abi' por ni ma beenman rayagbee ree guial ad yu't dxej lox xguialrniabeeman abi' laa tèëman naj Dios. Zeel ad zajct xhie gudxiib bejn guijc guial achet ragbeeman xcwent Dios. ²¹ Din majsi yu' ree bejn ragbee guial yu' Dios, per ad rajpt reeman laaman respejt zi'c rayal, ad rudëë tèët reeman quixtëë lojman, aal xgab ren ree rüjn reeman ni ad rüjnt sirv abi' gaz ragdxa reeman. ²² Rëb reeman guial rajc da't reeman abi' mazri na tont reeman. ²³ Din luar guiën reeman Dios ni ad yu't dxej guiët, rën reeman ni nit ree yu' dxej, rën reeman ni naj ree zi'c bejn, ni naj ree zi'c biguijn, zi'c ree be yu' tajp guia' në ree bëël.

²⁴ Zeel ma gulëëladx Dios laa reeman loj xixgab mal reeman, abi' rüjn reeman ni natu ree con ree ben ren. ²⁵ Luar chinal reeman xdiidxli Dios, zinal reeman ni rusquiee ree. Abi' rën reeman rajp tèë reeman respejt ni been Dios, luar guiën reeman laaman guial beenman laa reen, abi' laaman rayal gap ree bejn respejt zianczi. Amën.

²⁶ Zeel gulëëladx Dios laa reeman loj ree ni dxuudx rüjn reeman. Abi' zien ree béngunaa ad nabantri ree xnejz, rën lasa' béngunaa gajc reeman. ²⁷ Ziangajc zien ree xinguaaaw ad nabantri xnejz, rën gajc lasa' xinguaaaw reex, xinguaaaw con xinguaaaw rüjn reex ni dxuudx, ni natu. Abi' laagajc reex rguuil xcasti reex.

²⁸ Abi' guial ad ridxga't reeman Dios, zeel gulëëladx Dios laa reeman loj xixgab mal reeman, din güün reeman ganax ni ad rayalt güün reeman. ²⁹ Ganax ni ad rayalt güün reeman rüjn reeman, za'në reeman xinguaaaw ren o béngunaa ren, zien ree ni mal rüjn reeman, rzëëbladx reeman gap reeman ni rajp ree ben ren. Dád nadëdloj reeman, rugüjt reeman bejn, rguuil reeman wadijl, rusquiee reeman bejn, ganaxczi ni mal yu'guijc reeman abi' rbëë reeman xtiidxguijdx bejn. ³⁰ Rnieeguijdx tèë reeman bejn, ralen reeman Dios, ad rajpt reeman bejn respejt, rliës xvalor gajc reeman, rüjn reeman benro'. Abi' rbëëguijc reeman ni mal ree, ad ruzoob tèët xtiidx xdad xniala reeman. ³¹ Dád nad reeman, ad rüjnt cumplid xtiidx reeman, ad rënt lasa' reeman, ad raya tèët lasa' reeman. ³² Ragbeechaaw reeman rëb Dios guial chi guiët ree bejn, dxel gra ree bèn rüjn gra ree ni guin yayal casti. Per majsi zian, rusnuu gajc rüjn reeman ni mal guin ree abi' xt rabaa reeman chi rüjn ree ben ren zian.

2

Xguialguxtis Dios

¹ Zeel chutëëz lüj guial rëbil xhie casti rayal bejn, ad rajptil derejch guiëbil zian, din lüj gajc rayal casti guin guial cayüjnl zi'cgajc rüjn reeman. ² Per dunuj ree rayagbee guial Dios rüjn guialguxtis zi'c rayal, chi rudëëdaman casti bèn rüjn ree ni mal guin. ³ Abi' lüj guial rëbil xhie casti rayal bejn abi' nëgajquiza lüj rüjn zi'c rüjn reeman, ad naladxil laal loj xcasti Dios. ⁴ Ad rëntil guialnaza'c Dios con lüj, ad rëntil guial rdaanman lüj rajp tèëman lüj pacens, ni'quid ragbeetil guial pacens guin rüjn lüj yudar din gapil tiamp par yayüjnl xgab por xtolil. ⁵ Per guial dád nadil, ad rëntil yayejqul loj Dios, zeel lüj gajc cayüjnxhiejl xtolil par dxej ni gudëëd Dios casti, dxej ni güünman guialguxtis zi'c rayal. ⁶ Par gudëëman ni rayal tijbgaj bejn bal gonin beenman. ⁷ Gudëëdaman guialnaban tiblyaa loj ree bèn ad radxagt rüjn naguiejn guiban zagdxe guial rüjn reeman naguiejn yayal reeman guialnaza'c yu' xanyabaa, rüjn tèë reeman naguiejn yaya'n reeman zagdxe loj Dios din gap reeman cuerp ni ad yu't dxej nit. ⁸ Per ree bèn ad ruzoobt

diidx, rdxe'ch Dios laa reeman abi' gudëédaman laa reeman casti, din luar chinal reeman xtiidxliman, zinal reeman nejz mal. ⁹ Gra ree bén zinal nejz mal, naya sac reeman sagdiaj reeman, yaloj ree bén Israel dxel bén ad najt ree bén Israel. ¹⁰ Guiáad ree bén zë loj nejz zagdxé, guilies Dios xvalor reeman, yabaanëman laa reeman, yabe'cdxe tëëman luxdoo reeman, yaloj xgaj ree bén Israel dxelri bén ad najt ree bén Israel.

¹¹ Din Dios tiblojzi rüjnman gualguxtis con gra bejn. ¹² Gra ree bén cayüjn dol sin guial ad nünbeet reeman ley badëéd Dios loj Moisejs, tëd reeman casti sin ley guin. Guiáad ree bén cayüjn dol majsi ragbee reeman ley guin, laa reeman tëd casti zi'c rniabee ley guin. ¹³ Din ad guial guientzi bejn ley guin ma nayaman loj Dios, bén rüjn ree zi'c rniabee ley guin laa reeman naj bén naya loj Dios. ¹⁴ Per chi ad najt bejn bén Israel, abi' cayüjnman ni zagdxé sin guial güünbeeman ley guin, dxel ma cayüjnman zi'c rniabee ley guin majsi ad nünbeetaman laan, gualzi nünbeeman conin naj ni zagdxé con tëë nin naj ni mal, abi' guijc gajc reeman zëed xley reeman. ¹⁵ Din zi'c naban reeman, rguien guial guijc reeman zëed conin rayal güün reeman con tëë nin ad rayalt güün reeman luar gap reeman ley guin. Abi' laagajc reeman ragbee chi ma been reeman ni zagdxé o chi ma been reeman ni mal. ¹⁶ Zian gac chi güün Dios gualguxtis por gra ree ni naguie'ch ni rüjn bénguidxliuj. Abi' zi'c culün bejn ree guidibczi, laaman güün gualguxtis por Jesucrist.

Bén Israel ree në xley Moisejs

¹⁷ Yan, lüj guial najl bén Israel yu'guijquil guial rajquil ley badëé Dios loj Moisejs, abi' rüjnl nabë guial najl xbejn Dios, ¹⁸ rëbil guial ragbeel xhienaag rën Dios guibanl, abi' por xleyaman ragbeel conin naj zagdxé güünl. ¹⁹ Abi' naladxil zile' guzuxnejzil bén ad nünbeet ree ley guin në ree bén ad nünbeet xnejz Dios, ²⁰ naladxil zile' gulüül bén ad rajt ree në ree bén rajc ta'nzi, guial por ley guin ragbeel gra, ragbee tëël conin naj diidxli. ²¹ Per zi'c nabanl, ¿chexc zeel ad rulüüt lüj gajc luar gulüül ben ren? Din lüj rëb guial ad laat cwan bejn, abi', ¿chexquiza zeel rbanl? ²² Rëbil guial ad laat sunë bejn bén ad najt lacheelaman, abi' lüj, ¿chexquiza zeel rüjnl zian? Rëb tëël guial rdxe'chil ni naladx bejn naj dios, abi', ¿chexquiza zeel rbanl lën yadoo lod yu' ree Dios guin? ²³ Dád nabë rüjnl guial nünbeel ley, per rusa'nxtul Dios guial ad rüjntil ni rniabee ley guin. ²⁴ Ze'cli rëb loj xtiidx Dios: “Bén ad najt ree bén Israel rníee reeman Dios diidxguijdx por lëjt.”

²⁵ Diidxli rüjnqui sirv guial ru xcuerp bejn sen ni ru ree bén Israel, bal rüjnman zi'c rniabee xley Dios. Per bal id rüjnman zi'c rniabee ley guin, achet sirvan guial yu'man sen guin. ²⁶ Per bal tijb bén ad yu't sen guin nabanman zi'cgajc tijb bén rajc xley Dios majsi ad nünbeetaman laan, dxel ma nayabaman zi'c tijb bén yu' sen, majsi ad yu'taman sen guin. ²⁷ Bén rüjn zi'c naj xley Dios, majsi ad nünbeetaman ley ad yu' tëëtaman sen, gusa'nxtu'man lüj guial nünbeel ley guin yu' tëël sen guin, abi' ad rüjntil zi'c rniabee ley guin. ²⁸ Din ad guial rajlt bejn loj nacion Israel, ad guial yu' tëëtaman sen ni ru ree bén Israel ma najman bén Israel loj Dios, ²⁹ bén wali naj bén Israel loj Dios, guidib luxdooan zinalaman xnejz Dios, ad por guial yu'taman sen ru ree bén Israel, ad por xcostumbr tëët reeman, por guial naban reeman con xSprijt Dios. Abi' bén naban zian, Dios rlies xvaloraman sa'n ad bénguidxliujt.

3

¹ Zeel zanadi lon xhieci gan naj bejn bén Israel o xhieci gan chu'man sen ru ree bén Israel. ² Per naj gani lojdi guial gadxagayaa mod lasajc guial naj bejn bén Israel, din yalojxgaj loj ree bén Israel badëéd Dios xtiidxaman. ³ Yan ad naladxidi por guial yu' ree bén ad zinalt xnejz Dios, ad züntraman cumplid ni rëbaman din xo güün Dios ni rëbaman güünman con ree bén zinal xnejzaman. ⁴ Din laaman ad yu't dxej guchaa xtiidxaman, majsi gra bénguidxliuj naj bén rusquiee, per Dios ad nëtaman rusquiee, zi'c rëb tiblajt loj xtiidxaman lod rëb:

Gra bejn güünbee lüj guial rüjn cumplid xtiidxil,
abi' achet zajc gudxiib reeman guijquil.

⁵ (Per yu' bejn rüjn xgab) guial bal por dol ni cayguieen ree rulüü guial benza'c naj Dios, ¿chexquiza zeel najman benmal rudëédaman bejn casti? ⁶ Per naj rni lojdi guial ad najt Dios benmal, din bal najman benmal xoxa güün xguialguxtisaman con bénguidxliuj.

⁷ Din bal yaguie'ch ree guial ad rucaagdiajgt xtiidx Dios, laan naj ni rüjn yudar xtiidxli Dios din gap bejn laaman mazri respejt, dxel ad zajctri guiëb Dios naj bejn béndol. ⁸ Abi' mazri ma yaguieen ree ni mal din gui't ni zagdxe, zi'c rëb ree bejn culün bejn ree, per Dios gudëéd casti bén rëb ree zian.

Graczi bejn ma been dol

⁹ Zeel zi'c ma rnin por ree bén Israel, në por ree bén ad najt bén Israel, abi' ma ragbeedi guial ad zajct guiëbidi guial mazri benza'c naj ree bén Israel guial loj ree bén ad najt bén Israel, din tiblojzi nayajc ree béndol. ¹⁰ Zi'c ca tiblajt loj xtiidx Dios lod rëb:

Achutczi naj benza'c,
per ni'qui tijb bejn.

¹¹ Achutczi rignia'.

Achutczi raguiil Dios.

¹² Gra reeman ma basa'n xnejz Dios.

Gra reeman ma zinal nejz mal.

Achutczi cayün ni zagdxe,
per ni'czi tijb bejn.

¹³ Zi'cgajczi tijb baa ni zøjbyal,
zian ganax ni dxuudx ririi ro' reeman.

Ganax diidx rusquiee rniee reeman.

Abi' xtiidx reeman naj zi'c xvenen bëel.

¹⁴ Ganax diidx mal ririi ro' reeman,
diidxguijdx ni rüjnnaa lasa' reeman.

¹⁵ Za'sin reeman din gugüjt reeman bejn.

¹⁶ Bantëöz guin zë reeman, rüjn reeman ni dxuudx ree.

Abi' rusagzi reeman bejn ree.

¹⁷ Ad nünbee tët reeman xhienaag naj guialrbajn bejn zagdxe.

¹⁸ Ad yu'guijct reeman guial rayal guidxeb reeman Dios.

¹⁹ Dunuj ree rayagbee guial gra ni zëéd loj xley Dios, naj par ree bén zinal ley guin, chitëe chu guiëb guial achut ragbee xhienin naj dol, laan naj par gagbee bejn guial najman béndol loj Dios. ²⁰ Din ad guial güünt bejn gra ni rniabee ley guin ma nayaman loj Dios, ley guin rulüü din gagbee bejn guial najman béndol.

Por guialr'iladx ma naya bejn loj Dios

²¹ Per yan Dios ma balüü dunuj ree tijb nejz guial xhienaag yayajc ree naya lojman. Ad guial yaguieentzi ree zi'c rniabee ley guin, por ley guin nē por ni bacaa ree bén badēē xtiidx Dios loj ree bejn. ²² Rayagbee ree guial rüjn Dios bejn cwent zi'c bén ad yu't xtol por guialrliladxaman Jesucrist, din par Dios tiblojzi naj bejn. ²³ Din gra bejn ma been dol, achutczí naya niz loj Dios. ²⁴ Per guial najman benza'c, ma beenman perdon dux tol ree sin guial yadijx ree, ma nayajc ree perdon por Jesucrist, bén gudix por dux tol ree chi gütaman loj crüjz. ²⁵ Dios guxhaal Jesucrist, din por xrejnmán chu' perdon par bénguidxliuj. Abi' perdon guin naj par ree bén rliladx Jesucrist. Zian rguien guial graczi rüjn Dios xnejz, abi' bal guia'xchej ad beent xguialguxtisaman por dol ni been ree bejn, laan naj por pacens ni rajpaman con bejn, ²⁶ guial ma ragbeeman goc güün xguialguxtisaman. Zian rusnuu rulüüman guial graczi rüjnman xnejz, zeel rüjnman perdon xtol ree bén rliladx Jesucrist.

²⁷ Yan, ¿xhienaag yaguieen ree nabē? Achet yaguieennē' ree nabē, din ad guial yaguieent ree ley guin cumplid ma nayajc ree perdon, yayajc ree perdon por guial yaliduladx ree Jesucrist. ²⁸ Zeel rayagbeechaaw ree guial Dios rüjn perdon xtol ree bejn guial rliladx reeman Jesucrist, ad guial rüjnt bejn nagaiejn güünman gra ni rniabee ley guin.

²⁹ ¿Wen xDiosi ree bén Israel naj Dios ya, ad nēt ree bén ad najt bén Israel naj xDios laaman ya? Naj rni lojdi guial Dios naj par gra bejn, ³⁰ din tijbzi Dios yu', laaman rüjn perdon xtol ree bén rliladx Jesucrist, yu'man o ad yu'taman sen ni rniabee ley chu' ree bén Israel. ³¹ Ad naladxidi cayguieen ree ley guin tiblad guial raliduladx ree Jesucrist, din ad ziantan, guial raliduladx ree laaman rguien guial nadxu'guijc ree ley guin.

4

Xguialrliladx Abraham

¹ Yan, ¿xhie zajc yaguie'ch ree xcwent dux béngulal ree Abraham? ² Bal niyab Abraham zi'c tijb bén gad güün dol por ree ni beenman, guyu mod nünjman nabē loj ree bejn, per ad lojt Dios. ³ Din rēb loj xtiidx Dios: “Guial bililadx Abraham Dios, zeel been Dios laaman cwent zi'c tijb bén ad beent dol.” ⁴ Chi rüjn bejn dxiin, milia ni rajxaman ad ni razaladxt reeman, rtia'man laan por dxiin ni rüjnman. ⁵ Per guial gac bejn perdon loj Dios, ad zajct guiēb bejn guial rayalaman perdon guin por ni beenman, din achut naya loj Dios. Perdon guin zēēdan guial rliladx bejn Jesucrist, zeel rüjn Dios bejn cwent zi'c bén ad yu't xtol. ⁶ Zi'c gunee rey Davi guial xiquilbaa ree bén been Dios cwent sin dol sin guial güün reeman xhienin par yayal reeman perdon guin. ⁷ Rēbaman:

Xiquilbaa ree bén been Dios perdon xtol,
bén ma badxi'caman xtol.

⁸ Xiquilbaa ree bén ma been Dios cwent sin dol.

⁹ Ad gunee Davi diidx guie ree naabzi par bén yu' ree sen ni ru ree bén Israel, guneeaman diidx guin ree par gra ree bejn. Din zi'c ma raguie'ch ree, Dios been Abraham cwent zi'c bén ad yu't xtol guial bililadxaman laaman.

¹⁰ Abi' chi biyabaman zi'c bén ad yu't xtol, ni'qui gadaman chu' sen ni ru ree bén Israel, chi gad Abraham chu' sen guin mal nünj Dios laaman cwent zi'c bén ad yu't xtol. ¹¹ Chi biabaman zi'c bén ad yu't xtol, dxel guyuman sen guin din sen guin naj guial ma nünj Dios laaman cwent zi'c bén ad yu't xtol guial bililadxaman laaman. Zeel naj Abraham dad par ree bén rliladx Dios, majsi

ad yu't reeman sen ni ru ree bén Israel, per por guialrliladx guin nünj Dios laa reeman cwent zi'c bén ad yu't xtol. ¹² Naj tëë Abraham dad par ree bén majsi yu' sen guin per rliladx reeman zi'c bililadx Abraham Dios diidz chi gadaman chu' sen guin.

Promejs ni been Dios loj Abraham

¹³ Chi been Dios promejs loj Abraham në loj ree xdiaaman, guial gudëëdaman guidib guidxliuj loj reeman zi'c tijb ni bayal reeman, ad beent Dios promejs guin loj Abraham guial beenman zi'c rniabee ley, beenman promejs guin guial bililadxaman laaman, zeel beenman laaman cwent zi'c tijb bén ad yu't xtol. ¹⁴ Yan bal ganaxzi ree bén zinal ley guin tia' ni gudëë Dios, achet cwent naj guialrliladx ree bejn laaman, ache tëët cwent naj promejs ni been Dios loj Abraham. ¹⁵ Din ley guin najn par castizi, per lod ad yu't ley, ad yu't mod chu guiëb guial ad cayüjnt bejn ley guin cumplid.

¹⁶ Zeel chi been Dios promejs loj Abraham guial gudëëdaman ni rëbaman par gra ree xdiaaman, beenman promejs guin lojman guial bililadx Abraham guin laaman, din guiguien guial najman benza'c abi' ad parzi ree bén zinalt ley guin naj promejs guin, nëgajc par ree bén rliladx Dios zi'c bililadx Abraham majsi ad rajpt reeman ley guin. Zeel naj Abraham dad par dugra ree. ¹⁷ Zi'c ca loj xtiidz Dios lod rëbaman loj Abraham: “Lüj gac dad par zien ree bénguidxliuj.” Zian naj promejs ni been Dios loj Abraham, Dios bén rusban ree bengüt abi' rnieeman xcwent ree ni gad chu' loj guidxliuj guie zi'c ruluü ma yu' reen.

¹⁸ Majsi ragbeechaaw Abraham guial ad zajctaman famil, per chi rëb Dios lojman zian, bililadxaman ni rëb Dios, bililadxaman guial gac gra ni rëbaman lojman. Zianan zeel najman dad par gra ree bén rliladx Dios zi'cgajc laaman. Zi'c rëb Dios lojman, chi rëbaman: “Zian gaquil famil, dád famil narooob gaquil.” ¹⁹ Cost tibgayuu ijz ma yu' Abraham nadxel, ragbeeman guial ma naj reeman bengol në xbëngunaaman Sara guial chu' xi'n reeman, per ad gyunawëëgtaman, bililadxaman ni rëb Dios lojman. ²⁰ Ad yu't dxej ad bililadxtaman ni rëb Dios. Diidxli bililadxaman laaman abi' rudëëman quixtëë lojman, ²¹ din guidiblagaa bililadxaman guial rajp Dios guialrniabee güünman zi'c ma rëbaman. ²² Zeel been Dios cwent Abraham zi'c tijb bén ad yu't xtol.

²³ Abi' lod rëb guial been Dios laaman cwent zi'c bén ad yu't xtol guial bililadxaman laaman, ad tijbtzi Abraham ruza't yagaj, ²⁴ nëgajc dunuj ree din ma raliduladx ree Dios. Abi' në dunuj ree ma nünjman cwent zi'c bén ad yu't xtol, Dios bén basban Dad Jesucrist loj gualgüjt, ²⁵ Dad Jesucrist been güt por dux tol ree, dxel babanman abi' por laaman ma naya ree loj Dios.

5

Chi ma naya bejn loj Dios

¹ Ma nünj Dios dunuj ree cwent zi'c bén ad yu't xtol guial raliduladx ree laaman, zeel ma nadxu' ree zagdx con laaman por xgualgüjt Dad Jesucrist. ² Din guial raliduladx ree Jesucrist ma zajc yadxin ree loj Dios abi' nadxu'guijc ree ni ma beenman por dunuj ree, zeel dád nix yu' du luxdoo ree din ralëëz ree yalay ree xanyabaa lod za'man. ³ Abi' ad ziantzi, në guial yu' du luxdoo ree zagdx por guialrzagdiaj ni radüüd ree, din rayagbee ree por guialrzagdiaj guin yasiid ree yaya'p ree pasens. ⁴ Abi' por pacens guin yasiid ree yadaan ree ni gui'tzi, abi' guial yadaan ree ma zajc yadxin ree loj

Dios. ⁵ Ni ralëez ree por Dios, ad zasa'nxtutan dunuj ree, din rayagbee ree guial rën da'taman dunuj ree por xSprijtaman bén ma baneeman duloj ree.

⁶ Gocli babajn ree ad bile't naguieen ree xhienin din güün Dios dunuj ree perdon. Per chi bidxin dxej bi't Cristo güjtaman por dunuj ree nayajc ree béndol. ⁷ Dunuj ree rayagbee guial nawëeg naj chu' bén tiëb guiët por tijb benza'c da't. ⁸ Per Dios ma balüüman guial rënman dunuj ree, zeel güjt Jesucrist por dunuj ree majsi nayajc ree béndol. ⁹ Per yan ma naya ree loj Dios por xguialgüjt Jesucrist, abi' ad ziantzi, në ad zayaltri ree xcasti Dios chi guidxin dxej. ¹⁰ Din chi ad bile't nadxin ree loj Dios, laaman guxhal nejz guin por xguialgüjt Xi'nman Jesucrist, diidxgui yan ad züjntaman dunuj ree perdon ya, guial ma nabajnnë' ree Jesucrist, bén guxhal nejz par loj Dios. ¹¹ Abi' ad laatzan, në guial yu' du luxdoo ree nix radëed ree quixtëe loj Dios por Dad Jesucrist, din por laaman ma nadxu' ree zagdxe con Dios.

Adán në Cristo

¹² Por tijb xinguaaw guzuloj guyu dol loj guidxliuj, abi' por dol guin guzuloj guyu guialgüjt, gra ree bejn bayal guialgüjt guin guial been reeman dol. ¹³ Diidz chi gad ley ni badëed Dios loj Moisejs chu' mal yu' dol, per guial achet ley guyu nadxel, achut zajc guiëb guial cayüjn bejn dol. ¹⁴ Per majsi zian, bidxinczi dxej ni güt reeman, diidz xtiamp Adán xt xtiamp Moisejs, majsi ad beent reeman lasa' dol ni been Adán. Abi' tiampzii Adán gojc tijb sen par tijb bén naj gui't.

¹⁵ Din garen naj dol ni been Adán guial loj perdon ni zëed por Dios. Por xtol tijb bejn guzuloj guyu guialgüjt par gra bejn, per por tijb bejn zëed xperdon Dios, abi' laaman naj Jesucrist. Por Jesucrist rüjn Dios dunuj ree perdon, abi' ni been Jesucrist naj ni mazri lasajc, në ni mazri zagdxe par zien ree bejn. ¹⁶ Din garen naj dol ni been Adán guial loj perdon ni runee Dios. Por tijb dol bi't xcasti Dios, per por Jesucrist ma zile' gac bejn perdon, majsi ma beenman zien dol. ¹⁷ Por dol ni been Adán bi't guialgüjt par gra ree bejn. Per por ni been Jesucrist bi't perdon par gra ree bén rliadx guial por Cristo ma naj bejn naya guidiblagaa loj Dios, abi' gap reeman guialnaban tiblayaa con laaman.

¹⁸ Abi' guial bi't guialgüjt zi'c tijb casti par gra ree bejn por dol ni been Adán, ziangajc por ni zagdxe ni been Jesucrist ma zajc gap ree bejn perdon në guialnaban loj Dios. ¹⁹ Din por tijb bén ad bazoobt diidz gra bejn naj béndol. Per ziangajc por tijb bén bazoob diidz ma zajc gap bejn perdon loj Dios.

²⁰ Abi' Dios badëe ley loj Moisejs, din por ley guin gagbee ree bejn guial cayüjn reeman dol. Abi' chi ragbee bejn guial cayüjnman zien dol loj Dios, ziangajc mazri benza'c naj Dios par güünman laaman perdon. ²¹ Guia'xchej gunabee dol bejn ree, abi' por dol guin guzuloj guyu guialgüjt. Per yan mazri nadxu'guijc ree guial rën Dios dunuj ree, din guial rënman dunuj ree nünman dunuj ree cwent sin dol, abi' yaya'p ree guialnaban con laaman por dux Dad ree Jesucrist.

6

Ma bayëjt ree par dol per nabajnnë' ree Jesucrist

¹ Ad naladxidi canin lojdi guial yaguieen ree dol mazri din guiën Dios dunuj ree mazri. ² Din ad ziantan, ma bayëjt ree par dol ad rayaltri yaguieenz yaguieen ree dol. ³ Din gol bignia' guial chi barobnijs ree por Jesucrist, laan naj zi'c rullüü guial në dunuj ree ma bayëjt con laaman. ⁴ Chi barobnijs ree

rèn guiëban guial ma baxa'tyuj ree con Cristo, ma bayëjt ree con laaman din ziangajc zi'c babanman por xguialrniabee Dios ziangajc zajc guidxaa mod ni nabajn ree, yabajn ree zi'c rën Dios.

⁵ Abi' bal chi barobnijs ree ma nayajc ree tijbzi con Jesucrist loj xguialgüjtaman, zi'c babanman ziangajc yaban ree. ⁶ Din dunuj ree rayagbee guial chi güjt Jesucrist loj crüjz, güjtaman por gra ni baguieen ree yaløj chi gad ree yaguieenbee laaman, abi' yagaj gunijt zi'c babajn ree yaløj, din ma naj nawëëg güün dol dunuj ree gan din ad rniabeetri dol guin dunuj ree. ⁷ Din bèn ma güjt por dol, ad rniabeetri dol guin laaman. ⁸ Abi' guial güjt Jesucrist por dux tol ree, zeel ma bayëjt ree par dol guin, yabajn tëë ree con laaman. ⁹ Din dunuj ree rayagbee guial chi baban Jesucrist ad yu'tri dxej guiëtaman din ad rniabeet guialgüjt laaman. ¹⁰ Con tivoltizi güjt Jesucrist por xtol ree bejn, yan ma nabandan par Dios. ¹¹ Ziangajc lëjt gol been cwent guial ma güjtidi par dol, abi' ma nabandi par Dios guial ma najdi tijbzi con Dad Jesucrist.

¹² Zeel la'tgaj nabandi loj guidxliuj guie ad tiëbidi nabee dol lëjt, ad tiëb tëëdi güün ree xgabdxuudx lëjt gan. ¹³ Ad cwëëladx lëjt gajc loj dol par güündi ni mal, zagdxeli gol cwëjß nabee Dios lëjt, zi'c tijb bën ma güjt, abi' yabandi par laaman. Gol cwëjß nabeeman lëjt par güündi ni zagdxë. ¹⁴ Zian ad zanabeetri dol lëjt, per ad por guial yu'guijctidi ni rëb ley ad güündi, ad zanabeetri dol guin lëjt por guial zinalidi guial rën Dios lëjt.

Ma gulaa ree loj dol

¹⁵ Ad canitan por guial ma zunaal ree guial rën Dios dunuj ree yan, zeel ma zajc yaguieen ree dol guial ad zunaaltri ree ley, din ad ziantan. ¹⁶ Lëjt ragbee bal yu' chu rniabee dunuj ree, yazoob ree xtiidx bën rniabee dunuj ree. Yan bal dol guin rniabee lëjt yayalidi casti, per bal ruzoobidi xtiidx Dios dxel ma rayalidi perdon. ¹⁷ Per quixtëë Dios guial majsi guia'xchej gunabee dol lëjt, per yan con guidib luxdoodi ma zinalidi xtiidx Dios zi'c ma basiididi. ¹⁸ Abi' yan guial ad rniabeetri dol lëjt, ma nabandi din güündi zi'c rën Dios. ¹⁹ (Canenë'n lëjt con ganax diidx ni zajc chignia'di xhie rën guiëb ni canin, din ragbeen guial nawëëg naj chignia'di ni guin ree.) Zi'c gunabee dol lëjt guia'xchej persi beendi ni dxuudx ree në graløj ree ni mal, ziangajc yan guidiblagaa gol cwëjß nabee Dios lëjt din gac güündi ni zagdxë guiban tëëdi zi'c rënman.

²⁰ Chi gunabee dol lëjt ni'quid guyutidi xgab nibajndi zi'c rën Dios. ²¹ Per, çxhieza gan beendi por ni mal ni beendi nadxel, ni mal ni ratunëdi yan guial ma ragbeedi por laan zëëd xcasti Dios? ²² Per yan guial ad rniabeetri dol lëjt ma zinalidi xnejz Dios, abi' laan naj ni zagdxë din por zian ma zajc guibandi zi'c rën Dios gap tëëdi guialnaban tiblayaa con laaman. ²³ Din ni rüjn bejn gan por dol laan naj casti, per ni razaladx Dios naj guialnaban tiblayaa par ree bèn ma naj tijbzi con dux Dad ree Jesucrist.

7

Ni naj zi'c guialruxhliaa

¹ Compniar raliduladx ree Jesucrist, lëjt ragbee xhienaag naj tijb ley. Ley guin naj ni rniabee bejn la'tgaj nabanman. ² Laan naj zi'c chi ruxhliaa bejn, ad zajct guxhliaanëman ben ren la'tgaj naban lacheelaman. Per bal guiët lacheelaman dxel ad yu't ley ni gudxoon guial guxhliaanëman ben ren. ³ Zeel bal naban lacheelaman abi' guchajgaman ben ren, dolan cayüjnman. Per bal

ma güjt lacheelaman dxel achet ley gudxoon guial guxhliiaanëman ben ren ad cayüjn tēētaman dol.

⁴Ziangajcan lējt compniar raliduladx ree Jesucrist, por xguialgüjt Jesucrist ma güjtidi par xley Moisejs. Yan ma najdi xbejn Cristo bén baban zatijb, abi' zian ma zajc yagueien ree zi'c rën Dios yagueien ree. ⁵Din chi babajn ree zi'ctzi bayën ree, mazri baguieen ree ni rudxoon ley guin yagueien ree abi' bunaal ree ni mal ni rayal casti. ⁶Per yan guial ma bayëjt ree par ley guin, yan guial ad rniabeetri ley guin dunuj ree guial ma bidxaa tēë mod ni nabajn ree, ma zajc yagueien ree zi'c rën Dios por xSprijtaman bén nabajnnë' ree, ad guial nadxu'güjct ree ley guin.

Ley con dol

⁷Ad canitan lojdi guial ni mal naj ley guin, din ad ziantan. Din bal id ley guin ad zagbeetan conin naj dol, ad zagbee tēetan guial dol naj guialrzëëbladx, bal id rëb loj ley guin: "Ad sēëbladxil." ⁸Per chi gogbeen guial ni mal naj guialrzëëbladx, mazri gojcxhie'j da dolan por gra ni guzëëbladxan. Bal id yu' ley, ad zagbeet bejn xhienin naj dol. ⁹Chi gadan günbee ley guin, par naj zagdxë nabanen. Per chi benbeen ley guin, gogbeen guial cayünan dol abi' por dol guin rayalan casti. ¹⁰Bi't ley guin din gagbee bejn xhienaag guibanman, per par naj bi'tzan par gudëëdan naj casti. ¹¹Din basquiee dol guin naj guial zile' günan gra ni rniabee ley, per por ley guin gajc gogbeen guial castizi rayalan.

¹²Zeel ad ni malt naj ley guin din loj Dios zëëdan abi' gra ni zëëd loj ley guin loj Dios zëëdan, abi' zagdxë xnejz tēë naj ni rëb loj ley guin. ¹³Ad ley guint rajp dol guial rayalan casti, dol guinan naj ni basquiee naj din günan ni rayal casti. Abi' por ley guin gogbeen guial ni dxuudx da't naj guial güün bejn dol.

¹⁴Dunuj ree rayagbee guial por Dios zëëd ley guin, per guial najn bénguidxliuj zeel zianczi rüjn dol guin naj gan. ¹⁵Ad rignia'tan xhienin rajcan, din ad rüntan ni rënan, aal ni ad rëntan rünan. ¹⁶Abi' chi rünan ni ad rëntan günan, zian ragbeen guial ni zagdxëqui naj ley guin, din por ley guin ragbeen xhienin cayünan. ¹⁷Zeel ad najtczi rün guial rünan ni ad rëntan, rünan laan guial najn béndol, abi' zianczi rüjn dol guin naj gan. ¹⁸Din guial najn bénguidxliuj, ragbeen guial ni'czi ta'n ad najtan benza'c, majsi rënan günan ganax ni zagdxë, per ad rajctan. ¹⁹Ad rüntan ganax ni zagdxë ni rënan günan, aal ganax ni mal rünan ni ad rëntan günan. ²⁰Yan bal rünan ni ad rëntan günan, ad najtczi rün par günan laan, rünan laan guial najn béndol abi' zianczi rüjn dol naj gan.

²¹Ragbeen guial majsi rënan günan ganax ni zagdxë, per laa za' gajc dol guin par güünan naj gan. ²²Dád ruladxan gra zi'c rniabee Dios günan, ²³per yu' ni rudxoon günan laan, abi' ni rudxoon guin naj dol, guial sta naban dol guin luxdon abi' zianczi rüjnan naj gan.

²⁴¡Prob naj! ¿Chu zajc yabëë naj loj casti rayalan por dol ni rünan guial naj naj bénguidxliuj? ²⁵Per quixtëë Dios guial por dux Dad ree Jesucrist ma gulaan loj casti guin. Diidxliczi da xgaban naj guial günan ganax ni rniabee Dios, per guial najn bénguidxliuj zeel zianczi rüjn dol guin naj gan.

8

Guialnaban runee xSprijt Dios

¹Gra ree bén rililadx Jesucrist ad rayaltri reeman xcasti Dios, bén ad nabantri ree zi'ctzi rën reeman, laa reeman ma rüjn reeman naguiejn naban

reeman zi'c rniabee xSprijt Dios. ² Din por xgualrniabee xSprijt Dios, bèn runee gualnaban duloj ree gual ma nayajc ree tijbzi con Jesucrist, ad rniabeetri dol dunuj ree ad zayal tēetri ree xcasti Dios. ³ Gual nayajc ree bēnguidxliuj ad bile't nūjn ley dunuj ree yudar, ley ni badēēd Dios loj Moisejs. Per yan ma been Dios ni ad bile't nūjn ley guin. Laaman guxhaal Xi'n loj guidxliuj zi'cgajczi tijb bēnguidxliuj persi gūjtaman por dux toj ree chitēē nabeeri dol dunuj ree. ⁴ Laaman been zian, din yaguieen ree zi'c rēnman zi'cgajc tijb bēn cayūjn zi'c rniabee ley gual ad nabantri ree zi'ctzi rayēn ree, ma nabajn ree zi'c rniabee xSprijt Dios.

⁵ Bēn naban ree zi'ctzi naj xixgab reeman, mazri yu'guijc reeman gūūn reeman zi'ctzi rēn reeman. Per ree bēn naban zi'c rniabee xSprijt Dios, mazri yu'guijc reeman gūūn reeman zi'c rniabee Sprijt guin. ⁶ Gual yu'guijc bejn gūūnman zi'ctzi naj xixgabaman zeel zēēd casti. Per bēn yu'guijc gūūn zi'c rniabee xSprijt Dios, zajpaman gualnaban con Dios yabe'cdxe tēē Dios luxdooman. ⁷ Bēn yu'guijc ree guiban zi'ctzi naj xixgab reeman, rdxe'ch Dios laa reeman din ad rēnt reeman guzoob reeman xtūdxaman ad rīle' tēēt gūūn reeman zi'c rēnman. ⁸ Zeel bēn naban ree zi'ctzi naj xixgab reeman, ad ruladxt Dios ni rījn reeman.

⁹ Per lējt ad nabantridi zi'ctzi naj xixgabidi, ma nabandi zi'c rniabee xSprijt Dios, bal wali ma nabannēdi xSprijt Dios. Din bēn ad nabannēt xSprijt Dios, ad najtaman xbejn Cristo. ¹⁰ Per bal ma nabannēdi Cristo, rēn guiēban gual ma gūjtidi par dol, ma nabannēdi xSprijt Dios din ma nūjn Dios lējt cwent sin dol. ¹¹ Abi' bal ma nabannēdi xSprijt Dios, bēn hasban Jesucrist loj ree bengūt. Majsj guiētidi per zasban Dios lējt din tia'di zatijb gualnaban por xSprijt Dios bēn nabannēdi.

¹² Zeel yan compniar raliduladx ree Jesucrist, ad rayaltri yabajn ree zi'ctzi naj dux xgab ree. ¹³ Din bal nabandi zi'ctzi naj xixgabidi, dxel yayalidi casti, per bal por xSprijt Dios bēn nabannēdi ma basa'ndi dol tiblax dxel ma gapidi gualnaban tiblayaa con Dios.

¹⁴ Gra ree bēn rtiēbj rniabee xSprijt Dios laa reeman, laa reeman naj xi'n Dios. ¹⁵ Din ad nabannēt reeman xSprijt Dios par guidxeb reeman, zi'c rdxeb tijb bejn xpatronman, por Sprijt guin ma naj reeman xi'n Dios. Abi' por Sprijt guin raguie'ch ree loj Dios: “jDad!” ¹⁶ Din xSprijt Dios rusni dunuj ree persi rayagbee ree gual ma nayajc ree xi'n Dios. ¹⁷ Abi' gual nayajc ree xi'n Dios dxel ma rayal ree ni guneeman zi'cgajc Jesucrist, bal wali yadaan ree gualzi zi'c laaman din yayal ree xanyabaa lod zojbaman.

¹⁸ Ma benan xgab gual achet lasajc gualrzagdiaj ni caydüūd ree yan gual loj gualnaza'c ni yaca' ree xanyabaa. ¹⁹ Abi' xt gra ree ni badxe' Dios loj guidxliuj, ma rēn nejzdoo reen guidxin dxej guiguieen chu ree nin naj xi'n Dios. ²⁰ Din guidxliuj ma guxinan, per ad laatan rajp dol, Dios basa'n gac zian. Yan cabēs guidxliuj guin ²¹ yariin loj ree ni dxuudx ni yu', din yayajc nix da't zi'c goc chi gurechaawan, zi'cgajc laa ree xi'n Dios loj ree nidxuudx yu' loj guidxliuj guie. ²² Per la'tgaj cabēz guidxliuj guin guidxin dxej guin, dunuj ree rayagbee gual dād naya cazagdiajn zi'c rzagdiaj tijb bēngunaa chi ma gal xi'nman. ²³ Abi' ad tijbtizi guidxliuj guin cazajc zian, nēgajc dunuj ree gual nabajnnē' ree xSprijt Dios zi'c tijb sen por ni guneē Dios duloj ree. Abi' cayzaagdiaj ree la'tgaj caylēz ree guidxin dxej ni guiguieen gual nayajc ree xi'n Dios, dxej ni guidxaa dux cuerp ree chi yaya'p ree cuerp cūb. ²⁴ Dunuj ree rayagbee gual gac zian, laan naj ni ralēz ree gualraliduladx ree ma nayajc ree perdon. Lējt ragbee bal ni ralēz ree ma gojcan, ad zalēztri reen din ad

zajctri cwëz bejn ni ma gojc. ²⁵ Per bal gad ni caylëz ree gac, ad rayalt yadxag ree yalëëz ree gacan.

²⁶ Abi' xSprijt Dios ragnë dunuj ree chi ad rayagbeet ree xhie yaguieen ree, din yu' dxej loj hor guin ad rilet' yarejdx yanaab ree Dios zi'c rayal. Abi' chi ad rayagbeet ree xhienaag yaguie'ch ree loj Dios, xSprijt Dios mal ragbee dux quiaragueijn ree, dxel laaman rbejdx rniab Dios por dunuj ree. ²⁷ Abi' Dios, bén nünbee luxdoo gra ree bejn ragbeeman xhienin canab Sprijt guin lojman por dunuj ree. Din chi rniab Sprijt guin por ree xbejn Dios, laaman rniab por ree bejn zi'c rën Dios.

Achet zajc güün dunuj ree gan

²⁸ Dunuj ree rayagbee guial gra ni cayza'c ree loj guidxliuj guie naj ni güün sirv par dunuj ree guial rayën ree Dios, dunuj ree guial bazoob ree xtiidxaman par yaguieen ree zi'c rënman. ²⁹ Abi' diidz guia'xchej ma ragbee Dios chu ree nin chililadx laaman abi' gulejman laa reeman din guiban reeman zi'c Xi'nman Jesucrist, din Jesucrist naj bén nabee loj gra ree bén naj Xi'n Dios. ³⁰ Gra ree bén ragbee Dios guial chililadx reeman laaman, rbejdxaman laa reeman din gac reeman xbejnman, rünjman laa reeman cwent sin dol abi' rudëëman xanyabaa loj reeman lod zøjhaman.

³¹ Yan, guial ma rayagbee ree gra ree ni guie, achet güünan chutëëz güün xcontr dunuj ree, dunuj ree rayagbee guial Dios ragnë dunuj ree. ³² Ad gurexuut Dios nudëë Xi'nman din guëtaman por dunuj ree. Yan nacli Xi'nman baneeman persi güjtaman por dunuj ree, ¿diidxgui ree ni ren ree nid zuneeman duloj ree ya? ³³ ¿Chu zajc cwe'c dux guialquia ree nayajc ree bén ma gulej Dios? Din Dios ma nün dunuj ree cwent sin dol. ³⁴ Achut zajc na guial rayal ree casti, din Jesucrist güjt persi gudijxaman por dunuj ree. Abi' ad ziantzi, babanman abi' yan za'man xladbee Dios lod rnieeman por dunuj ree. ³⁵ Zi'c rën Cristo dunuj ree, achut zajc yala' dunuj ree con laaman. Ni'qui por gualyu'naya, o por gualzi, o por ni rünj bejn dunuj ree, o por gualrliaän, o por gual ryaadx du xab ree, o por tijb ni nadxeb, o guial yayëjt ree, achet zajc yala' dunuj ree con laaman. ³⁶ Zi'c rëb loj xtiidx Dios: Guial nayajcan xbejnl, zianczi nadxu'n loj gualgüjt. Rünjnë reeman dunujn zi'c ree xil ma naj guiët.

³⁷ Per ni'qui tijb ni guin ad zünjt dunuj ree gan guial ragnë Cristo dunuj ree, bén rën dunuj ree. ³⁸ Ragbeechaawan guial ni'qui gualgüjt, ni'qui gualnaban, ni'qui ree anjl, o xindxab ree, o gra ree ni rajp gualrniabee, o ni cayajc, o ni zëëd gac, ³⁹ o ni zëëd xanyabaa, o lën liuj, ni'qui tijb ni been Dios, achetzi achut tëët zajc chiquied gualrën Dios dunuj ree por dux Dad ree Jesucrist.

9

Dios gulej bén Israel ree

¹ Lëjt ragbee guial naj xbejn Cristo, canin lëjt diidxli ad canitan lëjt ni rusquiee. Abi' naj ragbee guial xSprijt Dios ragbee guial diidxli naj ni canin lëjt, ² guial guixie guixie dád yu'naya luxdoo, xt ni'quid radxajt xhie günan. ³ Balzianclaa majsi ad zayaltan perdon, majsi güün Cristo naj tiblad, per bal zian chile' günan yudar bén ladx reen chitëë yayal reeman casti. ⁴ Laa reeman naj bén Israel, abi' laa reeman naj bén gule Dios din gac reeman xbejnman. Abi' guzujman con laa reeman zi'c form tijb zaj, baya'nñëman laa reeman diidx conin güünman con tëënin güün reeman, badëë tëë xleyaman loj reeman. Rëbaman loj reeman xhienaag guiën reeman laaman, been

tëeman promejs loj reeman. ⁵ Zëed reeman loj xdiaa ree bén been ree sirv loj Dios gulal, loj gajc ree bén zëed Cristo chi bi'taman loj guidxliuj, laaman naj bén nagle' zianczi rajp tëeman gualrniabee loj gra ni yu'. Amén.

⁶ Ad canitan gual ad züntri Dios xpromejsaman cumplid, ni canin naj gual ad grat ree bén Israel naj xbejn Dios. ⁷ Ad gual zëedt reeman loj xdiaa Abraham din gac reeman xdiaaman, din rëb Dios loj Abraham: "Diizd xi'nl Isaac suloj xdiaal." ⁸ Laan rulüü dunuj ree gual ad por gual najt bejn bén Israel, ma najman xbejn Dios, xbejn Dios naj ree bén naj cwent loj xdiaa Abraham gual riladx reeman xtiidx Dios zi'c Abraham. ⁹ Din Abraham bililadxaman Dios chi rëb Dios lojman: "Zatib ijz tiamp guie gajc gualan abi' dxej zii ree ma ca' Sar tijb xindobëz."

¹⁰ Abi' ad laatzan. Grop ree xi'n Rebeca gojc xdad reex Isaac, bén goc dux béngulal ree, ¹¹⁻¹³ per chi gad reex gal, chi ad wayüjn tëët reex ni zagdxe ni'qui ni mal, rëb Dios loj Rebeca: "Xin yaløj guin laax güün sirv loj xinguiag guin." Zi'c rëb loj xtiidx Dios lod rëb: "Guyënan Jacob, per bidxe'chan Esau." Zian rugien gual ma ragbee Dios chu rbeman ad por ni rüjnt bejn, laaman ma ragbee chu rucaabeaman.

¹⁴ Yan, çpor zian yaguie'ch ree ya, ad rüjnt xgualguxtis Dios zi'c rayal? ¡Per ad ziantan! ¹⁵ Din Dios rëb loj Moisejs: "Yayan bén rënan yayan abi' bén rayal ree casti, bal rënan ad zudëedtän laa reeman casti." ¹⁶ Zeel ad zile't yaya Dios bejn por xixgabzaman o por ni rüjnman, laaman mal ragbee chu rënman yayaman. ¹⁷ Loj xtiidx Dios rëb gual rëbaman loj rey Egipto: "Naj ben lüj rey din guiguen da gualrniabean din güünbee gra bénguidxliuj naj." ¹⁸ Zeel rnin lojdi gual ma ragbee Dios chu yayaman chu tëë güünman luxdoo gojl.

¹⁹ Per wed por zian nadi: "Bal zianan, çchexquiza zeel rdxe'ch Dios gual nayajc ree zi'c nayajc ree awa ad zajct yadxoön ree zi'c naj xixgabaman?"

²⁰ Per, çchu naj bénguidxliuj din guinieeman Dios zian? Wen zajc guiëb tijb guiajs loj bén been laan ya: "çChexc zeel beenl naj zian?" ²¹ çNid bén rüjn guiajs guin rüjnnë bajn guin zi'ctzi rënman ya? Laaman ruguiaa xhie güünnëman bajn guin, bal güünman guiajs güün dxiin guixie o güünman guiajs güün dxiin dxej zojblojzi ree.

²² Yan, ziangajc Dios ma ragbeeman chu rayal casti, abi' xt zajc laa nudëed gajcaman casti din guiguen xgualrniabeeman. Per gudaanman gojp tëeman pacens bén ad ruzoobt ree diidx, bén rayal ree nit. ²³ Gudaanman laa reeman din guiguen gual laaman guinia xhiënaag güünman, gual laaman naj bén ca' gualrniabee abi' bayaman bén ragbeeman diizd guia'xchej gual yayal reeman xanyabaa. ²⁴ Abi' laa reeman naj dunuj ree bén ma gurejdx Dios, loj ree bén Israel në loj ree bén ad najt bén Israel. ²⁵ Zi'c ca loj libr ni bacaa Oseas bén badëë xtiidx Dios loj ree bejn, lod rëb:

Bén ad najt ree da bejnan,
guiën loj reeman gual naj reeman da bejnan,
abi' ree bén ad yu't bén rën laa reeman,
naj guiën laa reeman.

²⁶ Abi' lod rëb Dios loj ree bejn: "Ad da bejntän lëjt".

Yagaj gac reeman xbejnman, laaman gual najman bén naban.

²⁷ Guiaäd Isaías bén badëë xtiidx Dios loj ree bejn, rëbaman por ree bén Israel: "Majsi zien da't naj ree bén Israel zi'c üx riga' ro' nijsdoo, per ta'nz naj ree bén laa loj casti, ²⁸ din Dios nayob güün cumplid xtiidxaman loj guidxliuj guie zi'c ma rëbaman." ²⁹ Abi' diizd gocli rëb Isaías loj ree bejn: Bal nitiëjb dux Dad ree Dios

bén rajp gra guialrniabee
 ninijt gra ree dux béngulal ree,
 diizd gocli mal gunijt dux diaa ree
 zi'c gunit ree bèn Sodoma nē ree bèn Gomorra.

Bén ad najt ree bèn Israel ma naj reeman perdon loj Dios

³⁰ Yan, ¿xhie yaguie'ch ree? Bén ad najt ree bèn Israel ni'quid guyut reeman xgab xhienaag gac reeman perdon loj Dios, per yan ma naj reeman perdon guial rliladx reeman Jesucrist. ³¹ Abi' ree bèn Israel majsi dád been reeman naguiejn guiban reeman zi'c rniabee ley din gac reeman perdon loj Dios, per ad gojctan. ³² ¿Chexc zeel ad bile't niajc reeman perdon zian? Guial mazri been reeman naguiejn nibajn reeman zi'c rniabee ley luar nililadx reeman Dios zi'c rayal chililadx reeman din gac reeman perdon. Zian gojc Cristo par laa reeman zi'c tijb “guiaj ni rliadx guia' bejn” ³³ zi'c ca loj xtiidx Dios lod rēb: Ma gulen tijb bejn luguiedx Sión, bèn gac zi'c tijb guiaj ni ladx guia' ree bejn abi' gusajban laa reeman. Abi' bèn chililadx laaman ad yu't dxej yaya'nxtuman.

10

¹ Compniar raliduladx ree Jesucrist, ni rēnan rniaab tēen loj Dios naj guial gac ree bèn Israel perdon. ² Din naj ragbee guial dád cayūjn reeman naguiejn cayūjn reeman sirv loj Dios, per diidxli ad rignia't reeman zagdxe xhienaag rēn Dios güün reeman. ³ Din ad rtiējbt reeman chililadx reeman xhienaag rayal güün reeman din gac reeman perdon loj Dios, al zinal reeman zi'c naladx reeman gac reeman perdon, luar güün reeman zi'c rēn Dios din gac reeman perdon. ⁴ Din por Jesucrist bayaaloj zi'c rniabee ley güün bejn, yan bèn rliladx ree laaman, ma naya reeman loj Dios.

⁵ Bén rēn gac naya loj Dios guial zinalaman ley, rēb Moisejs guial bèn güün zi'c tal rēb ley, zajpaman guialnaban la'tgaj cayūjnman zi'c rniabee ley guin. ⁶ Per guial rajc bejn naya loj Dios por guial rliladxaman Jesucrist, naj guial ad zūjntaman xgab: “¿Chuczi zajc chē'p xanyabaa?” (Din rēn guiēban guial ad rliladxtaman, abi' rēnman guguaaaman guiat Cristo loj guidxliuj.) ⁷ Ad guiēb tēēman: “¿Chu zajc che lod za' ree bengüt?” (Din rēn guiēban guial ad rliladxtaman, abi' rēnman guguaaaman yaban Cristo loj ree bengüt.) ⁸ Per loj xtiidx Dios rēb: “Gajxh za' xtiidx Dios con lūj, ryaadxzi güünl xgab guiēb tēēl bal chililadxil laan.” Din guialrliladx ni ratie'ch ree naj ze. ⁹ Bal yanero'l guial Jesús naj Dad par lūj abi' guidib luxdool chililadxil guial basban Dios laaman loj ree bengüt, dxel ma najl perdon. ¹⁰ Din chi chililadx bejn Jesucrist con guidib luxdooan, diizd loj hōr zii ma najman cwent sin dol. Abi' chi yanero'man guial Jesucrist naj Dad par laaman, dxel ma najman perdon.

¹¹ Abi' loj xtiidx Dios rēb: “Gra ree bèn chililadx laaman ad yu't dxej yaya'nxtu reeman.” ¹² Laan rēn guiēb guial loj Dios tiblojzi naj bejn, achet güünan chutēēz najman, bal najman bèn Israel o ad najtaman bèn Israel. Din tijbzi Dios naj Dad par dugra ree, abi' dád benza'can con gra ree bèn rbejdx rniab laaman. ¹³ Din loj xtiidx Dios rēb: “Gra bèn yanab perdon loj Dios, gacaman perdon.” ¹⁴ Per, ¿xhieza naag cwedx guiniab reeman laaman awa ad waliladxt reeman laaman? ¿Abi' xhieza naag chililadx reeman laaman awa ad wacaagdiajgt reeman xcwentaman? ¿Xhienaag guiguiejn reeman xcwentaman awa achut bèn guinee xtiidxaman loj reeman? ¹⁵ ¿Xhienaag chu' bèn guitie'ch xtiidxaman awa achut guixhiaal laa reeman? Loj xtiidx Dios rēb: “¡Ni za'cdxoon naj chi rdxin bèn zinē ruson zagdxe!”

16 Per ad grat bejn ridxga' xtiidxza'c Dios. Zi'c rëb Isaías: “Dad, ¿chu ma rililadx ni ranen por lüj?” 17 Zeel guialrliladx zëed por ni rigueijn bejn, abi' ni rigueijn bejn naj xtiidxza'c Jesucrist.

18 ¿Wen nid wagueijn ree bejn laan ya? ¡Per naj rni guial ma bacaagdiajg reeman laan! Din loj xtiidx Dios rëb:

Guidib guidxliuj ma bire'ch xtiidx Dios

abi' xt luar bigra lod naguei'ch ma bigueijn reeman xtiidxaman.

19 Yan rünan xgab: ¿Wen id rignia' ree bén Israel xtiidx Dios ya? Per diizd guia'xchej bacaa Moisejs ni rëb Dios por laa reeman chi rëbaman:

Naj gün din tédlojdi por ni gūnan

con ree bén ad najt bén Israel.

Në por ni gūnan con laa reeman,
majsi ad ragbeet reeman, abi' zadxe'chidi.

20 Abi' sin guialrdxeb bacaa Isaías ni rëb Dios por ree bén Israel, chi rëbaman:

Bén naj ree bén Israel, majsi ad baguuilt reeman naj,

per badxejl reeman naj.

Abi' ma balūlon loj reeman,

majsi ad gunabdiidxt reeman por naj.

21 Bacaa tëe Isaías ni rëb Dios por ree bén Israel, chi rëbaman: “Dëchej za'n rbedxan bejn ree abi' ad rënt reeman guzooob reeman diidx al rusagloj reeman naj.”

11

Xixgab Dios

1 Ad canitan lojdi guial ma gulëeladx Dios bén Israel ree, din ad ziantan.

Lëjt ragbee guial bén Israel naj abi' loj xdiaa Abraham zialan, guial zialan loj

xdiaa Benjamín. 2 Diizd guia'xchej, gulej Dios bén Israel ree din gac reeman

xbejnman, zeel ad rbëeladxtaman laa reeman. ¿Nid rusaaladxidi tiblajt loj

xtiidx Dios ya lod zëed chi gule'c Elías bén badëe xtiidx Dios loj ree bejn

xguialquia ree bén Israel loj Dios? Chi rëbaman: 3 “Dad, ma bagüjt reeman

gra ree bén badëe xtiidxil loj ree bejn ma bachijl tëe reeman xialtar reel,

najzi baya'n abi' nëgajc naj rën reeman gugüjt reeman.” 4 Per badxi' Dios

xtiidxaman rëbaman: “Ma gulëcan gajdx mil bejn par naj, bén ad wazuxibtcki

ree loj dios la Baal.” 5 Yan ziangajc yu' ta'n bén Israel, por guial rayaman

laa reeman gulejman laa reeman par laaman. 6 Abi' bal guial rayaman laa

reeman gulejman laa reeman, ad por ni cayüjnt reeman, din bal nibejman

laa reeman por ni cayüjn reeman dxel ad por guial rayatraman laa reeman.

7 Zian gojc, bén Israel bén gule Dios, badxejl reeman laaman guial rililadx

reeman laaman. Per ree bén Israel ren gad reeman yadxejl laaman, din

raguuilt reeman laaman zi'c naladx reeman, ad raguuilt reeman laaman zi'c

rënman zeel beenman luxdoo reeman gojl, 8 zi'c rëb loj xtiidx Dios lod rëb:

“Basiaaw Dios xquiargueijn reeman, abi' naj reeman zian xt yandxej, majsi

ruguiaa reeman per ruluü ad ruguiaat reeman, abi' majsi rigueijn reeman

per ruluü ad riguejnt reeman.” 9 Rëb tëe Davi:

Xguialraw zagdx reeman con gra xguialnaza'c reeman

laan gusquiee laa reeman guial zëqui reeman zagdx.

Laan gusquiee laa reeman din téd reeman casti ni rayal reeman.

10 Yaya'n reeman zi'c tijb bén ad ruguiaat,

abi' sac reeman zi'c tijb bén ca bëw xijch.

Gac ree bén ad najt bén Israel perdon

¹¹ Ad canitan lojdi por guial ad rtiëjbt ree bén Israel güün reeman zi'c rën Dios zeel ma gunijt reeman loj Dios, din ad ziantan. Guzajc reeman zian din chu' mod gac ree bén ad najt ree bén Israel perdon, din chile' sëëbladx ree bén Israel gap reeman perdon guin. ¹² Yan bal guial ad bazoobt ree bén Israel diidx, beenan sirv par din yayal los demazri ree bénguidxliuj xguialnaza'c Dios, bén ad najt ree bén Israel. Yan, z'rüjndi xgab ya xhienaag güünle' Dios bejn ree chi tiëb ree bén Israel güün reeman zi'c rën Dios?

¹³ Yu' ni rënan ganin lëjt bén ad najt ree bén Israel, lëjt ragbee guial Dios guxhaal naj din gün xtiidxaman lojdi abi' dád cayünan naguiejn günan zi'c rayal. ¹⁴ Rënan guial ree bén ladx reen bén Israel ree sëëbladx zi'c rünjdi din güün reeman zian din chile' gac reeman perdon. ¹⁵ Walican guial chi ad bazoobt ree bén Israel xtiidx Dios, guyu mod gojc los demazri ree bejn perdon. jPer xi nix chi chililadx reeman xtiidx Dios! Laan naj zi'c chi yaban tijb bengüt zatijb. ¹⁶ Abi' zi'c chi beenle' Dios bén Israel ree gulal laan naj tijb sen guial güünle'man los demazri ree bén Israel, ziangajc bal güünle' Dios xliuj tijb yag guidib yag guin ma nagle'.

¹⁷ Bén Israel ree naj reeman zi'c tijb yag olivo, per yu' reeman naj zi'c xidx yag olivo guin ni ma gurug. Abi' lüj guial ad najtil bén Israel najl zi'c tijb xidx yag olivo ni yu' dajn ni rguuid lod biru' xidx yag olivo guin, zeel rajpil guialnaban por xliuj yag guin. ¹⁸ Zeel ad naladxil guial mazri zagdxen najl guial loj yag oliv ni rnin naj ree bén Israel. Per bal rüjnl xgab zian, basaaladx guial ad lüjt cudëë guialnaban loj xliuj yag guin, xliuj yag guin cunee guialnaban lojl.

¹⁹ Wed zanal: "Walican, per gurug xidx yag olivo guin persi guyu'n xluaran din gacan tijbzi con yag olivo guin." ²⁰ Waliquil, per xidx yag olivo ni canin naj ree bén Israel, gurug reen guial ad bililadxt reen abi' lüj guyul xluar reen guial rliladxil. Zeel ad rüjnl nabë, zagdxeli gojp cudad. ²¹ Din bal bén Israel ni canin naj ree xidx yag guin, ad bayat Dios laa reeman, ziangajc zajc saquil. ²² Gogbee guial benza'c naj Dios, per ziangajc diidxli rüjn xguialguxtisaman. Ma been xguialguxtisaman con ree bén ad bazoobt xtiidxaman, abi' ma beenan ni zagdx con lüj. Per rayal guibanl zi'c rënan, bal id züjnl zian züjn xguialguxtisaman con lüj. ²³ Abi' bal yayejc ree bén Israel con Dios, abi' chililadx reeman perdon ni zëed por laaman, züjnman laa reeman cwent con los demazri ree bén Israel rliladx. Din laaman rajp gualrniabee par yayüjnman laa reeman tijbzi con los demazri ree bén Israel. ²⁴ Din lüj guial ad najtil bén Israel, lüj guial canin najl zi'c tijb yag olivo ni yu' dajn, zile' niajqwil tijbzi con yag olivo zagdx ni rnin naj ree bén Israel, jdiixgui ree bén Israel ni ad ruzoobt ree xtiidx Dios, nid zayajc reeman tijbzi ya con los demazri ree bén Israel bal guzoob reeman xtiidx Dios!

Gac ree bén Israel perdon

²⁵ Compniar raliduladx ree Jesucrist, yu' ni ad ragbeetidi abi' rënan gagbeedan, chitëë güündi nabë. Bén Israel rüjn ree nad par guzoob reeman xtiidx Dios, cayajc zian xt chi ma bayaaloj bililadx ree bén ad najt ree bén Israel, bén ma naj ree par chililadx xtiidx Dios. ²⁶ Chi ma gojc zian, dxel graczi ree bén Israel ma güüncwent xtiidx Dios. Zian gac reeman perdon, zi'c rëb loj xtiidx Dios lod rëb:

Luguiedx Sión za bén gagnë ree bén zëed loj xdiaa Jacob.
Din yariica reeman loj nejj mal zinal reeman.

²⁷ Dxel gac cumplid da diidxan,

Zi'c ma rën loj reeman guial gūnan perdon xtol reeman.

²⁸ Per yan guial dád nad ree bèn Israel par chililadx reeman xtiidxza'c Jesucrist, zian yu' mod persi rliladxidi guial ad najtidi bèn Israel. Abi' majsi zian, rën gajc Dios laa reeman zi'c beenman promejs loj ree xbéngulal reeman. ²⁹ Din Dios ad ruchaat xixgabaman, ni ma bazaladxaman loj bejn, ad rquiedtaman laan, ad rbëeladx tēētaman bèn ma gulejman par laaman. ³⁰ Gocli ad binaltidi xnejz Dios, per yan por ree bèn Israel ad ruzoobt xtiidx Dios, ma balüüman lëjt guial rayaman lëjt. ³¹ Abi' bal yan ad ruzoobt ree bèn Israel xtiidx Dios, cayajc zian din yayaman lëjt, per chi guidxin dxej ziangajc yayaman laa reeman. ³² Cwëjb Dios guial zi'c ree bèn Israel nē ree bèn ad najt bèn Israel ad zuzoobt reeman xtiidxaman, din gac yayaman gra reeman tiblojzi.

³³ ¡Dád zro' naj xguialrignia' Dios, nē xguialrajcaman con xguialnaza'caman! Achut zajc gagbeechaaw xhienaag naj xixgab Dios o ni cayüjnman. ³⁴ Zi'c ca loj xtiidxaman lod rëb: “¿Chu zajc gagbeechaaw xhienaag naj xixgab dux Dad ree Dios? ¿Chu mazri rajc din guiëb lojman xhienaag güünman? ³⁵ ¿O chu ma badëë xhienin lojman din cwëzaman quixaman laaman?” ³⁶ Xieenman naj gra ni yu', laaman been laa reen abi' par laaman naj gran. Zeel rayal gap bejn laaman respejt zianczi. Amén.

12

Guialnaban cüb

¹ Zeel compniar raliduladx ree Jesucrist, rniaaban lojdi, zi'c ma baya Dios dunuj ree, gol basa'n lëjt loj Dios zi'c tijb gon ni ma nagle' ni yayuladx tēēman, din guibandi zi'c rënman, abi' zian guiëndi laaman. ² Ad guibanridi zi'c naban los demazri ree bèn yu' ree yan, zagdxeli gol bachaa xixgabidi din gac guidxaa zi'c nabandi abi' zian gagbeedi xhienaag rën Dios guibandi. Zian gagbeedi conin naj zagdx, conin ruladxaman, con tēēnin naj xnejz.

³ Guial naj Dios benza'c baneeman dxiin guie lon din guialan ganen xtiidxaman lojdi. Zeel rnin lojdi ni'qui tijbidi ad rayalt güün nabë guial mazri lasajquidi loj ree bejn. Zagdxeli gol been xgab por lëjt zi'c rayal, segun naj quiargueijn ni bane Dios loj tijbgajdi. ⁴ Din zi'c xcuerp bejn zien la' najn, per ad tijbtzi ni rüjn. ⁵ Ziangajc dunuj ree guial raliduladx ree Jesucrist, majsi zien nayajc ree, per por guialraliduladx ree zeel nayajc ree tijbzi con Cristo, per tijbgaj dunuj ree con ni rayal yaguieen ree din yaguieen yudar du lasa' ree.

⁶ Din tijbgaj dunuj ree garent garen naj quiargueijn ni baca' ree, zi'c naj ni güyën Dios baneeman dunuj ree. Zeel bal ma baneeman quiargueijn du loj ree par yanee ree xtiidxaman, rayal yanee ree laan loj ree bejn, rayal yanee ree laan por guialraliduladx ree. ⁷ O bal baneeman quiargueijn par yaguieen ree sirv ben ren ree, rayal yaguieen reen zi'c rayal. Bèn cwa' quiargueijn par gulüüman bejn ree xtiidx Dios, rayal gulüüman bejn ree. ⁸ O bèn cwa' quiargueijn par gudëëman consejw loj ree bejn, rayal gudëëman consejw. Guiáad bèn cwa' quiargueijn par yazaladxaman xhienin loj ree bejn, rayal yazaladxaman con guidib luxdooman. Abi' bèn cwa' quiargueijn par nabeeman, rayal gapaman cudad nabeeman zi'c rayal, o bèn cwa' quiargueijn par güünman yudar bèn cazagdiaj ree, rayal chu' luxdooman zagdx güünman laa reeman yudar.

Ni rayal güün ree bèn rliladx Jesús

⁹ Gol guyèn lasa'di con guidib luxdoodi, gol basa'n ree ni mal tiblاد, gol binal ni zagdxé. ¹⁰ Gol guyèn gra ree bejn zi'c tijb bijchidi, ad rüjn lëjt gajc benro', gol gojp respejt lasa'di.

¹¹ Ad gaquidi bén ploj par güündi ni rayal güündi, con guidib luxdoodi gol been sirv loj Dios.

¹² Gol badxe' luxdoodi zagdxé por ni cabëzidi tia'di, gol gudaan tëë loj ni rzagdiajdi, ad gucwëëz cwedx guiniabidi Dios.

¹³ Chi xhie ryaadx xcompniaridi, bén riladx ree Jesucrist, gol been reeman yudar. Gol gojc benza'c con ree bén ri't lidxidi.

¹⁴ Gol gurejdx Dios por ree bén rzunal lëjt par güün reeman lëjt ni mal, ad guzaalidi diidxmal guijc reeman, gol gurejdx Dios guial gagnëman laa reeman.

¹⁵ Gol badxe' luxdoodi nix con ree bén yu' luxdoo nix, per con ree bén yu' luxdoo naya, gol been naguiejn din gagbee reeman guial za'quidi con laa reeman.

¹⁶ Gol gubajn zagdxé con ree lasa'di, ad güündi nabë, gol gojc bén naxanladx. Ad naladxidi mazri rajquidi guial loj ree ben ren.

¹⁷ Ad güündi ni mal bén rüjn lëjt ni mal, gol been naguiejn güündi ni zagdxé loj gra ree bejn. ¹⁸ Gol been naguiejn da't din cwenëdi bejn ree zagdxé.

¹⁹ Compniar raliduladx ree Jesucrist, ad rgu' guialxyajn luxdoodi con ree bén rüjn lëjt xhienin, gol basa'nan loj Dios, laaman güün xguialguxtis, zi'c rëb loj xtiidxaman, lod rëb: “Naj naj bén rayal güün xguialguxtis, gudë tëën ni rayal bejn. Zian rëb dux Dad ree Dios.” ²⁰ Rëb tëëman: “Bal rliaan bén rdxe'ch lüj, badëëd ni gawaman, o bal re'caman nijs, badëëd ni guië'man, zian guguaial yatuman.” ²¹ Ad bal tiëbil güün ni mal lüj gan, been ni zagdxé din güünl ni mal guin gan.

13

Rayal yaya'p ree guxtis respejt

¹ Gra bejn rayal gucaagdiajg xtiidx gobiarn në xtiidx gra ree guxtis. Din por Dios yu' ree gobiarn në gra ree guxtis, por laaman zëëd guialrniabee ni rajp reeman. ² Zeel bén ad ruzoobt xtiidx ree bén rniabee guin, rën guiëban guial ad rënt reeman güün reeman zi'c rniabee Dios. Abi' ree bén rüjn zian laagajc reeman rguuil xcasti, ³ din bén rajp ree guialrniabee ad za't reeman par guchejb reeman Bén rüjn ree ni zagdxé, za' reeman par guchejb reeman Bén rüjn ree ni mal. Yan bal rën guibanl guial ad zadxebtil Bén ca' ree guialrniabee, gubajn zagdxé din yaya'nl zagdxé loj reeman. ⁴ Din laa reeman cayüjn reeman sirv loj Dios din yalaj reeman lüj. Per bal cayüjnl ni mal, zadxebil Bén ca' ree guialrniabee, din ad ca' xlia'tzi reeman guialrniabee guin, laa reeman cayüjn sirv loj Dios din gudëëd reeman casti Bén rüjn ree ni mal. ⁵ Zeel rayal guzoobidi xtiidx ree Bén ca' ree guialrniabee, ad güündi zian naabzi par ad zayaltidi casti, gol been zian guial ragbeedi zian rayal güündi. ⁶ Gol gudijx tëë impuest, din gusnuu nabee ree Bén ca' ree guialrniabee, din laan naj mandad bayal reeman par güün reeman sirv loj Dios.

⁷ Zeel gol badëëd ni rayal gudëëdidi, bal rayal cwe'quidi milia, gol gule'can o bal rayal quixidi impuest, gol gudijxan. Gol bazoob xtiidx Bén rayal guzoobidi xtiidx, gol gojp respejt Bén rayal respejt. ⁸ Gol been naguiejn gol baguijx ni ralidi loj ree bejn, abi' ad rayalt gucwëëz guiëndi bejn ree. Din Bén rën bejn ree, ma cayüjnman cumplid gra ni rniabee xley Dios. ⁹ Xmandamient Dios rëban: “Ad sunël Bén ren Bén ad najt lacheelil, ad gugüjtil bejn, ad

cwanl, ad séebladxil ni rajp ben ren”, per mandamient guie ree, con ree xmandamient ren Dios rajc cumplid con tijb mandamient rëb: “Guyën ben ren ree zi'c rën lüj gajc.” ¹⁰ Din bén rën bejn ree ad zajct güünman laa reeman ni mal guial rënman laa reeman. Zeel con guial rën lasa' bejn rayaaløj rünjman gra ni rëb loj xley Dios.

¹¹ Gol gogbee xhie tiamp nadxu' ree yan, gol gogbee guial ma gojl yatie'ch dux bacaal ree. Din yan ma zidyob dxej gui't Jesucrist guial loj chi guzuløj qui baliduladxri ree xtiidxza'caman. ¹² Mazri caydop tiamp guin, abi' mazri cabig dxej gui'taman, zeel rayal yasa'n ree ni rinë dunuj ree loj nejz mal, abi' yaguieen ree naguiejn yaguieen ree ganax ni zagdxe din yunaal ree nejz zagdxe. ¹³ Rayal yabajn ree zagdxe zi'c rayal, ad yaguieen ree ni natu. Ad yazüdx ree, o ad rayalt yaguieen ree lanij naabzi par chu' mod yaguieen ree ni dxuudx. Ad rayalt sunë bejn ben ren bén ad najt lacheelaman, o guial gapaman graløj vijs, o guialrdil o guialrdëdoj. ¹⁴ Gol basa'n lëjt gajc loj dux Dad ree Jesucrist, ad rayalt guibandi zi'ctzi rëndi.

14

Ad gusa'nxtudi bén qui rliladxri xtiidx Dios

¹ Zagdxe gol guneenë bén qui rliladxri Jesucrist ad gusa'nxtudi laaman guial mazri rajquidi guial lojman. ² Din yu' ree bén rliladx Jesucrist naladx reeman zajc gaw reeman xhietëez nin, per yu' ree bén qui rliladxri naladx reeman guial zagdxeli naj ad zajwt reeman bëël. ³ Bén rünj xgab guial zajc gawaman xhietëez nin, ad rayalt güünman tibläd bén naladx yu' ni ad zajct gaw bejn. Guiáad bén rünj xgab guial yu' ni ad zajct gaw bejn, ad rayalt guze'man bén naladx zajc gaw bejn xhietëez nin. Din niz loj Dios tiblojzi ma naj reeman xbejnman. ⁴ Zeel, ¿chu naj bejn din guze' xcompniaraman bén rliladx Jesucrist por niguinzi ree? Diosqui ragbee bal cayünjman ni zagdxe o cayünjman ni mal. Abi' bal ad wayignia'taman xhienaag güünman, dxel dux Dad ree Jesucrist rajp guialrniabee par gagnëman laaman güünman zi'c rayal.

⁵ Ziangajc yu' ree dux compniar ree bén raliduladxnë' ree Jesucrist naladx reeman guial yu' dxej zøjbloj, yu'za ree bén naladx guial tiblojzi naj gra dxej, per achet güünan, tijbgaj bejn con ni naladxaman naj zagdxe par laaman. ⁶ Din bén rünj xgab guial yu' dxej zøjbloj, rünjman zian persi rënman Dios. Guiáad bén naladx guial tiblojzi naj gra dxej, rünjman zian persi rënman Dios. Abi' bén raw graløj, rawaman guial yu'guijcaman guial por Dios zëëdan abi' rudëëman quixtëë lojman. Guiáad bén naladx guial yu' ni ad zajct gaw bejn, rünjman zian guial naladxaman zian cayajpaman Dios respejt abi' rudëëman quixtëë lojman.

⁷ Ni'qui du tijb ree ad nabant ree por dux xgabzi ree, o ad zayëjtt ree por dux xgabzi ree. ⁸ Bal nabajn ree por dux Dad ree Jesucrist par laa tëëman nabajn ree. Abi' bal yayëjt ree por laaman par laa tëëman yayëjt ree. Zeel bal nabajn ree o yayëjt ree, par dux Dad ree Jesucrist ma nayajc ree. ⁹ Din par zian güjtaman abi' babanman, din gacaman Dad loj ree bén naban në loj ree bén ma güjt.

¹⁰ ¿Chexquiza din guze' lasa'l bén rliladx Jesucrist o güün lasa'l tibläd ya? Awa dugra ree rayal yadxu' loj Dios din yadëëd ree cwent lojman. ¹¹ Zi'c ca loj xtiidxaman lod rëb:

Naj naj Dios naban,
abi' diidxli rnin lojdi guial gra ree bejn guzuxib lon.
Abi' gra ree bejn guieëb guial naj naj Dios.

¹² Abi' tijbgaj dunuj ree rayal yadëed ree cwent loj Dios, per por dunuj gajc ree.

Ad gusajbidi bejn loj dol

¹³ Zeel ad rayalt yaneeguidx du lasa' ree bén rliadx ree Jesucrist, zagdxeli yaguieen ree naguiejn yaya'p ree cudad chitëe por dunuj ree güün reeman dol. ¹⁴ Naj najn xbejn Jesús, ragbeen guial ad dolt naj gaw bejn xhietëeznin. Per par bén naladx guial ad zajct gawaman xhietëeznin, par laaman dolan cayünman bal gawaman xhietëeznin. ¹⁵ Yan bal por ni rawil naladx tijb xcompniaril bén rliadx Jesucrist guial dolan cayüjn, abi' bal id ridxga'l laaman rën guiëban guial ad rëntil laaman. Gojp cudad chitëe por ni rawzil güün xcompniaril dol, din nëgajc por laaman güjt Jesucrist loj crüzj. ¹⁶ Ad güünl tijb ni guinieeguidx ree xcompniaril lüj, majsi lüj ragbee guial ad ni malt naj ni cayüjn. ¹⁷ Niz loj Dios ad ni rawt bejn o ad ni rë'taman naj ni lasajc, ni lasajc par laaman naj guial guiban bejn xnejz, yabedxe luxdoo bejn, chu' tëe luxdooan nix por xSprijt Dios. ¹⁸ Abi' bén naban zian guial zinalaman Jesucrist, cayünman zi'c rën Dios, zi'c ruladx tëe bejn.

¹⁹ Zeel rayal yaguieen ree naguiejn yabajnnë' du lasa' ree zagdxe yabedxe tëe du luxdoo ree, din yasnuu yayagbee ree xhienaag yunaal ree xnejz Dios. ²⁰ Gol gojp cudad chitëe por ni rawzidi gunijitidi tijb xbejn Dios. Walican graczi zajc gaw bejn. Per ni mal guin naj bal par xcompniaril dolan cayüjn. ²¹ Zeel zagdxeli naj guial ad zajwtil bëel ad zë' tëetil vin o xhie stijb nin bal por laan güün xcompniaril dol. ²² Majsi lüj ragbee guial achet güünan gaw bejn xhietëeznin, per zagdxeli lüjzi con Dios. Naj rni guial, jxiquilbaa bén ad yu'nawëëgt luxdoo rawaman xhietëeznin! ²³ Per bén yu'nawëëg luxdoo par gawaman xhienin, abi' gawaman laan laagajcaman ma cayün dol guial ad cayawtraman guidib ladxaman. Bal naladx bejn ad laat naj ni cayünman, dxel laagajcaman cayün dol.

15

Royal yaguieen ree ni naladx bejn naj zagdxe

¹ Yan, dunuj ree guial ma nadxu'dxi'ch ree loj ni raliduladx ree Jesucrist, rayal yaguieen ree yudar bén ad wazudxi'cht loj guialrliadx Jesucrist luar yaguieen ree ni rayentzi ree, ² dugra ree rayal yaguieen ree naguiejn din chu' luxdoo dux compniar ree zagdxe con dunuj ree. Abi' rayal yaguieen ree ni naladx reeman naj zagdxe, din chile' gusnuu güünbee reeman xnejz Dios. ³ Din ni'qui Jesucrist ad beent zi'c naj xixgabaman, gojc zi'c ca loj xtiidx Dios lod rëb: "Naj bayal gra ree diidx mal ni ninia reeman lojl." ⁴ Gra ni ca loj xtiidx Dios, can din yayagbee ree xhienaag yabajn ree, abi' por xtiidx Dios zëed pacens në gualragnë chitëe yalenyä' ree yalëjz ree ni ralëjz ree yaca' ree. ⁵ Dios, bén razaladx pacens në gualragnë chitëe yalenyä' ree, laaman gagnë lëjt din guibandi nadxag con gra ree xcompniaridi zi'c naj xixgab Jesucrist. ⁶ Din tiblojzi guilies reeman xvalor Dios, xdad dux Dad ree Jesucrist.

Bire'ch xtiidx Dios loj ree bén ad najt bén Israel.

⁷ Zeel, zi'c baca' Jesucrist lëjt par gaquidi xbejnman, ziangajc gol guneenë ree xcompniaridi zagdxe, bén rliadx ree laaman par guiliesidi xvalor Dios. ⁸ Gol basaaladx guial bi't Cristo loj guidxliuj par gülüüman bén Israel ree xtiidx Dios, zian bidgaguieenman sirv loj reeman, persi gojc cumplid promejs ni been Dios loj ree xbéngulal reeman, abi' zian biguien guial rünqu

Dios cumplid xtiidxaman. ⁹ Bi't tēē Cristo loj guidxliuj din por laaman, bèn ad najt ree bèn Israel guilies reeman xvalor Dios guial rayaman laa reeman, zi'c ca loj xtiidxaman lod rēb:

Xt loj ree bèn ad najt bèn Israel guzatan lūj
guial najl benza'c.

Gol tēēn cant ree par lūj.

¹⁰ Ziangajc rēb zatibljajt loj xtiidx Dios:

Lējt bèn ad najt ree bèn Israel,
gol babaa zi'c rabaa ree bèn Israel.

¹¹ Zatibljajt loj xtiidx Dios rēb:

Gra ree bèn ad najt bèn Israel.

Nē los demazri ree bejn, gol gules xvalor Dios.

¹² Rēb tēē Isaías:

Loj xdiaa Isaí, grii tijb bèn nabee bénguidxliuj ree,
xt ree bèn ad najt bèn Israel, chililadx laaman.

¹³ Dios bèn ragnē dunuj ree ralējz ree ni caylējz ree, laaman yagu' luxdoodi zagdxe yabe'cdxe tēēman luxdoodi guial rliiladxidi laaman, din cwēz da'tidi ni guneeaman por xSprijt Dios.

¹⁴ Compniar raliduladx ree Jesucrist, naj ragbeecheaw guial zagdxe nabandi con ree xcompniaridi, ma ragbee tēēdi zagdxe xhienaag chinalidi xnejz Dios, xt rajc rudēēdidi consejw rulūū tēē xcompniaridi. ¹⁵ Per majsi zian, tio'p choon lajt loj gui'ch guie bacan diidx naa, din yasaaladxidi xhienaag guibandi. Rūnan zian por guialrniabee ni ma banee Dios naj, ¹⁶ din gūnan sirv loj Jesucrist. Din da dxiinan naj gulūn bèn ad najt ree bèn Israel xtiidxza'c Dios din guiban reeman zi'c rēn Dios, din gac reeman naya niz lojman por xSprijtaman. ¹⁷ Ra'pan xhie gūnnē'n nabē, guial ragnē Jesucrist naj por ree dxiin cayūnan por Dios. ¹⁸ Per achetctzi zajc guiēn bal id zēn guial por Cristo cayūnan laan, din laaman cayagnē naj persi cayūnan yudar bèn ad najt ree bèn Israel din gac chililadx reeman guzoob tēē reeman xtiidx Dios. Yan ma rliiladx reeman laaman por ni rēn loj reeman nē por guial ruguiaa reeman xhienaag nabanān, ¹⁹ nē guial ma baguiaa reeman sen ree con ree milagr ni ma gojc por xguialrniabee xSprijt Dios. Zian ma gutiechan xtiidxza'c Jesucrist guidibczi, diizd Jerusalén xt guidib niz Ilírico. ²⁰ Din zian naj da xgaban gūnan, gatie'chan xtiidxza'c Jesucrist. Per ad lod ma guzulojt ben ren con dxiin guie, gatiechanan lod ad waguiejtctzi reeman xcwent Cristo, ²¹ zi'c ca loj xtiidx Dios lod rēb:

Bèn ad waguiejnt ree xcwentaman,
gūnbee reeman laaman.

Guiáad ree bèn ad wayagbeet xcwentaman,
gagbee reeman laan.

Rūjn Pab xgab cheman Roma

²² Abi' guial wan guidibczi lod ma rnin lojdi, zeel ad wayajct gan guidganan lējt, majsi zianczi guyēnan nidganan lējt. ²³ Per yan guial ma gulox gutiechan xtiidx Dios guidib niz guie, abi' guial ma gojc zien iyz ni rēnan guidganan lējt, ²⁴ zeel rūnan xgab guidganan lējt chi gan España. Abi' chi gadēēdan guguian lējt, chi ma gojc tio'p choon dxej yu' luxdoon zagdxe guial za'n con lējt, dxel ma gūndi naj yudar din gan España. ²⁵ Per yan yaloj gan Jerusalén chigsa'nān tijb yudar par ree dux compniar ree bèn rliiladx ree Jesucrist. ²⁶ Din bèn Macedonia ree con ree bèn Acaya bèn rliiladx gajc ree Jesucrist, been reeman xgab guto'p reeman yudar guin par ree bēnprob zojb

ree Jerusalén, bén rliadx ree Jesucrist. ²⁷ Abi' por xixgab reeman guixhiaal reeman yudar guin, per zagdxe naj ni cayüjn reeman din mal nuzëëb reeman loj reeman. Din por ree bén Israel bidxin xtiidx Dios loj reeman, dxel yan laa reeman guial ad najt reeman bén Israel, zagdxen guial güün reeman yudar bén Israel ree zi'ctzi gac reeman. ²⁸ Zeel chi ma balooxan dxiin guie, chi ma bayün yudar guin, dxel gan España, abi' chi gadëëdan ladxidi dxel guidganan lëjt. ²⁹ Naj ragbee guial chi guidganan lëjt, zien da't ni guneë Dad Jesucrist par ganin lëjt.

³⁰ Yan por dux Dad ree Jesucrist në guial rën xSprijt Dios dunuj ree, rniaaban lojdi din güüdi naj yudar yarejdx yanaab ree Dios por naj. ³¹ Gol gurejdx gunab Dios din gagnëman naj loj ree bén Judea, bén ad rliadxt ree Jesucrist, gol gurejdx tëë Dios por dux compniar ree bén rliadx ree Jesucrist, bén zobj ree Jerusalén din tiëb reeman tia' reeman yudar ni chigsa'nan par laa reeman. ³² Dxel bal gagnë Dios ma chu' luxdon zagdxe guidganan lëjt dxel ma zajc yaziiladxan la'tgaj za'n con lëjt. ³³ Dux Dad ree Dios bén rabe'cdxe du luxdoo ree, laaman gagnë gradi. Amén.

16

Rugajpdioz Pab bejn ree

¹ Yan ni gui't Febe ladxidi, béngunaa ni naj dux compniar ree guial raliduladx ree Jesucrist, bén cayüjn tëë sirv lën yadoo ni zobj guiedx Cencrea. ² Gol baca'man zagdxe por Dad Jesucrist, zi'c rayal yaguieennë' ree dux compniar ree bén rliadx ree Jesucrist. Gol beenman yudar bal xhienin ryaadxaman, din dád zien ree bejn ma beenman yudar nëgajc naj ma beenman yudar.

³ Gol bagajpdioz Aquila con xbéngunaaman Priscila, bén cayüjn ree naj yudar cayguieenan sirv loj Jesucrist. ⁴ Abi' laa reeman xt guzuj reeman loj guialgüjt por naj, zeel rudën quixtëë loj reeman. Abi' ad najtzi rudë quixtëë loj reeman në ree dux compniar ree bén rliadx ree Jesucrist bén ad najt ree bén Israel rudëë quixtëë loj reeman. ⁵ Gol bagajpdioz ree bén rliadx Jesucrist, bén rado'p ree lidx Priscila con Aquila. Gol bagajpdioz da miwan Epeneto, bén goc bén yaloj bililadx xtiidx Jesucrist niz Acaya. ⁶ Gol bagajpdioz Li, bén ma been da't lëjt yudar. ⁷ Gol bagajpdioz ree bén ladxan Adrónico con Junias, bén guyu'në' reen ladxguib. Abi' ree xi apóstoles Jesús dád rën reeman laa reeman, abi' yaloj laa reeman bililadx Jesucrist guial lon.

⁸ Gol bagajpdioz Amplias, da miwan bén rën da'tan guial nayajcan xbejn Jesucrist. ⁹ Gol bagajpdioz Urbano, bén cayüjn naj yudar cayguieenan sirv loj Jesucrist. Gol bagajpdioz tëë da miwan Estaquis. ¹⁰ Gol bagajpdioz Apeles, bén ma balüü guial diidxliczi rliadxaman Jesucrist, gol bagajpdioz tëë xfamil Aristóbulo. ¹¹ Gol bagajpdioz tëë Herodiön ben ladxan, në ree xfamil Narciso, bén ma rliadx Jesucrist. ¹² Gol bagajpdioz Trifena në Trifosa, bén cayüjn ree sirv loj Jesucrist. Gol bagajpdioz tëë Pérsida, bén naguieenbee ree guial dád cayünman sirv loj Jesucrist. ¹³ Gol bagajpdioz Rufo, bén diidxliczi zinal xnejz Dios, gol bagajpdioz tëë xniaaman, bén rënan zi'c da nan. ¹⁴ Gol bagajpdioz Asincrito, Flegonte, Hermas, Patrobas, Hermes në gra ree bén za' con laa reeman, bén ma rliadx ree Jesucrist. ¹⁵ Gol bagajpdioz Filólogo, Julia, në Nereo con bizanman, në Olimpas con gra ree bén rliadx Jesucrist bén za' ree con laa reeman.

¹⁶ Gol bagajpdioz lasa'di zi'c rayal. Dux compniar ree bén raliduladx ree Jesucrist bén za' ree guie, rugajpdioz reeman lëjt.

¹⁷ Compniar raliduladx ree Jesucrist, rniaaban lojdi din gapidi cudad con ree bén rlia' lasa' ree bejn, bén rusquiee ree bejn guial rulüü reeman ni ren ree guial loj ni ma basiididi. Ad guidxga'di laa reeman, ¹⁸ din ad lojt Jesucrist cayüjn reeman sirv, rüjn reeman ni rëntzi reeman, abi' con diidxnagüüdx ne con diidxa'c rüjn reeman gan bén ad ragbeetcki ree o bén ad ragbeeza'ct ree xtiidx Dios. ¹⁹ Per lëjt, guidibcki ma ragbee ree bejn guial ruzoobquidi diidx zinalidi xtiidx Dios, dád nix yu' luxdon abi' rënan susindi par güündi ni zagdx ad par güüntidi ni mal. ²⁰ Dios, bén rabe'cdxe luxdoo bejn, laaman gagnë lëjt nayob chitëë güünri xindxab lëjt gan. Dux Dad ree Jesucrist gagnë lëjt.

²¹ Rugajpdioz Timoteo lëjt, bén cayüjn naj yudar con xchiin Dios ni cayünan, në ree bén ladxan bén la ree Lucio, Jasón, në Sosípater, rugajpdioz reeman lëjt.

²² Në Tercio, bén cayüjn gui'ch guie rugajpdioz lëjt por dux Dad ree Jesucrist.

²³ Nëtëë Gayo rugajpdioz lëjt, lidxaman za'n, runee tëë lidxaman rado'p ree dux compniar ree bén rliladx ree Jesucrist. Në Erasto, bén naj tesorer luguiedx guie në bén la Cuarto ben rliladx Jesucrist, rugajpdioz reeman lëjt.

²⁴ Dux Dad ree Jesucrist güünle' gradi. Amén.

Diidx bigra bacaa Pab loj gui'ch guie

²⁵ Radëën quixtëë loj Dios din laaman zile' gagnë lëjt din gusnuu gagbeedi sudxi'ch tëedi loj xtiidxza'c Jesucrist, zi'c ma balüün lëjt xhienaag din gaquidi perdon. Din zian naj xixgab Dios diidz chi gad guidxliuj gacchaaw, xgab ni ad gogbeet ree bejn diidz guia'xchej. ²⁶ Per yan ma rayagbee ree xhienaag naj xixgab Dios, ma rayagbee ree por ree gui'ch ni bacaa ree bén badëë xtiidx Dios loj ree bejn zi'c gunabee Dios laa reeman, bén naban goctëëz. Abi' guidibcki care'ch xtiidx Dios din chililadx ree bejn Jesucrist guzoob tëë reeman xtiidxaman.

²⁷ ¡Tijbzi Dios, bén rajc gradooczi, rayal yaya'p reeman respejt ziancki por Dad Jesucrist! Amén.

Gui'ch yaløj ni guxhaal San Pabl loj ree bèn Corinto riladx Jesucrist

Rxhiaal Pab xtiidx Dios

¹ Naj Pab, Dios bacaabee naj gacan tijb xi apóstol Jesucrist. Za' Sóstenes guie con naj, bèn riladx Jesucrist. ² Caxhalan gui'ch guie par lèjt najdi bèn riladx xtiidx Dios luguiedx Corinto, lèjt guial ma nayadi delant loj Dios por Jesucrist, abi' ma bacaabee Dios lèjt gaquidi xbejnman bacaabee tèëman gra ree bèn gra lad bèn riladx ree Jesucrist, bèn naj Dad par dunuj ree nē par laa reeman. ³ Dux Dad ree Dios nē Dad Jesucrist güünle' lèjt, yabe'cdxe tèë reeman luxdoodi.

Rudëed Pab quixtëe loj Dios

⁴ Gra dxejczy rudëdan quixtëe loj Dios por lèjt zi'c ma gognëman lèjt guial riladxidi Jesucrist. ⁵ Nē guial najdi tijbzi con Jesucrist dád ma gognë Dios lèjt, baneeman lèjt quiargueijn din guineedi chignia' tèedi xtiidxaman. ⁶ Zian rguien guial diidxli naj ni ma bigueijndi por Cristo diizd chi guzuløj bililadxidi laaman. ⁷ Abi' zianczy rajpidi xyudar Dios la'tgaj rbëzidi dxej ni gui't Jesucrist zatijb. ⁸ Abi' Dios gagnë lèjt din sudxi'chidi guidiblagaa loj ni riladxidi laaman, chitëe xhie xtolidi chu' dxej ni gui't dux Dad ree Jesucrist zatijb. ⁹ Din Dios diidxli rüjn xtiidxaman cumplid, abi' laaman naj bèn gule lèjt din gaquidi tijbzi con dux Dad ree Jesucrist.

Ad rayalt la' lasa' ree xbejn Jesucrist

¹⁰ Compniar raliduladx ree Jesucrist, rniaaban lojdi por Jesucrist din guidxag cwedi, ad gaquidi tio'p lala', tijbzi gol gojc, tijbzi xgab gol been. ¹¹ Rnin lojdi zian compniar raliduladx ree Jesucrist, din ma gogbeen guial yu' wadijl entr lèjt, zian bagojn ree xfamil Cloé naj. ¹² Guial garent garen rëb ree bejn, yu' reeman rëb: "Naj naj xbejn Pab", yu' tèë reeman rëb: "Naj naj xbejn Apolos", yu' reeman rëb: "Naj naj xbejn Bëd", yu' tèë reeman rëb: "Naj naj xbejn Cristo." ¹³ Per naj rni lojdi guial Cristo tijbzi najman, din ad najt güit loj crüzj por lèjt, ad gurobnijs tèëtidi par gaquidi da bejnman. ¹⁴ Quixtëe Dios chi wan ladxidi achut mazri barobnijsan, Crispozi nē Gayo. ¹⁵ Chitëe guiëbidi guial gurobnijsidi par gaquidi da bejnman. ¹⁶ Barobnijs tèën xfamil Estéfanas, per ad rusaaladxtran chu mazri barobnijsan. ¹⁷ Din ad guxhaal Cristo naj par gurobnijsan bejn ree, guxhaalaman naj par gatie'chan diidx xhienaag gap bejn perdon loj Dios. Ad cane tèëtan con diidx ni yadxaløj ree bejn naj luar cu'guijc reeman par xhie güjt Cristo loj crüzj.

Xguialrniabee Dios nē xquiargueijnman

¹⁸ Gra ni raguie'ch ree guial por xhie güjt Cristo loj crüzj, achet lasajcan par ree bèn zë loj nejz mal. Per par dunuj ree guial ma raya'p ree perdon, dád lasajc xguialgüjtaman din zian rayagbee ree xhienaag naj xguialrniabee Dios. ¹⁹ Abi' loj xtiidx Dios rëb:

Gunijtan xquiargueijn ree bèn ni rëb guial rajc da't reeman,

abi' gusajyan xquiargueijn ree bèn ni rëb guial rignia' da't reeman.

²⁰ Yan, ¿con ree bèn rëb guial rajc da't reeman? ¿Con ree mextr rajc ley? ¿Con ree bèn rëb guial rajc da't reeman xcwent ree ni yu' loj guidxliuj? Par Dios achet lasajc xquiargueijn bënguidxliuj. ²¹ Abi' por xquiargueijn Dios

ragbeechaawaman guial ad zayünbeet bénguidxliuj laaman por xquiargueijn reeman, zeel beenman xgab yabëëman bejn loj casti por xtiidxaman ni caylüün bejn ree. Abi' ree bèn yarii loj casti guin laa reeman naj bèn rliladx laaman, majsi par ree ben ren achet lasajc ni canin por Cristo.

²² Din bèn Israel ree rën reeman guguaa reeman milagr din chililadx reeman, abi' ree bèn ad najt bèn Israel rën reeman guien reeman ni mazri nawëëg din chililadx reeman. ²³ Per dunujn ni caylüün bejn ree naj par xhie güjt Cristo loj crüzj, abi' ree bèn Israel rdxe'ch reeman, guiáad par ree bèn ad najt bèn Israel achet sirv rüjn ni caylüün. ²⁴ Per par ree bèn ma bacaabee Dios, zi'c ree bèn Israel zi'c ree bèn ad najt bèn Israel, por Cristo rguien xguialrniabee Dios në xquiargueijnman. ²⁵ Din ni rulüü achet lasajc guial ni rüjn Dios, laan naj ni mazri lasajc loj xguialrajc bénguidxliuj. Abi' xt ni bigra xguialrniabee Dios laan naj ni mazri lasajc loj xguialrniabee bénguidxliuj. ²⁶ Gol gogbee compniar raliduladx ree Jesucrist guial ta'nzi ree bèn rliladx laaman naj bèn rignia' zi'c naladx ree bénguidxliuj, ta'nzi ree bèn rliladx laaman rajp guialrniabee loj guidxliuj guie, abi' ta'nzi ree bèn rliladx laaman naj ree bèn za loj ree famil ni naj bèn zøjbloj. ²⁷ Abi' Dios gulej ree bèn ni naladx ree bejn ad rajcza'ct din yaya'nxtu ree bèn rajc da't, gulej tëëman bèn ad ca't ree guialrniabee din yaya'nxtu ree bèn ca' guialrniabee. ²⁸ Dios gule ree bèn ni naladx ree bejn guial achet sirv laa reeman, bèn ni naladx ree bejn guial achet lasajc reeman, bèn ni achut naj loj guidxliuj guie din chiquiedaman xguialdxal ree bèn naj ree chunin loj guidxliuj guie. ²⁹ Zianan zeel achut zajc güün benro' delant loj Dios. ³⁰ Yan por Dios ma najdi tijbzi con Jesucrist, dxel por laaman rtia'di xguialrajc Dios. Abi' guial raliduladx ree Jesucrist ad zayaltri ree casti, por laaman ma naya ree, nayajc tëë ree par laaman abi' ma raya'p ree perdon loj Dios. ³¹ Zianan din gac zi'c rëb loj xtiidx Dios lod rëb: “Bal yu' bèn rën guilies xvalor gajc, luar güündi zian gol gules xvalor dux Dad ree Jesucrist.”

2

Xtiidx Jesucrist bèn cwa loj crüzj

¹ Compniar raliduladx ree Jesucrist lëjt ragbee guial chi wan ladxidi, chi gunen xtiidx Dios lojdi, ad gunetan lojdi con ree diidx nabee o con ree diidx nawëëg par chignia'di. ² La'tgaj guzun con lëjt ad gunetan diidx ren ree lojdi, tijbzi xcwent Jesucrist bèn cwa loj crüzj. ³ Abi' chi wan ladxidi zi'c tijb bèn ni ad yu't gojl, rnijczan guial rdxeban bialan lojdi. ⁴ Në chi gunenë'n lëjt, chi gunen xtiidx Dios lojdi, ad gunenë'tan lëjt con ree diidx ni günan lëjt gan por da diidxan, benan gan rliladxidi Jesucrist por xyudar xSprijt Dios në xguialrniabeeman. ⁵ Din guiguien guial ni rliladxidi Jesucrist zëëdan por xguialrniabee Dios ad por xguialrajc bénguidxliuj.

Por xSprijt Dios nünbee bejn laaman

⁶ Majsi chi ralüün bèn ni ma rajc ree mazri xtiidx Dios, ralüün laa reeman por guialrajc. Per ad por guialrajc ni yu' loj guidxliuj guie, lasa' guialrajc ni rajp ree bèn rniabee, guialrajc ni yu' dxex nit. ⁷ Ralüün laa reeman por guialrajc ni zëëd por Dios, din yanee ree zi'c naj xixgab Dios, xgab ni goc ni nague'ch par ree bénguidxliuj, abi' xgab guin naj guial chililadx reeman Jesucrist, diizd chi gad guidxliuj gacchaaw been Dios xgab guin din gac yayal ree xanyabaa. ⁸ Laan naj tijb ni ad gogbeet ree bèn rniabee loj guidxliuj guie,

din bal niagbee reeman dxel ad nucaat reeman dux Dad ree Jesucrist loj crüzj, bèn ca' gualrniabee. ⁹ Per loj xtiidx Dios rëb:

Achut waguiaa, achu tëët waguiejn

abi' ni'quid wayüjnt bénguidxliuj xgab

por ni nagu'chaaw Dios par ree bèn rën laaman.

¹⁰ Per dunuj ree ma balüü Diosan duloj ree por xSprijtaman bèn naban con dunuj ree, din xSprijt Dios gran ragbeeman, xt ni mazri naguie'ch ni zëed por Dios.

¹¹ Achut ragbee xhie xgab cayüjn tijb bejn. Xsprijtsaman ragbee xhie xgab cayüjnman. Ziangajc xSprijt Dios tijbzi laaman ragbee xhienaag naj xixgab Dios. ¹² Abi' dunuj ree guial ma zunaal ree xnejz Dios, ad nabajnt ree con tijb sprijt ni zëed loj guidxliuj guie, ma nabajn ree con Sprijt zëed loj Dios, din por xSprijt Dios yayagbee ree gra ni ma bazaladx Dios duloj ree guial najman benza'c. ¹³ Abi' laa reen naj ni caylüün bejn ree, per ad por dux quiaraguejntan, xSprijt Dios culüü dunujn xhienaag yanen. Zian ralüün xcwent Dios bèn ma nabannë xSprijtaman.

¹⁴ Per bèn ad nabannët xSprijt Dios ad rliadxtaman ni zëed ree por Dios ni rulüü xSprijt Dios dunuj ree, din par laaman najn tijb ni ad rüjnt sirv. Zeel ad zajct chignia'man xcwent Dios din con xSprijtzi Dios zajc chignia' bejn ni rën guiëban. ¹⁵ Per bèn ma nabannë xSprijt Dios por Sprijt guin rignia'man ni naj xcwent Dios, abi' ni'qui tijb ree bèn ad nabannët xSprijt Dios ad rignia't chexc zeel rignia'man ni guin ree. ¹⁶ Loj xtiidx Dios rëb: “¿Chu ma bignia' xixgab Dios? ¿Chu zajc gulüü Dios ni güünman?” Per dunuj ree, naj dux xgab ree zi'c xixgab Cristo.

3

Compniar rüjn ree sirv loj Dios

¹ Compniar raliduladx ree Jesucrist, chi guzun con lëjt ad gunenë'tan lëjt zi'c ree bèn ma nabannë xSprijt Dios, gunenë'n lëjt zi'c ree bèn ad nabannët xSprijt Dios, zi'c ree bèn qui guzuløjri rliadlx Jesucrist. ² Diidx ad nawëëgt ree gunenë'n lëjt zi'c rudëë bejn lejch loj tijb xindobëz guial xo gawix ni raw bengol, zian gunenë'n lëjt diidx ad nawëëgt ree. Abi' ni'qui yan ad zile't ganenë'n lëjt zi'c ree bèn ma rignia' mazri xtiidx Dios. ³ Din sta nabandi zi'c naban gra ree bénguidxliuj. Nadëdloj lasa'di rdil tëëdi, zian rguien guial sta nabandi zi'c gra ree bénguidxliuj bèn ad zinalt ree xnejz Dios. ⁴ Din chi rëbidi: “Naj naj xbejn Pab”, o chi rëbidi ya: “Naj naj xbejn Apolos”, zian rguien guial sta cayüjndi zi'cgajc chutëëz bénguidxliuj.

⁵ Per naj rni lëjt: ¿Chu naj Pab o chu naj Apolos? Gol gogbee guial nayajczan tio'p ree bèn cayüjn sirv loj Dios persi bile' bililadxidi tijb gajc dunujn cayguieen dxiin ni banee Dios dunujn. ⁶ Yaguie'ch ree guial naj naj zi'c bèn rxübin abi' Apolos naj bèn rguuil, per por Dios caygbeedi mazri ctiidxaman zi'c rusni'saman tijb cwaandoo. ⁷ Abi' zi'c bèn rxübin zi'c bèn caguiil mandadzi cayüjn reeman, Diosan naj bèn ni rusni's ni rxübin reeman. ⁸ Yan ziangajc naj con Apolos tijbzi mandad cayguieenan, rayagbeen guial zunee Dios dunujn ni rayalan bal xhienaag yaguieenan mandad ni banee-man yaguieen tijb gajc dunujn. ⁹ Zeel naj con Apolos nayajcan compniar cayguieenan xmandad Dios.

Yaguie'ch ree lëjt naj xguiniaa Dios lod cayguieenan dxiin o lëjt naj zi'c tijb yu ni cayüjn Dios. ¹⁰ Abi' naj guial catiechan xtiidxaman najn zi'c tijb albanil bèn ni rajp da't cudad din grii xchiinman zagdxë guial bacaabeeman naj

günan xcimiant yu guin. Abi' ree bèn ni cusnuu culüü xtiidx Dios, laa reeman naj zi'c bèn cusnuu cayüjn yu guin. Per rayal gap reeman cudad xhienaag cales reeman yu guin, ¹¹ din achut zajc guchaa cimiant ni ma benan, abi' cimiant guin naj guial rililadx Jesucrist. ¹² Abi' ree bèn ni cayguie'ch ree naj ree bèn ni cusnuu cales yu loj cimiant ni cayguie'ch ree naj gualrliladx Jesucrist, bal cayüjn reeman laan con or o con plajt o con ree guiaj zagdxe o con yag o con biqui o con balagya'. ¹³ Per chi guidxin dxej ni güün Dios xguialguxtisaman, dxel guiguien xhienaag naj xchiin reeman. Din dxej guin gac zi'c chi rajc prueb xhienin loj guij din guiguien xchiin tijb gaj bejn. ¹⁴ Abi' bal rüjn sirv ni beenman zi'c tijb bèn ni ruzoob tijb yu ni ad re'ct, zaca'man ni rayalaman por ni beenman. ¹⁵ Per bal che'c ni beenman, sacaman zi'c tijb bèn ni re'c lidx abi' penz rliaaman loj bajl, din zajcaman perdon per gusëëbaman gra.

¹⁶ Zeel gol gogbee guial lëjt naj zi'c tijb xyadoo Dios guial nabandi con xSprijt Dios. ¹⁷ Abi' bal chu bèn guitie'chdojn bèn rililadx ree Jesucrist, zunidloj Dios laaman guial ruse'nman xyadoo nagle'man ni canin naj lëjt guial najdi xbejnman.

¹⁸ Ad gusquiee lëjt gajc. Bal yu' tijbidi naladx guial rajc da'tidi guial loj ree bejn, zagdxeli gol been naya din gaquidi diidxli bënrajc da't. ¹⁹ Din delant loj Dios achet lasajc gualrajc bënguidxliuj, tib lajt loj xtiidxaman rëb: “Ad rudëët Dios mod grii zagdxe ni naj xixgab ree bèn naladx guial dád nasin reeman par güün reeman tijb ni ad najt xnejz.” ²⁰ Rëb tëë loj xtiidxaman: “Dios ragbeechaaw guial xixgab ree bèn rajc da't achet lasajcan.” ²¹ Zeel ad rayalt chu guilies xvalor gajc guial najman xbejn tijb bejn o stijb bejn. Din xieendi ma naj gra. ²² Ma nulendi dunujn, naj Pab, Apolos në Bëd. Xieendi naj guidxliuj, gualnaban, gualgüjt, ni yu', në ni qui chu'ri, xieendi naj gra. ²³ Abi' lëjt ma najdi xbejn Cristo abi' Cristo naj Xi'n Dios.

4

Dxiin ni been ree bèn naj ree xi apóstoles Jesús

¹ Gol baguiaa dunujn zi'ctzi xmojs Cristo par yasiidan bejn ree xhienaag naj xixgab Dios, xgab ni naguie'ch par bejn. ² Per lëjt ragbee guial tijb mojs naj par güünman gra ni rayal güünman din gap reeman laaman confianz. ³ Zeel ad rutan xgab bal xhienaag ruguiaadi naj o bal xhienaag ruguiaa ree xuxtis naj, din ni'qui naj ad zajt ganin xhienaag najn. ⁴ Din majsi bal naladxan guial achet ni mal wayünan per ad por ziant ma ganin guial achet da faltan niz loj Dios, tijbzi dux Dad ree Jesucrist ragbee xhienaag cayünan. ⁵ Zeel ad rayalt yadxa lojdi chu cayüjn zagdxe o chu ad cayüjnt zagdxe, gol basa'n ree ni guin par dxej ni gui't Dad Jesucrist. Laaman gusguien conin naj diidxli, o bal wali ree baguieen ree xmandadaman guidib du luxdoo ree, dxej guin yayagbee ree xhie diidxza'c guiniee Dios por tijb gaj dunuj ree.

⁶ Compniar raliduladx ree Jesucrist, gra ree ni canin lëjt wen par lëjtan. Abi' Apolos con naj nayajcan tijb ejempl par lëjt, din por dunujn gusiididi ad tédlañ guiliesidi xvalor bejn chitëë por zian gusa'ndi trajs stijb bejn. ⁷ Din ni'qui tijb bejn ad lasajct mazri loj stijb bejn. ¿O xhie rajpidi ni ad baneet Dios lojdi? Abi' bal por laaman rajpidi ni rajpidi, ¿chexc zeel rlies xvalorgajquidi zi'c rulüü ad por Diost rajpidi laan?

⁸ Lëjt naladxidi achet ryaadxidi, guial ma bayaaløj rignia'di abi' ad ryaadxtridi dunujn. Abi' naladxidi najdi zi'c ree rey. ¡Per xinix niajquidi

rey din nanabeen con l jt! ⁹ Yu' dxej naladxan guial dunujn nayajcan xi ap stoles Jes s, Dios basial dunujn yayajcan zi'c ree b n ad lasajct, zi'c ree benmal ni rayal gualg jt, abi' radxaloy ree anjl n  ree b nguidxliuj dunujn. ¹⁰ Abi' la'tgaj nayajcan zi'c ree b n ad yu't xquiarguejn par b nguidxliuj guial ratie'chan xtiidxa'c Cristo, l jt rlies xvaloridi guial rignia' da'tidi guial rliadxidi laaman. Dunujn nayajc zi'c b n ad yu't gojl gui ad l jt naladxidi yu' da'tidi gojl abi' rajp ree bejn l jt respejt gui ad dunujn ad r nt reeman dunujn. ¹¹ Xt yandxej sta cayzaagdiajn por gualrlian, guial re'c nijs n  guial ryaadx du xaban. Zienloj ni r jnn  ree bejn dunujn, achet du lidxan. ¹² Abi' d d radxagan raguieenan dxin din guidxel ni yadaawan. Chi ruzaal ree bejn diidxmal du guijcan radxi'nan con diidxa'c, abi' radaanan ni r jnn tzi reeman dunujn. ¹³ Abi' chi rnieeguidx reeman dunujn, raneeza'cn 'n laa reeman. Xt yan nayajcan zi'c tijb guix par b nguidxliuj, nayajcan zi'c tijb ni ad r jnt sirv par laa reeman. ¹⁴ Ad cucatan gui'ch guie par gusa'nxtun l jt, cucan laan din gunen l jt consejw zi'cgajc da xi'n reen guial r nan l jt. ¹⁵ Din majsi gapidi zi'c chii m l ree b n gusiid l jt, per najzi naj zi'c tijb Dad par l jt. Din por naj guzuloy rliadxidi Jesucrist chi basidan l jt xtiidxa'caman. ¹⁶ Zeel rniaaban lojdi din guibandi zi'c nabananan.

¹⁷ Din par zian rxhialan Timoteo gutixlojman l jt, b n r nan zi'c da xi'nan laaman diidxli rliadxaman Jesucrist. Laaman gusaaladx l jt xhienaag nabananan guial rliadxan Jesucrist, din zi'c nabananan naj ni cusidan b n rliadx ree Jesucrist gra lod ran. ¹⁸ Yu' ree xcompniaridi naladx guial ad zitixlotran l jt abi' rlies xvalor reeman guial naban reeman zagdxe. ¹⁹ Per Dios gunee permis din diob gutixlon l jt dxel gagbeen wali reeman ya naban reeman zi'c rniee reeman o rnieez reeman. ²⁰ Din guial guiban zi'c rniabee Dios ad najtan diidxzi, rayal g  n bejn zi'c rniabee Dios con xgualrniabeeman. ²¹ Yan,  conin r ndi g nan chi gutixlon l jt, gadil 'n l jt ya o gui enan l jt ganen 'n l jt diidxa'c?

5

Xhienaag gac con b n r jn tijb dol

¹ Ma bacagdiagan guial tijb l jt b n rliadx ree Jesucrist nabann  xnaropidi zi'c lacheelidi, ni'quiza ree b n ad n nbeet Dios ad r jnt lasa' dol guin. ² Abi' l jt r jndi benro', luar r jndi benro' gol guyunaya gol bab e t e b n guin lojdi. ³ Majsi ad za'tan con l jt, per r nan xgab por l jt zi'cgajc rul   za'n con l jt, abi' ma benchaawan xgab xhie rayal b n r jn dol guin. ⁴ Zi'c gualrniabee ni banee Jesucrist naj, naj rni l jt: "Gol bachajg lasa'di." Dxel gol gunaladx guial za'n con l jt abi' por xgualrniabee Dad Jesucrist, ⁵ gol been b n guin tiblax, gol basa'nman loj xindxab din gagnaaman o sagdiajman por ni cay jman din gacaman perdon dxej ni gui't dux Dad ree Jesucrist.

⁶ Ad nixtan guial rlies xvalorgajquidi abi' rti jvidi rajc lasa' ree dol guin. Gol gogbee guial zi'c r jn levadur cob par guiadxtil ziangajc con tijb b n g  n dol ma z  gajcan zian con gra ree lasa'di. ⁷ Zeel gol been naguiejn din gaquidi naya zi'c cob harin ni ad yu't levadur guijc. Din zi'c bag jt ree bejn tijb xiil lanij pascw din yaya xtol reeman, ziangajc dunuj ree por xgualg jt Jesucrist ma naya ree loj Dios. ⁸ Abi' guial yabaa ree por zian naj guial yabajn ree guidib du luxdoo ree zi'c rayal, zi'c guiadxtil ni ad no'cht levadur, luar yabajn ree con ree ni mal n  ree dol zi'c babajn ree yaloj.

⁹ Abi' zi'c ma rnin lojdi loj stijb gui'ch ni ma guxhalan lojdi, ad guchajguidi b n naban ree nadxuudx. ¹⁰ Ad canen 'tan l jt zian por ree b n ad rliadxt Dios, b n naban ree nadxuudx o rz  bladx reeman ni ruguiaa'tzi reeman o naj reeman gubaan o r n reeman ni ren luar gui n reeman Dios, din bal zianan dxel ryaadx yariidi loj guidxliuj guie. ¹¹ B n ni canin l jt naj ree b n ni r b naj ree xcompniaridi, b n rliadx ree Jesucrist abi' naban reeman nadxuudx, o rz  bladx reeman ni ruguiaatzi reeman, o r n reeman ni ren ree luar gui n reeman Dios, o rb   reeman xtiidx bejn, o naj reeman bengui', o b ngubaan. Xcompniaridi b n naban ree zian ni'quid rayalt gawn di laa reeman. ¹²⁻¹³ Ad da cwenttan naj ganen por ree b n ni ad najt dux compniar ree loj ni raliduladx ree Jesucrist bal rajp reeman dol o ad rajpt reeman dol, Dios naj b n g  n guialguxtis con laa reeman, per dux cwent ree naj guial yazuxnejz ree b n naj ree dux compniar ree b n rliadx ree Jesucrist. Zeel gol bab   b n cayi n dol entr lojdi.

6

Chi yu' wadijl entr ree b n rliadx Jesucrist

¹ Zi'c chi xhie rzajcn  tijb xcompniaridi b n rliadx Jesucrist,  chexc zeel r jdi loj guxtis din yab  xnejzaman ni rzajquidi luar chedi loj ree xcompniaridi b n rliadx ree Jesucrist? ²  Id rliadxidi ya guial yu' dxej b n rliadx ree Jesucrist laa reeman naj b n g  n xguialguxtis loj ree b nguidxliuj? Abi' bal yu' dxej g  n xguialguxtis reeman loj b nguidxliuj,  chexquiza zeel ni ad naw  gt ni rzajc ree xcompniaridi ad rajct rab  xnejzidi? ³  Id ragbeedi ya guial xt loj ree xianjl Dios yu' dxej yaya'p ree guialrniabee?  Abi' xt mazri ziale' yal  xnejz ree ni cayza'c ree loj guidxliuj guie! ⁴ Zeel zi'c chi xhie rzajcn  lasa'di,  chexc zeel z di loj ree b n ad najt xbejn Cristo din yab  xnejz reeman ni rzajquidi? ⁵ Canin l jt ni guin ree din yatu lojdi.  Wen nid yu'czi tijb l jt zajc yab  xnejz ni rzajc lasa'di ya? ⁶ Per l jt luar g  ndi zian aal rud  d lasa'di loj ree b n ni ad rliadxt Dios.

⁷ Abi' natun guial gud  d xcompniaridi loj guxtis guial cadilidi, mejorli gol gudaan ni r jnn  reeman l jt. Mejrli ti bidi con reeman xieendi. ⁸ Per luar g  ndi zian, l jtlci cayi n ree ni mal guin con ree xcompniaridi b n rliadx ree Jesucrist. Rti'a'di xieen reeman abi' r jnn di laa reeman ni ad rayalt g  nn di laa reeman.

⁹  Id ragbeedi ya guial b n naj ree benmal ad zut reeman loj xguialrniabee Dios? Gol gogbee guial loj xguialrniabee Dios ad zut ree b n ni naban ree nadxuudx, n  ree b n r n ree ni ad najt ree Dios, n  ree b n za'n  b n ad najt lacheel reeman, n  ree xinguaaw r jn zi'c b ngunaa n  ree xin r n lasa' xinguaaw zi'c b ngunaa. ¹⁰ N  ree b ngubaan, n  ree b n rz  bladx ni ruguiaatzi reeman, n  ree bengui' con ree b n rnieeguijdx bejn, n  ree b n raguiil xhienaag chiquied reeman xieen bejn, ad zut reeman loj xguialrniabee Dios. ¹¹ Yu'di gubajn zian guia'xchej, per yan ma nayadi delant loj Dios, ma najdi par Dios, abi' ma nayabidi zi'c tijb b n ni ad way jnt dol por xguialrniabee Dad Jesucrist n  por xSprijt Dios b n ma nabann di.

Dux cuerp ree naj par Dios

¹² Walican zajc yaguieen ree zi'ctzi ray n ree, per ad gratan naj zagdxe par g  n bejn. Zajc g nan zi'ctzi r nan, per ad zati  btan xhie nabee naj. ¹³ Yu' ree bejn r b: "Gualraw naj par l n bejn, abi' l n bejn naj par gualraw." Walican, per gunidloj Dios grop ree ni guin. Per ad walitan guial xcuerp bejn naj par

güünman ni dxuudx ree con bèn ad najt lacheelaman. Din dux cuerp ree naj par Dios, abi' laaman rniabee dux cuerp ree. ¹⁴ Dxel zi'c basban Dios dux Dad ree Jesucrist, ziangajc yasbanman dunuj ree por xguialrniabeeman.

¹⁵ Gol gogbee guial ma najdi tijbzi con Cristo, guial dux cuerp ree ma naj tibli'a xcuerpaman. ¿Wen yaca' ree xcuerp Cristo ya ni cayguie'ch ree naj dux cuerp ree par yuné' ree tijb béngunaa dxuudx? ¡Ad rayalt gac zian! ¹⁶ ¿Nid ragbeedi ya guial chi runé bejn tijb bèn ni ad najt lacheelaman, dxel ma najman tijbzi con bendxuudx guin? Léjt ragbee guial loj xtiidx Dios rëb: "Grop reeman ma naj tijbzi." ¹⁷ Per bèn ni ma naj tijbzi con dux Dad ree Jesucrist, najman tijbzi con laaman por xSprijt Dios.

¹⁸ Gol gojþ da't cudad ad güündi ni dxuudx ree con bèn ad najt lacheelidi. Xhietëez dol ren ad ruxhiintan xcuerp bejn zi'c rxin xcuerpaman chi rünman ni dxuudx con bèn ad najt lacheelaman. ¹⁹ Din gol gogbee guial léjt naj xyadoo xSprijt Dios bèn ma baneeman lojdi, dxel zian zi'c ma nabandi con xSprijt Dios ad rniabeetri léjt gajc. ²⁰ Din par zian gudijx Jesucrist por dunuj ree chi gütaman loj crüz. Zeel gol beenné xcuerpidi dxiin par güündi Dios bèn zøjbloj, din laaman naj bèn rniabee léjt.

7

Consejw xcwent guialruxhliia

¹ Yan, yadxi'n diidx xcwent ni gunabdiidxidi naj loj gui'ch ni guxhaalidi lon. Naj rni zagdxe naj guial ad zuxhliiat bejn. ² Per chitëe güün bejn dol con stijb bejn, zagdxen guial tijb gaj xinguaaw chu' lacheel o tijb gaj béngunaa chu' lacheel, ³ din gudëe xinguaaw guin gust lacheelix abi' béngunaa guin gudëezaman gust lacheelaman. ⁴ Din chi ma baxhliia tijb béngunaa ad laatraman rniabee xcuerp, xinguaaw guin naj xin rniabee laan. Ziangajc chi ma baxhliia xinguaaw, ad rniabeetri xcuerpiz, béngunaa guin ma rniabee laan. ⁵ Zeel xinguaaw në béngunaa ad rayalt gudxoon xcuerpidi loj lacheelidi. Per bal ma bedi diidx con lacheelidi guial ad zugaalt lasa'di tio'p choon dxej din cwedx guiniabidi Dios, zagdxen. Per chi ma gudë ree dxej guin, gol bachajg lasa'di stijb chitëe güün xindxab léjt gan con ree xixgabidi.

⁶ Ad canitan lojdi guial najczi guxhliia bejn, per ad ni maltan guial guxhliiaadi. ⁷ Da xgaban naj guial xi nix gra ree bejn gac zi'c naj, per tijb gaj bejn ma bazaladx Dios xquiarguiejnman guial xhienaag guibanman, bal guxhliiaaman o bal id zuxhliiaaman.

⁸ Par ree bèn xtijb në par ree béngunaa bizëjb, naj rni guial zagdxeli yaya'n reeman zi'c naj. ⁹ Per bal id zadaan reeman guial ad zuxhliiat reeman, dxel zagdxeli guxhliia reeman luar gudëd xcuerp reeman casti guial taan reeman.

¹⁰ Guiáad ree bèn ma baxhliia, ad da diidxtan ganin lojdi, xtiidx dux Dad ree Jesucristan guial ad zaro'nt béngunaa lacheelaman. ¹¹ Per bal tio'n lacheelaman ad rayalt guxhliianëman xin ren, zagdxeli naj yachajg lasa' reeman stijb. Ziangajc xinguaaw ad najt yala' lacheelix.

¹² Yan, ni ganin ad ni guneet dux Dad ree Jesucristan, per naj rni lojdi: Bal yu' xinguaaw rliladx Jesucrist abi' lacheelix ad rliladxt, abi' bal par béngunaa guin achet güünan, dxel ad najt yala' lasa' reex. ¹³ Ziangajc bal rliladx béngunaa guin abi' lacheelaman ad rliladxt, abi' bal par xinguaaw guin achet güünan, dxel ziangajc ad rayalt yala' reeman. ¹⁴ Din xinguaaw ni ad rliladxt Jesucrist, zünle' Dios laax guial rliladx lacheelix. Guiáad béngunaa

ni ad rliładxt Jesucrist züjnle' Dios laaman guial rliładx lacheelaman, zian güünle' Dios xi'n reex. Din bal id naj zian, ad nayabt xi'n reex loj Dios zi'c tijb bèn ni ad wayüjnt dol. ¹⁵ Per bal xingüiaaw o béngunaa ni ad rliładxt Jesucrist rēnman yala' lacheelaman guial rliładx lacheelaman Jesucrist, yala'ri reeman. Bèn rliładx ad zajct güünman naguiejn guibannē lacheelaman laaman din ad gurejdxť Dios dunuj ree par yabajn ree con wadijl. ¹⁶ Din béngunaa guin ad ragbeetaman bal güünman gan chililadx lacheelaman, o bal xingüiaaw guin ma rliładx dxel ni'qui laax ad ragbeet bal güünx gan chililadx lacheelix.

¹⁷ Naj rni guial tijbgaj ree bèn ni ma rliładx Jesucrist rayal guiban reeman loj guidxliuj guie zi'c ma bacaabee Dios laa reeman, yaya'n reeman zi'ctzi naj reeman chi guzuløj rliładx reeman Jesucrist. Zianan naj ni cayēn loj ree dux compniar ree bèn rliładx ree Jesucrist güün reeman. ¹⁸ Bal tijb bejn chi guzuløj rliładxaman Jesucrist mal yu'man sen ni ru ree bèn Israel, yaya'nraman zian. O bal id yu'man sen guin chi guzuløj bililadxaman Jesucrist, ad najť chu'man sen guin. ¹⁹ Din achet güünan bal yu' bejn sen guin o ad yu'taman sen guin, ni mazri lasajc naj guial güünman zi'c rniabee Dios. ²⁰ Zeel gol baya'n zi'c najđi chi guzuløj bililadxidi Jesucrist. ²¹ Bal najł zi'c bèn nado' chi guzuløj bililadxil laaman, ad najťan ni chu'l xgab xhienaag güünł. Per bal zile' ad zajctril zi'c bèn nado', mazri zagdxē barii loj ni najł zi'c bèn nado' guin. ²² Bèn ni naj zi'c bèn nado' chi guzuløj bililadxaman Cristo ma najman zi'cgajc bèn ni ad najť zi'c bèn nado' par güünman sirv loj Cristo. Abi' bèn ni ad najť zi'c bèn nado' chi guzuløj bililadxaman Cristo, dxel Cristo ma rniabee laaman. ²³ Lējt ragbee guial ma gudijx Jesucrist zro' por lējt, yan ma najđi par Dios. Ad rayalt tiēbidi nabee ree bénguidxliuj lējt con ree ni rusquiee. ²⁴ Zeel rnin lojđi compniar raliduladx ree Jesucrist, gol baya'n zi'c najđi chi guzuløj bililadxidi Jesucrist.

²⁵ Yan lējt bèn ad waxhliaat ree, dux Dad ree Jesucrist achet rēbaman por zian. Per naj zajc gunen lējt consejw xhienaag güündi, abi' da xgaban naj guial zaliladxidi ni ganin lojđi din guial raya Dios naj bacaabeeman naj cayünan mandad ni cayünan. ²⁶ Zeel naladxan guial zi'c naj tarbajw ni caydüüd ree yan, zagdxeli naj guial ad zuxhliaatidi. ²⁷ Bèn ni ma baxhliaa ad najť gusa'n lacheelaman. Guíaad bèn ni ad waxhliaat ad rayalt güünman naguiejn guxhliaman. ²⁸ Per bal rüjnł xgab guxhliaal, ad dolt naj guxhliaal. Ziangajc ree biinxdüb ni rēn guxhliaa, ad dolt naj guxhliaa reem. Per rugojnan lējt guial zienloj naj ni rzajc bèn ruxhliaa, abi' laan ad rēntan saquidi.

²⁹ Ni rēnan gagbeedi naj guial ma caydop ree dxēj ni zio'p ree loj guidxliuj guie par yaguieen ree xmandad Dios. Zeel bèn ni ma baxhliaa ree gol been sirv Dios xt lod guneetzan lējt zi'cgajc ree bèn ni ad waxhliaat. ³⁰ Ni'qui gualrabaa, ni'qui gualrunaya, ni'qui guial rajp bejn xhienin loj guidxliuj guie achet zajc gudxoon guial güün bejn xmandad Dios. ³¹ Bèn ni ad ryaadxt ree xhienin loj guidxliuj guie, gol gunaladx guial achet rajpidi, din gra ni yu' loj guidxliuj guie najn ni rdēd.

³² Ni rēnan naj guial ad zutidi xgab por ree ni yu' loj guidxliuj guie. Tijb xingüiaaw xtijb mazri rüjnx xgab por xmandad Dios, mazri rüjnx naguiejn güünx zi'c ruladx Dios. ³³ Per tijb xingüiaaw ni ma baxhliaa mazri rüjnx xgab por ree ni yu' loj guidxliuj guie, par laax mazri rüjn naguiejn yabaanē lacheelix laax. ³⁴ Dxel tio'p ma naj xixgabix, por Cristo nē por xbéngunaax. Ziangajc tijb béngunaa ni ad waxhliaat mazri rüjnman xgab por ree xmandad

Dios guidiblagaa rüjnman sirv loj Dios par güünman zi'c ruladxaman. Per tijb béngunaa ni ma baxhliaa mazri rüjnman xgab por ree ni yu' loj guidxliuj guie, mazri rüjnman naguiejn yabaanë lacheelaman laaman.

³⁵ Gra ni canin lojdi, canin laan par günan læjt yudar ad par gudxontan guxhlaadi, caninan din guibandi zi'c rayal xnejz dxel gol been gol gubajn tée zi'c rën dux Dad ree Jesucrist sin guial gudxoon xhienin læjt.

³⁶ Chutëez xinguaaw rüjn xgab guxhlaanë biin rnienëx abi' bal ma yu' biingunaa guin ijz par guxhlaam, güünri reex ni naladx reex naj zagdxe par laa reex. Bal guxhlaa reex, guxhlaari reex. Ad doltan guial guxhlaa bejn. ³⁷ Ziangajc chutëez bèn ni ad rüjnt xgab guxhlaa, ad rayalt güünman xgab guial rüjn naguiejn guxhlaaman bal ma beenman xgab zagdxe guial ad zuxhlaataman. Din zagdxe gajcan bal id zuxhlaa bejn. ³⁸ Zeel rnin lojdi zagdxen guial chu guxhlaa, per mazri zagdxe bal id zuxhlaa bejn.

³⁹ Tijb béngunaa chi ma baxhlaaman, ad rayalt sunëman xinguaaw ren chi nabannë lacheelaman. Per bal guiët lacheelaman ma zajc tia' xin ren laaman per con tijb ree xcompniaraman xin rliladx Jesucrist. ⁴⁰ Per naladxan guial mazri zagdxe guibanman bal id zuxhlaaman stijb. Zian rünan xgab guial nabannë'n xSprijt Dios zi'cgajc læjt.

8

Guialraw ni rbe'c ree bejn loj ni naladx reeman naj Dios

¹ Yan, ganin lojdi xcwent ree guialraw ni rbe'c ree bejn loj ree ni naladx reeman naj Dios. Dunuj ree rayagbee guial dugra ree rayignia' xhienaag yaguieen ree por ree ni guin, per yu' dxej por guialrignia' rhes bejn xvalor gajcaman. Per guialrën lasa' bejn lasajc mazri din por guial rën lasa' bejn zile' yaguieen yudar du lasa' ree din yasnuu yayignia' ree xhienaag rayal yabajn ree. ² Bal yu' bèn naladx guial ma bayaaloj rignia'man gra, cusquiee laagajcaman din ryaadx da'tri chignia'man. ³ Per bèn ni rën Dios, Dios nünbee laaman.

⁴ Yan por guial raw bejn guialraw ni ma gule'c reeman loj ree ni naladx reeman naj Dios, dunuj ree rayagbee guial achet guialrniabee rajp ree dios guin loj guidxliuj guie, din tijbzi Dios yu'. ⁵ Majsı yu' ree bejn naladx guial yu' zien ree dios bèn rniabee xanyabaa në loj guidxliuj, ⁶ per dunuj ree rayagbee guial tijbzi dux Dad ree Dios yu' abi' por laaman yu' gra ni yu' por laa tēëman nadxu' ree loj guidxliuj guie. Tijbzi Jesucrist naj Dad par dunuj ree abi' por laaman yu' gra por laaman tēë raya'p ree guialnaban.

⁷ Per ad grat ree bejn rüjn xgab zian. Din yu' ree bèn ni guyën graloj ni naladx reeman naj Dios, abi' yan guial qui bililadxri reeman Jesucrist naladx reeman guial dolan gaw tijb bejn guialraw ni ma gurej loj ree dios guin. ⁸ Dunuj ree rayagbee guial ad ni rawt bejn rüjn guiban bejn mazri zagdxe loj Dios, lasa'gajcanan bal yadaaw ree o ad zadaawt ree lasa' ree guialraw guin. ⁹ Per majsı læjt ragbee guial zajc gawidi xhietëëznin, rayal gapidi cudad ad güündi guial ree bèn qui rliladxri Jesucrist güün reeman dol. ¹⁰ Din bal lüj guial achet naladxil rawil xhietëëznin, zobjil cayawil guialraw ni ma gurej loj ree ni ad najt dios. Dxel guguaa tijb ree bèn qui rliladxri Jesucrist lüj abi' nëgajcaman sëëbladx gaw guialraw guin majsı lën luxdooman naladxaman guial ad zagdxe naj ni cayüjnman. ¹¹ Dxel por xguialrajquil cayüjnl guial güünman dol guial ad nixt yu' luxdooman cayawaman ni guin ree, per badxe'guijc guial në por laaman güjt Jesucrist loj crüzj. ¹² Zeel bal rüjnl tijb ni naj ni mal par ree bèn qui rliladxri ree Jesucrist abi' rüjn reeman

dol por lüj, dolan cayüjn delant loj Cristo. ¹³ Bal por tijb ni rawan rüjn ree da compniaran dol, mejorli ad zawtran laan chitëë güünman dol por naj.

9

Ni zajc güün tijb apóstol

¹ Lëjt ragbee guial zajc güünan ni rënan por gualrniabee ni ra'pan guial najn apóstol. Ma baguiaan dux Dad ree Jesucrist abi' lëjt naj ree bën ni ma benan gan par laaman guial ma bililadxidi laaman. ² Bal yu' ree bën ni ad nünbeet naj zi'c apóstol, per lëjt ragbee guial apóstol najn. Din zi'c ma rililadxidi Jesucrist dxel ma rguien guial diidxli najn apóstol.

³ Abi' par ree bën ad rililadxt guial najn apóstol, ze naj ni rën loj reeman: ⁴ Ra'pan derejch gunee reeman ni gawan në ni guië'n. ⁵ Abi' zajc tëë guxhlian con tijb béngunaa naj dulasa' raliduladx ree Jesucrist din chinë'n laaman bantëëz guin gan, zi'c rüjn los demazri ree apóstoles con ree bijch Dad Jesucrist në Bëd. ⁶ ¿O najzi con Bernabé bayal yaguieenan xmandad Dios dux cwentan ya? ⁷ Per ni'qui tijb suldad ad rejt loj wadij xwentaman, yu'czi bën rguixj xgaxtaman. Ziangajc bën rxübin uv, ¿wen id zajc gawaman laan ya? Laadx bën ni rajp vag ree, ¿wen id zajc guië'man xlejch reeb ya? ⁸ Abi' ad xixgabtzi bénguidxliujn canin lojdi, në loj ley ni badëë Dios loj Moisejs rëb zian. ⁹ Din loj ley guin rëb: "Ad gudxe'di guixh ro' ree be gui'xh la'tgaj cayüjn reeb dxin." Ad rëbt Dios zian guialzi yu'man laa reeb xgab, ¹⁰ rëbaman zian por dunuj ree. Din zi'c bën rlia' yuj zi'c bën rusia trigo, grop reeman yu'guijc guial yu' ni yaca' reeman. ¹¹ Yan ma balün lëjt xhienaag chinalidi xnejz Dios, ¿wen zro' da't yanaaban lojdi ya bal güündi dunuj yudar din gusunuu dux guialnabanan? ¹² Bal stijb ree bën ni rusiid lëjt rila' rtia' reeman ni rayal gudëëdidi loj reeman, dxel ziangajc dunujn raya'pan mazri derejch güündi dunuj yudar.

Per majsi zian dunujn achet wanaaban lojdi zi'c naj derejch ni raya'pan, caydaanzan ni raza'can chitëë xhie cwib guijc guial ad zucaagdiajgtri ree bejn xtiidxza'c Jesucrist. ¹³ Lëjt ragbee guial gra ree bixhioz ni rüjn sirv lën xyadoo Dios, rtia' reeman tibda'n ni rinë ree bën Israel loj Dios persi rila' rbajn reeman. Ziangajc gra ree bixhioz ni rüjn ree sirv lule' yadoo guin lod rinë ree bejn be ree par Dios, në reeman rtia' ta'n ni rinë ree bejn persi rila' rbajn reeman. ¹⁴ Yan laagajcan rëb dux Dad ree Jesucrist por ree bën ni rulüü xtiidxza'caman, guial por ree bën ni rulüü reeman rayal guiban reeman. ¹⁵ Per naj achet caca'n, ad caxhal tëtän gui'ch guie lojdi din guneedi xhienin. Din par naj zagdxeli naj guiëtan luar chu' bën chiquied guialrabaa guin luxdon guial cusidan bejn ree xtiidxza'c Jesucrist.

¹⁶ Ad rayalt gales da valor gajcan guial cusidan bejn ree xtiidxza'c Jesucrist, din mandad guin naj ni bayalan. ¡Prob naj bal idan gusid bejn ree diidxza'c guin! ¹⁷ Zeel bal cayünan mandad guin guial ruladxan güünan laan, dxel yu' ni gaca'n. Per ni'qui bal id ruladxan güünan mandad guin, laan bayal güünan. ¹⁸ Abi' ni rünan gan naj guialrabaa ni yu' luxdon majsi ad naxtan, majsi ad caca'tan ni rayal tia' bën ni rulüü xtiidxza'c Jesucrist, per cusnuu culün diidxza'c guin ree bejn ree.

¹⁹ Abi' majsi ad yu't bën rniabee naj por mandad guin, per laa naj guie par gra ree bejn din gac güünan sirv xbejn Cristo. ²⁰ Abi' chi za'n con ree bën Israel, rünan naguiejn persi yu'guijc reeman guial nayajcan bën Israel din güünan gan gac reeman xbejn Cristo. Chi za'n con ree bën Israel bën

rùjn ree naguiejn chinal xley Moisejs dxel rünan zi'c bèn zinal ley guin, din günan gan gac reeman xbejn Cristo, majsi ragbeen guial ad rniabeet ley guin naj. ²¹ Abi' chi za'n con ree bèn ad najt bèn Israel, bèn ad zinalt ree ley guin dxel majsi ragbeen guial Dios naj bèn rniabee naj guial nabanen zi'c rniabee Cristo, per rünan naguiejn din guguaa reeman naj zi'cgajc tijb lasa' reeman din gac günan gan gac reeman xbejn Cristo. ²² Chi za'n con ree bèn yu'nawëëg par günn reeman o gaw reeman xhienin, dxel rünan naguiejn din su reeman zagdxé con naj din günan laa reeman yudar gac reeman xbejn Cristo. Bantëëz lod ran rünan naguiejn din guguaa reeman naj zi'cgajc tijb lasa' reeman, din günczan gan majsi ta'nzi reeman günan gan gap reeman perdon por Cristo.

²³ Gra ree ni guie cayünan guial rënan xtiidzxa'c Jesucrist, din tiblojzi güünle' Dios naj con gra ree bèn rililadx diidzxa'c guin ree.

²⁴ Lëjt ragbee guial chi yu' tijb carrer zien bejn ruxüün, per tijbzaman naj bèn rtia' prem. Ziangajc lëjt gol been naguiejn tia'di ni guneé Dios. ²⁵ Bèn ni ruxüün ree rajp laagajc reeman cudad chitëë xhie gudxoön guxüün reeman. Rùjn reeman zian din günn reeman gan, abi' ni rùjn reeman gan naj tijbzi coron balag ni rigool cari. Per dunuj ree ni cayguieen ree naguiejn cayca' ree najn tijb prem ni ad yu't dxej nit. ²⁶ Abi' ragbeechaawan xhienin cayünan, ad cayüntan zi'c tijb bèn ni ruxüün sin guial gagbeen chexc, ad rüntan zi'c tijb bèn ni rga'p sin guial gagbeeman ban ca'paman. ²⁷ Zeel cusagdiaj naj gajc din gac ganabee naj gajc günan zi'c rayal günan, chitëë guial culün bejn ree xtiidzxa'c Jesucrist achet yayalan delant loj Dios.

10

Guial rën ni ad najt ree Dios

¹ Compniar raliduladx ree Jesucrist, gol basaaladx guial dux bengol gulal ree bèn binal ree Moisejs, gra reeman guza xan zaj ni guxhaal Dios abi' gra reeman gudëd loj nijsdoo ni la nijsdoo xniam. ² Zian biguien guial xbejn Moisejs naj reeman din gra reeman guzanë laaman xan zaj guin, abi' gudëd reeman con laaman loj nijsdoo guin. Zian gurobnijs reeman loj zaj guin në loj nijsdoo guin. ³ Gra tëë reeman gudaw guialraw ni bi't diidz xanyabaa. ⁴ Gra tëë reeman gu' nijs ni bazaladx Dios loj reeman, nijs brii lad tijb guiaj. Rën guiëban guial diidz nadxel mal naban Cristo con laa reeman lod zëtzi reeman. ⁵ Per zien reeman ad beent zi'c ruladx Dios, abi' güjt reeman niz loj yujbidx niz lod guza reeman.

⁶ Gra nine gojc din yayagbee ree guial ad laa yaguieen ree lasa' ree ni mal ni been reeman. ⁷ Ad rayalt yayën ree ni rëb ree bejn naj ree Dios zi'c been zien ree dux bengol gulal ree, din rëb loj xtiidx Dios xcwent reeman: "Gurej reeman, gudaw reeman dxel bisu reeman been reeman ni dxuudx ree." ⁸ Ad rayal tëët günn bejn ni dxuudx con bèn ad najt lacheelaman, zi'c been zien ree dux bengol gulal ree abi' tijb dxej güjt gajlbichoon mil reeman. ⁹ Ad zaneeguijdx tëët ree Dios zi'c been zien ree bèn guin, abi' gudaw bëël laa reeman persi güjt reeman. ¹⁰ Ad rayal tëët yaguie'ch ree guial ad cayüjnt Dios zi'c rayal, din zian been zien ree dux bengol gulal ree abi' guxhaal Dios tijb anjl bagüjt laa reeman.

¹¹ Gra ni guzac reeman cwan loj xtiidx Dios din yayagbee ree guial ad laa yaguieen ree zi'c been reeman, dunuj ree guial nabajn ree yan guial ma caydop dxej ni yadëed ree bejn cwent loj Dios. ¹² Zeel bèn ni naladx za'dxi'ch loj xnejz Dios, mejorli gapaman cudad chitëë günn dol laaman gan. ¹³ Gra

ni cazajquidi ad najtan ni ad rzajct bejn, din Dios ad zaro'nladxtaman lëjt. Ad zuslaat Dios saquidi tijb ni ad zadaantidi, abi' laaman güün lëjt yudar din gagbeedi xhienaag laadi loj ni cayajc.

¹⁴ Zeel compniar raliduladx ree Jesucrist, zi'c rënan lëjt rnin lojdi gapidi cudad ad goc guiëndi ni naladx ree bejn naj dios. ¹⁵ Naj ragbee guial najdi ganax bèn rignia', zeel lëjt gajc gol been xgab bal zagdxë naj ni canin lojdi. ¹⁶ Chi raguieen ree zi'c been dux Dad ree Jesucrist chi gudaw reeman guxhin bigra, dxel chi radü' ree vin ni ma gogle' rasaaduladx ree rejn ni ma guxhie'man chi gütaman por dux tol ree. Abi' chi radaaw ree guiadxtil zi'c beenman, laan naj tijb sen guial ma nayajc ree tijbzi con laaman. ¹⁷ Din majsi zien nayajc ree, per zi'c rlia' tijbzi guiadxtil par dugra ree, zian rguien guial ma nayajc ree tijbzi con Cristo.

¹⁸ Lëjt ragbee xhienaag rüjn ree bèn Israel chi rinë reeman tijb gon par Dios, abi' zi'c raw reeman tibia' gon guin yu'guijc reeman guial ma naj reeman tijbzi con Dios. ¹⁹ Ad canitan lojdi por ree ni naladx ree bejn naj dios guial lasajc reen o guial lasajc guialraw ni gurej loj ree dios guin. ²⁰ Din bèn rüjn ree zian ad lojt Diosan rbe'c reeman guialraw guin ree, loj xindxaban rbe'c reeman laa reen. Abi' ad rëntan gaquidi tijbzi con ree xindxab guin. ²¹ Ad zacjt güüdi zian par guiguien guial ma najdi tijbzi con ree xindxab guin, abi' gaw tēdi guiadxtil con vin din guiguien guial ma najdi tijbzi con Cristo. ²² ¿O rëndi ya yache'ch ree Dios? ¿Wen mazri raya'p ree guialrniabee guial lojman ya?

Xhie zajc güün ree xbejn Dios

²³ Graczi zajc güün bejn, per ad gratan naj zagdxë guial güünman. Majsi gra zile' güün bejn, per ad gratan rüjn sirv par güün lasa'man yudar chinalaman xnejz Dios. ²⁴ Din ad rayalt yaguieen ree xgab por dunujzi ree, rayal yaguieen ree xgab por ree dux compniar ree.

²⁵ Zi'c chi rziidi bëel luguaia', ad guiniabdiidxidi bal ma gurejn loj xdios reeman, chitëë xhie guinialadxidi chi gawidi laan. ²⁶ Din xieen dux Dad ree Dios naj guidxliuj con gra ni yu' lojn.

²⁷ Bal tijb bèn ad waliladxt xtiidx Dios na lojdi guial chitawidi lidxaman, abi' bal rëndi chedi gol chej. Gol gudaw gra ni gunee reeman lojdi ad xhie guiniabdiidxidi chitëë xhie naladxidi. ²⁸ Per bal yu' xcompniaridi na guial ni cunee bèn guin cayawidi ma gurejn loj xdiosaman, ad gawidi laan por bèn bagojn lëjt chitëë güünman xgab mal guial ad laat cayüjndi, majsi lëjt ragbee guial xieen dux Dad ree Dios naj guidxliuj në ni yu' loj guidxliuj guin. ²⁹ Ad canitan lëjt xcwent guial xhie naladxidi, ni canin lëjt naj por ree xgab ni zajc güün tijb xcompniaridi por lëjt.

Per wed yu'di rüjn xgab: "Per, ¿chexc zeel ad züntan gra ni ragbeen ad najt ni mal por xixgabzi stijb bejn? ³⁰ Wed rëb tēdi: Naj ragbee guial rudën quixtëë loj Dios por gra ni rawan, ¿chexquiza zeel güün reeman xgab mal por naj?"

³¹ Per naj rni lojdi gra ree ni guin rayal gudxe'guijquidi din zi'c ni rawidi zi'c ni rē'di në gra ree ni rüjndi rayal güündi laan par güündi Dios bèn zojbloy.

³² Gol gojp cudad xhienaag nabandi din zi'c ree bèn Israel zi'c ree bèn ni ad najt bèn Israel con ree xcompniaridi bèn riladx ree Jesucrist ad züjnt reeman xgab mal por lëjt. ³³ Din zian rünan, rünan naguiejn chitëë xhie naladx bejn con naj. Ad rüntan ni rüjnzi naj yudar, rünan naguiejn din günan ni rüjn yudar zien ree bejn din gac gap reeman perdon loj Dios.

11

¹ Zeel gol binal zi'c rünan, zi'c zinaalan zi'c been Cristo.

Xhie rayal güün ree bejn chi rbejdx rniab reeman Dios

² Naj dád rabaanë'n lëjt guial rusaaladxidi naj, guial yu'guijquidi rüjn tēedi zi'c balün lëjt. ³ Rën tēen gusaaladxidi guial Dios rniabee Cristo abi' Cristo rniabee xinguaaaw abi' xinguaaaw rniabee bēngunaa. ⁴ Tijb xinguaaaw chi rgu' xhienin guijquix par cwedx guiniabix Dios o gulüüx xtiidx Dios, natu naj ni cayüjnx. ⁵ Ziangajc chutēez bēngunaa cabejdx canab Dios o culüüman bejn ree xtiidx Dios, abi' achet xoob guijcaman, natu gajc naj ni rüjnman. Güünman cwent guial najman zi'c tijb bēngunaa ni biaj guijc xt garej. ⁶ Zeel bal tijb bēngunaa ad rēntaman guixhioob xhienin guijcaman, gugajli guijcaman. Per bal ragbeeman, guial natun guiyaj guijcaman xt garej, mejorli guixhioob xhienin guijcaman. ⁷ Per xinguaaaw achet zajc chu' guijquix din Dios beenman laax zi'cgajczi laaman, zian rulüüx respejt ni rajpix Dios. Abi' bēngunaa guial rxhioob xhienin guijcaman, zian rulüüman respejt ni rajpaman xinguaaaw. ⁸ Din ad gojct xinguaaaw con guxtil lad bēngunaa, bēngunaa guin gojc con guxtil lad xinguaaaw. ⁹ Ad gojct xinguaaaw par bēngunaa, bēngunaa guin gojc par xinguaaaw. ¹⁰ Zeel bēngunaa rayal guixhioob xhienin guijcaman din guiguien guial xinguaaaw rniabee laaman zi'c rulüü ree anjl chu rniabee laa reeman. ¹¹ Majsi delant loj Dios tiblojzi naj bejn, din bal id bēngunaa niu achut xinguaaaw niu, abi' bal id chu xinguaaaw niu achut bēngunaa niu. ¹² Walican, guial con guxtil lad xinguaaaw gojc bēngunaa, per yan por bēngunaa ri't xinguaaaw loj guidxliuj, zeel zi'c xinguaaaw con bēngunaa por Dios yu' reeman loj guidxliuj.

¹³ Naj rni lëjt, lëjt gajc gol been xgab bal zagdxen cwedx guiniab tijb bēngunaa Dios abi' achet naxhoob guijcaman. ¹⁴ Bejn gajc ragbee guial natun bal id zugaj guijc xinguaaaw. ¹⁵ Per par bēngunaa mazri zagdxen rguienman bal guyool guidxguijcaman, din rajpaman laan par gusiaaawan guijcaman. ¹⁶ Bal chu ad za't conform por ni canin lojdi, per naj rugojn lëjt guial achet stijb costumbr raya'p ree, zian naj dux costumbr ree con los demazri ree bën rililadx xtiidx Dios.

Ruxhiin reeman zi'c basa'n Dad Jesucrist gac

¹⁷ Yan xcwent ni ma ganin lëjt, ad zile't ganin guial zagdxen naj ni cayüjndi din chi radxaag lasa'di par cwedx guiniabidi Dios, al ni ad rayalt güündi rüjndi. ¹⁸ Yaløj rnin lojdi biguiejnan guial chi radxaag lasa'di par cwedx guiniabidi Dios ad raya'ntidi diidx, abi' tiblad rililadxanan. ¹⁹ Din nawēeg najn guial ad zajct zian, abi' zian rguien chu diidxli zinal xnejz Dios. ²⁰ Per por zianzi, achetri sirv rüjn guial radxajg lasa'di par gawidi xche zi'c been dux Dad ree Jesucrist. ²¹ Din tijbgajdi rüjn naguiejn diob gawidi, ad rbëjzt xcompniaridi. Abi' la'tgaj yu' ree bejn rliaan, yu'di raw da't abi' xt rzüdxidi guial rē'di zi'ctzi rēndi. ²² ¿Id yu' lidxidi ya lod gawidi guië' tēedi zi'ctzi rēndi?, ¿o ad rēntidi xcompniaridi bën rililadx ree xtiidx Dios ya, zeel rusa'nxtudi bēnprob ree bën achet rajp? Yan, ¿rēndi ya chu' luxdon zagdxen con lëjt por zian? ¡Per zian zi'c cayüjndi, ad zajct ganin lojdi guial zagdxen naj ni cayüjndi!

Ni bigra gudaw Jesucrist xche

(Mt. 26:26-29; Mr. 14:22-25; Lc. 22:14-20)

²³ Abi' ni balün lëjt, basidan laan por dux Dad ree Jesucrist guial guxhin ni bayü reeman laaman chi bigra gudawaman xche, cwa'man tijb guiadxtil.

24 Abi' chi gulox badëëman quixtëë loj Dios dxel gula'man guidxtil guin, rëb gajman: “Guidxtil guie naj da cuerpan ni ma bayün par guiëtan por lëjt. Abi' chi güündi zian, gol beenan guial gusaaladxidi naj.” 25 Ziangajc beennëman cojp ni yu' vin chi gulox gudaw reeman xche, dxel rëbaman: “Vin guie naj da rejnan ni gaxhië'n chi guiëtan par gaxhalan tijb nejz cüb guial xhiënaag gac ree bejn perdon loj Dios. Abi' chi güündi zian, gol been zian guial rusaaladxidi naj.” 26 Zeel, beegaj chi radxaag lasa'di par gawidi xche zi'c been dux Dad ree Jesucrist, chi rawidi guidxtil rë' tëedi vin, zian rulüüdi guial güjtaman por lëjt, gol been zian xt chi gui'taman loj guidxliuj guie zatijb.

Xhiënaag rayal gac xche

27 Yan bal yu' bèn raw guidxtil rë' tëëman vin xche guin, abi' ad yu' gui'ctaman ni rën guiëb ni cayünman, dolan cayünman guial ad yu'guijctaman ni rën guiëb xcuerp në xrejn dux Dad ree Jesucrist. 28 Zeel rayal güün bejn xgab xhiënaag nabanman delant loj Dios dxel ma zajc gawaman guidxtil guië' tëëman vin xche guin. 29 Din bèn raw guidxtil guin con vin guin abi' ad yu'guijctaman ni rën guiëb xcuerp Jesucrist. Laagajcaman caguiil xcasti. 30 Din guial rüjn ree bejn zian zeel dád ziendi ragxuu, zien tëedi ad yu' gojl abi' zien reeman ma güjt. 31 Per bal yaløjxgaj yaguieen ree xgab xhiënaag nabajn ree loj Dios dxel ma zajc yadaaw ree xche guin, achetri xcasti Dios yayal ree. 32 Per ziangajc bal yu' xcasti Dios ni yayal ree, laan naj par guzuxnejzaman dunuj ree chitëë yaguieen ree dol, chitëë yayal ree casti ni rayal ree bèn ad rliladxt xtiidxaman.

33 Zeel compniar raliduladx ree Jesucrist, chi radxaag lasa'di par gawidi, gol gulëjz ree xcompniaridi din gawidi tijbzi. 34 Per bal yu'di ad zajc cwëz guial ma rliaandi, zagdxeli gaw lidxidi chitëë yayalidi xcasti Dios guial ad züjntidi zi'c rayal. Gra ni rayal ganin lojdi, chi guialan guidganan lëjt dxel yanee ree.

12

Quiarguiejn ni runee xSprijt Dios

1 Yan ganin lëjt, quiarguiejn ni runee Dios loj tijb gaj bejn por xyudar xSprijt Dios, din ad rëntan guibandi sin guial gagbeedi ni guin ree.

2 Lëjt ragbee guial chi gadidi güünbee Dios dxel gogdxadi, bidxga'di ni na ree bejn lojdi naj ree Dios abi'za ni'quid rnieet reen. 3 Zeel gol gogbee, chutëëz bèn rnieeguijdx Jesucrist, rën guiëban guial ad nabannëtaman xSprijt Dios. Achu tëët bejn zajc guiëb: “¡Jesucrist naj bèn rniabee naj!”, bal id nabanman con xSprijt Dios.

4 Quiarguiejn rent quiarguiejn ren runee Dios dunuj ree, per Sprijt guin gajc naj bèn ragnë dugra ree. 5 Majsi ni rent ni ren naj xmandad Dios ni cayguieen ree, per laagajcaman naj bèn ni cayguieen ree sirv. 6 Abi' majsi garent garen cayün tijbgaj bejn, Dios gajc naj bèn ni cayün yudar tiblojzi. 7 Tijbgaj dunuj ree rulüü Dios ni rayal yaguieen ree con xyudar xSprijt Dios din yaguieen ree yudar dux compniar ree. 8 Din con xyudar xSprijt Dios yu' ree bèn ma ca' quiarguiejn par guiniee reeman, yu' tëë ree bèn ma ca' quiarguiejn par chignia' reeman diidxli xcwent Dios. 9 Abi' por xyudar xSprijt Dios yu' ree bèn ma cwa' guialrliladx ni guidiblagaa. Yu' tëë ree bèn ma cwa' guialrniabee par yayün reeman bënragxuu ree. 10 Yu' tëë ree bèn ma cwa' guialrniabee par güün reeman gadxagayaa ree milagr. Yu' ree bèn ma ca' quiarguiejn par gudëed reeman xtiidx Dios loj ree bejn. Yu' tëë ree

bèn ma cwa' ree quiargueijn par gagbee reeman bal wali o ad walit ni canee bèn rëb guial caneeman xtiidx Dios. Yu' tõe reeman ma ca' quiargueijn par guiniee reeman gadzagayaa ree diidx, abi' yu' reeman ma ca' quiargueijn par yadëed reeman tijb diidx par stijb diidx. ¹¹ Per por xyudar gajc xSprijt Dios rünj bejn ni guin ree, laaman ma ragbee conin rudëeman guün tijb gaj bejn ni naladxaman naj zagdx.

Tijbzi cuerp nayajc dugra ree

¹² Din zi'c dux cuerp ree majsi zien la' najn, per tijbzi nayajc ree. Ziangajc dunuj ree guial raliduladx ree Jesucrist majsi zien nayajc ree per tijbzi nayajc ree con laaman. ¹³ Din dugra ree barobnijs por tijbzi xSprijt Dios par yajajc ree tijbzi con gra ree dux compniar ree majsi nayajc ree bèn Israel o ad nayajct ree bèn Israel, bal nayajc ree zi'c bèn nado' o ad nayajct ree zi'c bèn nado', per tijbzi ma nayajc ree din dugra ree tiblojzi nabajn ree con xSprijt Dios.

¹⁴ Lëjt ragbee guial ad tibia' tzi naj xcuerp bejn, zien la' naj xcuerp bejn.

¹⁵ Yan bal guiëb guia' bejn: "Ad najtan tibia' xcuerp bejn din ad najtan yaa bejn." Per ad por ziant ad najt guia' bejn tibia'man. ¹⁶ Ziangajc majsi guiëb guidiajg bejn: "Ad najtan tibia' xcuerp bejn din ad najtan guiaaløjman", ad por ziant ad najtri guidiajgaman tibia' xcuerpaman. ¹⁷ Din bal guidib xcuerp bejn niajc guiaaløjman, ¿xhieza naag niguieijnman?, o bal guidib xcuerp bejn niajc guidiajgaman, ¿xhieza naag niuxi'man? ¹⁸ Per Dios ma ragbeeman banguin rayal guzoobaman tibia'gaj ni naj xcuerp bejn din gacaman zi'c rënman. ¹⁹ Din bal niajc xcuerp bejn tiblojzi, dxel ad najtran cuerp. ²⁰ Per zi'c ma rnin lëjt majsi zien la' naj xcuerp tijb bejn per tijbzi naj guidiban.

²¹ Ad zajct guiëb guiaaløj bejn loj yaaman: "Ad ryaadxtan lüj." Ad zajct tõeet guiëb guijc bejn loj guia'man: "Ad ryaadxtan lëjt." ²² Din luar lod rulüü ad rünza'ct sirv, laa reen naj ni mazri rünj sirv. ²³ Abi' ree luar lod ad rguient zagdx, raguieen ree naguieijn din guiguien reen zagdx. Guiáad ree luar naguie'ch, mazri raya'p ree cudad luar guin ree rata'cw reen din guiguien reen zagdx. ²⁴ Ad zro't radxu' ree xgab por ree luar ni rguien, mazri raya'p ree cudad luar naguie'ch ree zeel radojt ree xhienin din guiguien zagdx dux cuerp ree. Zianan bejn Dios xcuerp bejn ²⁵ din chitëe yaguieen ree xgab guial yu' lod ad rünjt sirv, guidib dux cuerp ree rünj yudar lasa'. ²⁶ Chi rdoob tiblajt xcuerp bejn guidib xcuerp bejn rdoob, abi' bal nix yu' tiblajt xcuerp bejn guidib xcuerp bejn yu' nix.

²⁷ Yan ziangajc guial nayajc ree tijbzi con Cristo dugra ree nayajc ree zi'c tijbzi cuerp par laaman, tijb gaj dunuj ree nayajc ree tibia' cuerp guin. ²⁸ Abi' entr gra dux compniar ree bèn riladx Jesucrist. Dios yaløj bacaabeeman bèn naj ree xi apóstoles Jesús, ni barojp bacaabeeman bèn gudëed ree xtiidxaman loj ree bejn, bayon bacaabeeman bèn gulüü ree xtiidxaman bejn ree, dxel bacaabeeman bèn gap ree gualrniabee par yayünj reeman bënragxuu ree. Bacaabee tõeeman bèn guün ree gadzagayaa milagr. Bacaabee tõeeman bèn ni guün ree yudar bejn ree. Bacaabee tõeeman bèn ni nabee ree loj ree bèn riladx xtiidxaman abi' bacaabeeman bèn ni rniece ree zien ree diidx. ²⁹ Ad grat ree bejn naj apóstoles ad gra tõeet ree bejn zajc gudëed xtiidx Dios loj ree bejn, ad grat ree bejn zajc gulüü xtiidx Dios bejn ree. Ad grat ree bejn zajc guün milagr, ³⁰ ad gra tõeet ree bejn zajc yayünj ree bënragxuu, abi' ad grat bejn zajc guiniee zienloj diidx ad gra tõeet bejn zajc yayünj tijb diidx zatijb diidx. ³¹ Per

gol been naguiejn din gunee Dios l jt quiarguiejn zagdxe ree, abi' naj ganin l jt conin naj nejz mazri zagdxe chinalidi.

13

Xcwent guial r n bejn ree

¹ Din bal rajc rnien zienloj diidx ni rniece b nguidxliuj n  xtiidx ree anjl yu' xanyabaa, per bal id r nan bejn najzan zi'c tijb guilib rzijdx o zi'c tijb plati ni yu' cha'. ² O bal nayalan nud dan xtiidx Dios loj ree bejn, o nia'pan quiarguiejn par niagbeen gra ni z ed por Dios ni gad gagbee bejn, o nia'pan zienloj guialrignia' o nia'pan tijb guialrliladx Dios ni xt zile' guchan xliajt ree guia', per bal id r nan bejn ree achet lasajcan. ³ Ziangajc majsi gagui'san gra ni ra'pan loj ree b n ni ryaadx laan abi' yay  da cuerpan din che'can, per bal id r nan bejn ree achet lasajc ni cay nan.

⁴ Guial r n lasa' naj gap pacens lasa' bejn, gac bejn benza'c con lasa'man, ad zad dlojt lasa' bejn, ad z jnt bejn nab , ad z jnt bejn benro' loj lasa'man.

⁵ Guial r n lasa' naj gap respejt lasa' bejn, ad gac bejn naxhien, ad yalenyaman, ad chu'xyajnt t e lasa' bejn, ⁶ ad rayalt yabaa bejn por ni mal ni cay jn bejn o ni cazajcaman, rayal yabaaman chi z  bejn xnejz. ⁷ Guial r n lasa' naj g un bejn perdon lasa'man ni g unn tzi reeman laaman, abi' chililadx lasa'man, ad zadaxg t etaman cw zaman ni cab zaman, taan t eman ni r jnn tzi reeman laaman. ⁸ Guial r n lasa' ad yu't dxej loxan, per guialrajc yu' dxej loxan, ad zu t etri b n ni rud ed ree xtiidx Dios loj ree bejn ni'qui ree b n rniece zienloj diidx. ⁹ Din yan bal rayignia' ree, tibda'nzi naj ni rayignia' ree abi' bal rad ed ree xtiidx Dios loj ree bejn, tibda'nzi rayagbee ree xcwentaman. ¹⁰ Per chi guidxin dxej yayignia' ree gran, dxel achetri lasajc ni rayagbee ree yan.

¹¹ Chi gocan xindoo gunen zi'c xindoo, benan xgab zi'c xindoo, go'pan xquiarguiejn xindoo. Per chi bidxin dxej gojcan bengol basa'nan gra guial xindoo tiblax. ¹² Ziangajc yan ad rayignia't ree gra zi'cgajc chi ad rguient zagdxe loj tijb guiaawajn, per chi guidxin dxej yadxin ree lod zobj Dios dxel yayignia' ree gra. Yan yu'zi ni rignia'n per chi guidxin dxej guidxinan lod zobj Dios dxel g nbeen gra zi'c n nbeeman naj.

¹³ Choon naj ree ni ad yu't dxej lox, guialrliladx Dios, guialrb z ni gunee Dios, n  guial r n Dios dunuj ree. Per loj guiyon ree ni guin mazri lasajc guial r n Dios dunuj ree.

14

Guialrniece stijb diidx

¹ Gol been naguiejn gol guy n ree bejn, gol gurejdx gunab t e Dios din guneeman xquiarguiejndi din g undi xmandadaman, per mazri r jn naguiejn gapidi quiarguiejn par gud edi xtiidx Dios loj ree bejn. ² B n rniece tijb diidx ni ad rignia't gra bejn, g unman cwent guial achut caneen man. Tijbzi Dios caneen man guial achut rignia' xtiidxaman, tijbzi laaman ragbee ni caneeman per bejn ree ad ragbeet reeman ni r n gui b ni caneeman. ³ Per tijb b n rul u xtiidx Dios bejn ree cay jnman yudar xhienaag chinal bejn xtiidx Dios, cud edaman consejw loj ree bejn ragu' t eman luxdoo reeman. ⁴ Abi' b n rniece tijb diidx ni ad rignia't gra ree bejn, par tijbzi laaman naj ni caneeman, per b n rniece xtiidx Dios cay jnman yudar gra ree xbejn Dios din gusnuu chinal reeman xnejzaman.

⁵ Bal zianclaa gradi niajc niniee zienloj ree diidx, per mejorlan bal zajc gulüüdi bejn ree xtiidx Dios. Din mazri lasajc guial guiniee bejn xtiidx Dios guial loj guial guinieeman zienloj ree diidx, o bajtëe bal zile' guiëbaman loj ree bejn xhie rën guiëb ni rnieeman din güün sirv ni rnieeman gra ree bejn. ⁶ Din zi'c naj bal gutixlon lëjt compniar raliduladx ree Jesucrist, abi' ganen lojdi tijb diidx ni ad zignia'tidi, çhieza sirv güünan lëjt bal id canin lojdi zagdxre ni balüü Dios naj o ni ragbeen o bal id canen xtiidx Dios lojdi zagdxre o xhietëez zatiyb ni rayal gusiididi?

⁷ Zi'c tijb ni rucwejdx reeman, zi'c tijb bidxa o tijb arp bal id zucwejdx bejn laan zagdxre ad zignia't ree bejn xhienin cucwejdxaman. ⁸ Ziangajc bal id zucwejdx reeman zagdxre trompejt loj wadijl, çhieza naag chignia' reeman guial ma rayal suchaaw reeman par til reeman con ree bèn rayal tilnë reeman? ⁹ Yan ziangajc bal guinieenëdi bejn ree con tijb diidx ni ad rignia't reeman, çhieza naag chignia' reeman ni rëbidi! Xlia'zi caneedi achut rignia' ni rnieedi. ¹⁰ Lëjt ragbee guial zienloj diidx yu' loj guidxliuj guie, per graczan yu' ni rëban par bèn rignia' laan. ¹¹ Per bal chu guinieenë naj con tijb diidx ni ad rignia'tan dxel benzit najman par naj abi' za naj benzit najn par laaman. ¹² Zeel zi'c rëndi gapidi quiarguejn por xyudar xSprijt Dios par güündi xhietëez ni naj xchiin Dios, gol gunab loj Dios din yazaladxaman quiarguejn lojdi din gac güündi ni rünj sirv par gra ree xbejn Cristo.

¹³ Zeel bèn ni rniee tijb diidx ni ad rignia't gra ree bejn, rayal guiniabaman loj Dios din gagnëman laaman din gac gusignia'man bejn ree ni rëbaman. ¹⁴ Din zi'c naj bal gabedx ganaaban Dios con tijb diidx ni ad rignia'tan dxel tijbzi da sprijtan ragbee ni canen, per naj ni'quid ragbeetan xhienin canen. ¹⁵ Zeel ni rayal günan naj, gabedx ganaaban loj Dios con da sprijtan abi' gagbeen xhie rën guiëb ni canen. Ziangajc chi rolan cant ree par Dios rayal gagbeen chignia' tëen xhie rën guiëb ni cayolan. ¹⁶ Din bal rnieel diidx zagdxre ree loj Dios con diidx ni ad rignia't ni'qui lüj. Dxel bèn za' con lüj, ad zajct guiëbaman “Amén” chi ma gulox badëëdil quixtëe loj Dios guial ad rignia'taman ni rnieel. ¹⁷ Majsı nix da't badëëdil quixtëe loj Dios, per achetzi yudar beenl bèn za' con lüj par gagbeeman xhienaag chinalaman xnejz Dios guial ad bignia'taman ni rëbil. ¹⁸ Quixtëe Dios naj mazri rajc zien loj diidx guial loj gradi. ¹⁹ Per majsı zian chi za'n lod rado'p ree dux compniar ree bèn rliladx ree Jesucrist par ganenë'n laa reeman, par naj mejorli naj ganenë'n laa reeman con gaay diidx per diidx ni chignia' reeman në ni güün laa reeman sirv din gulüü reeman ben ren ree luar ganenë'n laa reeman con chiimil diidx ni ad rignia't reeman.

²⁰ Compniar raliduladx ree Jesucrist, ad bal rünjridi xgab zi'c xindobëz. Gol gojc zi'c xindobëz per guial ad züjntidi ni mal, per par güündi xgab gol been xgab zi'c bengol. ²¹ Loj xtiidx Dios rëb: “Gaxhalan bèn rniee ree diidx ren, bèn ad najt ree bèn niz guie din guinieenë reeman bèn guie ree. Per ni'qui zian ad zuzoobt reeman da diidxan, rëb dux Dad ree Dios.” ²² Zeel guial rniee zienloj diidx, najn tijb sen par ree bèn ad rliladx xtiidx Dios din chililadx reeman. Per guial ruluü bejn ree ni rën Dios gagbee reeman, laan naj ni güün sirv par ree bèn ma rliladx ad par bèn ad rliladxt. ²³ Per ni'qui zian chi radxaag lasa'di par gucaagdiajguidi xtiidx Dios, abi' bal suloj guiniee tijb gajdi gadxagayaa diidx ni achut rignia' abi' chu' ree bèn qui bililadxri xtiidx Dios o bèn ad waliladxt ree xtiidxaman, çwen id zanaladx reeman ya guial guijquidi rajc? ²⁴ Per bal chu' bèn qui bililadxri o bèn ad waliladxt abi' caneedi xtiidx Dios, dxel chi guiguiejnman ni caneedi, gagbeeman xhie dol cayünj reeman, laagajcaman gagbee chu najman. ²⁵ Zian gagbeeman xhienaag nabanman

dxel guzuxibaman cwedx guiniabaman Dios, abi' guiëbaman guial diidxli za' Dios con lëjt.

Gol been gra xnejz

²⁶ Gra ni canin lojdi compniar raliduladx ree Jesucrist, caninan din gag-beedi guial chi rado'pidi par gucaagdiajguidi xtiidx Dios, gradi zajc güün ni chile' güündi, bèn ni gool cant par Dios, bèn ni gulüü ree bejn, bèn gugojn bejn ree conin balüü Dios lojman, bèn guinee diidx ren ni ad rignia't gra bejn nè bèn gudëed xtiidxaman loj ree bejn. Per gra ni güündi güün sirv par güünan yudar los demazri ree xcompniaridi din gusnuu sudxi'ch reeman loj ni riladlx reeman xtiidx Dios. ²⁷ Bal yu' bèn rniece tijb diidx ni ad rniet gra bejn, tio'pzaman o choonzaman guinee diidx ni rajcaman, abi' tijb gaj tijb gaj reeman guinee, chu' tëë bèn ni guiëb loj ree bejn xhie rën guiëb ni rëb reeman. ²⁸ Per bal id yu' bèn zajc gugojn bejn ree xhienin rëb reeman con diidx ni rajc reeman, mejorli achet guiëb reeman delant loj ree bejn. Zagdxeli laazi reeman cwedx Dios lën luxdoo reeman. ²⁹ Abi' ree bèn gugojn delant loj gra ree bejn conin balüü Dios laa reeman, tio'pzi reeman o choon reeman guinee. Abi' los demazri reeman gucaagdiajg bal zagdxequi naj ni canee reeman. ³⁰ Per bal tijb bèn zøjb cucaagdiajg loj hor guin gulüü Dios laaman xhienin, rayal yacwëez bèn canee din gac gugojn bèn guin bejn ree xhie nin balüü Dios lojman loj hor guin. ³¹ Gra ree bèn ni bayal gudëed xtiidx Dios loj ree bejn, gradi zajc gugojn bejn ree xhienin balüü Dios lëjt, per tijb gajdi chi yayalidi din gra ree bèn cucaagdiajg gusiid reeman chu' tëë luxdoo reeman. ³² Gol badxe'guijc guial ree bèn rudëe xtiidx Dios loj ree bejn laagajc reeman rniabee laa reeman din guinee reeman chi rayal guinee reeman. ³³ Din Dios ad rëntaman tijb ni ad najt xnejz, rënman tijb ni naj xnejz din yabedxe luxdoodi con ree xcompniaridi.

Yan, zi'c rajc gra ree luar lod rado'p ree xbejn Cristo, ³⁴ loj hor ni ma cucaagdiajg reeman xtiidx Dios ad yu't permis guinee ree bəngunaa rayal guzoob reeman xtiidx xixinguaaw reeman zi'c rëb Dios güün reeman diizd gual. ³⁵ Bal xhie rën reeman gagbee reeman, mejorli lidx reeman guiniabdiidx loj lacheel reeman, din natun guinee tijb bəngunaa loj hor ni cucaagdiajg reeman xtiidx Dios.

³⁶ Gol basaaladx guial ad lëjtiti naj bèn yaløj cwa' xtiidx Dios ad tijb tēetzti lëjt ragbee xtiidx Dios din güündi zi'c naj xixgabidi. ³⁷ Bal chu bèn naladx guial ma cwa'man quiarguejn par gudëeman xtiidx Dios loj ree bejn o por xSprijt Dios ma cwa'man xhie stijb quiarguejn, dxel laa gagbee gajcaman guial ni cucan loj gui'ch guie najn zi'c rniabee dux Dad ree Dios. ³⁸ Per bal id riladlxaman ni canin lojdi loj gui'ch guie, ziangajc ad chililadxidi xtiidxaman.

³⁹ Yan zi'c ma rnin lojdi compniar raliduladx ree Jesucrist, gol been naguiejn din gapidi quiarguejn din gudëedi xtiidxaman loj ree bejn, ad bal gudxoondi guinee tijb ree xcompniaridi bèn rniece tijb diidx ni ad rignia'tidi.

⁴⁰ Per gra ni rüjndi gol beenan xnejz, gol beenan zi'c rayal.

15

Baban Jesucrist loj ree bengüt

¹ Compniar raliduladx ree Jesucrist, rën tēen gusaaladxidi xtiidxza'c Jesucrist ni ma rnin lojd, diidxza'c ni ma bililadxidi loj ni za'dxi'chidi. ² Gol basaaladx guial por ree diidxza'c guin ma rajpidi perdon por xtolidi bal walidi zinalidi laan, per bal id zinalidi laan bililadx xlia'zidi laan.

³ Yaløjxgaj balün lëjt ni basidan yaløj. Rnin lojdi guial Cristo güt por dux tol ree zi'c rëb loj xtiidx Dios. ⁴ Abi' biguie'chaman dxel ni goc choon dxej babanman zi'cgajc rëb loj xtiidx Dios. ⁵ Chi ma babanman, dxel balüülojman loj Bëd dxel loj los demazri ree apóstoles. ⁶ Zianz balüülojman në loj ree tijb cwaa ree bèn rliiladx laaman, gojc reeman mazri de gaay gayuu bejn. Yu' reeman ma güjt, per mazri zien reeman sta naban. ⁷ Balüü loj tëëman loj Santiaaw dxelri loj ree apóstoles. ⁸ Ni bigra balüülojman lon, naj najn zi'c tijb xindo ni rajl chi ma gudëd tiamp ni rayal galix. ⁹ Din naj ta'nzi lasajcan loj los demazri ree apóstoles, abi' ad rayalt guirii lan apóstol guial basagzin bèn rliiladx ree Jesucrist. ¹⁰ Per guial naj Dios benza'c zeel najn ni najn, abi' ad bayaxlia'tzaman naj din naj mazri ma benan xmandadaman guial loj los demazri ree xbejn Jesús, majsi diidxliczi ad da xtijbt naj cayünan ni cayünan, në con xyudar Dios cayünan laan. ¹¹ Zeel achet güünan bal por chunin biguiejndi xtiidx Dios bal por naj o por stijb ree xbejn Jesús, ni mazri lasajc naj guial ma biguiejndan abi' ma bililadxidan.

Yaban ree bengüt

¹² Yan zi'c ma balüün lëjt xtiidx Dios guial baban Cristo, ¿chexquiza zeel yu'di rëb ad zabant ree bengüt? ¹³ Bal id zaban ree bengüt, rën guiëban guial ad babant Cristo. ¹⁴ Abi' bal id baban Cristo dxel achet sirv ni caylün lëjt, ache tëët sirv ni rliilaxidi laaman. ¹⁵ Dxel bal zianan, ganax diidx rusquieen caynan por Dios guial ma ranan ma baban Jesucrist. Abi' bal id walin guial yaban ree bengüt, dxel ad walitan guial baban Jesucrist. ¹⁶ Din bal id zaban ree bengüt, dxel ni'qui Jesucrist ad babantri. ¹⁷ Abi' bal id babanman, achet sirv guial rliilaxidi laaman ache tëët perdon yu' por xtolidi. ¹⁸ Bal naj zian, xt ree bèn ma güjt achet xperdon reeman majsi bililadx reeman Jesucrist. ¹⁹ Bal lojzi guidxliuj guie güün sirv ni baliladx ree Jesucrist dxel dunujzi ree nayajc ree bèn naban mazri naya guial loj chutëëz bënan.

²⁰ Per diidxliczi Jesucrist naj bèn baban, abi' laaman naj quijb bèn yaløj baban. ²¹ Abi' zi'c bidoonloj guialgüjt loj guidxliuj guie por tijb bejn, ziangajc por tijb bejn yaban ree bengüt. ²² Zi'c bidoonloj guialgüjt par gra ree bejn por Adán, ziangajc yan por Jesucrist ma yu' stijb guialnaban par ree bèn rliiladx laaman. ²³ Per gra gac zi'c rayal: Yaløj Jesucrist naj bèn baban, dxel chi gui'taman stijb dxel ma yaban ree bengüt bèn bililadx ree laaman. ²⁴ Abi' chi ma beeman gan gunabeeman gra ree bèn rdxe'ch laaman, zi'c ree bèn rajp guialguxtis në ree bèn rajp graløj guial rniabee, dxel ma yayü xguialrniabeeman loj dux Dad ree Dios. ²⁵ Din rayal nabee Cristo xt chi ma beeman gan canabeeman gra ree bèn rdxe'ch laaman. ²⁶ Abi' ni chigra gunidlojman naj guialgüjt. ²⁷ Loj xtiidx Dios rëb guial Dios badëë guialrniabee loj Jesucrist din nabeeman gra, per ad rënt guiëban guial në Dios rniabeeman din Dios badëë guialrniabee lojman. ²⁸ Abi' dxej ni ma rniabee Jesucrist loj gra dxel yayüman guialrniabee ni badëëd Dios lojman din ma nabee tijbzi Dios gra.

²⁹ Yan bal id zaban ree bengüt, ¿chexquiza zeel yu' ree bèn riobnijs xcwent ree bèn ma güjt, abi'za bal id zaban ree bengüt?

³⁰ Achet sirv guial nadxu'n loj ni nadxeb gra hor. ³¹ Din rugojnan lëjt, gra dxej za'n loj guialgüjt, laan naj ni diidxli ni rnn lëjt zi'cgajc walin guial dad nix yu' luxdon con lëjt guial najdi xbejn Cristo. ³² Yan bal naabzi loj guidxliuj guie güün sirv ni cayünan dxel achet sirv ni basajc ree bèn Éfeso naj, naj reeman bendoxh zi'c ree bedoxh. Din bal id zaban ree bengüt mejorli

yaguieen ree zi'c rëb ree bèn rëb: “Yadaaw ree yadü' tëë ree din guixie ma bayëjt ree.”

³³ Per naj rni lëjt ad tiëbidi gusquiee reeman lëjt. Din guial ridxga' xtiidx ree bèn ni ad zët xnejz, najnan par guxhiinan zi'c nabandi. ³⁴ Zeel gol been xgab zi'c rayal ad bal rüjn tëëridi dol din yu'di ni'quid nünbeetidi Dios, zeel canin lojdi zian din yaya'nxtdi.

Xhienaag yaban ree bengüt

³⁵ Per wed yu'di rüjn xgab: “¿Xhieza naag yaban ree bengüt? ¿Xhienaag naj cuerp ni gap reeman?” ³⁶ Per xgab guin xgab tontzan. Din lëjt ragbee guial chi rxübin bejn tijb xhaj xhienin, chi rliejnan dxel rnijt xhaj ni guxübinman. ³⁷ Ad cwaan ni rliejn quint rxübin bejn, xhajnan rxübinman, zi'c rüjn bejn con trigo o xhietëez stijb xhaj nin. ³⁸ Per chi rliejnan ma najn cwaandoo zi'c rniabee Dios gacan, xhietëez xhaj nin ni rxübin bejn ma yu' cwaandoo ni guilianen. ³⁹ Zi'c nadxaa xcuerp bejn con xcuerp ree be, nadxaa tëë bëjl con xcuerp ree biguijn. ⁴⁰ Nadxaa tëë ree ni yu' xanyabaa con ree ni yu' guidxliuj, nadxaa naj gualza'cdxoon ree ni yu' xanyabaa con ree ni yu' loj guidxliuj. ⁴¹ Nadxaa xbacha' gubijdx guial loj bëëw nadxaa tëë xbacha' ree bajl xanyabaa, xt ree bajl xanyabaa garent garen naj xbacha' reen.

⁴² Yan ziangajc gac con guial yaban ree bengüt. Cuerp ni rguie'ch rodxdan, per cuerp ni gap bejn stijb ad yu't dxej godxdan. ⁴³ Cuerp ni rguie'ch rxinan, per chi yaban bejn stijb ma gapaman tijb cuerp za'cdxoon ni achet gac. Cuerp ni rguie'ch guin achet gojl yu'n, per chi yaban bejn stijb ma gapaman cuerp ni yu' gojl. ⁴⁴ Rguie'ch cuerp ni rajp bejn loj guidxliuj guie, per chi yaban bejn stijb ma gapaman tijb cuerp ni güün sirv par xanyabaa. Din zi'c yu' cuerp par loj guidxliuj guie ziangajc yu' cuerp par xanyabaa.

⁴⁵ Loj xtiidx Dios rëb guial yaløj Adán gojp guialnaban loj guidxliuj guie. Dxel bi't Jesucrist, bèn razaladx guialnaban loj ree bejn. ⁴⁶ Ad yalojt rajp bejn guialnaban ni gapaman xanyabaa, yalojxgaj rajpaman guialnaban loj guidxliuj guie dxel guialnaban xanyabaa. ⁴⁷ Adán gojcaman con yuj zeel najman bënguidxliuj, per Jesucrist xanyabaa zëëdaman. ⁴⁸ Gra ree bënguidxliuj naj xcuerp reeman zi'c goc xcuerp Adán loj guidxliuj guie, per chi guidxin dxej dxel gap ree bejn tijb cuerp lasa' cuerp ni rajp Jesucrist xanyabaa. ⁴⁹ Din zi'c nayajc ree zi'c goc Adán loj guidxliuj guie, ziangajc yayajc ree zi'c naj Jesucrist xanyabaa.

⁵⁰ Abi' rugojnan lëjt compniar raliduladx ree Jesucrist, cuerp ni raya'p ree loj guidxliuj guie ad zajct yayun xanyabaa lod canabee Dios. Din ni rodxd ad zajct chu'n lod yu' ni ad rodxt. ⁵¹ Per rënan gagbeedi tijb ni achutcz wayagbee xt yan guial ad dugrat ree yayëjt, per dugra ree guidxaa zi'c nayajc ree, yaya'p ree cuerp ren. ⁵² Laan gac chi yaguiejn ree trompejt ni gugojn dunuj ree guial ma bidxin tiamp ni yarii ree loj guidxliuj guie, dxel tibrajtzi zi'c chi ruchip guiaaløj bejn zian guidxaa zi'c nayajc ree. Chi guibejdx trompejt guin yaban ree bengüt dxel ad yu'tri dxej guiët reeman abi' hor zii ma bidxaa zi'c nayajc ree yan. ⁵³ Din rüjn naguiejn guidxaa cuerp ni rodxd por stijb cuerp ni ad yu't dxej godxd guidxaa tëë cuerp ni rëjt por stijb cuerp ni ad yu't dxej guiët. ⁵⁴ Abi' chi ma bidxaa cuerp ni rodxd por stijb cuerp ni ad yu't dxej godxd guidxaa tëë cuerp ni rëjt por stijb cuerp ni ad yu't dxej guiët, dxejzii naj dxej ni ma gojc cumplid ni rëb loj xtiidx Dios lod rëb: “Xt guin ma bayaaløj gojc gan loj gualgüjt.” ⁵⁵ Nadxel tëë ma gojc cumplid zi'c rëb loj xtiidx Dios lod rëb: “Guialgüjt, ¿conza guial rüjnl gan? ¿Conza guial rusagzil bejn?” ⁵⁶ Guialrusagzi gualgüjt naj por dol, abi' por ley ragbee bejn guial dol

guin naj ni rniabee laaman. ⁵⁷ Per quixtëe dux Dad ree Dios, bén rüjn dunuj ree yudar par yaguieen ree gan por xguialgüjt Dad Jesucrist.

⁵⁸ Zeel compniar raliduladx ree Jesucrist zi'c rënan lëjt rnin lojdi, gol guzudxi'ch ad chu' tëë luxdoodi tio'p. Guixie guixie gol been naguiejn güüнди mazri xmandad Dios, din lëjt ragbee guial ad ni xlia'tzi gra ni cayüjndi par Dad Jesucrist.

16

Milia ni rdo'p par ree xbejn Dios

¹ Yan por milia ni naj guto'pidi par güüнди yudar stijb ree dux compniar ree bén raliduladx ree Jesucrist, gol been zi'c gunabeen güün ree bén rliladx ree Jesucrist niz Galacia. ² Gazob dumingw tijb gajdi gol gule'c cintabl zi'ctzi beendi gan lën toxman, din chi guialan ad rüjntri naguiejn guido'pidi milia guin. ³ Abi' chi guialan, bén ni gucaabeedi par gaxhalan laa reeman chigsa'n gon guin Jerusalén gaxhalan laa reeman con gui'ch ni guiëb chu naj reeman. ⁴ Abi' bal guguian guial rüjn naguiejn gan dxel chinë'n laa reeman.

Xhienaag naj xixgab Pab

⁵ Yaløj gadëëdan niz Macedonia dxel guialan Corinto guidganan lëjt. ⁶ Wed xchej gazun con lëjt. Wed guidib tiamp nayaag gazun con lëjt, dxel güüнди naj yudar din gan lod naj gan. ⁷ Ad rëntan gadëëdzi nejzan gaguixlon lëjt, rënan gaglaan con lëjt bal guneë Dios permis. ⁸ Per yan naj yaya'nan Éfeso xt lanij pentecostés, ⁹ din guie merdzi yan catiëjb ree bejn cucaagdiajg reeman xtiidx Dios, abi' rulüü zien reeman chililadx laan, majsi zien gajc reeman rdxe'ch naj por zian.

¹⁰ Chi gui't Timoteo, gol been naguiejn din suman zagdxe con lëjt, din lasa'gajc xmandad Dios ni cayünan cayüjnman. ¹¹ Zeel achu lëjt guiniajgaa lojman, gol beenman yudar din gusnuu xnejzaman sin guial chu'man xgab, din gui'taman guie lod cabëëzan laaman con los demazri ree dux compniar ree.

¹² Abi' Apolos, naj guza'c laaman liaadx din nidnëman laa reeman nitixloj reeman lëjt, per ad guyëntaman ni'taman yan, per zi'tcaman guitixlojman lëjt chi guneen laaman tiamp.

Düidx bigra ni bacaa Pab loj gui'ch guie

¹³ Gol guzujsin gol guzujdxi'ch tëë loj ni rliladxidi Jesucrist. Gol gudaan ni gui'tzi gol guzujdxi'ch tëë. ¹⁴ Gra ni güüнди gol beenan guial rëndi bejn ree.

¹⁵ Compniar raliduladx ree Jesucrist, lëjt ragbee guial Estéfanos con xfamilaman laa reeman naj bén yaløj bililadx Jesucrist niz Acaya, ragbee tëëdi xhienaag cayüjn reeman yudar dux compniar ree bén rliladx ree Jesucrist. Zeel rnin lojdi: ¹⁶ Lasa' ree bén guin gol bazoob xtiidx reeman con gra ree bén cayüjn xmandad Dios në ree bén cayüjn yudar cayajc mandad guin.

¹⁷ Dád nix guyu luxdon chi baguiaad Estéfanos guie, në Fortunato në Acaico. Din por laa reeman guza'can zi'cgajc chi za'n con gradi. ¹⁸ Laa reeman bagu' luxdon niz guie zi'c ragu' reeman luxdoodi, abi' lasa' ree bén guin gol gojp reeman respejt.

¹⁹ Gra ree compniar rliladx Jesucrist niz Asia guie rugajpdioz reeman lëjt. Abi' Aquila con lacheelaman Priscila con gra ree xbejn Cristo bén rado'p ree lidx reeman, rugajpdioz reeman lëjt, nayajc ree xbejn Cristo. ²⁰ Gra ree dux

compniar ree bèn rliladx ree Cristo rugajpdioz reeman lëjt, gol bagajpdioz tēē lasa'di zi'c rayal.

²¹ Naj Pab, quijb naj cuca lëjtr guie ree par gugajpdiozan lëjt.

²² Bal yu' bèn ad rënt dux Dad ree Jesucrist, laaman ma rayal xcasti Dios. ;Dux Dad ree Jesucrist nayob gui'taman!

²³ Abi' dux Dad ree Jesucrist güünle' gradi. ²⁴ Zi'c nayajc ree xbejn Cristo tiblojzi rēnan gradi. Amén.

Gui'ch barojp ni guxhaal San Pabl loj ree b n Corinto r liladx Jesucrist

Rugajpdioz Pab b n Corinto r liladx ree Jesucrist

¹ Naj Pab, Dios bacaabee naj gacan xi ap stol Jesucrist, n  dux compniar ree Timoteo za' con naj. Naj cuca gui'ch guie par l jt guial ma r lilaxidi xtiidx Dios luguiedx Corinto n  los demazri ree b n riga' niz Acaya. ² Dux Dad ree Dios con Dad Jesucrist g  nle' l jt yabe'cdxe t e reeman luxdoodi.

Tarbajw ni gud d Pab

³ Quixt e Dios xDad Dad Jesucrist, b n naj raya dunuj ree naj t eman Dios b n ragu' du luxdoo ree. ⁴ Laaman ragu' du luxdoo ree loj xhiet z guialrzagdiaj ni rad  d ree din gac yalu' ree luxdoo ree b n cad d xhiet z guialzi, yalu' ree luxdoo reeman zi'c ragu' Dios du luxdoo ree. ⁵ Din majsi cayzaagdiaj da't ree guial nayajc ree xbejn Cristo, ziangajc d d ragu'man du luxdoo ree. ⁶ Abi' bal cayzaagdiajn, cayzaagdiajn din yaguieenan l jt yudar din chu' luxdoodi din laa t edi loj dol. Abi' bal cu'man du luxdoo, rgu'man du luxdoo din chu' luxdoodi din gac taandi lasa' ree guialzi ni cayd udan. ⁷ Ad yu' naw egt du luxdoo con l jt, din zi'cgajc cazagdiajdi ziangajc cayzaagdiajn dxe ziangajc yagu' Dios luxdoodi zi'cgajc ragu'man du luxdoo.

⁸ Compniar raliduladx ree Jesucrist, ray nan gagbeedi guial d d zro' naj ni baza'can niz Asia. Naya baza'can niz ni, par dunujn ad zadaantran, ad nagueenran nejz guial yabajnran mazri, ⁹ baguieenan xgab guial ma bay jtan. Per baza'can zian din yadxeguijcan guial achet zajc yaguieen dunujzan sin xyudar Dios, b n rasban ree beng t. ¹⁰ Laaman bab e dunujn loj guialg jt guin abi' gagn man dunujn loj lasa' ree ni nadxeb guin. Dunuj ree rayagbee guial gusnuu g  nman dunujn yudar, ¹¹ mazri bal g  ndi yudar cwedx guiniabidi Dios por dunujn. Abi' bal zien ree bejn cabejdx canab Dios por dunujn dxe zien gajc reeman gud ed quixt e lojman zi'c cayagn man dunujn.

Chexc ad wejtp Pab Corinto

¹² Abi' ni rabaan rnin lojdi guial achetdzi naduladxan guial rayagbeen nabajnan naya delant lojdi n  delant loj ree b nguidxliuj, abi' diidxli cayguieenan ni rayal yaguieenan. Per ad cayguieentan zian por dux quiaragueijnzan, cayguieenan zian por xyudar Dios. ¹³ Loj dux gui'chan ad racaatan ni ad zajct goolidi o ni ad zajct chignia'di. Balzianclaa chignia'di gra ni canin lojdi. ¹⁴ Zi'cgajc ta'ngaj cayagbeedi guial chi gui't Dad Jesucrist zatijb l jt yabaadi con dunujn guiaad dunujn yabaan con l jt.

¹⁵ Laan naj ni yu'guican, zeel yaloj benan xgab nidganan l jt din nabaadi guial ma barojp volt bidganan l jt. ¹⁶ Benan xgab nidganan l jt chi nialan niz Macedonia, abi' chi nazaan Macedonia nialan nidganan l jt stijb, dxe nagu'nejzidi naj par Judea. ¹⁷ Ad g  ndi xgab guial chi rnin guidganan l jt nrizan zian. Ad g  ndi xgab guial r nan zi'c r jn gra ree b nguidxliuj, ganin guialan abi' ragbeen guial ad zialtan. ¹⁸ Dios ragbee guial ad raguie'cchan yaguieenan ni rayagbeen ad zaguieentan. ¹⁹ Din Jesucrist Xi'n Dios, b n ni ma baguieen xtiidx lojdi, naj con Silvano con Timoteo, ad najt Jesucrist b n na

g nman ni ragbeeman ad z jntaman, laaman ganax diidxli rnieeman. ²⁰ Din por laaman rajc cumplid gra ree xpromejs Dios. Zeel por laaman raguie'ch ree "Am n" chi rad ed ree quixt e loj Dios. ²¹ Abi' Dios laaman cayi n dunuj ree yudar con l jt din yadxu'dxi'ch ree loj ni nayajc ree tijbzi con Cristo, Dios bacaabee dunuj ree din yayajc ree par laaman. ²² Laaman gule dunuj ree par laaman, abi' guxhaal xSprijtaman b n nabajnn ' ree zi'c tijb sen guial yaca' ree ni yaca' ree.

²³ Yan bal gadan ga Corinto zi'c benan xgab, Dios ragbee guial gadan ga guial ad r ntan gadil n l jt, abi' Dios gud ed naj casti bal id wali ni canin.

²⁴ Ad cayguieentan naguiejn yanabeen l jt xhienaag chililadxidi Jesucrist, din dunujn rayagbee guial diidxli za'dxi'chidi loj ni rliadxidi Jesucrist, ni cayguieenan naj guial yaguieenan l jt yudar din chu' luxdoodi nix guibandi.

2

¹ Zeel benan xgab ad zidganatan l jt yan, chit e chu'naya luxdoodi. ² Din bal gagu'nayan luxdoodi,  chuzo cu' luxdon nix bal ma badxe'nayan luxdoodi l jt ragu' luxdon? ³ Zeel banan zi'c bacan loj gui'ch ni guxhalan lojdi, din chi guialan ad cu'di luxdon naya luar cu'di luxdon nix. Abi' naj ragbee bal yu' luxdon zagdxo gradi yu' luxdoo zagdxo por zian. ⁴ Chi bacan gui'ch guie d d guyun xgab abi' guyunayan xt ronon bacan diidxnaa ni bacan loj gui'ch guie, per ad bacatan gui'ch guin par gagu'nayan l jt, bacanan par gagbeedi guial r n da'tan l jt.

Yu' perdon par b n badxe' falt

⁵ Bal yu' tijbidi ma badxe'naya naj, per ad najtzi guyunaya n gajc l jt guyunaya. Rnin n  l jt chit e gad edlajn guial ganin graczi di guyunaya por zian. ⁶ Per naj rni lojdi compniar raliduladx ree Jesucrist, ma gojczy yan con casti ni ma bad edidi loj b n guin. ⁷ Yan gol beenman perdon gol bagu' t e luxdoo man chit e chu'naya luxdoo man xt ad zadxejlt xhie g nman. ⁸ Zeel rniaaban lojdi, gol been naguiejn din gagbeeman guial r ndi laaman zi'cgajc guy ndi laaman guia'xchej. ⁹ Gui'ch ni guxhalan lojdi gocli, guxhalanan din gagbeen bal ruzoobidi da diidxan guial g undi gra ni ganin lojdi. ¹⁰ Yan chut ez b n g undi perdon, n gajc naj g n laaman perdon. Abi' b n ma benan perdon, bal yu' ni g nan perdon, benan laaman perdon delant loj Cristo por l jt ¹¹ chit e g n xindxab dunuj ree gan, din dunuj ree rayagbee xhienaag naj xguialrusquiee xindxab.

Ad nixt guyu luxdoo Pab guzujman Troas

¹² Chi bidxinan guiedx Troas par ganen xtiidxza'c Jesucrist, d d gogn  Dios naj par g nan mandad guin ni. ¹³ Per ad nixt guza'can guial ad bidxaaglojtan dux compniar ree Tito. Zeel basa'nan b n guin ree abi' wan Macedonia.

Ragn  Jesucrist dunujn zianczi

¹⁴ Per quixt e Dios guial por Jesucrist guixie guixie cayagn man dunujn chit e xhie g n dunujn gan abi' por dunujn cayagbee ree bejn xtiidxza'c Jesucrist, diidxza'c guin ree naj zi'c tijb ni rliaa nejxh ni rire'ch cha' guidibczi.

¹⁵ Abi' por Jesucrist dunujn nayajc zi'c tijb go'xh ni rliaa nejxh delant loj Dios, go'xh ni rdxin loj ree b n rliadx Jesucrist n  loj ree b n ad rliadx. ¹⁶ Par ree b n ad rliadx laaman, dunujn nayajc zi'c tijb go'xh ni rug jt, per par ree b n rliadx laaman dunujn nayajc zi'c tijb go'xh ni runee guialnaban. Per,  chu zajc g n ree ni guin sin xyudar Dios? ¹⁷ Dunujn ad cayguieentan negojs con xtiidx Dios zi'c r jn garol ree bejn, dunujn raguieenan zi'c rayal, zi'c ma

baacaabee Dios dunujn yaguieenan. Abi' Dios ragbee guial por guial nayajcan xbejn Cristo zeel raneen xtiidxaman.

3

Nejz cüb ni yu' par yadxin ree loj Dios

¹ Chi ranan zian, ad naladxidi guial dunuj gajcan cayles dux valoran. Lëjt ragbee guial ad rüjnt naguiejn yalüün tijb gui'ch lojdi par gagbeedi chu dunujn o yanaaban gui'ch lojdi ni güün dunujn yudar par gagbee ree bejn chu nayajcan zi'c rüjn ree ben ren. ² Din lëjt gajc naj tijb gui'ch par dunujn, gui'ch ni yu' du luxdoon ni rool ree bejn ni nünbee tëë reeman. ³ Zi'c rulüü yaguie'ch ree lëjt naj tijb xtiidx Cristo ni bacaan, per ad bacaatanan con tint, bacaanan con xSprijt Dios bén naban, tijb ni ad cwat loj tijb guiaj nata', cwan luxdoo ree bejn.

⁴ Dunujn raya'p Dios confianz por Jesucrist, ⁵ abi' ad raguieentan xgab guial yu' ni raguieen dunujzan, din gra ni raguieenan, raguieenan laan con xyudar Dios. ⁶ Dios naj bén razaladx dunujn quiarguiejn par yagojnan bejn ree xcwent nejz cüb ni ma yu' par yadxin ree loj Dios, nejz cüb ni ad ryaadxt chinal bejn tijb ley ni zëed loj gui'ch, per rüjn naguiejn chinalaman ni zëed por xSprijt Dios. Din ley castizi naj ni zidnën, per xSprijt Dios guialnaban naj ni rudëeman loj ree bejn.

⁷ Abi' majsi castizi naj ni zidnë ley ni badëë Dios loj Moisejs loj tijb guiaj nata', per dád bidiin bacha' loj Moisejs chi cwa'man ley guin, xt ad gojct nuguaa ree bén Israel lojman por bacha' guin, bacha' ni ta'ngaj ta'ngaj gunidlojn. ⁸ Bal chi bi't ley guin gojc zian, yan, jmazri ni za'cdxoon naj guial gucaagdiajg ree bejn xcwent nejz cüb ni rulüü xSprijt Dios ni ma rajp bejn con Dios! ⁹ Din chi bi't ley ni ridnë casti par ree bejn, con bacha' bi'tan, yan, jmazri ni za'cdxoon naj guial guien ree bejn xhienaag gac reeman naya delant loj Dios! ¹⁰ Abi' bal ni za'cdxoon gojc chi bi't xley Dios loj guidxliuj guie, yan achetzi lasajc gualza'cdxoon guin par gualza'cdxoon ni naj por nejz cüb ni ma rajp ree bejn con Dios. ¹¹ Abi' bal ni ad rüjnt sirv par gra tiamp, bi'tan con tijb ni za'cdxoon, yan mazri ni za'cdxoon naj ni ad yu't dxej nit.

¹² Abi' guial yu'guijc ree zian, zeel sin guialrdxeb caylüünan bejn ree. ¹³ Ad raguieentan zi'c been Moisejs, basiaaw lajd lojman chitëë gagbee ree bén Israel guial ziquied guialrulaa bacha' lojman, bacha' ni laa gunit gajc. ¹⁴ Per ad lojtzi Moisejs biaaw, ne gajc xquiarguiejn ree bejn biaaw. Din xt yandxej chi rool reeman loj xtiidx Dios ni bacaa Moisejs, achet rignia' reeman, tijbzi por Jesucrist zajc chignia' reeman laan. ¹⁵ Per xt yandxej chi rool reeman ni bacaa Moisejs ad rignia't reeman guial sta nayaaw xquiarguiejn reeman. ¹⁶ Per bén rililadx Jesucrist, laaman rxhial xquiarguiejnman. ¹⁷ Din tijbzi naj Jesucrist con xSprijt Dios, abi' lod ma naban bejn con xSprijt Dios achetri rniabee laaman. ¹⁸ Zeel achetri nayaaw duloj ree zi'c been Moisejs, din dunuj ree nayajc ree zi'c guiaawajn lod rguien xbacha' Jesucrist abi' chaawladx cayajc ree zi'c rënman yayajc ree, abi' guixie guixie cusniman dunuj ree por xSprijtaman.

4

¹ Zeel zi'c ma baya Dios dunujn abi' gulejman dunujn par yaneen xtiidxaman, ad zadxagtan yaguieenan mandad guin. ² Dunujn achet raquie'chan, achet ni ad rüjnt sirv cayguieenan, ad caysquieentan bejn ree ad caychaa tëetan xtiidx Dios. Dunujn cayneen ni naj xtiidxli Dios, abi' bejn gajc ree zajc gagbee guial cayguieenan xnejz delant loj Dios. ³ Per bal yu' bén

ni ad rignia't xtiidxa'c Jesucrist ni cayneen, ad rignia'taman laan guial ad z taman loj xnejz Dios. ⁴ Abi' xindxab rniabee loj guidxliuj guie ma bascajyis xquiargueijn reeman, guial ad r nt reeman chililadx reeman, chit e gusni xtiidxa'c Jesucrist laa reeman abi' ad zajc guguaa reeman xguialrniabeeman, laaman guial najman zi'c gajzi Dios. ⁵ Ad caytie'chtan dux tiidx gajcan, ni caytie'chan naj xtiidxa'c Jesucrist, b n naj Dad par dunuj ree. Abi' ni ranazan lojdi guial caygueenan sirv l jt por guial ray nan Jesucrist. ⁶ Abi' laagajc Dios ni gunabee persi bani loj guidxliuj guie chi gule'cchaawaman laan, laagajcaman basni dux quiargueijn, guxhalaman dux quiargueijn din yayignia'n xhienaag naj xguialrniabeeman, guialrniabee raguaa ree por Jesucrist.

Yabajn ree por guialrliladx

⁷ Gulejman dunujn par yagueenan ni caygueenan, majsi nayajczan zi'c guiajs bajn din guiguien guial gra guialrniabee z ed por Dios ad por dunujtan. ⁸ Majsi graloj gualzi cayd udan per ad ralenya'tan. Majsi rul u achetri zajc yagueenan, per radxejl gajc xhienaag yagueenan. ⁹ Majsi xhiet ez r jnn  bejn dunujn, per ad riro'nladxt Dios dunujn. Rguin reeman dunujn per ad runidlojt reeman dunujn. ¹⁰ Bant ez guin zio'n nadxu'n loj gualg jt zi'cgajc guzajc Jesucrist, per zian ral un guial raya'pan xguialnabanman. ¹¹ Dxel la'tgaj nabanman, guixie guixie nadxu'n loj gualg jt guial nayajcan xbejn Jesucrist, per zian ral un guial raya'pan xguialnabanman, majsi guidxin dxej nit dux cuerpan. ¹² Nadxu'n loj gualg jt guial caytie'chan xtiidx Jesucrist, per por zian ma rajpidi guialnaban delant loj Dios.

¹³ Loj xtiidx Dios r b: "Guial bililadxan, zeel gunen ni gunen." Yan ziangajc guial raliduladxan xtiidx Dios zeel cayneen laan. ¹⁴ Din dunujn rayagbee guial Dios, b n basban dux Dad ree Jesucrist loj gualg jt, ziangajc yashanman dunuj ree guial ma nayajcan tijbzi con Jesucrist dxel l jt con dunujn tijbzi chign man dunuj ree lod zojbaman. ¹⁵ Din gra ni caygueenan n  gra ni cayza'can, cayza'can zian din yagueenan l jt yudar din gusnuu gacxhiej ni rliladxidi Jesucrist. Zian ma gac ree bejn mazri zien gud ed reeman quixt e loj Dios, guiza't t e reeman laaman zagdxe.

¹⁶ Zeel ad ralenya'tan. Din majsi cayo'xh dux cuerpan por mandad guin, per dux sprijtan guixie guixie cayc b Dios laan. ¹⁷ Achetctzi lasajc ree gualzi ni cayd udan loj guidxliuj guie din najn ni rd d, per por gualzi guin ree rayalan xguialnaza'c Dios, guialnaza'c ni lasajc mazri abi' ad yu't dxej nitan. ¹⁸ Din dunuj ree ad caygueent ree nagueijn yaya'p ree ni raguaa ree loj guidxliuj guie, caygueen ree nagueijn din yaya'p ree ni ad raguaat ree. Din ni raguaa ree loj guidxliuj guie yu' dxej nit reen, per ni ad raguaat ree yan ad yu't dxej nit reen.

5

¹ Dunuj ree rayagbee guial dux cuerp ree naj zi'c tijb yu cenci par dux sprijt ree loj guidxliuj guie, yu ni yu' dxej nit. Per rayagbee ree guial xanyabaa Dios gunee dunuj ree stijb cuerp, cuerp ni ad gojct por b nguidxliuj zi'c rajc tijb yu, abi' cuerp guin yaya'p ree par tiblayaa. ² La'tgaj raya'p ree cuerp guie loj guidxliuj ralu' ree gualquia, par dunuj ree xi nix diob guidxin dxej yaya'p ree cuerp ni yaya'p ree xanyabaa. ³ Din ad ganaxtizi Sprijt yayajc ree xanyabaa, n gajc cuerp yaya'p ree. ⁴ La'tgaj raya'p ree cuerp ni yaya'p ree loj guidxliuj guie, cayzaagdiajn nadxu'n xgab por ni cayza'can. Ad ranatan guial ray nan yay jtan, ni ray nan naj guial yaya'pan cuerp c b ni yaya'pan

par tiblayaa din nit dux cuerpan ni rayal nit. ⁵ Dios been dunuj ree zi'c nayajc ree abi' banee xSprijtaman duloj ree zi'c tijb sen guial gac zi'c naman gac.

⁶ Zeel zianczi raya'p ree confians, abi' dunuj ree rayagbee guial la'tgaj nabajn ree loj guidxliuj guie, zijt nadxu' ree guial lod zobj dux Dad ree Jesucrist. ⁷ Per dunuj ree zunaal reeman guial raliduladx ree laaman ad guial raguiaat ree xhienaag gac. ⁸ Zeel raya'p ree confians guin, abi' ma ray n ree yasa'n ree cuerp ni raya'p ree loj guidxliuj guie din yo' ree yuchu' ree con Jesucrist. ⁹ Zeel achet g  nman bal loj guidxliuj guie o bal xanyabaa, per ni ray n ree naj guial yaguieen ree zi'c r n Cristo. ¹⁰ Din dugra ree rayal yadxin lojman lod g  nman guialguxtis din tijbgaj dunuj ree yaca' ni rayal ree, por ni zagdxe o por ni mal ni baguieen ree loj guidxliuj guie.

Xhienaag gap bejn nejz par guidxinman loj Dios

¹¹ Zeel por respejt ni raya'p ree Jesucrist, cayguieen ree naguiejn guidxga' ree bejn xtiidxaman. Abi' Dios ragbee guial dunuj ree cayguieen ree zi'c rayal, balzianclaa n  l jt g  nbee dunujn guial dunujn cayguieencan xnejz.

¹² Ad caylest dux valoran, ni ray nan naj guial yabaadi guial gagbeedi ni naj diidxli por dunujn, din gac yadxi'di diidx loj ree b n r jn naguiejn yaya'n reeman zagdxe delant loj ree bejn luar g  n reeman xgab xhienaag naban reeman delant loj Dios. ¹³ Yan bal par bejn rajc duguijcan por ni cayguieenan, per cayguieenan laan por Dios. Abi' bal par l jt nad dguieenan zeel cayguieenan mandad guie, cayguieenan laan par yaguieenan l jt yudar.

¹⁴ Guial r n Cristo dunujn zeel cayguieenan ni cayguieenan, din dunujn rayagbee guial Cristo g jt par gra bejn abi' gra ree bejn ma naj zi'c beng t par dol. ¹⁵ Abi' Jesucrist g jtaman por gra bejn din b n chililadx ree laaman ad zabajntri reeman zi'ctzi r n reeman, ma guiban reeman ni'c r nman, laaman guial g jtaman por laa reeman abi' babanman stijb. ¹⁶ Zeel bal guia'xchej baguieen ree xgab guial naj Cristo tijbzi b nguidxliuj, per ad najtri dux xgab ree zian por laaman. Abi' ad rayidxga'tri ree guial chu naj bejn, ¹⁷ din chut  z b n ma naj tijbzi con Cristo, ma bidxaa mod ni nabanman. Ma nabanman garen guial loj ni gubanman guia'xchej.

¹⁸ Per gra nine naj por xyudar Dios, laaman been persi raya'p ree nejz par yadxin ree lojman por Jesucrist, abi' laaman gule dunujn din yagojnan bejn ree xhienaag din gap reeman nejz par guidxin reeman lojman. ¹⁹ Din tijbzi naj Dios con Jesucrist abi' por Jesucrist r jn Dios naguiejn gap ree bejn nejz par guidxin reeman lojman, por Jesucrist ma nayab ree bejn sin dol delant loj Dios, zianan naj ni bacaabeeman dunujn yagojnan bejn ree. ²⁰ Zeel dunujn nayajc b n canee por Cristo, cayd edan xtiidx Dios din gabbee ree bejn xhie rniab Dios g  n reeman. Abi' por Jesucrist ranaaban lojdi: Gol guzuj zagdxe con Dios. ²¹ Din Jesucrist achetctzi dol beenman, per por dux tol ree baslaa Dios g jtaman zi'c tijb b ndol din por laaman, cuguiaa Dios dunuj ree zi'c tijb b n ni ad way jnt dol.

6

¹ Zeel zi'c cayguieenan xmandad Dios, dunujn ranaab lojdi: Ad g  nbee xlia'di guial r n Dios l jt. ² Din loj xtiidxaman r b:

Chi bidxin dxej guidxga'n l j,
bidxga'n l j

abi' chi bidxin dxej gapil perdon
dxel beenan l j yudar.

Abi' dunujn rana lojdi guial ma bidxin dxej guin par l jt, ma bidxin dxej guidxga' Dios l jt n  dxej g unman l jt perdon.

³ Dunujn ad cayguieentan tijb ni g un guial ad zaliladxtri ree bejn Jesucrist, ad cayguieentan tijb ni gui b ree bejn guial ad cayguieentan zi'c balu n bejn ree. ⁴ Par gra cayl un bejn ree guial dunujn nayajc b n cay jn sirv Dios caydaan t en xhiet ez ni raza'can, zi'c guialzi, tarbajw, ni naya, ⁵ n  guial naa ni r jn ree bejn dunujn. N  guial rgu' reeman dunujn ladxguiib, rgu' t e reeman dunujn loj wadijl, ni radxagan guial tant zien ni raguieenan, ni ral en bacaal, ne guialrliaan ni rad udan. ⁶ Cayl u t en bejn ree chu nayajcan guial nabajnan zi'c rayal, guial rayagbeen conin naj diidxli, guial raya'pan pacens nayajc t en benza'c con ree bejn, guial nabajnan con xSprijt Dios, guial diidxli ray enan ben ren ree, ⁷ guial ranen ni naj diidxli, guial cay jn Dios dunujn yudar, n  guial rad en consejw loj ree bejn o radxi'n xtiidx ree bejn con xtiidx Dios. ⁸ Yu' dxej rajp ree bejn dunujn respekt, yu' t e dxej rnieeguidx reeman dunujn. Yu' dxej rniee reeman dunujn diidxguidx. R jnn  reeman dunujn zi'c b n rusquiee majsi diidxli naj ni raneen. ⁹ Yu' dxej r jn reeman zi'c b n ad n nbeet dunujn, majsi n nbee reeman dunujn. Majsi rul u ma yay tan per ad ray ttan, abi' majsi xhiet ez r jnn  reeman dunujn per ad rug tt reeman dunujn. ¹⁰ Majsi yu' naya du luxdoon, per raguieenan naguiejn din guiguien guial yu' du luxdoon nix. Majsi b nprob dunujn per por dunujn zien ree b n ma naj rijcw niz loj Dios guial ma ragbee reeman xtiidxaman. Majsi achet raya'pan loj guidxliuj guie, per achet rayaadxan.

¹¹ B n Corinto, dunujn ma ranan gra por dunujn, achet ni naguie'ch par dunujn guial diidxli ray enan l jt. ¹² Dunujn ad rlioxt ray enan l jt, l jt bal id r nridi dunujn. ¹³ Per naj rni n ' l jt zi'c rnieen  tijb dad gra xi'nman: Gol guy n dunujn zi'c ray enan l jt.

Nayajc ree zi'c xyadoo Dios naban

¹⁴ Gol gojp cudad xhie ree compromis g undi con ree b n ad rliladxt Dios, din garen naj xixgab ree b n ma zinal ree xnejz Dios guial loj xixgab ree b n contzi naban. Garen naj xixgab ree b n ridxga' xtiidx Dios guial loj xixgab ree b n ad ridxga't laan. ¹⁵ L jt ragbee guial ad zajct gac Cristo tijbzi con xindxab, ziangajc garen naj b n rliladxt Cristo guial loj b n ad rliladxt laaman. ¹⁶ Garen naj ree b n rliladxt dux Dad ree Dios guial loj ree b n rliladxt ni naladx reeman naj dios. Din dunuj ree guial raliduladxt ree Dios naban, dunuj ree nayajc xyadoodman zi'c r b tiblajt loj xtiidxaman lod r b:

Naj gabajnn ' laa reeman gazu t en con laa reeman bant ez guin che reeman.

Naj gac xDios reeman
abi' laa reeman gac da bejnan.

¹⁷ R b t e loj xtiidx Dios:
Gol barii loj ree ben mal, gol been tiblax.
Ad g undi ni dxuudx din yaca'n l jt,

¹⁸ abi' naj gac tijb Dad par l jt
gui ad l jt gaquidi da xi'ngaanan n  daxi'ndxa'pan.

Zian r b dux Dad ree Dios b n ca' gra guialrniabee.

7

¹ Ni guin ree naj ree promisejs ni ma been Dios con dunuj ree nayajc ree b n rliladxt ree Jesucrist. Zeel rayal yaguieen ree naguiejn yabajn ree naya.

Yasa'n ree tiblād dol, xgab mal, nē gra ree ni dxuudx. Abi' guixie guixie yaguieen ree nagueijn yabajn ree zi'c rēn Dios por respejt ni raya'p reeman.

Rabaa Pab guial bayūjn ree bèn Corinto xgab por xtol reeman

² ¡Gol gojc benza'c con dunujn! Dunujn achet waguieenan lējt, achet ni mal waguieenan lējt ad wasquiee tēētan lējt. ³ Ad naladxidi caneguijdxan lējt, din zi'c ma rnin lojdi diizd guia'xchej guial dunujn rayēnan lējt, abi' majsi yayējtan o majsi yabajnan per tijbzi nayajcan con lējt. ⁴ Dád ra'pan lējt confianz abi' dád rabaanē'n lējt. Majsi xhietēēz guialzi caydūūdan, per zi'c rgu' di du luxdoon nix zeel dád rabaan, majsi xhietēēz cayza'can

⁵ Din diizd chi badxinan niz Macedonia achetctzi guial yaziiduladxan por gra ni cayza'can, zi'c ni rüjnnē ree bejn dunujn nē guialnadxeb ni caydūūdan.

⁶ Per Dios bèn ragu' luxdoo ree bèn yu'naya luxdoo, laaman bagu' du luxdoon chi bi't Tito guie. ⁷ Abi' ad guialzi bi'ttaman bayu du luxdoon nix, nē guial bagu' di luxdooman zeel bayu du luxdoon. Naman du lojn guial dád rēndi guguiaadi naj, yu' tēēdi xgab yu'naya tēēdi por naj. Laan naj ni rabaanē'n guial yu'quidi xgab por naj.

⁸ Majsi naya guyu luxdoodi por gui'ch ni guxhalan lojdi, per achet naladxan. Majsi dád naya guyu luxdon chi guxhalanan guial ragbeen zunayadi tiblādēd, ⁹ per yan nix yu' luxdon, ad guial guyu nayatidi, yu' luxdoon nix din por guialguyunaya guin ma bayūjndi xgab zēdi loj xnejz Dios. Guyunayadi abi' gudaandi zi'c rēn Dios, abi' achet ni mal waguieenan lējt. ¹⁰ Din chi runaya luxdoo bejn zi'c rēn Dios, guialrunaya guin rüjn yudar persi rayūjn bejn xgab por xtolaman, zian rarii bejn loj casti, abi' ad yu't dxej yayūjn bejn xgab guial gulaaman loj casti guin. Per guial runaya luxdoo bejn abi' ad rüjntaman nagueijn chu'man loj xnejz Dios, dxel ad zajct gapaman guialnaban delant loj Dios. ¹¹ Per lējt gol baguiaa zi'c ma been yudar guial guyunayadi abi' gudaandi zi'c rēn Dios. Por guial guyunayadi nayob beendi nagueijn bazuxnejzidi ni ma rnin cayūjn tijb lējt, abi' balendi bidxeb tēēdi por ni cayūjnx. Dxel ma rēnejzdoodi gazun con lējt, badēē tēēdi laax casti zi'c rayal. Por gra ni beendi zian biguien guial achet dol rajpidi por zian. ¹² Gui'ch ni guxhalan lojdi, ad guxhaltanan guialzi rünan xgab por bèn cayūjn dol guin o guial rünan xgab por bèn cazagdiaj por xtol bèn guin. Guxhalan gui'ch guin lojdi din gulūūdi loj Dios guial yu'guijccquidi dunujn. ¹³ Laan naj ni rabaanē'n guial beenquidi zian.

Abi' yan mazri rabaan guial raguiaan Tito yu' luxdooman zagdxē baguiaadaman guial dád naza'c gojquidi con laaman. ¹⁴ Zeel ad basa'nxututidi naj por gra zi'c bazatan lējt lojman. Din gra ni rēn por lējt naj diidxli zi'c ragbeedi guial dunujn ganax diidxli raneen, abi' tēē diidxli naj ni raguie'chan loj Tito por lējt. ¹⁵ Yan dad rusaaladxaman lējt guial rusaaladxaman xhienaag bazoobidi xtiidxaman nē gra respejt ni gopidi laaman chi guzuman con lējt. ¹⁶ Dád nix yu' luxdon guial ra'pan lējt confianz par gra.

8

Guial rudēēd gon con guidib luxdoo

¹ Yan compniar raliduladx ree Jesucrist, rayēnan gagbeedi xhienaag cayagnē Dios bèn rililadx ree Jesucrist niz Macedonia. ² Majsi xhietēēz cazajc reeman, per ad rucwēēzt rguien guial dád rabaa reeman. Majsi dád bēnprob reen, per dad rabaa reeman rudēēd reeman cintabl par gagnē reeman bejn

ree. ³ Naj ragbee guial diidxli been reeman yudar bejn ree xt lod baneetzan laa reeman. Laa reeman been yudar mazri guial loj ni baguieenan xgab, sin guial chu güün laa reeman naguiejn. ⁴ Dád been reeman naguiejn du lojn din yatiéjban guial nē laa reeman güün yudar bén rliladx ree Jesucrist, ⁵ abi' been reeman yudar mazri guial loj ni baguieenan xgab, laan naj guial diidxli ma basa'n laagajc reeman loj Dios, laan naj ni been reeman yaloj. Zeel yan ma za' reeman par güün reeman ni yaguie'chan loj reeman guial rēn reeman güün reeman zi'c rēn Dios. ⁶ Zeel yan zi'c ma guzuloj Tito cuto'paman yudar guin, raguie'chan lojman din gulox guto'paman laan entr lējt. ⁷ Dunujn rayagbee guial par gra zagdxē zēdi: Diidxli rliladxidi Jesucrist, ragbeedi xcwentaman, achet ryaadxidi par guinieedi xtiidxaman, za'sindi par güündi laaman sirv rēn tēēdi dunujn, yan gol been naguiejn din guiguien guial najdi benza'c par güündi yudar con ni ranan lojdi. ⁸ Ad rüntan lējt naguiejn guial gudēēdi ni rdo'p, per rugojnan lējt zi'c rabaa ree ben ren guial rüjn reeman yudar, din bal rēndi gulüüdi guial diidxli rēndi xcompniaridi. ⁹ Din lējt ragbee zi'c naza'c Dad Jesucrist, bén basa'n gra guialnaza'c xanyabaa, abi' bi'taman loj guidxliuj zi'c tijb laan ni achet rajp din por laaman yayal nē lējt xguialnaza'c Dios.

¹⁰ Zeel rnin lojdi guial zagdxen gulooxidi ni guzulojdi gudibijz. Yaloj lējt been xgabza'c guial güündi yudar, abi' laa guzuloj gajquidi. ¹¹ Yan zi'cgajc yu' luxdoodi nix guzulojdi, ziangajc gol babaa gusnuudi gudēēdi ni rdo'p zi'ctzi galguzjdi. ¹² Din chi diidxli rēn bejn güünman yudar, xhietēz naag zajc güünman yudar. Ad rayalt gudēēdaman xt ni ad rajptaman.

¹³ Ad canitan lojdi guial tēdidi tarbajw cwe'quidi xt ni ad rajptidi par güündi yudar bén ryaadx ree xhienin chitēē xhie guiyaadx reeman, ni rayēnan naj guial tibloj yaguieen dulasa' ree yudar. ¹⁴ Yan lējt zajc güündi yudar bén ryaadx ree xhienin, dxel despuejs güün reeman lējt yudar con ni ryaadxidi. Zian tibloj yaguieen du lasa' ree yudar. ¹⁵ Loj xtiidx Dios rēb: “Bén bato'p zro' achet been sobr, abi' bén bato'p ta'nzi achet biaadxaman.”

Tito con ree xcompniaraman

¹⁶ Quixtēē Dios badēēman loj Tito lasa'gajc xgab rünan por lējt. ¹⁷ Yan chi raguie'chan lojman guidganajman lējt, laa cwēb gajcaman guial ma rēnman guguiaaman lējt, ad beent naguiejn chu niniabee ni'taman.

¹⁸ Abi' con laaman cayxhaalan stijb dux compniaran bén ma nünbee ree dux compniar ree bén rliladx ree Jesucrist guidibczi, guial rulüüman bejn ree xtiidxa'c Dios zagdxē. ¹⁹ Ma bacaabee tēē ree dux compniar raliduladx ree Jesucrist laaman din saman con dunujn din güünman dunujn yudar yune'n ni cado'p. Abi' yudar guin cado'pan din guiguien guial rayēnan yaguieenan yudar stijb ree dux compniar ree, abi' por yudar guin guza't reeman Dad Jesucrist zagdxē. ²⁰ Zeel cwabee bén guie din saman con dunujn chitēē xhie gucaaquia reeman dunujn por gra yudar ni cado'p ni naca'n par yugsa'nan. ²¹ Din dunujn rayēnan yaguieenan gra zi'c rayal, ad naabtizi loj Dad Jesucrist, nē loj ree bejn.

²² Yan cayxhaalan Tito con bén guin cayxhaalnē'n laa reeman stijb dux compniaran bén ma balu'been zien volt guial diidxli rēnman güünman yudar, abi' mazri yan guial dád rajpaman lējt confians. ²³ Bal chu guiniabdiidx por Tito, gol güjdx guial da compniaran najman, laaman cayüjn naj yudar par günan lējt yudar chinalidi xnejz Dios. Guiáad za' tio'p dux compniaran bén zē ree con laaman, dux compniar ree bén rliladx ree Jesucrist guxhaal laa reeman, abi' ruza't reeman Jesucrist zagdxē. ²⁴ Yan gol balüü loj reeman

guial diidxli rëndi bejn ree, din por laa reeman gagbee ree los demazri ree compniar rlladx Jesucrist xcwentidi, din guguaa tée reeman guial ni diidxli naj ni ma rën loj reeman xcwentidi.

9

Yudar par ree xbejn Jesucrist.

¹ Yan por yudar ni rayal yale'can par yaguieenan yudar dux compniar ree bën rlladx ree Jesucrist, ad ryaadxt ganin mazri xcwentan, ² din naj ragbee guial ruladxidi güündi yudar. Abi' xt nix yu' luxdon rën loj ree bën Macedonia guial lëjt bën Acaya diidz gudibijz cayüjndi nagueijn cayüjndi yudar, abi' gra ree bën Macedonia been nagueijn güün yudar chi bigueijn reeman zian. ³ Zeel caxhalan Tito con za tio'p ree dux compniar ree din guiguien guial waliqui ni ma gunen por lëjt xcwent yudar guin, din güündi nagueijn güündi yudar zi'c ma rën por lëjt. ⁴ Din bal guidnë'n tio'p choon ree bën Macedonia ad yadxaaglojn lëjt ad za'tidi porvinid, abi' natun par naj chitëe ganin natun par lëjt por confianz ni ra'pan lëjt. ⁵ Zeel benan xgab rën loj Tito con za tio'p dux compniar ree guial meyorli ned gaj reeman guidganaj reeman lëjt, din güün tée reeman yudar guloo guto'p reeman yudar ni ma nadi din ma najn purvinid chi guialan. Zian guiguien guial diidxli rëndi yazaladxidi ad gualzi canabeetan lëjt.

⁶ Naj rni lojdi bën rxübin ta'n, ta'n gajc raca'man, guíaad bën rxübin zro', zro' gajc raca'man. ⁷ Tijbgaj lëjt gol badëe zi'c naj xixgabidi gudëedi, ad mal gant ad nagueijn tëet, din Dios rënman bën razaladx guidib luxdoo. ⁸ Abi' Dios rajpaman gra gualrniabee par güünman lëjt yudar gapidi gra ni ryaadxidi chitëe xhie guiyaadxidi din güündi yudar zi'c rayal. ⁹ Loj xtiidx Dios rëb: Bën ni rgui's ni rajpaman abi' rudëeman laan loj ree bënprob, ad yu't dxej yayanladx reeman ni zagdxe ni rüjnman.

¹⁰ Yan Dios bën razaladx bin rxübin bejn, bën razaladx gualraw par ree bejn, laaman gulüü lëjt xhie güündi din gapidi gra ni rayal gapidi, din gac güündi yudar mazri bën ryaadx ree xhienin. ¹¹ Zian mazri naj ni gunee Dios lojdi din gusnuu güündi yudar yazaladxidi. Abi' por yudar ni guixhiaalnëdi dunujn par ree compniar rlladx ree Jesucrist, laa reeman gudëed quixtëe loj Dios. ¹² Abi' yudar guin ad züjntan sirv naabzi par loj ni ryaadx reeman laan, güünan sirv në par gudëed reeman mazri quixtëe loj Dios. ¹³ Por yudar guin gagbee reeman guial cuzoobquidi xtiidxza'c Jesucrist zi'c rlladxidi laan abi' guza't reeman Dios zagdxe por zian, në guial najdi benza'c rgui'sidi ni rajpadi par laa reeman në par gra ree bën ryaadx laan. ¹⁴ Abi' zën reeman lëjt, cwedx tée reeman Dios por lëjt por xgab za'c ni baneë Dios lojdi guial güündi yudar. ¹⁵ ¡Quixtëe Dios por ni ma bazaladxaman duloj ree por xi'nman, xt ni'quid radxejlt xhie yaguie'ch ree por zian!

10

Guialrniabee ni rajp Pab guial najman xi apóstol Jesucrist

¹ Naj Pab, yu' ree bën na guial benza'c naj chi za'n con lëjt, abi' chi za'n zijt sin guial rdxeb rdililë'n lëjt. Per zi'cgajc ninieenë Cristo lëjt con respejt në con diidxza'c, rniaaban lojdi guial ² xi nix chi guialan guidganan lëjt ad rüjnt nagueijn gadilë'n bën rëb ree por da xgabzan cayünan ni cayünan, din ad rdxebtan ganenë'n laa reeman. ³ Walican nayajcan bënguidxliuj, per ad

raguieentan naguiejn yaguieenan gan por dux xgabzan zi'c r jn ree b n ad zinalt xnejz Dios. ⁴ Ad raguieentan naguiejn yaguieenan bejn ree gan por dux xgabzan, dunujn raguieenan gan por xguialrniabee Dios, guialrniabee ni zajc guse'n xhiet ez ni mal. ⁵ Por guialrniabee guin baguieenan gan loj ni rudxiib ree bejn duguijcan, abi' baguieen t en gan loj guial nadxal reeman ni rudxoon g unbee reeman Dios. Zianan rase'nan xhiet ez xgab din chile' gucaagdiajg reeman xtiidx Jesucrist. ⁶ Abi' l jt chi ma cuzoobidi xtiidx Dios diidxli, dxel dunujn ma nadxu'n par yazuxnejzan gra ree b n ad wazoobt diidx zagdx.

⁷ L jt mazri ridxga'di zi'c ruguiaadi bejn. Bal yu' b n r jn xgab guial diidxli najman xbejn Cristo, rayal cu'guijcaman guial nayajc ree xbejn Cristo zi'cgajc laaman. ⁸ Abi' majsi ganin lojdi mazri xcwent guialrniabee ni banee Dios lon, ad ratutan din laaman banee guialrniabee par g nan l jt yudar chignia'di mazri xcwent xnejzaman ad par gunijttan l jt. ⁹ Ad naladxidi guial r nzan gucheban l jt con ree da gui'chan. ¹⁰ Din yu' ree b n ni r b guial diidx naa abi' sin guialrdxeb rniene'n l jt loj ree da gui'chan, abi' chi za'n con l jt ni'quid rul t lasajcan par l jt, ni'quid radxat loj ree bejn ni rniene. ¹¹ Per naj r nin lojdi guial b n r b ree zian rayal gagbee reeman guial zi'cgajc raneene'n l jt loj dux gui'chan chi nadxu'n zijt, ziangajc zajc yaguieenan chi nadxu'n con l jt.

¹² Din dunujn ad raguieentan zi'c r jn ree b n rlies xvalor gajc, per ni'czi ta'n ad raguieentan xgab yaguieenan zian. Din nitontzi r jn reeman chi rlies xvalor gajc reeman, ruguiaa laagajc reeman xhienaag naj reeman par ree stjib xcompiar reeman. ¹³ Per dunujn ad ralest dux valor gajcan mazri guial loj ni rayal, din dunujn ranazan ni naj diidxli zi'c gulej Dios dunujn yaguieenan, yan ma cw jbaman badxinan ladxidi. ¹⁴ Zeel ad g undi xgab guial cad t  caynabeen l jt, din yaloj dunujn bio'p ladxidi par yasiidan l jt xtiidxza'c Jesucrist. ¹⁵ Dunujn ad ralest dux valor gajcan por tijb ni been stjib bejn. Per ral ezan guial ni's xguialrliladxidi, din yasnuu yaguieenan l jt yudar gusnuu g unbeedi ni rayal gagbeedi xhienaag rayal yaguieen ree. ¹⁶ Zian ma zile' yo'n mazri delant ladxidi par yatie'chan xtiidxza'c Jesucrist, per lod achut wazuloj chit e yales dux valor gajcan con ni ma been ben ren.

¹⁷ Bal yu' b n r n guilies xvalor gajc, mejorli guiliesaman xvalor dux Dad ree Dios. ¹⁸ Din ad b n rliest xvalor gajc naj b n raya'n zagdx loj Dios, b n raya'n zagdx naj b n rlies xvalor Dios.

11

Pab con ree ap stoles b n rusquiee ree

¹ Yan,  xi nix taandi naj con tio'p choon ree da xgab tontan! Per naj rni lojdi gol gudaan naj. ² Naj r nan l jt zi'cgajc r n Dios l jt. Zi'cgajc tijb dad rajp xi'ndxa'p biin ni ma naj guxhliaa din chile' guidxinm naya loj xin tia' laam, zian r nan guidxine'n l jt loj Cristo naya sin dol. ³ Per rdxeban chu' b n gusquiee l jt zi'c basquiee b el Eva, abi' ad z jntridi xgab guidib luxdoodi xcwent Jesucrist. ⁴ Din chi ri't ben ren r man diidx lojdi xcwent Cristo, per garen guial zi'c ma bal un l jt, o chi ri't b n ren r man diidx lojdi xcwent Sprijt, per ad lasa't xSprijt Dios b n ma nabann di, o chi ri't ben ren lojdi naman xhienaag din gapidi perdon, per garen guial loj ni ma ranan lojdi, l jt laa ridxga' gajquidi laa reeman. ⁵ Per naj rul u achet ryaadxan delant loj ree b n r b laa reeman naj quijb xi ap stoles Jes s. ⁶ Din majsi achet sirv

naj par ganen, per ad ryaadxtan guialrignia' abi' lèjt ragbee guial diidxlin por gra ni ma baguiaadi baguieenan.

⁷ Per, ¿chuj ni ni malan benan ya guial ad bentan benro' lojdi persi benan gan gojquidi xbejn Cristo, nè guial ad baquijxtan lèjt chi basidan lèjt xtiidx Dios? ⁸ Ben renli ree bèn naj ree xbejn Cristo cwa'n xmilia reeman persi beenan naj yudar la'tgaj guzun con lèjt persi basidan lèjt xtiidx Dios. ⁹ Abi' chi guzun con lèjt, chi biaadxan xhienin ad gunaabtan lojdi güündi naj yudar, bèn Macedonia ree bèn rliadx ree Jesucrist laa reeman bidnè ni biaadxan nadxel. Ad goct wanin lojdi guneedi xhienin par naj, ad yu' tèèt dxej ganin guial rüjn naguiejn güündi naj yudar. ¹⁰ Zi'c najn xbejn Cristo rnin lojdi ni naj diidxli, guial niz Acaya Achutczí zajc gudxoon guial chu' luxdon zagdxé guial guièn ni benan con lèjt. ¹¹ Abi' ¿chexc zeel benan zian con lèjt? ¿Guial ad rëntan lèjt ya? Per Dios ragbee guial dád rënan lèjt.

¹² Abi' gusnuu günan zi'c cayünan xt yandxej guial ad zanaabtcan lojdi güündi naj yudar, din chitëë xhie guinee ree bèn ruladx guilies xvalor gajc guial naj reeman xbejn Jesús guial zi'cgajc cayguieenan cayüjn reeman. ¹³ Din laa reeman rëbzi reeman guial naj reeman xi apóstoles Jesús, rusquieezi reeman bejn ree rüjnzi reeman zi'c rulüü naj reeman xi apóstoles Jesús. ¹⁴ Per xt ni'quid radxtal loj bejn por zian, din xt xindxab zile' gulüüloj loj bejn zi'c tijb xianjl Dios. ¹⁵ Dxel xt ni'quid radxtal loj bejn guial bèn ni cayüjn ree xmandad xindxab rëb reeman guial laa reeman cayüjn xmandad Dios. Per laa reeman zayal reeman casti ni ryal reeman por ni cayüjn reeman.

Tarbjaw ni gudëd Pab guial najman xi apóstol Jesucrist

¹⁶ Yan canin lèjt stijb: Ad naladxidi guial ad nadëdguientan, per bal rüjndi xgab zian gol basa'n za naj ganen zi'c tijb bèn ad nadëdguient din nëgajc naj gales da valoran majsi tibda'nzi. ¹⁷ Ad nat Dios guial gales da valoran zi'c cayünan, per gales da valoran zi'c tijb bèn ad nadëdguient. ¹⁸ Zi'c yu' zien ree bèn rlies xvalor gajc por ni rüjn reeman loj guidxliuj guie, yan ziangajc naj gales da valor gajcan. ¹⁹ Din guial najdi bèn rignia' ad nawëëgt naj taandi bèn ad nadëdguient ree. ²⁰ Rdaandi bèn rniabee ree lèjt rüjn reeman zi'ctzi rën reeman, rdaandi bèn rtia' ree ni rajpidi, bèn rusquiee ree lèjt, o rniee reeman lojdi ganax ree diidx nabë abi' xt rtiëjbidi rëéz reeman ro'di. ²¹ Majsi natu'n par naj, per naj rni lojdi guial ad baya'ptan valor guial naguieenné'n lèjt zian.

Per bal rlies xvalor reeman por xhiedxitzinin, nëgajc naj zajc gales da valoran. Canen lojdi zi'c tijb bèn ad nadëdguient, din ad xnejxtan. ²² Per bal na reeman guial naj reeman bèn Hebreo, nëgajc naj naj bèn Hebreo. Bal na reeman guial naj reeman bèn Israel, ziangajc naj bèn Israel gajc naj. Bal na reeman guial loj xdiaa Abraham zëéd reeman, nëgajc naj zial loj xdiaa Abraham. ²³ Abi' bal na reeman guial xmandad Cristo cayüjn reeman, naj mazri cayünan xmandadaman. Majsi zi'c rniee bèn ad nadëdguient rnien chi rnin zian, per diidxli guial naj mazri ma benan xmandad Cristo guial loj reeman. Abi' por zian mazri ma guyun ladxguiib guial loj reeman, mazri ma gudijn ree bejn naj guial loj reeman abi' mazri zien volt ma guzun loj guialgüjt. ²⁴ Gaay volt ma gudijn ree bèn Israel naj, abi' beegaj gudijn reeman naj zi'ctiubitap volt rugaz reeman duu ladan. ²⁵ Choon volt gudijn reeman naj con yag, abi' tib volt bacaaguiaj reeman naj. Choon volt ma wej barcw lod za'n xan nijsdoo, abi' tibdxej tibguiaal baya'nan loj nijsdoo. ²⁶ Guidibczí lod ma wan, gudëëdan loj ree ni nadxeb chi gudëëdan loj ree guiw, loj ree

béngubaan, loj ree bèn ladxan bèn Israel ree në loj ree bèn ad najt bèn Israel. Ma gudëed tēen loj ree ni nadxeb luguiedx ree, dajn ree, loj nijsdoo, në loj ree bèn rusquiee na reeman guial naj reeman xbejn Cristo. ²⁷ Dád ma guzaagdiajn. Dád zien volt ma gulèn bacaal, ma gulaanan, ma we'can nijs, abi' ma guyu dxej ni achetctzi gudawan. Ma gognajlan, ma biaadx tēē da xaban.

²⁸ Abi' ad laatzanan ma guza'can, zien ree ni ma guza'can. Abi' guixie guixie rünan xgab por ree xbejn Cristo bèn zojb ree niz lod ma wan. ²⁹ Bal xhie cazajc tijb ree bèn rliiladx Jesucrist, cayünan xgab por laaman. Abi' bal cusquiee reeman tijb ree bèn rliiladx Jesucrist par güünman dol, dád ralenan yu' tēēn laaman xgab. ³⁰ Bal rüjn naguiejn gales da valor gajcan, tijbzi ni ganin por naj, naj por guialrzagdiaj ni ma gudëedan. ³¹ Abi' Dios xDad Dad Jesucrist, laaman bèn ryalal respejt guidib tiamp, laaman ragbee guial diidxli naj ni canen. ³² Tiamp chi canabee rey Aretas, wan luguiedx Damasco dxel gunabee gobernador luguiedx guin biaaw nejz par guiniaaz reeman naj. ³³ Per guyu ree bèn ni badxe' naj lēn tijb dxüm abi' gulet reeman naj niz ro' ventan ni naj ro' ze' ni nayaw guiedx guin, zian gulaan loj gobernador guin.

12

Ni balüüloj lon

¹ Achet rüjn bejn gan guial guilies xvalor gajcaman, per ryalal ganin lojdi por ree ni balüüloj lon në ree ni balüü Dad Jesucrist naj. ² Naj nünbee tijb xinguaaw rliiladx Jesucrist, ma gojc chidaj ijz wejx xanyabaa lod zojb Dios. Ad ragbeetan bal binē xcuerpix o xsprijtzix wej, ad ragbeetan, tijbzi Dios ragbee. ³ Bal binē xcuerpix o xsprijtzix wej, ad ragbeetan, tijbzi Dios ragbee. Per naj ragbee ⁴ guial wejx lod zojb Dios, lod biguiejnx diidx ni xt ni'quid radxejlt xhienaag ninieex laan guial ad rayalt gagbee gra bejn laan. ⁵ Bēn zii zajc galesan xvalor, per ad rliestan da valor gajcan, ni rnizan por naj por ree guialrzagdiaj ni ma gudëedan. ⁶ Abi' majsi gales da valoran, ad cayüntan zi'c tijb bèn ad nadëdguient din ganax ni diidxli naj ni ganin. Per ad rüntan zian chitēē yadxaloj bejn naj mazri guial loj ni ryalal por ni ruguiaa reeman rünan, o por ni riguejn reeman rnien.

⁷ Në par chitēē gales da valoran zro' por gra ni ma balüü Dios naj, cadëedan tijb guialzi ni naj zi'cgajc zi'c chi yu' tijb guiějch tibljajt bejn. Laan naj xchiin xindxab par güünnaax naj chitēē gales da valoran. ⁸ Choon volt ma canaaban loj Dios din chiquiedaman guialzi ni cadëedan, ⁹ per laaman na lon: “Zi'c rēnan lüj achet gac, din mazri rguien da guialrniabeen chi cazagdiaj bejn.” Zeel rabaan por ree guialrzagdiaj ni cadëedan din guiguien guial nabanen con xguialrniabee Cristo. ¹⁰ Rabaan por xhietēēz guialrzagdiaj ni cadëedan, o në chi rnieeguidx bejn naj, o chi ryaadxan xhienin, o chi xhie rüjn bejn naj, në gra ree tarbajw ni cadëedan, guial cadëedan laan guial rēnan Cristo. Din chi cazaagdiajn dxel mazri ra'pan xyudar Cristo.

Yu' Pab xgab por ree bèn rliiladx Cristo luguiedx Corinto

¹¹ Gunenē'n lējt por naj gajc zi'c tijb bèn ad nadëdguient, per lējt rajp dol guial benan zian. Din lējt naj bejn ryalal guilies da valoran delant loj ree bèn ni rēb guial laa reeman naj quijb xi apóstoles Jesucrist. Din majsi tijbzi bèn ad rüjnt sirv naj, per achet ryaadxan delant loj reeman. ¹² Chi guzun con lējt ad balenya'tan guial günan milagr ree në gra los demazri ree ni badxalojdi ni benan në graloj ree ni benan ni been sirv zi'c sen guial diidxli najn xi apóstol

Jesucrist. ¹³ Gra zi'c ma benan con gra ree compniar rliladx Jesucrist lod ma wan, ma benan laan con lèjt. Tijbzi ni ad bentan con lèjt naj guial ad rnitan lojdi guial güündi naj yudar con gra ni ryaadxan la'tgaj guzun con lèjt, per bal guneguijdxan lèjt por zian ¡Gol been naj perdon!

¹⁴ Yan ma cayünan xgab guidganen lèjt stijb, laan naj ni yayon volt guidganen lèjt. Abi' ni'qui yan ad zanitan lojdi guial güündi naj yudar, ad ni rajptidi rënan, lèjt naj bèn rënan. Din ad xi'nt bejn rguuil xhienaag guibanman, dad guin ree rguuil xhienaag guiban ree xi'n reeman. ¹⁵ Abi' majsi gra ni ra'pan gūnan gaxt, o majsi yadib da cuerpan par gūnan lèjt yudar, per achet güunan. Majsi rulüü chi mazri rënan lèjt, ta'nzi rëndi naj.

¹⁶ Walican guial ad gunaabtän lojdi niagnëdi naj nuneedi xhienin, per yu' ree bèn rëb guial benan zian din nasinan par gusquien lèjt. ¹⁷ ¿Wen basquieen lèjt ya chi guxhalan bèn bidganaj ree lèjt? ¹⁸ Nè chi rën loj Tito guial gui'taman guidganajman lèjt abi' guxhalan laaman con stijb dux compniar ree bèn rliladx Jesucrist, ¿wen yu' ni basquiee Tito lojdi ya? ¿Nid zi'c laaman zi'c naj tiblojzi naj xgab raguieenan ya abi' zi'cgajc rünan rüjnman?

¹⁹ Por gra ni ma ranan lojdi, ad naladxidi guial caylaj dunuj gajcan, din achet waguieenan lèjt. Dios ragbee guial zi'c nayajcan xbejn Cristo cayneenë'n lèjt, abi' gra ni caynan lojdi najn par yaguieenan lèjt yudar chinalidi xnejz Dios guial rayënan lèjt. ²⁰ Din rdxeban guial chi guialan guidganen lèjt ad zadxaaglojtan lèjt zi'c rënan, abi' lèjt ad zuguaatidi naj zi'c rëndi guguaadi naj. Rdxeban gadxaaglojn lèjt con wadijl, gualnadëdloj, gualrdxe'ch, gualrlies xvalor gajc, gualrniee guijdx lasa', guial ruza't bejn, guial rüjn benro' nè guial ad nadxagtri lasa'di. ²¹ Rdxeb tëen guial chi guidganen lèjt stijb abi' yaya'nxtun por lèjt delant loj Dios. Abi' dád chu' naya luxdon por zien ree lasa'di bèn ad rbëzt ree rüjn dol, bèn ad rayüjnt ree xgab zi'c naban reeman. Ad rucwëëzt rzunë reeman bèn ad najt lacheel reeman, ad rucwëëz tëët reeman vijs ni rajp reeman o stijb ree ni ad rüjnt sirv ni rüjn reeman.

13

Diidx bigra bacaa Pab loj gui'ch guie

¹ Yan ni yayon volt guidganen lèjt. Chi guialan, gra ni nadi por stijb ree xcompniaridi, rayal chu' tio'p o choon testiw din guiguien guial diidxli naj ni canadi. ² Abi' zi'c rën loj ree bèn ni cayünj dol chi bialan bidganen lèjt ni barojp volt zi'cgajc ma rnin loj gradi, laagajcan canin lojdi yan za'n zijt guial chi guialan guidganen lèjt stijb, achetctzi ni téd zezi par ree bèn ni cayünj dol. ³ Zian gagbeedi ni rëndi gagbeedi guial Jesucrist cunee diidx ni rayal ganin lojdi. Abi' Jesucrist achet ryaadxaman par güünman zi'c rayal güünman con lèjt abi' con lèjt culüü xgualrniabeeman ni rajpaman. ⁴ Walican güjt Jesucrist loj crüjz zi'c tijb bèn ad rajpt gualrniabee, per yan nabanman por xgualrniabee Dios. Abi' zi'c güjtaman zi'c tijb bèn ad rajpt gualrniabee ziangajc dunuj ree rulüü ad raya'pt ree gualrniabee, per zi'c nayajcan xbejn Cristo raya'pan xgualrniabee Dios par yaguieenan ni rayal yaguieenan con lèjt.

⁵ Lèjt gajc gol been xgab bal walidi rliladxidi Jesucrist. Lèjt gajc gol been xgab xhienaag nabandi. Gol gogbee guial ma nabandi con Jesucrist, bal id rnieezidi guial rliladxidi laaman. ⁶ Balzianclaa gagbeedi guial dunuj diidxli raliduladxan laaman. ⁷ Abi' rarejdxan Dios por lèjt chitëë güündi ni mal, ad par yaya'ntan zagdxë delant loj ree bejn, cayguieenan zian par

güündi ni naj zagdxe, majsi par ree bejn ad cayguieentan zi'c rayal. ⁸ Per ad zajct yaguieenan tibladi ni naj diidxli, dunujn caynazan ni naj diidxli. ⁹ Zeel yu' du luxdoon nix achet güünan ni cayza'ctzan din chile' sudxi'chidi loj ni rliladxidi. Abi' rarejdxan Dios din gagbeedi guidiblagaa xhienaag guibandi xnejz. ¹⁰ Abi' caxhalan gui'ch guie lojdi dxelri guidganan lëjt, din chi guialan guidganan lëjt ad ryaadxt gadilë'n lëjt por guialrniabee ni bane Dad Jesucrist lon, guialrniabee ni baneeman lon par günan lëjt yudar chignia'di mazri zagdxe xnejz Dios, ad par gunijttan lëjt.

¹¹ Yan compniar raliduladx ree Jesucrist par guloxan gui'ch guie, naj rni lëjt: Gol badxe' luxdoodi zagdxe, gol been naguiejn gol gubajn zi'c rayal, gol bagu' luxdoodi gol gubajn tée zagdxe, gol babe'cdxe luxdoodi con ree xcompniaridi. Abi' Dios bén rën dunuj ree rabe'cdxe tëëman du luxdoo ree laaman gagnë lëjt. ¹² Xhietëëz hor ni radxaag ree xcompniaridi, gol bagajpdioz lasa'di zi'c rayal. ¹³ Gra ree dux compniar ree bén rliladx ree Jesucrist niz guie rugajpdioz reeman lëjt.

¹⁴ Dad Jesucrist güünle' gradi, guial rën Dios lëjt abi' xSprijtaman gagnë lëjt zianczi. Amén.

Gui'ch ni guxhaal San Pabl loj ree bén Galacia rliladx Jesucrist

Rugajpdioz San Pabl bén rliladx ree Jesucrist

¹ Naj Pab najn apóstol, per ad bénguidxliujt bacaabee naj ad laa tēēt reeman guxhaal naj, najn apóstol por Jesucrist nē por dux Dad ree Dios bén basban laaman loj gualgūjt. ² Gra ree dux compniar ree bén za' ree guie con naj ragajpdiozan lējt najdi bén rliladx Jesucrist niz Galacia. ³ Dux Dad ree Dios nē Dad Jesucrist gūnle' lējt yabe'cdxe tēē reeman luxdoodi. ⁴ Jesucrist gūjt por dux tol ree persi babēēman dunuj ree loj gra ree ni mal ni yu' loj guidxliuj guie zi'c goc xixgab dux Dad ree Dios. ⁵ Zeel rayalczi yaya'p reeman respejt zianczi. Amēn

Achetri diidx ren ni zajc yabēē dunuj ree loj dol

⁶ Dád radxalon guial dád cari cabēēladxidi xtiidx Dios, abi' laaman guial rēn Jesucrist lējt zeel gurejdxaman lējt. Per lējt diidx ren ma ridxga'di ⁷ abi' ni'quid xtiidx Diosan. Diidxliczi yu' ree bén rēn gagdxadi abi' rēn reeman guchaa reeman zi'c naj xtiidx Cristo. ⁸ Per bal yu' bén ruluū lējt diidx ren ree guial loj ree diidx ni ma balūn lējt par gaquidi perdon, laaman ma rayal xcasti Dios, majsi chutēēznin majsi naj gajc o majsi tijb xi anjl Dios. ⁹ Zi'c ma rnin lējt abi' yan ma rninan zatijb: Bal chu ruluū lējt diidx ren ree guial loj xtiidx Cristo ni ma bililadxidi, laaman ma rayal xcasti Dios.

¹⁰ Ad raguiltan mod guial yaya'nan zagdxe loj ree bénguidxliuj, rūnan naguiejn din yaya'nan zagdxe loj Dios. Din bal gūnan naguiejn yaya'nan zagdxe loj ree bénguidxliuj dxel ad cuzobtran xtiidx Cristo.

Xhienaag gojc zeel gojc Pab apóstol

¹¹ Compniar raliduladx ree Jesucrist, rēnan gagbeedi guial xtiidx Cristo ni ma balūn lējt ad bénguidxliujt gulēēgujic laan. ¹² Abi' ad cwa'tanan ad basid tēētan laan por bénguidxliuj, Jesucrist gajc naj bén balūū laan naj.

¹³ Lējt ma biguiejn guial chi guyu'n loj xreligion ree bén Israel, guzunaalan bén rliladx ree xtiidx Dios din gūnan laa reeman ni mal abi' benan naguiejn din gusa'n ni rliladx reeman. ¹⁴ Abi' naj mazri guzudxi'chan loj religion guin guial loj ree lasa' zidnē'n tijbzi guial benan naguiejn benan gra ree xcostumbr ree dux béngulalan. ¹⁵ Per guial rēn Dios naj, diidx chi gadan guial loj guidxliuj mal gulejman naj. Dxel chi beenman xgab. ¹⁶ Balūūloj xi'nman lon din gatiechan xtiidxza'caman loj ree bén ad najt bén Israel. Abi' chi goc zian achut loj bignabdiidxan, ¹⁷ ad watan Jerusalén nignan bén ma naj ree xi apóstoles Jesús gocli diidx chi gadan gac xi apóstol Jesús, laa wa gajcan niz Arabia dxel baye'can niz Damasco stijb.

¹⁸ Chi goc choon ijz dxel wan Jerusalén persi benbeen Bēd abi' guzun con laaman chiin gubijdx. ¹⁹ Per achut apóstol ren baguiaan tijbzi Jacob bijch Dad Jesucrist. ²⁰ Gra ni canin lējt naj diidxli abi' Dios ragbeechaaw guial ad rusquieetan.

²¹ Dxelri wan niz Siria nē niz Silicia. ²² Per ree bén rliladx Cristo, bén zojib ree niz Judea ad wayūnbeet reeman naj nadxel. ²³ Rguiejnzi reeman rēb ree bejn: “Bén guzunal dunuj ree yaloj par gūnman dunuj ree ni mal yan ma catie'chaman xtiidx Jesucrist, majsi yaloj beenman naguiejn din yasa'n ree

ni raliduladx ree Jesucrist.” ²⁴ Abi' rudëë reeman quixtëë loj Dios guial në naj ma rliladx Cristo.

2

Bachajg Pab bén naj ree apóstoles

¹ Chi goc chidaj ijz, dxel wan Jerusalén zatijb. Binë'n Bernabé con Tito, ² din Dios na guial gan ni. Abi' Jerusalén guin badxaag dulasa'n tijb luar con ganax ree bén rniabee loj ree xbejn Cristo persi benë'n laa reeman diidx por xtiidx Jesucrist ni culün bén ad najt ree bén Israel. Benan zian din ad rëntan guial ni ma benan o ni cayünan gacan dxiin xlia'. ³ Per ni'qui Tito bén guzu ni con naj, majsi najman bén grieg ad beent reeman laaman nagueijn chu'man sen ni ru ree bén Israel. ⁴ Din guyu tio'p choon ree bén Israel been reeman zi'c rulüü naj reeman dux compniaran persi gojc bachajg reeman dunujn par gula'ch reeman conin ad raguieentran guial ma raliduladxan Jesucrist din gac nabee reeman dunujn yaguieenan zi'c rniabee ley. ⁵ Per ni'czi tibda'n ad batiëjbtan nüjn reeman dunujn gan, din ad rayëntan cwëëladxidi xtiidxli Jesucrist ni ma zinalidi.

⁶ Abi' ree bén rniabee loj ree xbejn Jesucrist achetri na reeman lon guial rayal gūnan, majsi chutëëz naj reeman din delant loj Dios tiblojzi naj bejn.

⁷ Luar ninia reeman xhie mazri nūnan, laa gogbee gajc reeman guial Dios gulej naj din gatiechan xtiidxza'c Jesucrist loj ree bén ad najt bén Israel, zi'cgajc gulejman Bëd din gutiie'chaman diidxza'c guin ree loj ree bén Israel.

⁸ Abi' Dios bén bacaabee gajc Bëd din gacaman apóstol loj ree bén Israel, laagajcaman bacaabee naj din gacan apóstol loj ree bén ad najt bén Israel.

⁹ Zeel Jacob, Bëd con Waj bén rniabee ree mazri loj ree bén rliladx Jesucrist, gogbee gajc reeman guial Dios naj bén banee naj guialrniabee guin. Abi' banee yaa reeman zi'c tijb sen guial ma nayajcan compniar guial ma za' tëë reeman conform guial naj con Bernabé yuglüün bén ad najt ree bén Israel, guíad laa reeman gulüü reeman bén Israel ree. ¹⁰ Ni gunabzi reeman du lojn din yaguieenan yudar bënprob ree, abi' laan naj ni ruladxan gūnan.

Gudilë Pab Bëd

¹¹ Per chi we Bëd guiedx Antioquia, dxel gudilë'n laaman guial ad cayüntaman zi'c rayal. ¹² Guial yaloj gudawnëman bén ad najt ree bén Israel. Per chi bidxin ree bén guxhaal Jacob guiedx Antioquia, dxel ad bachajgtraman bén ad najt ree bén Israel guial bidxebaman xhie niëjb ree bén zinal ley. ¹³ Në los demazri ree bén Israel bén rliladx ree Jesucrist bén zojb ree ni në reeman been zi'c been Bëd abi' xt në Bernabé been zian. ¹⁴ Zeel chi baguian guial ad cayüjnt reeman zi'c rëb loj xtiidxza'c Jesucrist, dxel rën loj Bëd delant loj gra reeman: “Lüj najl bén Israel abi' ad nabantil zi'c laa reeman, ¿chexc zeel rüjnl nagueijn guiban ree bén ad najt ree bén Israel zi'c naban ree bén Israel?”

Guialrliladx Jesús rabëë bejn loj dol

¹⁵ 'Dunuj ree nayajc ree bén Israel diidx chi bayajl ree abi' ad yu't dxej babajn ree sin xley Dios zi'c ree bén ad najt bén Israel. ¹⁶ Per dunuj ree rayagbee guial achut zajc gac naya niz loj Dios por guial zinal bejn ley, gacaman naya guial rliladxaman Jesucrist. Zeel në dunuj ree ma raliduladx Jesucrist din yayajc ree naya delant lojman guial raliduladx reeman, ad guial cayguieent ree zi'c rniabee ley. Din achut zajc gac naya delant loj Dios guial zinalaman ley.

17 'Yan bal cayguieen ree naguiejn yayajc ree naya delant loj Dios, laan rul u dunuj ree guial nayajcqui ree b endol,  wen mazri b endol cay jn Cristo dunuj ree ya?  Dunuj ree rayagbee guial ad ziantan! 18 Din bal ma basa'nan xley Moisejs, abi' yaye'can con ley guin zatijb dxel naj gajc cay n naj b endol. 19 Zeel ma basa'nan ley guin din gabajan par Dios. 20 Abi' r nan cwent guial n  naj g jt chi g t Cristo loj cr jz dxel ad nabanri da xtijban, ma nabann n Cristo. Abi' yan zi'c nabanan, ma nabanan zi'c rliladxan Xi'n Dios, b n r n naj g jt t eman por naj. 21 Abi' ad r ntan tiblax guial r n Dios dunuj ree, din bal nile' niajc bejn naya niz loj Dios guial r jn bejn zi'c rniabee xley Moisejs dxel achetri lasajc guial g jt Cristo."

3

Guialrliladx Jesucrist rquied dol

1  B n Galacia, chexc zeel ad rad dguientidi!  Chu bascajy xquiarguejndi? Awa chi bal n l jt, delant loj gradi bagojnan l jt par xhie g jt Cristo loj cr jz.

2 Yan r nzan gagbeen:  Nabann di xSprijt Dios ya guial r jndi zi'c rniabee xley Moisejs o por guial rliladxidi xtiidx Jesucrist ni ma bacaagdiajguidi?

3 Xipxi nadidi zeel awa ma nabann di xSprijt Dios abi' yan naladxidi guial din yayaaloj gaquidi zi'c r n Dios rayal chinalidi ley. 4  Wen achet lasajc guialrzagdiaj ni gud didi ya, o guzagdiaj xlia'zidi ya? 5 Chi runee Dios xSprijtman lojdi abi' r jnmman milagr ree delant lojdi,  wen r jnmman zian ya por guial zinalidi xley Moisejs o por guial ma bililadxidi xtiidx Jesucrist ni ma bacaagdiajguidi?

6 Gol basaaladx guial Abraham por guial bililadxaman Dios, been Dios laaman cwent zi'c tijb b n ad way jnt dol. 7 Zeel gol gogbee guial gra ree b n rliladx Dios, laa reeman naj zi'c xi'n Abraham. 8 Diizd gocli mal ragbee Dios guial majsi loj ree b n ad najt b n Israel yu' ree b n g nman cwent zi'c b n ad way jnt dol guial rliladx reeman laaman. Din tiblax loj xtiidxaman r b guial r baman loj Abraham: "G nle'n gra ree b nguidxliuj por l j." 9 Zeel r jnle' Dios gra ree b n rliladx laaman zi'cgajc beenle'man Abraham guial bililadxaman laaman.

10 Gra ree b n zinal xley Moisejs yu' casti par laa reeman din loj gajc libr ley guin r b: "B n ad zinalt g n gra zi'cgajczi r b loj ley guin, yayalaman casti."

11 Zeel rayagbee ree ad zile't gac bejn naya loj Dios por guial r jnmman zi'c rniabee ley. Din loj xtiidx Dios r b: "B n rliladx Dios rajpaman guialnaban delant lojman guial ma n jnmman laaman cwent sin dol." 12 Per ley guin ad rniabtan chililadx bejn laan, loj libr ley guin r b: "B n g n zi'c gajczi rniabee ley, zajpaman guialnaban."

13 Jesucrist badxi'ca dunuj ree loj xmaldicion ley din laaman bayal casti ni rayal ree por ley guin, din loj libr ley guin r b: "Ma z  maldicion guijc b n r jt loj cr jz." 14 Zian guzajc Jesucrist par chile' g nle' Dios b n ad najt ree b n Israel, zi'c beenle'man Abraham. Abi' guial rliladx reeman Jesucrist zeel ma naban reeman con xSprijt Dios zi'c tal r b Dios diizd guia'xchej.

Xley Moisejs n  xpromejs Dios

15 Yan compniar raliduladx ree Jesucrist ganin l jt xhienaag r jn ree b nguidxliuj: Chi rajs tijb gui'ch abi' rgu' bejn laan firm, dxel achut zajc guse'n laan o gucaa guijc ree diidx ni ca loj gui'ch guin. 16 Ziangajc gol gogbee, chi been Dios promejs guial g nle'man Abraham con xdiaaman, ad r bt loj xtiidx Dios guial g nle'man "b n z ed ree" loj xdiaa Abraham. Ad r btan

zien bejn, r ban tijbzi bejn, din laaman r b g nle'n "B n z ed" loj xdiaaman. Abi' b n z ed loj xdiaaman laaman naj Cristo. ¹⁷ Abi' ni canin l jt naj guial xley Moisejs bi'tan tajpgayuu gajlbichii ijz despuejs ni been Dios promejs con Abraham, zeel ad zajct guse'n ley guin promejs ni ma been Dios. ¹⁸ Din bal par yaca' ree ni r b Dios loj Abraham rayal yaguieen ree zi'c rniabee ley, dxel ad promisejtran. Per Dios bazaladx loj Abraham ni r baman por promejs ni beenman lojman.

¹⁹ Wed zanabdiidxidi lon,  par xhieza r jn ley guin sirv? Bad e Dios ley guin din gagbee bejn guial najman b ndol, abi' been ley guin sirv xt dxej ni bi't b n z ed loj xdiaa Abraham zi'c tal been Dios promejs con laaman diisdz guia'xchej. B n naj ree xianjl Dios bad e ley guin loj Moisejs, abi' Moisejs bad ed laan loj ree bejn. ²⁰ Per chi been Dios promejs con Abraham achutctzi bad ed xtiidxaman, quijb laaman guneen  Abraham.

Xhie sirv r jn ley

²¹ Ad naladxidi canin guial ley guin za' contr xpromejs Dios. Canin bal por ley guin zajc gap bejn guialnaban delant loj Dios, dxel ma ragbee bejn guial ma nayaman loj Dios guial zinalaman ley. Per ad ziantan ²² din loj xtiidx Dios r b guial dol rniabee gra bejn din gra ree b n chililadx Jesucrist tia' reeman gra ni r b Dios.

²³ Chi gad guialrliladx Jesucrist guidoonloj, gunabee ley dunuj ree, zi'c chi nayaaw bejn bal ez ree guidoonloj guialrliladx Jesucrist. ²⁴ Zeel par dunuj ree ley guin naj ni balu  dunuj ree xhienaag yabajn ree abi' gunabeen dunuj ree xt dxej ni baguieenbee ree Jesucrist din g nman dunuj ree cwent zi'c tijb b n ni ad way jnt dol guial raliduladx ree laaman. ²⁵ Per yan guial ma raliduladx ree Jesucrist ad r jntri naguiejn gulu  ley guin dunuj ree.

²⁶ Din guial raliduladx ree Jesucrist ma nayajc ree xi'n Dios. ²⁷ Abi' guial barobnijs ree por Jesucrist zeel ma nayajc ree tijbzi con laaman din ma nabajnn  reeman. ²⁸ Abi' zi'c b n Israel zi'c b n ad najt b n Israel, zi'c b n naj zi'c b n nado' zi'c b n ad najt zi'c b n nado', zi'c xinguaaw zi'c b ngunaa, par Cristo tiblojzi nayajc ree din ma nayajc ree tijbzi con laaman. ²⁹ Zeel bal ma nayajc ree xbejn Cristo dxel ma nayajc ree zi'cgajc xi'n Abraham abi' yayal ree ni r b Dios loj Abraham diisd gulal.

4

¹ Ni canin naj: Zi'c tijb xindo rayal ni rajp xdadix, la'tgaj najx xindoo achet guialrniabee rajpax, zi'cgajc tijb mojs, majsi xieenx naj gra ni rajp xdadix. ² Abi' yu' ree b n rajp laax yu' t e ree b n rniabee laax n  ree ni rajpax, xt chi guidxin dxej ni r b xdadix tia'x ni rayalix. ³ Ziangajc dunuj ree, zi'c tijb xindoo bayajc ree yaloj guial bunaaldx'i'ch ree gra ree xcostumbr ree b nguidxliuj. ⁴ Abi' chi bidxin dxej gojc zi'c r b Dios gac, guxhaal xi'nman Jesucrist loj guidxliuj guie, tijb b nguidxliuj gojc xniaaman. Abi' gubajman zi'c rniabee ley ni basa'n Moisejs duloj ree ⁵ persi bile' bab eman dunuj ree loj ley guin bile' t e nayajc ree Xi'n Dios.

⁶ Abi' guial nayajc ree xi'n Dios, guxhaalaman xSprijt Jesucrist persi nabajnn  reeman, abi' por Sprijt guin raguie'ch ree: "iDux Dad ree Dios!"

⁷ Zeel ad nayajctri ree zi'c mojs, ma nayajc ree xi'n Dios, ma rayal ree ni gunee Dios por Cristo.

Yu' Pab xgab por ree b n rliladx Jesucrist

⁸ Yaloj chi gadidi g unbee quijb Dios, beendi sirv loj ree ni naladxidi naj Dios, per diidxli ad Diost reen. ⁹ Per yan guial ma n nbeedi Dios o guial ma

nünbeeman lëjt, ¿chexc zeel rëndi yabi'di güüнди graløj ni ad rüjnt sirv ni beendi yaløj? ¿Chexc zeel rëndi gaquidi zi'c bén nado' loj ree ni guin ree zatijb? ¹⁰ Abi' yan guial sta zinëdi cwent xhie dxej o xhie bëëw o xhie tiamp o xhie ijz naj ni zojbloj par lëjt par güüнди xhienin zi'c goc xcostumbridi. ¹¹ Dád rdxeban por lëjt, doolgui basid xlia'zan lëjt.

¹² Zeel rniaaban lojdi compniar raliduladx ree Jesucrist, gol gubajn zi'c nabanen, zi'c benan persi gogbeedi guial tiblojzi nayajc ree. Ad canitan lojdi guial xhie ni mal ma beendi naj ¹³ din lëjt ragbee guial yaløj chi basidan lëjt xtiidxza'c Jesucrist, ragxuun nadxel. ¹⁴ Per majsı zian, gudaandi naj. Ad beentidi naj tıblad ad gulëeladx tëetidi naj, bidxga'di naj zi'c tijb xianjl Dios o zi'cgajc Jesucrist. ¹⁵ Naj ragbee guial bal zile'n xt guiaaløjdi zajc cwëedi par guneedan lon. Laadx yan, ¿conzan guial rabaanëdi naj? ¹⁶ ¿o al rdxe'chidi naj ya guial rnin ni naj diidxli lojdi?

¹⁷ Rnin lojdi guial ree bén cayüjn naguiejn guial guidxga'di xtiidx reeman, ad zagdxet rën reeman lëjt, xixgab reeman naj din gusa'ndi ni basidan lëjt abi' mazri guidxga'di xtiidx reeman. ¹⁸ Ad ni malt naj guial guiën bejn lasa' bejnman, per par ni zagdxe në zianczi, ad chi za'tzan con lëjt. ¹⁹ Par naj lëjt naj zi'c da xi'nan. Abi' cazaagdiajn por lëjt zatijb, zi'c rzagdiaj tijb béngunaa chi rajl xi'nman. Abi' gusunuu gazaagdiajn xt chi ma zinalidi Jesucrist diidxli zi'c rayal. ²⁰ ¡Bal zianclaa za'n con lëjt din ganenë'n quijb lëjt, per yan ad ragbeetan xhienaag günnë'n lëjt!

Agar con Sara

²¹ Per gol guna, lëjt bén rën ree guiban zi'c rniabee ley. ¿Wen id wayignia'di ni rëb loj ley ya? ²² Loj ley rëb guial guyu tio'p xi'n Abraham: Guyu xi'nman con tijb béngunaa brii laj Agar bén goc xmojsaman, guyu tëe stijb xi'nman con quijb xbéngunaaan bén brii laj Sara. ²³ Xi'n Abraham con béngunaa goc xmojsaman, guyux guial bagaal Abraham laaman. Per xi'nman xin guyu con quijb xbéngunaaan guyux ad por guial bgaaltzi Abraham xbéngunaaan, në par gac cumplid promisejs ni been Dios lojman. ²⁴ Yan, Sara në Agar laa reeman naj ejempl por tio'p nejz ni yu' par chinal bejn. Tijb nejz guin naj guial chinal bejn ley ni badëed Dios loj Moisejs ruguia' Sinaí, abi' bén zinal ree ley guin naj reeman zi'c bén nado' loj ley guin zi'c goc Agar loj Abraham. ²⁵ Lëjt ragbee guial niz Arabia naj guia' Sinaí, abi' ree bén niz ni rniee reeman guia' guin Agar. Per yan Jerusalén naj zi'c guia' guin, din gra ree bén zëed niz Jerusalén, bén zinal ree ley, laa reeman naj zi'c bén nado' loj ley. ²⁶ Per dunuj ree du ladx ree naj Jerusalén ni yu' xanyabaa abi' Jerusalén guin ad najtan zi'c ni nado' loj ley guin zi'c ad gojct Sara loj Abraham. ²⁷ Loj xtiidx Dios rëb: Babaa béngunaa ni ad zajct chu' xi'n.

Babaa da't guial ad nünbeetil gualrzagdiaj

ni rdëd béngunaa ni rajl xi'n.

Din bén ad rut xi'n, mazri zien xi'nman chu'

guial loj bén ru xi'n.

²⁸ Rnin lojdi compniar raliduladx ree Jesucrist, zi'c gol Isaac guial bililadx Abraham xtiidx Dios guial gac zian, ziangajc dunuj ree ma nayajc ree xi'n Dios guial raliduladx ree xtiidxaman. ²⁹ Abi' lën ree dxejzii, xi'n Agar baze'x xi'n quijb xbéngunaa Abraham, ziangajc yan bén zinal ree ley ruze' reeman dunuj ree nabajnnë' ree xSprijt Dios, guial ma nayajc ree xi'n Dios, ³⁰ Per, ¿xhie rëb loj xtiidx Dios? Rëban: “Balaagdxa xmojsil con guidib xi'nman, din ad rayalt gac tio'p lala' ni rayal tia' xi'n quijb xbéngunaa.” ³¹ Zeel compniar

raliduladx ree Jesucrist, dunuj ree ad nayajct ree zi'c xi'n b n naj zi'c b n nado' guin, nayajc ree zi'c xi'n quijb xbingunaa Abraham guial ad rniabeet ley dunuj ree.

5

Gol guzujdx'i'ch loj ni rliadixidi xtiidx Dios

¹ Cristo naj b n bab e dunuj ree loj ni rniabee ley dunuj ree. Zeel gol guzujdx'i'ch, ad bal guibandi zatijb zi'c b n nado' guial g undi zi'c rniabee ley.

² Naj Pab rnin l jt. Bal rudi sen zi'c rniabee ley, achet lasajc guial rliadixidi Jesucrist. ³ Abi' rnin l jt zatijb: Chut ez b n ru sen guin rayal g unman zi'c tal rniabee ley. ⁴ L jt guial r jndi xgab guial g undi zi'c rniabee ley ma najdi naya delant loj Dios, laan r n gui b guial ad najtridi xbejn Cristo ad yu'guij t etridi guial r n Dios l jt. ⁵ Per dunuj ree por xSprijt Dios n  guial raliduladx ree Jesucrist nadxu'guijc ree guial yadxin ree naya delant loj Dios. ⁶ Din chi ma naj bejn tijbzi con Cristo achet lasajc bal yu'man sen o ad yu'taman sen. Ni mazri lasajc naj guial chililadxaman Cristo. Abi' por guialrliladx guin zajc yabajn ree zagdxe yay n dulasa' ree. ⁷ L jt ma z di zagdxe.  Chu na lojdi guial ad zidxga'tidi ni naj diidxli? ⁸ Din xgab guin ad z edtan por Dios, b n gule l jt. ⁹ Zeel gol gojp cudad "din con ta'nnijt zajc gusquiee reeman gradi." ¹⁰ Per naj ra'pan Cristo confians guial ad zusa'ntidi ni basidan l jt. Abi' Dios gud ed casti b n cusquiee ree l jt, majsi chut eznin. ¹¹ Bal r n guial r jn naguiejn chu' ree bejn sen, ad zazunaltri ree b n Israel naj. Ziangajc bal gui n guial rayal chu' ree bejn sen, r n gui ban guial achet lasajc guial g jt Cristo loj cr jz. ¹² Balzianclaa gra ree b n ruslen l jt guial rayal chu'di sen,  mejorli gut ug laagajc reeman tiblayaa!

¹³ Din l jt ma gulaadi loj ley, per ad guial ad rniabeetri ley l jt din g undi ni r ntzidi, rayal gui endi g un t e yudar lasa'di. ¹⁴ Din con tijbzi mandamient ma been bejn gra zi'c rniabee xley Dios. Mandamient guin r b: "Guy n ben ren zi'c r n l j gajc." ¹⁵ Per bal rdxe'ch lasa'di abi' rdilidi, gol gojp cudad chit e zianzi la' lasa'di.

Guialnaban ni runee xSprijt Dios

¹⁶ Zeel rnin lojdi: Gol gubajn zi'c rniabee xSprijt Dios guibandi. Ad guiban-ridi zi'ctzi naj xixgabidi. ¹⁷ Din guial rbajn bejn zi'ctzi naj xixgabaman, ad najtan zi'c rniabee xSprijt Dios guiban bejn. Abi' zi'c rniabee xSprijt Dios guiban bejn, ad najtan guial guiban bejn zi'ctzi naj xixgabaman. Ni'qui laan ni'qui zi'c rniabee xSprijt Dios ad najtan tibloj. Zeel ad zajct guiban bejn zi'ctzi r nman. ¹⁸ Per bal xSprijt Dios naj b n rniabee l jt dxel ad rniabeetri ley l jt. ¹⁹ Yan laa rguien gajc con ree nin z ed con xixgabzi ree bejn: Guialrzun  xinguaaaw ren o b ngunaa ren, guialr jn bejn nidxuudx, guialrajp bejn gadxagayaa vijs, ²⁰ guial r n bejn graloj ni naladxaman naj Dios, guial r jn bejn guialbidxaa, guialrdxe'ch lasa', guialrdil, guialrz ebladx ni rajp bejn, guialralenya', guialrries xvalor gajc, guialrria' lasa' bejn, guial ru loj tibcwaa bejn o stib cwaaman, ²¹ guialrd dloj, guialrug jt bejn, guialrz dx, guialnala n  xhiet ez ni mal lasa' ree ni guin. Rugojan l jt zi'cgajc ma rnin lojdi yaloj, b n cay jn ree lasa' ree ni guin ad zayalt reeman lod rniabee Dios.

²² Per ni z ed por xSprijt Dios naj, guialr n lasa' bejn, guialrabaa, guialrga'dxe luxdoo, guial yu' pacens, guialnaxanladx, guial rajc naza'c, guial r jn cumplid xtiidx, ²³ guial r jn naya, guialrniabee bejn xixgab mal gajcaman.

Abi' ad yu't ley ni rudxoon guial g un bejn ni guin ree. ²⁴ Abi' ree b en ma naj xbejn Cristo ma basa'n reeman gra dol, n  gra ree ni mal ni r n reeman g un reeman din ma g jt Cristo por gra dol. ²⁵ Yan bal ma nabajn ree con xSprijt Dios rayal yabajn ree zi'c rniabee Sprijt guin yabajn ree.

²⁶ Ad yales dux valor gajc ree, ad yache'ch du lasa' ree, ad yad dloj du lasa' ree.

6

Yaguieen du lasa' ree yudar

¹ Compniar raliduladx ree Jesucrist, rnin l jt, bal chu xcompniaridi r jn dol gan, l jt guial ma rajquidi mazri xtiidx Dios gol gunee man con ganax ree diidxza'c, din rayal cu'guijquidi guial n gajc l jt zajc g un dol l jt gan.

² Gol gogn  lasa'di loj xhiet ez gualzi ni rd didi, zian ma cay jndi ni rniabee Cristo g undi.

³ Bal yu' b en ni naladx guial rajcaman gra abi' achetczi rajcaman, dxel laa-gajcaman cusquiee laaman. ⁴ Tijbgaj bejn rayal g un xgab bal nabancaman xnejz. Abi' bal nabanman xnejz, tijbzi laaman rayal yabaa luar g unman xgab guial nabanman zagdx loj gra ree bejn. ⁵ Din tijbgaj dunuj ree rayal yaya'p ree xhienaag yabajn ree.

⁶ Chut ez b en cusiid xtiidx Dios, rayal g unman yudar b en cul u laaman con ni ryaadxaman.

⁷ Ad gusquiee l jt gajc, din achut zajc guze' Dios. Ni rx bin bejn laagajcan yato'paman. ⁸ Bal nabanman zi'ctzi naj xixgabaman zadxin dxej yayalaman casti. Per b en naban zi'c rniabee xSprijt Dios, por Sprijt guin yayalaman guialnaban tiblayaa delant loj Dios. ⁹ Ad rayalt yadxag ree guial yaguieen ree ni zagdx, din bal id zadxag ree chi guidxin dxej yaca' ree ni yayal ree.

¹⁰ Zeel beegaj gunen dunuj ree rayal yaguieen ree yudar bejn ree, abi' mazri con dux compniar ree b en rliladx ree Jesucrist.

Xconsejw Pab

¹¹ Gol baguiaa xi narooB ree lejtr ni cucan par l jt con quijb yan. ¹² B n cay jn ree naguiejn chu'di sen, r jn reeman zian par yaya'n reeman zagdx loj ree bejn luar sagdiaj reeman guial rliladx reeman Jesucrist. ¹³ Per ni'qui ree b en yu' sen guin ad r jnt reeman gra zi'c r b ley guin. R nzi reeman chu'di sen guin din g un reeman nab  guial ma been reeman gan yu'di sen guin. ¹⁴ Per naj achet por ni g nan nab , tijbzi por gualg jt Dad Jesucrist. Abi' guial g jtaman loj cr jz ma basa'nan gra ree ni mal yu' loj guidxliuj guie abi' ma g jtan par ree ni mal guin. ¹⁵ Din chi ma naj bejn tijbzi con Cristo, achet lasajc bal yu' bejn sen o ad yu'taman sen. Ni mazri lasajc naj guial ma bachaa zi'c nabanman. ¹⁶ Abi' ree b en ma zinal xnejz Cristo, Dios yaya laa reeman yabe'cdxe t  man luxdoo reeman n  gra ree b en diidxli naj xbejn Dios.

¹⁷ Diizd yan ad r ntran chu guche'ch naj. Din dib ni ca ree ladan laa reen rul u guial najn xiap stol Jesucrist.

¹⁸ Compniar raliduladx ree Jesucrist, dux Dad ree Jesucrist g unle' gradi. Am n.

Gui'ch guxhaal San Pabl loj ree bèn Éfeso rliladx Jesucrist

Rugajpdioz San Pabl bèn Éfeso ree

¹ Naj Pab, najn tijb xi apóstol Jesucrist por xgualrniabee Dios. Cucan gui'ch guie par lëjt guial diidxli zinalidi xtiidx Jesucrist, lëjt guial ma najdi xbejn Dios luguiedx Éfeso. ² Dux Dad ree Dios në Dad Jesucrist gūinle' lëjt yabe'cdxe tēē reeman luxdoodi.

Rūjnle' Dios bèn rliladx ree Jesucrist

³ Quixtēē Dios, xdad Dad Jesucrist, dád benza'c najman, guial yan ma nayajc ree tijbzi con Jesucrist, ma beenle'man dunuj ree diidz xanyabaa con graloy guialnaza'c din gac yunaal ree xtiidxaman. ⁴ Laaman bacaabee dunuj ree por Dad Jesucrist diidz chi gad guidxliuj gacchaaw din yabajn ree naya sin dol lojman. ⁵ Abi' guial rēnman dunuj ree, diidz guia'xchej beenman guial yayajc ree xi'nman por Jesucrist zi'c beenman xgab gac. ⁶ Zeel ad racwēēzt raza't ree Dios zagdxe guial dád benza'c najman, ma beenle'man dunuj ree por Xi'nman Jesucrist, bèn rēnman, ⁷ bèn ma gudijx por dunuj ree chi guxhie' xrejnman, abi' ma gojc perdon dux tol ree guial dád rēn Dios dunuj ree. ⁸ Zeel dád zro' gualrajc në gualrignia' ma bazaladxaman duloy ree, ⁹ abi' ma balūūman duloy ree xhienaag naj xixgabaman diidz gocli, zi'cgajczi ma beenman xgab gac. ¹⁰ Guia'ad xgab guin gacan cumplid chi guidxin dxej, Dios gusa'n gra loj Jesucrist zi'c ni yu' xanyabaa në loj guidxliuj.

¹¹ Nētēē guial nayajc ree tijbzi con Jesucrist, Dios ma bacaabee dunuj ree din yayajc ree par laaman zi'c naj xixgabaman diidz guia'xchej, din laaman rūjn gra zi'c rēnman gac. ¹² Abi' laaman ma been zian, din dunuj ree nayajc ree bèn yaloy bililadx Jesucrist, yayajc ree bèn guza't laaman zagdxe por xgualrniabeeman. ¹³ Nēgajc lëjt chi biguejndi diidxli xhienaag par gaquidi perdon dxel bililadxidi Cristo gojquidi tijbzi con laaman. Abi' zi'c rēb Dios guial guneeman xSprijtaman, dxel yan guial ma nabannēdi laaman, laaman naj zi'c tijb sen ni rulūū guial ma najdi par Dios. ¹⁴ Guial ma nabannē xSprijt Dios dunuj ree, yaca' ree ni rēb Dios guneeman chi ma bara xbejnman za' xanyabaa, din chitēē yacwēēz yaza't reeman zagdxe por xgualrniabeeman.

Rniab Pab quiarguejn loj Dios

¹⁵ Abi' guial ragbeen rliladxidi Dad Jesús rēn tēēdi los demazri ree bèn naj xbejn Dios, ¹⁶ zeel ad rucwēēzt rudēn quixtēē loj Dios por lëjt, beegaj rbedx rniabab laaman. ¹⁷ Laaman naj Dios rniabee diidz xanyabaa, xDad Dad Jesucrist. Rniabab lojman yazaladxaman quiarguejn lojdi din chignia'di ni gulūūman lojdi gusunu tēē gūūnbeedi laaman mazri. ¹⁸ Rniabab lojman din guixhialaman xquiarguejndi din chignia'di xhie rēn guieb ni rbēzidi diidz chi bacaabeeman lëjt, chignia' tēēdi guial ni za'cdxoon narooob tēē naj ni nagu'chaaw Dios par ree bèn naj xbejnman. ¹⁹ Rniab tēēn lojman guial gagbeedi guial dád narooob naj xgualrniabeeman ni cayagnē dunuj ree raliduladx reeman. Laagajc gualrniabee narooob guin balūū Dios ²⁰ chi basbanman Jesucrist abi' gule'caman laaman xladbeeman xanyabaa ²¹ lod badēēman gualrniabee lojman ni mazri lasajc guial loj gra ree gualrniabee, në loj gra gualguxtis në loj gra gobiarn. Abi' mazri lasajc gualrniabee guin

guial loj gra ree gualrniabee yu', n  ni qui chu'ri ree loj guidxliuj guie.
²² Dxel basa'n Dios gran loj Jesucrist, bacaabeeman laaman din nabeeman
 gra ree b en rliladx laaman. ²³ Gui ad ree b en rliladx laaman, guidiblagaa
 nabann man laa reeman abi' bant ez guin za'man din laaman guidiblagaa
 rniabee.

2

Nayajc ree perdon guial r n Dios dunuj ree

¹ Gocli gojquidi zi'c beng t loj Dios por ree ni mal n  por ree dol ² ni
 beendi guial binalidi nejz mal been t edi zi'ctzi r n xindxab g undi, sprijtmal
 ni nabann  gajc ree b en ad ruzoobt xtiidx Dios. ³ Du gra ree ziangajc
 babajn ree guia'xchej. Baguieen ree zi'ctzi bay n ree, zi'ctzi goc dux xgab
 ree, abi' zi'cgajc rayal ree b en ad ruzoobt xtiidx Dios casti, ziangajc nayal
 ree casti. ⁴ Per guial raya da't Dios dunuj ree r n t eman dunuj ree, ⁵ zeel
 majsi bayajc ree zi'c beng t lojman por dux tol ree, per yan ma raya'p ree
 guialnaban lojman con Jesucrist. Guial tant benza'c naj Dios, zeel nayajc
 ree perdon. ⁶ Chi basbanman Jesucrist n gajc dunuj ree basbanman abi'
 zi'c rulu  ma nadxu'n ' ree Jesucrist xanyabaa. ⁷ Dios been zian din dxej
 z ed ree guiguien guial d d r nman dunuj ree, abi' benza'c t   najman con
 dunuj ree por Jesucrist. ⁸ Guial naj Dios benza'c, zeel ma nayajc ree perdon,
 ad guial nayajct ree benza'c lojman. Por guial rliladx z ed xperdon Dios.
⁹ Ni'quid por ni zagdxe ni ma baguieent ree z ed perdon guin chit   chu
 guilies xvalor gajc. ¹⁰ Por Dios nadxu' ree loj guidxliuj guie abi' por Jesucrist
 bachaaman mod babajn ree yaloj din yaguieen ree ni zagdxe zi'c beenman
 xgab yaguieen ree diizd gocli.

Tijbzi nayajc ree por Jesucrist

¹¹ Zeel l jt b n ad najt ree b n Israel, gol basaaladx xhienaag guzajquidi
 yaloj. B n Israel ree gul elaj l jt b n ad yu't ree sen guial yu' reeman sen
 zi'c rniabee ley. ¹² Tiamp zii ad beenbeetidi Jesucrist, ad gojctidi cwent
 loj ree b n Israel ad gojc t etidi cwent guial rayalidi ni r b Dios gud eman
 loj ree xbejnman. Contzi gubajndi achet gul jzidi ad gubajnn  t etidi Dios.
¹³ Per yan guial ma rliladxidi Jesucrist, l jt guial guzujdi zijt loj Dios, por
 xrejn Jesucrist ma bibiguidi lojman. ¹⁴ Din Jesucrist babe'cdxe du luxdoo
 ree. Laaman bis d gualrdxe'ch ni rudxoon gac ree b n Israel tijbzi con ree
 b n ad najt b n Israel. ¹⁵ Abi' por xgualg jt Jesucrist gulox gra ree costumbr
 rniabee xley ree b n Israel g  n ree bejn, laaman been persi gojc ree b n
 Israel con ree b n ad najt b n Israel zi'c tijbzi guiedx c b guial ma nayajc ree
 tijbzi con laaman. Zian babe'cdxeman luxdoo ree bejn. ¹⁶ Din por xgualg jt
 Jesucrist loj cr jz ma gulox gualrdxe'ch lasa' ree b n Israel con ree b n ad
 najt b n Israel, abi' ma nadxu'n ' ree Dios zagdxe guial ma nayajc ree tijbzi
 por Jesucrist. ¹⁷ Abi' laaman bidgagojn dugra ree, zi'c ree b n Israel zi'c
 ree b n ad najt b n Israel xhienaag yadxu'n ' ree Dios zagdxe. ¹⁸ Dxel por
 Jesucrist grop cwaa ree bejn ma rajp nejz par loj Dios guial tijbzi naj xSprijt
 Dios nabajnn ' ree. ¹⁹ Zeel ad najtridi zi'c b n z ed lod ren, zi'c benzit loj Dios,
 ma najdi cwent loj ree xbejnman, ma najdi tijbzi con ree xbejnman. ²⁰ L jt
 naj zi'c xze' tijb yu ni cayajc, gui ad ree xi ap stoles Jes s con ree b n bad  
 xtiidx Dios loj ree bejn, naj reeman zi'c xcimiant yu guin, gui ad Jesucrist
 naj zi'c guiaj zojbloy ni cayajcn  yu guin. ²¹ Abi' guial yagaj guzuloj cayajs
 yu guin, dxel cay 'pzi cay 'p ze' guin ni cayguie'ch ree najdi din yayajc ree

tijbzi xyadoo Dios con Jesucrist. ²² Nè yan guial ma najdi tijbzi con Jesucrist ma naj tèedi tijbzi con los demazri compniar raliduladx reeman dín yayajc ree tijbzi yadoo lod za' Dios por xSprijtaman.

3

Cwabee Pab din chigneeman xtiidxa'c Jesucrist

¹ Por zianan yu'n ladxguuib, naj Pab guial cayünan sirv loj Jesucrist din gūnan yudar lèjt bèn ad najt ree bèn Israel. ² Lèjt ragbee guial naj Dios benza'c zeel baneeman dxiin guin lon din gūnan lèjt yudar chignia'di xtiidxaman. ³ Abi' laaman balüü naj xhienaag naj xixgabaman diizd gulal, zi'cgajczi ma rnin lojdi diizd guia'xchej. ⁴ Chi goolidi laan, gagbeedi guial ma ragbeen xhienaag naj xixgab Dios par Jesucrist. ⁵ Tiamp gulal achut gojc niagbee xhienaag naj xixgabaman par Jesucrist, gojcan zi'c tijb ni naguie'ch par ree bejn. Per yan por xSprijtaman ma balüüman laan loj ree xi apóstoles Jesús nè loj ree bèn badëë xtiidx Dios loj ree bejn. ⁶ Abi' ni goc zi'c tijb ni naguie'ch par ree bejn naj guial por xtiidxa'c Jesucrist, nè ree bèn ad najt bèn Israel ma rayal ni gudëë Dios loj ree bèn Israel guial ma naj reeman tijbzi, dxel ziangajc ma nayab reeman loj promise ni been Dios por Jesucrist.

⁷ Naj cugojn xtiidxa'c Jesucrist loj ree bejn, ad guial rayalt gūnan dxiin guin. Guial naj Dios benza'c, zeel bazaladxaman gualrniabee lon par gūnan laaman sirv. ⁸ Naj naj bèn bigra bèn lasajc ta'nz loj gra ree xbejn Dios, per guial naj Dios benza'c, bacaabeeman naj dín gūn diidx loj ree bèn ad najt bèn Israel xcwent xgualnaza'c narooob Jesucrist, ⁹ nè par gugojnzan zagdxe gra reeman xhienaag naj xixgab Dios bèn been gra, xgab ni ad balüü gajtaman loj ree bejn. ¹⁰ Din yan zi'c naj ree bèn rliiladx Jesucrist, gagbee gra ree bèn rajp gualrniabee xanyabaa guial gra lojczy gualrajc rajp Dios. ¹¹ Abi' diizd chí gad guidxliuj gacchaaw mal been Dios xgab guial gac zian. Yan ma gojcan cumplid por Dad Jesucrist. ¹² Nè guial raliduladx ree Jesucrist ma raya'p ree nejz par loj Dios, abi' con confians ma zajc yubiig ree lojman. ¹³ Zeel rnin lojdi ad runayadi por ree guialzi ni cadëëdan por lèjt, din zagdxen par lèjt.

Dád rën Jesucrist dunuj ree

¹⁴ Zeel ruzuxiban loj dux Dad ree Dios; ¹⁵ laaman naj Dad loj gra ni yu' loj guidxliuj nè xanyabaa. ¹⁶ Abi' rniaaban lojman por xgualrniabee narooobaman yazaladxaman lèjt gojl nè gualrniabee por xSprijtaman dín yayu luxdoodi, ¹⁷ guibannë tèedi Jesucrist guial rliiladxidi laaman. Din zian zi'c diidxli zinalidi zi'c rën Jesucrist dunuj ree, ¹⁸ dxel ma zajc gagbeedi con los demazri ree compniar raliduladx ree laaman guial gudëdlaj abi' xt banczi naaloj zro' rënman dunuj ree. ¹⁹ Zeel rniaaban loj Dios gagbeedi plact rënman dunuj ree, guial mazri zro' najn guial loj ni raguieen ree xgab, abi' zian guidiblagaa guibannëdi Dios.

²⁰ Laaman, guial rajpaman gualrniabee par gūnman mazri guial loj ni raguieen ree xgab o mazri guial loj ni ranaab ree lojman por xSprijtaman bèn nabajnnë' ree, ²¹ abi' rayal yaza't reeman zagdxe gra dxej nè gra tiamp por Jesucrist, dunuj ree guial raliduladx ree Jesucrist. Amén.

4

Nayajc ree tijbzi por xSprijt Dios

¹ Naj, yu'n ladxguuib guial cayünan sirv Jesucrist, rniaaban lojdi zi'c ma najdi xbejn Dios, gol gubajn zi'c rayal guiban ree bèn ma naj ree xbejnman.

² Gol gojc benza'c nē bēn naxanladx, gol gojp pacens gol gudaan tēē lasa'di guial rēn lasa'di. ³ Gol been naguiejn gusnuu gaquidi tijbzi con xyudar xSprijt Dios bēn rabe'cdxe du luxdoo ree par yayajc ree tijbzi. ⁴ Dunuj ree nayajc zi'c tijbzi cuerp, abi' dugra ree nabajnnē' xSprijt Dios, abi' zi'c ma nayajc ree xbejn Dios, ziangajc ralēz ree ni guneeman. ⁵ Tijbzi Dad, tijbzi guialrliladx nē tijbzi guialrirobnijs raya'p ree. ⁶ Din tijbzi Dios yu', bēn naj Dad par dugra ree, rniabeeman dugra ree, nabannēman dugra ree rijn tēēman ujs dugra ree.

⁷ Per tijb gaj dunuj ree ma naj ni yaguieen ree, zi'ctzi ni banee Jesucrist yaguieen ree. ⁸ Zianan zeel rēb loj xtiidx Dios:

Chi bayē'paman xanyabaa,
beenman gan loj gra guialrniabee,
abi' badēēdaman loj ree bejn ni rayal gūūn reeman.

⁹ Abi', ¿xhie rēn guiēb lod rēb “bayē'paman”? Rēn guiēban bi'taman loj guidxliuj. ¹⁰ Guiāad Jesucrist bēn bi't loj guidxliuj, laagajcaman naj bēn bayē'p xanyabaa persi canabeeman guidib guidxliuj nē xanyabaa. ¹¹ Abi' ma badēēman loj ree bejn ni rayal gūūn reeman, yu' reeman bayal gac apóstoles, yu'za reeman bayal gac bēn rudēē xtiidx Dios loj ree bejn, yu' reeman bayal gantie'ch xtiidxaman, yu' tēē reeman bayal gudēē consejw guluū tēē reeman bēn rliladx ree laaman. ¹² Zian bacaabee Jesucrist bejn ree din gusiid los demazri ree bēn rliladx laaman, gac tēē gūūn reeman laaman sirv, gusnuu tēē gūūnbee reeman laaman, ¹³ xt yayaaloy yaliduladx ree yaguieenbee tēē ree Xi'n Dios guidiblagaa, din yayaaloy yayignia' ree xhienaag rayal yunaal ree Jesucrist. ¹⁴ Dxel ad zayajctri ree zi'c ree xindoo rliladx xhietēēznin, ad zayajctri ree zi'c tijb ni rnē bi niz ni niz guie por graloj ni rū ree bēn raguuil mod gusquiee ree bejn, ¹⁵ rayal yayēn du lasa' ree, yadū ree diidx yunaal tēē ree ni diidxli din gusnuu yayignia' ree yaguieen tēē ree zi'c rēn Jesucrist bēn rniabee dunuj ree. ¹⁶ Din por Jesucrist nayajc ree tibloj gra ree compniar raliduladx ree laaman. Por laaman nadxajg dulasa' ree nayajc ree tijbzi, abi' tijb gaj dunuj ree con ni rayal yaguieen ree par yaguieen du lasa' ree yudar din gusnuu yayēn dulasa' ree por Jesucrist.

Guialnaban cūb con Jesucrist

¹⁷ Yan por Jesucrist rnin lējt: Ad bal guibanridi zi'c naban ree ben ad nūnbeet Dios, din laa reeman naban zi'ctzi naj xixgab reeman, ¹⁸ nacay xquiarguiejn reeman, ad rajpt reeman guialnaban rēn Dios gap reeman, guial ad rignia't reeman ache tēēt naladx reeman. ¹⁹ Ma been luxdoo reeman gojl, ma gulēēladx laagajc reeman abi' cusnuu cayūjn reeman graloj nidxuudx. ²⁰ Per lējt ad beenbeetidi Jesucrist din guibandi zian, ²¹ bal walidi ma biguiejndi xcwentaman bal wali tēēdi ma basiididi diidxli zēēd por laaman. ²² Gol basa'n zi'c gubandi yaloj, din ruxhiinzi zi'c gubandi yaloj con xgabmal ni basquiee lējt guial beendi zi'ctzi gūyēndi. ²³ Gol been naguiejn guidxaa xixgabidi guidiblagaa ²⁴ din gaquidi zi'c tijb bencūb been Dios zi'c rēnman, con tijb guialnaban naya nē zi'c rayal por xdiidxliman ni ma biguiejndi. ²⁵ Zeel ad bal rnieeridi diidx rusquiee. Gol guneē diidxli con xcompniaridi din tijbzi nayajc dugra ree con Jesucrist. ²⁶ Bal rdxe'chidi, ad gūūndi dol. Ad gudxe' guialrdxe'ch guin luxdoodi dēchej, ²⁷ chitēē tiēbidi gūūn xindxab lējt gan. ²⁸ Bēn rban, rayal gucwēēz cwanman abi' gūūnman dxiin, din con dxiin zagdxe gūūnman dxel ma rajpaman con xhie gūūnman yudar bēn ryaadx ree xhienin. ²⁹ Ad rniee tēēdi diidxgūijdx, gol guneē ganax

diidxzagdxe ni güün yudar chignia' ree ben ren bèn gucaagdiajg ree laan din güünan laa reeman sirv. ³⁰ Ad rgu'nayadi xSprijt Dios, bèn ma nabannèdi zi'c tijb sen guial ma najdi xbejnman par dxej ni guidxindi lojman. ³¹ Gol basa'n tiblax gra guialralenya', guialrdxe'ch, guialralen lasa', guialrguidxa'nè lasa', guialrniee diidxguijdx loj lasa' nè graloj ni mal. ³² Gol gojc benza'c, gol baya lasa'di gol been tèe lasa'di perdon zi'c been Dios lèjt perdon por Jesucrist.

5

Zi'c rayal guiban ree Xi'n Dios

¹ Zi'c ma najdi xi'n Dios bèn rënman, gol been naguiejn güündi zi'c laaman. ² Gol gubajn zagdxe, gol guyèn lasa'di zi'c guyèn Jesucrist dunuj ree abi' bayü laagajcaman güjtaman por dunuj ree, gojcaman zi'c tijb gon ni rliaa nejxh par Dios.

³ Yan lèjt guial ma najdi xbejn Dios, ad rayalt guinee loj lasa'di diidx dxuudx, ni'qui graloj ree ni ad rüjnt sirv ad rzèëbladx tèedi gra par lèjt. ⁴ Ad rnieedi diidxguijdx ree, diidxont ree, diidx ni ad rayalt guinee diin ad ni zagdxet reen. Mazri zagdxe gol badëë quixtëe loj Dios. ⁵ Din lèjt ma ragbee guial ree bèn naban nadxuudx nè ree bèn rüjn ni ad rüjnt sirv, nè ree bèn rzèëbladx gap gra (mazri yu'guij reeman ni guin ree luar guièn reeman Dios), dxel ad zile't chu' reeman lod rniabee Jesucrist con Dios. ⁶ Gol gojp cudad achu gusquiee lèjt con ree diidx ad rüjnt wen, din por ree ni guin zèéd xcasti Dios par ree bèn ad ruzoobt diidx. ⁷ Zeel ad güündi zi'c rüjn reeman.

⁸ Gocli gubajndi zi'c tijb bèn nayaaw xquiarguejn, per yan guial ma najdi tijbzi con Jesucrist, laaman naj biani par lèjt. Zeel gol gubajn zi'c ree bèn ma zinal biani guin, ⁹ din guial chinal bejn biani guin ma zile' güünman ni zagdxe zi'c rayal, nè ni naj diidxli. ¹⁰ Gol been naguiejn gol been zi'c ruladx Dios. ¹¹ Ad nè lèjt güün ni ad rüjnt ree sirv ni rüjn ree bèn nayaaw xquiarguejn, gol guneenè reeman din gagbee reeman ni rüjn reeman. ¹² Din xt ratu bejn güman ni rüjn reeman ralan. ¹³ Per por xtiidx Jesucrist laa gagbee gajc reeman xhienin rüjn reeman. ¹⁴ Din zianan zeel rëb loj xtiidx Dios: Batie'ch xbacaalil, lüj guial zinalil nejz mal.

Bariica loj dol din gusni Jesucrist xquiarguejnl.

¹⁵ Zeel gol gojp cudad xhienaag nabandi, ad gontzi guibandi, gol gubajn zi'c bèn yu' xquiarguejn. ¹⁶ Gol been naguiejn guibandi zi'c rayal naga yu' tiamp, din lën ree dxej guie ad xnejztri naban bejn. ¹⁷ Zeel ad gontzi nabandi zi'c naj xixgabidi, gol beenli naguiejn chignia'di xhienaag rën Dios guibandi. ¹⁸ Ad südxidi, din guialrzüdx guin ruxhiin bejn. Zagdxeli gol cwëjb nabee xSprijt Dios luxdoodi guidiblagaa. ¹⁹ Chi rünè lasa'di diidx, gol baza't ni ca loj ree salmos, loj ree himno, nè gra loj ree cant ni naj par Dios. Abi' guidib luxdoodi gol biil gol baza't tèe Dios zagdxe. ²⁰ Abi' guixie guixie gol badëëd quixtëe loj dux Dad ree Dios por Dad Jesucrist por gra ni rüjnman par dunuj ree.

Zi'c rayal guibannè lasa' ree bèn rliladx Jesucrist

²¹ Gol bazoob xtiidx lasa'di por respejt ni rajpidi Jesucrist. ²² Nè lèjt béngunaa nuxhliaa, gol bazoob xtiidx lacheelidi zi'c ruzoobidi xtiidx Jesucrist. ²³ Din xinguaaw ree rniabee lacheel zi'c rniabee Jesucrist bèn rliladx ree laaman, bèn babëë laa reeman loj dol abi' naj reeman xbejnman. ²⁴ Abi' zi'c ruzoob ree bèn rliladx Jesucrist xtiidxaman, ziangajc ree béngunaa rayal guzoob xtiidx lacheel reeman. ²⁵ Nègajc lèjt xinguaaw nuxhliaa ree, gol

guyën lacheelidi zi'c rën Jesucrist bën rlliladx ree laaman, abi' xt güjtaman por laa reeman ²⁶ persi bisüdaman xtol reeman, basiaman laa reeman por xtiidxaman në por gualrirobnijs, ²⁷ din guidxin reeman lojman nix da't në ni'qui tijb ni mal, sin falt o dol ren ree, guidxin reeman lojman nayadxuj sin dol. ²⁸ Yan ziangajc ree xinguaaw baxhliaa, rayal guiën lacheel reex zi'c rën laagajc reex. Abi' xin rën lacheel, laa gajquixan rën. ²⁹ Din ni'qui tijb bejn ad rdxe'cht laagajcaman, ruyaanli laagajcaman rniajchi' tée laagajcaman zi'c rüjnnë Jesucrist dunuj ree nayajc ree bën rlliladx laaman ³⁰ gual nayajc ree tijbzi con laaman. ³¹ Zeel zi'c rëb loj xtiidx Dios: "Xinguaaw gusa'n xdad xniaax din gaquix tijbzi con lacheelix abi' grop reex ma naj tijbzi bejn." ³² Dád nawëëg naj par chignia' bejn diidx guie ree, per caninan din zian naj Jesucrist con ree xbejnman. ³³ Yan, xinguaaw ree, gol guyën lacheelidi zi'c rën lëjt gajc. Guiaád lëjt béngunaa, gol gojp respejt lacheelidi.

6

¹ Në lëjt najdi xi'n, gual zinalidi Jesucrist, gol bazoob xtiidx ree xdadidi, din zian rayal güündi. ² Abi' mandamient yaloi ni rëb gual yu' ni yaca' ree bal yaguieen ree ni rëb: "Gojp respejt xdad xnial, ³ din guiban zagdxe guiban téeel xchej loj guidxliuj guie." ⁴ Négajc lëjt dad na ad gusagdiaj xi'ndi chitëë guidxe'ch reex por zian. Mejrli gol basni's reex zagdxe, gol guneeenë reex gol balüü tée reex zi'c rën Dios. ⁵ Në lëjt bën rüjn ree xchiin bejn, gol bazoob xtiidx bën naj xpatrondi loj guidxliuj guie. Con guidib luxdoodi gol gojp respejt gol bazoob tée xtiidx reeman, gol gunaladx xchiin Jesucristan cayüjndi. ⁶ Gol been reeman sirv ad chi ruguiaatzi reeman lëjt par yaya'ndi zagdxe loj reeman, gol gunaladx gual Jesucristan cayüjndi sirv gual diidxli cayüjndi zi'c rën Dios güündi. ⁷ Gol been dxiin con gan, gol gunaladx xchiin Jesucrist cayüjndi, ad xchiint bénguidxliuj. ⁸ Din lëjt ma ragbee gual tijbgaj bejn majsi bën rüjn xchiin bejn o bën ad rüjnt xchiin bejn, per gudëë Jesucrist ni rayalaman zi'ctzi naj ni zagdxe beenman. ⁹ Négajc lëjt bën naj ree patron, gol gojc benza'c con ree xmojsidi, ma gojczy rusagzidi laa reeman, din lëjt ragbee gual bën rniabee laa reeman në lëjt yu'man xanyabaa, abi' ad rbetaman loj bejn.

Gol guzudxi'ch loj ni rlliladxidi

¹⁰ Rni téen lojdi compniar raliduladx ree Jesucrist, gol guzudxi'ch loj gual ma najdi tijbzi con laaman por xgualrniabee naroobaman. ¹¹ Gol gojp lëjt gajc con xgualrniabee Dios din sudxi'chidi chitëë güün xindxab lëjt gan con ree ni rusquiee. ¹² Din ad cayguieent ree naguiejn yaguieen ree gan loj tijb ni naj bëel në dxijt, caydijl ree con gra loj sprijtmal zi'c ree ni rajp gualrniabee, gualguxtis në gra loj xsprijt xindxab ni yu' ni canabee tée loj guidxliuj guie. ¹³ Zeel gol gojp lëjt gajc con xgualrniabee Dios din chile' taandi xhietëëz loj gualzi gui't sudxi'ch tée di loj xhietëëz ni saquidi.

¹⁴ Gol guzudxi'chcliza por ni diidxli ni ma ragbeedi, gol basnuu tée zi'c rayal guibandi. ¹⁵ Gol guzusin par guinieedi xtiidxza'c Jesucrist din por laan yadxu' ree zagdxe con Dios. ¹⁶ Gol badxe'guijc tée gual gualrliladx ni rajpidi naj ni ragnë lëjt loj gra ni zëed por xindxab. ¹⁷ Në ni been Dios perdon xtolidi, laan naj ni rutëë lëjt, guiaád xtiidxaman naj zi'c tijb espad ni runee xSprijt Dios lojdi. ¹⁸ Ad gucwëëz cwedx guiniabidi Dios. Gol gudi'n gunab lojman guixie guixie con xyudar xSprijtaman. Gol guzusin par cwedx guiniabidi laaman, ad gucheladxidi, gol gurejdx tée man por gra ree xbejnman. ¹⁹ Gol

gurejdx gunab tēeman por naj din yazaladxaman naj diidx ni rayal ganen din ganen sin guialrdxeb xtiidxza'c Jesucrist ni zidnē perdon. ²⁰ Dios bacaabee naj par ganen xtiidxza'caman, abi' por zian yu'n ladxguiib. Per gol gurejdx gunab Dios chitēē gadxeban gūn xtiidxaman zi'c rayal gūnan.

Diidx bigra ca ree loj gui'ch guie

²¹ Tíquico, tijb du lasa' ree bën rayēn da't ree, abi' diidxli cayūjnman dunuj ree yudar cayguieen ree sirv Jesucrist, laaman gugojn lējt gra xhienaag za'n xhie tēē cayūnan, ²² din par zianczi caxhalan laaman din gugojnman lējt xhienaag nadxu'n niz guie yagu' tēeman luxdoodi. ²³ Rniaaban loj Dios guial gra ree bën rililadx Jesucrist, cwe'cdxeman luxdoo reeman guiēn tēē lasa' reeman, chililadx tēē reeman laaman nē Dad Jesucrist, ²⁴ gūūnle' tēeman gra ree bën wali rēn Dad Jesucrist.

Gui'ch guxhaal San Pabl loj ree bèn Filipos rliladx Jesucrist

Rugajpdioz Pab bèn rliladx ree Jesucrist

¹ Naj Pab con Timoteo, raguieenan sirv loj Jesucrist. Caycaan gui'ch guie par lëjt najdi bèn rliladx Jesucrist luguiedx Filipos, nê par ree bèn rniabee lojdi ruluü têe reeman xtiidx Dios nê ree bèn rÿjn yudar bèn rliladx ree Jesucrist. ² Dux Dad ree Dios nê Dad Jesucrist güünle' lëjt, yabe'cdxe têe reeman lëjt.

Rbejdx rniab Pab Dios por ree bèn rliladx Jesucrist

³ Zianczi chi rasaaladxan lëjt, rudën quixtêe loj da Dadan Dios. ⁴ Abi' zianczi chi rbedx rniaaban laaman dád nix ru luxdon, rbedx rniaaban laaman por gradi. ⁵ Din diizd dxej ni guzuloj rliladxidi Jesucrist dxel guzuloj raguieen ree tijbzi xgab par guire'ch xtiidxaman xt yan. ⁶ Ragbeechaawan guial diizd chi guzuloj rliladxidi xtiidx Dios, laaman cusnuu cayagnê lëjt din gaquidi zi'c rayal xt dxej gui't Jesucrist stijb. ⁷ Najczi guial günan xgab zian por gradi, din rusaaladxan lëjt, zi'c chi yu'n ladxguuib ziangajc chi culün conin naj diidxli xcwent Dios din tibloj cayÿjnle'man dunuj ree. ⁸ Dios ragbee guial dád rusaaladxan lëjt guial rënan lëjt zi'cgajczi rën Jesucrist lëjt. ⁹ Rniaab tēen lojman din mazri guiën lasa'di, abi' guixie guixie gusnuu guixhialaman xquiarguejndi din gagbeedi ni rayal güündi, ¹⁰ din chile' cwedi ni naj mazri zagdxe. Abi' zian guibandi naya sin dol niz loj Dios, chitêe xhie naman contr lëjt dxej ni gui't Dad Jesucrist stijb. ¹¹ Abi' por laaman zajc guibandi zi'c rën Dios zi'c balüü Jesucrist lëjt din gap ree bejn Dios mazri respejt guilies têe reeman xvaloraman.

Yabajn ree par Cristo

¹² Compniar raliduladx ree Jesucrist, rënan gagbeedi guial graczi ni guza'can cayÿjn reen yudar persi care'ch xtiidxza'c Jesucrist. ¹³ Abi' yan, gra ree bèn yu' lën palas nê gra ree bèn zojb niz guie ragbee reeman guial yu'n ladxguuib por guial najn xbejn Jesucrist. ¹⁴ Abi' chi baguiaa ree compniar raliladxnê' ree Jesucrist guial yu'n ladxguuib, mazri guzudxi'ch reeman abi' zien da't reeman guyu luxdoo guitie'ch reeman xtiidx Jesucrist sin guialrdxeb.

¹⁵ Per diidxliczi yu' reeman rtie'ch xtiidx Jesucrist guial rdëdloj reeman naj abi' rën reeman gac reeman mazri bèn zojbloj. Per yu' reeman rtie'ch xtiidxaman guial naj xixgab reeman zagdxe. ¹⁶ Yu'za reeman guial rën reeman Jesucrist, catie'ch reeman xtiidxaman abi' ragbee reeman guial yu'n ladxguuib guial za'dxi'chnê'n xtiidxaman guial najcan diidxli. ¹⁷ Per yu' reeman ad walit reeman naj xixgab reeman zagdxe catie'ch reeman xtiidx Dios, naabzi par guilies bejn xvalor reeman abi' xixgab reeman naj guial gusagdiaj reeman naj mazri lën ladxguuib guie. ¹⁸ Per achet güünan majsi zagdxe naj xixgab reeman o ad zagdxet ya, contzi ma catie'ch reeman xtiidx Jesucrist, laan naj ni rabaanê'n abi' mazri yabaan. ¹⁹ Din ragbeen guial yariin loj ni cadëedan guial cabejdx canabidi Dios por naj nê guial cayagnê xSprijt Jesucrist naj. ²⁰ Naj ragbee guial ad yu't dxej guslaa Dios naj yaya'nxtun, sin guialrdxeb gulün bejn ree xhienaag ra'pan respejt Jesucrist majsi nabanen o majsi guiëtan. ²¹ Din par naj la'tgaj nabanen cayünan

laaman sirv, abi' bal gui tan mazri zagdxen din ma gazun con laaman. ²² Per bal gabajnran loj guidxliuj guie, gusnuu g nan sirv loj Cristo zi'c rayal, per ad ragbeetan conin naj zagdxen par naj. ²³ Din loj grop ree ni guin d d naw egan par gaben conin g nan, tijb r nan yaca' Dios naj din gazun con Cristo, laan naj mazri zagdxen par naj, ²⁴ per por l jt r jn naguiejn gabajnran. ²⁵ Abi' naj ragbeen guial gabajnran din g nan l jt yudar gusnuu chinalidi xnejz Dios, din chu' luxdoodi gusnuu chililadxidi Jesucrist. ²⁶ Abi' chi guidganan l jt stijb, chu' ni yabaan di gud e t edi quixt e loj Jesucrist por ni beenman por naj.

²⁷ Per ganin l jt, gol been naguiejn gol gubajn zi'c rayal, zi'c r b loj xtiidx Jesucrist. Din bal guidganan l jt o bal id zialan, per r nan guiguiejn guial za'dxi'chidi nadxag t e lasa'di abi' tiblojz cay jndi naguiejn catie'chidi xtiidx Jesucrist. ²⁸ Ad guidxebidi b n rdxe'ch l jt. Zian guiguien guial ma canijt reeman loj Dios, per l jt zian guiguien guial ma rajpidi perdon z ed loj Dios. ²⁹ Din ad cwabeetidi par chililadxidi Jesucrist, cwabeedi n  par sagdiajdi por laaman. ³⁰ L jt con naj tiblojz cayd ud ree tarbajw par yatie'ch ree xtiidx Jesucrist, ma baguiaadi xhienaag rd edan tarbajw por xtiidxaman abi' yan cagaiejndi guial cusnuu cay nan mazran.

2

Nadxag yadxu' ree por Jesucrist

¹ Yan, zi'c ma yu' luxdoodi zagdxen por Cristo, zi'c ma yu' luxdoodi nix guial rusnuu r n lasa'di, n  zi'c ma nabann di xSprijt Dios n  zi'c yu' luxdoodi nix con lasa'di, n  zi'c raya lasa'di. ² Gol basnuu gol gubajn zian din yagu'di luxdoon nix. Gol gubajn, gol guy n t e lasa'di tibloj, gol gojc tijbzi, gol been t e tijbzi xgab. ³ Ad s ebladxidi g undi gan loj ree lasa'di o guilies xvalor l jt gajc, mazri zagdxen gol been naya, gol been t e xgab guial stijb lasa'di mazri lasajc guial lojdi. ⁴ Ad bal chu'di xgab por l jtzi, gol guyu xgab por stijb lasa'di.

⁵ Gol been xgab zi'c been Jesucrist xgab. ⁶ Din majsi laaman naj Dios, per ad guzudxi'chtaman guial ni baman laaman naj Dios. ⁷ Basa'n xguialrni-abeeman persi bi'taman loj guidxliuj guie zi'c tijb mojs abi' gojlanan zi'c tijb b nguidxliuj. ⁸ Abi' chi gocaman zi'c tijb b nguidxliuj beenman naya abi' bazoob xtiidx xDadaman, xt g jtaman loj cr jz, majsi ni natu naj guial r jt loj cr jz. ⁹ Zeel d d guialrniabee naroo bad e Dios lojman, bad e t eman lojman laj bejn ni mazri lasajc loj gra laj bejn. ¹⁰ Din chi guiguiejn ree bejn laj Jesucrist, guzuxib gra reeman lojman, zi'c ree ni yu' xanyabaa, n  gra ree ni yu' loj guidxliuj, n t e ree ni yu' l n liuj. ¹¹ Abi' gra bejn gui b guial Jesucrist naj Dad, zian guilies reeman xvalor dux Dad ree Dios.

Xbejn ree Jesucrist naj zi'c tijb guij ni rulaa bacha'

¹² Zeel compniar raliduladx ree Jesucrist, zi'c r nan l jt abi' rnin l jt guial zi'c bazoobidi da diidxan chi guzun con l jt, ziangajc gol bazoob da diidxan mazri yan guial za'n zijt. Con guialrdxeb n  con respejt gol been zi'c rayal g un ree b n ma naj perdon. ¹³ Din por Dios z ed xgabza'c ni r jndi, abi' laaman ragn  l jt din g undi zi'c r nman.

¹⁴ Gol been gra ni rayal g undi, achet guial ad zayuladxtidi achet t et guial tildiidxidi, ¹⁵ chit e xhie guiniee bejn l jt o chit e xhie xfaltidi yadxej reeman. L jt najdi xi'n Dios gol gubajn naya niz loj ree b n ad zinalt xnejz Dios, b n r jn ree ni guijdx. Din gaquidi zi'c tijb guij loj reeman, zi'c tijb guij ni rulaa bacha' lod nacay, ¹⁶ guial za'dxi'chn di xtiidx Dios ni zidn 

guialnaban. Abi' zian yabaan por l jt dxej ni gui't Jesucrist stijb guial gagbeen ad bentan dxiin xlia' ad bizaa t etan xlia'. ¹⁷ Din guial riladixidi Dios laan naj zi'c tijb gon par laaman, abi' nix yu' luxdon majsi gui tan din yayaaloj gon guin guial rabaan 'n gradi. ¹⁸ Yan ziangajc gol babaa, gol babaa zi'c rabaan.

Timoteo n  Epafrodito

¹⁹ Dad Jesucrist gagn  naj din diob gaxhalan Timoteo lod zojbidi din xhienladxan chi gagbeen xhienaag riga'di. ²⁰ Din tijbzi Timoteo yu' l jt xgab zi'c yu'n l jt xgab. Achut b n ru l jt xgab zi'c laaman. ²¹ Graczi reeman ru xgab per por laagajc reeman, ad rut reeman xgab por ni r n Jesucrist g  n reeman. ²² Per ma ragbeedi xhienaag naj Timoteo, ma ragbeedi xhienaag cay nman naj yudar persi catiechan xtiidx Jesucrist. Cay nman naj yudar zi'c r jn bejn xDadaman yudar. ²³ Zeel r nan gaxhalan laaman din guitixlojman l jt, gagbeezan xhienaag gariican loj cwent guie ²⁴ Dad Jesucrist gagn  naj din diob guidgana quijb naj l jt.

²⁵ Abi' rul   r jn naguiejn gaxhalan da miwan Epafrodito ladxidi. L jt guxhaal laaman din g  nman naj yudar loj ree ni ryaadxan. Abi' zian cay nman naj yudar, tiblojzi cayzaagdiajn. ²⁶ D d r nman guidganajman l jt abi' d d yu'man xgab guial gogbeedi gogxuuman. ²⁷ Abi' walican gogxuuman zamer ni jtaman. Per baya Dios laaman, abi' ad laatzaman, n gajc naj bayaman, chit   chu'naya luxdon mazri zi'c ma guyu nayan. ²⁸ Zeel diob gaxhal gajcan laaman din yabaadi chi guguaadi laaman stijb chit   chu'naya t en mazri. ²⁹ Gol babaa, gol baca'man guial najman tijb du lasa' ree b n riladix Jesucrist. Zian gol guy n gra ree b n naj zi'c laaman. ³⁰ Din zamer ni jtaman guial r nman sirv loj Jesucrist, guzujman loj guialg jt guial beenman naj yudar loj ni ad bile't n jn quijb l jt naj yudar.

3

Ni mazri lasajc

¹ Yan, compniar raliduladx ree Jesucrist, gol badxe' luxdoodi zagdxe por Dad Jesucrist. Par naj achetan guial ganin l jt diidx ni ma rni gajcan tijb, din par l jt lasajc ree diidx guin chit   chu' ni gusquiee l jt. ² Gol gojp cudad con ree bentont, b n ad nad dguient, benmal, b n r jn ree naguiejn din chu' ree bejn xsen b n Israel. ³ Din mazri lasajc sen ni raya'p ree, abi' sen guin naj guial diidxli zunaal ree Dios por xSprijtaman b n nabajnn ' ree, abi' rabaa ree guial ma rayagbee ree nayajc ree xbejn Jesucrist, per ad por guial zunaalt ree costumbr. ⁴ Majsi zajc gales da valoran guial zinaalan gra ree costumbr, per bal yu' b n rlies xvalor gajc, n gajc naj zajc g n zian. ⁵ Din chi goc toxman goolan, badxe' reeman naj sen ni ru ree b n Israel. Abi' b n Israel naj, loj xdiaa Benjam n zialan, rniin diidx Hebreo din xi'n ree b n rniee diidx Hebreo naj. Benan gra ni rniabee ley din b nfarisew gojcan. ⁶ Benan zi'cgajczi r jn ree b nfarisew, zeel xt guzunaalan b n riladix ree Jesucrist din g nan laa reeman ni mal, benan gra zi'c tal rniabee ley abi' achut zajc ni jb guial ad cay ntan zi'c rayal. ⁷ Gra ni benan nadxel, par naj d d lasajcan nadxel, per yan achet lasajcan par naj, din yan Cristo mazri lasajc. ⁸ Abi' achet ni mazri lasajc guial loj ni n nbeen Dad Jesucrist, por laaman gra ni benan nadxel ma basa'nan tiblax, naj reen zi'c tijb guix par naj din nabee Cristo naj guidiblagaa, ⁹ abi' gacan tijbzi con laaman. Ad naladxtan por guial r nan zi'c rniabee ley achet dol ra'pan niz loj Dios, naladxtan por guial

rliladxan Jesucrist, din por gualrliladx guin ma naya bejn loj Dios. ¹⁰ Zeel rënan günbeeçaawan Cristo, günbee tëën gualrniabee ni basban laaman, rën tëën gadaanan xhietëez loj gualrzagdiaj ni gadëedan zi'c gudaanman, ma guidxin dxej gacan zi'c rayal gacan por xgualgüjtaman. ¹¹ Din yu'guican gual yabanan zi'c baban Jesucrist.

Ni gunee Dios xanyabaa

¹² Ad canitan lojdi gual ma bayaaloj benan gra o gual najn benza'c, per cayünan naguiejn din gacan zi'c rën Cristo gacan diizd chi guzuloj rniabeeman naj. ¹³ Compniar raliduladx ree Jesucrist, naj rni lëjt gual ad wayaalojt günan zi'c rayal, per cayünan naguiejn din yayanladxan gra ni benan gocli din gac gusunun par delant, ¹⁴ din yayaaloj günan zi'c rayal din chile' gaca'n ni gunee Dios xanyabaa zi'c gurejdxaman dunuj ree por Jesucrist.

¹⁵ Abi' dunuj ree gual ma rayagbee ree zagdxe ni rën guiëb xtiidx Dios, rayal yaguieen ree xgab zian. Per bal garen naj xixgabidi gual loj ni canin lojdi, Dios gulüü lëjt conin naj diidxli. ¹⁶ Per rüjn naguiejn yabajn ree zi'c ma raignia' ree.

¹⁷ Compniar raliduladx ree Jesucrist, gol gubajn zi'c naban, gol baguiaa tëë xhienaag naban ree bèn naban zi'c naban. ¹⁸ Din zien volt ma rnin lojdi abi' yan caydxi'nan zatijb, xt ronan canin lëjt gual zien ree bejn naban zi'c ree bèn ad rliladxt gual güjt Cristo loj crüzj por dux xtol ree. ¹⁹ Abi' ree bèn guin castizi naj ni rbëz laa reeman din mazri ruladx reeman güün reeman ni dxuudx. Abi' luar yatu reeman por ni rüjn reeman aal mazri rlies xvalor reeman gual mazri rüjn reeman xgab por ree ni yu' loj guidxliuj guie. ²⁰ Per dunuj ree ma nayab ree xanyabaa abi' caylëz ree gual diizd xanyabaa gui't Dad Jesucrist bèn gudix por dux tol ree. ²¹ Laaman naj bèn guchaa dux cuerp ree ni raya'p ree loj guidxliuj guie din gacan zi'c naj xcuerpaman xanyabaa. Abi' güünman zian con gualrniabee ni rajpaman par nabeeman gra.

4

Gol badxe' luxdoodi zagdxe por Dad Jesucrist

¹ Zeel compniar raliduladx ree Jesucrist, rënan lëjt rën tëën guidganan lëjt, lëjt rgu' luxdon zagdxe, abi' najdi zi'c tijb prem par naj, gol guzujdxi'ch loj ni rliladxidi Dad Jesucrist.

² Yan, rniaaban loj Evodia në loj Síntique din guidxag cwe reeman gual naj reeman compniar loj ni rliladx reeman Dad Jesucrist. ³ Abi' ziangajc lüj compniar ni cayguieen dxiin tijbzi, rniaaban lojl din güünl yudar bëngunaa guin ree din laa reeman been naj yudar bire'ch xtiidx Jesucrist në Clemente con ree ben ren, gra reeman ma yu' laj loj libr ni yu' laj ree bèn guiban tiblayaa con Dios.

⁴ Zianczi gol badxe' luxdoodi zagdxe por Dad Jesucrist. Naj rni lëjt ¡Gol badxe' luxdoodi zagdxe! ⁵ Gol been naguiejn güünbee gra bejn lëjt gual najdi benza'c. Gol badxe'guijc gual zamer gui't Dad Jesucrist zatijb.

⁶ Ad rayalt chu'di xgab por xhienin, gol gurejdx gunab Dios por gra ni rzajquidi, gol gurejdxaman gol badëë tëë quixtëë lojman. ⁷ Dios yabe'cdxe luxdoodi, zro' rabe'cdxeman luxdoo bejn mazri gual loj ni naladx bejn, abi' laan naj ni gagnë lëjt din yayaalyuj luxdoodi yayaalyuj tëë xquiarguiejndi gual ma najdi tijbzi con Jesucrist.

Gol badxe'guijc ganax ni zagdxe

⁸ Naga gad lox gūnan gui'ch guie, compniar raliduladx ree Jesucrist, rnin lējt gol badxe'guijc ganax ni diidxli, ni rayal respejt nē ni naj xnejz. Gol badxe'guijc ganax ni rŭjn sirv, ni naj zagdxē nē ni rayal gūn bēn zē xnejz. Gol badxe'guijc gra ni naj zagdxē nē ni guilies bejn xvalor.

⁹ Gol been zi'c basidan lējt, zi'c ma balūn lējt, gol been zi'c rnin lējt zi'c ma baguiaadi benan, zian gagnē Dios lējt bēn rabe'cdxe luxdoo ree bejn.

Ni badēēd ree bēn filipos loj Pab

¹⁰ Dád rabaan por Dad Jesucrist guial ma basaaladxidi naj. Ad canitan bayanladxidi naj, canin zian guial ad gojctri nŭjndi naj yudar. ¹¹ Ad canitan zian guial cayaadxan xhienin din ma basidan gadēēdan con ni ra'ptzan.

¹² Ragbeen xhienaagan chi naban bejn loj guialprob ragbee tēēn xhienaagan chi achet ryaadx bejn, din ma basidan rdaanan ni zēēdtzi, bal rawan o bal id rawan, bal rŭjnan naj sobr o bal ryaadxan. ¹³ Rajc rdaanan ni zēēdtzi con xyudar Jesucrist. ¹⁴ Per zagdxē naj ni beendi guial beendi naj yudar loj ni cazaagdiajn.

¹⁵ Ragbee tēēdi guial chi briin niz Macedonia din suloj gatie'chan xtiidxza'c Jesucrist, lējtzi bazaladx xhienin lon guial loj gra ree guiedx lod ma rliladx reeman xtiidx Jesucrist, zi'c benan lējt yudar ziangajc beendi naj yudar.

¹⁶ Ziangajc chi guzun luguiedx Tesalónica chi biaadxan xhienin, bēlczī volt beendi naj yudar. ¹⁷ Ad cayguiltan mod din gūndi naj yudar mazri, ni rēnan naj guial mazri yaya'ndi zagdxē loj Dios. ¹⁸ Ma baca'n gra ni guxhaalidi con Epafrodito, yan xt sobr rŭjnan naj, par naj ni guxhaalidi naj zi'c tijb ni nadxoon o tijb gon ni ruree nejxh, ni ruladx Dios. ¹⁹ Zeel Dios gunee lējt gra ni ryaadxidi por ree ni za'c ni rajpaman xanyabaa con Dad Jesucrist. ²⁰ ¡Abi' por gualrniabee ni rajp dux Dad ree Dios, rayalczi yaya'p reeman respejt goctēēz! Amén.

Rugajpdioz ree bēn rliladx Jesucrist bēn Tesalónica ree

²¹ Gol bagajpdioz gra ree bēn ma naj xbejn Jesucrist, guiáad gra ree bēn rliladx Jesucrist bēn za'nē' reen guie, rugajpdioz reeman lējt. ²² Gra ree bēn zojb ree guie, bēn ma naj ree xbejn Jesucrist, nē gra ree bēn rŭjn sirv loj rey, nē reeman rugajpdioz lējt.

²³ Dux Dad ree Jesucrist gūnle' gradi. Amén.

Gui'ch guxhaal San Pabl loj ree bén Colosas rliladx Jesucrist

Rxhiaal Pab xtiidx Dios

¹ Naj Pab, najn tijb xi apóstol Jesucrist, din zian rën Dios. Naj con Timoteo nayajcan compniar raliduladxan Jesucrist, ² caycaan gui'ch guie par lëjt guial diidxli zinalidi xtiidx Jesucrist, lëjt guial najdi xbejn Dios luguiedx Colosas. Dux Dad ree Dios güünle' lëjt cwe'cdxe tēēman luxdoodi.

Rbejdx Pab Dios por ree xbejn Jesucrist

³ Beegaj chi rarejdxan Dios, xDad Dad Jesucrist, radēēdan quixtēē lojman por lëjt. ⁴ Din ma baguiejnan xhienaag rliladxidi Jesucrist xhie tēē naag rëndi gra ree bén naj ree xbejnman. ⁵ Guial cabēzidi yayalidi guialnaza'c yu'chaaw xanyabaa. Gogbeedi laan chi biguiejndi xtiidxza'c Jesucrist ni naj diidxli. ⁶ Abi' ree diidxza'c guin ni ma bacaagdiajguidi, gra ladczi ma care'chan. Abi' gra ladczi ma caliladx ree bejn laan zi'cgajc guzaquidi chi biguiejndi guial naza'c Dios abi' diidxli rënman lëjt. ⁷ Lëjt gogbee diidxli guin ree chi balüü Epafras laa ree lëjt. Laaman cayüjn dunujn yudar abi' dád rayēnan laaman, din laaman diidxli cayüjn sirv loj Jesucrist delant lojdi. ⁸ Abi' tēē laaman be diidx du lojn xhienaag rën lasa'di guial yu' xSprijt Dios luxdoodi. ⁹ Zeel diizd chi baguiejnan xhienaag nabandi, ad racwēēzt rarejdxan Dios por lëjt din chignia'di zagdx xhienaag rënman güündi gunee tēēman lëjt gra loj guialrajc guixhial tēēman xquiarguiejndi por xSprijtaman. ¹⁰ Abi' zian guibandi zi'c ryal guiban ree bén rliladx Jesucrist, din güündi zi'c tal ruladxaman abi' gusnuu güündi ganax ree ni zagdx gusnuu tēē güünbeedi Dios mazri. ¹¹ Abi' ranaaban lojman din con xguialrniabee za'cdxoonman gagnēman lëjt din sudxi'chidi, taan tēēdi xhietēēz loj guialzi tēdidi sin guial yalenyā'di. ¹² Abi' xt nix chu' luxdoodi gudēēdi quixtēē loj dux Dad ree Dios guial basiaman lëjt din yayalidi ni ryal ree xbejnman, bén zinal ree xnejzman. ¹³ Laaman babēē dunuj ree loj xguialrniabee xindxab abi' bagu'zman dunuj ree loj xguialrniabee xi'nman Jesucrist bén rënman, ¹⁴ abi' gudijxaman por dux tol ree, yan ma raya'p ree perdon loj Dios.

Por xguialgüjt Jesucrist ma nadxu'nē' ree Dios zagdx

¹⁵ Achut zajc guguiaa Dios, per Jesucrist naj zi'c gajczi naj Dios. Abi' laaman mal rniabeenēman Dios diizd chi gad guidxliuj gacchaaw. ¹⁶ Por Jesucrist gojc gra ni yu' xanyabaa nē loj guidxliuj, zi'c ni ruguiaa bejn zi'c ni ad ruguiaataman. Abi' por laaman yu' graloj gualrniabee nē graloj guialguxtis ni rajp ree ni ad rajt ruguiaa ree bejn. Gran gojc por laaman nē par laaman. ¹⁷ Mal yu' Jesucrist diizd guia'xchej chi gad guidxliuj gacchaaw, laaman dxiibgujic gra abi' rniabeeman gra. ¹⁸ Abi' laa tēēman rniabee gra ree bén rliladx laaman, bén ma naj ree xbejnman. Laaman naj bén yaloj abi' yaloj laaman baban loj ree bengüt din guiguien guial tijbzi laaman rajp gualrniabee loj gra. ¹⁹ Din bayuladx Dios gac Jesucrist zi'c gajczi naj Dios. ²⁰ Abi' por Jesucrist gra bēnguidxliuj ma za' zagdx con Dios, zi'c ni yu' loj guidxliuj zi'c ni yu' xanyabaa. Za' bejn zagdx con Dios por xguialgüjt Jesucrist loj crüjz. ²¹ Gocli ad gojctidi tijbzi con Dios, gojquidi zi'c bén bidxe'ch laaman guial beendi ganax ni mal. ²² Per yan ma za'di zagdx con Dios

por ree guialzi ni gudëd Jesucrist chi gütaman loj crüjz din gac guidxindi lojman naya sin dol chitëë xhie naman lojdi. ²³ Per par zian rayal sudxi'chidi loj guialrliladx ni rajpidi, ad gucwëëz chinalidi xtiidzza'c Jesucrist ni ma biguiejndi. Abi' diidzza'c guin gajc ree ma bire'ch guidib guidxliuj. Abi' naj naj tijb ree bèn catie'ch diidzza'c guin ree.

Bacaabee Dios Pab din güünman sirv loj ree xbejn Dios

²⁴ Abi' yan nix yu' luxdon por guialzi ni cadëëdan guial rünan lëjt yudar abi' lasa'gajc guialzi ni gudëd Jesucrist cadëëdan din chile' günan yudar bèn rliladx ree laaman bèn ma naj ree xbejnman. ²⁵ Din Dios bacaabee naj par günan sirv loj ree xbejnman. Abi' laaman banee dxiin guin naj din gulün lëjt xtiidxaman zi'c tal najn. ²⁶ Diidz tiamp gulal ad bignia't ree bejn zagdx ni rën guiëb xtiidx Dios. Per yan ma balüüman ni rën guiëban loj ree xbejnman. ²⁷ Din gugojn reeman bèn ad najt ree bèn Israel xhienaag naj xguialnaza'c za'cdxoonman. Abi' ni ad balüüt Dios loj ree bejn tiamp gulal naj guial nabannë Jesucrist lëjt abi' por laaman ragbeedi zagdx guial yu' dxej yayalidi xanyabaa. ²⁸ Abi' dunujn batie'ch xtiidx Jesucrist, baneenë'n bejn ree, balüüt tëen laa reeman con gra quiarguiejn ni runee Dios din chi guidxin reeman lojman por Jesucrist ma naj reeman zi'c rënman gac reeman. ²⁹ Abi' naj dád cayünan naguiejn cayünan dxiin guie con guialrniabee ni baneeman naj.

2

¹ Rënan gagbeedi guial cayün da'tan naguiejn cayünan lëjt yudar, në ree bèn zojb guiedx Laodicea në gra ree bèn ad wayünbeet naj. ² Cayünan naguiejn din yayu luxdoo reeman din gusnuu guiban reeman tijbzi, guiën lasa' reeman chu' tëë xquiarguiejn reeman din chile' güünbee reeman ni ad balüüt Dios bejn ree gulal abi' laaman naj Jesucrist, ³ por laaman zëëd gra guialrajc në guialrignia'. ⁴ Canin diidx guie ree lojdi chitëë chu gusquiee lëjt con ree xtiidx zagdx reeman. ⁵ Majsı ad za'tan con lëjt, per yu'guican lëjt abi' rabaan guial cayüjndi zi'c rayal, za'dxi'ch tëëdi loj guialrliladxidi Jesucrist.

⁶ Zeel zi'c ma rliladxidi Dad Jesucrist, ziangajc gol gojc tijbzi con laaman. ⁷ Gol been naguiejn gol binalaman guidiblagaa, gol guzudxi'ch loj guial rliladxidi laaman zi'c ma basiididi ad gucwëëz tëë gudëëdi quixtëë loj Dios.

Guialnaban ni rudëëd Jesucrist

⁸ Gol gojp cudad, ad tiëbidi güün ree bèn rën gusquiee lëjt gan con ree ni rulüü reeman o con ree diidx ni ad rüjnt sirv ni zëëd por ree costumbr o por ree guialrniabee yu' loj guidxliuj, din ad zëëdt reen por Jesucrist.

⁹ Din zi'cgajczi naj Dios, ziangajczi naj Jesucrist. ¹⁰ Abi' nabannëdi Dios guidiblagaa guial najdi tijbzi con Jesucrist, din laaman rniabee loj gra guialrniabee në loj gualguxtis. ¹¹ Abi' tëë guial ma najdi tijbzi con Jesucrist ma yu'di xsenman, per ad lasa't sen ru ree bèn Israel, sen yu'di por laaman najn guial ma basa'ndi dol tiblax. ¹² Chi gurobnijsidi, laan rën guiëb guial güjtidi con Jesucrist abi' babandi con laaman stijb guial rliladxidi Dios rajp guialrniabee persi basbanman Jesucrist loj gualgüjt. ¹³ Gocli gojquidi zi'c bengüt delant loj Dios por xtolidi në por guial ad guyutidi sen ni ru ree bèn Israel. Per yan por Jesucrist, ma been Dios dux tol ree perdon abi' ma raya'p ree guialnaban con Jesucrist. ¹⁴ Ma badxi'ca Dios dux tol ree ni bayal nadijx ree zi'c rniabee xleyaman, badxi'caman dol guin ree chi güt Jesucrist loj crüjz abi' laaman naj bèn gudijx laan por dunuj ree. ¹⁵ Abi' zian beenman gan gra

loj ree guialguxtis n  loj gra guialrniabee z ed loj xindxab. Basa'nxtuman laa reeman loj ree bejn, beenman laa reeman gan guial g jtaman loj cr jz.

Gol been xgab ni yu' ree xanyabaa

¹⁶ Zeel achut rayal gula'ch l jt por ni rawidi n  ni r 'di o por guial ad r jntidi cwent dxej lanij o dxej ni yu' b ew c b o dxej raziiladx ree bejn. ¹⁷ Din gra ree ni guin naj zi'c tijb xballa Jesucrist abi' yan laaman naj b en ma bi't. ¹⁸ Ad ti bidi gutiaalguuiw b en r n ree anjl zi'c Dios l jt, par gusa'ndi xnejz Dios, din laa reeman rulu  naj reeman b en naxanladx, per ad najt reeman laan r b t e reeman guial yu' ni rulu loj loj reeman. Dxel laagajc reeman rlies xvalor por xixgab gajc reeman. ¹⁹ Per laa reeman ad nabann t reeman Jesucrist, b en rniabee dunuj ree. Abi' por laaman caysnuu cayignia' ree xhienaag yunaal ree xnejzaman din yadxajg du lasa' ree yayajc ree tijbzi con Jesucrist zi'c naj xixgab Dios.

²⁰ Yan bal walidi ma g jtidi con Jesucrist par ree ni rb eguijc ree b nguidxliuj,  chexquiza zeel ruzoobidi xtiidx ree b en r b: ²¹ "Ad rayalt gugaalil ni guin, ad gawil ni guin, ad guiniaazil ni guin"? ²² Gra ree mandamient guin yu' dxej nit reen, din b nguidxliuj gul eguijc laa reen. ²³ Diidxliczi rulu  lasajc da't ree mandamient guin guial tant r jn ree bejn naguiejn g  n reeman laa reen cumplid abi' r jn reeman b en naxanladx dxel rusagzi laagajc reeman, per achetctzi lasajc ree mandamient guin par gucw  z reen ni mal rz  bladx reeman g  n reeman.

3

¹ Zeel bal ma rajpidi guialnaban c b con Jesucrist, gol been naguiejn gol been xgab ni yu' ree xanyabaa lod za' Jesucrist xladbee Dios. ² Ad g  ndi xgab ganax ree ni yu' loj guidxliuj, gol been xgab mazri ni yu' loj xanyabaa. ³ Gol gunaladx ma g jtidi par ree ni yu' loj guidxliuj abi' ma rajpidi guialnaban delant loj Dios por Jesucrist. ⁴ Abi' chi gui't Jesucrist stijb, b en runee dunuj ree guialnaban, n  l jt yayal guibann  laaman loj xguialrniabee za'cdxoonman.

Zi'c rayal guiban ree b en rliadx Jesucrist

⁵ Yan, gol basa'n gra ree ni mal riga' loj guidxliuj guie. Ad sun di b en ren b en ad najt lacheelidi. Gol basa'n ni ad r jnt ree sirv, n  ree xgabmal n  ree ni mal yu'di gan g  ndi. Ad s  bladx t  di gapidi gra loj ni yu' loj guidxliuj din b en r jn zian laan r nman mazri luar Dios. ⁶ Abi' por ree ni guin z ed xcasti Dios par ree b en ad ruzoobt xtiidxaman. ⁷ Lasa' ree ni mal guin beendi chi gadidi g  nbee Jesucrist. ⁸ Per yan gol basa'n gra ree ni mal guin zi'c guialrdxe'ch, guialralen lasa', guialr jn ni mal lasa', guialrnieeguijdx n  guial rniee diidxguijdx. ⁹ Ad rusquiee loj lasa'di, din ad nabantridi zi'c gubandi gocli chi beendi ni mal ree, ¹⁰ din yan ma bidxaa mod nabandi. Ma najdi zi'c benc b guial chigagaj ma cayajquidi zi'c r n Dios gaquidi din g  nbeedi Dios mazri zagdx, b en runee l jt guialnaban. ¹¹ Abi' chi ma rliadx bejn Jesucrist, achet g  nan chut  z najman, bal najman b en grieg o b en Israel, bal yu'man sen ru ree b en Israel o ad yu'taman laan ya, bal najman benzit o najman b en zobj dajn, bal najman zi'c b en nado' o ad najtaman zi'c b en nado' Per ni mazri lasajc naj guialrliladxaman Jesucrist, b en rniabee za' t eman con dugra ree.

¹² Abi' Dios r n l jt, zeel gulejman l jt din gaquidi xbejnman. Zeel gol baya bejn ree, gol gojc benza'c, gol gojc b en naxanladx, ad gaquidi bendxal, gol

gojp pasens lasa'di. ¹³ Ad yaleny'a'në lasa'di. Gol been tëë perdon lasa'di bal xhie rüjnnë reeman lëjt. Zi'c been Dad Jesucrist lëjt perdon ziangajc gol been perdon bejn ree. ¹⁴ Gol badxe'guijc guialrën lasa' naj ni mazri lasajc. Abi' guialrën lasa' guin rüjn yudar dìn guidxaag guiban bejn. ¹⁵ Gol cwëjb nabee Jesucrist lëjt dìn yabedxe luxdoodi, dìn par zian gulej Dios lëjt par gaquidi tijbzi por Jesucrist gol badëë tëë quixtëë lojman por zian.

¹⁶ Gol badxe'guijc da't xtiidx Jesucrist, gol balüü gol guneenë tëë lasa'di zi'c rayal. Gol badëë quixtëë loj Dios con ree cant në ree salmos në los demazri ree cant ni naj par Dios. ¹⁷ Xhietëëz ni güündi ni guiniee tëëdi, yaloj xgaj gol basaaladx Dad Jesús abi' por laaman gol badëëd quixtëë loj dux Dad ree Dios.

Zi'c rayal guiban tijb famil

¹⁸ Lëjt béngunaa yu' ree lacheel, gol bazoob xtiidx lacheelidi, dìn zian rayal güün bën rliiladx Jesucrist. ¹⁹ Abi' ziangajc lëjt xinguiiaaw yu' ree lacheel, gol guyën lacheelidi ad gusagzi tëëdi laa reeman.

²⁰ Në lëjt xin naj ree xi'n, gol bazoob gra xtiidx ree xDadidi, dìn zian ruladx Dios. ²¹ Abi' ziangajc lëjt dad na, ad gusagdiaj xi'ndi chitëë guidxe'ch reex abi' yaleny'a' reex.

²² Lëjt bèn rüjn ree xchiin bejn, gol bazoob gra xtiidx xpatrondi loj guidxliuj guie. Ad chi ruguiaatzì reeman lëjt par yaya'ndi zagdxë loj reeman, guidib luxdoodi gol been xchiin reeman por respejt ni rajpidi Dad Jesucrist. ²³ Xhietëëz nin güündi, gol beenan con gan. Gol gunaladx loj Jesucrist cayüjndi sirv, ad lojt bénguidxliuj. ²⁴ Dìn lëjt ma ragbee guial zian yu' ni tia'di loj Dad Jesucrist guial cayüjndi laaman sirv. ²⁵ Per par ree bèn rüjn ni mal, laa reeman yalay casti por ni mal been reeman, dìn Dios ad rbetaman loj bejn.

4

¹ Nëgajc lëjt bèn naj ree patron, gol been zi'c rayal con ree bèn rüjn xchiindi, gol gojc tëë benza'c con laa reeman, dìn lëjt ragbee guial xanyabaa yu' bèn rniabee lëjt.

² Gol guzusin, gol gurejdx Dios ad bal gucheeladxidi, gol badëë quixtëë lojman. ³ Gol gurejdx tëë Dios por dunujn dìn guixhialaman nejz dìn gac yatie'chan mazri xtiidx Jesucrist ni ad wayünbeet ree bejn. Abi' por ree diidx guin yu'n ladxguuib. ⁴ Gol gurejdx Dios dìn gac gatiechan diidx guin ree loj ree bejn zi'c rayal dìn gac chignia' reeman laan zagdxë.

⁵ Gol gubajn zagdxë delant loj ree bèn ad waliladxt Jesucrist gol gunee tëë xtiidxaman loj reeman beegaj chi chu' mod. ⁶ Chi rüdi diidx, gol be diidx xnejz dìn yayuladx bejn ni rnieedi gagbee tëëdi xhienaag yadx'i'di ni riabdiidx reeman lojdi.

Rxhiaal ree xbejn Jesucrist xtiidx Dios

⁷ Tíquico, tijb du lasa' ree, bèn rayën ree, bèn diidxli cayüjn naj yudar cayünan sirv loj Jesucrist, laaman gugojn lëjt gra xhienaag za'n niz guie. ⁸ Par zian caxhalan laaman dìn gugojnman lëjt xhienaag nadxu'n niz guie dìn yagu' tëëman luxdoodi. ⁹ Abi' con laagajcaman caxhalan Onésimo, tijb du lasa' ree bèn rayën gajc ree, bèn naban zi'c rayal, bèn naj bèn ladxidi. Laa reeman gugojn lëjt gra ni cayajc niz guie.

¹⁰ Aristarco, bèn yu'n'è'n ladxguuib, laaman rxhiaal xtiidx Dios lojdi. Nëgajc Marcw, bijchwin Bernabé rugajpdioz lëjt. Abi' ma bagojnman lëjt chunin naj Marcw, bal gui'taman guidganajman lëjt, gol baca'man zagdxë. ¹¹ Abi' nëgajc Jesús, bèn la gajc Justo, rxhiaal xtiidx Dios lojdi. Loj gra ree bèn Israel

rliladx Jesucrist, laaz reeman cayüjn naj yudar caytie'chan xtiidx Dios abi' laaz reeman naj bèn cagu' luxdon. ¹² Nè Epafra, bèn ladxidi, rxhiaal xtiidx Dios lojdi. Laaman cayüjn sirv loj Jesucrist. Gra dxejczy rbejdxaman Dios por lëjt din sudxi'chidi chinalidi xnejz Dios güün tēēdi gra zi'c rēnman. ¹³ Naj ragbee zagdxe guial dád ruman xgab por lëjt, nè por ree bèn Laodicea, nè por ree bèn Hierápolis. ¹⁴ Lujc, doctor rayèn da't ree, nè Demas, nè reeman rxhiaal xtiidx Dios lojdi.

¹⁵ Gol bagajpdioz ree dux compniar ree bèn rliladx ree Jesucrist, bèn zojb ree luguiedx Laodicea. Gol bagajpdioz tēē Ninfas con los demazri ree xbejn Jesucrist bèn rado'p ree lidxaman. ¹⁶ Chi ma gulox biilidi gui'ch guie, dxel gol guxhaalan loj ree bèn rliladx Jesucrist, bèn zojb ree luguiedx Laodicea, din nè reeman gool laan. Nè gui'ch ni guxhalan loj reeman rayal yaxhaal reeman lojdi din nēgajc lëjt gool laan. ¹⁷ Abi' gol güjdx loj Arquipo din güünman cumplid ni ma bacaabee Dad Jesucrist güünman. ¹⁸ Naj Pab, quijb naj cuca lejtr guie ree par gugajpdiozan lëjt. Gol basaaladx guial yu'n ladxguiib. Dios güünle' lejt. Amén.

Gui'ch yaloj guxhaal San Pabl loj ree b́en Tesalónica rliadx Jesucrist

¹ Naj, Pab con Silvan nē Timoteo, cayxhaalan gui'ch guie par lējt najdi b́en rliadx Jesucrist luguiedx Tesalónica, dux Dad ree Dios nē Dad Jesucrist güünle' lējt yabe'cdxe tēē reeman luxdoodi.

Rudēē Pab quixtēē loj Dios

² Guixie guixie radēēn quixtēē loj dux Dad ree Dios por gradi, rasaaladx tēēn lējt chi rarejdx ranaaban laaman. ³ Nē zianczi chi rarejdx ranaaban laaman, nadxe'duguijcan ni ma beendi guial rliadxidi laaman, nē guial rēn lasa'di, nadxe'duguijc tēēn guial cadaandi cabēzidi gui't Dad Jesucrist stijb. ⁴ Compniar raliduladx ree Jesucrist, dunujn rayagbee guial Dios rēn lējt, gulej tēēman lējt. ⁵ Din chi baneen xtiidxza'caman lojdi, ad diidxtizi balüün lējt, balüün lējt con xguialrniabee xSprijt Dios abi' rayagbeen guial diidxli naj ni caynan lojdi. Lējt ragbee xhienaag babajnan chi badxu'nē'n lējt, babajnan zian din yaguieenan lējt yudar xhienaag guiband.

⁶ Abi' lējt nabandi zi'c babajnan lojdi nē zi'c balüü Jesucrist, abi' por xSprijt Dios babaadi bililadxidi ni banan lojdi, majsi dád guzagdiajdi. ⁷ Zian najdi tijb ejempl par gra ree b́en rliadx Jesucrist niz Macedonia nē niz Acaya. ⁸ Por lējt bire'ch xtiidxaman ad tijbtizi luarzii ree, gra ladczi ruza't reeman xhienaag rliadxidi Dios, xt ni'qui chetri ryaadx yaguie'chan. ⁹ Din laagajc reeman rü diidx xhienaag baca'di dunujn chi budganajn lējt, xhie tēē naag basa'ndi ni naladxidi naj ree dios persi binalidi quijb Dios naban abi' guzuloj cayüjndi laaman sirv. ¹⁰ Rü tēē reeman diidx xhienaag cabēzidi gui't Jesucrist Xi'n Dios diidz xanyabaa, b́en basbanman loj ree bengüt, Jesús b́en rabēē dunuj ree loj casti ni zēēd.

2

Ni been Pab luguiedx Tesalónica

¹ Lējt ragbee, compniar raliduladx ree Jesucrist, guial ad budganaj xlia'tzan lējt, ² majsi lējt ragbee guial luguiedx Filipos guna ree bejn diidxguijdx du lojn nē graloj ree guialzi badēēd reeman dunujn. Per Dios baneen dunujn valor persi badün xtiidxza'caman lojdi, majsi xhietēēz raza'can por ree b́en rdxe'ch dunujn. ³ Din ad baneenē'tan lējt diidx rusquiee, o par yaguieennē'n lējt zi'ctzi rayēnan ya, o par yasquieen lējt. ⁴ per zi'c bacaabee Dios dunujn din yaneen xtiidxza'caman guial baguiaaman zile' yaguieenan ni rayal yaguieenan, laanan naj ni radün ad par yaya'ntan zagdxe loj ree bejn, par yaya'nan zagdxe loj Dios, b́en ragbee gra ni yu' luxdoo bejn. ⁵ Lējt ragbee guial ad yu't dxej baneenē'n lējt zagdxe naabzi par guiēndi dunujn, ache tēēt guijc badxiiban din yaca'n xmiliadi. Dios ragbee guial laan naj diidxli. ⁶ Ad radiiltan guza't ree bejn dunujn zagdxe, ad radiil tēētan guza'tidi dunujn zagdxe, o guza't ree ben ren dunujn zagdxe, ⁷ majsi guial nayajcan xiapóstoł Jesucrist, raya'pan derejch yanabeen lējt güündi xhienin par dunujn, per ad raguieentan zian. Lējt ragbee guial benza'c bayajcan chi badxu'nē'n lējt, zi'cgajczi tijb na rusni's rniaj tēē xi'n. ⁸ Abi' guial tant rayēnan lējt, ad tijbtzi xtiidx Dios baneen lojdi, nē dux gualnabanan bayēnan

naneen por lëjt, guial tant rayënan lëjt. ⁹ Abi' lëjt ragbee compniar, guial dád baguieenan dxiin. Dxej guiaal baguieenan dxiin, chitëe yalu'n xchiindi guial güündi dunujn yudar yabajnan la'tgaj balüün lëjt xtiidxza'c Dios.

¹⁰ Lëjt në Dios ragbeechaaw guial chi badxu'në'n lëjt, babajnan xnejz zi'c rayal, abi' achet chile' gudxiibidi du guijcan, lëjt bën rliadx ree Jesucrist. ¹¹ Lëjt ragbee xhienaag baneen lëjt consejw, xhie tëe naag balu'n luxdoodi zi'c rüjn tijb dad can ree xi'nman. ¹² Ma banan lojdi din guibandi zi'c rayal guiban bën ma naj ree xbejn Dios, bën rbejdx lëjt din yayalidi xanyabaa lod rniabeeman.

¹³ Zeel në dunujn ad racwëëzt radëen quixtëe loj Dios, guial chi biguiejndi xtiidxaman ni banan lojdi, bidxga'di laan zi'c xtiidx Dios ad zi'ctzi xtiidx bëngxamluj. ¹⁴ Abi' diidx guin ree naj ni rusni xquiarguiejndi, lëjt guial rliadxidi Jesucrist. ¹⁴ Abi' lëjt compniar raliduladx ree laaman, ma guzajquidi zi'c guzac ree xbejn Dios, bën Israel zojb ree niz Judea, bën rliadx ree Jesucrist. Din zi'cgajc basagdiaj ree bën ladxidi lëjt, ziangajc basagdiaj lasa' bën Israel reeman laa reeman. ¹⁵ Abi' tëe ree bën Israel bagüjt reeman Dad Jesús, zi'cgajc bagüjt reeman bën badëed ree xtiidx Dios loj ree bejn, balaagdxa tëe reeman dunujn, ad rüjnt reeman zi'c rën Dios, abi' contzi gra bejn rdxe'ch reeman. ¹⁶ Rudxoon reeman yalüün bën ad najt ree bën Israel xhienaag gac reeman perdon, zian laagajc reeman cutioob guijc xtol reeman, abi' yan ma cadëd reeman xcastiro' Dios.

Guyën Pab nejman Tesalónica stijb

¹⁷ Compniar raliduladx ree Jesucrist, chi basa'nan lëjt tio'p choondxej, majs ad raguiaatan lëjt, per rasaaduladxan lëjt, abi' rayën nejzdoon yaguiaan lëjt stijb. ¹⁸ Dád bayënan nudganajn lëjt. Naj Pab, zien volt da't guyënan nidganan lëjt, per badxoon xindxab niajc zian. ¹⁹ Per yan sta rayënan yudganajn lëjt, din ni ralëjzan naj guial lëjt ragu' du luxdoon zagdxë. Lëjt naj dux chiinan ni rabaanë'n yubiügnë'n loj Dad Jesucrist chi gui'taman stijb. ²⁰ Lëjt naj bën rabaanë'n rlies tëedi dux valoran.

3

¹ Zeel chi badxu'n luguiedx Atenas, ad radaantran, ma rayënan yayagbeen xhienaag za'di, dxel baguieenan xgab baya'n du xtijban ni. ² Abi' baxhaal dux compniaran Timoteo, bën cayguieennë'n xchiin Dios caytie'chan xtiidxza'c Jesucrist, din yagu'man luxdoodi sudxi'chidi loj ni ma rliadxidi, ³ din ni'qui tijbidi ad zalenya't por ree guialzi ni cadëdidi, lëjt ragbee guial zian yaza'c ree. ⁴ Chi badxu'në'n lëjt, banan guial dád zien loj gualzi yadüüd ree, abi' lëjt ragbee guial laan naj ni ma gojc. ⁵ Zeel ad gudaantran, abi' guxhalan Timoteo din gagbeen xhienaag zinalidi ni rliadxidi, din rdxeban gusquiee xindxab lëjt, abi' achetri sirv nüjn ni baguieenan por lëjt.

⁶ Per yan ni ma baguiaad Timoteo ni bidganajman lëjt, ma bagojnman dunujn guial zinalidi zagdxë ni rliadxidi Jesucrist në zi'c rën lasa'di. Laaman na guial zianci yu' luxdoodi zagdxë rasaaladxidi dunujn, abi' dád ma rëndi guguaadi dunujn, zi'cgajc rayënan yaguiaan lëjt. ⁷ Zeel, compniar raliduladx ree Jesucrist, majsi graloj tarbajw në gualzi caydüüdan, per dád nix yu' du luxdoon raguiejnan guial zagdxë zinalidi ni rliadxidi. ⁸ Abi' yan mazri nix ma bayu du luxdoon guial ma bayagbeen za'dxi'chquidi loj ni zinalidi xnejz Dad Jesucrist. ⁹ Dxel xt ni'quid radxejltan xhienaag yadëen quixtëe loj Dios por lëjt, guial dád nix yu' du luxdoon lojman por lëjt. ¹⁰ Dxej

guiaal radi'n ranaaban lojman din guneeman mod yudganajn lëjt, abi' lox yanan lojdi ni ryaadx gagbeedi xcwent guial rililadxidi Jesucrist.

¹¹ Dux Dad ree Dios në Dad Jesucrist gagnë dunujn din gac yudganajn lëjt.

¹² Abi' Dad Jesucrist gagnë lëjt din gusnuu guiën lasa'di mazri, guiën tëëdi gra lasa' bejndi zi'c rayënan lëjt. ¹³ Laaman gagnë lëjt sudxi'chidi loj xnejz Dios din sudi naya sin dol lojman, dxej ni gui't Dad Jesucrist stijb con gra ree xbejnman.

4

Zi'c rën Dios guiban ree xbejnman

¹ Yan, compniar raliduladx ree Jesucrist, raza'can lëjt liaadx, rana tëën lojdi por laaman, guial zi'c nabandi yan zi'c ma balüün lëjt guibandi, din güüнди zi'c rën Dios, gol been naguiejn gol basnuu mazri guibandi zi'c rënman.

² Din lëjt ma ragbee gra ni guxhaal Dad Jesús dunujn yanan ni güüнди.

³ Ni rën Dios naj guial guibandi naya lojman, guial ad güüнди nidxuudx ree con ree bën ad najt lacheelidi. ⁴ Gol gogbee guial tijbgaj lëjt rayal guibannë lacheelidi zagdxe zi'c rën Dios con respejt, ⁵ ad chu' lacheelidi naabzi par grii xgustidi zi'c rüjn ree bën ad nünbeet Dios. ⁶ Ni'qui tijbidi ad rayalt güünnaladx lasa'di, gusquiee lasa'di güüнди xhie nidxuudx con lacheel reeman. Din dux Dad ree Dios zudëëdaman casti gra ree bën rüjn zian, zi'c ma banan lojdi zi'c ma bagojnjan lëjt. ⁷ Din Dios ad gurejdxaman dunuj ree yayajc ree xbejnman par yabajn ree nadxuudx, gurejdxaman dunuj ree par yabajn ree naya. ⁸ Zeel bën ad ridxga't ni ma banan lojdi, ad bénguidxliujtan ad ridxga'taman, Dios ad ridxga'taman, bën razaladx xSprijt duloj ree.

⁹ Yan, xcwent guial guiën lasa'di, ad ryaadxt yanan lëjt xhienin xcwentan, din lëjt gajc ma basiid por Dios xhienaag guiën lasa'di, ¹⁰ abi' laan naj ni cayüjndi con gra dux compniar ree bën rililadx ree Jesucrist niz Macedonia. Per raza'can lëjt liaadx din gusnuu guiën lasa'di mazri. ¹¹ Gol been tëë naguiejn guibannë lasa'di zagdxe, gol guyu xgab xchiindi, zi'c ma ranan lojdi güüнди dxiin, ¹² din guibandi zagdxe loj ree bën ad rililadxt Jesucrist në chitëë xhie guiyaadxidi.

Ni gac chi gui't Dad Jesucrist

¹³ Yan, compniar raliduladx ree Jesucrist, ad rayëntan guibandi sin guial gagbeedi xcwent ree bengüt, chitëë chu'nayadi zi'c ree bën ad rililadxt Jesucrist. ¹⁴ Din bal raliduladx ree guial güjtaman abi' babanman stijb, ziangajc raliduladx ree guial ree bën ma güjt, bën bililadx ree laaman, yasban Dios laa reeman por Jesucrist.

¹⁵ Zeel zi'c ma rayignia'n xtiidxaman, dunujn rana lojdi guial gra ree xbejnman, bën sta naban ree chi gui'taman stijb, ad zanedt reeman loj ree xbejnman bën ma güjt ree. ¹⁶ Din dxejzii guiguien cha' bën rniabee xhienaag gac, guiguien cha' anjl rniabee ree anjl, guiguien guibejdx xtrompejt Dios. Dxel guiat Dad Jesucrist diizd xanyabaa, abi' yaløj ree xbejnman bën ma güjt ree yaban stijb. ¹⁷ Guiáad dux compniar ree bën sta naban ree dxejzii, yadxaag ree con ree bën baban guin, dxel yo' ree ladya loj ree zaj lod yadxaag ree Dad Jesucrist. Zian yo' ree yuchu'në' reeman tiblayaa. ¹⁸ Zeel gol bagu' luxdoo lasa'di con ree diidx guin.

5

¹ Yan, compniar raliduladx ree Jesucrist, xhie dxej gac zian o goc gac zian ya, ad rüjnt naguiejn ganinan lëjt. ² Din lëjt ragbeechaaw guial zi'cgajczi ri't tijb béngubaan guxhin, chi achut rbëz laaman, zian guidxin dxej gui't Dad Jesucrist stijb. ³ Chi guiëb ree bejn: “Zagdxé zio' ree, achet gac”, dxel dxejczy gui't guialzi par laa reeman ni ad zariit reeman loj, zi'c chi rdxin hor ragnaa lén béngunaa chi ma gal xi'nman. ⁴ Per lëjt compniar, ad zëtridi loj nejzmal din guiniaaz dxej ni gui't Dad Jesucrist lëjt zi'c chi ri't tijb béngubaan. ⁵ Din graczidi ma zinal Dios, zinalidi xnejzaman, nejz nayni. Ad zunaalt ree nejz mal, nejz nacay. ⁶ Zeel ad najt guial yabajn ree zi'c tijb bénaayëjs, zi'c rüjn los demazri ree bejn, rayal yatie'ch dux baaal ree, yadxu' ree nadëdguiendxuj. ⁷ Bén zinal ree nejzmal zi'c tijb bénaayëjs, zi'c tijb bengu', zian zinal reeman nejz guin. ⁸ Per dunuj ree, guial ma zunaal ree xnejz Dios, guidib tiamp naj guial yabajn ree nadëdguien. Yadxu'dxi'ch ree loj gualrliladx ni ma raya'p ree në loj ni rën Dios dunuj ree, abi' yadxu'dxi'ch tée ree në loj ni ma raliduladx ree guial ma raya'p ree perdon. Abi' zi'c tijb xin suldad yu' xcascwix ni rutëe yaya'p tée reen zi'c tijb ni gutëe dunuj ree loj ni mal ⁹ Din ad gurejdx Dios dunuj ree par yayal ree xcastiman, gurejdxaman dunuj ree din yayal ree perdon por Dad Jesucrist, ¹⁰ bén güt por dunuj ree, din majsi nabajn ree o ma bayëjt ree chi gui'taman stijb, per yo' ree yuchu'në' reeman. ¹¹ Zeel gol bagu' luxdoo lasa'di gol been tée yudar lasa'di din gagbeedi mazri xtiidx Dios zi'c ma cayüjndi.

Ni rayal güün ree bén rliadx Jesucrist

¹² Compniar raliduladx ree Jesucrist, raza'can lëjt liaadx, gol gojp respejt Bén rusiid ree lëjt xtiidx Dios, Bén ruluü ree lëjt rnieenë tée reeman lëjt xhienaag chinalidi Jesucrist. ¹³ Gol gojc benza'c da't con laa reeman, gol guyën da't reeman por dxiin cayüjn reeman. Gol gubajnnë lasa'di zagdxé.

¹⁴ Ranaab téeen lojdi compniar, gol guneenë ree Bén ad rënt güün dxiin, gol bagu' luxdoo ree Bén ralenya'në xnejz Dios, gol been tée yudar Bén ad za'dxi'cht ree loj xnejzaman, gol gojp pacens gra reeman.

¹⁵ Gol been naguiejn ad güündi ni mal Bén rüjn ree lëjt ni mal, zagdxeli gol gojc benza'c con lasa'di në con gra ree bejn. ¹⁶ Gol badxe' luxdoodi zagdxé zianczi. ¹⁷ Ad gucwëez cwedx guiniabidi Dios. ¹⁸ Gol badëë quixtëe lojman por gra, din zian rënman güündi, lëjt najdi xbejn Jesucrist.

¹⁹ Ad rbexuudi nabeé xSprijt Dios lëjt. ²⁰ Gol bidxga' ni rniee ree Bén rudëed xtiidxaman. ²¹ Yaloj xgaj gol gogbee zagdxé xhietééznin, dxel gol been ni naj zagdxé. ²² Gol gubi'ca loj gra ree ni mal.

²³ Dios, Bén rabe'cdxe luxdoo bejn, laaman gagnë lëjt din gaquidi lojman naya guidiblagaa. Laaman gagnë xcuerpidi, gagnëman xsprijtidi në guidiblagadi din gaquidi nayadxuj lojman dxej gui't Dad Jesucrist. ²⁴ Abi' Dios güün zian, din laaman, Bén rbejdx dunuj ree par güünman dunuj ree xbejnman, rüjn xtiidxaman cumplid.

Diidx bigra ca ree loj gui'ch guie

²⁵ Compniar raliduladx ree Jesucrist, gol gurejdx gunab Dios por dunujn. ²⁶ Gol badëë xtiidx Dios da cwentan loj gra ree compniar rliadx Jesucrist. ²⁷ Abi' por laaman, naj rni lojdi rniabee téeen lëjt: Gol biil gui'ch guie loj gra ree compniar rliadx laaman. ²⁸ Dux Dad ree Jesucrist güünle' lëjt.

Gui'ch barojp guxhaal San Pabl loj ree b́en Tesalónica rliadx Jesucrist

¹ Naj, Pab con Silvan në Timoteo, cayxhaalan gui'ch guie par lějt rliadxidi Jesucrist luguedx Tesalónica, lějt najdi xbejn dux Dad ree Dios në xbejn Dad Jesucrist. ² Dux Dad ree Dios në Dad Jesucrist güünle' lějt yabe'cdxe tēe reeman luxdoodi.

Rudēed Pab quixtēe loj Dios

³ Guixie guixie radēen quixtēe loj Dios por lějt compniar raliduladx ree Jesucrist, din zian rayal yaguieenan guial mazri cusnuu rliadxidi laaman, abi' tijb gajdi mazri ma rēn lasa'di. ⁴ Zeel dád nix yu' du luxdoon raza'tan lějt loj gra ree xbejn Dios, raguie'chan loj reeman pacens ni rajpidi në guialrliadx ni rajpidi, rdaan tēedi gra ree ni rüjnnē ree bejn lějt në gra ree guialzi ni cadēdidi. ⁵ Zian rguien xnejz naj xguialguxtis Dios, guial gulejman lějt din yayalidi lod rniabeeman, din por laan cadēdidi guialzi.

⁶ Abi' guial gra ni rüjn Dios naj xnejz, zeel gudēedaman casti gra ree b́en cudēed lějt casti. ⁷ Guiáad lějt cadēdidi guialzi yan, guneeaman lějt guialraziiladx con dunujn, dxej ni gulüüloj Dad Jesucrist diizd xanyabaa galay xbianiman ni naj zi'c bajl, con ree xianjlaman b́en ca' ree mazri guialrniabee. ⁸ Dxel gudēedaman casti b́en ad bayagbeet ree Dios, b́en ad guyēnt ree nuzoob xtiidxza'c Dad Jesucrist. ⁹ Gudēedaman laa reeman casti tiblyayaa, su reeman zijt par Dios në par xguialrniabee za'cdxoonman. ¹⁰ Zian gac dxej ni gui't Dad Jesucrist, din guza't ree bejn laaman zagdxēe por ree xbejnman, yadxa tēe loj gra reeman laaman, abi' nē lějt, din ma bililadxidi xtiidxaman ni badün lojdi.

¹¹ Zeel ad racwēēzt rarejdx ranaaban Dios por lějt din gagnēman lějt guibandí zi'c rayal, zi'c guredxaman lějt guibandí. Ranaab tēen lojman guial con xguialrniabeeman gac cumplid gra xixgabzagdxedi në gra ni rüjndi guial rliadxidi laaman. ¹² Abi' zian guiliesidi xvalor Dad Jesucrist, guiáad laaman guilies xvaloridi guial laaman con dux Dad ree Dios rēn reeman dunuj ree.

2

Gulüüloj b́en ca' xguialrniabee xinxab

¹ Yan, compniar raliduladx ree Dad Jesucrist, xcwent guial gui'taman stijb në guial yadxaag ree con laaman, raza'can lějt liaadx, ² ad bal tiēbidi tibrajtzi gusquiee ree bejn lějt, b́en rēb ree ma bidxin dxej gui't Dad Jesucrist. Ad guidxebidi gucaagdiajguidi zian, o na ree bejn guial tijb sprijt rēb loj reeman zian, o dunujn baxhaal gui'ch loj reeman lod raguie'chan zian. ³ Ad tiēbidi chu gusquiee lějt, din chi gad dxej guin guidxin, yalojxgaj guidxin ree dxej ni ad zuzoobtri bejn xtiidx Dios. Abi' gulüüloj tijb b́en güün ganax ni rēn xinxab, b́en ma naj par gabijl. ⁴ Laagajc laaman guilies xvalor, abi' yalenman gra ni nünbee bejn zi'c Dios në gra ni rnaijchi' bejn zi'c dios, xt cweman lēn xyadoo Dios, abi' guiēbaman guial laaman naj Dios.

⁵ Gol basaaladx guial zian rnin lojdi chi guzunē'n lějt. ⁶ Abi' yan lějt ma ragbee chu cutēē chitēē gulüülojman, la'tgaj guidxin dxej rayal gulüülojman. ⁷ Ma cayajc ree xgabmal guin, per yu' b́en cutēē gac reen cumplid. Chi ma bisüd b́en cutēē guin, ⁸ dxel gulüüloj benmal guin, abi' Dad Jesucrist con tijbzi gulüjbaman gugüjtaman laaman, dxel con xbianiman ni guidnēman

gunidlojman laaman. ⁹ Benmal guin por xindxab gui'taman, abi' dád gapaman gualrniabee. Gūnman zien ree ni yadxaløj ree bejn, gūn tēeman zien ree milagr par gusquieeman. ¹⁰ Con graløj ree ni mal gusquieeman bēn canijt ree loj Dios, gual ad guyēnt reeman ad cwējb tēēt reeman nililadx reeman ni diidxli zile' nuslaa laa reeman loj dol. ¹¹ Zeel ruslaa Dios gusquiee gra ree ni guin laa reeman, abi' guililadx reeman ni ad najt ni diidxli, ¹² din yayal gra reeman casti, gual ad bililadxt reeman ni diidxli guin, din mazri bayuladx reeman been reeman ni mal.

Sudxi'ch reeman loj ni rliladx reeman

¹³ Compniar, rēn Dad Jesucrist lējt. Zianczi rayal yadēen quixtēē loj Dios por lējt, din diizd guia'xchej ma bacaabeeman lējt din laadi loj casti, gual ma nayadi por xSprijt Dios nē guial ma bililadxidi ni naj diidxli. ¹⁴ Par zian gurejdx Dios lējt gaquidi xbejnman chi badūn xtiidxza'c Dad Jesucrist lojdi, din yayalidi xanyabaa lod za'man.

¹⁵ Zeel, compniar raliduladx ree Jesucrist, gol guzujdxi'ch gol binal tēē ni balūūn lējt chi badxu'nē'n lējt, nē ni ma banan lojdi loj gui'ch ren. ¹⁶ Abi' Dad Jesucrist gajc nē dux Dad ree Dios bēn rēn dunuj ree, bēn ragu' du luxdoo ree zianczi, bēn banee tēē ni ralējz ree gual najman benza'c, ¹⁷ laaman yagu' luxdoodi gagnē tēēman lējt din sudxi'chidi din gra ni guinieedi gūn tēēdi gac zagdxē.

3

Rēn Pab cwedx guiniab reeman Dios

¹ Yan, compniar raliduladx ree Jesucrist, gol gurejdx gunab Dios por dunujn din diob guire'ch xtiidx Dad Jesucrist gralad, abi' guza't reeman xtiidxaman zagdxē zi'cgajc beendi. ² Gol gurejdx gunab tēēman din yabēēman dunujn loj ree benmal, loj ree bendxuudx ad nabant xnejz, din ad grat bejn rliladx xtiidx Dad Jesucrist. ³ Per laaman zianczi rūjn xtiidxaman cumplid, abi' laaman gagnē lējt din sudxi'chidi, guinia tēēman lējt chitēē gūūndi ni mal. ⁴ Dunujn rayagbeechaaw gual laaman cayagnē lējt cayūjndi gusnuu tēē gūūndi ni banan lojdi. ⁵ Gagnēman lējt din guiēndi bejn ree zi'c rēn Dios laa reeman gap tēēdi pacens zi'c gojp Dad Jesucrist pacens.

Rūjn naguiejn gūūn bejn dxiin

⁶ Yan, compniar raliduladx ree Jesucrist, por laaman ranabeen lējt: Gol bariica loj chutēēz compniar gaz za' ad rēnt gūūn dxiin, bēn ad naban tēēt zi'c balūūn lējt. ⁷ Din lējt ragbee xhienaag guibandi din guibandi zi'c nabajnan. Dunujn ad badxu'nē'tan lējt sin gual naguieenan dxiin, ⁸ achu tēēt banee xlia' ni badaawan. Lējt ragbee gual dád baguieenan naguiejn baguieenan dxiin, dxej guiaal baguieenan dxiin chitēē yalu'n xchiūndi gual gūūndi dunujn yudar din gac yabajnan. ⁹ Majsī zajc nanabeen lējt nūjndi dunujn yudar, per baguieenan dxiin par yalūūn xhienaag rayal guibandi gūūndi zi'c raguieenan. ¹⁰ Chi badxu'nē'n lējt, ranan lojdi: Bēn ad rēnt gūūn dxiin, ad zajw gajctaman. ¹¹ Per yan baguiejnan gual yu'di gaz za' ad rēntidi gūūndi dxiin, abi' rudi loj ni ad rayaltidi. ¹² Par bēn zii ree dunujn rana ranabee tēēn laa reeman por Dad Jesucrist yabedxe reeman, gūūn reeman dxiin din guiban reeman.

¹³ Guiáad lējt compniar, ad yalenya'di gūūndi ni naj zagdxē. ¹⁴ Bal yu' tijbidi ad ruzoobt diidx gual gūūndi ni ranan loj gui'ch guie, gol baguiaa chu benan,

ad guchajg tēēdi laaman din yatu lojman. ¹⁵ Per ad guguaadi laaman zi'c tijb bēn rdxe'chidi, gol baguaaman zi'c tijb bijchidi, gol guneenēman din guibanman zagdxē.

Diidx bigra ca ree loj gui'ch guie

¹⁶ Dad Jesucrist bēn rabe'cdxe luxdoo bejn, laaman yabe'cdxe luxdoodi guixie guixie nē loj gra. Laaman sunē lējt.

¹⁷ Naj, Pab, quijb naj cuca ree lejtr guie par gugajpdiozan lējt. Zian rūnan con gra ree da gui'chan, zian naj ree da lejtran. ¹⁸ Dad Jesucrist gūnle' gradi.

Gui'ch yaløj guxhaal San Pabl loj Timoteo

Rugajpdioz Pab Timoteo

¹ Naj Pab, najn tijb xiapóstol Jesucrist por xgualrniabee Dios bén rüjn perdon dux tol ree në por Jesucrist bén rayagbee ree gui't stijb. ² Cucan gui'ch guie par lüj Timoteo, din par naj lüj naj zì'cgajc da xi'nan guial tiblojzi raliduladx Jesucrist. Dux Dad ree Dios në Dad Jesucrist güünle' lüj, yayaman lüj yabe'cdxe tëëman luxdool.

Rëb Pab loj Timoteo xcwent ree bén rusquiee

³ Zi'c rnin lojl chi briin za'n niz Macedonia, guial yaya'nl guiedx Éfeso din nabeel tio'p choon ree bejn ni chitëë rulüü reeman bejn ree ni ad najt diidxli.

⁴ Ad chililadx reeman ni rbëëgujic ree bejn, ad guidxga' tëë reeman ban za reeman, o chu rajc reeman xbengol gulal reeman, din ad ni guint ree gagnë laa reeman par gusnuu chililadx reeman xtiidx Dios.

⁵ Canabeen lüj din güün reeman zian din guiguien guial diidxli rën lasa' reeman, achat naladx reeman din guiguien tëë guial guidib luxdoo reeman rliladx reeman xtiidx Dios. ⁶ Din yu' reeman ad rüjntri zian guial ganax ree ni ren ni ad rüjnt ree sirv rü reeman. ⁷ Rën reeman gulüü reeman bejn ree xhienaag naj xley Dios, abi' ni'qui laa reeman ad ragbeet xhie rën guiëb ni rniece reeman ni'quid rignia't reeman ni naladx reeman naj zagdxe culüü reeman bejn ree.

⁸ Dunuj ree rayagbee guial zagdxe naj ley guin par bén rignia' xhie sirv rüjnan. ⁹ Abi' rayagbee ree guial ad baneet Dios ley guin par ree bén naban xnejz niz lojman, baneeman ley guin par téd ree bejn casti, bén naban ree zi'ctzi naj xixgab reeman, bén ad ruzoobt ree diidx, bén ad yu'gujict ree Dios, bén rüjn ree dol, bén ad rajpt ree Dios respejt, bén ad rüjnt ree naguiejn guiën reeman Dios, bén rugüjt xdad xniaa, në par gra ree bén rugüjt bejn, ¹⁰ rüjn tëën sirv par xcasti ree bén za'në xinguaaw o béngunaa ren, par ree xin ruladx lasa' xinguaaw gajc o béngunaa ruladx lasa' béngunaa gajc, në par ree bén rban bejn ree par guto' reeman laa reeman zi'c mojs, nētëë par ree bén rusquiee në ree bén ruza't Dios par sudxi'chnë xgualrusquiee reeman në par gra ree bén rüjn xcontr ni naj diidxli. ¹¹ Diidxli guie ree naj ni zëéd ree loj xtiidxza'cdxoon Jesucrist. Dux Dad ree Dios, bén rayal respejt, laaman naj bén basa'nnë naj diidx guin ree din gatiechan laa reen.

Xhienaag baya Dios Pab

¹² Quixtëë Dad Jesucrist laaman cayagnë naj, rajp tëëman naj confianz abi' bacaabeeman naj par gatiechan xtiidxaman, ¹³ majsi yaløj gunen laaman diidxgujidx abi' guzunaalan bén rliladx ree laaman din günan laa reeman ni mal abi' dád naya bennë'n laa reeman. Per Dios bayaman naj guial ad bignia'tan ni cayünan din gad naj chililadx Jesucrist. ¹⁴ Abi' dád benza'c gojcaman con naj, balüüman naj xhienaag chililadxan balüü tëëman xhienaag güënan Dad Jesucrist.

¹⁵ Diidxli ni ganin lëjt, rayal chililadx bejn: guial Jesucrist bi't loj guidxliuj par güünman xtol bejn perdon, abi' loj gra ree bejn naj naj mazri béndol.

¹⁶ Per majsi najn mazri béndol, baya Dios naj abi' gojp Jesucrist naj pacens din gagbee ree bén chililadx xhienaag rajp Jesucrist pacens par chililadx

bejn xtiidxaman, abi' zian gap reeman guialnaban tiblayaa con Dios. ¹⁷ Zeel zianczi rayal yaya'p reeman respejt yaza't tēē reeman zagdxē guial najman rey bēn ad yu't dxej guiēt, abi' rajpaman guialrniabee par tiblayaa guial tijbzi laaman naj Dios abi' achut rajc ruguiaa laaman. Amēn.

¹⁸ Timoteo, par naj lūj naj zi'c da xi'nān zeel rnin lūj been zi'c guneē reeman xcwentil diizd yaloj, abi' zi'c tijb suldad ni rej loj wadijl ad guidxebil niz loj ree bēn za' ree contr xtiidx Dios. ¹⁹ Guzudxi'ch loj ni rliladxil Jesucrist, been tēē ganaxzi ree xgab zagdxē par gūūnl zi'c rayal. Din yu' ree bejn guial ad rūjnt reeman zian, yan ma baniyt reeman ni rliladx reeman Dios. ²⁰ Zian ma guzajc ree Himeneo con Lejandr, zeel ma bayūn laa reeman loj satanās din gusiid reeman guial ad rayalt guinieē reeman Dios diidguijdx.

2

Xhienaag cwedx guiniab bejn Dios

¹ Yalojdoo ni rnin lojdi naj guial cwedx guiniabidi Dios, cwedx guiniabidi laaman por gra ree bēnguidxliuj, gudēēd tēēdi quixtēē lojman. ² Rayal yarejdx yanaab ree Dios por ree rey nē por gra ree guxtis loj guidxliuj din chilē' yabajn ree zagdxē gusnuu tēē yabajn ree zi'c rēn Dios. ³ Din laan naj ni zagdxē ni rayuladx tēē dux Dad ree Dios, bēn rūjn perdon dux tol ree, ⁴ bēn rēn guial gra bejn gac perdon guidxin tēē dxej gagbee bejn xhie rēn guiēb xtiidxliman. ⁵ Din tijbzi laaman naj Dios, abi' por tijbzi Jesucrist zile' yaya'p ree nejz par loj Dios guial bi'taman loj guidxliuj zi'cgajc tijb bēnguidxliuj. ⁶ Gūjtaman loj crūjz persi gudijxaman por xtol gra ree bēnguidxliuj, zian naj ni balūū Dios bejn chi bidxin dxej bacaabeeman gac zian. ⁷ Zeel bacaabeeman naj gacan xi apōstol Jesucrist din gatiechan xtiidxaman, nē par gusidan bēn ad najt ree bēn Israel conin naj diidxli, xhie tēē naag chililadx reeman Jesucrist, walin ad rusquieetan.

⁸ Yan rēnan guial guidibczi cwedx guiniab ree xinguaaw Dios, guilies yaa reex con guidib luxdoo reex sin dol, sin guialrdxe'ch nē sin wadijl. ⁹ Rēn tēēn guial ree bēngunaa su reeman zi'c rayal, ad tēdlaj suchaaw reeman con or, nē ree perl nē ree vistid zagdxē o guial tēdlaj gūūnchaaw guidxguijc reeman. ¹⁰ Din mazri zagdxē gūūn reeman ni naj zagdxē, zi'c rayal gūūn ree bēngunaa ni ma zinal xnejz Dios. ¹¹ Abi' rayal gucaagdiajzgi reeman ache guinieē reeman chi rulūū ree xinguaaw xtiidx Dios. ¹² Din ad zatiēēbtan guial gulūū tijb bēngunaa bejn ree chi radxaag lasa' reeman par gucaagdiajg reeman xtiidx Dios, ad rayalt nabee bēngunaa xinguaaw, rayal gucaagdiajgzaman. ¹³ Din Dios, yaloj Adān beenchaawaman, dxelri Eva. ¹⁴ Din ad Adānt basquieē reeman, yaloj Eva basquieē reeman, abi' por guialrusquieē guin beenman dol. ¹⁵ Per zajc gac bēngunaa perdon, bal gūūn xchiinman zagdxē guial najman na, bal gusnuu chililadxaman Dios, guiēnman bejn ree guiban tēēman xnejz.

3

Xhienaag guiban ree bēn rniabee

¹ Gol badxe'guijdx da diidxan: Bal chu bēn rēn gap guialrniabee loj gra ree bēn rliladx Jesucrist par gulūūman laa reeman xnejz Dios, zagdxēqui naj ni rēnan gūūnman. ² Per bēn rajp guialrniabee guin rayal gūūnman zi'c rayal chitēē chu guinieēguijdx laaman. Rayal chu' tijbzi lacheelaman, guibanman zagdxē chu' tēē xquiargueijnman din gap ree bejn laaman

respejt. Gacaman benza'c con ree bèn rdxin lidxaman, gac tēēman tijb bèn rignia' par gulūūman bejn ree. ³ Ad rayalt gacaman bengu', ni'qui bèn rguuil wadijl ad rayal tēēt yaguuilaman mod par tia'man xmilia ree bejn, rayal gacaman benza'c con chutēēz, gac tēēman bèn naxanladx ad zazēēbladx tēētaman milia. ⁴ Rayal nabee lidxaman zi'c rayal din gulūū ree xi'nman xhienaag gap reex respejt guzoob tēē reex diidx. ⁵ Din bal id rajc rniabee lidxaman, ¿xhieza naag nabeeman bèn rliladx ree Jesucrist? ⁶ Zeel tijb bèn qui guzuløjri rliladx Jesucrist, ad rayalt nabeeman loj ree bèn ma rliladx chitēē guilies xvalor gajcaman abi' yayalaman lasa' casti ni bayal xindxab. ⁷ Bèn rajp guialrniabee guin xt ree bèn ad rliladx Jesucrist rayal gūūnbee laaman guial najcaman benza'c chitēē yaya'nxtuman abi' gūūn xindxab laaman gan.

Ni gūūn ree bèn rŷjn yudar bèn rniabee ree

⁸ Yan ziangajc ree bèn ma cwabee par gūūn reeman yudar bèn rniabee ree, rayal gūūn reeman zi'c rayal din gap ree bejn laa reeman respejt, gūūn cumplid xtiidx reeman, ad guiē' tēē reeman, ad yaguuil tēē reeman mod par tia' reeman xmilia ree bejn. ⁹ Con xgabza'c chinal reeman ni ma balūū Dios dunuj ree. ¹⁰ Zeel yaløjxgaj rayal gac reeman prueb abi' bal id xhie xfalt reeman, dxel ma zile' guzuj bejn laa reeman din gūūn reeman yudar bèn rniabee ree. ¹¹ Ziangajc ree bēngunaa ni ma cwabee par gūūn reeman yudar, rayal gūūn reeman zi'c rayal din gap bejn laa reeman respejt ad zaneeguidxt reeman bejn, rayal guiban reeman zagdx abi' gūūn cumplid xtiidx reeman. ¹² Abi' ree xinguaaw cwabee guin par gūūn reex yudar bèn rniabee loj ree xbejn Cristo, tijbzi lacheel reex rayal chu', nabee tēē lidx reex con xi'n reex zi'c rayal. ¹³ Din bèn rŷjn ree sirv zi'c rayal ad respejtzi rajp bejn laa reeman, sin guialrdxeb ma zile' guiēb reeman xhienaag rliladx reeman Jesucrist.

Naroob naj bèn raliduladx ree

¹⁴ Gagnē Dios chile' guialan guidganan lŷj. Per cucas gui'ch guie, ¹⁵ din bal gaglaan ma ragbeel xhienaag guiban bejn delant loj los demasri ree xbejn Dios, bèn ma naj ree xbejn Dios naban, abi' za'dxi'ch reeman rulūū tēē reeman xtiidxliman. ¹⁶ Dunuj ree rayagbee guial dād bèn narooob najman, bèn raliduladx ree: Bi'taman loj guidxliuj zi'c tijb bēnguidxliuj, rēb xSprijt Dios guial laaman naj bèn naya abi' baguiaa ree anjl laaman bi'taman loj guidxliuj. Bre'ch xtiidxaman loj ree bèn ad najt bèn Israel, guidibczi bililadx bejn laaman abi' baca' Dios laaman xanyabaa.

4

Bèn rusa'n ree guialrliladx reeman Jesucrist

¹ Ma bagojnchaaw xSprijt Dios guial zēēd ree dxej ni yu' ree bejn gusa'n guialrliladx reeman Jesucrist, mazri guidxga' reeman xtiidx ree bēnrusquiee nē gra ree ni zēēd por xindxab. ² Mazri guidxga' reeman bēnrusquiee ree, bèn wed rŷjnz ree, bèn achetri ree rzajc guial rŷjn reeman dol din ma naya' reeman zian. ³ Guiēb reeman guial ad najt guial guxhliaa ree bejn ad zajw tēēt reeman graloj. Per Dios badxe' graloj guialraw par gaw ree bèn rliladx laaman, bèn ma ragbee ree conin naj diidxli abi' gudēēd reeman quixtēē lojman. ⁴ Din gra ni badxe' Dios naj zagdx, achet ni rayal cwexuu bejn

tia'man bal gudëeman quixtëe chi cayawaman laan. ⁵ Din chi rarejdx ranaab ree Dios con xtiidxaman rüjnle'man guijc ni yadaaw ree.

Bén rüjn sirv zagdxe loj Jesucrist

⁶ Zeel bal rulüül bén rililadx ree Jesucrist zi'c ma rnin, dxel cayünquil sirv Jesucrist zi'c rayal, abi' zian gusnuu gusiidil mazri guial loj ni ma rajquil xcwent guialrililadx guin në ree diidxxa'c ni zinalil. ⁷ Per ad guidxga'l ni rbëëguijc ree bejn, ni ad najt ree diidxli por Dios, meyorli basnuu basiid sudxi'chil guibanl zi'c rën Dios. ⁸ Zagdxe naj par güün bejn galoj ejercijs par gacaman gojl, per loj gra xhietëëznin mazri lasajc guiban bejn zi'c rën Dios. Din ad lojtzí guidxliuj guie güün sirv guial naban bejn zi'c rën Dios, nëgajc xanyabaa lod gap bejn guialnaban tiblyaa. ⁹ Dunuj ree rayagbee guial ni diidxli naj ree diidx guie, abi' rayal chililadx gra bejn laan. ¹⁰ Zeel majsi cayza'can ni cayza'can, per cayguieenan ni cayguieenan guial raliduladxan Dios naban, bén naban par güünman yudar gra ree bejn, per mazri bén rililadx ree laaman.

¹¹ Zian rayal gusiidil bejn ree güjdx tëe loj reeman din güün reeman zian. ¹² Gojp cudad chitëe guiëb ree bejn guial achet sirv lüj guial ad wayajctil bengol. Meyorli been naguiejn din gaquil tijb ejempl par ree bén rililadx Jesucrist, zi'c xhienaag rül diidx, zi'c nabanl, zi'c rënl ben ren ree, zi'c rililadxil Dios nëtëe por ree xixgabza'quil. ¹³ La'tgaj guialan, basnuu biil xtiidx Dios loj ree bejn, guneeñ reeman balüü tëe reeman xhie rën guiëb xtiidx Dios. ¹⁴ Ad yayanladxil güünl zi'c rayal güünl por quiarguejn ni banee Dios lojl chi badxiib yaa ree bengol guijquil chi gogbee reeman guial lüj naj bén gule Dios.

¹⁵ Badxe'guijc diidx guie ree din gagbee gra ree bejn guial cusnuu zël delant. ¹⁶ Gojp lüj con ni rusiidil bejn ree. Guzujdx'i'ch loj ni ma ragbeel, zian yabëe lüj gajc loj casti yabëe tëel bén cucaagdiajg ree xtiidxil.

5

Xhienaag güün Timoteo con ree bén rililadx Jesucrist

¹ Ad tilnël tijb bengol, badëeman consejw zi'cgajc xdadil, abi' xin naj ree xinguiag, badëe reex consejw zi'cgajc bijchil. ² Ziangajc béngunaa bengol ree badëe reeman consejw zi'cgajc xniaal, abi' biinguiag ree, badëe reem consejw zi'cgajc bizanl con xgabza'c.

³ Bidxga' ree béngunaa bizëjb ni diidxli achut rajp. ⁴ Per bal tijb béngunaa bizëjb guin yu' ree xi'n o xiajg, dxel yaløj laa reex gusiid guidxga' xfamil, güün reex yudar din yaguijx reex ni baslaa xdad xniaa reex laa reex. Din zian naj zagdxe, zian tëe ruladx Dios. ⁵ Béngunaa naj diidxli bén bizëjb, bén ad rajptri chunin loj guidxliuj guie, tijbzi Dios naj bén yu'guijcaman güün laaman yudar dxel ad rucwëët rbejdx rniabaman laaman dxej guiaal. ⁶ Per tijb béngunaa bizëjb ni rüjn ni rëntzi, laaman naj zi'c tijb bengüt guial ad yu'guijctaman Dios. ⁷ Bagojn gra ree diidx guie bén ma rililadx ree Jesucrist chitëe chu guinieeguidx laa reeman. ⁸ Din bén ad rüjnt yudar xcompniar, abi' ni'qui xfamilaman bén zojb ree lidxaman ad rüjntaman yudar, laaman ma basa'n ni rililadxaman abi' piorli najman guial loj ree bén ad rililadx Jesucrist.

⁹ Ad tia'l laj chutëez béngunaa bizëjb par gac reeman yudar, naabzi ree béngunaa bizëjb bén ma nadëd ree gayojn ijz abi' ad guzunëtaman ben ren la'tgaj naban lacheelaman. ¹⁰ Bal nünbee tëe ree bejn laaman guial beenman

ganax ree ni rüjn sirv, bal baslaa ree xi'nman zi'c rayal, bal badëe lidxaman baya'n ree bejn bal gojcaman benza'c con ree bén rililadx Jesucrist bén bidxin ree lidxaman, bal beenman yudar bén rzagdiaj ree, bal been tëëman naguiejn beenman ganax ni zagdxe.

¹¹ Per ad tia'l laj ree béngunaa bizëjb benguiag ree, din despuejs rën reeman guxhliia reeman abi' ad rüjntri reeman ni rayal güün reeman por Cristo guial rën reeman guxhliia reeman stijb. ¹² Dxel rüjn reeman dol guial ad rüjntri reeman ni ma been reeman compromis con Cristo. ¹³ Abi' tëë ree benguiag guin zë reeman yu yu, zianz rajc reeman costumbr achetczy rüjn reeman. Abi' ad laatzan, rzuloj ruza't reeman bejn, ru reeman loj xhietëëznin abi' rniee reeman ni ad rayalt guiniee reeman. ¹⁴ Zeel rënan guial bén naj ree béngunaa bizëjb benguiag, mejorli guxhliia reeman stijb, chu' xi'n reeman nabee tëë lidx reeman zi'c rayal, chitëë gudëed reeman mod guinieeguidx ree bén ralen ree dunuj ree laa reeman. ¹⁵ Din yu' ree béngunaa bizëjb ma guro'nladx reeman xnejz Dios abi' ma zinal reeman xnejz xindxab.

¹⁶ Abi' bal tijb bén rililadx Jesucrist naj xfamilaman tijb bén baya'n bizëjb, dxel laaman rayal güün yudar béngunaa bizëjb guin chitëë gacan mazri carg par ree dux compniar ree bén rililadx ree Jesucrist. Zian güün reeman yudar béngunaa bizëjb diidxli achutri rajp loj guidxliuj guie.

¹⁷ Bén rililadx ree Jesucrist rayal gap reeman respejt bén rniabee laa reeman në ree bén rniee rulüü tëë xtiidx Dios zi'c rayal, gudëe tëedi loj reeman gra ni ryaadx reeman. ¹⁸ Din loj xtiidx Dios rëb: “Ad gudxe'di guijxh ro' ree begui'xh la'tgaj cayüjn reeb dxiin”, rëb tëë loj xtiidx Dios: “Rayal gax bën rüjn dxiin”.

¹⁹ Ad guidxga'di ni rudxiib ree bejn guijc tijb ree bén rniabee ree bén rililadx Jesucrist, bal id yu' tio'p choon ree bejn rëb guial diidxli naj ni rniee reeman por laaman. ²⁰ Per bal tijb bén ma ca' guialrniabee rusnuu rüjnman dol, rayal guinieenël laaman delant loj gra reeman din guidxeb los demazri reeman.

²¹ Yan por Dios, por Jesucrist në por ree anjl ni ma gulejman, naj rni badxe'guijc been tëë zi'c ma rnin ad cwel loj ree bejn, tiblojzi been con gra reeman. ²² Gojp cudad cwel tijb bén ni nabee din ad ragbeetil bal yu' ni mal cayüjnman, dxel güün ree bejn xgab guial nëgajc lüj ruladx ni cayüjnman. Gojp cudad graloj ree dol.

²³ Në guial guië't guië't ragxuu lënl guial ad nadaant lënl, ad rë'l nijs lagajzi mejorli gu' tibda'n vin.

²⁴ Yu' reeman laa rguien gajc xhie dol cayüjn reeman diidz chi gad reeman gudëed cwent loj Dios, per yu' reeman ad rguient xhie dol cayüjn reeman xt chi yadëed reeman cwent loj Dios. ²⁵ Ziangajc yu' ree bén ni laa rguien gajc ni zagdxe ni cayüjn reeman, abi' yu' reeman ni'quid rguient ni zagdxe ni cayüjn reeman, per yu' dxej gagbee ree bejn laan.

6

¹ Gra ree mojs rayal gap reeman respejt xpatron reeman chitëë chu guiniee diidxguijdx contr Dios o contr xtiidxaman ni caylüün. ² Abi' bal rililadx patron guin Jesucrist dxel rayal gap reeman laaman mazri respejt guial nëman rililadx Jesucrist zi'cgajc laa reeman. Abi' tëë rayal güün xchiin reeman zi'c rayal guial cayüjn reeman sirv tijb xcompniar reeman bén rililadx Jesucrist compniar ni rën reeman. Zian balüü ree bejn güjdx tëë loj reeman din güün reeman zian.

Guialnaza'c ni naj diidxli

³ Bal yu' bén rulüü diidx ni ad najt zi'c xtiidxza'c Dad Jesucrist ni'qui zi'c raliduladx ree Jesucrist ad rulüütaman bejn ree, ⁴ najzaman bendxal. Din ruladxaman tildiidxaman abi' ni'quid xnejt rnieeman, dxel ni zëed guialnadëdloj, guial rdxe'ch, guial rniee diidxguijdx abi' ad rliadxtri lasa' reeman, ⁵ ad rucwëzt rdil reeman por ree ni ad rüjnt sirv ni yu' guijc reeman guial ad ragbeet reeman ni naj diidxli, dxel naladx reeman guial chililadx reeman Jesucrist ma gac reeman ben rijcw. Bén naj ree zian, biquied loj reeman. ⁶ Dad ben rijcw naj bejn chi ma rliadxaman Jesucrist, per bén za' conform con ni rajptzaman. ⁷ Din achet budnë' ree loj guidxliuj ache tëet zajc yunë' ree chi yayëjt ree. ⁸ Bal raya'p ree ni yadaaw ree në lajd ni yadojt ree con laan rayal yaya'n ree conform. ⁹ Per ree bén rzëëbladx gac reeman rijcw loj guidxliuj guie ad rilet' sudxi'ch reeman, laa rüjn gajc xindxab laa reeman gan. Mazri rüjn reeman xgab ni ad rüjnt sirv abi' rüjn reeman ni ad rayalt güün reeman ni rüjn persi rnijt reeman. ¹⁰ Din guial rzëëbladx milia laan naj xliuj gra ni mal. Abi' yu' reeman por guialrzëëbladx guin ma basa'n reeman ni rliadx reeman Dios abi' laagajc reeman cusagdiaj laa reeman.

Ni rayal güün Timoteo

¹¹ Per lüj Timoteo, xbejn Dios, briica loj ree ni mal guin. Been naguiejn guibanl zagdx, guibanl zi'c rën Dios, bililadxaman, gojc bén naxanladx, gojp pacens guyën tëe ree ben ren. ¹² Been da't naguiejn guzudxi'ch loj ni rliadxil xtiidx Jesucrist. Ad gusëëbil guialnaban ni naj guialnaban tiblayaa, din par zian gulejman lüj abi' rëbil delant loj zien ree bejn xhienaag rliadxil Jesucrist. ¹³ Yan, por Dios bén razaladx guialnaban loj gra ni yu' loj guidxliuj në por Jesucrist bén ni guneë sin guialrdxeb loj Poncio Pilato, naj rniabee lüj ¹⁴ din guzoobil diidx güünl ni rnin lojl, sin guial guchaal xhienin chitëe guiëb ree bejn guial ad cayüjntil xnejz. Zian been xt dxej ni gui't Dad Jesucrist stijb. ¹⁵ Gui'taman dxej ni nabee Dios gui'taman, Dios bén rayal respejt bén naj tijbzi Dios rajp tëeman gra guialrniabee, bén naj xrey ree rey naj tëeman xDad ree dad. ¹⁶ Bén ni ad yu't dxej guiët, Bén ni za' lod mazri nayni lod achut zajc chibig. Ni'qui tijb bënguidxliuj ad waguiaat laaman ad zajc tëet guguaiaa bejn laaman. ¡Par laaman naj respejt në guialrniabee par tiblayaa! Amén.

¹⁷ Bén naj ree benrijcw loj guidxliuj guie, güjdx loj reeman ad güün reeman benro' ad cu'guijc tëe reeman guial ni rajp reeman najn par tiblayaa, din guialnaza'c ni rajp bejn yu' dxej yaran. Mejrli cu'guijc reeman Dios bén naban din laaman razaladx da't dunuj ree graloj din chu' du luxdoo ree nix. ¹⁸ Güjdx loj reeman din güün reeman ni zagdx, güün reeman zien ree ni rüjn sirv, cu' tëe luxdoo reeman zagdx güün reeman yudar bënprob ree. ¹⁹ Abi' zian guto'p reeman guialnaza'c ni güün laa reeman yudar loj ree dxej ni zëed din yayal reeman guialnaban tiblayaa xanyabaa.

Xconsejw Pab

²⁰ Timoteo, badxe'guijc ni rayal güünl, Ad guidxga'l diidxdxuudx ree xcwent ree ni ad rüjnt ree sirv, ni'qui ree diidx rusquiee, ni'qui ree diidx ni rü ree bén ni naladx guial rajc da't reeman abi'za ad walit ni rajc reeman. ²¹ Din yu' ree bén rüjn zian yan, abi' ma basa'n reeman guialrliadx reeman Dios.

Dios güünle' lüj Timoteo. Amén.

Gui'ch barojp guxhaal San Pabl loj Timoteo

Rugajpdioz Pab Timoteo

¹ Naj Pab, najn tijb xi apóstol Jesucrist, Dios gule naj din gatiechan diidx por promeys ni beenman guial gudëédaman guialnaban tiblyaa loj ree bën rliadx Jesucrist. ² Naj caxhal gui'ch guie par lüj Timoteo bën rënan zi'c da xi'n'an. Dux Dad ree Dios con Dad Jesucrist güünle' lüj, yayaman lüj, yabe'cdxe tëëman luxdool.

Guialrülüü xcwent Jesucrist

³ Dxej guiaal chi rbedx rniaaban Dios, rusaaladxan lüj, abi' rudën quixtëë loj Dios, bën rünan sirv con guidib luxdon zi'c been ree da bengol gulalan been reeman laaman sirv. ⁴ Chi rusaaladxan ni biinl, ma rën nejzdoon guguan lüj din yayu luxdon zagdxe. ⁵ Yu'guican guial lüj diidxli rliadxil Jesucrist, yaloj xnaxüsil Loida con xniaal Eunice bililadx laaman zian, zeel ragbeechaawan guial ziangajc rliadxil laaman.

⁶ Zeel rnin lojl, been naguiejn din guiguien quiarguiejn ni banee Dios lojl chi badxib yan guijquil. ⁷ Din ad baneet Dios xSprijtaman duloj ree par yadxeb ree, banee xSprijtaman par yadxu'dxi'ch ree, par yayën du lasa' ree, në par yaya'p ree tijb quiarguiejn zagdxe. ⁸ Zeel ad yatul guinieel xtiidx Dad Jesucrist, ad yatu nëtëël naj yu'n ladxguuib por laaman, con xyudar Dios gudaan guialzi ni rayal tëdil guial gutie'chil xtiidxza'c Jesucrist. ⁹ Din Dios ma beenman perdon dux tol ree abi' ma gulejman dunuj ree din yabajn ree zi'c rënman, ad por ni baguient ree, diidx chi gad guidxliuj gacchaaw beenman xgab guial por Jesucrist gulüüman dunuj ree xhienaag rënman dunuj ree. ¹⁰ Yan bi't Jesucrist bën güit por dux tol ree, rayagbee ree guial diidxli rën Dios dunuj ree. Abi' Jesucrist naj bën biquied guialrniabee loj guialgüjt abi' zian biguien guial yu' guialnaban, guialnaban tiblyaa par ree bën rliadx xtiidxaman.

¹¹ Zeel gulej Dios naj din gacan xi apóstol Jesucrist, din ganen xtiidxaman gulü tëen laan bën ad najt ree bën Israel, ¹² abi' por zian cadëëdan guialzi ni cadëëdan. Per ad ratutan por zian, din naj ragbee chu rliadxan, abi' ragbeen guial laaman rajp guialrniabee par cu'chaawaman ni basa'n'an lojman xt dxej ni gui'taman stijb.

¹³ Badxe'guijc binal tëë ree diidxza'c ni ma balün lüj, tant zi'c rliadxil Dios në zi'c rën ree lasa'l guial ma nayajc ree tijbzi con Jesucrist. ¹⁴ Abi' con xyudar xSprijt Dios bën naban con dunuj ree, gojp ni banee Dios güünl.

¹⁵ Lüj ragbee guial gra ree bën zojb niz Asia ma gulëëladx reeman naj, loj reeman no'ch Figelo con Hermógenes. ¹⁶ Dios gagnë ree xfamil Onesíforo, din laaman dád zien volt bagu'man luxdon. Abi' ad batunëtaman naj yu'n ladxguuib, ¹⁷ naabzi bi'taman Rom baguüilaman naj xt lodzi badxejlaman naj. ¹⁸ Abi' lüj ragbee guial dád beenman dunuj ree yudar chi badxu' ree Éfeso. Xi nix chi gui't Dad Jesucrist stijb, yaya da'taman laaman.

2

Zi'c tijb xsuldad Jesucrist

¹ Guiáad lüj xi'ngaan, guzujdxi'ch loj yudar ni raya'p ree por Jesucrist.
² Abi' ni biguiejnl rën delant loj zien ree bejn, balüün loj ree bën diidxli rliiladx, bën ni zajc gulüü ree ben ren.

³ Zi'c tijb suldadza'c, zian gudaan ree guialzi, zi'c najl xbejn Jesucrist.
⁴ Ni'qui tijb bën naj suldad ad rut loj ni ad najt xcwënt ree suldad par chile' yaya'nman zagdxë loj bën rniabee laaman. ⁵ Ziangajc bën ni rguijt xhie tijb nin, rayal quitaman xnejz din chile' tia'man prem. ⁶ Abi' bën rüjn dxiin dajn, yalox xgaj rüjn da'taman dxiin din gac yaca'man guialnaza'c. ⁷ Been xgab ni canin lojl, abi' Dad Jesucrist gagnë lüj din chignia'l gra. ⁸ Basaaladx Jesucrist, bën gü't abi' babanman, bën zëed loj xdiaa rey Davi, zian naj xtiidxza'caman ni catiechan. ⁹ Abi' por zian cadëedan guialzi, xt naxiin lën ladxguuib zi'c tijb benmal, per xtiidx Dios ad naxiitan. ¹⁰ Zianan zeel rdaanan gra par günan yudar bën ni ma naj ree par Dios, din gap reeman perdon por Jesucrist yalay tëe reeman guialnaban za'cdxoon ni naj par tiblayaa.

¹¹ Waliqiu ree diidx ni rëb:

Bal ma bayëjt ree con laaman,
 ziangajc yabajn ree con laaman.

¹² Bal radaan ree xhietëez ni raza'c ree,
 ziangajc yanabee ree con laaman.
 Bal raguie'ch ree guial ad naguieenbeet reeman,
 ziangajc guiëbaman guial ad nünbeetaman dunuj ree.

¹³ Bal id raguieen ree cumplid dux tiidx ree,
 per laaman rüjn cumplid xtiidxaman
 din ad zajct guidxaa zi'c najman.

Tijb bën raya'n zagdxë con xchiin

¹⁴ Güjdx loj ree bejn din gusaaladx reeman ni guie ree, abi' por Dios güjdx loj reeman guial ad rdildiidx reeman por ree ni ad rüjnt yudar, ruxhiinzan bën ni riguejn ree laan. ¹⁵ Been xt lod chile' güünl din yaya'n'l zagdxë loj Dios, din chibiguil lojman zi'c tijb bën ni rüjn dxiin abi' achet ni gustu laaman, guial cayüjnl xnejz con xtiidx Dios. ¹⁶ Ad gü'l diidx ni ad rüjnt sirv, ni ad rüjnt yudar bejn ree. Din bën rüjn ree zian zi'cri zinal reeman nejz mal, ¹⁷ abi' xtiidx reeman naj zi'c tijb guialgujdx ni rigaa. Lasa' ree bën guin naj Himeneo con Fileto, ¹⁸ din ad zinaltri reeman zi'c naj xtiidx Dios. Rëb reeman guial xcwënt guial yaban ree bengüt mal gudëd gojc zian, abi' rüjndxa reeman xguialrliladx tio'p choon ree bejn. ¹⁹ Per xtiidx Dios ad zajct guidxaan zi'c tijb guiaj ni zojbdxi'ch. Abi' loj xtiidx Dios rëb: "Dios nünbee bën naj ree xbejnman", rëb tëe loj xtiidxaman: "Graczi ree bën rëb guial nünbee reeman Dios rayal gusa'n reeman gra ni mal."

²⁰ Lën tijb yu narooob, ad ganaxt ree ni or yu' o ni plajt, nëgajc ree ni goc con yag në con bajn yu'. Din yu' reen rüjn sirv guixie guixie, yu' tëe reen ma naj dxej rüjn reen sirv. ²¹ Yan ziangajc bën ni rüjn naguiejn guiban naya, laaman naj zi'c ni rüjn sirv chi rajc xhienin, laaman ma naj xbejn Dad Jesucrist në ni güün sirv par laaman, din za'man par güünman gra ni naj zagdxë.

²² Zeel basa'n xixgab xinguiai, xgab ni ad rüjnt sirv, gubajn xnejz. Binal guialrliladx, guialrën lasa' në guial yabedxe luidoo con los demasri ree bën ni con guidib luidoo rbejdx rniab Dad Jesucrist. ²³ Ad tildiidxil por tijb ni ad züjntil gan, o por tijb ni ad lasajct par tildiidxil, din lüj ragbee guial por zian rzuloj wadijl. ²⁴ Abi' tijb bën ni rüjn sirv Dad Jesucrist ad rayalt gacaman bën ruladx wadijl, rayal gacaman benza'c con chutëez, rayal gacaman tijb

bén ni gac guluü ree bejn, gacaman bén pacens ²⁵ guzuxnejz tëëman con ree diidxzagdxe bén ni rüjn ree xcontr ni naj diidxli. Abi' rupent zian güün Dios guial yayüjn reeman xgab din gagbee reeman ni naj diidxli. ²⁶ Par laa reeman loj xtramp xindxab ni rniabee laa reeman güün reeman ni rënman.

3

Xhienaag gac ree bejn dxej ni bigra ree

¹ Rayal tëë gagbeel Timoteo guial dxej ni bigra ni zëed ree, dád nawëëg gacan par ree bejn guial guiban reeman. ² Din bejn ree, par laagajc reeman güün reeman xgab, ganaxzi milia güün reeman xgab, abi' güün reeman benro', ganax ree diidxdxal guiniee reeman, guinieeguijdx reeman Dios con ree bejn. Ad zuzoobtri xtiidx ree xdad reeman o xniaa reeman, achetri yayuladx reeman, ad zidxga'tri reeman ni naj por Dios, ³ ad zëntri reeman ad zaya tëëtri reeman bejn ree. Ganax diidx rusquiee guiniee reeman bejn ree, ad zucwëëzt güün reeman ni dxuudx ree, dád bén nayaaladx gac reeman, abi' guidxe'ch reeman ni naj zagdxe. ⁴ Yayü reeman laagajc ree bén ni rajp laa reeman confians, sin gualrdxeb guiniee reeman xhietëëz ni gui't guijc reeman, dád guilies xvalor reeman, mazri ma güün reeman ni rëntzi reeman guial loj zi'c rën Dios. ⁵ Guluü guial dád benyadoo naj reeman, per ni'quid zaliladxt reeman xgualrniabee Dios.

Ad guchajguil bén ni naj ree zian. ⁶ Din loj reeman no'ch bén ni ru ree lidx ree bejn, abi' rüjn reeman gan béngunaa ni naban ree con gadxagayaa ree dol, con gadxagayaa ree xgab ni ad rüjnt sirv, tibrajtzi rililadx reeman laa reeman ⁷ béngunaa guin ree zianczi rusiid reeman, per ad ragbeetci reeman ni diidxli. ⁸ Gulal bén ni brii ree laj Janes con Jambres been xcontr reeman Moisejs. Yan ziangajc naj ree bén ni za' ree contr ni naj diidxli, laa reeman ma guxin xquiarguejn reeman, ad zinaltri reeman zi'c rayal chililadx reeman. ⁹ Per ad xchejt güün reeman zian, din gra ree bejn gagbee guial rusquiee reeman zi'c goc con Janes në Jambres.

Rniabee Pab sudxi'ch Timoteo loj ni basiidaman

¹⁰ Per lüj Timoteo, ragbeel zagdxe xhie rulün bejn ree, xhienaag naban, xhienaag naj da xgaban, xhienaag rililadxan, xhienaag ra'pan pacens, xhienaag rënan bejn ree, xhienaag rdaanan, ¹¹ xhie ma been ree bejn naj, xhie tëë ree gualzi ma gudëëdan. Lüj ragbee xhienaag guza'can luguiedx Antioquia, Iconio con Listra. Dád ma guzaagdiajn por gra ni ma been ree bejn naj, per Dios babëë naj loj gra ree gualrzagdiaj guin. ¹² Abi' dunuj ree rayagbee guial gra ree bén ni rën guiban zi'c rën Dios gualrliladx reeman Jesucrist, naj sagdiaj reeman por ni güün ree bejn laa reeman. ¹³ Per ree ben mal con ree bén rusquiee, zi'cri zinal reeman nejz mal, rusquiee reeman bejn ree rusquiee tëë laagajc reeman.

¹⁴ Per lüj basnuu guzudxi'ch loj ni ma basiidil, në loj ni ma rililadxil, din lüj ragbee chu ree nin basiid lüj. ¹⁵ Abi' lüj diidz xindool nünbeel xtiidx Dios, diidx ni zile' güün lüj yudar gagbeel xhienaag naj perdon ni zëed por gualrliladx Jesucrist. ¹⁶ Gra ni zëed loj xtiidx Dios, por Dios zëëdan. Abi' rüjn par gusiid bejn bejn ree, par gudëë bejn consejw, par guzuxnejz bejn bejn ree, në par gagbee bejn xhienaag rayal guibanman, ¹⁷ din gagbee xbejn Dios guidiblagaa din güünman graloj ni naj ni zagdxe.

4

¹ Delant loj Dios në delant loj Jesucrist, bën gui't zi'c tijb rey par güünman guialguxtis loj ree bën naban në loj ree bën ma güjt, naj rni lojl, ² gutie'ch xtiidx Dios. Been naguiejn gunee xtiidxaman ad chi yu'tzi mod. Been naguiejn chililadx ree bejn ni rnieel, gudilë ree bën ad ruzoobt diidx, badëë tëë consejw loj ree bejn, balüü reeman sin guial yaleny'a'l. ³ Din zadxin dxej ad zatiëjbt ree bejn gucaagdiajg reeman ni naj diidxli, ma güün reeman zi'ctzi rën reeman, zaguil reeman zien ree bën gulüü laa reeman ganax ni ruladx reeman gucaagdiajg reeman. ⁴ Ad zidxga'tri reeman ni naj diidxli, mazri ma guidxga' reeman ni rbëëguijc ree bejn. ⁵ Per lüj Timoteo, gubajn nadëdguien, gudaan xhietëëz guialrzagdiajg tëdil, gutie'ch xtiidxza'c Jesucrist, been mandad ni banee Dios lojl güünl.

⁶ Din naj zamer gugüjt reeman naj, ma zidbig guialgüjt par naj. ⁷ Ma guzudxi'chan loj xtiidx Dios majsi guza'can ni guza'ctzan, ma gulox benan ni rayal günan abi' ad basa'tnan ni rliladxan. ⁸ Yan prem ni rayalan ma cabëzan naj, prem ni gunee Dad Jesucrist lon chi guidxin dxej, bën rüjn guialguxtis zi'c rayal. Abi' ad lotzan guneeman prem guin, në loj gra ree bën yu' luxdoo në cabëz reeman laaman.

Ni rayal güün Timoteo

⁹ Been naguiejn diob guidganajl naj, ¹⁰ din Demas ma guro'nladxaman naj guial mazri ruladxaman ni yu' ree loj guidxliuj, zeel zëman niz Tesalónica. Abi' Crescente ma zëman niz Galacia guiáad Tito zëman niz Dalmacia. ¹¹ Tijbzi Lujc za' con naj. Chi gui'til tanë Marcw din zile' güünx yudar gutie'chix xtiidx Dios. ¹² Tíquico ma guxhalan laaman luguiedx Éfeso. ¹³ Chi gui'til tanë da cajpan ni basa'nan luguiedx Troas lidx Carpo, në ree da libran tanë ad yayanladx tëël guidnël da gui'ch reen.

¹⁴ Lejandr bën naj herrer, dád zien ree ni mal ma beenman naj, per con Dios yaguijxaman gra ni beenman. ¹⁵ Gojp cudad con laaman, din laaman dád rüjn xcontraman ni ranee ree.

¹⁶ Yaloj chi guzun loj ree guxtis achutczí been naj yudar, graczi reeman guro'nladx naj. Gagnë Dios ad zidxga'taman ni been reeman. ¹⁷ Per Dad Jesucrist been naj yudar baneë tëëman naj gojl persi baloox gutiechan xtiidxaman, persi biguiejn ree gra ree bën ad najt bën Israel laan. Zian baslaa Dios naj, zi'c rliaa tijb bejn loj beedx. ¹⁸ Abi' Dad Jesucrist, laaman yabëë naj loj gra ni mal, laaman guinia naj xt chi guidxin dxej guidxinan lod canabeeman xanyabaa. ¡Par laaman naj respejt gra tiamp në zianczi! Amén.

Diidx bigra ca loj gui'ch guie

¹⁹ Bagajpdioz Prisca në Aquila në ree xfamil Onesíforo. ²⁰ Erasto baya'nman Corinto, guiáad Trófimo ragxuuman basa'nan laaman luguiedx Mileto. ²¹ Been naguiejn guda chi gad tiamp nayaag gui't. Eubulo, Pudente, Lino, Claudia në los demasri ree bën rliladx Jesucrist rugajpdioz reeman lüj.

²² Dad Jesucrist gagnë lüj, abi' Dios güünle' gradi. Amén.

Gui'ch guxhaal San Pabl loj Tito

Rxhiaal Pab xtiidx Dios

¹ Naj Pab cayünan Dios sirv, naj najn xiapóstol Jesucrist par günan yudar bén ma naj ree par Dios xhienaag chililadx reeman laaman din gagbee tëë reeman diidxli xhienaag guiban reeman delant loj Dios, ² din yu'guijc ree guial zian yaya'p ree guialnaban tiblayaa delant loj Dios. Diizd chi gad guidxliuj gacchaaw, rëbaman guial yazaladxaman guialnaban guin, abi' dunuj ree rayagbee ree zagdxe guial ad rnieet Dios diidx rusquiee. ³ Abi' chi bidxin dxej ni gule Dios guial gogbee ree bejn xtiidxaman laaman balüü xtiidx, abi' naj bayal catiechan xtiidxza'caman laan naj ni guxhaalaman naj günan, bén ni rüjn dux tol ree perdon. ⁴ Cucan gui'ch guie par lüj, Tito, guial najl zi'c da xi'nän guial tiblojzi raliduladx Jesucrist. Dux Dad ree Dios con Jesucrist bén güt por dux tol ree, yaya reeman lüj, güünle' reeman lüj yabe'cdxe tëë reeman luxdool.

Dxiin ni been Tito guiedx Creta

⁵ Naj basa'n lüj niz Creta din güünl ni ryaadx günan ni. Abi' tijbgaj luguedx gucaabeel bén ni nabee ree loj ree xbejn Cristo zi'c ma rnin. ⁶ Chi gucaabeel laa reeman rayal gucaabeel bén ni naban ree zi'c rayal chitëë chu guinieeguijdx laaman, bén ni yu' tijbzi lacheel, rililadx tëë ree xi'nman Jesucrist, bén ni nünbee ree bejn guial ad nabant ree xi'nman zi'ctzi rën reex ad najt tëët reex xin rusagloj. ⁷ Din bén rajp guialrniabee loj ree xbejn Cristo, lojman riga' gra ni naj por Dios, zeel rüjn naguiejn guibanman zi'c rayal. Ad rayalt güünman xgab guial tijbzi ni guiëbaman güün sirv, ad rayalt gacaman bënralenya', ad rayalt gacaman bengua', ni'qui ben ruladx wadijl, ad zaguiil tëëtaman mod xhienaag tia'män xmlia ree bejn. ⁸ Rayal gacaman bén ni gudëë lidx yaya'n ree bejn chi rüjnan naguiejn, bén ruladx güün ganax ni zagdxe, gac tëë nabee laagajcaman. Rayal gacaman benza'c, guibanman zi'c rayal delant loj Dios në delant loj ree bejn, ad rayalt guibanman zi'ctzi rënman. ⁹ Rayal chinalaman diidxli ni ma basiidaman, din chile' gusiidaman bejn ree diidxza'c guin ree din guzuxnejz tëëman bén ni rnieeguijdx ree xtiidxli Dios.

¹⁰ Din dád zien ree bén ad ruzoobt diidx yu'. Ganax diidx rusquiee rniee reeman abi' rusquiee reeman bejn ree, abi' loj ree bén Israel ni rulüü ley loj reeman no'ch mazri lasa' ree ben guin. ¹¹ Lasa' ree bén guin ad rayaltri yatiëëb ree guluü reeman bejn ree, din dád zien ree yu ma beendxa reeman gra tijb famil guial rulüü reeman laa reeman ni ad rayalt naabzi par güün reeman gan milia.

¹² Tijb gajc bén ladx reeman bén rëb reeman naj bén badëë xtiidx Dios loj ree bejn, laaman rëb guial ree bén Creta ganax diidx rusquiee rniee reeman, dád nadoxh reeman, dád bén nala naj reeman abi' achetctzi rën reeman güün reeman. ¹³ Abi' waliman, zeel gudilë reeman con diidxdoxh din chile' chinal reeman xtiidx Cristo zi'c rayal, ¹⁴ ad guidxga'ri reeman ni rbëëguijc ree bén Israel, ad güün teë reeman ni rniabee ree bén ni ma guro'nladx ree ni naj diidxli.

¹⁵ Bén naya ree xquiarguejn, achet xgab mal rüjn reeman. Per ree bén rüjn ganax xgabdxuudx, bén ad rililadxt, achetctzi xgab zagdxe rüjn reeman guial

ad nayat xquiarguiejn reeman, ganax ree xgab mal yu' guijc reeman. ¹⁶ Laa reeman rëb guial nünbee reeman Dios, per rëbzi reeman din ad rünjt reeman ni rën Dios. Dád bendxuudx naj reeman rusagloj tée reeman, ni'qui tijb ni rünj sirv ad rajct rünj reeman.

2

Ni rayal gulüü Tito

¹ Per lüj Tito, balüü ree bejn gra zi'c tal naj xtiidzxa'c Dios. ² Balüü ree bengol din guiban reeman zagdxe, gustëdguien reeman din gap bejn laa reeman respejt, guidib luxdoo reeman chililadx reeman, guiën reeman bejn ree, taan tée reeman xhietëez ni sac reeman. ³ Ziangajc ree béngunaa bengol rayal guiban reeman zi'c rayal guiban ree xbejn Cristo. Ad rayalt gü reeman xtiidx bejn, ad gac reeman bengu'. Rayal gulüü reeman bejn ree xhienaag naj ni zagdxe, ⁴ rayal gulüü reeman béngunaa guiag ree din guiën lacheel reeman con xi'n reeman, ⁵ din guiban tée reeman naya delant loj Dios, nadëdguien, guinia lidx reeman, gac reeman benza'c guzoob tée reeman xtiidx lacheel reeman chitëe chu guinieeguijdx xtiidx Dios.

⁶ Ziangajc lüj Tito, badëe consejw loj ree xinguaaw guiag din guiban reex nadëdguien. ⁷ Been naguiejn din güünl gra xnejz din guguaa reex xhienaag güün reex ni naj zagdxe. Chi rulüül laa reex, balüü reex zagdxe zi'c rayal, ⁸ con ganax ree diidx zagdxe chitëe xhie gudxiib ree bejn guijquil, din yaya'nxtu ree bën ni rdxe'ch dunuj ree guial achet yadxejl gudxiib reeman duguijre.

⁹ Badëe tée consejw loj ree bën naj ree mojs din guzoob gra xtiidx xpatron reeman, gac reeman benza'c ad yadxi'ro' reeman. ¹⁰ Ad cwan reeman xhie xieen xpatron reeman, gac reeman bën confians din guguaa gra ree bejn xhienaag naban reeman guial niza'cdxoon naj xtiidx dux Dad ree Dios bën rünj dux tol ree perdon.

¹¹ Abi' Dios ma balüüman plact rënman dunuj ree, abi' guial rënman dunuj ree zile' gac gra ree bejn perdon. ¹² Guial rënman dunuj ree rayagbee ree guial rayal yasa'n ree ni mal con ree ni ad rünjt sirv ni rayën ree yaguieen ree loj guidxliuj guie, din yabajn ree nadëdguien, zi'c rayal, zi'c rën Dios yabajn ree loj guidxliuj guie ¹³ la'tgaj caylëz ree dxej za'cdxoon ni gac cumplid xtiidzxa'caman zi'c ma naman duloj ree guial gui't dux Dios ree Dad Jesucrist con xguialrniabeeman, bën been perdon dux tol ree. ¹⁴ Laaman gü't por dunuj ree din yabëëman dunuj ree loj gra dol abi' basiaman dunuj ree din yayajc ree xbejnzaman abi' yaguieen ree naguiejn yaguieen ree ganax ni zagdxe.

¹⁵ Gra ni ma rnin lojl balüün laa reeman sin guialrdxeb badëed reeman consejw, bazuxnejz reeman con guialrniabee ni ca'l. Ad tiëbil gusagloj reeman lüj.

3

Ni rayal güün ree bën rliadx Jesucrist

¹ Basaaladx reeman din güün reeman ni rëb ree bën rniabee laa reeman në ni rëb ree guxtis, gac reeman bën nacaagdiajg susin tée reeman par güün reeman ni naj zagdxe. ² Ad guinieeguijdx reeman bejn ree, ad quuil reeman wadijl, gac reeman benza'c në bënchaawladx con chutëez bënan.

³ Gocli nĕgajc dunujn baguieenan zi'ctzi bayĕnan, ad bazoobtan diidx, badxu'n loj nejz mal, baguieenan ni bayĕntzan nĕ zi'ctzi naj dux xgaban. Baguieenan ganax ni ad najt zagdx, bayajcan bĕn nadĕdloj, bidxe'ch ree bejn dunujn abi' badxe'ch gajcan laa reeman. ⁴ Per chi bidxin dxej dux Dad ree Dios bĕn baguijx por dux tol ree, balüüman loj ree bejn guial najman benza'c rĕn tĕĕman bejn. ⁵ Laaman been dux tol ree perdon, per ad guial baguieent ree xhie ni rĕjn sirv, guial bayaman dunuj ree. Laaman basia dunuj ree yan ma nayajc ree naya delant lojman, abi' por xSprijtaman ma raya'p ree guialnaban cüb. ⁶ Por Dad Jesucrist bĕn baguijx por dux tol ree, Dios bazaladx dunuj ree zro' da't xSprijtaman. ⁷ Dxel zi'cgajc laaman ma nulabaman dunuj ree sin dol guial najman benza'c, yayal ree guialnaban tiblayaa ni ralĕjz ree.

⁸ Laan naj diidxli. Zeel rĕnan gusnuu gugojnl diidx guie ree bĕn ni rliadx ree Dios dĭn gŭün reeman naguiejn gŭün reeman ni naj zagdx. Abi' nine ree naj ni zojbloj nĕ ni gŭün sirv par gra ree bejn. ⁹ Per ad guidxga'l diidx ni ad rĕjnt ree sirv ni rnĕee ree bejn, ad guidxga'l xtiidx ree bĕn ni ru ree xgab mazri chunin naj diidxli xdiaa gulal ree bejn. Ad guidxga' tĕĕl bĕn ni rdildiidx ree por xley Moisejs, dĭn ad najtan ni zojbloj achet tĕĕt lasajc ni rnĕee reeman, achetzi sirv rĕjn ree ni guĭn.

¹⁰ Bal por tijb lĕjt rzuloj rlia' lasa' ree xbejn Cristo, guneenĕman tib volt o tio'p volt, abi' bal id ruzoobaman xtiidxil mejorli babĕĕman lojdi. ¹¹ Dĭn lŭj ragbee guial lasa' ree bĕn guie ma guro'nladx reeman ni naj diidxli abi' laagajc reeman cunijt laa reeman por xtol reeman.

Ni ryal gŭün Tito

¹² Chi gaxhalan Artemas o Tĭquico lod zojbil, been da't naguiejn tagnaj naj luguiedx Nicópolis, dĭn ni ma benan xgab gadĕĕdan tiamp nayaag. ¹³ Been tĕĕ yudar Apolos nĕ licenciad Zena zi'ctzi gaquil. Badĕĕ gra ni ryaadx reeman dĭn chinal xnejz reeman chitĕĕ xhie guiyaadx reeman. ¹⁴ Nĕ ree dux compniar ree ryal gusiid gŭün ni naj ni zagdx, gŭün reeman yudar chi rĕjn naguiejn gŭün reeman yudar chitĕĕ guiban xlia'zi reeman.

Diidx bigra ca ree loj gui'ch guie

¹⁵ Gra ree bĕn za' con naj rugajpdioz reeman lŭj. Bagajpdioz sii gra ree bĕn rĕn dunujn por guialrliladx ni raya'pan. Dux Dad ree Dios gŭünle' gradi. Amĕn.

Gui'ch guxhaal San Pabl loj Filemón

¹ Naj Pab, yu'n ladxguuib guial rtiechan xtiidx Jesucrist. Naj, në Timoteo raxhaalan gui'ch guie par lüj Filemón, nayajc ree compniar ratie'ch ree xtiidxaman, lüj ragbee rayèn da'tan lüj. ² Raxhaal tëën gui'ch guie par gra ree bèn rliladx Jesucrist bèn rado'p ree lidxil, në par Apia nètèë par Arquipo, bèn naj dux compniar ree caytie'ch ree xtiidx Jesucrist. ³ Dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rudëë Pab quixtëë loj Dios por Filemón

⁴ Beegaj chi rbedx rniaaban Dios rudën quixtëë lojman por lüj, ⁵ din ma cwa'n rusion guial dád rënrl riladx tëël Dad Jesús dád rën tëël gra ree bèn ma naj xbejn Dios. ⁶ Rniaab tëën lojman guial lüj cayüjn dunujn yudar par yatie'ch ree mazri xtiidx Jesucrist, gusnuu gagbeel gra ni zagdxe ni raya'p ree guial ma nayajc ree tijbzi con Jesucrist. ⁷ Dád nix yu' luxdon rabaa tëën guial rënrl dux compniar ree bèn rliladx ree Jesucrist, din por lüj bijch ma bayu luxdoo reeman zagdxe.

Rniee Pab por Onésimo

⁸ Zeel majsi ra'pan guialrniabee par ganin conin rayal güünl guial najn tijb xi apóstol Jesucrist, ⁹ per guial rayèn du lasa', zagdxeli rniaaban lojl, naj Pab, ma najn tijb bengol abi' yan yu'n ladxguuib guial rtiechan xtiidx Jesucrist, ¹⁰ rniaaban lojl por Onésimo, bèn naj zi'c da xi'nän guial ma bililadxaman xtiidx Jesucrist ni ben lojman lën ladxguuib guie.

¹¹ Gocli achet sirv been Onésimo lüj, per yan zi'c rünman naj sirv ziangajc güünman lüj sirv. ¹² Yan caydxi'n laaman lidxil, gunajchi'man zi'c rniajchi'l naj. ¹³ Guyënan nizujman con naj din nünman naj yudar luar lüj, la'tgaj yu'n ladxguuib guial rtiechan xtiidx Jesucrist. ¹⁴ Per ad guyëtan nünan xhienin sin xtiidxbeel din xhietëëz favor güünl por naj ad züjntilan nagueijn, güünlan guial guiënl. ¹⁵ Bal brie Onésimo lidxil tiblädëd, per gojc zian din chile' sunëman lüj tiblyaa, ¹⁶ per ad zi'ctri tijb mojs, mazri zagdxe guial loj tijb mojs, zi'c tijb bijchil bèn rënrl. Dád rënan laaman, per lüj rayal guiënl laaman mazri ad zi'ctzi tijb bejn, rayal guiënl laaman zi'c tijb bijchil por Jesucrist.

¹⁷ Yan bal walil nayajc ree compniar por Jesucrist, baca' Onésimo gunaladx naj gajcan. ¹⁸ Bal yu' xhie beenman lüj, o bal yu' xhie ralaman lojl, naj yaguix laan. ¹⁹ Abi' naj Pab, quiyb naj cuca diidx guie ree: Naj yaguixan, majsi rulüü ad rüjnt nagueijn ganin lojl din gusaaladxil guial xt xguialnabanl ralil lon. ²⁰ Yan been naj favor guin guial rënrl Jesucrist, zian bagu' luxdon guial nayajc xbejn Jesucrist.

²¹ Naj caxhal gui'ch guie lojl abi' ragbeechaawan guial guzoobil da diidxan, ragbee tëën guial mazri naj ni güünl guial loj ni canin lojl. ²² Been tëë porvinid lënu lidxil lod yaya'nän, din zi'c cabejdx canabidi Dios, ragbeen tiëbaman guidganan lëjt.

Diidx bigra ca ree loj gui'ch guie

²³ Epafra, bèn yu'në'n ladxguuib guial ratie'chan xtiidx Jesucrist, rugajpdiozaman lüj. ²⁴ Nëgajc Marcw, Aristarco, Demas në Lujc, bèn cayüjn gajc ree naj yudar caytie'chan xtiidx Jesucrist në reeman rugajpdioz lüj. ²⁵ Dad Jesucrist güünle' lëjt.

Gui'ch par ree bèn Hebreos

Ma gunee Xi'n Dios xtiidx xDadaman

¹ Tiamp gulal, Dios guneenè ree dux béngulal ree zien volt nè gadxagayaa mod por ree bèn badèè xtiidx Dios loj ree bejn, ² per yan ma guneenèman dunuj ree por Xi'nman. Dios been gra ni yu' xanyabaa nè loj guidxliuj por Xi'nman. Abi' gra basa'n loj Xi'nman. ³ Laaman naj xbacha' za'cdxoon Dios, laaman naj zi'cgajczi naj Dios. Abi' laaman naaz gra ni yu' por gualrniabee ni rajpaman.

Xi'n Dios naj mazri bèn zobjloj guial loj ree anjl

⁴ Zianan zeel laaman naj mazri bèn zobjloj loj ree xianjl Dios din laaman naj quijb Xi'n Dios. Chi gulox guzajcaman ni guzacaman par yayajc ree naya por dux tol ree, dxel gurejman xanyabaa xladbee xDadaman Dios bèn rajp gra gualrniabee ⁵ Din ad yu't dxej rëb Dios loj ree anjl:

Lüj naj da xi'nan,

abi' diizd yan gulün guial lüj naj da xi'nan.

Achut tēet loj anjl rëbaman:

Naj gac Xdadil, abi' lüj gac da xi'nan.

⁶ Per chi guxhaal Dios Xi'nman loj guidxliuj, Xi'nman bèn rajp gualrniabee zi'cgajc laaman, dxel rëbaman:

Gra ree da anjlan,

gol guyèn da Xi'nan, gol gojp tēeman respejt.

⁷ Abi' chi gunee Dios por ree anjl, rëbaman:

Naj rün ree da anjlan zi'c bi, rün tēen laa reeman zi'c bajl.

⁸ Per por Xi'nman rëbaman:

Dad Dios, xgualrniabeel naj par tiblayaa,

abi' guidib tiamp nabeel zi'c rayal.

⁹ Lüj ruladxil ni naj zagdxe

abi' rdxe'chil ni mal.

Zeel Dios bèn naj xDiosil

baneeman lüj mazri guial rabaa guial loj gra ree bèn za'nël.

¹⁰ Rëb tēeman:

Dad, diizd yaløj lüj been guidxliuj nè xanyabaa

con gra ni yu' loj reen.

¹¹ Gra reen yu' dxej nit reen,

per lüj ma nabanl tiblayaa.

Gra reen yayox zi'c tijb lajd,

¹² gusie'til laa reen zi'c rusie't bejn xabaman,

abi' zuchaal laa reen zi'c ruchaa bejn xabaman,

per lüj ad yu't dxej guidxaa zi'c najl

abi' zianczi gapil guialnaban.

¹³ Ad yu't dxej rëb Dios loj tijb ree xianjlaman:

Gurej da ladbeen xt gūnan gan nabeel bèn rdxe'ch ree lüj.

¹⁴ Din gra ree anjl naj sprijt cayūjn ree sirv loj Dios, abi' rxhiaalaman laa reeman din gūn reeman yudar bèn ni gap ree guialnaban tiblayaa delant loj Dios.

2

Ad yasa'n ree diidx ni yabëë dunuj ree loj dol

¹ Zeel rüjn naguiejn yayidxga' ree xtiidx Dios ni ma bacaagdiajg ree chitëë yasa'n ree xnejzaman ni ma zunaal ree. ² Din zi'c goc cumplid gra xtiidx Dios ni gunee ree anjl diidx gocli, bën ad bazoobt diidx, bën been ree dol, laa reeman bayal casti ni rayal reeman. ³ Xhieza naag laa ree loj casti bal nê dunuj ree ad zayidxga't xtiidx Dios ni rugojn dunuj ree par yayajc ree perdon? Awa laagajc Dad Jesucrist bagojn xcwent perdon guin diidx yaloj, abi' ree bën bigueijn laan, laa reeman bagojn dunuj ree. ⁴ Yan zi'c ma cwa' bejn gualrignia' rent gualrignia' ren por xSprijt Dios zi'c naj xixgabaman, abi' por ree sen nê ree milagr con los demazri ree ni radxaloj bejn, zian ma balüü Dios guial ni diidxli naj ree diidx guin.

Jesucrist rabëë bejn loj dol

⁵ Dios ad badëëtaman gualrniabee loj ree xianjlaman par nabee reeman lod yaya'p ree gualnaban cüb ni cayza't ree, ⁶ din yu' tiblajt loj xtiidx Dios lod rëb bejn:

Dios, çchu naj bénguidxliuj zeel rusaaladxil laaman?

çChu naj xi'n bénguidxliuj zeel rüjnl xgab por laaman?

⁷ Guyu tijb tiamp ni baletil xi valoraman guial loj ree anjl.

Per despuejs na beenl laaman bën zojbloj,

badëël gualrniabee lojman din nabeeman gra ree ni beenchaawil,

⁸ abi' gra basa'nl lojman.

Chi badëë Dios gualrniabee lojman par nabeeman gra, achetczy ni baya'n ni ad zanabeetaman majsi dunuj ree sta ad cayguiaat ree guial nabeeman gra.

⁹ Per dunuj ree rayagbee guial guyu tiamp ni balet Dios xvalor Jesús guial loj ree anjl. Yan ma ca'man gualrniabee abi' rajp bejn laaman respejt por guialzi ni gudëdaman chi gütaman por gra bejn, abi' zian gojc guial rën Dios dunuj ree.

¹⁰ Por Dios yu' gra, abi' laaman rniabee gra ni yu', abi' rënman chu' zien ree xi'nman xanyabaa. Zeel por guialzi ni gudëd Jesucrist bayaaloj bazoobaman xtiidx Dios, abi' tijbzi por laaman ma zajc yaya'p ree perdon. ¹¹ Bën ma naya ree delant loj Dios, por Jesucrist naya reeman. Abi' tant Jesucrist tant ree bën ma naya por laaman, tijbzi Dios naj xdad reeman. Zeel ad ratut Jesucrist rëbaman loj reeman: Da bichan. ¹² Zi'c ca tib lajt loj xtiidx Dios lod rëb:

Gün diidx loj ree da bichan xcwentil,

abi' chi yadxaag lasa' reeman golan cant ree ni guza't lüj zagdxe.

¹³ Rëb tëëman:

Tijbzi Dios yu'guican gagnë naj;

abi' rëbaman:

Laa naj guie con ree da xi'nan xin bazaladx Dios naj.

¹⁴ Abi' zi'c bénguidxliuj tibloj najman rejn con bëël, ziangajc gojc Jesucrist chi bi'taman loj guidxliuj persi gojc gütaman, abi' por xgualgütaman beenman gan loj gualrniabee ni gop xindxab loj gualgüjt. ¹⁵ Zian beenman persi babëëman bejn ree loj gualnadxeb xieen gualgüjt, bën ni guidib tiamp ni naban reeman rdxeb reeman gualgüjt zi'c rdxeb bejn xpatronman.

¹⁶ Din laaman ad bi'ttaman loj guidxliuj par gagnëman anjl ree, bi'taman par gagnëman bën naj ree xdiaa Abraham. ¹⁷ Zeel gojcaman zi'cgajczy bénguidxliuj, persi bidxin dxej gojcaman tijb bixhioz zojbloj delant loj Dios, bixhioz ni raya bejn, bën rüjn tëë cumplid xtiidx Dios persi gojc guidjxaman

por xtol ree bejn. ¹⁸ Abi' guial laagajcaman guzagdiaj been tëë xindxab guial ad zuzoobtaman xtiidx Dios, zeel laaman zajc gagnë ree bèn ni cayüjn xindxab naguiejn güün reeman dol.

3

Jesús naj mazri bèn zobjloy guial loj Moisejs

¹ Zeel compniar, lëjt guial ma najdi xbejn Dios, lëjt guial ma bacaabeeman lëjt par gaquidi xi'nman, gol badxe'guijc Jesucrist guial laaman naj bixhioz zobjloy, bèn raliduladx ree, bèn guxhaal Dios loj guidxliuj. ² Din Jesucrist bazoobaman xtiidx Dios bèn bacaabee laaman zi'c bazoob Moisejs xtiidx Dios delant loj ree bèn Israel. ³ Per mazri rayal Jesucrist respejt guial loj Moisejs guial mazri zobjloyman, zi'c tijb bèn ni rüjn yu mazri ruza't reeman laaman zagdxe guial loj yu guin. ⁴ Gra yu yu'czi tijb bèn rüjn laan, per Dios laaman been gra ni yu'. ⁵ Abi' Moisejs bazoobaman xtiidx Dios, beenman sirv lojman chi badëëdaman xtiidxaman loj ree bèn Israel persi bagojnman laa reeman ni rëb Dios. ⁶ Per Jesucrist guial najman Xi'n Dios, laaman rniabee loj gra ree xbejn Dios. Abi' dunuj ree nayajc ree xbejn Dios bal yasnuu yadxu'dxi'ch ree loj ni raliduladx ree laaman sin guial yalenya' ree abi' yalëéz ree xt dxej bigra.

Gol guzujdxi'ch loj xnejz Dios

⁷ Zeel, zi'c rëb xSprijt Dios:
Bal rucaagdiajguidi xtiidx Dios yan dxej,
⁸ ad cwexuudi zi'c been ree bèn ad bacaagdiajgt xtiidxaman chi been reeman laaman prueb chi guzu reeman loj yujbidx.
⁹ Abi' yagaj naj lod ad bacaagdiajgt ree xbëngulalidi xtiidx Dios majsi baguiaa reeman milagr ni beenman delant loj reeman loj tiuu ijz niz loj yujbidx.
¹⁰ Zeel bidxe'ch Dios bèn guin ree, abi' rëbaman:
“Xgab ren rüjn reeman, ni'quid rüjnt reeman naguiejn din gagbee reeman xhienaag rënan güün reeman.”
¹¹ Zianan zeel bidxe'ch Dios abi' rëbaman guial ad yu't dxej gap reeman xguialraziiladx Dios.

¹² Zeel gol gojpdudad compniar raliduladx ree Jesucrist, chitëë chu' tijbidi guial por xixgab malidi ni rudxoon chililadxidi, guibi'cadi loj xnejz Dios bèn naban. ¹³ Mejrli guixie guixie gol guneenë gol badxe' tëë luxdoo ree lasa'di naga yu' tiamp, chitëë ad zuzoobtridi xtiidx Dios guial ma been dol lëjt gan.
¹⁴ Din bal ma nayajc ree xbejn Cristo, zianczi rayal yadxu'dxi'ch ree loj ni raliduladx ree laaman zi'c baliduladx ree laaman diizd guia'xchej.

¹⁵ Abi' zi'c ma rnin lojdi, loj xtiidx Dios rëb:
Bal rucaagdiajguidi xtiidx Dios yan,
ad bal gaquidi nad zi'c goc ree bèn ad bazoobt xtiidx Dios gocli.

¹⁶ Abi', ¿chuzza ree nin ad bazoobt xtiidx Dios majsi biguiejn reeman ni guneeman? ¿Nid bèn Israel ni babëë gajc ree Moisejs Egipton ya? ¹⁷ Abi', ¿nid laagajc reeman bidxe'ch Dios loj tiuu ijz ya por dol ni been reeman abi' zien reeman güjt loj yujbidx? ¹⁸ Abi', ¿nid bèn guin gajc reen rëb Dios loj ya guial ma beenchaawaman xgab guial ad zut reeman lod gap reeman xguialraziiladxaman, guial ad bazoobt reeman xtiidxaman? ¹⁹ Zian rayagbee ree guial ad gojpt reeman guialraziiladx guin guial ad bililadxt reeman ni rëb Dios loj reeman.

4

1 Zeel yan guial sta raya'p ree promejs ni been Dios guial yaya'p ree xguialraziiladxaman, rayal yaya'p ree cudad chitëë awa raya'p ree promejs guin yaya'n tijb dunuj ree guial ad zaya'pt ree guialraziiladx guin. ² Din dunuj ree ma bacaagdiajg ree xtiidxza'c Jesucrist zi'cgajc laa reeman, per laa reeman achet sirv been guial bacaagdiajg reeman düidx guin ree, guial ad bililadxt reeman laan. ³ Per dunuj ree guial ma baliduladx ree xtiidx Dios, ma raya'p ree guialraziiladx guin, sa'n por ree bèn ad bililadxt rëb Dios: Guial bache'ch reeman naj zeel ma benan xgab guial ad zajpt reeman da guialraziiladxan.

Diidz chi gule'cchaaw Dios guidxliuj baloox xchiinman, ⁴ zi'c rëb loj xtiidxaman por dxej ni raziiladx bejn:

Chi gulox been Dios gra xchiinman
dxel ni goc gajdx dxej baziiladxaman.

⁵ Per par ree bèn ad bazoobt xtiidxaman rëbaman:
Ad yu't dxej gap reeman da guialraziiladxan.

⁶ Bèn biguiejn ree xtiidx Dios yaloj, ad gojpt reeman guialraziiladx guin guial ad bazoobt reeman xtiidxaman, per sta yu' ree bèn ryaadx gap guialraziiladx guin. ⁷ Zeel chi gudëd zien ijz, Dios gulëëca zatijb dxej ni naj yandxej. Abi' zi'c ma rnin guial rëb rey Davi tib lajt loj xtiidx Dios:
Bal rigujendi xtiidx Dios yandxej,
gol bazoob xtiidxaman.

⁸ Din bal por Josué ni ajp ree bèn Israel guialraziiladx, ad nuza'tt Dios zatijb dxej. ⁹ Zeel xt yandxej yu' guialraziiladx guin par ree xbejn Dios. ¹⁰ Din bèn rajp xguialraziiladx Dios, raziiladxaman xieen gra xchiinman zi'c baziiladx Dios chi gulox been xchiinman. ¹¹ Zeel rayal yagueien ree naguiejn yaya'p ree guialraziiladx guin, chitëë chu güün zi'c been ree bèn ad bazoobt xtiidx Dios.

¹² Din xtiidx Dios nabanen rajp tëën guialrniabee. Mazri rëëzan guial loj tijb espad ni nadoxh grop lad, rëëzan lën luxdoe bejn në lën xsprijtaman. Xt lën dxijt në lën yob rëëzan, abi' por laan ragbee bejn bal ni mal o ni zagdxe naj ni rënman güünman. ¹³ Achetdzi ni been Dios zajc guiguie'ch lojman, din gradooczan ruguiaaman, abi' lojman naj yadëed ree cwent.

Jesús naj bixhioz mazri zojbloj

¹⁴ Zeel guial ma raya'p ree bixhioz ni mazri zojbloj, abi' laaman naj Jesucrist Xi'n Dios, bèn ma zojb xanyabaa, rayal yasnuu yadxu'dxi'ch ree loj ni raliladx ree laaman. ¹⁵ Din Jesucrist bèn naj dux bixhioz zojbloj ree laaman zajc gagnë dunuj ree chitëë güün dol dunuj ree gan. Din në laaman guzajc graloj zi'cgajc cayza'c ree, per laaman ad yu't dxej beenman dol. ¹⁶ Zeel con confianz ma zajc yabiig ree loj Dios yarejdx yanaab reeman, bèn rën dunuj ree par yayaman dunuj ree. Abi' guial rënman dunuj ree, laaman gagnë dunuj ree loj hor ni yayën ree chu güün dunuj ree yudar.

5

1 Gra bèn rajc bixhioz mazri zojbloj, Dios gulej laaman loj ree bejn persi rbejdx rniabaman Dios por ree bejn. Abi' lojman rudëëd bejn gon par Dios në ree be ni guiët por ree xtol ree bejn. ² Abi' guial bënguidxliuj gajc naj bixhioz guin, zeel ragbeeman xhienaag rzajc bejn. Zeel rile' rajpaman pacens bèn ni ad ragbeet xhienin rüjn, në ree bèn ad zinalt xnejz Dios. ³ Abi' guial yu' chi rüjn bixhioz guin dol zeel nëman rugüjt tijb be zi'c gon par Dios por xtolaman, zi'cgajc rüjnman por ree bejn.

⁴ Abi' achut zajc guiëb guial gacaman bixhioz zobjloj, Dios naj bèn rbe laaman zi'c guleman Aarón. ⁵ Ziangajc gojc con Jesucrist, ad laataman rëb guial gacaman bixhioz zobjloj par dunuj ree, Dios bacaabee laaman, chi rëbaman:

Lüj naj da Xi'nan, abi' diidz yan
gulün guial lüj naj da Xi'nan.

⁶ Ziangajc rëb zatib lajt loj xtiidx Dios por Jesucrist:
Lüj naj bixhioz par tiblayaa zi'c goc Melquisedec bixhioz.

⁷ Chi guban Jesucrist loj guidxliuj guie dád biinman gurejdx gunabaman Dios bèn zajc yabëë laaman loj guialgüjt ni gudëdaman. Dxel bidxga' Dios Jesús badëeman laaman valor guial bazoobaman gra xtiidxaman. ⁸ Majsi Xi'n Dios najman, per basiidaman bazoobaman diidz majsi guzagdiajman. ⁹ Abi' guial guidiblagaa beenman gra ni rën Dios güünman, zeel por laaman tiblayaa ma yu' perdon par gra ree bèn guzoob xtiidxaman. ¹⁰ Abi' Dios naj bèn gule laaman par gacaman bixhioz zobjloj zi'c goc Melquisedec bixhioz.

Royal yasnuu yaguieenbee ree xtiidx Dios

¹¹ Dád zien ni yu' ganin lëjt por ree ni guin, per nawëëg najn par ganinan zi'c rënan guial dád nen rignia'di. ¹² Ma gojc xchej da't nünbeedi xtiidx Dios, yan bal zajcan, lëjt ma rayal gulüü ben ren ree, per lëjt sta ryaadx chu' bën gulüü lëjt xtiidx Dios stijb ni basiididi guia'xchej. Lëjt naj zi'c tijb xindoo ni rë' ganax lejch luar gawix graloj. ¹³ Abi' gra ree bèn naj zi'c xindoo ad wayajct gaw graloj, ad zile't gagbee reeman conin naj xnejz. ¹⁴ Per ree bèn ni cusnuu cayignia' xtiidx Dios, laa reeman naj zi'c bën ma raw graloj guial ma rignia' reeman conin naj zagdxce con tëënin naj ni mal.

6

¹ Zeel rayal yaguieen ree naguiejn mazri yayignia' ree xtiidx Jesucrist, luar yaye'c ree yasiid ree xtiidxaman ni ma basiid ree guia'xchej. Zagdxeli naj zian luar yasiid ree naabzi xhienaag yasa'n ree ni mal ni baguieen ree yaloy, o xhienaag yaliduladx ree Dios, ² o xhienaag tiobnijs bejn, o xhienaag yadxiib du yaa ree guijc bejn, o xhienaag yashan Dios bengüt ree, o xhienaag güün Dios xguialguxtisaman chi guidxin dxej yadëed ree cwent lojman, ³ zagdxeli naj guial yasnuu ree yasiid ree xtiidxaman. Abi' Dios gagnë dunuj ree din chile' yaguieen ree zian.

⁴ Din bèn ma ragbee ree xcwent Dios, bën ma nünbee ree xcwent ree ni yu' xanyabaa, bën ma gubajn ree con xSprijt Dios, ⁵ abi' bayuladx reeman xtiidxza'c Dios, ma ragbee tëë reeman xhienaag nabee Dios, ⁶ dxel rusa'n reeman guial chinal reeman xtiidxza'c Jesucrist, par laa reeman dád nawëëg naj chu' reeman loj xnejz Dios, din zi'c rulüü cucaa reeman Jesucrist Xi'n Dios loj crüzj zatijb din guze' ree bejn laaman. ⁷ Bënguidxliuj ree naj reeman zi'c tibli'a' guidxliuj ni rë' guibidx guia' ni ryajb, abi' bal rajc da't guiniaa guin par bën rünj dxiin lojn dxel rünjle' Dios laan. ⁸ Per bal ganax guiëjch në ree gui'xh mal rliejn lojn, dxel ad rünjtan sirv, abi' mazri zëëd gajxh casti par guidxliuj guin abi' casti guin naj guial che'can.

Ni nuzujdxi'ch dunuj ree loj xnejz Dios

⁹ Ad caynatan zian por lëjt, din dunujn rayagbee guial zagdxen cayüjndi, guial zinalquidi ni rayal güündi din laadi loj xcasti Dios. ¹⁰ Abi' laaman rünj xguialguxtisaman zi'c rayal, abi' ad zayanladxtaman ni zagdxce ni beendi në guial ma balüüdi guial rëndi laaman, abi' beendi yudar cusnuu tëë cayüjndi

yudar dux compniar ree b en raliduladx ree Jesucrist. ¹¹ Per dunujn ray enan guial gusnuu g undi zian xt dxej chigra, sin guial yalenya'di din yayafidi ni cab ezidi tia'di. ¹² Ad gaquidi b en ploj, gol been zi'c been ree b en bililadx Dios sin gualralenya' tia' reeman ni r eb Dios tia' reeman.

¹³ Chi been Dios promejs loj Abraham, baza't laagajcaman din achut b en mazri lasajc guial lojman, ¹⁴ abi' r ebaman loj Abraham: "Naj diidxli g nle' l uj abi' d ad zien ree xdiaal chu'." ¹⁵ Abi' Abraham guyuman pacens ad balenya'taman persi cwa'man ni r eb Dios gud eman lojman. ¹⁶ Chi r ujn bejn jurar, r ujnman jurar por stijb b en mazri lasajc guial lojman din guiguien guial diidxliqui g unman ni r ebaman. ¹⁷ Ziangajc yan, guial r en Dios gul uman loj ree b en ni tia' ni r ebaman guial ad yu't dxej guchaa xixgabaman por promejs ni beenman, zeel beenman jurar. ¹⁸ Tio'p ni ad zaze'nt been Dios, beenman promejs been t eman jurar abi' rayagbee ree guial ad rnieetaman diidx rusquiee. Zianan zeel nadxu' ree valor zubiig ree loj Dios din g unman dunuj ree yudar guial ma raya'p ree confianz guial gac zi'c ma r ebaman. ¹⁹ Abi' guial rayagbee ree guial gac zi'c ma r eb Dios, zeel nadxu'dxi'ch ree loj xtiidxaman zi'c nuzujdxi'ch tijb ganch guuib tijb barcw. Abi' guial nadxu'dxi'ch ree diidx xanyabaa z edan, ²⁰ lod ma guyu Jes us par guixhialaman nejz par dunuj ree, b en ma naj bixhioz zobjloj tiblayaa zi'c goc Melquisedec.

7

Jes us naj bixhioz zi'cgajc gojc Melquisedec

¹ Melquisedec gojc rey Salem gojc t eman xbixhioz Dios b en yu' xanyabaa. Chi baza Abraham loj wadijl lod beenman gan rey gudiln e ree laaman, dxel bigchaagloj Melquisedec laaman, abi' beenle'man Abraham. ² Dxel loj gra ree ni been Abraham gan, beenman laan chii lala' abi' bad eman tijban loj Melquisedec. Melquisedec r en gui ban "rey ni r ujn xgualguxtis zi'c rayal", Abi' guial gojcaman xrey Salem r en gui ban "rey rabe'cdxe luxdoo ree bejn", din Salem r en gui b "ni rabe'cdxe luxdoo ree bejn". ³ Melquisedec guin achut ragbee chu naj xDadaman, o xniaanman o chu ree nin naj xdiaaman. Achut ragbee goc gojlaman goc t e g jtaman. Laaman goc bixhioz zi'cgajc Jes us Xi'n Dios b en ma naj bixhioz par tiblayaa.

⁴ Gol been xgab xi b en lasajc gojc Melquisedec nadxel. Zeel xt dux b ngulal ree Abraham bad e tib part loj chii ni beenman gan loj ree rey ni gudiln eman. ⁵ Loj ley r eb guial ree bixhioz Israel ni z ed loj xdiaa Lev i rajp reeman derejch tia' reeman tib part loj chii ni rajp ree b en Israel, majsi tijbzi loj xdiaa Abraham z ed gra reeman. ⁶ Melquisedec majsi ad z edtaman loj xdiaa Lev i, per cwa'man tib part loj chii ni been Abraham gan. Dxel beenle'man Abraham b en cwa' xpromejs Dios. ⁷ Abi' dunuj ree rayagbee guial b en r ujnle' stijb bejn, mazri lasajcaman guial loj b en r ujnle'man. ⁸ Per gra ree bixhioz ni rtia' tib part loj chii la' ni rajp ree bejn, r ejt gajc reeman zi'cgajc dunuj ree. Sa'n Melquisedec b en cwa' tib lia' ni been Abraham gan, loj xtiidx Dios ruza't laaman zi'c rulu  sta nabanman. ⁹ Yan zi'c rulu  yaguie'ch ree guial Lev i con ree bixhioz ni z ed loj xdiaaman b en ni rtia' ree tib part loj chii ni rajp ree bejn n e reeman bad e tib part guin loj Melquisedec loj hor ni bigchaagloj Melquisedec dux b ngulal ree Abraham. ¹⁰ Din chi bigchaagloj Melquisedec dux b ngulal ree Abraham, ad wayut Lev i, per loj xdiaa Abraham z ed Lev i.

¹¹ Bal por ree bixhioz Levitas nile' niajc bejn naya delant loj Dios por ley ni guyu par ree b en Israel, dxel ad r ujntri naguiejn ni't stijb bixhioz b en naj

zi'c Melquisedec ad zi'ct Aarón. ¹² Din chi bidxaa bixhioz nêgajc ley bidxaa, ¹³ din dux Dad ree Jesucrist laaman naj bixhioz guin. Per ad lojt xdiaa ree bixhioz zêédaman, loj diaa ren zêédaman abi' ni'qui tijb ree xdiaaman ad gojct bixhioz. ¹⁴ Dunuj ree rayagbee guial loj xdiaa Judá zêéd dux Dad ree Jesucrist abi' Moisejs ad baza'ttaman diaa guin chi rêbaman chu reenin gac bixhioz.

¹⁵ Per laa rguien gajc guial Jesucrist naj bixhioz zi'cgajc Melquisedec, ¹⁶ guial ad lojt xdiaa Levi zêédaman zi'c rêb loj ley par gac bejn bixhioz, najman bixhioz guial rajpaman gualrniabee guibanman tiblayaa. ¹⁷ Din ze rêb loj xtiidx Dios por laaman:

Lÿj naj bixhioz par tiblayaa,
lasa' bixhioz ni goc Melquisedec.

¹⁸ Zianan zeel gojc ley guin tiblald guial ad beentan sirv guial nÿjn bejn zi'c rniabee ley guin. ¹⁹ Ad bile't nÿjn ley guin gan nibajn bejn zagdxé delant loj Dios. Per luar ley guin zagdxé naj gualrliladx ni raya'p ree din por gualrliladx guin ma raya'p ree nejz par yadxin ree loj Dios. ²⁰⁻²¹ Gulal chi ru bejn rajcaman bixhioz, achet promejs been Dios, per chi bacaabee Dios Jesús gacaman bixhioz, Dios been promejs zi'c ca tiblajt loj xtiidxaman lod rêb:

Dux Dad ree Dios ma been promejs abi' ad zuchaat xixgabaman:
“Lÿj naj bixhioz par tiblayaa, lasa' bixhioz ni goc Melquisedec.”

²² Zeel zian zagdxé naj nejz cÿb ni guxhal Jesús par yadxin ree loj Dios. ²³ Gulal zien gojc ree bixhioz per guial rdxin dxej rêjt reeman ad bile't nÿjag reeman bixhioz par tiblayaa. ²⁴ Per Jesús ad yu't dxej guietaman ad yu' têtê dxej lox guial najman bixhioz. ²⁵ Zianan zeel rîle' rabêëman bejn ree loj xcasti Dios, bén rên ree gap nejz par guidxin reeman loj Dios por laaman, din laaman rajpaman gualnaban par tiblayaa par cwedx guiniabaman Dios por laa reeman. ²⁶ Zeel laaman naj bixhioz zobjloj bén rayaadx ree gagnê dunuj ree. Din laaman naj bén naya nali, achet ni mal rÿjnman, nayaman loj Dios, garen najman guial loj bêndol, abi' zobjaman xanyabaa cwê' Dios. ²⁷ Laaman ad ryadxt gÿnman zi'c rÿjn ree bixhioz zobjloj guial guixie guixie rugÿjt reeman be gui'xh zi'c gon par Dios. Yaloj por xtol gajc reeman dxel por xtol ree ben ren. Per Jesús con tib volt gÿjtaman por dux tol ree, ad ryaadxtri guietaman stijb. ²⁸ Por ley bile' gojc ree bejn bixhioz zobjloj majsî ad nayaalojt naya reeman niz loj Dios. Per despuejs rêb Dios guial diidxliczi xi'nman gac bixhioz zobjloj, laaman nayaaloj nayaman niz loj Dios zianczi.

8

Jesús naj dux bixhioz zobjloj ree

¹ Loj gra diidx ni caydü ree ni mazri lasajc naj guial Jesucrist naj dux bixhioz zobjloj ree, bén ni ma zobj xanyabaa xladbee Dios bén rniabee. ² Ni ma rÿjnman sirv gualbixhioz, lèn yadoo ni bazoob Dios, ad bênguidxliujt. ³ Gra ree bixhioz zobjloj loj guidxliujt guie xchiin reeman naj guial rinê reeman gon rugÿjt têtê reeman be ree zi'c gon par Dios. Ziangajc Jesucrist bén naj dux bixhioz zobjloj ree yu' ni badêëman loj Dios. ⁴ Abi' bal sta za' Jesucrist loj guidxliujt guie ad nÿjactaman bixhioz, guial ma yu' ree bixhioz ni rinê ree gon loj Dios zi'c rniabee ley ni basa'nnê Dios Moisejs. ⁵ Per gra ni rÿjn ree bixhioz loj guidxliujt guie, najzi reen zi'c tijb bala, zi'c tijb sen xhienaag naj ree ni yu' xanyabaa. Dunuj ree rayagbee guial najzi reen zi'c tijb sen din chi ma cadxin gajxh gÿn Moisejs yadoo, dxel rêb Dios lojman: “Baguiaa zagdxé din gÿnli zi'cgajczi balÿn lÿj ruguia' Sináí.” ⁶ Per mazri zagdxé naj ni rÿjn

Jesucrist, bén bayal naj dux bixhioz zojbloj ree, din mazri zagdxé naj nejj cüb ni guxhalaman din chile' yadxin ree loj Dios. Abi' por nejj cüb guin mazri zagdxé naj ree xpromejs Dios par bejn.

⁷ Bal por ley nile' nibajn bejn zagdxé delant loj Dios, dxel ad rüjnt naguiejn niu nejj cüb. ⁸ Per baguiaa Dios guial ad cayüjnt ree bejn zi'c rayal zeel rëbaman:

Naj rni guial guidxin dxej gaxhalan nejj cüb par ree bén Israel në ree bén Judá.

⁹ Per nejj cüb guin ad najtan zi'c ley ni basa'nan loj xbéngulalidi chi babën laa reeman Egipto. Abi' guial ad bazoobt reeman da diidxan zeel gulëladxan laa reeman, zian rëb Dios.

¹⁰ Rëb tëëman:

Zian ma baya'n diidx gac con ree bejn chi guidxin dxej guijc reeman yasa'nan da leyan abi' lën luxdoo reeman gucanan.

Dxel naj gac xDios reeman, abi' laa reeman gac da bejnan.

¹¹ Dxejzii ree ad rüjntri naguiejn gusiid ree bejn lasa' reeman.

Ni'qui bijch reeman par güünbee reeman naj, din gra reeman güünbee naj, diidz xindobëz xt bengol.

¹² Abi' naj güün perdon gra ree ni mal ni ma been reeman, abi' ad yu't dxej gusaaladxan xtol reeman.

¹³ Chi rëb Dios guial guixal nejj cüb guin rën guiëban guial achetri sirv rüjn nejj gulal guin ni gop ree bejn par guidxin reeman lojman, abi' ni ad rüjntri sirv nayob nitan.

9

Yadoo ni yu' loj guidxliuj në yadoo ni yu' xaryabaa

¹ Dunuj ree rayagbee guial chi binal bejn ley ni cayguie'ch ree naj nejj gulal, loj ley guin zëed xhienaag guiën bejn Dios, xhie tëë naag rayal güün reeman tijb yadoo loj guidxliuj guie. ² Lën yadoo guin guzëëb tijb lajd persi gojcan tio'p lën. Tijb lënan ni naj niz ro' port, lod brii laj lod nada abi' lën guin guzobj ni ru gandel në tijb mex ni gudxib ree guiadxtil ma gogle'. ³ Dxel stijb lën guin xijch lajd guin brii laj lod mazcsi nada. ⁴ Lën guin guyu tijb altar ni or lod rgu' reeman goxyal në tijb caj ni brii laj xcaj xpromejs ree Dios. Abi' caj guin nadüüban or zi'c lënan zi'c xijchan. Lën caj guin yu'chaaw guiaj ni ca ree guidxii xmandamient Dios në xvar Aarön ni бага' con stijb re or ni guyuchaaw mana. ⁵ Dxel guijc caj guin guzobj tio'p xfigur ree anjl bén la ree querubines abi' con xhiil reeman rusiaaw reeman guijc lod ruroob bixhioz zojbloj xrejñ ree be por xtol ree bejn. Per por yan ad rüjnt naguiejn guzatan mazri ree ni guin lojdi.

⁶ Chi gulox been reeman gra zi'c rayal gac lën tijb yadoo loj guidxliuj guie, dxel guixie guixie guyu ree bixhioz lën yadoo guin per naabzi lod brii laj lod nada, lod rguieen reeman ni rayal güün reeman par Dios. ⁷ Per stijb lën guin lod la mazcsi nada, tijbzi bixhioz zojbloj ru ni tib volt lën tib ijz. Abi' ad zajct chu'man bal id zinëman xrejñ ree be din güün Dios perdon xtolaman në xtol ree bejn. ⁸ Por ree ni guin rulüü xSprijt Dios dunuj ree guial la'tgaj rüjn sirv lod brii laj lod nada ad yu't mod chu' bejn lod la mazcsi nada. ⁹ Gra ree ni guin najzi reen tijb ejempl par dunuj ree yan, din gon në ree be ni binë ree bejn par Dios, ad beent reen sirv par nayaaloj ninialadx reeman guial ma naya

reeman loj Dios. ¹⁰ Gra ree costumbr ni gop reeman zi'c ree con ni gudaw reeman, nè ree ni gu' reeman nè gra ree ni rayal güün reeman din naladx reeman guial ma naj reeman naya, laan naj ni gunabee ley güün ree bejn xt dxej ni bachaa Dios gra.

¹¹ Din yan ma bi't Jesucrist, bèn naj bixhioz zojbloj par dunuj ree, abi' por laaman ma raya'p ree yaya'p tēē ree ni ma rēb Dios yaya'p ree. Abi' mazri zagdxē naj lēn yadoo lod ma guyuman mazri lasajc yadoo guin guial ad zojbtan loj guidxliuj guie ad gojc tēētān por ree bénguidxliuj guie. ¹² Jesucrist ma guyuman lēn yadoo lod nada da't, per ad con xrejt ree go'n dobēz o xrejn ree dxib, guyuman con quijb xrejnman. Laaman con tib volt guyuman, ad rüjnt naguiejn güünman zian stijb abi' por laaman raya'p ree perdon par tiblayaa. ¹³ Tiamp gulal xrejn ree dxib o xrejn ree go'n o cobdēj ni we'c ree vagdobēz ruroob bixhioz guijc ree bejn persi naladx reeman ma naya reeman. Yan bal zian naladx reeman guial raya'n reeman naya, ¹⁴ diidxgui con xrejn Jesucrist nid zanaduladx ree ya guial ma naya ree niz loj Dios xcwent dux tol ree, din chile' yaguieen ree ni rēn Dios bèn naban. Din por xguialrniabee xSprijt Dios, Jesucrist bèn ad beentczi dol, badēē laagajcaman zi'c tijb gon par Dios.

¹⁵ Zeel por Jesucrist ma raya'p ree tijb nejz cüb par yadxin ree loj Dios. Din por xguialgüjt Jesucrist ma yu' perdon par dux tol ree nè xtol ree bèn ni binal ley, gra ree bèn naj xbejn Dios zian yaca' ree ni rēb Dios yaya'p ree par tiblayaa. ¹⁶ Din zi'cgajc tijb bèn rlies tijb gui'ch guial chu yaya'nnē ree ni rajpaman, ad züjnt gui'ch guin dxiin xt chi ma güjtaman. ¹⁷ La'tgaj naban bèn guin achet sirv rüjn gui'ch guin, rüjnān sirv xt chi ma güjtaman. ¹⁸ Zeel diidz tiamp gulal par guzuloj been sirv ley ni basa'n Dios loj Moisejs, bagüjt reeman tio'p choon ree be gui'xh persi gulēē reeb rejn. ¹⁹ Din chi gulox bagojn Moisejs gra ree bejn gra ni zēēd loj xley Dios dxel cwa'man guidxlad xiiil ni nayē' culor xnia bacaaman laan guijc tib xidx yag ni la hisopo, dxel badxe'man laan loj nijs ni no'ch xrejn ree go'n dobēz con xrejn ree dxib dxel bacojpaman laan loj libr ley nè guijc ree bejn ²⁰ rēbgajman: "Rejn guie naj tijb sen guial ma banee Dios xleyaman lojdi par güündi laan cumplid." ²¹ Bacojp tēēman rejn guin lēn yadoo nè guijc gra ree ni rüjnnē ree bixhioz dxiin lēn yadoo. ²² Ley guin gra gunabeen gagle' con rejn din guiguien guial ma naya reen delant loj Dios, din sin rejn achet perdon par dol yu'.

Xrejn Jesucrist rquied dol

²³ Zeel par guiguien guial ma naya ree ni beennē ree bixhioz dxiin lēn yadoo guin, gojc naguiejn bagüjt reeman be ree persi beenle' reeman ni guin ree. Per ni guin ree najzi reen zi'c tijb xsen ni yu' ree xanyabaa, din par ree ni yu' xanyabaa ryaadx rejn mazri lasajc guial loj xrejn ree be. ²⁴ Abi' Jesucrist ad lēnt yadoo ni been bénguidxliujn guyuman, yadoo ni najzi tijb sen guial xhienaag naj xanyabaa, ma guyuman xanyabaa lod caneeman por dunuj ree loj Dios. ²⁵ Jesucrist ad biaadxt niējtaman zien volt por dol ree, ad beentaman zi'c been ree bixhioz zojbloj guial gazobijz binē reeman xrejn ree be lēn yadoo lod brii laj lod nada da't. ²⁶ Din bal id zian, zien volt niējtaman diidz chi gocchaaw guidxliuj. Per chi bidxin dxej bi'taman, con tib voltzi badēē laagajcaman par guiētaman din chiquied dux tol ree. ²⁷ Zi'cgajc gra bejn tib voltzi rējt reeman, dxel zēēd ni yadēē reeman cwent loj Dios. ²⁸ Ziangajc Jesucrist tib voltzi badēē laagajcaman par guiētaman din quixaman por xtol ree bejn. Abi' chi gui'taman stijb ad zi'ttaman por dol, gui'taman din chignēman bèn cabēz ree laaman.

10

Ad leyt riquied dol

¹ Ley ni basa'nne Dios Moisejs najzan tijb sen xcwent ree ni gac, per ad por ziant gojc ni rayal gac. Din majsi gazobijz güjt ree be par Dios zi'c gunabee ley güün bejn, per ad guyut dxej ni naladx reeman guial ma bayaaloj naya reeman loj Dios. ² Din bal ninialadx reeman guial ma naya reeman con tib volt ni bagüjt reeman be ree par Dios, dxel ad ryaadxtri nüjn reeman zian guial ma ragbee reeman achetri xtol reeman. ³ Per ad gunaladxt reeman zian, gazobijz rusaaladx xtol reeman chi rugüjt reeman be ree par Dios, ⁴ din xrejn ree go'n në xrejn ree dxib ad zajct chiquiedan xtol ree bejn.

⁵ Zeel chi bi't Jesucrist loj guidxliuj, rëbaman loj Dios:

Ad rëntil xrejn ree be

ni'qui los demazri ree ni ridnë bejn par lüj,
zeel baneel naj cuerp ni ra'pan loj guidxliuj guie.

⁶ Ad rëntril guial ruze'c reeman be ree par lüj
ni'qui xrejn ree be ni ridnë reeman por xtol reeman.

⁷ Zianan zeel rën:

“Laa naj guie, Dad Dios,
zialan par günan zi'c rën,
zi'c ca loj libr por naj.”

⁸ Jesucrist yaloj rëbaman guial ad rënt Dios xrejn ree be, ni'qui los demazri ree ni rinë bejn par laaman, ni'qui guial ruze'c reeman be ree por xtol reeman zi'c rniabee ley güün reeman. ⁹ Chi gulox rëb Jesús zian, dxel rëb tëëman: “Laa naj guie, Dad Dios, zialan par günan zi'c rën.” Zianan baloox Jesucrist guial rinal ree costumbr ni rëb loj ley abi' guxhalaman tijb nejz cüb par yadxin ree loj Dios. ¹⁰ Yan ma nayajc ree naya delant loj Dios guial ma been Jesucrist zi'c rën Dios, badëed laagajcaman güjtaman por xtol ree bejn, con tib volt par tiblayaa, ad ryaadxt güünman zian stijb.

¹¹ Gra ree bixhioz Israel guixie guixie za' reeman cayüjn reeman gra ni rniabee ley güün reeman, abi' guixie guixie rugüjt reeman be ree par Dios. Abi' majsi zien volt rüjn reeman zian per ad riquiedt guialrugüjt be guin ree xtol ree bejn. ¹² Per Jesucrist con tib volt badëed laagajcaman güjtaman por xtol ree bejn, ad ryaadxt güünman zian stijb. Dxel gurejman xladbee Dios, ¹³ lod cabëzaman guidxin dxej nabeeman loj gra ree bén rdxe'ch laaman. ¹⁴ Din laaman con tib volt badëed laagajcaman güjtaman por xtol ree bejn dxel tiblayaa ma naya ree bén rliladx laaman. ¹⁵ Abi' dunuj ree rayagbee ree guial walin din por xSprijt Dios zëed ree diidx ni ca loj xtiidx Dios guial rëb Dios:

¹⁶ Zianan ma baya'n diidx gac
con ree bejn chi guidxin dxej:
Guijc reeman gusa'n da leyan
abi' lën luxdoo reeman gucanan

¹⁷ Abi' rëb tëëman:

Ad yu't dxej gusaaladxan xtol reeman
në graloj ree ni mal ni ma been reeman.

¹⁸ Abi' zi'c ma yu' perdon par dol, ad rüntri naguiejn guiët ree be por dol.

Royal yubiig ree loj Dios

¹⁹ Zeel compniar raliduladx ree Jesucrist sin guialrdxeb ma zajc yadxin ree lod zojb Dios por xrejn Jesucrist, ²⁰ din chi badëed xcuerpaman persi güjtaman, guxhalaman tijb nejz cüb ni zidnë guialnaban par dunuj ree. ²¹ Yan zi'c ma rniabee Jesucrist dunuj ree, bén naj bixhioz zojbloj xanyabaa, ²² con

guidib du luxdoo ree ma zajc yubiig ree loj Dios con tijb gualrliladx ni wali ree raliduladx ree laaman, con tijb quiarguejn naya sin xgab mal, con tijb cuerp ni ma baya loj dol, zi'c chi qui badiibri dux cuerp ree con nijs naya. ²³ Zeel rayal yadxu'dxi'ch ree loj ni raliduladx ree Dios, din laaman züjn cumplid xtiidxaman zi'c ma rëbaman. ²⁴ Rayal yagueien ree xgab xhienaag yalu' ree luxdoo ree dux compniar ree yayën tëë du lasa' ree yagueien tëë ree ni naj zagdx. ²⁵ Ad rayalt yagueien ree zi'c rüjn ree bèn ad rejtri ree lod radxaag lasa' ree dux compniar ree par chignia' reeman mazri xtiidx Dios, rayal yalu' ree luxdoo du lasa' ree, abi' mazri yan gual ma rayagbee ree gual ma zidyob dxej gui't Jesucrist stijb.

²⁶ Din bal ma rayagbee ree xtiidxli Jesucrist abi' baguieen ree xgab yagueien ree mazri dol, dxel ad yu'tri por chu zajc yayajc ree perdon. ²⁷ Ni cabësi dunuj ree naj xgualguxtis doxh Dios, tijb bajl lod yayal ree bèn ad ruzoobt xtiidxaman. ²⁸ Chi bal id been tijb bejn zi'c rniabee ley ni basa'nnë Dios Moisejs, abi' yu' tio'p choon testiw gual ad beent bèn guin zi'c rniabee ley guin, dxel ad yu'tri mod laaman loj gualgüjt ni rayalaman. ²⁹ Yan gol been xgab, jixixi mazri castiro' yayal bèn rnieeguijdx xSprijt Dios bèn ragnë dunuj ree! Bèn ni naladx gual achet lasajc Xi'n Dios, abi' rüjnman desprejs xrejnman, rejn ni rulüü gual gac zi'c rëb Dios, rejn ni rusia xtol bejn. ³⁰ Dunuj ree rayagbee gual rëb Dios: "Naj rayal gün gualguxtis, naj gudë ni rayal bejn." Rëb tëëman: "Dios naj bèn ni yaca' cwent por ni cayüjn bejn." ³¹ jAbi' nadxeb yayal bejn xcasti Dios bèn naban!

³² Per lëjt gol basaaladx xhienaag guzajquidi chi qui beenbeeridi xtiidxli Jesucrist. Gudaandi gra gualzi ni gudëdidi. ³³ Yu'di zien loj da't gualzi badëëd ree bejn lëjt, abi' baze' reeman lëjt delant loj ree bejn, yu' tëëdi ad gulëëladxtidi bèn guzac ree zian. ³⁴ Ad gulëëladxtidi bèn ni guyu ree ladxgüiib, abi' chi baca' ree bejn gra ni rajpidi, babaagajquidi gual ma ragbeedi mazri lasajc ni rajpidi xanyabaa, në ree ni rajpidi ni, taan reen tiblayaa. ³⁵ Zeel ad gusa'ndi gualrliladxidi Jesucrist, din por gualrliladx guin dád zagdx naj ni tia'di. ³⁶ Rüjn nagueien gapidi pacens din chile' güündi zi'c rën Dios, zian tia'di ni ma rëbaman guneeman lojdi. ³⁷ Din loj xtiidx Dios rëb:

Nayob, dád nayob gui't bèn naj gui't,
ad zaglaataman.

³⁸ Abi' bèn naban zi'c rënan,
guidib tiamp ni nabanman rliladxaman naj.
Per bal gusa'nman ni rliladxaman naj,
ad zabaanë'tan laaman.

³⁹ Per dunuj ree ad nayajct ree zi'c ree bèn rusa'n ni rliladx reeman Jesucrist abi' rayal reeman casti, dunuj ree nayajc ree bèn rliladx Jesucrist diidxli par chitëë yayal ree casti.

11

Guialrliladx Dios

¹ Yan, çxhienin naj guialrliladx? Guialrliladx naj gual guidiblagaa yaliduladx ree gac zi'c caylëjz ree gac, në gual waliqiu ni raliduladx ree ni ad raguaat ree. ² Dux bëngulal ree baya'n reeman zagdx delant loj Dios gual bililadx reeman laaman.

³ Zi'c raliduladx ree Dios, dunuj ree rayagbee gual con xtiidxaman beenman xanyabaa në guidxliuj në gra ni raguaa ree, achetci ni beenman con ree ni raguaa ree yan.

⁴ Guial bililadx Abel Dios, zeel zagdxe naj gon ni badëeman guial loj Caïn, abi' baya'nman zagdxe delant loj Dios abi' cwa' Dios gon ni bazaladx Abel lojman. Zian majsi ma güjt Abel, per sta rguiajt xhienaag bililadxaman Dios.

⁵ Guial bililadx Enoc Dios zeel ad güjttaman, guidib nabanman ziaman xanyabaa abi' ad badxejlt ree bejn laaman guial ma zignë Dios laaman. Per chi gadaman chignë laaman, loj xtiidx Dios rëb guial bayuladx Dios zi'c gubanman. ⁶ Abi' achut zajc güün zi'c rën Dios bal id rliladxaman laaman. Chutëez bèn rën gap nejz par guidxinman loj Dios rayal chililadxaman guial yu' Dios chililadx tëëman guial laaman rudëë ni rëbaman gudëëman loj ree bèn raguüil laaman.

⁷ Guial bililadx Noé Dios dxel chi rëb Dios lojman guial gac ree ni gadaman guguaa gac bazoobaman xtiidxaman, beenchaawaman tijb barcw din laaman con ree xfamilaman loj ni rëb Dios gac. Dxel por guialrliladx guin biguien guial gra bénguidxliuj rayal casti ni rëb Dios, abi' baya'n Noé zagdxe delant loj Dios guial bililadxaman xtiidxaman.

⁸ Ziangajc Abraham guial bililadxaman Dios, bazoobaman xtiidxaman chi rëbaman lojman din grii ladxaman cheman lod tia'man guidxliuj ni gudëëd Dios lojman. Abi' brii ladxaman ni'quid ragbeetaman banguin cheman.

⁹ Guial bililadxaman Dios, gubajñman zi'c benzit loj guidxliuj ni rëb Dios gudëëdaman lojman. Gurejman lën ree carp ni naj në guid, ziangajc Isaac në Jacob në laa reeman rayal guidxliuj guin. ¹⁰ Gubajñ Abraham zian guial ragbeeman chisobaman luguiedx ni beenchaaw Dios, guiedx ni ad yu't dxej nit.

¹¹ Ziangajc Sara, por xguialrliladxaman, majsi ma najman bengol par chu' xi'nman, per guyuman gojl par gacaman na abi' guyu tijb xi'nman guial bililadxaman guial rüjn Dios cumplid xtiidxaman. ¹² Zian gojc majsi bengol da't ma naj Abraham per gojcaman famil. Dád zien ree xdiaaman guyu zi'c ree bajl xanyabaa, zi'c ree üx ni riga' ro' ni nijsdoo ni ad zile't guiyab.

¹³ Gra ree bèn ma bazatan xt bidxin dxej güjt reeman bililadx reeman Dios, majsi ad baguiaat reeman gojc cumplid gra ree promejs ni been Dios loj reeman, per guial rliladx reeman ragbee reeman guial zajc zi'c rëb Dios abi' rabaa reeman. Laa reeman ragbee guial tio'p choon dxejzi zëed reeman loj guidxliuj guie ad tiblayaat. ¹⁴ Abi' ree bèn rniee zian, zian rguienchaaw guial sta rguüil reeman lod diidxli gac ladx reeman. ¹⁵ Din bal por guidxliuj lod guza reeman cayüjn reeman xgab, dxel zile' nayejc reeman ni stijb. ¹⁶ Per laa reeman mazri rüjn reeman xgab por tijb luar lod naj mazri zagdxe, mazri rüjn reeman xgab por xanyabaa. Zeel Dios ad ratutaman najman xDios reeman abi' ma beenchaawaman luar lod guiban reeman xanyabaa.

¹⁷ Guial bililadx Abraham Dios, dxel chi been Dios laaman prueb din gugüjt xi'nman Isaac din gudëëdaman laaman zi'c gon par Dios, cwëjb Abraham majsi tijbzi Isaac guin naj xi'nman, majsi ragbee tëëman guial rëb Dios lojman: ¹⁸ "Por xi'nl Isaac gacxhieje da't xdiaal." ¹⁹ Per Abraham yu'gujcaman guial rajp Dios guialrniabee xt par yasbanman bengüt ree, abi' zi'c ruluü baban xi'nman stijb chi gudëëdaman prueb guin.

²⁰ Ziangajc Isaac por guialrliladxaman Dios dxel chi beenle' ree xi'nman Jacob con Esaú, rëbaman xhienaag gac con tijbgaj reeman. ²¹ Abi' ziangajc Jacob guial bililadxaman Dios ziangajc beenle'man grop ree xi'n Xiëb chi ma guidxin hor guiëtaman. Dxel cwa' yagriadxaman abi' gurejdx gunabaman Dios. ²² Ziangajc Xiëb guial bililadxaman Dios, chi ma guidxin hor guiëtaman, rëbaman guial grii ree bèn Israel Egipto, abi' rëbaman loj reeman xhienaag güünnë reeman xdxijtaman.

²³ Por guial bililadx ree xdad xniaa Moisejs Dios chi gol Moisejs guin, baquie'ch reeman laax choon b ew guial baguiaa reeman najx xindoza'cdxoon, abi' ad bidxebt reeman guial r b b n naj rey guial gui t gra ree xindob z. ²⁴ Abi' chi goc Moisejs guin bengol, guial bililadxaman Dios, gojc xixgabaman cwexuuman niacjaman xi'n xi'ndxa'p rey Egipto. ²⁵ Par laaman zagdxeli naj sagdiajman con ree xb n Israelaman, luar n jnman dol niro'n'ladxaman laa reeman din niapjapan ni r nman, ni ad rdaant ree par tiblayaa. ²⁶ Par laaman mazri lasajc sagdiajman zi'c Cristo luar niapjapan gra ree guialnaza'c ni yu' Egipto, din mazri yu'guijcaman guialnaza'c ni yayalaman delant loj Dios. ²⁷ Guial bililadx Moisejs Dios, briiman Egipto, ad bidxebtaman majsi balen rey Egipto. Guzudxi'chaman zi'c rul u ruguiaa-man Dios b n ad zajct guguiaa ree bejn.

²⁸ N  guial bililadx Moisejs Dios, beenman lanij pascw, abi' gunabeeman baroob ree b n Israel rejn ro' xport lidx reeman, din chi t d xianjl guialg jt, ad zug jtaman xi'n yaloj ree b n Israel. ²⁹ Guial bililadx ree b n Israel Dios, gud d reeman zi'c loj yujbidx lod bixal loj nijsdoo la nijsdoo xnia. Per chi guy n ree b n Egipto nid d reeman, loj hor guin bayaaw nijs guin dxel gu' reeman nijs abi' g jt reeman.

³⁰ Guial bililadx ree b n Israel Dios, chi baza' gajdx dxej ni biaw reeman guiedx Jeric , dxel bazaj ze' ni nayaw guiedx guin. ³¹ Abi' Rahab b n goc b ngunaa dxuudx luguiedx Jeric , guial bililadxaman ad g jtaman chi g t ree los demazri ree b n ladxaman b n ad bazoobt ree diidx, guial baca'man b n Israel ni we ree bigla'ch luguiedx guin.

³² Yan,  xhie mazri ganin lojdi? Ad zadaant tiamp guin ganin lojdi xcwent Gede n, Barac, Sans n, Jeft , Davi, Samuel n  xcwent ree b n bad e xtiidx Dios loj ree bejn. ³³ Gra reeman bililadx Dios abi' been reeman gan loj zien ree nacion, been xguialguxtis reeman zi'c rayal, baguiaa reeman gojc cumplid ni r b Dios loj reeman abi' basiaaw reeman ro' ree beedx. ³⁴ Guzuj reeman loj bajl ro' abi' achet goc reeman, gulaa reeman loj guialg jt con espad, guyu reeman gojl chi rul uczi' ad yu't reeman gojl, guzudxi'ch reeman loj wadijl abi' balaagdxa reeman benzit ni gudil  reeman. ³⁵ N  ree b ngunaa ni g t ree xfamil, por guial bililadx reeman Dios baban ree xfamil reeman stjib.

Per yu' ree bejn majsi g jt reeman, per par laa reeman mazri zagdx guzadiaj reeman loj ree b n bag jt laa reeman, luar nusa'n reeman guialrliladx reeman Dios par gap reeman stjib guialnaban c b ni mazri lasajc. ³⁶ Yu' t e reeman guzagdiaj baze' ree bejn laa reeman, gudijn ree bejn laa reeman, xt guxhii ree bejn laa reeman con caden abi' guyu reeman ladxguiib. ³⁷ Yu' reeman bag jt ree bejn con guiaj, yu' t e reeman bag jt reeman gul exh n reeman laa reeman con sierr, g jt t e reeman con espad. Yu' t e reeman biza gra lad najcw reeman guid xab xiil n  guid xab dxib, probza laa reeman naya biza reeman, graloj beenn  ree bejn laa reeman. ³⁸ Biza reeman niz loj yujbidx, niz ruguia' ree, n  graloj l n ree guiajbiliaa. B n guin ree ad rayal nibajn reeman loj guidxliuj guial d d benza'c gojc reeman. ³⁹ Abi' majsi biguien guial gra reeman diidxli bililadx reeman Dios, per ad cwa't reeman ni r baman loj reeman. ⁴⁰ Din laaman beenman xgab tijb ni mazri zagdx par dunuj ree, abi' ad gojc gajt ni r baman loj reeman din tijbzi yaca' ree ni r baman con laa reeman.

12

yunaal ree Jes s

¹ Zeel, zi'c ma bacaagdiajg ree por zien ree bejn xhienaag bililadx reeman Dios, rayal yasa'n ree tiblax gra dol n e gra ree ni rudxoon yaguieen ree zi'c rayal, ad zalenya' t  t ree yunaal ree nejz ni ma bal   Dios dunuj ree. ² Rayal yadx'e guijc ree Jesucrist din por laaman z  d guialrliladx ni raya'p ree abi' por tijbzi laaman rayaalox guialrliladx ni raya'p ree. Gudaanman guialzi ni gud daman loj cr jz, ad batutaman g jtaman zian din ragbeeman guial chi ma gulox guzagdiajman, dxel gui't guialrabaa. Abi' yan ma zobjaman xladbee Dios xanyabaa.

³ Gol been xgab xhienaag guzagdiaj Jesucrist chi basagdiaj ree b ndol laaman, chit   yadxaguidi, ad yaleny'a'di por ni cazajquidi. ⁴ Din majsi cusagdiaj ree bejn l jt guial cay jndi nagueijn ad cay jntidi dol, per ad wazujtidi loj gualg jt por zian. ⁵   Wen ma bayanladxidi ya xhienaag banee Dios l jt consejw najdi xi'nman? Loj xtiidxaman r b: Xi'n, bidxga' zi'c runee dux Dad ree Dios l j consejw, ad bal yaleny'a'l chi guzuxnejzaman l j.

⁶ Din r jnnaman b n ni naj ree xi'nman, ruzuxnejzaman laa reeman guial r nman laa reeman.

⁷ Zeel gol gudaan guialzi, din zagdx'e najn par l jt. R jnn  Dios l jt zi'c r jnn  bejn xi'nman,   wen yu' dad ad ruzuxnejzt xi'n ya? ⁸ Yan bal id ruzuxnejz Dios l jt zi'c r jnn  gra ree xi'nman, r n gui ban guial ad najtidi xi'nman diidxli, ad najtaman xDadidi. ⁹ L jt ragbee guial chi bayajc ree xindoo, gudijn dux dad ree dunuj ree din yacaagdiajg ree xtiidxaman abi' raya'p reeman respejt. Yan,   chexc di ad ree yazoob xtiidx dux Dad ree Dios b n yu' xanyabaa, din yaya'p ree guialnaban con laaman? ¹⁰ Dux dad ree ruzuxnejzaman dunuj ree por tio'p choon dxej ni zio'p ree loj guidxliuj din yaguieen ree zi'c ni naladxaman naj zagdx'e. Per Dios ruzuxnejzaman dunuj ree par tijb ni mazri zagdx'e par dunuj ree, ruzuxnejzaman dunuj ree din yabajn ree naya zi'c laaman. ¹¹ Diidxliczi achet gualnaa naj nix loj hor ni cad dilan, ragnaalil. Per ree b n ni rusiid ruzoob diidx zian, laa reeman naban zagdx'e, naalyuj delant loj Dios.

Ad cw  ladxidi xtiidx Dios

¹² Zeel gol bagu' luxdoodi, gol bad  d valor l jt gajc zi'c tijb b n raca'ladx chi ma badxag da'taman. ¹³ Gol been nagueijn gol gubajn xnejz, din ree b n ragdx'a xhie gu n reeman, ad gusa'n reeman xnejz Dios, chu' luxdoo reeman zagdx'e chinal reeman laan.

¹⁴ Gol been nagueijn guibandi zagdx'e con gra ree bejn, gol gubajn naya delant loj Dios din b n ad nabant naya ad zile't guguaaman dux Dad ree Dios. ¹⁵ Gol gojp cudad chit   chu' tijbidi gusa'n tiblax zi'c r n Dios gagn man l jt chit   chu' tijbidi gac zi'c gui'xh nala ni r jn guialquia abi' guxhiinan gra xcomparidi. ¹⁶ Ni'qui tijbidi ad rayalt sun di b n ad najt lacheelidi, ad cwe'quidi tiblax ni zagdx'e ni z  d ree por Dios chit   saquidi zi'c guzac Esa , por tijb guialraw bato'man guialrniabee ni rayalaman guial najman b n yalox loj bijchaman. ¹⁷ Abi' l jt ragbee guial chi guy n Esa  n jnle' xdadaman laaman ad beenle'taman laaman zi'c rayalaman. Majsi d d biinman gunabaman laan, per ad bile't nuchaaman ni beenman.

¹⁸ L jt gadidi chibig lod ad najt par gugaalidi zi'c gubig ree b n Israel gulal guijc guia' Sinaf lod baguiaa reeman cayajc bajl guijc guia' guin, baguiaa reeman go'xh ya's ni basiaaw guijc guia' guin abi' rbi' gaj tijb bidoxh yagaj

zi'c bidojn. ¹⁹ Dxel biguiejn reeman bibejdx tijb trompejt abi' biguiejn reeman cha' Dios guneenëman laa reeman. Per guial tant bidxeb reeman biguiejn reeman cha'man dád guzajc reeman laaman liaadx ad rnieenëman laa reeman. ²⁰ Din ragbee reeman guial nawëëg naj ni gunabee Dios güün reeman chi rëbaman: “Chutëëz bejn o be gui'xh ni gugaal guijc guia' guie rayal guiëtaman o guiëtib con guiaj o con lans.” ²¹ Nadxeb naj ni baguiaa reeman xt Moisejs rëb: “Rnij guial tant rdxeban.”

²² Per lëjt ma bibiguidi loj Dios, ad guzajctidi zian. Ma yu' nejt par guidxindi ruguia' Sión, xanyabaa lod naj Jerusalén ladx Dios bèn naban, lod nadxag lasa' ree zien da't ree anjl, ²³ dád nix yu' luxdoo reeman rën reeman laaman lod yadxaj lasa' ree xbejn Dios bèn ni ma ca ree laj loj libr xanyabaa. Ni zobj Dios, bën yanab cwent loj gra bejn, ni tëë za' xSprijt ree bën guban zi'c rayal laa reeman ma naya reeman por Dios. ²⁴ Ni gajc zobj Jesucrist, bën guxhal nejt cüb ni raya'p ree par yadxin ree loj Dios. Chi güt Abel xrejman gunab gac gualguxtis, per con Jesucrist ad gojct zian, güjtlaman, guxhie' tëë xrejman par yayajc ree perdon.

²⁵ Zeel gol gojp cudad gol bidxga' Dios, laaman najman bèn rnieenë dunuj ree. Din bal bèn ni ad bidxga't ree xtiidx Moisejs bèn badëëd xtiidx Dios loj guidxliuj guie ad gulaat reeman loj casti ni rayal reeman, diidxgui dunuj ree nid zayal ree xcasti Dios ya bal id zayidxga' ree xtiidx Jesucrist, bèn guza diizd xanyabaa din guinieenëman dunuj ree. ²⁶ Chi gunee Dios béngulal ree ruguia' Sinaí, binij guidxliuj. Per yan ma rëbaman: “Gunin guidxliuj zatijb, per ad guidxliujtzi, nè xanyabaa.” ²⁷ Chi rëb Dios guial güünman zian zatijb, rën guiëban guial gunijman gra ni beenman, din chiquied ni rayal chiquied din yaya'n ni ad rayalt chiquied. ²⁸ Zeel rayal yadëëd ree quixtëë loj Dios guial ma rayal ree lod canabeeman, lod ad yu't dxej nit, abi' con respejt nè gualrdxeb yaguien ree ni ruladxaman. ²⁹ Din dux Dios ree naj zi'c tijb bajl ni ruze'c gra.

13

Xhienaag güün bejn ni yayuladx Dios

¹ Ad cwëz guiëndi xcompniaridi bèn rliladx ree Jesucrist. ² Ad yayanladxidi gudëë lidxidi yaya'n ree bèn ri't, din zian yu' ree bèn baca' ree xianjl Dios sin guial gagbee reeman chunin.

³ Gol basaaladx bèn yu' ree ladxguiib, gol gunaladx guial nè lëjt yu' ladxguiib con laa reeman. Gol been tëë xgab por ree bèn ni cazagdiaj, gol gunaladx guial nè lëjt cazagdiaj.

⁴ Gol gojp respejt gualruxhliaa, ad gusquiee lacheelidi. Din Dios zudëëdaman casti bèn za'në xinguaaw o béngunaa ren, nè gra ree bèn ni rüjn ree ni dxuudx con ree bèn ad najt lacheel reeman.

⁵ Ad sëëbladxidi milia, gol baya'n conform con ni rajpidi din Dios ma rëb: “Gra dxej za'n con lüj, abi' ad yu't dxej gabëladxan lüj.” ⁶ Abi' con confianz zajc yagui'e'ch ree:

Da Dadan Dios naj bèn ragnë naj
ad rdxebtan majsi xhietëëz güünnë ree bejn naj.

⁷ Gol basaaladx ree bèn ni gunabee ree lojdi, bèn ni balüü ree lëjt xtiidx Dios. Gol been xgab xhienaag gubajn reeman gol binal tëë zi'c bililadx reeman Jesucrist.

⁸ Abi' Jesucrist laagajcaman nieey, laagajcaman yan nè zianczi. ⁹ Ad tiëbidi gusquiee graloj ni rulüü ree bejn lëjt, din ad najt reen zi'c rayal chinalidi

Cristo. Mazri zagdxe gol gojp confianz xyudar Dios din guibandi xnejz luar chinalidi costumbr xcwent guial xhie zajc gawidi o xhie ad zajc gawidi, din costumbr guin ree achet yudar rüjn ree delant loj Dios.

¹⁰ Dunuj ree raya'p ree tijb bèn güt por dunuj ree, laaman naj zi'c tijb xgon bejn por xtolaman, gon ni ad zajc gaw ree bixhioz rüjn ree sirv lèn yadoo guin. ¹¹ Bixhioz zojbloj guin, laaman rinè xrejñ ree be ni rudëed ree bejn zi'c gon por xtol reeman, rinëman rejn guin lèn yadoo lod rayal chinëman laan. Dxel ree begüt guin re'c reeb ro' guiedx lod achut zojb. ¹² Ziangajc gojc con Jesucrist, ro' guiedx Jerusalén güjtaman par gusiaman bejn xtol reeman por xrejñman. ¹³ Zeel yunaal ree Jesucrist majsi gulëe reeman laaman luguedx Jerusalén, nè majsi xhietëez guialxtu o guialrzagdiaj yadüüd ree zi'c laaman. ¹⁴ Din loj guidxliuj guie ad raya'pt ree tijb guiedx lod ma nabajn ree tiblayaa, dunuj ree caylëjz ree lod yabajn ree tiblayaa. ¹⁵ Zeel con xyudar Jesucrist ad yacwëez ree yadëed ree quixtëe loj Dios, laan naj gon yadëed ree lojman, abi' zian raxhoobdol ree guial nayajc ree xbejnman. ¹⁶ Ad yayanladxidi güüñdi ni zagdxe güün tëe lasa'di yudar con ni gactzidi, din laa reen naj ni ruladx Dios.

¹⁷ Gol bazoob xtiidx ree bèn rniabee lojdi, bèn rulüü ree lëjt xtiidx Dios. Gol gojp reeman respejt din laa reeman ruguiaa lëjt din chinalidi xtiidx Dios, guial ragbee reeman yadëed reeman cwent loj Dios. Gol been ni yabaanë reeman ad ni cu'nayat laa reeman, din guial ad ruzoobt diidx achet sirv güüñan lëjt.

¹⁸ Gol gurejdx gunab Dios por dunujñ. Dunujñ rayagbee guial achet ni mal cayguieenan, abi' rayënan guial gra ni yaguieenan, yaguieenan laan xnejz. ¹⁹ Rniaaban lojdi din cwedx guiniabidi Dios por naj, din guneeleman permis diob guialan din gazun con lëjt zatijb.

Düidx bigra ni bacan loj gui'ch guie

²⁰ Dios bèn rabe'cdxe luxdoo ree bejn, bèn basban Jesucrist, rajpaman dunuj ree zi'c rajp tijb bejn xiil, por xguialgüjtaman zianczi ma raya'p ree nejz par yadxin ree loj Dios, ²¹ laaman gagnë lëjt par gra ni naj zagdxe din chile' güüñdi zi'c rënman. Laaman gagnë dunuj ree din yayajc ree zi'c rënman guial ma nayajc ree tijbzi con Jesucrist. ¡Laaman rayal yaya'p ree respejt zianczi! Amén.

²² Compniar raliduladx ree Jesucrist, ad naroobt gui'ch guie, per rniaaban lojdi ad yalenya'di por ree diidx ni canin lëjt cunen lëjt consejw. ²³ Rugojñ tëen lëjt guial ma barii dux compniar ree Timoteo ladxguilb abi' bal nayob gui'taman niz guie, dxel du gropan yo'p yudganajn lëjt.

²⁴ Gol bagajpdioz gra ree bèn rniabee lojdi bèn ni rulüü ree lëjt, nè gra ree dux compniar ree bèn rililadx ree Jesucrist. Abi' ree bèn Italia rugajpdioz reeman lëjt.

²⁵ Dios güünle' gradi. Amén

Gui'ch bacaa Santiaaw

Rxhiaal Santiaaw xtiidx Dios

¹ Naj naj Santiaaw, cayūnan xchiin Dios nē xchiin Dad Jesucrist, rugajp-diozan gra ree bēn naj xdiaa Israel, nare'chidi guidib guidxliuj.

Quiarguiejn zēēd loj Dios

² Gradi compniar raliduladx ree Jesucrist, rnin lējt, gol babaa majsi xhi-tēēz loj guialrzagdiaj tēdidi. ³ Lējt ragbee, chi rdēdidi gralojn guial rliiladxidi Dad Jesucrist, zian rusiididi gapidi pasens. ⁴ Per gol been naguiejn gūūn pasens guin lējt yudar din gaquidi zi'c rēn Dios, gusnuudi loj xnejzaman, chitēē guiyaadxidi xhienin.

⁵ Bal chu lējt riaadx chu' mazri xquiarguiejn, gol gunab xquiarguiejndi loj Dios. Laaman guneē gra ni riaadxidi, ad zabexuutaman guneeman laan. ⁶ Per rayal chililadxidi guial guneeman laan, ad rayalt chu' nawēēguidi, dīn bēn ru nawēēg luxdoo naj zi'c xtūjp nijsdoo ni rinē bi ni guiezi. ⁷ Bēn naj zian ad cwēzidi guneē Dios ni guiniabidi, ⁸ dīn bēn ru nawēēg, ad rūjntaman tijbzi xgab, ad rinal tēētaman tijbzi nejz.

⁹ Lējt guial najdi bēnprob gol babaa, dīn loj Dios najdi bēn zojbloj. ¹⁰ Guiáad lējt benrijcw, gol babaa guial ma ragbeedi achet lasajc guialrijcw loj Dios, dīn guialrijcw guin najn ni tēd zi'c rdēd guiaa rial dajn. ¹¹ Lējt ragbee chi rbēē loj gubijdx gojl, dxel rucwiidxan gui'xh, rba'y ree xguiaan, dxel ad nixtri rguienan. Ziāngajc benrijcw yu' dxej guiētaman majsi galay gra ree ni rajpaman.

Bēn rdaan ree rdēd loj guialrzagdiaj

¹² Chabaa bēn rzudxi'ch loj xnejz Dios rdaan tēēman xhietēēz rzajcaman guial rliiladxaman Jesucrist. Chi ma gudaanman loj guialrzagdiaj, tia'man coron rayalaman, laan naj guialnaban tiblyaa ni cwēb Dios yazaladxaman loj ree bēn rēn laaman.

¹³ Bal chu rūjn xgab gūūn ni mal, ad najtan ni naladxaman guial Dios rudxe' xgab guin guijcaman. Dīn ad yu't dxej guiēn Dios gūūnman ni mal, ni'quid rgu' tēētaman xgab guijc bejn gūūnman ni mal. ¹⁴ Xixgabmal gajc bejn rudēē laaman gan gūūnman ni mal. ¹⁵ Zeel por xgabmal guin rūjn bejn dol, dxel chi ma rniabee dol guin laaman, stijbzi xcasti Dios rayalaman.

¹⁶ Gradi compniar raliduladx ree Jesucrist, diidxli rēnan lējt, ad gusquieē lējt gajc. ¹⁷ Graczi xgab zagdxē nē gra ni za'c zēēd loj Dios, bēn been gra ree bajl yu' xanyabaa. Ad yu't dxej guidaaman, zianczi rūjnman ni zagdxē.

¹⁸ Guial guyēnman, zeel baneeman guialnaban tiblyaa duloj ree, guial ma raliduladx ree xtiidxaman, dīn yayajc ree zi'c ree bin yalaj yaca'man loj gra ree ni beenman. ¹⁹ Zeel yan ma ragbeedi nine ree.

Rayal yasa'n ree gra ni mal riga' loj guidxliuj

Rēnan lējt, zeel rnin lojdi gradi compniar raliduladx ree Jesucrist: Gol guzujsin dīn gucaagdiajguidi, ad yoobladxidi guial guinieedi ni'qui guial yalendi, ²⁰ dīn bēn ralen ad zajct gūūnman ni rēn Dios. ²¹ Zeel gol gulēēladx gra ni ad najt zagdxē nē gra ni mal riga' loj guidxliuj guie, gol gojc bēnchaawlax, gol bazoob xtiidx Dios ni ma bacaagdiajguidi, dīn laan yabēē lējt loj dol. ²² Per gol been zi'c rēb xtiidxaman, ad aal rucaagdiajgzidan, chitēē

gusquiee lëjt gajc. ²³ Din Bén rucaagdiajgzi laan abi' ad rüjntaman zi'c ma bacaagdiajgaman, najman zi'c tijb Bén ruguiaa loj guiaawajn, ²⁴ per chi ma ziaman, rayanladxaman xhienaag naj lojman. ²⁵ Per Bén ad rayanladxt ni bacaagdiajgaman rüjnman naguejñ chignia'man xtiidx Dios mazri, din laan nayaaloj rabëë tëen dunuj ree loj dol. Rzudxi'chaman loj nejz guin, rüjn tëëman ni rën Dios. Bén güün zian chu' luxdooman zagdx per ni cayüjnman.

²⁶ Bal chudi naladx zinalidi xnejz Dios zagdx per ad rajptidi cudad xhienin guinieedi, cusquiee lëjt gajc, dxel achet lasajc guial naladxidi zinalidi xnejz Dios. ²⁷ Din par dux Dad ree Dios Bén zinal xnejzaman zagdx naj Bén rüjn yudar xindo bizëjb ree në ree béngunaa bizëjb chi rzagdiaj reeman, rajp tëëman cudad chitëë yabaman loj ni mal riga' loj guidxliuj.

2

Ad rayalt yalej ree loj ree bejn

¹ Gradi compniar raliduladx ree Jesucrist Bén rniabee, ad rayalt cwedi loj ree bejn. ² Yaguei'ch ree, chu' tijb bejn lod rado'pidi, najcwaman lajd zagdx yu' tëë guibniil or yaaman, chu' tëë tijb Bénprob najcwaman lajd senci, ³ abi' mazri güüncwentiidi Bén najcw lajd zagdx guin, guiëbidi lojman: “Gurej guie, laan naj luar zagdx”, guiáad loj Bénprob guin guiëbidi: “Yagaj guzuli o gurej luyuj zii ya.” ⁴ Chi rüjndi zian, ¿nid cabedi bejn loj gajguidi ya?, ¿nid rula'chidi ya chi rüjndi gra ree xgabmal guin? ⁵ Gradi compniar raliduladx ree Jesucrist, rënan lëjt, gol bacaagdiajg nine: Dios gule Bén naj ree Bénprob loj guidxliuj din chililadx da't reeman laaman, din yayal reeman lod rniabeeman zi'c cwëbaman loj ree Bén rën laaman. ⁶ Guiáad lëjt rusa'n xtudi Bénprob ree. Wen, ¿id henrijcw guin ree rusagzi lëjt ya ruxdig tëë reeman lëjt loj guxtis? ⁷ ¿Id laagajc reeman rnieeguijdx Jesucrist ya, Bén naj Bénlasajc? Zi'c najman Xi'n Dios, ziangajc najdi xi'n Dios, guial nuchajguidi laaman.

⁸ Bal walidi rüjndi ni ca loj xley Dios, zi'c ca loj xtiidxaman ni rëb: “Guyën bejn ree zi'c rën lüj gajc”, dxel zagdxequi cayüjndi. ⁹ Per bal mazri rüjncwentiidi tijb bejn guial loj stijbaman, dxel ma cayüjndi dol, ma rajpidi dol guial ad rüjntidi cumplid xley Dios. ¹⁰ Din bal chutëez zinal gra ni ca loj ley guin per ad rüjntaman tijb ni rayal güünman, ma cusaglojman guidib ley guin. ¹¹ Dios gajc rëb: “Ad sunël xinguaaw ren o béngunaa ren”, rëb tëëman: “Ad gugüjtil bejn.” Per bal id za'nël xinguaaw o béngunaa ren ya per rugüjtil, dxel ma cusaglojl xley Dios. ¹² Zeel gol gunee gol been tëë zi'c ree Bén yadëed cwent diidxli loj Dios por xtiidxaman ni rabëë dunuj ree loj dol. ¹³ Din Bén ad rayat ree lasa', ad zayat Dios laa reeman dxej güün xguialguxtisaman. Per Bén raya ree lasa' ad najtan ni guidxeb reeman dxej guin.

Royal yagueen ree ni rën Dios

¹⁴ Zeel rnin lëjt, ¿xhie sirv güün bal chu guiëb, rliladxan Dios, abi' ad rüjntaman ni rënman? ¿Wen, guialzi rliladxaman ya gacaman perdon? ¹⁵ Yaguei'ch ree, tijb dux compniar ree, Bén rliladx Jesucrist, najman xinguaaw o béngunaa ya, guiyaadx xabaman con ni gawaman, ¹⁶ abi' guiëb tijb lëjt loj reeman: “Yaguiajdi zagdx, gawidi zagdx ad gagnajl tëëdi.” Per bal id rudëedi ni riaadx reeman, ¿xhieczzi gan guiëbidi zian? ¹⁷ Ziangajc rzajc Bén rëb rliladx Dios abi' ad rüjntaman ni rënman, achet lasajc guial rëbaman rliladxaman laaman.

¹⁸ Xt zajc chu na lojl: “Lüj na rliadxil Dios, guiáad naj rünan ni rënman.” Yan balüü naj guial rliadxil laaman guial ad rüjntil ni rënman, guiáad naj gulün guial rliadxi guial rünan zi'c rënman. ¹⁹ Zagdx rüjnl bal rliadxil yu' tijbzi Dios, per nê ree xindxab rliadxi zian, abi' xt rnij reex guial rdxeb reex. ²⁰ Zeel ad bal natontil, bignia' achet lasajc guial chililadxi bejn Dios bal id rüjman ni rënman. ²¹ Basaaladxi, dux bêngulal ree Abraham, bayagbee Dios laaman zi'c bën ad beent dol, guial beenman ni guyën Dios, chi rëbaman lojman din nugüjt xi'nman Isaac nudëe tëëman laax zi'c gon lojman. ²² Ma qui ruguiaal, guial bililadxi man, zeel beenman ni guyën Dios. Guial beenman zian, zeel biguien guial diidxi bililadxi man laaman. ²³ Zian gojc cumplid ni ca loj xtiidxi Dios, lod rëb: “Bililadxi Abraham Dios, zeel bayagbeeman laaman zi'c bën ad beent dol”, bayagbee tëë ree bejn laaman zi'c tijb xmiw Dios.

²⁴ ¿Ma bignia'di yan ya? Rayagbee Dios bejn zi'c tijb bën ad wayüjnt dol guial rüjman ni rënman, ad guialzi rëbtaman rliadxi man laaman. ²⁵ Ziangajc gojc con tijb bën brii laj Rahab, bën goc bêngunaa dxuudxi, bayagbee Dios laaman zi'c bën ad beent dol guial beenman ni rën Dios, chi badëed lidxi man baquie'chloj tio'p ree bën Israel we ladxi man biquiaa reeman xhienaag chu' ree xsuldad reeman, been tëëman laa reeman yudar persi zia reeman nejz ren. ²⁶ Din bën achet xsprijt ad zajc guibanman. Ziangajc rzajc tijb bën rliadxi Dios: bal id züjman zi'c rënman, achet lasajc guial rëbaman rliadxi man laaman.

3

Du lüdx ree naj zi'c tijb luar lod guidxi ni mal

¹ Gradi compniar raliduladxi ree Jesucrist, rnin lëjt: Ad bal ziendi guiën gac mextr gulüü xtiidxi Dios, din ma ragbeedi, dunujn guial ralüün xtiidxi man, mazri zro' naj guialguxtis ni güün Dios con dunujn bal id zaguiënan zi'c rayal. ² Du graczi ree rüjn xhietëëz dolan gan yu' dxej, per bal chu lëjt ad rüjnt dol ni'qui tijb diidxi guijdx ad ririi tëët ro'di, najdi bën naya delant loj Dios, rajc tëë rniabee lëjt gajc. ³ Lëjt ragbee, chi ralu' ree fren ro' ree way din che reeb lod rayën ree, zian raguieen ree gan ranabee reeb. ⁴ Ziangajc ree barcw, majsi narooob reen, majsi por mazt rucadxaa bidoxh laa reen, per con tijb guiibdobëz ni la timón, con laan ma zajc chinë bejn laan lod rëntzaman. ⁵ Ziangajc naj du lüdx ree, najn ni dobëz, per narooob gualquia rüjman. Najn zi'c tijb naj dobëz, per majsi najn ni dobëz, rüjman gualquia narooob ruze'can dajn narooob. ⁶ Du lüdx ree naj zi'c tijb guij, zajc yanee nê' reen ganax ni mal yu' loj guidxliuj. Bal id zaya'p ree cudad, du lüdx gajc ree guxhiin dunuj ree, dxel zianczi grii diidxi zëed loj xindxab du ro' ree. ⁷ Rayagbee ree guial gralox ree bedoxh zajc gagnadoo, xt nê ree be rzuj nê ree bëel nëtëë ree be yu' loj nijs, yan ma sognadoo reeb por ree bênguidxliuj. ⁸ Per lüdx bejn achut wayüjn gan nabee laan, najn zi'c tijb ni ad zajc gagnadoo, zi'c tijb ni guidxa venen rugüjt. ⁹ Con du lüdx ree ranee ree diidxi zagdx par dux Dad ree Dios, abi' con laagajcan raneeguidxi ree bejn, bën been gajc Dios zi'c najman. ¹⁰ Gradi compniar raliduladxi ree Jesucrist, du ro' ree ririi diidxi zagdx nê diidxi guijdx, per ad rayalt gacan zian. ¹¹ Lëjt ragbee, lod rajch nijs zagdx ad zajc grii nijs naxij, ¹² ad zajc tëët tia aceitunas loj yag higo, ad za zajc tia higo loj yag uv, ad zajc tëët grii nijs zagdx lod ririi nijs naxij.

Ni rüjn bën ca' quiaguiejn rudëë Dios

¹³ Bal chu lëjt naladx rajc rignia' tēē gra xtiidx Dios, rayal gacaman bēnchaawladx guiban tēēman zi'c rayal, zian guiguien guial yu' xquiargueijnman. ¹⁴ Per bal guidxa guialnadēdloj luxdoodi rēn tēēdi gra par lëjt gajc din gaquidi mazri bēn zojbloj, ad güündi benro' guial rajquidi xtiidx Dios, cusquieezidi guial rüjndi zian. ¹⁵ Lasa' quiargueijn guin ad Diost rudēē laan, xquiargueijn gajc bēn riga' loj guidxliuj guien, zēēd tēēn loj xindxab. ¹⁶ Din lod yu' guialnadēdloj lod yu' tēē bēn rēn gra par laagajcaman, ni yu' wadijl nē gra loj ni mal. ¹⁷ Per bēn rajp quiargueijn runeē Dios, yaloy rüjnman nagueijn guibanman zagdxē lojman, gac tēēman bēn ad rüjnt nabē, nē benza'c, gap tēēman bejn ree pasens, yayaman bejn ree, gacaman benza'c con ree bejn, ad zabejtaman loj ree bejn güün tēēman cumplid ni guinieeman. ¹⁸ Bēn rüjn ree nagueijn ribajñ sin wadijl, raguuil reeman mod guinieenē reeman bejn zagdxē, zian rbajñ reeman zi'c rēn Dios.

4

¹ ¿Ban zēēd guial ralen lasa'di nē guial rdilidi? ¿Id zēēdan por xgabmal ni rüjndi ya? ² Rzēēbladxidi gapidi ni ad rajptidi, zeel xt rugüjt lasa'di din tia'di ni rēndi, rdēdloj tēēdi bejn ree, abi' bal id zajc gapidi ni rajp reeman, dxel ralen lasa'di abi' rdilidi. Per diidxliczi ad rajptidi ni rēndi, din ad rniabtidan loj Dios. ³ Abi' bal rniabidan, ad runeetaman laan, din ad rniabtidan par güündi ni zagdxē, rēnzidan din guibandi zi'ctzi rēndi. ⁴ ¡Bēn rusquiee! ¿Id ragbeedi ya guial chu rinal ni mal yu' loj guidxliuj ad zajc gaquidi xmiw Dios? Zeel bal chu rēn chinal ni mal guin, laagajcaman za' contr Dios. ⁵ Ad ca xlia'tzi loj xtiidxaman lod rēb: “Badxe' xSprijt Dios du luxdoo ree, rēnman Sprijt guin, xt neelojman laaman.” ⁶ Dád zro' naj yudar rüjn Dios dunuj ree, zi'c ca loj xtiidxaman lod rēb: “Dád naza'c Dios con ree bēn rüjn naya lojman, per ad rüjn cwenttaman bēn rüjn ree benro'.” ⁷ Zeel gol bazoob xtiidx Dios, ad gudēēdi mod güün xindxab lëjt gan, zian chiquiedix loj xnejzidi. ⁸ Gol gubig loj dux Dad ree Dios din güün cwenttaman lëjt, guiáad lëjt bēndol, gol bariica loj dol, guiáad ree bēn yu' nawēēg luxdoo guial chinalidi xnejz Dios, con guidib luxdoodi gol binalaman. ⁹ Gol guyu xgab, gol guyu naya gol biin tēē por xtoldi, luar guxijdxidi gol biin, luar chu' luxdoodi nix gol guyu naya, ¹⁰ gol been naya loj Dios, din guiliesaman xvaloridi.

Ad rayalt yala'ch du lasa' ree

¹¹ Gradi compniar raliduladx ree Jesucrist, ad bal rnieeguijdx lasa'di, din bēn rnieeguijdx o bēn rula'ch lasa', ma caneeguijdxaman cula'ch tēēman xley Dios. Bal rula'chidan, ad cayüjntridi zi'c rniabeen, lëjtli ma canabee laan. ¹² Per tijbzi Dios basa'n ley guin rüjn tēēman guialguxtis, laaman ca' guialrniabee guial yabēēman nē guial gunijtaman. Per lüj, ¿chu najl zeel rula'chil bejn?

Dux guialnaban ree naj ni tibrajtzi

¹³ Yan gol bacaagdiajg nine lëjt bēn rēb ree: “Yan o guixie ya yo'n loj tijb ciuda, ni yadxu'n tib ijz, yaguieenan negojs lod yaguieenan gan zro' da't milia.” ¹⁴ Ni'quid ragbeetidi xhie gac guixie, din dux guialnaban ree naj zi'c tijb bēj rguien tibrajt, stibrajt ma gunidlojn. ¹⁵ Zagdxeli naj guiēbidi: “Bal gunee Dios dunujñ guialnaban, yaguieenan nine o ni ni ya.” ¹⁶ Per lëjt mazri zinalidi xtiidx dxalidi, abi' laa reen naj ni mal. ¹⁷ Zeel bēn ragbee xhienaag güünman ni zagdxē abi' ad rüjntaman laan, ma cayüjnman dol.

5

Ni rüjn ree benrijcw

¹ ¡Lëjt, najdi benrijcw! Gol bacaagdiajg nine, gol biin gol gurixdiaj tée, din ma zëed lod sagdiajdi, ² tant zien ni rajpidi xt rxin reen, guiáad xabidi xt raw be laa reen. ³ Gra or nê plajt ni rajpidi xt rzebëj reen, laagajc reen rulüü ni mal rüjndi, laagajc reen gac zi'c tijb bajl gustib lëjt. Ma zidyob güün Dios xgualguxtisaman, guiáad lëjt gule'cchaaw ni lasajc ree loj guidxliuj guie. ⁴ Gol baguiaa, laa ree bën been xchiindi canab din quixidi laa reeman, xt Dios bën ca' gra gualrniabee ma bigueijn gual caygu' reeman gualquaia. ⁵ Nabandi zi'tc rëndi, per cusni'szidi ni ad züjnt lëjt sirv chi guidxin dxej güün xgualguxtis Dios. ⁶ Din xt baguillidi mod persi bagüjtidi bën ad beent ree xhienin, abi' achet gojc nünj reeman chitëe niëjt reeman.

Royal yarejdx ree Dios yaya'p tée ree pasens

⁷ Gradi compniar raliduladx ree Jesucrist, gol gojp pasens xt dxej gui't dux Dad ree Jesucrist stijb, zi'c rdaan tijb bën rüjn dxiin dajn, rbëzaman guia yaløj xt guia bigra din yalesaman ni guxübinman. ⁸ Ziangajc lëjt gol gojp pasens, ad yalenyadi, din ma zidyob dxej gui't dux Dad ree Jesucrist.

⁹ Rni tëen lëjt, ad yalenyadi nê lasa'di, chitëe xhie casti yayalidi, din ma zidyob dxej güün xgualguxtis Dios. ¹⁰ Gol binal zi'c been ree bën badëe xtiidx Dios loj ree bejn, gojp reeman pasens gudaan tée reeman graløj gualrzagdiaj gudëd reeman. ¹¹ Rayagbee ree gual xiquilbaa ree bën rdaan loj gualrzagdiaj. Ma bigueijndi xcwent bën brii laj Job, xhienaag gudaanman chi guzagdiajman, ragbee tëedi xhienaag beennë Dios laaman, chi gulox gudëdaman loj gra gualrzagdiaj guin, din Dios dád naza'caman raya tëeman bejn ree.

¹² Gol gojp cudad chi rüjndi xhie compromisan loj bejn, ad guza'tidi Dios o xhie stijnin ya, chitëe gudëed Dios lëjt casti, zagdxeli naj guinieedi diidxli güün tée xtiidxidi cumplid.

¹³ Bal chu lëjt cazagdiaj, gol gurejdx Dios, o bal yu' luxdoodi zagdx, gol biil par laaman. ¹⁴ Guiáad bal ragxuu tijb lëjt, royal guinieedi bën rniabee ree lëjt gual najdi bën riladlx Jesucrist, din cwedx reeman Dios por laaman quiëeb tée reeman laaman sejt por laj Jesucrist. ¹⁵ Bal cwedx reeman Dios con guidib luxdoo reeman, zayajc bënragxuu guin, yales Dios laaman, abi' bal xhie dolan ma beenman, güünman laan perdon. ¹⁶ Zeel gol baxhoobdol loj lasa'di gol gurejdx tée Dios por lasa'di din yayajquidi, din tijb bën zinal xnejz Dios, chi rbejdxaman laaman, rüjn cwentaman laaman. ¹⁷ Zi'c bën brii laj Elías bën badëe xtiidx Dios loj ree bejn, gojcaman bënguidxliuj zi'cgajc dunuj ree, abi' chi gudi'n gunabaman loj Dios gual ad zalt guia, dxel ad golt guia choon ijz garol. ¹⁸ Chi guredxaman Dios zatijb, zianz bazuloj gol guia, dxel bayu gualnaza'c loj guidxliuj.

¹⁹ Gradi compniar raliduladx ree Jesucrist, bal chu lëjt rarij loj xnejz Dios abi' por stijb bejn yayejquidi, ²⁰ gol gogbee gual chutëez bën rasiejc tijb bëndol loj nejz zagdx chitëe chinalaman ni mal, laaman rabëe bëndol guin loj casti, abi' majsi ma beenman zien dol, gran gac perdon.

Gui'ch yaløj bacaa San Pedr

Rxhiaal Bëd xtiidx Dios loj ree bejn

¹ Naj Bëd, najn tijb xi apóstol Jesucrist, laaman guxhaal naj, cusan gui'ch guie par lëjt najdi bën bire'ch gra lad abi' zøjbidi guiedx riga' ree niz Ponto, Galacia, Capadocia, Asia Menor nê Bitinia. ² Ma gulej dux Dad ree Dios lëjt diidz gocli, zi'c goc xixgabaman. xSprijtaman gulëëca lëjt din guzoobidi diidz gac tëë luxdoodi naya delant lojman por xrejn Jesucrist. Zro' güünle' Dios lëjt yabe'cdxe tëëman luxdoodi.

Ni ralëjz ree gunee Dios

³ Quixtëë Dios xdad Dad Jesucrist, guial rayaman dunuj ree. Laaman bachaa mod nabajn ree guial baban Jesucrist loj ree bengüt, zeel zro' naj ni ralëjz ree gunee Dios. ⁴ Abi' yaca' ree ni nagu'chaawaman xanyabaa par dunuj ree, laan naj ni naya gra tiamp, ad rxintan, ad yu' tëët dxej nitan. ⁵ Guial rliiladxidi Dios, laaman rniaj lëjt con xguialrniabeeman, din chi guidxin dxej nit guidxliuj, dxel gagbee gra bejn guial ma beenman lëjt perdon.

⁶ Zeel rabaa da'tidi majsi tëdidi graloj guialrzagdiaj tiblädëd, ⁷ din por guialrzagdiaj guin guiguien chu diidxli rliiladx Dios, zi'c rüjnnë reeman or, rudëëd reeman laan loj bajl din gagbee reeman bal najn ganax or. Or guin najn ni rnidloj, zeel mazri lasajc guialrliiladx laaman, bal chu taan xhietëëz loj guialrzagdiajn, din ad yu't dxej nit xguialrliiladxidi. Abi' dxej gui't Jesucrist stijb, lasa' guialrliiladx guin naj ni ruladx Dios, guiáad ree bejn nê ree anjl guza't reeman laaman zagdxe gap tëë reeman laaman respejt guial rusnuu rliiladxidi laaman.

⁸ Ad waguiaatidi Jesucrist per rëndi laaman, abi' yan rliiladxidi laaman majsi ad waguiaatidi laaman, dád nix yu' luxdoodi abi' tant nix yu' luxdoodi, xt ad radxejlt xhienaag guiëbidi, ⁹ din lëjt ragbee, guial rliiladxidi, ma nünj Dios lëjt cwent zi'c ree bën achet xtol.

¹⁰ Diidz gocli, bën badëë ree xtiidx Dios loj ree bejn basiid reeman been tëë reeman naguiejn niagbee reeman xhienaag güün Dios bejn ree perdon, abi' rëb reeman xhienin güün Dios par lëjt guial najman benza'c. ¹¹ Por xSprijt Jesucrist gogbee reeman diidz gocli guial sagdiajman zianz qui gapraman guialrniabee, dxel been reeman naguiejn niagbee reeman chu benan sac zian goc tëë gac zian. ¹² Per balüü Dios laa reeman guial ni gunee reeman ad najtan par laagajc reeman, najn par lëjt, abi' yan lëjt ma rignia'di ni guin ree por ree bën catie'ch xtiidxza'c Jesucrist por xguialrniabee Sprijt zëëd xanyabaa. Nê ree anjl ma rën nejzdoö gagbee nine ree.

Ze rayal guiban ree xi'n Dios

¹³ Zeel gol guzusin gol bastëdguien tëë, con guidib luxdoodi gol gulëjz ni gunee Dios guial najman benza'c, dxej gui't Jesucrist stijb. ¹⁴ Zi'c ree xi'n Dios nazobdiidz reeman, ad bal guibanridi zi'c gubandi gocli chi gadidi güünbee laaman. ¹⁵ Laaman gule lëjt, zeel gol been naguiejn guibandi naya delant lojman, din laaman naj bën naya nali. ¹⁶ Zi'c rëb loj xtiidxaman: “Gol gubajn naya delant lon, din naj naj bën naya nali.” ¹⁷ Yan bal rnieedi Dios “Dad”, bën rüjn xguialguxtis tibloj, bal conin rüjn tijb gaj bejn, rayal gapidi laaman respejt guidib tiamp guibandi loj guidxliuj guie. ¹⁸ Din lëjt ragbee guial

babëëman lëjt loj costumbr ni basa'nnë ree xbéngulalidi lëjt, costumbr ni ad rüjnt ree sirv, abi' lëjt ragbee guial gojx din yariidi loj reen, per ad gojxt con ree ni rüjnt, zi'c or o plajt ya, ¹⁹ gojx con xrejñ za'cdxoon Jesucrist ni guxie'man loj crüzj chi gütaman zi'c tıjñ xiil zagdxë be ad naxint, be rugüjt reeman par Dios por xtol ree bejn. ²⁰ Diizd chi gad guidxliuj gacchaaw, mal gulej Dios laaman din sacaman zian, yan ma guzajcaman zian guial rënman lëjt. ²¹ Zeel por laaman riladxidi Dios bën basban laaman badëë tëëman guialrniabee lojman, yan con guidib luxdoodi ma riladxidi Dios rbëz tëëdi ni guneeman.

²² Yan, guial ma ruzoobidi xtiidxaman ni naj diidxli, ma naya luxdoodi delant lojman din guiën lasa'di zi'c rayal, zeel gol guyën lasa'di con guidib luxdoodi. ²³ Din ma bidxaa mod nabandi, zi'c rulüü gojlidi stıjñ, abi' guialnaban zinalidi ad zëëdtan por tıjñ bën nit, zëëdan por xtiidx Dios, diidx naban, diidx ni ad zanijt, ²⁴ din loj xtiidxaman rëb:

Gra bénguidxliuj naj zi'c gui'xh dajn,
guiáad ni rajp reeman naj zi'c xguiaa gui'xh guin.

Rbidx gui'xh guin, abi' riajb xguiaan,

²⁵ per xtiidx Dios ad yu't dxej nitan.

Abi' laan naj xtiidxza'c Jesucrist ni ma biguejndi.

2

¹ Zeel gol basa'n gra ni mal, gra ni rusquiee, ad bal rüjnzidi, gol basa'n guialnadëdloj në guial rnieeguijdx lasa'di. ² Zi'c re'c ree xindo quigojñejzri dud, zian gol been naguiejn chignia'di xtiidx Dios, din gusunuu gagbeedi mazri xhienaag rayal guibandi din yabandi loj ree bengüt con gra ree bën nuchajj Jesucrist chi gui'taman stıjñ, ³ bal walidi ma ragbeedi guial naj Dios benza'c.

Jesucrist naj zi'c guiaj naban

⁴ Gol bibig loj Jesucrist, laaman naj zi'c guiaj naban. Been ree bénguidxliuj laaman tiblad, per par Dios najman bën lasajc, laaman gule laaman.

⁵ Ziangajc lëjt, guial ma riladxidi Jesucrist, najdi zi'c ree guiaj naban ni cayajcnë xyadoo Dios. Najdi bixhioz naya luxdoo rüjn sirv lojman, din nabandi zi'c ruladx Dios, laan naj ni rudëëdi lojman zi'c gon por Jesucrist.

⁶ Rëb loj xtiidx Dios:

Gol baguiaa, guzoban tıjñ guiaj zagdxë luguiedx Jerusalén.

Laan naj guiaj nabee, guiaj zojbloj, nilasajc tëë.

Bal chu chililadx laan,

ad yu't dxej yaya'nxtuman.

⁷ Par lëjt, guial riladxidi Jesucrist, laaman naj zi'c guiaj lasajc da't. Per par ree bën ad riladx rajc cumplid ni rëb loj xtiidx Dios, lod rëb:

Guiaj ni gulëëgo'n ree bën rüjn yu,

yan laan naj guiaj zojbloj.

⁸ Rajc tëë cumplid ni rëb stıb lajt loj xtiidxaman, rëban:

Laaman naj guiaj rırejñ guia' ree bejn,

abi' rureeyujñ laa reeman.

Rzajc reeman zian, guial ad ruzoobt reeman xtiidx Dios, zian rajc ni rëbaman xcwent reeman.

⁹ Per lëjt naj bën guleman, najdi bixhioz rüjn ree sirv lojman, guial najman dux rey ree. Lëjt ma naya luxdoo delant lojman, abi' gulejman lëjt din chigtie'chidi diidx xcwent ree ni zagdxë rüjnman. Laaman babëë lëjt loj nejz

mal, persi bagu'man lëjt loj xnejz za'cdxoonman. ¹⁰ Gocli achutczi najdi, per yan ma najdi xbejn Dios. Gocli ad ragbeetidi guial raya Dios lëjt, per yan ma ragbeedi.

Zi'c rayal guiban ben rliiladx Dios

¹¹ Gradi compniar raliduladx ree Jesucrist, rniaaban favor lojdi, zi'c zio'p ree loj guidxliuj guie tibrajtzi, ad bal tiëbidi güün ree xgab mal lëjt gan, din xgab mal guin ree rüjn naguiejn zianczi din gusa'n ree bejn xnejz Dios. ¹² Gol gubajn zagdxo loj ree bën ad nünbeet laaman, zian majsi rnieeguijdx reeman lëjt yan, rëb reeman najdi benmal, per chi guguaaa reeman guial zagdxo naj ni cayüjndi, dxel guza't reeman laaman zagdxo, dxex ni yadëed reeman cwent lojman.

¹³ Guial rliiladxidi Dad Jesucrist, gol bazoob xtiidx gra ree bën rniabee loj guidxliuj guie. Gol bazoob xtiidx pristent rniabee xnaciondi ¹⁴ në xtiidx gobernador bën rxhiaalaman din gudëedaman casti bën rüjn ree ni mal guilies tëëman xvalor ree bën rüjn ni zagdxo. ¹⁵ Din rën Dios güündi ni zagdxo ree din gucwëëzidi ro' ree bentont ad rignia't abi' rnieeguijdx reeman lëjt.

¹⁶ Zajc güündi zi'c rëndi, per ad por ziantzi güündi ni naj ni mal, gol been zi'c rayal güün ree xbejn Dios. ¹⁷ Gol gojp respejt gra bejn zi'c rayal, gol guyën ree bën rliiladx Jesucrist, gol bidxeb Dios, gol gojp tëë respejt pristent rniabee xnaciondi.

Gol gudaan loj guialrzagdiaj

¹⁸ Lëjt bën naj ree mojs, gol bazoob xtiidx ree xpatrondi, gol gojp tëë reeman respejt, ad bën najtzi ree benza'c raya tëë reeman lëjt, në ree bën naj bendxuudx. ¹⁹ Din zagdxo naj guial chu rdaan loj guialrzagdiaj, majsi ad rayaltaman laan, rdaanman laan guial rënman güünman ni ruladx Dios. ²⁰ Bal chu lëjt rzagdiaj por ni mal rüjndi, achet lasajcan, per bal rzagdiajdi por ni zagdxo rüjndi abi' rdaandi loj guialrzagdiaj guin, laan lasajc delant loj Dios, ²¹ din par zian gulejman lëjt. Guzagdiaj Jesucrist por lëjt, zian balüüman lëjt xhienaag guibandi din chinalidi xnejzaman. ²² Ad yu'tczi dxex beenman dol abi' ni'qui tijb diidx rusquiee ad briit ro'man. ²³ Chi rëb reeman diidxguijdx lojman, ad badxi'taman laan con diidxguijdx, chi basagzi reeman laaman, ad rëbtaman loj reeman guial yaguijx reeman ni cayüjnnë reeman laaman, graczan basa'nman loj Dios bën rüjn xguialguxtis zi'c rayal. ²⁴ Guzagdiaj Jesucrist loj crüjz por dux tol ree persi babëëman dunuj ree lojn din yabajn ree zi'c rën Dios, abi' por lod bidxeelguijdxaman ma bayüjnman du luxdoo ree naya. ²⁵ Gocli gubajndi zi'c xiil rzëëb, per yan ma najdi xbejn Jesucrist bën rën lëjt rajp tëëman lëjt zi'c tijb bën rajp xiil.

3

Zi'c rayal guiban ree bën ca' lasa'

¹ Në lëjt bëgunaa ma yu' ree lacheel, gol bazoob xtiidx lacheelidi, din bal chu lacheelidi ad rliiladx xtiidx Dios, per chi guguaaa reex zi'c nabandi, dxel guililadx reex. Ad rüjnt naguiejn xhie guiëbidi loj reex, ² chililadx reex guial guguaaa reex nabandi zi'c rayal rajp tëëdi laa reex respejt. ³ Chi rzujchaawidi, ad bal rdëdlaj rüjnchaaw guidxguijquidi ni'qui guial güündi ujs ganax ni or o gacwidi ganax lajd lasajc. ⁴ Mazri zagdxo naj guial güündi naguiejn gac luxdoodi naya delant loj Dios, gol gojc benza'c në bën chaawladx, din laan ad yu't dxex nitan, abi' laan mazri lasajc delant lojman.

⁵ Din zian gubajn ree béngunaa binal ree xnejzaman goc da't, bililadx reeman laaman bazoob tëe reeman xtiidx lacheel reeman. ⁶ Zian been Sara, bazoob xtiidx lacheelaman Abraham, abi' guneeman laaman "Dad". Gaquidi zi'c xi'n Sara, bal rüjndi ni zagdxe sin gualrdxeb.

⁷ Ziangajc lëjt xinguaaaw, gol gubajnnë lacheelidi zagdxe, gol gojp reeman respejt ad gualzi najt reeman bën nada, rayal güündi zian guial në reeman rayal guialnaban tiblyaa razaladx Dios, guial najman benza'c. Zian gol gubajn, chitëe xhie gudxe' nawëëg lëjt chi cwedx guiniabidi laaman.

Xhie rayal güündi chi xhie güün në reeman lëjt

⁸ Zeel rnin loj gradi: Gol gubajnnë lasa'di zagdxe, gol bachajg lasa'di, gol been xgab tijbzi, gol guyën lasa'di zi'c rayal, gol gojc benza'c në bën chaawladx. ⁹ Ad yadxi'di ni mal rüjn ree bejn lëjt, ad yadxi'di diidxguijdx ni na reeman lojdi, gol gurejdx Dios din gagnëman laa reeman, din Dios gulej lëjt par gagnëman lëjt. ¹⁰ Din rëb loj xtiidxaman:

Bën rën guiban zagdxe chu' tëe luxdooman zagdxe, rayal gapaman cudad ad guinieeman diidxguijdx ad guiniee tëeman diidx rusquiee.

¹¹ Cwëëladxaman ni mal, güünman ni zagdxe güün tëeman naguiejn guibannë ree lasa'man zagdxe, zian rayal guibanman zianczi.

¹² Din dux Dad ree Dios rniaj bën rüjn ree ni rënman rüjncwent tëeman xtiidx reeman chi rbejdx reeman laaman, per ralenman bën rüjn ree ni mal.

¹³ Achut güün lëjt ni mal, bal cayüjndi naguiejn güündi ni zagdxe. ¹⁴ Per xiquilbaadi bal cusagdiaj bejn lëjt guial cayüjndi ni zagdxe. Ad chu'di xgab ad guidxeb tëedi por zian, ¹⁵ gol gojp respejt gol badxe'guijc tëe dux Dad ree Jesucrist. Gol guzujsin din yadxi'di xtiidx ree bën guiniabdiidx lojdi xcwent ni rililadxi, per gol badxi' xtiidx reeman zagdxe con diidx zagdxe ree. ¹⁶ Gol gubajn zagdxe din guiguien guial achet ni mal yu'guijquidi din yaya'nxtu ree bën rnieeguijdx lëjt, guial rüjndi ni zagdxe rililadx tëedi Jesucrist. ¹⁷ Mazri zagdxe naj sagdiaj bejn guial güünman ni zagdxe, bal zian rën Dios, luar sagdiajman guial güünman ni mal.

¹⁸ Din xt Jesucrist guzagdiaj, güjtaman tib voltzi por dux tol ree majsi ad beentaman dol, per güjtaman duxcwent ree nayajc ree bëndol, zian guxhala-man nejz din gac yadxin ree loj Dios, güjtaman zi'c bénguidxliuj per babanman por xSprijtaman. ¹⁹ Chi gadaman yaban, wej xSprijtaman bigneenëman xsprijt ree bengüt lod nayaaw reeman. ²⁰ Sprijt guin ree naj xsprijt ree bën ad bazoobt diidx tiamp gulal, chi guban Noé loj guidxliuj guie, chi gop Dios laa reeman pasens la'tgaj cayüjn Noé barcw, abi' xhujnzni bejn gulaa loj nijs banijt guidxliuj tiamp zii. ²¹ Nijs guin naj zi'c gualrriobnijs ni rulüü guial ma nayajc ree perdon. Gualrriobnijs guin ad rënt guieban guial najn par gusian dux cuerp ree, rulüün guial caynaab ree loj Dios din yaya dux quiargueijn ree, guial ma raya'p ree gualnaban cüb guial baban Jesucrist loj ree bengüt, ²² bën bayë'p xanyabaa abi' za'man xladbee Dios lod canabeeman anjl ree në ree sprijt ca' gualrniabee.

4

Gol beennë quiargueijn ni banee Dios dxiin

¹ Zeel zi'c gudëd Jesucrist loj gualrzagdiaj, në lëjt rayal taan lojn. Din por gualrzagdiaj guin rüjn bejn dol tiblax, ² din güünman zi'c rën Dios guidib xgualnabanman luar güünman zi'c naj xixgabaman. ³ Xchej da't gubajndi zi'c naban ree bën ad nünbeet Dios, gubajndi zi'ctzi guyëndi, beendi zi'ctzi

gojc xixgab dxuudxidi, gu'di, badxajg lasa'di persi beendi nidxuux ree, guzũdx da'tidi, guyèn tèèdi ni ad najt ree Dios, laan naj ni rbijxhladx Dios. ⁴ Per yan guial ad zinaltridi zi'c naban ree bèn naban zian, zeel radxa loj reeman, rnieeguijdx tèè reeman lèjt. ⁵ Per rayal yadèèd reeman cwent loj Dios bèn za' par guün xgualguxtisaman con ree bèn naban nè ree bèn ma gujt. ⁶ Din nè ree bèn ma gujt bigueijn xtiidx Dios chi guban reeman loj guidxliuj guie, din guiban reeman loj Dios majsi par ree bènguidxliuj ma gujt reeman.

⁷ Ma zidyob dxej nit guidxliuj, zeel gol bastèdguien gol guzujsin tèè din cwedx guiniabidi Dios con guidib luxdoodi. ⁸ Ad yayanladxidi guial guien lasa'di zi'c rayal, din bèn rèn lasa' rüjnman perdon majsi xhietèèz rüjnnè reeman laaman. ⁹ Bal yu' tijb xcompniaridi rniab luar lidxidi din yaya'nman, gol badèèdsii lidxidi con guidib luxdoodi ad yaleny'a'di. ¹⁰ Loj tijb gajdi ma banee Dios quiargueijn din guündi ni rayal guündi. Zeel gol been lasa'di yudar con ni rajc rüjndi, din guiguien guial cayüjndi zi'c rayal con quiargueijn ni bazaladxaman lojdi. ¹¹ Bal chu lèjt ca' quiargueijn par gulüü xcompniaridi, rayal guinieedi ni naj diidxli zi'c tal rëb loj xtiidx Dios, ziangajc bèn ca' quiargueijn par guünman yudar dux compniar ree, rayal guünman laan con gojl razaladx Dios lojman. Gra ni cayüjndi, gol beenan din guza't ree bejn Dios zagdxe por Jesucrist, bèn rayal respejt nè guialrniabee zianczi. Amén.

Gol gudaan gra guialrzagdiaj

¹² Gradi compniar raliduladx ree Jesucrist, rënan lèjt, zeel rnin lojdi, ad ru nawèègudi guial zro' naj loj guialrzagdiaj cadèdidi, din laan naj zi'c prueb par lèjt. Ad rudi xgab chexc zeel cazajquidi zian. ¹³ Gol babaali chi cazagdiajdi zi'c guzagdiaj Jesucrist, din ziangajc yabaadi chi guguaadi xbianiman dxej gui'taman stibj. ¹⁴ Xiquilbaadi bal chu na diidxguijdx lojdi guial zinalidi Jesucrist, din gra dxejczy za'nè xSprijt Dios lèjt, bèn ca' guialrniabee. ¹⁵ Achet lasajc bal cazagdiajdi guial bagüjtidi bejn, o por guialgubaan, o por guial rüjndi ni mal o guial rudi lod ad rayaltidi. ¹⁶ Per bal chu cazagdiaj guial zinalaman xnejz Jesucrist, ad rayalt yatuman, rayal gudèèman quixtèè loj Dios guial ma najman xbejn Jesucrist.

¹⁷ Gol gogbee, guial rtièjb Dios rzagdiaj ree xbejnman din guzoob reeman diidx, abi' bal dunuj ree nayajc ree xbejnman cayza'c ree zian, xhieczi naag sac ree bèn ad rënt guzoob xtiidxza'caman. ¹⁸ Nacli ree bèn zinal xnejz Dios nawèèg naj guial yaguij reeman xanyabaa, piorli ree bëndol bèn ad nünbeet ree Dios, xhieczi naag naj luar lod yayal reeman. ¹⁹ Zeel bèn cazagdiaj ree zi'c naj xixgab Dios, rayal gusnuu guün reeman ni zagdxe gusa'n tèè reeman gran loj Dios, laaman gagnè laa reeman. Laaman bazaladx guialnaban rüjn tèèman zi'c rayal.

5

Consejw par ree bèn rliiladx Jesucrist

¹ Yan rënan gudèdan consejw loj ree bèn rniabee ree lojdi, naj guial ca'n guialrniabee zi'cgajc laa reeman, naj tèèn testiw xcwent ni guzagdiaj Jesucrist, zi'cgajc laa reeman guguan xbianiman dxej gui'taman stibj, zeel rënan guien nine ree loj reeman. ² Rnin lojdi, gol gunaj ree xbejn Jesucrist, bèn rayal ree gulüüdi din gusnuu chinal reeman xnejz Dios. Ad guündi dxiin guin guialzi ragbeedi rayal guündi laan, gol beenan guial yu'di gan guündi

laan, con guidib luxdoodi gol beenan, ad bal güündi laan guialzi rzëëbladxidi milia. ³ Ad guial ca'tidi guialrniabee din nabeedi zi'c tal rëndi, rayal guibandi zagdxé din guguaa ree bën rliladx Jesucrist din guiban reeman zian, ⁴ din chi gui't bën rniabee dunuj ree stijb, dxel guneeman tijb niza'cdxoon ni ad yu't dxéj nit.

⁵ Ziangajc lëjt xinguiag, gol bazoob xtiidx ree bengol. Gradi zi'c xinguiag ree zi'c ree bengol, gol been naya gol bazoob tëë xtiidx ree xcompniaridi, din: Ralen da't Dios bën rüjn ree benro', per dád benza'can con ree bën rüjn naya.

⁶ Zeel gol been naya loj Dios, bën ca' gra guialrniabee, din guiliesaman xvaloridi chi guidxin dxéj. ⁷ Gol basa'n gra xgab yu'di loj Dios, din laaman rniaj lëjt.

⁸ Gol guzujsin, gol gojp cudad, din xindxab xin ralen da't lëjt, za'x zi'c tijb beedx rliaan, rguilix chu güünx gan. ⁹ Zeel ad tiëbidi güünx lëjt gan, gol guzujdx'i'ch loj ni rliladxidi, din ragbeedi guial zi'c cazagdiajdi, ziangajc cazagdiaj ree bën rliladx Jesucrist guidib guidxliuj. ¹⁰ Per chi ma gudëdidi ta'n loj guialrzagdiaj, dxel gagnë Dios din gusnuu güündi naguiejn guibandi zi'c rënman, su tëëdi rejs, sudxi'chidi, gap tëëdi segur guial zinalidi xnejzaman. Laagajcaman naj Dios cayüjn dunuj ree yudar loj gra ni cayza'c ree, abi' ma gulejman dunuj ree din yayal ree tiblayaa lod rniabeeman guial nachajg ree Jesucrist. ¹¹ Laaman rayal respejt, din tijbzi laaman ca' guialrniabee zianczi. Amén.

Diidx bigra ca ree loj gui'ch guie

¹² Silvan, tijb dux compniar ree, bën ragbeen naban zi'c rën Dios, laaman been gui'ch guie din ganin lojdi tio'p choon diidx, par gunen lëjt consejw nëtëë par gugoynan lëjt guial diidxli rën Dios lëjt, zeel gol basnuu gol guyënman gol guyën tëë lasa'di. ¹³ Bën rliladx ree Jesucrist, bën ma gulej Dios zi'cgajc lëjt, bën zobj ree Babilonia, rugajpdioz reeman lëjt. Në Marcw xin nünan zi'c da xi'n'an rugajpdioz lëjt. ¹⁴ Guial rën lasa'di, gol bagajpdioz lasa'di xhietëéz horan radxaaglojdi. Yabe'cdxe Dios luxdoodi guial ma nuchajguidi Jesucrist.

Gui'ch barojp bacaa San Pedr

Rxhiaal Bëd xtiidx Dios loj ree bejn

¹ Naj, Simón Bëd, najn tijb xi apóstol Jesucrist rün tëen sirv lojman, cucan gui'ch guie par lëjt guial rajpidi lasa'gajc guialrliladx za'cdxoon ni raya'pan, yan guial ma naya du luxdoo ree por ni been Jesucrist, Dios raliduladx ree, bën rabëë bejn ree loj dol. ² Güünle' Dios lëjt mazri, yabe'cdxe tëëman luxdoodi guial ma nünbeedi laaman në dux Dad ree Jesucrist.

Zi'c rayal gac ree xbejn Jesucrist

³ Por xguialrniabee Dios ma baneeman gra ni rayaadx ree, din yaya'p ree guialnaban tiblyaa, yabajn tëë ree naya delant lojman, din ma naguieenbee ree Dios bën gule dunuj ree guial ca'man guialrniabee naj tëëman benza'c. ⁴ Zeel ma beenman promejs du loj ree, promejs narooob ree ni lasajc ree, abi' por laa reen ma yu' xSprijt Dios luxdoodi, ma been tëëdi tiblyad gra ree ni ad rüjnt sirv në ree ni mal riga' loj guidxliuj guie. ⁵ Zeel gol been naguiejn por guialrliladx ni rajpidi gol gubajn zagdx, din guial guibandi zagdx, dxel mazri ma gagbeedi xhienaag guibandi. ⁶ Abi' guial gagbeedi xhienaag guibandi, ma zajc gucweëz xixgabmalidi, abi' guial gucweëzidi xgabmal guin ree, ma zajc gapidi pasens, abi' guial gapidi pasens, ma zajc guibandi naya delant loj Dios, ⁷ dxel guial guibandi naya delant lojman, ma zajc guiën lasa'di, abi' guial guiën lasa'di, ma zajc guiëndi gra ree bejn.

⁸ Bal yu'guijquidi nine ree cusnuu tëë cayüjndi naguiejn guibandi zian, dxel ad naban xlia'tzidi, ad beenbee xlia' tëëtidi dux Dad ree Jesucrist. ⁹ Per bën ad rüjnt naguiejn guiban zian, laaman naj zi'c tijb bën lutia'p o zi'c tijb bën ad ruguiaat zijt, ma bayanladxaman guial biquied Dios xtolaman ni beenman guia'xchej. ¹⁰ Zeel rnin lojdi, compniar raliduladx ree Jesucrist, zi'c ma bacaabee Dios lëjt ma gulej tëëman lëjt, gol been naguiejn gol guzudxi'ch loj xnejzaman, din bal sudxi'chidi, ad zayajbtridi loj dol. ¹¹ Zian gapidi nejj nali din chu'di lod rniabee dux Dad ree Jesucrist tiblyaa, bën babëë dunuj ree loj dol.

¹² Zeel zianczi ganin nine ree lojdi din gusaaladxidi laa reen, majsi ma ragbeedan, majsi ma zinal tëëdi ni diidxli ni ma bacaagdiajguidi. ¹³ La'tgaj naban loj guidxliuj guie, naladxan rayal gunen consejw lojdi con ree diidx guin. ¹⁴ Din por dux Dad ree Jesucrist ma gogbeen guial ma zidyob dxej yazaan loj guidxliuj guie.

¹⁵ Zeel cayün da'tan naguiejn rnienë'n lëjt, din gusaaladxidi da diidxan majsi ma güjtan.

Bën baguiaa ree xguialrniabee Jesucrist

¹⁶ Chi ranan lojdi xhienaag naj xguialrniabee Jesucrist xhie tëë naag gui'taman stijb, ad balëëguijctan ni banan lojdi. Din con quijb du lojn baguiaa xbianiman ¹⁷ chi biguien cha' Dios diidx xanyabaa, gulesaman xvaloraman baza't tëëman laaman zagdx, rëbaman: "Xin guie naj da xi'n'an, rënan laax rabaanë' tëën laax." ¹⁸ Abi' dunujn nayajc bën biguien cha' Dios diidx xanyabaa chi nadxu'në'n Jesús ruguia' zii, lod biguien xbianiman.

¹⁹ Zianan zeel mazri raliduladxan ni rëb ree bën badëëd xtiidx Dios loj ree bejn, zeel zagdx naj bal yu'guijquidi ni rëb reeman, din xtiidx reeman naj zi'c tijb guij rusni lod nacay la'tgaj rareguiaa. Yan ziangajc lëjt chaawladx

cusnuu cayagbeedi xcwent Dios xt chi gui't Jesucrist stijb, b́en naj bajl rusni par dunuj ree, dxel ma gagbeedi graczan zi'c tal najn. ²⁰ Per gol gogbee guial ni'qui tijb xtiidx Dios ad zajct chignia' bejn por xixgabzaman. ²¹ Din b́en badéed ree xtiidx Dios loj ree bejn, ad guneet reeman xtiidxaman zi'c goczi xixgab reeman, guneee reeman ni basajb xSprijt Dios guijc reeman.

2

B́en ruliüü ree diidx rusquiee (Judas 4-13)

¹ Zian zi'c guyu ree b́en rusquiee loj ree b́en Israel tiamp gulal rēb reeman rudéed reeman xtiidx Dios loj ree bejn, ziangajc chu' ree b́en rusquiee guliüü lējt ni rusquiee ree, yaguil reeman mod din guliüü reeman lējt ni ad najt diidxli par gagxdadi. Ad zatiējt reeman nabee Jesucrist laa reeman, majsi baguixaman xtol reeman, zeel ad zaglaat gunijt Dios laa reeman. ² Per zien ree bejn chinal guiban nadxuudx zi'c naban reeman, abi' por laa reeman guinieeguidx ree bejn xtiidxza'c Dios. ³ Abi' guial rzēēbladx reeman milia, yaguil reeman xhie ni rusquiee guliüü reeman lējt din tia' reeman xmiliadi, per ziangajc ad zalaat reeman loj xcasti Dios ni cabēz laa reeman, din diizd gocli mal yu' casti ni yayal ree b́en rüjn zian.

⁴ Ad beent Dios perdon anjl ad bazoobt ree xtiidxaman, guxhaalaman laa reeman gabijl, abi' nada'cw reeman lod nacay da't, cabēz reeman dxex güün xguialguxtisaman. ⁵ Ad been tēētaman perdon benmal guyu ree tiamp gulal, banijtaman laa reeman con nijs. Tijbzi Noé b́en balüü xhienaag chinal ree bejn xnejz Dios, laazaman naj b́en gulaa con zagajdx ree bejn. ⁶ Ziangajc chi been xguialguxtis Dios con ree guiedx Sodoma nē Gomorra, baze'caman laa reen xt bayajc reen cobdēj, abi' laan naj ejempl par ree b́en guiban nadxuudx zi'c ree b́en guiedx zii ree. ⁷ Per baslaa Dios b́en brii laj Lot, b́en guban zi'c rēn Dios guyu tēēman xgab guial baguiaaman zi'c guban ree benmal guin. ⁸ Abi' guial gubajnman zagdx, zeel guixie guixie guyunaya da'taman por ree nidxuudx biguiejnman baguiaa tēēman been ree b́en guin. ⁹ Rajc rüjn Dios yudar b́en ruzoob ree xtiidxaman xhietēz loj prueb cadēd reeman, abi' ma naj xhie güünnēman benmal ree dxex güün xguialguxtisaman.

¹⁰ Laan naj ni yayal ree b́en naban zi'ctzi rēn reeman, ad rēnt reeman nabee Jesucrist laa reeman, dád nad reeman, ad ratut reeman, ad rdxeb tēēt reeman rnieeguidx reeman b́en naj ree xianjl Dios. ¹¹ Abi' ni'qui ree xianjl Dios, majsi rajp reeman mazri gojl nē guialrniabee, per achet diidxguijdx rēb reeman lojman contr laa reeman.

¹² Lasa' ree b́en guin naban reeman zi'c ree be, ad yu't xquiarguejn reeman abi' rnieeguidx reeman ni ad rignia't reeman, guidiblagaa rüjn reeman ni rēntzi reeman sin xgab. Zi'c ree be zēēdzi reeb loj guidxliuj guie par guiniaaz reeb din guiēt reeb, ziangajc laa reeman por nidxuudx rüjn reeman ma cusēēb laagajc reeman, ¹³ abi' yaguijx reeman gra ni rüjnnē reeman bejn ree.

Rabaa da't reeman guial rüjn reeman ni dxuudx ree, ni natu ree. Naj reeman zi'c tijb manch, ruxhiin reeman lanij rüjndi chi rawidi tijbzi, abi' rabaa da't reeman guial rusquiee reeman lējt.

¹⁴ Ad zajct guiguaa reeman tijb b́engunaa sin guial ad züjnt reeman xgabdx-uudx, ad rucwēēzt rüjn reeman dol rusquiee tēē reeman b́en ad rignia'za'ct ree xtiidx Dios din güün reeman dol, abi' dád nasin reeman par güün reeman gan ni rzēēbladx reeman, laa reeman ma naj par yayal reeman xcasti Dios.

¹⁵ Ad zinaltri reeman xnejzaman, ma bidxaa zi'c naban reeman, ma zinal reeman ni been Balaam bën badëed xtiidx Dios loj ree bejn, xi'n bën brii laj Beor, chi guyënman nünjman gan milia por ni mal nünjman. ¹⁶ Per chi zëman ziguienman ni mal guin, bacwëez Dios laaman, basneeman xburaman zi'c tijb bejn, zian bacwëez Dios xixgabtontaman.

¹⁷ Yan bën rusquiee cuzat reen lojdi naj reeman zi'c bizë ni ad yu't nijs, zi'c zaj ni ad nët guia, zeel rayal reeman lod nacay da't lod ad yu' tët dxej yarii reeman. ¹⁸ Ganax ree diidx nabë rü reeman, diidx ad rüjnt ree sirv, rëb reeman guial achet güünan guiban bejn zi'ctzi rënman, abi' zian rusquiee reeman bën qui cusa'nri ree nejzmal. ¹⁹ Rëb reeman guial achut rayal nabee bejn, per ad rignia't reeman guial nidxuudx rünj reeman rniabee laa reeman, din graczi ni ad rajt rucwëez rünj ree bejn, laan naj ni rniabee laa reeman. ²⁰ Chi ma beenbee ree bejn dux Dad ree Jesucrist guial laaman naj bën babëe dunuj ree loj dol ma basa'n tëe reeman nidxuudx yu' ree loj guidxliuj guie, abi' rtiëjb reeman rniabee laa reeman stijb, dxel piorli guiban reeman guial chi gad reeman güünbee laaman. ²¹ Zagdxeli naj ad nünbeet reeman xnejzaman, guial beenbee reeman laan abi' basa'n reeman xtiidxza'caman ni ma biguiejn reeman. ²² Con laa reeman rajc cumplid diidx ni rëb: "Rayaw bë'cw ni bayëbib, guiáad cüch qui gojzri con nijs naya rayub loj nizbajn."

3

Ni gac chi gui't Jesucrist stijb

¹ Gradi compniar raliduladx ree Jesucrist, rën da'tan lëjt, nine naj gui'ch rarojp rxhialan par lëjt. Loj grop gui'ch guie cayünan naguiejn ganenë'n lëjt din güündi xgab zi'c rayal. ² Gol basaaladx ni rëb ree bën badëed xtiidx Dios loj ree bejn tiamp gulal, gol basaaladx tëe xtiidx dux Dad ree Jesucrist, bën babëe dunuj ree loj dol, xtiidxaman ni balüü ree apóstoles lëjt.

³ Gol badxe'guijc, chi ma zidyob nit guidxliuj, chu' ree bën guze' lëjt abi' guiban reeman zi'ctzi rën reeman. ⁴ Abi' na reeman lojdi: "¿Gon promejs been Jesucrist guial gui'taman stijb? Ma güjt gra ree dux bégulal ree, abi' graczi ni yu' loj guidxliuj guie sta naj gajc diizd chi gocchaaw guidxliuj."

⁵ Na reeman zian, guial ad rënt reeman yayagbee reeman guial diizd tiamp gulal mal yu' xanyabaa në guidxliuj abi' por xguiarlriabee Dios brii guidxliuj guin loj nijs. ⁶ Gojc xchej, dxel con nijs gajc banijt Dios bën gocli ree. ⁷ Per xanyabaa në guidxliuj raguiaa ree yan, ma naj guial gunijt Dios laa reen con bajl por xguiarlriabeeman dxej ni güün xguialguxtisaman con ree bën ad ruzoobt xtiidxaman.

⁸ Zeel rnin lojdi, compniar raliduladx ree Jesucrist, ad bal yayanladxidi, guial par dux Dad ree Dios tib dxej naj zi'c timil ijz, guiáad timil ijz naj zi'c tib dxej.

⁹ Ad cayaglaataman par güün cumplid xpromejsaman, zi'c naladx garol ree bejn, rajpaman pasens, din ad rëntaman guial nit bejn delant lojman, rënman guial gra bejn yayagbee laaman.

¹⁰ Zi'c tal ri't tijb bégubaan achut ragbee gui'taman, zian guidxin dxej gui't dux Dad ree Jesucrist stijb, nadxeb da't gac naquie' chi nidloj xanyabaa, guiáad gra ree ni yu' xanyabaa guin, gunijt Dios laa reen con bajl, në guidxliuj con gra ree ni yu' lojn, con bajl gunijt Dios laa reen.

¹¹ Yan, guial ma ragbeedi xhienaag nit guidxliuj, rünj naguiejn guibandi naya sin dol zi'c rën Dios. ¹² Con gan gol gulëjz dxej ni ma gulejman, dxej ni

guze'caman xanyabaa nē gra ni yu' xanyabaa, zi'cgajc guidxliuj con gra ni yu' lojn, con bajl gajc nit reen dxej zii. ¹³ Per dunuj ree caylējz ree xanyabaa cūb nē guidxliuj cūb zi'c ma been Dios promejs, ni gac zi'c tal rēnman.

¹⁴ Zeel rnin lojdi compniar raliduladx ree Jesucrist, la'tgaj cabēzidi gac ree ni guin, gol been da't naguiejn din guidxaagloj Dios lējt naya sin dol, riga'dxenē tēē lasa'di. ¹⁵ Gol badxe'guijc, guial dux Dad ree Dios cayajpaman dunuj ree pasens, din yaya'p ree tiamp yasa'n dux tol ree din yaye'c ree lojman. Abi' dux compniar ree Pab, bēn rayēn da't ree, ziangajc naman lojdi loj ree xtiidxaman, zi'ctzi naj quiarguiejn ni bazaladx Dios lojman. ¹⁶ Gra loj ree xtiidxaman naman lojdi ni canin lojdi. Per yu' lajt loj ree gui'ch guin lod naj nawēēg guial chignia' bejn, dxel bēn ad rajctzi ree nē ree bēn ad zinalt xtiidx Dios con guidib luxdoo, ruchaa reeman ni rēn guiēb xtiidx Pab, zi'cgajc rūjnnē reeman ni zēēd ree loj xtiidx Dios, zeel laagajc reeman cusēēb laa reeman.

¹⁷ Compniar raliduladx ree Jesucrist, rēnan lējt, zeel yan guial ma ragbeedi nine ree, gol gojp cudad chitēē gūūn ree bēn rēn ree gusquiee lējt gan, chitēē gucwēēz sudxi'chidi loj xnejz Dios. ¹⁸ Zagdxeli gol been naguiejn gūūnbeedi mazri dux Dad ree Jesucrist, bēn baguijx dux tol ree, gol been tēē naguiejn gagbeedi mazri guial rēn da'taman dunuj ree. Laaman rayal respejt gra tiampczi.

Gui'ch yaløj bacaa San Juan

Jesucrist runee guialnaban tiblyaa

¹ Gui'ch guie naj par gugojnan lëjt xcwent Jesucrist, bën mal yu' gocli diizd chi gad guidxliuj gacchaaw. Ma baaagdiajgan, ma baguiaan ni beenman, baguiaan laaman zagdxë, ma baqui'tëen laaman con quijb du yaan. Laaman naj bën runee guialnaban, ² ma bi'taman loj guidxliuj, ma baguiaan laaman, dunujn nayajc testiw ragojn tëen lëjt xcwentaman. Laaman naj bën runee guialnaban tiblyaa, najman bën guzunë Dios diizd gocli bi't tëeman loj guidxliuj. ³ Zeel ragojnan lëjt ni ma baguiaan ni ma baguiejn tëen din gaquidi tijbzi con dunujn zi'c nayajcan tijbzi con dux Dad ree Dios con xi'nman Jesucrist. ⁴ Ragojnan lëjt nine ree loj gui'ch guie din chu' luxdoodi zagdxë, zi'c yu' du luxdooon zagdxë.

Royal yanaab ree loj Dios din güünman dux tol ree perdon

⁵ Ni ne naj ni balüü Jesucrist dunujn, yan ragojnan lëjt guial naj Dios biani, achetczi dol nabannëman. ⁶ Bal yaguie'ch ree nadxu'në' reeman abi' zunaal gajc ree nejz mal rasquiee ree ad zunaalt ree diidxli.

⁷ Per bal yunaal ree xbiani Dios zi'c za'man, guial achet xtolaman, dxel ma nayajc ree tijbzi con du lasa' ree. Abi' xrejñ xi'nman Jesucrist chiquied gra dux tol ree.

⁸ Bal yaguie'ch ree achet dux tol ree yu', rasquiee dunuj gajc ree, ad cayguie'ch tëët ree diidxli. ⁹ Per bal yaxhoobdol ree loj Dios, rayagbee ree zagdxë guial güünman ni naman, güünman perdon dux tol ree, chiquied tëeman gra ni mal yu' du luxdoo ree. ¹⁰ Per bal yaguie'ch ree ad waguieent ree dol, raguieen reeman zi'c bënrusquiee, ad raliduladx tëët ree xtiidxaman.

2

Bën rën Dios royal guzoobaman xtiidxaman

¹ Xi'n, rucan nine ree par lëjt chitëë güüdi dol. Per bal chu lëjt rüjn dol, raya'p ree bën guiniee por dunuj ree loj Dios, laaman naj Jesucrist bën ad wayüjntczi dol. ² Por xguialgüjtaman naj dux tol ree perdon, abi' ad dux toltzi ree, në gra xtol ree bënguidxliuj.

³ Bal razoob ree xtiidx Dios, zian raya'p ree segur guial ma naguieenbee reeman zagdxë. ⁴ Per bal chu rëb: "Nünbeen Dios", abi' ad ruzoobtaman xtiidxaman, rusquieeman, din ad walit ni rëbaman. ⁵ Per bënruzoob xtiidxaman, diidxli rënman laaman con guidib luxdoooman, zian rayagbee ree guial ma nabajnnë' reeman. ⁶ Bën rëb nabannëman Dios, royal guibanman zi'c guban Jesucrist.

Bën zinal ree xnejz Dios rën lasa' reeman

⁷ Gradi compniar raliduladx ree Jesucrist, diidx canin lojdi yan ad diidx cübt reen, xtiidx gajc Jesucristan ni ma biguiejndi diizd yaløj, laagajcanan canin lojdi yan. ⁸ Per canin laa reen zi'c rulüü diidx cüb reen, din por Jesucrist në por lëjt ma rguien guial ma cusa'ndi ni mal abi' zinalidi ni zagdxë.

⁹ Bal chu rëb zinal xnejz Dios abi' ralen lasa'man, sta zinalaman nejz mal. ¹⁰ Bën rën lasa' zinalaman xnejz Dios, abi' ma naj nawëëg guial güün dol

laaman gan. ¹¹ Per bèn ralen lasa', nabanman loj nejj mal, ad ragbeetaman ban cheman, din nejj mal guin basa'n laaman zi'c tijb bèn'lutia'p.

¹² Xi'n, rucan gui'ch guie par lèjt, din ma gojc xtolidi perdon por xgualrni-abee Jesucrist. ¹³ Cucan nine ree par lèjt guial najdi bèn ma rignia' mazri chunin naj Jesucrist. Bèn ma yu' gocli diizd chi gad guidxliuj gacchaaw, cucan ni ne ree par lèjt bèn ma rignia' ta'n chunin naj Jesucrist din ma beendi gan ad zũjntidi ni zèed loj xindxab, cuca tèn nine ree par lèjt bèn qui guzulojri ree cayignia' chunin naj Jesucrist din ma nũnbeedi dux Dad ree Dios.

¹⁴ Bacan nine ree par lèjt guial ma rignia'di mazri chunin naj Jesucrist bèn ma yu' gocli diizd chi gad guidxliuj gacchaaw, baca tèn nine ree par lèjt guial ma rignia'di ta'n chunin naj Jesucrist, din za'dxi'chidi zinal tèedi diidxli xnejz Dios con guidib luxdoodi, ma been tèedi gan ad zũjntidi ni zèed loj xindxab.

¹⁵ Ad sèebladixidi ni ad najt zagdxe ni rũjn ree bejn loj guidxliuj, bal chu rèn mazri ni riga' loj guidxliuj guie, ad rëntaman dux Dad ree Dios, ¹⁶ din acheteci ni mal yu' loj guidxliuj guie zèed loj Dios, ni rajc gajc loj guidxliuj guien, rũjn reeman zi'c naj xixgab dxuudx reeman, rzèebladix reeman gap reeman gra ni ruguiaa reeman, rũjn tèe reeman benro' por gra ni rajp reeman. ¹⁷ Per guidxliuj guie yu' dxej nitan con guidib ni mal yu' lojn, per bèn naban zi'c rèn Dios rajpaman gualnaban tiblayaa con laaman.

Yunaal ree ni naj diidxli

¹⁸ Xi'n, rnin lojdi ma zidyob dxej nit guidxliuj, din ma biguiejndi guial rayal gui't tijb bèn su contr Jesucrist guièb tèeman laaman naj Jesucrist. Yan zien ree bèn ralen laaman ma balũüloj, zeel rayagbee ree guial ma zidyob dxej nit guidxliuj. ¹⁹ Bèn ralen ree Jesucrist, duløj gajc ree brii reeman nayajc ree bèn rliladx Jesucrist, per diidxliczi ad najt reeman dux bejn ree, din bal niajc reeman dux bejn ree, naya'n reeman duløj ree guial raliladx ree Jesucrist, per gojc nine din guiguien guial ad grat reeman naj dux bejn ree. ²⁰ Jesucrist banee xSprijt Dios lojdi, abi' por laaman gradi ma ragbee ni naj diidxli. ²¹ Cucan nine par lèjt, ad guial ad ragbeetidi conin naj ni diidxli, cucanan guial ma ragbeedan, abi' lèjt ragbee guial ni'qui tijb ni rusquiee ad zajct gui't loj ni diidxli guin. ²² Yan, ¿chu naj bèn rusquiee? Bèn rusquiee naj bèn røb guial ad Jesús naj bèn guxhaal Dios loj guidxliuj. Bèn røb zian naj zi'cgajc naj bèn za' contr Jesucrist guial ad rliladxtaman Dios ni'qui xi'nman Jesucrist. ²³ Din chutèez bèn røb guial ad najt Jesucrist Xi'n Dios, laaman ad nũnbeet dux Dad ree Dios, per bèn røb Jesucrist naj Xi'n Dios nè dux Dad ree Dios nũnbeeman.

²⁴ Zeel gol binal diidx ma biguiejndi diizd guia'xchej chi bililadxidi Jesucrist. Bal chinalidi diidx guin ree, dxel ziz nabannèquidi dux Dad ree Dios con xi'nman Jesucrist. ²⁵ Abi' ni ma røb Jesucrist guneeaman naj gualnaban tiblayaa.

²⁶ Cucan diidx guie ree par lèjt por ree bèn rèn gusquiee lèjt. ²⁷ Per nabannèdi xSprijt Dios, bèn banee Jesucrist, ad riaadxtidi bèn gulũü lèjt, din Sprijt guin gajc rulũü lèjt gra, abi' ganax diidxli ad ni rusquieet, zeel gol gubajn zi'c rniabeeman din gusnuu gaquidi tijbzi con Jesucrist.

²⁸ Yan rnin lojdi xi'n, gol binal xnejz Jesucrist, chitèe yadxeb ree chi gulũülojman, ad zaya'nxtu tèt ree lojman chi gui'taman. ²⁹ Lèjt ragbee guial

rüjn Dios zi'c rayal, ragbee tēēdi guial graczi ree bēn rüjn zi'c rayal, laa reeman naj xi'n Dios.

3

Bēn naj ree xi'n Dios

¹ Gol been xgab, plact rēn dux Dad ree Dios dunuj ree, zeel balēē dulaj ree xi'n Dios, abi' waliczan nayajc ree xi'nman. Per bēn ad zinalt ree xnejz Dios ad nūnbeet reeman dunuj ree zi'c xi'nman, din ad nūnbeet reeman laaman.

² Gradi compniar raliduladx ree Jesucrist, rēnan lējt, rnin lojdi: Ma nayajc ree xi'n Dios, majsi ad rayagbeet ree xhienaag yayajc ree chi gui't Jesucrist stibj, per raya'p ree segur guial yayajc ree zi'c najman, din xt nādxel yaguiaa ree diidxliczi xhienaag najman. ³ Graczi ree bēn rliladx guial gac zian, rüjn reeman nagueijn guiban reeman naya delant loj Dios zi'c laaman, guial achet xtolaman.

⁴ Per graczi ree bēn ad zinalt ni rniabee Dios, cayūjn reeman dol, din dol naj guial ad rüjnt reeman ni rniabeeman. ⁵ Lējt ragbee guial bi't Jesucrist loj guidxliuj din chiquiedaman xtol ree bejn, abi' laaman ad guyutczī dxej ad yu' tēēt dxej nūjnman dol. ⁶ Zeel bēn naj ree tijbzi con laaman rüjn reeman nagueijn ad rüjnt reeman dol, per graczi bēn rüjn dol zianczi ad wayignia't reeman chu najman, ad wayūnbee tēēt reeman laaman. ⁷ Xi'n, ganin lējt, ad bal tiēbidi chu gusquiee lējt, din bēn cayūjn ni rēn Dios, laaman naya delant lojman zi'c naya Jesucrist delant lojman. ⁸ Per bēn yu' loj dol xbejn xindxaban, din xindxab rüjn dol diizd yaløj, abi' Jesús Xi'n Dios bi'taman loj guidxliuj par zianczi din gūnman gan loj xguialrniabee xindxab.

⁹ Zeel ni'qui tijb ree bēn ma zinal xnejz Dios ad rusnuutri rüjn dol, din ma nabannēman Dios, ad rayal tēētri gūnman dol din ma najman xi'nman.

¹⁰ Laa rguien gajc chu reenin naj xi'n Dios chutēē reenin naj xi'n xindxab, din chutēēz ad rüjnt ni rēn Dios ad rēn tēēt lasa'man, dxel ad najtaman xi'n Dios.

Rayal yayēn du lasa' ree

¹¹ Abi' lējt ma biguiejndi xtiidx Dios diizd guia'xchej guial rayal yayēn dulasa' ree. ¹² Ad rayalt yaguieen ree zi'c been Caïn, cwējbaman gunabee xindxab laaman, zeel bagūjt bijchaman. Caïn been zian, din beenman ganax ni mal, guiaad bijchaman been ni zagdxē.

¹³ Zeel gradi compniar raliduladx ree Jesucrist, ad gagdxadi bal yalen ree bēnguidxliuj lējt guial ma zinalidi xnejz Dios. ¹⁴ Dunuj ree rayagbee guial ad nayajct ree zi'c bengūt par laaman, ma raya'p ree guialnaban delant lojman, guial rayēn du lasa' ree. Per bēn ad rēnt lasa', sta najman zi'c bengūt par Dios.

¹⁵ Graczi bēn ralen lasa' najman zi'c bēn rugūjt bejn, abi' lējt ragbee, tijb bēn rugūjt bejn ad rajptaman guialnaban tiblāyaa delant loj Dios. ¹⁶ Ma rayagbee ree conin naj guial rēn lasa', guial gūjt Jesucrist por dunuj ree, yan ziangajc dunuj ree rayal yayēn dulasa' ree xt yayējt ree por laa reeman. ¹⁷ Per bal chu tijb dunuj ree ad riaadxt xhienin loj guidxliuj guiee abi' ruguiaaman tijb bēn cayaadx laan abi' ad rüjntaman laaman yudar, dxel, xhienaag guieebaman guial rēnman Dios? ¹⁸ Xi'n, ganin lējt, ad con diidxtizī yaguie'ch ree guial rayēn dulasa' ree, rayal guiguien guial rayēn dulasa' ree por ni rguieen ree.

Raya'p ree segur guial za' nē Dios dunuj ree

¹⁹ Zian rayagbee ree cayzoob ree xtiidx Dios, abi' raya'p ree segur guial cayguieen ree ni rayal yaguieen ree delant lojman. ²⁰ Per bal cayguieen ree zian abi' sta ragbee du luxdoo ree guial ad cayguieent ree zi'c rayal, rayal yayagbee ree guial Dios naj mazri benro' guial duløj ree, abi' laaman ragbee gra. ²¹ Zeel zi'c rënan læjt rnin lojdi, bal ragbee du luxdoo ree guial cayguieen ree ni zagdx, dxel raya'p ree segur guial cayguieen ree ni zagdx delant loj Dios. ²² Laaman gunee graczi ni yanaab ree lojman guial razoob ree xtiidxaman ni rniabeeman, abi' raguieen ree naguiejn raguieen ree ni ruladxaman. ²³ Ni ne naj ni rniabeeman yaguieen ree guial yaliduladx ree Jesucrist naj xi'nman yayën tõe dulas'a ree zi'c gunabeeman dunuj ree. ²⁴ Bén rüjn ree ni rniabee Dios, laa reeman nabannë Dios abi' Dios nabannë laa reeman, rayagbee tõe ree guial za'man con dunuj ree por xSprijtaman bén baneeman duløj ree.

4

Bén ad rliadxt Jesucrist ad yu't xSprijt Dios luxdooan

¹ Gradi compniar raliduladx ree Jesucrist, rënan læjt, rni tõe lojdi: ad rliadxidi chutëez bén rëb rnieeman xtiidx Dios. Yaløj xgaj gol gogbee zagdx bal wali reeman xtiidx Diosan rniee reeman o ad laatanan ya, din loj guidxliuj guie ziza zien ree bén rusquiee, rëb reeman rniee reeman xtiidxaman. ² Yan din gagbeedi chu reenin rniee xtiidx Dios: Laa reeman naj bén rliadx guial Jesucrist bi't zi'c bénguidxliuj. Bén rliadx ree zian yu' xSprijt Dios luxdoo reeman. ³ Per bén ad rliadxt ree zian ad yu't xSprijtaman luxdoo reeman, laa reeman naj bén ralen Jesucrist. Ma biguiejndi guial rayal gui't tijb bén su contr laaman. Abi' diidz yan ma za' sprijt guin guidxliuj, zeel zien ree bén ralen Jesucrist ma yu' loj guidxliuj guie.

⁴ Per læjt xi'n ma najdi xi'n Dios, guiaad ree bén ralen Jesucrist ad zajct güün reeman læjt gan, din mazri narooob guialrniabee ca' bén nabannë læjt guial loj bén nabannë bén zinal ree nejz mal loj guidxliuj guie. ⁵ Bén za' ree contr Jesucrist rüjn reeman xgab tijbzi ni riga' loj guidxliuj guie rniee reeman, guiaad ree bén ad rliadxt Jesucrist rüjncwent reeman ni rëb reeman. ⁶ Per dunuj ree ma nayajc ree xbejn Dios, abi' bén ma nünbee ree Dios rucaagdiajg reeman ni ranee ree, guiaad ree bén ad nünbeet Dios ni'quid rüjncwent reeman ni ranee ree, zian rayagbee ree chu nabannë xSprijt Dios bén rulüü dunuj ree diidxli chutëenin nabannë sprijt ni rulüü ganax ni rusquiee.

Rën Dios dunuj ree

⁷ Rënan læjt, rnin lojdi rayal yayën dulas'a ree, din gualrën lasa' zëed loj Dios. Gra bén rën lasa' naj xi'n Dios nünbee tõe reeman laaman. ⁸ Abi' bén ad rënt lasa' ad wayünbeetaman Dios, din gualrën lasa' zëed loj Dios. ⁹ Balüü Dios guial rënman dunuj ree, din majsi tijbzi xi'nman Jesucrist, guxhaalaman laaman guidxliuj din yaya'p ree gualnaban delant loj Dios por laaman. ¹⁰ Rën Dios dunuj ree. Ad dunujt ree bayën laaman, yaløj laaman guyën dunuj ree, zeel guxhaal xi'nman Jesucrist persi güjtaman por dux tol ree, zeel ma yu' perdon par dunuj ree. ¹¹ Rënan læjt, zeel rnin lojdi, zi'c rën Dios dunuj ree, ziangajc rayal yayën dulas'a ree. ¹² Majsi achut waguiaa laaman, per bal rayën dulas'a ree, nabannë'qui ree Dios, abi' diidxli rayën reeman.

¹³ Dunuj ree rayagbee guial nabannë' reeman abi' laaman za' con dunuj ree, din ma baneer xSprijtaman duløj ree. ¹⁴ Abi' dunuj gajcan baguiaa ragojn tõe guial guxhaal Xi'n Dios loj guidxliuj guie persi güjtaman por xtol gra ree

bejn. ¹⁵ Chutëez rëb guial Jesucrist naj Xi'n Dios nabannëman Dios, abi' Dios nabannë laaman. ¹⁶ Dunuj ree rayagbee raliladx tëe ree guial rën Dios dunuj ree. Por laaman zëed guial rayën dulasa' ree. Abi' bën rën lasa' nabannëman Dios, guiáad Dios nabannë laaman.

¹⁷ Bal wali rayën ree Dios zi'c rënman, ad najtan ni yadxeb ree dxej güün xgualguxtisaman, din ma nayajc ree tijbzi con laaman, zi'c naj Jesucrist tijbzi con laaman. Din guidib dux gualnaban ree nabannë' reeman loj guidxliuj guie. ¹⁸ Bën rën Dios, ad rdxebtaman, din bën rën laaman diidxli, ad rdxebtraman, per bën ad rënt laaman rdxebaman, din rünman xgab casti ni yayalaman, zeel bal chu rdxeb, ad walitaman rënman laaman. ¹⁹ Dunuj ree rayën Dios, din yaløj laaman guyën dunuj ree. ²⁰ Bal yu' bën rëb: "Rënan Dios", abi' ralen lasa'man, rusquieeman. Din bal id rën lasa'man bën ruguiaaman, çxhienaag guiënman Dios bën ad waguiaataman? ²¹ Laagajcaman na: Bën rën Dios rayal guiën lasa'man.

5

Guial raliduladx ree Jesucrist zeel raguieen ree gan loj ni mal

¹ Gra ree bën rliladx guial Jesús naj bën guxhaal Dios, laa reeman naj xi'nman. Bal chu rën dux Dad ree Dios, në gra ree xi'nman rënman. ² Chi rayën ree Dios raguieen tëe ree ni rniabeeman, dxel rayagbee ree guial rayën ree gra ree xi'nman. ³ Guial guiën bejn Dios naj guial güünman ni rniabeeman. Abi' ad nawëëgt naj guial güünman ni rniabeeman, ⁴ din gra bën naj xi'nman ma rün gan loj ree ni mal yu' loj guidxliuj guie. Abi' guial raliduladx ree, zeel ma raguieen ree gan loj ree ni mal guin. ⁵ Bën rliladx guial Jesús naj Xi'n Dios, tijbzi laaman zajc güün gan loj ree ni mal yu' loj guidxliuj.

Ni ruliüü Dios dunuj ree xcwent Jesucrist

⁶ Jesucrist bi't loj guidxliuj, guobnijsaman guxhie' tëe xrejnman loj crüzj. Ad guobnijstzaman, në guxhie' xrejnman. XSprijt Dios naj testiw, laaman rü diidxli xcwent ree nine.

⁷ Choon testiw yu' xanyabaa: xDadaman Dios, Jesucrist në xSprijt Dios, guiyon reeman naj tijbzi Dios.

⁸ Yu' tëe choon testiw loj guidxliuj: XSprijt Dios, në guial guobnijs Jesucrist con ni guxhie' xrejnman loj crüzj, guiyon reen rü diidx tijbzi.

⁹ Bal raliduladx ree ni na ree bejn, mazri rayal yaliduladx ree ni na Dios xcwent xi'nman Jesucrist, din xtiidxaman mazri lasajcan. ¹⁰ Bën rliladx Xi'n Dios, laaman rliladx ni rëb Dios xcwentaman. Per bën ad rliladx laaman, rünman Dios zi'c bën rusquiee, din ad rliladxaman ni rëbaman xcwent Xi'nman. ¹¹ Abi' ni rëbaman naj guial ma baneeman gualnaban tiblayaa duloj ree, gualnaban guin zëed por xi'nman. ¹² Bën za'në Xi'n Dios tijbzi, laaman naban tiblayaa delant loj Dios, per bën ad za'nët laaman tijbzi, laaman ad ca't gualnaban guin.

Ni bigra ca loj gui'ch guie

¹³ Cuan nine ree par lëjt najdi bën rliladx Jesucrist Xi'n Dios din gagbeedi guial ma ca'di gualnaban tiblayaa delant loj Dios.

¹⁴ Rayagbee ree zagdx: chi yanaab ree xhienin lojman, rünjcwentaman dunuj ree, bal yanaab ree zi'c rënman. ¹⁵ Bal rayagbee ree rünjcwentaman dunuj ree chi ranaab ree xhienin, ziangajc rayagbee ree zagdx guial guneeman ni ranaab ree.

¹⁶ Bal chu dunuj ree rayagbee guial tijb dunuj ree cayguieen dol ni zajc gac perdon, rayal cwedxaman Dios por laaman zian gudëe Dios guialnaban tiblayaa lojman, bal zajc gac dol guin perdon. Yu' dol ni ad zajct gac perdon, abi' ad canitan guial cwedxidi Dios por bën rüjn dol guin. ¹⁷ Graczi ni mal naj dol, per yu' dol ni zajc gac perdon.

¹⁸ Rayagbee ree guial bën ma naj ree xi'n Dios ad rusnuutri rüjn reeman dol, din Jesucrist Xi'n Dios naj bën rniaj laa reeman, abi' xindxab ad zajctri nabeex laa reeman. ¹⁹ Rayagbee ree guial nayajc ree xbejn Dios, per ree bênguidxliuj, bën ad najt ree xbejn Dios, xindxab rniabee laa reeman.

²⁰ Rayagbee tää ree guial Jesucrist Xi'n Dios ma bi'taman loj guidxliuj guie, guxhalaman dux quiarguejn ree, persi baguieenbee ree bën naj quijb Dios. Yan nadxu'në' reeman tijbzi por Xi'nman Jesucrist. Tijbzi laaman naj Dios, por laa tääman yu' guialnaban tiblayaa. ²¹ Xi'n, gol gojp cudad chitää chinalidi ni naladx ree bejn naj Dios.

Gui'ch barojp bacaa San Juan

Rxhiaal Waj xtiidx Dios loj ree bejn

¹ Naj, bén rniabee loj ree bén rliadx Jesucrist, rxhialan gui'ch guie lojdi najdi bén gulej Dios rliadx tëëdi Jesucrist, diidxli rënan lëjt, abi' ad tijbtizi naj, në gra ree bén zinal xtiidx Dios. ² Rënan lëjt guial ma nabannë' ree xtiidx Dios abi' laan nabannë dunuj ree zianczi. ³ Dux Dad ree Dios con Xi'nman Jesucrist güünle' lëjt, yaya reeman lëjt, yabe'cdxe tëë reeman luxdoodi guial zinalidi xtiidxaman rën tëë lasa'di.

Rniabee Dios yayën du lasa' ree

⁴ Dád nix guyu luxdon chi gogbeen yu' ree xcompniaridi, diidxli zinal xtiidx Dios naban tëë reeman zi'c rniabee dux Dad ree Dios. ⁵ Yan, zi'c rënan lëjt najdi dux compniar ree, gol been wen gol guyën lasa'di. Ni canin lojdi ad nicübtan, diidx ni bacaagdiajg gajquidi diizd guia'xchejn. ⁶ Guial rën Dios naj guial guiban bejn zi'c rniabee Dios, abi' ni rniabeeman ni bacaagdiajgudi diizd guia'xchej naj guial rayal guiban bejn, guien lasa'man.

Bén rusquiee ree bejn

⁷ Rnin zian, din gra ladczi guidxliuj ziza zien ree bén rusquiee ree bejn, guial ad rliadx reeman bi't Jesucrist loj guidxliuj zi'c bejn, bén rüjn zian rusquieeman abi' za'man contr Jesucrist. ⁸ Gol gojp cudad chitëë guseëbidi ni rayalidi por ni cayüjndi, din tia'di gra ni rayalidi delant loj Dios.

⁹ Chutëëz bén racaa guijc zi'c balüü Jesucrist bejn ree ad nabannëtaman Dios, per bén zinal xtiidx Jesucrist zi'c balüüman bejn ree, laaman nabannë Dios con Xi'nman. ¹⁰ Bal chu gui't lidxidi abi' ad rulüütaman xtiidx Dios zi'c balüü Jesucrist, ad cu'di laaman lënü, ad güüncwent tëëdi ni rnieeman.

¹¹ Din bén rüjncwent xtiidxaman, rën guiëban guial ma za'man conform con ni rusquiee bén guin.

Diidx bigra ca ree loj gui'ch guie

¹² Zien ree ni rënan ganin lëjt, per ad rëntan gucanan loj gui'ch, din wed ad zaglaat guialan guidganan lëjt din ganenë' quijb naj lëjt din chu' du luxdoo ree zagdxe tijbzi. ¹³ Bén naj ree bén ma gulej Dios, dux compniar raliduladx ree Jesucrist bén zojb ree niz guie, rugajpdioz reeman lëjt.

Gui'ch bayon bacaa San Juan

Rugajpdioz Waj Gayo

¹ Naj, bèn rniabee loj ree bèn rliadx Jesucrist, rxhialan gui'ch guie par lüj Gayo najl da miwan diidxli rënan lüj.

² Zi'c rënan lüj rniaaban loj Dios zi'c zël zagdxo loj xnejzaman ziangajc grii zagdxo gra ni cayüjnl gunee tēëman lüj guialnadaan. ³ Dád nix guyu luxdon chi guna garol dux compniar ree guial diidxli nabanl zi'c rëb loj xtiidx Dios.

⁴ Achet mazri ni rgu' luxdon zagdxo zi'c chi riguejnan guial diidxli naban ree da compniaran zi'c rëb loj xtiidx Dios.

⁵ Zi'c rënan lüj Gayo, rnin lojl guial zagdxo da't naj ni cayüjnl con dux compniar ree bèn rliadx Jesucrist abi' mazczi zagdxo naj ni rüjnl con ree bèn zëed lood ren. ⁶ Din laa reeman na delant loj gra ree bèn rliadx Jesucrist, bèn rado'pnë' reen guie, guial gunajchi'l laa reeman, zeel zagdxo güünl guial güünl laa reeman yudar con ni ryaadx reeman guial cayüjn reeman sirv loj Dios din gusnuu xnejz reeman. ⁷ Din brier reeman zigtie'ch reeman xtiidx Jesucrist abi' ad rtiëjbt reeman tia' reeman ni rudëë ree bèn ad rliadx laaman. ⁸ Zeel dunuj ree bèn raliduladx ree Jesucrist, rayal yaguien ree yudar bèn catie'ch ree xtiidxaman, zian yaguien ree yudar guire'ch ni naj diidxli.

Ad ruzoobt Diótrefes diidx

⁹ Ma guxhalan tijb gui'ch loj ree dux compniar ree bèn rliadx ree Jesucrist, per Diótrefes guial ruladxaman nabeeman ad rüjncwënttaman dux tiidxan.

¹⁰ Zeel bal guidganan lëjt dxel ganenë'n laaman xcwent guial rnieeguidxaman nree tēëman diidx rusquiee contr dunujn abi' ad tijbtzi laan rüjnman në ad rudëët lidxaman yaya'n dux bejn ree bèn zëed ree lood ren, ad rtiëjb tēëtaman gudëëd lidx ree ben ren yaya'n reeman, abi' ree bèn rudëëd lidx ad rtiëjbtaman chu' reeman lën yadoo.

¹¹ Zi'c rënan lüj Gayo rnin lojl ad chinalil neyz mal, been ni naj ni zagdxo din bèn rüjn ni zagdxo laaman naj xbejn Dios per bèn zinal ni mal ad nünbeetaman Dios.

¹² Graczi reeman ruza't Demetrio zagdxo guial binalaman zi'c rayal, laa nen gajc xhienaag nabanman xt dunujn raza't laaman zagdxo abi' lüj ragbee guial diidxli naj ni raguie'chan.

Diidx bigra ca ree loj gui'ch guie

¹³ Zien ni rënan ganin lojl per ad rëntan gucanan loj gui'ch, ¹⁴ din wed ad zaglaat guialan guidganan lüj, dxel ganenë' quijb naj lüj.

¹⁵ Yabe'cdxe Dios luxdool, dux miw ree bèn riga' ree guie rugajpdioz lüj, bagajpdioz tēë gra dux miw ree.

Gui'ch bacaa San Judas

Rugajpdioz Judas bén naj ree bén gule Dios

¹ Naj, Judas bijch Santiaaw, cayünan sirv Jesucrist, cucan gui'ch guie par lëjt najdi bén ma gulej dux Dad ree Dios guial rënman lëjt, abi' dux Dad ree Jesucrist canaj lëjt. ² Gusnuu yaya Dios lëjt, yabe'cdxeman luxdoodi guiën tēdi laaman.

Bén ad rnieet ree diidxli

(2Pe. 2:1-17)

³ Gradi compniar raliduladx ree Jesucrist, rënan lëjt, diidz gocli guyënan nixhialan gui'ch lojdi, din gagbeedi xcwent xhienaag naj perdon ni raya'p ree delant loj Dios, per yan ma bidxin dxej rüjn nagueijn gaxhalan gui'ch guie lojdi din ganin lojdi din guiniadi guialrliladx ni ma raya'p ree, ni nayaaloj, guial nayajc ree xbejn Jesucrist. ⁴ Din yu' ree bén rüjn bén rliladx naabzi par go'ch reeman lojdi. Bén guin ree diidz gocli ma ragbee Dios guial rayal reeman casti, din ad rdxebt reeman laaman, rudxiib reeman guijc naj Dios benza'c, abi' naban reeman zi'ctzi rën reeman. Ad rtiëjbt reeman nabee Jesucrist laa reeman, laaman naj tijbzi dux Dad ree bén rniabee dunuj ree.

⁵ Majsi ma ragbeedi ni ganin lëjt, per ganinan din gusaaladxidi guial majsi babëë Dios bén Israel ree Egipto, per despuejs banijtaman bén ad bililadxt ree laaman. ⁶ Në ree anjl ad bazooft xtiidx Dios niniabee reeman lod badëëman loj reeman, basiaawaman laa reeman lod nacay da't xt dxej güün xguialguxtisaman. ⁷ Nëtëë ree bén Sodoma con ree bén Gomorra con ree guiedx gure gajxh, ad laat gubajn reeman, been reeman gra loj nidxuudx zi'ctzi guyën reeman, zeel basagzi Dios laa reeman, banijtaman baze'c tēëman laa reeman, laan naj ni rayal yaguaaa ree chitëë yaguieen ree zian.

⁸ Per ni'czi zian, yan ziangajc rüjn ree bén raguuil mod par go'chzi reeman lojdi, rüjn reeman xgab guial zajc güün reeman zi'ctzi rën reeman, ruxhiin laagajc reeman, ad rtiëjb tēt reeman nabee Jesucrist laa reeman, rnieeguijdx tē reeman bén naj ree xianjl Dios. ⁹ Per chi gudildiidx ree arcangel Miguel con xindxab guijc xcuerp Moisejs, ni'quid bayaxt anjl guin niëjbaman diidxguijdx loj xindxab guin, tijbzi ni rëbaman naj: "Ladxaa Dios gusa'n'an lüj." ¹⁰ Abi' yan bén raguuil gajc ree mod go'ch reeman lojdi, rnieeguijdx reeman ni ad rignia't reeman, per nidxuudx rüjn reeman, ad rüjnt reeman laan xgab, contzi rüjn reeman laan zi'c ree be guial ad rüjnt reeb xgab. Zian cusëëb laagajc reeman delant loj Dios.

¹¹ ¡Prob laa reeman!, guial zinal reeman ni mal zi'c been Caín, mazri zinal reeman milia zi'c been Balaam, guiët tē reeman zi'c güt Coré chi guyënman niniabeeman luar Moisejs. ¹² Laagajc reeman ruxhiin lanij rüjndi chi rado'pidi din gawidi tijbzi, guidiblagaa ad ratut reeman raw reeman ad rüjn tēt reeman xgab por ree bejn, rüjnz reeman xgab par cha lën reeman. Naj reeman zi'c zaj ni ad nēt guia ni rinë bi, zi'c ree yag rbdix abi' ria'xh reen guial ad rtiat reen. ¹³ Naj reeman zi'c xtüjp nijsdoo chi rajsan zro' da't, din zi'c ririi bichijn loj nijs guin, ziangajc sin gualxtu rüjn reeman nidxuudx ree, naj tē reeman zi'c ree bajl xanyabaa ni basëëb xnejz, dxel tiblayaa ma rayal reeman lod nacay da't.

¹⁴ Abi' bën brii laj Enoc, laaman gojc gajdx loj ree xdiaa Adán, guneeman xcwent ree bën guin chi rëbaman: “Naj baguiaa dux Dad Dios zidnë zien da't ree xianjlaman ¹⁵ zidgaguieen xguialguxtisaman con gra ree bejn, din guiëbaman xhie casti rayal ree benmal por gra ni mal been reeman në por diidxguijdx ni guneë reeman laaman guial naj reeman béndol.” ¹⁶ Lasa' ree bën guin achetczi ruladx reeman, abi' graczi rnieeguijdx reeman. Zianczi rüjn reeman zi'ctzi rën reeman, abi' zianczi ruza't laagajc reeman zagdxë ruza't tëë reeman bejn ree zagdxë din cwentzi güün ree bën guin ni rën reeman.

Mod rayal guiban ree xbejn Dios

¹⁷ Per lëjt compniar raliduladx ree Jesucrist, rën da'tan lëjt, gol basaaladx guial bën goc ree xi apóstoles Dad Jesucrist ¹⁸ rëb reeman: “Chi ma zidyob nit guidxliuj, chu' ree bën guze' gra ni zëëd loj Dios güün tëë reeman zi'ctzi naj xixgabdxuudx reeman.” ¹⁹ Lasa' ree bën guin naj bën rlia' lasa' ree bën ma zinal xnejz Dios, abi' naban reeman zi'ctzi rën reeman, ad yu't xSprijt Dios luxdoo reeman.

²⁰ Per lëjt compniar raliduladx ree Jesucrist, gol guzudxi'ch loj ni rliladxidi, din guialrliladx guin zëëd loj Dios. Gol gurejdx gunab Dios con xyudar xSprijtaman. ²¹ Gol basnuu gol binal guial rën Dios la'tgaj cabëzidi guidxin dxej guneë Jesucrist guialnaban tiblyaaa duloj ree guial rayaman dunuj ree.

²² Gol been yudar bën sta yu' nawëëg ree luxdoo. ²³ Gol been yudar bën zë ree loj nejzmal, zi'c rüjn tijb bën rüjn yudar bën cayajb loj bajl, gol guyën reeman per ad chu'ladxidi zi'c rüjn reeman, gol gojp cudad chitëë yabidi loj xtol reeman.

Diidx bigra ca ree loj gui'ch guie

²⁴ Yu' tijbzi Dios ca' guialrniabee par guiniaman lëjt, chitëë yabidi loj dol, din chu' luxdoodi zagdxë sin dol chi guidxindi xanyabaa lod za'man.

²⁵ Laaman naj tijbzi Dios bën babëë dunuj ree loj dol por dux Dad ree Jesucrist, rayalaman respejt din gra naj xieenman, tijbzi laaman ca' guialrniabee con guialguxtis diidz gocli, yan con gra tiampczi. Amén.

Ni balüü Jesucrist loj San Juan

¹ Ni ne ree naj ni ma balüü Dios loj Jesucrist din në laaman gulüü laan loj ree xbejnman, din gagbee reeman conin ma zidyob gac. Abi' Jesucrist guxhaal xianjlaman din gulüüman ni guin ree lon, naj Waj xbejn Jesucrist, bën cayüjn laaman sirv. ² Abi' canin ni diidxli xcwent xtiidx Dios, xcwent Jesucrist në xcwent gra ree ni baguian.

³ Xiquilbaa ree bën ni rool, në ree bën rucaagdiajg në ree bën ridxga' ni ca loj gui'ch guie ni rugojn xcwent ree ni gac, din ma zidyob gac reen.

Rxhiaal San Juan gui'ch loj guigajdx ree yadoo

⁴ Naj Waj cucan gui'ch guie par lëjt najdi xbejn Cristo, lëjt bën naban ree loj guigajdx ree xguedx Asia. Dux Dad ree Dios, bën gui't bën naj Dios diizd gocli në yan, në guigajdx ree sprijt za' lod canabeeman, në Jesucrist, laa reeman güünle' lëjt yabe'cdxe tëë reeman luxdoodi. ⁵ Jesucrist been gra ni naj güünman, laa tëëman goc bën yaloj baban loj ree bengüt abi' laaman rniabee gra ree bën rniabee loj guidxliuj. Laaman rën dunuj ree abi' con xrejnman basiaman dux tol ree ⁶ abi' beenman dunuj ree zi'c bën rniabee, been tëëman dunuj ree bixhioz rüjn sirv xDadaman Dios. Zeel Jesucrist rayalaman respejt në gualrniabee zianczi. Amén.

⁷ ¡Gol gogbee guial gui'taman loj zaj! Gra ree bejn guguaia laaman xt ree bën ni guliiz lans cwë'lënman, abi' gra ree bënguidxliuj goon da't chi guguaia reeman laaman. Laan naj diidxli. Zian gac.

⁸ Dux Dad ree Dios bën rajp gra gualrniabee. Laaman gui't, laaman naj Dios diizd guia'xchej, në yan, laaman rëb por laagajcaman: "Naj naj zi'c lejtr A con Z, lejtr ni rzuloj në ni rlioxnë alfabeto, naj ca' gra gualrniabee."

Baguaia San Juan xgualrniabee Cristo

⁹ Naj Waj tijb ree lasa'di bën rililadx Jesucrist. Tijbzi nadxu' ree loj xgualrniabeeman, tijbzi cayzaagdiaj ree abi' caydaan ree por laaman. Naj guyu'n ladxguuib loj yuj riga' loj nijsdoo lod la Patmos guial rtiechan xtiidx Dios në gra ree ni ragbeen xcwent Jesucrist. ¹⁰ Chi yu'n ladxguuib loj yuj riga' loj nijsdoo guin, guyu' tijb dumingw chi guza'can zi'c bën rnie'xhchaal por xgualrniabee xSprijt Dios, abi' xichan biguiejnan zi'c cha' trompejt abi' biguien rejs da't cha' tijb ¹¹ bën ni rëb:

—Naj naj zi'c lejtr A con Z, lejtr ni rzuloj në ni rlioxnë alfabeto, din tijbzi naj naj bën rniabee. Bacaa loj gui'ch gra ni cuguaial dxel guixhiaalil gui'ch guin loj guigajdx cwaa ree da bejnan bën zobj ree niz Asia, luguiedx Éfeso, Esmirna, Pérgamo, Tiatura, Sardis, Filadelfia në Laodicea.

¹² Dxel chi badxi' lon par guguian chunin rnieenë naj dxel baguian gajdx ree candeler or. ¹³ Abi' galay ree candeler guin baguian tijb ni naj zi'c tijb bejn, najcwaman tijb lajd yool xt guia'man, abi' naxii tijb cinch or luxdooiman. ¹⁴ Naquichbëj guijcaman zi'c naj guidxlad xiil, zi'c naj guiajnayaag nauquich naj guidxguijcaman abi' zi'c bajl re'criani guiaalojman. ¹⁵ Abi' guia'man rdiinan bacha' zi'c guuib ni la bronce chi yu'n loj guij, abi' cha'man naj rejs zi'c rüjn nijs nauquie' chi rguiajtan. ¹⁶ Guiáad yaaman ladbee ca'man gajdx bajl xanyabaa. Abi' ro'man ririi tijb Espad ni nadoxh da't grop lad, guiáad lojman rulaa bacha' zi'c chi rusni gubijdx gojl da't.

¹⁷ Dxel chi baguian laaman biajban guia'man zi'c bengüt. Per laaman guxhoob yaa ladbeeman guican, naman:

—Ad rdxebil, naj naj bén rniabee diidz guia'xchej abi' par tiblyaa. ¹⁸ Ma güjtan, per yan ma babanan, abi' ma nabanan tiblyaa, abi' naj rniabee guialgüjt në gabijl. ¹⁹ Yan bacaa ni ma baguiaal në ni cuguaal në ni qui gacri. ²⁰ Ni në rën guiëb guigajdx ree bajl xanyabaa ni baguiaal yan ladbee, në guigajdx ree candeler or. Guigajdx ree bajl xanyabaa guin rën guiëban gajdx ree bén rniabee guigajdx cwaa ree da bejnan niz Asia, abi' guigajdx candeler or guin rën guiëban guigajdx cwaa ree da bejnan.

2

Diidx par ree bén Éfeso

¹ Yan bacaa ni guixhiaalil loj bén rniabee ree da bejnan luguiedx Éfeso. Bacaa: “Bén ni ziza galay ree candeler or, bén ni ca' gajdx ree bajl xanyabaa con yaa ladbeeman, laaman na lojdi: ² Naj ragbee xhie cayüjndi. Naj ragbee xhie tarbajw cadëdidi, ragbee tëën guial ad ralenya'tidi. Naj ragbee guial ad rdaantidi bén mal ree, abi' ma beendi prueb bén na ree naj xi apóstoles Jesucrist majsi achut naj reeman abi' ma gogbeedi guial ganax diidz rusquiee rniee reeman. ³ Naj ragbee guial rajpidi pacens abi' ma guzagdiajdi guial rëndi naj sin guial yalenya'di. ⁴ Per yu' ni ad ruladxtan rüjndi: guial ad rëntridi naj zi'c guia'xchej. ⁵ Gol basaaladx xhienaag guyëndi naj guia'xchej guial zi'c cayüjndi yan. Gol bayüjn xgab, gol been zi'c beendi guia'xchej, bal id züjndi zian, nayob gaxhalan casti par lëjt abi' ad zajctridi biani par los demazri ree bejn, bal id zayüjndi xgab. ⁶ Per yu' ni cayüjndi zi'c royal, guial rdxe'chidi ni rüjn ree ben nicolaítas, zi'cgajc rdxe'chan por ni rüjn reeman. ⁷ Bén rën ree gucaagdiajg, gol bacaagdiajg ni rniee xSprijt Dios par ree da bejnan: Bén ni güün gan loj dol, naj gudë ni gawaman ni rtia loj yag ni runee guialnaban ni zojb xanyabaa lod zojb Dios.”

Diidx par ree bén Esmirna

⁸ Yan bacaa ni guixhiaalil loj bén ni rniabee ree da bejnan luguiedx Esmirna. Bacaa: “Bén rniabee diidz guia'xchej në par tiblyaa, bén ni güt abi' babanman stijb, laaman na lojdi: ⁹ Naj ragbee xhienaag cadëdidi tarbajw por ni rüjn bejn lëjt, ragbee tëën loj guialprob ni nabandi majsi diidxli najdi benrijcw guial ma zinalidi xtiidx Dios, abi' ragbeen xhienaag rnieeguijdx bejn lëjt, bén ni na ree naj reeman bén Israel xbejn Dios majsi laa reeman naj xbejn xindxab. ¹⁰ Ad rdxebtidi guialzi ni tëdidi din xindxab güünx gan din cu' ree bejn tio'p choondi ladxguib par guiguien guial diidxli zinalidi xnejz Dios. Chü dxej tëdidi guialzi guin ree, per gol guzujdx'ch xt dxej guiëtidi, abi' naj yazaladx lëjt guialnaban tiblyaa. ¹¹ Bén rën ree gucaagdiajg gol bacaagdiajg ni na xSprijt Dios par ree da bejnan: Bén güün gan loj dol, achetri güün guialgüjt ni rarojp laaman.”

Diidx par ree bén Pérgamo

¹² Yan bacaa ni guixhiaalil loj bén rniabee ree da bejnan luguiedx Pérgamo. Bacaa: “Bén ca' espad ni nadoxh grop lad ro', laaman na lojdi: ¹³ Naj ragbee guial luguiedx zojbidi xindxab rniabee ni. Per majsi zian lëjt za'dxi'chidi con naj ad rucwëëzt riladxidi naj ni'qui lën ree dxej ni bagüjt reeman Antipas, tijb ree xcompniaridi bén ad bacwëëzt bililadx naj, bén bagüjt reeman ladxidi lod rniabee xindxab. ¹⁴ Per yu' ree ni ad ruladxtan rüjndi. Tijb ni ad ruladxtan rüjndi naj guial lojdi no'ch ree bén ad rusa'nt ni basiid

Balaam bejn ree, bén rëb loj Balac xhienaag guzaalguiiwaman bén Israel ree din gaw reeman guialraw ni ma gurej loj ree xdios Balac guin, në par been reeman graloj ree nidxuudx con ree bén ad najt lacheel reeman. ¹⁵ Stijb ni ad ruladxtan naj guial lojdi no'ch ree bén ad rucwëëzt rüjn zi'c rüjn ree bén nicolaítas. ¹⁶ Zeel gol bayüjn xgab por ni rüjndi, bal id züjndi zian nayob gaxhalan casti din günan guialguxtis con laa reeman con espad ni ririi ro'n. ¹⁷ Bén rën ree gucaagdiajg, gol bacaagdiajg ni na xSprijt Dios par ree da bejnan: Bén rüjn gan loj dol, naj gudë mana gawaman, guialraw xanyabaa ni ad nünbeet ree bejn. Gudë tëën tijb guiaj naquichdoo lod ca laj cübaman ni achutczu ragbee, tijbzi bén tia' guiaj guin gagbee.”

Diidx par ree bén Tiatira

¹⁸ Yan bacaa ni guixhiaalil loj bén rniabee ree da bejnan luguiedx Tiatira. Bacaa: “Xi'n Dios, bén re'criani guiaaloj zi'c bajl, bén rdiin bacha' guia' zi'c guuib ni la bronze, laaman na lojdi: ¹⁹ Naj ragbee ni cayüjndi, ragbeen xhienaag rëndi naj, xhienaag rliadxidi naj, xhie cayüjndi por naj abi' ad ralenya'tidi. Naj ragbee guial mazri zagdxe cayüjndi yan guial loj guia'xchej, ²⁰ Per yu' ni ad ruladxtan cayüjndi: Rdaandi Jezabel, béngunaa ni na rudëëd xtiidx Dios. Abi' rtiëjbidi ruluüman da bejn reen dxel ruzaalguiiwaman laa reeman rüjn reeman ni dxuudx ree con ree bén ad najt lacheel reeman, abi' raw reeman guialraw ni ma gurej loj ree xdios ree bénguidxliuj. ²¹ Ma badën tiamp din yayüjnman xgab, din gusa'n xguialdxuudxaman, per ad rëntaman. ²² Zeel yan gaxhalan guialguijdx par laaman, gaaman gagxuuman. Abi' bén rüjn ree zi'c rüjnman, bal id reeman guchaa mod ni naban reeman ziangajc zro' naj guialzi ni tëd reeman, ²³ gugüjtan gra ree bén ma been xgab guiban zi'c naban béngunaa guin. Zian gagbee ree da bejnan guial naj ragbee xhie yu' guijc bejn xhie tëë yu' luxdooman, xhie xgab rüjnman. Naj gune lëjt ni rayalidi bal gonin rüjndi. ²⁴ Par gra ree da bejnan bén zojb ree luguiedx Tiatira, lëjt bén ad zinalt ree zi'c rusiid Jezabel guin bejn ree, lëjt guial na reeman ad ragbeetidi xt ni bigra xcwent xindxab guial ad ridxga'tidi laa reeman, achetri ni ganin lojdi, ²⁵ tijbzi ni rnin lojdi: Gol guzujdx'i'ch loj ni ma ragbeedi xt chi guialan stijb. ²⁶ Bén güün gan loj dol, abi' gusnuu güünman zi'c rënan guidib tiamp ni guibanman, naj gudë guialrniabee lojman din nabeeman loj ree nacion. ²⁷ Nabeeman loj ree nacion guin zi'c tijb bén ni ca' tijb var guuib, zi'czi' rlia' bejn tijb guiajs zian güünëmän bén ni ad rënt ree guzoob diidx. Gudën guialrniabee guin lojman zi'c banee da Dadanan lon, ²⁸ gudë tëën lojman bajl xanyabaa ni rliejn rsildoo. ²⁹ Bén rën ree gucaagdiajg, gol bacaagdiajg ni rëb xSprijt Dios par ree da bejnan.”

3

Diidx par ree bén Sardis

¹ Yan bacaa ni guixhiaalil loj bén rniabee ree da bejnan luguiedx Sardis. Bacaa: “Bén naban con guigajdx ree xSprijt Dios abi' ca'man gajdx bajl xanyabaa, laaman na lojdi: Naj ragbee gra ni cayüjndi ragbee tëën guial ma güjtidi, majsi par ree bejn nabandi. ² Zeel gol batie'ch xbacaalidi, gol been naguiejn chitëë nit ni sta cayüjndi, din naj ruguiian guial ad cayüjntidi xnejz delant loj da Dadan Dios. ³ Gol basaaldx ni ma biguiejndi në ni ma basiididi, abi' gol been zian, gol bayüjn xgab zi'c ni cayüjndi. Din bal id zatie'ch xbacaalidi zi'c cayüjndi, dxel zi'c ri't tijb béngubaan ziangajc chi gagbeedi ma bi't casti par lëjt. ⁴ Per luguiedx Sardis, yu' tio'p choon ree

bejn sta naya, laa reeman naj Bén gacw lajd naquich abi' sa reeman con naj, din rayal reeman laan. ⁵ Bén güün gan loj dol, chi guidxin hor, zian gacwaman lajd naquich abi' ad zuse'n tēetan lajman loj xlibr guialnaban. Abi' delant loj Dios nē loj ree anjl guien guial laaman naj da bejnan. ⁶ Bén rēn ree gucaagdiajg, gol bacaadiajg ni rēb xSprijt Dios par ree da bejnan.”

Diidx par ree Bén Filadelfia

⁷ Yan bacaa ni guixhiaalil loj Bén rniabee ree da bejnan luguedx Filadelfia. Bacaa: “Bén naya nali, Bén naj diidxli, Bén rajp guialrniabee loj gra zi'c gojp rey Davi guialrniabee, tijbzi laaman rajp guialrniabee par guixhialaman tijb nejz ni achut zajc gusiaaw o gusiaawaman tijb nejz ni achut zajc guixhial, laaman na lojdi: ⁸ Naj ragbee gra ni cayüjndi. Gol gogbee guial majsi ad rajptidi guialrniabee, per naj ma guxhal tijb nejz din gutiē'chidi da diidxan sin guial chu gutēē lojdi, din zinalquidi da diidxan abi' ad goct rēbidi guial ad najtidi da bejnan. ⁹ Lējt guguaiaa ni günan con ree xbejn xindxab Bén rēb ree naj reeman Bén Israel xbejn Dios, abi' rusquieezi reeman. Guguaiaadi ni günan laa reeman, guidgazuxib reeman lojdi, gagbee tēē reeman xhienaag rēnan lējt. ¹⁰ Abi' zi'c ma bazoobidi diidx gapidi pacens guial chinalidi da diidxan, ziangajc ganan lējt chi guidxin dxej gui't guialzi loj guidib guidxliuj, zi'c tijb prueb par gra ree bénguidxliuj. ¹¹ Nayob guialan loj guidxliuj stijb. Gol guzujdxi'ch loj ni ma ragbeedi chitēē tia' ben ren ni rayalidi. ¹² Bén güün gan loj dol, naj gudē lojman tijb luar zobjbloj lēn yadoo zobj xanyabaa lod naban da Dadan Dios, ni guibanman tiblayaa. Dxel tibljataman guca laj da Dadan Dios con lan nicüb, con laj ladx da Dadan Dios ni la Jerusalén cüb ni naj xanyabaa lod zobjbaman. ¹³ Bén rēn ree gucaagdiajg, gol bacaagdiajg ni rēb xSprijt Dios par ree da bejnan.”

Diidx par ree Bén Laodicea

¹⁴ Yan bacaa ni guixhiaalil loj Bén rniabee ree da bejnan luguedx Laodicea. Bacaa: “Bén ni rüjn cumplid xtiidx, Bén ni been gra ni rayal güünman, Bén naj diidxli, Bén rniabeenē Dios diidx gocli chi gad guidxliuj gacchaaw, laaman na lojdi: ¹⁵ Naj ragbee gra ni cayüjndi. Ad najtidi zi'c nijs nayaag o zi'c nijs laa. ¡Balzianclaa tiblayaa niajquidi zi'c nijs nayaag o zi'c nijs laa! ¹⁶ Per lējt najdi zi'c nijs nayool, ni'qui nadxa' ni'quidza nayaagt, dxel zi'c laa rabēē gajc ro' bejn nijs nayool guin, zian ma rēnan gabēladxan lējt. ¹⁷ Lējt rēb guial najdi benrijcw, rajpidi gra abi' achet ryaadxidi. Per ad ragbeetidi guial achet rajpidi, najdi Bénprob, Bén zibēēl, achet sirv lējt, najdi bénlutia'p niz lon guial ad nabantidi xnejz. ¹⁸ Zeel rñin lojdi, zi'c rzii bejn ganax or, zian gol been nagueiejn gapidi gra da yudaran, din gaquidi rijcw delant lon. Abi' zi'c chi rzii bejn lajd naquich din guiguienman naya, zian gol bayüjn xgab din guiguie'ch xguialxtudi abi' guiguiendi naya delant lon. Nē chi rzii bejn tijb rumed par guiaaloj bejn din guguaiaaman zagdxe, zian gol been nagueiejn din gapidi da guial rignia'n din guguaiaadi zagdxe. ¹⁹ Rdilnē'n abi' ruzuxnejzan gra ree Bén rēnan. Zeel gol bagu' luxdoodi gol bayüjn tēē xgab xhienaag nabandi. ²⁰ Gol gogbee guial naj cabedx lējt, zi'c chi rniece tijb bejn rulidx stijb bejn. Cabēēsan chu guidxga' naj, zi'c chi rgu' bejn stijb bejn din gaw reeman tijbzi. Abi' Bén guidxga' naj ma nabannē'n laaman abi' laaman nabannēman naj. ²¹ Bén güün gan loj dol naj gudē cwē'n cweman lod canabeen, zi'cgajc naj chi gulox benan gan loj dol, gure cwē' da Dadan Dios lod canabeeman. ²² Bén rēn ree gucaagdiajg, gol bacaagdiajg ni na xSprijt Dios par ree da bejnan.”

4

Rlies reeman xvalor Dios xanyabaa

1 Chi gulox bacan diidx guie ree, baguian niz ladia dxel baguian tijb port naxal xanyabaa. Abi' bén guneenē gajc naj diizd guia'xchej bén naj cha' zi'c trompejt, laaman na lon:

—Wē'p guie din gulün lüj ni gac ree chi ma gojc ree ni rnin lojl.

2 Loj hor zii gajc por xguialrniabee xSprijt Dios, chi gogbeen ma za'n xanyabaa yagaj baguian tijb yagxhil zagdxē zi'c xi yagxhil tijb rey, lojn zojb tijb bejn. 3 Abi' bén zojb loj yagxhil guin rulaaman bacha' zi'c ree guiaj zagdxē ni lasajc wayējx, ni la jaspe nē cornalina. Abi' guijc yagxhil guin ca tijb guidgaj ni rulaa bacha' zi'c guiaj zagdxē ni la esmeralda. 4 Abi' gadēd ro' yagxhil guin baguian zagajlbitap ree yagxhil zagdxē abi' loj ree yagxhil guin zojb ree gajlbitap ree bengol najcw reeman lajd naquich yu' coron or guijc reeman. 5 Abi' lod za' yagxhil ni za' galay los demasri ree yagxhil guin, yagaj ririi ree bacha' zi'c chi rē'p nijs nē ree naquie' zi'c chi rbidxa' guziaaw. Abi' delant loj yagxhil guin re'c gajdx ree guij ni naj ree guigajdx xSprijt Dios. 6 Baguia tēen delant loj yagxhil guin zi'c nijsdoo, per nayadxujn zi'c tijb guiaawajn.

Abi' cwē' yagxhil guin za' tajp ree be, tijb gaj reeb za' tib xquin gaj yagxhil guin abi' guidib niz xijch reeb nē niz loj reeb yu' guiaaloj reeb. 7 Tijb reeb naj zi'c beedx, be barojp guin naj zi'c go'n, be bayon guin naj lojb zi'c loj bejn, be badajp guin naj zi'c bisia ni cazuj. 8 Tijb gaj ree be guin yu' xho'p xhiil reeb, abi' xijch xhiil reeb nē lēn xhiil reeb yu' zien da't guiaaloj reeb. Abi' dxej guiaal ad rucwēēt rēb reeb:

Naya nalil, naya nalil naya nalil najl dux Dadan Dios,
lūj guial ca'l gra guialrniabee,
lūj guial najl Dios diizd guia'xchej nē yan abi' gui'til.

9 Beegaj chi rlies ree be guin xvalor bén ni zojb loj yagxhil guin, bén naban tiblyayaa, beegaj ruza't reeb laaman zagdxē rudēēd reeb quixtēē lojman, 10 guigajlbitap ree bengol zojb yagaj, bazuxib reeman lojman, bén ni zojb loj yagxhil abi' nabanman tiblyayaa, abi' ruzuxib reeman lojman rudxiib xcoron reeman niz lojman, rēbgaj reeman:

11 Dux Dad ree Dios, lūj rayal guiya'p respejt,
diidxza'c nē guialrniabee.
Din lūj beenchaaw gra ni yu'
abi' lūj rēb guial chu' gra ni yu',
abi' yu' reen.

5

Tijb gui'ch ni nadüüb con bén naj zi'c xi xil Dios

1 Dxel baguian guial bén zojb loj yagxhil zagdxē ni naj zi'c xyagxhil tijb rey, ca'man tijb gui'ch yaaman ladbee. Gui'ch guin zi'c lojn zi'c xijchan ca lejtr abi' nadüüban, abi' naguidan con gajdx se chitēē chu guixhial laan. 2 Loj hor guin baguian tijb anjl bén gojl da't, rbidxa'man rejs rēbaman:

—¿Chu rayal anjquied ree se guie abi' guixhial loj gui'ch guie?

3 Per ni'qui xanyabaa, ni'qui loj guidxliuj, ni'qui lēn liuj ad bidxejlt bén ni rayal guixhial gui'ch guin, ni'qui par guguaaman ni ca loj gui'ch guin. 4 Abi' naj dád binan chi baguian guial achut rdxejl guixhial loj gui'ch guin nē par guguaaman ni ca loj gui'ch guin. 5 Dxel na tijb ree bengol guin lon:

—Ad roonl, baguiaa nial ma yu' tijb bén ni rayal guixhial loj gui'ch guin abi' chiquiedaman guigajdx se guin din ma beenman gan loj gra, laaman bén naj zi'c tijb beedx loj xdiaa Judá por gualrniabee ni rajpaman, laaman za loj xdiaa rey Davi.

⁶ Abi' chi baguian, dxel baguian guial galay lod za' yagxhil zagdxe ni naj zi'c xyagxhil tijb rey, lod za' guidap ree be guin galay ree bengol ni riga' yagaj, za' tijb bén naj zi'c xi xiil Dios rguien xsen lod bidxeelguigajdxaman chi gütaman. Abi' yu' gajdx xcajchaman con gajdx guiaalojman, guigajdx guiaalojman naj guigajdx xSprijt Dios bén rxhiaalaman guidib guidxliuj. ⁷ Bibig bén naj zi'c xiil guin cwa'man gui'ch guin ladxaa bén zobj loj yagxhil guin. ⁸ Chi cwa'man gui'ch guin, guidap ree be za' gajxh cwè' yagxhil guin nè gra guigajlbitap ree bengol guin bazuxib reeman lojman. Tijb gaj ree bengol guin ca' reeman tijb gaj arp ca' tée reeman cojp or ni guidxa goxyaal, go'xh guin naj xtiidx ree xbejn Cristo chi rbejdx rniab reeman Dios. ⁹ Bengol guin ree rool reeman tijb cant cüb ni rëb:

Lüj rayal tia' gui'ch guin

abi' guixhialil se ni naguidnën.

Din lüj güjtil

abi' con xrejnl ni guxhie'l gudijxil

por graloj bejn din gac reeman xbejn Dios,

achet güunan xhietëez diidx rniee reeman,

o xhie loj diaa, o xhie guiedx o xhie nacion zëed reeman.

¹⁰ Beenl laa reeman rey

been téeel laa reeman bixhioz par dux Dad ree Dios,

abi' laa reeman nabee loj guidxliuj.

¹¹ Baguia tëen biguiejn tëen cha' zien ree anjl gadëd ro' yagxhil zagdxe guin con guidap ree be guin nè ree bengol guin. Abi' bénguixiujczi naj reeman por mil naj reeman. ¹² Abi' dád rejs rniee reeman rëb reeman:

Bén naj zi'c xi xiil Dios, bén güt,

laaman rayal tia' gualrniabee,

laaman rayal gap gualnaza'c,

quiarguiejn, nè gojl,

respejt, guza't reeman laaman zagdxe,

guilies tée reeman xvaloraman.

¹³ Dxel biguiejn cha' gra ree ni been Dios, zi'c ni yu' ree xanyabaa, loj guidxliuj nè ni yu' ree lën liuj nè ree ni yu' loj nijsdoo, rëb reen:

Bén zobj loj xyagxhil gualrniabee nè bén naj zi'c xi xiilaman,

par laa reeman naj

respejt, diidxza'c, gualrniabee,

abi' guilies reeman xvalor reeman

zianczi nè par tiblayaa.

¹⁴ Chi gulox rëb reen zian, dxel guidap ree be za' yagaj rëb reeb:

—Amén.

Abi' guigajlbitap ree bengol za' yagaj bazuxib par gap reeman laaman respejt, bén ni naban zianczi nè par tiblayaa.

6

Guigajdx ree se

¹ Dxel baguian biquied bén naj zi'c xi xiil Dios se yaloj guin, abi' zi'c chi rbidxa' guziaaw zian biguiejnan gunee tijb ree be guin, rëbib:

—jGuda!

² Dxel baguian gulentie tijb way naquich, abi' bén dxiib laab ca'man tijb xi arcw flejch. Abi' cwa'man tijb coron guial ma beenman gan, dxel briiman persi ziguieenman gan mazri.

³ Chi biquied bén naj zi'c xi xiil Dios se barojp guin biguiejnan rëb be barojp guin:

—jGuda!

⁴ Dxel gulentie tijb way xnä, abi' bén dxiib laab ca'man tijb espad narooob në guialrniabee par gustijlaman bejn ree loj guidxliuj din gugüjt lasa' reeman.

⁵ Chi biquied bén naj zi'c xi xiil Dios se bayon, biguiejnan rëb be bayon guin:

—jGuda!

Dxel baguian gulentie tijb way ya's, abi' bén dxiib laab ca'man tijb xijlibr.

⁶ Abi' galay guidap ree be guin biguiejnan cha' tijb bén rëb:

—Tib quil trigo lasajcan tib dxej dxiin abi' choon quil cebada lasajcan tibdxej dxiin, per ache güünl sejt në vin.

⁷ Chi biquied bén naj zi'c xi xiil Dios se badajp guin, biguiejnan rëb be badajp guin:

—jGuda!

⁸ Dxel baguian gulentie tijb way nagüiech, abi' bén dxiib laab laman guialgüjt, abi' zinal gabijl laaman. Cwa' reeman guialrniabee par gugüjt reeman tib part loj tajp lala' ree bénguidxliuj. Yu' reeman guiët por wadijl, o por guialrliian, o por guialguijdx, o por ree be doxh yu' loj guidxliuj.

⁹ Chi biquied bén naj zi'c xi xiil Dios se bagaay guin, baguian xan altar za' ree xsprijt ree bén bagüjt reeman guial bililadx reeman guzujdxi'ch tëë reeman loj xtiidx Dios. ¹⁰ Abi' rbidxa' reeman rejs rëb reeman:

—Dios, Dad bén rniabee, lüj naj bén naya nali abi' rüjnl zi'c rayal, ¿za plact gaglaal par güün xguialguxtisil con ree bén ni bagüjt dunujn loj guidxliuj din yagüjx reeman ni been reeman?

¹¹ Dxel tijb gaj reeman cwa' tijb lajd naquich, abi' bagojn reeman laa reeman din cwëz reeman stibda'n yaza' lasa' reeman, din ryaadxri guiët ree xcompniar reeman zi'c güt reeman, bén ni cayüjn gajc ree sirv Dios.

¹² Chi baguian biquied bén naj zi'c xi xiil Dios se baxo'p guin, dxel guxu rejs da't abi' gubijdx gojcan nagas zi'c tijb lajd ya's. Guiáad bëëw gojcan naxnia zi'c rejn, ¹³ abi' ree bajl xanyabaa biajb reen loj guidxliuj zi'c ryajb ree higo ni ya' loj yag higo chi rbi' bidoxh. ¹⁴ Dxel gunidloj xanyabaa zi'c tijb gui'ch ni rdüüb, abi' gra ree guia' në ree yuj riga' ree loj nijs bachaa xliajt reen. ¹⁵ Abi' ree rey në gra ree bén rniabee loj guidxliuj, në ree bén rniabee ree suldad në ree bén rijcw, në ree bén yu' gojl par gra, në ree bén naj zi'c bén nado', në ree bén ad najt zi'c bén nado', gra reeman baquie'chloj lën guiajbiliaa në lën ree yalaj. ¹⁶ Abi' rëb reeman loj ree guia' në loj ree yalaj:

—Gol biajb du gujcan, gol baquie'ch tëë dunujn loj bén zojb loj xyagxhil guialrniabee në loj xcasti bén naj zi'c xi xiil Dios, ¹⁷ din ma bidxin dxej doxh ni gudëed reeman casti, abi', ¿chu zajc taan casti guin?

7

Tibgayuu tiuubitap mil ree bén Israel

¹ Chi gulox baguian ni guin ree, baguian tajp ree anjl za' reeman guidap xquin guidxliuj par gucwëëz reeman bi ni zëed guidap xquin, chitëë guibi' bi loj guidxliuj, ni'qui loj nijsdoo, ni'qui ree loj yag. ² Dxel baguian stijb anjl zëedaman niz lod rliejn gubijdx, ca'man xse Dios naban. Abi' dád rejs

guneenëman guidap ree anjl guin, bén ni ca' ree gualrniabee par güün reeman ni güün reeman con guidxliuj në con nijsdoo, ³ rëbaman loj reeman:

—Ad xhie güündi guidxliuj, ni'qui nijsdoo, ni'qui ree yag, xt chi ma gulox bacaa ree xse dux Dios ree lucwaj ree xbejnman.

⁴ Dxel biguejnan bël reeman cwa se guin lucwaj. Por gra ree bén Israel, tibgayuutiubitap mil reeman cwa se guin lucwaj. ⁵ Din chiptio'p mil ree bén zëed loj xdiaa Judá cwa se guin, në chiptio'p mil ree bén zëed loj xdiaa Rubén në chiptio'p mil ree bén zëed loj xdiaa Gad. ⁶ Në chiptio'p mil ree bén zëed loj xdiaa Aser, në chiptio'p mil ree bén zëed loj xdiaa Neftalí, në chiptio'p mil ree bén zëed loj xdiaa Manasés, ⁷ con chiptio'p mil ree bén zëed loj xdiaa Simeón, chiptio'p mil ree bén zëed loj xdiaa Leví, në chiptio'p mil ree bén zëed loj xdiaa Isacar, ⁸ chiptio'p mil ree bén zëed loj xdiaa Zabulón, chiptio'p mil ree bén zëed loj xdiaa José, chiptio'p mil ree bén zëed loj xdiaa Benjamín cwa se guin lucwaj reeman.

bénguixiuj najcw lajd naquich

⁹ Dxel baguian bénguixiuj ree, per bénguixiuj ree ni'qui chut zajc gulab laa reeman, bén ni za ree gadxagayaa guiedx, gadxagayaa diaa, bén rniee ree gadxagayaa diidx bén za ree gra lad në gadxagayaa nacion. Za' reeman delant loj xyagxhil bénrniabee në delant loj bén naj zi'c xi xiilaman. Najcw reeman lajd naquich ca' tée reeman zijn. ¹⁰ Abi' rëb reeman rejs da't:

Dunuñ raya'pan perdon por dux Dadan Dios

bén zojb loj xyagxhil gualrniabee

në por bén naj zi'c xi xiilaman.

¹¹ Abi' gadëd ro' yagxhil guin con guidap ree be ni za' yagaj con guigajlbitap ree bengol, gadëd yagaj za' gra ree anjl abi' bazuxib reeman delant loj xyagxhil Dios xt basajb guiç reeman liuj par gap reeman laaman respejt,

¹² rëb reeman:

¡Amén! gualrniabee, gojl,

gualrajc, respejt, diidxza'c,

gualrlies xvaloraman në quixtëe,

naj reen par dux Dad ree Dios zianczi në par tiblyaa. Amén.

¹³ Loj hor zii tijb ree bengol guin gunabdiidx lon:

—¿Chu ree bén ni najcw lajd naquich guin, ban tée ree bénan?

¹⁴ Badxi'nan rën:

—Ad ragbeetan Dad, lüj ragbee.

Dxel naman lon:

—Laa reeman naj bén guzagdiaj da't abi' naquich xab reeman guial ma naya reeman ma biquied xtol reeman con xrejñ bén naj zi'c xi xiil Dios.

¹⁵ Zeel za' reeman delant xi yagxhil Dios, abi' dxej guiaal cayüjn reeman sirv lod zojbaman. Abi' bén zojb loj yagxhil guin ma za'man con laa reeman, abi' laaman gap laa reeman. ¹⁶ Ad yu'tri dxej guiliaan reeman, ad ze'c tëet reeman nijs, ad zudxüü tëet gubijdx laa reeman, ad zagnalaa tëet reeman.

¹⁷ Din bén naj zi'c xi xiil Dios bén za' galay lod za' xi yagxhil Dios, laaman gap laa reeman zi'c tijb bén rajp ree xiil abi' chinëman laa reeman lod rajch nijs ni runee guialnaban. Dxel Dios laaman gutiaa loj reeman gra ree nijs brii loj reeman chi biin reeman.

¹ Chi biquied bén naj zi'c xi xiil Dios se ni goc gajdx guin, bayajcdxe xanyabaa cost garol hor. ² Dxel baguian gajdx ree anjl za' reeman delant loj Dios, cwa' reeman gajdx trompejt. ³ Dxel bi't stijb anjl con tijb chaabacwi ni or, guzuliman delant lo altar guin abi' yu' bén badëed zien yaal din cu'man goxyaal guin loj altar or ni za' delant loj yagxhil zagdxe ni naj zi'c xyagxhil tijb rey, din tijbzi chë'pnë goxyaal guin xtiidx gra ree xbejn Dios, diidx ni rníee reeman chi rbejdx rniab reeman laaman. ⁴ Dxel diidx ladxaa anjl guin brii goxyaal guin con ree xtiidx ree xbejn Dios, diidx ni rníee reeman chi cabejdx canab reeman laaman, abi' wë'p reen niz loj Dios. ⁵ Dxel bacha anjl guin chaabacwi guin guij ni yu' loj altar guin abi' bazurlojman laan loj guidxliuj. Abi' dád rejs guridxa' guziaaw, gojc naquie', wë'p nijs, abi' bi't xudoxh.

Trompejt ree

⁶ Dxel guigajdx ree anjl ni ca' ree trompejt guin, guzujchaaw reeman par gucwejdx reeman laan.

⁷ Chi bacwejdx anjl yaloj guin trompejt ni ca'man, biajb guiajyabaa loj guidxliuj no'chan bajl në rejn. Dxel cost gurol guidxliuj we'c con ree yag në ree gui'xh naga' yu' lojn.

⁸ Chi bacwejdx anjl barojp guin trompejt ni ca'man, dxel zi'c naj guia'ro' ni cacaguij naj ni biajb loj nijsdoo, abi' cost garol nijsdoo bayajcan rejn loj hor guin. ⁹ Abi' cost garol ree be ni naban loj nijsdoo güjt reeb abi' cost garol ree barcw ni yu' loj nijsdoo gunidloj.

¹⁰ Chi bacwejdx anjl bayon guin trompejt ni ca'man, dxel biajb bajl xanyabaa ni naroo ni cacaguij zi'c chi rtiaguij guied, loj cost garol guiiw ni yu' në cost garol ree lod rajch nijs biajban. ¹¹ Bajl xanyabaa ni biajb lan Ajenjo, abi' cost garol nijs guin ree gojc nala abi' dád zien ree bejn güjt guial bayajc ree nijs guin nala.

¹² Chi bacwejdx anjl badajp guin trompejt ni ca'man, abi' cost garol gubijdx bicajy, cost garol bëew në cost garol ree bajl xanyabaa bicajy. Abi' guial bicajy reen, dxel cost garol dxej në guiaal ad basnit.

¹³ La'tgaj cuguian ni guin ree, biguiejnan zi'c chi rzuj tijb bisia xanyabaa. Dxel biguiejnan cha' tijb anjl rbixdiajman rëbaman:

—i'Prob, per prob, per probza ree bén ni yu' loj guidxliuj por zaxoon trompejt ni ryaadx gucwejdx za choon ree anjl!

9

¹ Chi bacwejdx anjl bagaay guin trompejt ni ca'man, dxel baguian zi'c tijb bajl xanyabaa ni biajb loj guidxliuj, abi' bajl xanyabaa guin cwa'n guibliaw par guixhialan ro' bizë ni ad yu't lod rliox. ² Chi guxhialan ro' bizë guin tijb go'xh yo'xhchab brii lën bizëe guin zi'c chi ririi go'xh lën tijb horn narooob, xt bascajy go'xh guin gubijdx në bi. ³ Abi' lën go'xh guin brii ree bi'tsu abi' bire'ch reeb loj guidxliuj, abi' cwa' reeb guialrniabee par gac reeb bedoxh zi'cgajc nixüb. ⁴ Per gunabee reeman laa reeb chitëe xhie güün reeb guixya' ree, ni'qui ree yag, ni'qui ree gui'xh naga'. Naabzi ree bén ni ad yu't ree xse Dios lucwaj. ⁵ Per ad par gugüjtt reeb bejn, naabzi par sagdiaj reeman gaay bëew. Abi' lod rudidxa' reeb riyajnan zi'c ryajn lod rudidxa' nixüb. ⁶ Lën ree dxejzii quuil ree bejn guialgüjt, per ad zadxejlt reeman laan. Guiën reeman guiët reeman per ad zëjtt reeman.

⁷ Bi'tsu guin ree naj reeb zi'c naj ree way ni ma za' par che reeb loj wadijl, guijc reeb yu' zi'c coron or, abi' loj reeb naj zi'c loj bejn. ⁸ Abi' guidxguijc

reeb naj zi'c guidxguijc béngunaa, guiáad dxdidlay reeb naj zi'c dxdidlay beedx. ⁹ Guidib luxdoo reeb nada'cwan zi'c guiib, abi' xhiil reeb rüjnan naquie' zi'c rajc naquie' chi ruxüünné ree way carrejt loj wadijl. ¹⁰ Abi' xbaan reeb naj zi'c xbaan ree nixüb, abi' con lupuntan rudidxa' reeb. Con xbaan reeb yu' reeb gojl par gusagdiaj reeb bejn ree loj gaay bëew. ¹¹ Anjl ni rniabee bizé ni ad yu't lod rliox laaman rniabee ree bi'tsu guin. Anjl guin con diidx Hebreo laaman Abadón, abi' con diidx grieg laaman Apolión, diidx guin ree rën guiëb reen bën ruloox.

¹² Zian rliox guialzi yaloj, dxel gui't zatio'p guialzi.

¹³ Chi bacwejdx anjl baxo'p trompejt ni ca'man, dxel biguejnan tijb cha' bejn briin galay ree cajch ni za' guidap xquin altar or ni za' delant loj Dios.

¹⁴ Cha' bën biguejnan rëbaman loj anjl baxo'p bën ca' trompejt guin:

—Baslaa guidap ree anjl ni naxii ro' guiiw ro' ni la Eufrates.

¹⁵ Zian bidxin or, bidxin dxej, bidxin bëew në ijz ni naj par laa guidap ree anjl guin din gugüjt reeman garol ree bénguidxliuj. ¹⁶ Abi' biguejnan bël naj xsuldad reeman bën dxiib ree way. Naj reeman tio'pgayuu millon. ¹⁷ Ze baguian way guin ree con ree bën dxiib laa reeb: Bën dxiib ree way guin, guidib luxdoo reeman nada'cw guiib culor xnia, ni sul në ni naguiëch. Abi' guijc ree way guin naj reen zi'c guijc ree beedx, abi' ro' reeb ririi bajl, go'xh në azufre. ¹⁸ Abi' garol ree bénguidxliuj güjt por bajl guin, go'xh guin në azufre guin ni ririi ro' reeb. ¹⁹ Con ro' ree way guin rugüjt reeb bejn ree, abi' con xbaan reeb rucheelguijdx reeb din lupunt xbaan reeb najn zi'c guijc bëël.

²⁰ Per los demasri ree bën ni ad güjtt por ree guialzi guin, ad basa'n reeman ni mal rüjn reeman. Ad bacwëët rën reeman xindxab ree con ree Dios ni naj or, plajt, bronce në ree dios guiaj con ree dios yag, dios ni ad rajct ruguiaa, ad rajct riguejcn ad rajc tëtë rza reeman. ²¹ Ad bacwëez tëtë rugüjt reeman bejn ree, ad basa'n tëtë reeman guialbidxaa, ad basa'n tëtë reeman ni dxuudx ni rüjn reeman con bën ad najt lacheel reeman, ad basa'n tëtë reeman guialgubaan.

10

Tijb anjl ca' gui'ch

¹ Dxel baguian stijb anjl bën gojl da't, zidguiajtaman xanyabaa lën tijb zaj abi' guijcaman dxiib tijb guidgij. Lojman naj zi'c gubijdx, abi' guia'man naj zi'c tio'p bajl ziool. ² Dxel ca'man tijb librdoo naxal lojn. Abi' bazuj guia' ladbeeman loj nijsdoo, abi' guia'man lad ruvejs bazujman laan loj guidxliuj. ³ Dxel guridxa'man rejs da't zi'c rbidxa' beedx, chi guridxa'man guridxa' gajdx ree guziaaw. ⁴ Chi gulox guridxa' gajdx ree guziaaw guin, ma nucan ni rëb guigajdx ree guziaaw guin chi biguejnan cha' tijb bën na lon diidz xanyabaa:

—Ad gucaal ni gunee guigajdx ree guziaaw guin, din ad rayalt gagbee ree bejn laan.

⁵ Abi' anjl ni baguian za'li loj nijsdoo në loj guidxliuj gules yaa ladbeeman xanyabaa, ⁶ abi' badëë xtiidxaman por bën naban tiblayaa, bën been xanyabaa, guidxliuj në nijsdoo, në gra ni yu' xanyabaa, loj guidxliuj në loj nijsdoo guial ad zaglaatri gac ni rayal gac. ⁷ Din chi gucwejdx anjl ni goc gajdx trompejt ni ca'man dxel ma bidxin dxej gac zi'c naj xixgab Dios, zi'c bagojnman loj ree bën badëë xtiidx Dios loj ree bejn bën ni rüjn ree sirv lojman.

⁸ Dxel zatijb gaj gunee bën ni guneenë naj diidz xanyabaa, naman:

—Wej bica' librdo ni zojbyal loj ladxaa anjl ni za' loj nijsdoo në loj guidxliuj.

⁹Dxel wan lod za' anjl guin, rën lojman din guneeman librdo guin lon, dxel naman lon:

—Cwa'n gudawan. Ro'l guiatan nejxh zi'c dxijn, per lën'l nala yaban.

¹⁰Dxel cwa'n librdo guin ladxaa anjl guin, abi' gudawanan. Ro'n biguiaj-tan nejxh zi'c dxijn, per chi gulox gudawanan nala biguiajtan lënan. ¹¹Dxel bagojn reeman naj guial gusnuu gugojnan bejn ree ni na Dios gac con zien ree nacion, rey ree në ree guiedx, xhietëez diidx rniee reeman.

11

Tio'p ree testiw

¹Abi' baneeman tijb var ni rtia'beenë bejn, naman lon:

—Bisu bica'bee xyadoo Dios në altar, dxel gulabil bën cayajp ree Dios respejt lën yadoo guin. ²Per ad tia'beel lule' yadoo guin din lule' guin ma badëë Diosan loj ree bën ad najt ree bën Israel, laa reeman naj bën gusagdiaj ree bën Jerusalén loj choon ijz garol. ³Abi' naj gaxhalan tio'p ree da bejnan din guza't reeman naj. Grop reeman gacw lajd ya's, abi' laa reeman guiniee da diidxan choon ijz garol.

⁴Grop ree bën guin naj grop ree yag olivo në grop ree candeler ni za' loj dux Dad ree Dios bën rniabee loj guidxliuj. ⁵Bal chu bën rën günnë laa reeman xhienin, ro' reeman grii bajl din gugüjt reeman bën rdxe'ch ree laa reeman. Zian guiët ree bën rën güün laa reeman xhienin. ⁶Grop ree bën guin rajp reeman guialrniabee par gusiaaw reeman xanyabaa chitëë gal guia loj choon ijz garol guin chi guiniee reeman da diidxan. Rajp tëë reeman guialrniabee par guchaa reeman nijs gacan rejn, abi' zajc guiniab reeman din gui't graloj guialzi loj guidxliuj bëltëëz volt rën reeman. ⁷Per chi ma bayaaloj tiamp ni guiniee reeman da diidxan, dxel tijb monsturo, tijb be doxh grii lën bizë ni ad rliox, be guin ca'pnë laa reeman abi' güünb laa reeman gan abi' gugüjtib laa reeman. ⁸Dxel gaa xcuerp reeman lunejz luguiedx Jerusalén lod güt xdad reeman Jesucrist loj crüz, luguiedx ni naj yan zi'cgajc Sodoma në Egipto. ⁹Dxel graloj ree bejn bën rniee ree gadxagayaa diidx, bën gralad ree, bën za graloj ree nacion zuguaa reeman gaa xcuerp ree bën guin lunejz choon dxej garol, per ad zatiëjbt reeman guiguie'ch ree bën guin. ¹⁰Abi' ree bën naban loj guidxliuj dád yabaa reeman guial ma güjt ree bën guin, abi' guial tant yabaa reeman xt yazaladx reeman xhie renin loj lasa' reeman, din par laa reeman dád basagdiaj ree bën guin laa reeman. ¹¹Per chi ma bayaaloj choon dxej garol guin, yasban Dios bën guin ree dxel chixche reeman abi' gra ree bën guguaa dád guidxeb reeman. ¹²Dxel dád rejs biguien cha' tijb bën ni guneë xanyabaa, rëbaman loj grop ree bën guin:

—Gol wë'p guie.

Abi' wë'p reeman xanyabaa lën tijb zaj delant loj gra ree bën rdxe'ch laa reeman. ¹³Hor ni bayë'p reeman xanyabaa bi't tijb xudoxh abi' zien ree ni bize'n luguiedx guin abi' gajdx mil bejn güjt. Guiaad gra ree bën ad güjtt dád bidxeb reeman abi' gules reeman xvalor Dios bën yu' xanyabaa. ¹⁴Zian rliox guialzi rarojp, dxel laa zëëd gajc guialzi ni rayon.

Trompejt ni goc gajdx

¹⁵ Chi bacwejdx anjl ni goc gajdx guin trompejt ni ca'man, dxel rejs da't biguien cha' ree bejn xanyabaa rëb reeman:

Ma bidxin dxej yaya'n gra xguialrniabee
guidxliuj loj dux Dad ree Dios

në loj Jesucrist abi' nabee reeman zianczi në tiblayaa.

¹⁶ Guigajlbitap ree bengol zobj loj xyagxhil reeman delant loj Dios, bazuxib reeman xt basajb loj reeman liuj gojp reeman laaman respejt, ¹⁷ rëb reeman:

Dux Dadan Dios, lüj rajp gra guialrniabee

abi' najl Dios yan në diizd gocli abi' gui'til.

Quixtëë lüj guial ma culüü xguialrniabee naroo bil ni rajpil
abi' ma guzuloj canabeel.

¹⁸ Bénguidxliuj ree bidxe'ch reeman,

per ma bidxin dxej gulüü xguialrdxe'chil.

Ma bidxin dxej güün xguialguxtisil con ree bengüt

par gudëël ni rayal tia' ree xbejnl

bén badëëd ree xtiidxil, në ree Bén bililadx lüj.

Në ree Bén rajp lüj respejt.

Ma bidxin dxej zi'c ree benzojbloj në ree Bén ad zobjlojt tia' reeman ni rayal
reeman,

dxel gunidlojl Bén ruxhiin ree loj guidxliuj.

¹⁹ Chi gulox rëb reeman zian, bixal xyadoo Dios xanyabaa dxel biguien xcaj promejs ni been Dios diizd gocli. Dxel guzuloj rë'p nijs, rajc naquie', rëëz guziaaw, bi't xudo'xh abi' dád zro' biajb guiajyabaa.

12

Tijb béngunaa në tijb dragon

¹ Dxel gojc tijb sen ro' xanyabaa. Balüüloj tijb béngunaa nadüübaman gubijdx, abi' nuzuj guaia'man loj bëëw abi' guijcaman yu' coron ni gocchaaw con chiptio'p bajl xanyabaa. ² Yu' xi'n béngunaa guin abi' rbixdiajman ragnaa lënman guial ma gal xi'nman. ³ Per gojc stijb sen xanyabaa. Balüüloj tijb dragon ro', tijb bedoxh najb culor xnia. Yu' gajdx guijquib, chii xcajchib yu' tëë tijb coron tijb gaj guijquib. ⁴ Abi' con xbaanb bazaalib cost garol bajl xanyabaa loj guidxliuj. Dxel guzujb loj béngunaa guin din gawib xi'nman naabzi galix. ⁵ Gojl xi'n béngunaa guin tijb xindo niguiaaw, abi' laax nabee loj guidxliuj con tijb var guiiib. Dxel biquied reeman laax loj xniaax, bidxinx lod zobj Dios lod canabeeman. ⁶ Abi' béngunaa guin baxüünman par niz lod naj ganax yujbidx, lod ma beenchaaw Dios par laaman, lod gudëëd reeman ni gawaman choon ijz garol.

⁷ Dxel guyu wadijl xanyabaa, anjl ni la Miguel con ree xi anjlaman gudijlnë reeman dragon guin con ree xi anjlib. ⁸ Per ad beent be guin gan con ree xi anjlib loj anjl Miguel con ree xi anjlaman, dxel ad gojctri nibajn be guin xanyabaa con ree xi anjlib. ⁹ Zianan zeel bazaal reeman dragon guin loj guidxliuj con ree xi anjlib. Dragon guin naj bëël gulal ni la xindxab né satanás xin rusquiee gra ree bénguidxliuj.

¹⁰ Dxel biguien cha' tijb bejn rejs da't diizd xanyabaa rëbaman:

—Ma bidxin dxej baslaa Dios dunuj ree, ma bidxin xguialrniabeeman chi nabeenëman Jesucrist, din ma biquied Bén rbe'c xguialquia ree dux compniar ree, Bén rdxinnë ree guialquia guin loj dux Dad ree Dios dxej guiaal. ¹¹ Abi' dux compniar ree been reeman gan por rejn ni guxhie' Bén naj zi'c xi xiil Dios në por ni rëb reeman xhienaa gliladx reeman xtiidx Dios, ad

bidxebt reeman majsi niëjt reeman. ¹² Zeel gol badxe' luxdoodi nix gra ree bén zojb xanyabaa per; ¡proba læjt bén zojb ree loj guidxliuj nè ree be yu' loj nijsdoo! Din ma biguiajt xindxab lod zojbidi, dád rdxe'chix guial ragbeex sta'nz dxej raya'n par laax.

¹³ Chi baguiaa dragon guin guial ma biajbib guidxliuj, dxel briinalib béngunaa naj xniaa xindo guin. ¹⁴ Dxel badëë reeman tio'p xiil béngunaa guin zi'c xiil bisiaro' din gac suman loj bëël guin xt lod naj ganax yujbidx, lod gudëëd reeman ni gawaman choon ijz garol. ¹⁵ Abi' gulëë ro' dragon guin tijb guiw nijs din chinën béngunaa guin. ¹⁶ Per bixal loj guidxliuj persi gu'n guibidx nijs gulëë ro' dragon guin. Zian been guidxliuj béngunaa guin yudar. ¹⁷ Dxel dád bidxe'ch dragon guin béngunaa guin, abi' zitilnëb sta'n ree bén ni za loj xdiaaman, bén ruzoob ree xtiidx Dios zinal tëë reeman xtiidx Jesucrist.

13

Tio'p ree bedoxh

¹ Wej dragon guin bisub ro' nijsdoo. Abi' naj baguia guial brii tijb monstroo loj nijsdoo, tijb bedoxh be yu' gajdx guijc, chi xcajchib abi' loj tijb gaj cajch guin yu' tijb gaj coron, abi' loj guigajdx guiquib ca tijb diidx ni rnieeguijdx Dios. ² Bedoxh ni baguian naj zi'c tijb tigr, per guia'b najn zi'c naj guia' ojs, abi' ro'b najn zi'c ro' beedx. Dxel dragon ni guzu ro' nijsdoo badëëdib loj monstroo guin xluarib lod rniabeeb abi' gualrniabeero' ca'b par nabeeb. ³ Tijb guijc monstroo guin baguian tijb lod nadxeelguijdx ni rulüü ad zusbajnt laab, per bayajc lod nadxeelguijdx guin abi' gra ree bénguidxliuj badxaloy abi' binal reeman monstroo guin. ⁴ Dxel gojp da't reeman respejt dragon guin guial badëëdib gualrniabee loj monstroo guin gojp da't tëë reeman respejt monstroo guin, rëb reeman:

—¿Chu naj zi'c monstroo guin abi' chu zajc til con laab?

⁵ Monstroo guin gojchaaw ro'b par guilies xvalor gajquib, abi' guinieeguidxib Dios, gojpib gualrniabee par güünb zian loj choon ijz garol. ⁶ Abi' guneeguidxib Dios, guneeb diidxmal ree por laaman, por xyadooman nè por gra ree bén zojb xanyabaa. ⁷ Gojp monstroo guin permis par sub contr ree xbejn Dios abi' güünb laa reeman gan. Abi' gojpib gualrniabee par nabeeb graloy ree bejn, bén ni rniee ree gadxagayaa diidx, bén gra lad ree, gra ree nacion. ⁸ Gra ree bén ad cat laj loj xlibr gualnaban diidx chi gad guidxliuj gacchaaw, loj xlibr bén naj zi'c xi xiil Dios bén güüt por ree bejn, gra reeman gap da't respejt monstroo guin. ⁹ Bén rën ree gucaagdiajg, gol bacaagdiajg. ¹⁰ Bén naj che ladxguuib, cheman ladxguuib. Bén naj guiët con espad, con espad guiëtaman. Zeel bén naj ree xbejn Dios ad yadxaguidi ad gucwëëz tëë chililadixidi Dios.

¹¹ Dxel baguian stjib monstroo ren briib loj guidxliuj, yu' tio'p xcajchib zi'c xcajch xiil, per cha'b naj zi'c cha' dragon. ¹² Abi' lasa'gajc gualrniabee ca' monstroo ni brii loj nijsdoo lasa'gajcan ca'b abi' por laab gojp da't ree bejn respejt monstroo ni brii loj nijsdoo, monstroo ni bayajc lod nadxeelguijdx ni rulüücüzi gugüjt laab. ¹³ Abi' monstroo ni brii loj guidxliuj nè gajquib rüjn milagr narooob ree, xt rajc rniabeeb rguiajt bajl diizd xanyabaa xt loj guidxliuj delant loj ree bejn. ¹⁴ Zian rusquieeb bénguidxliuj ree por ree milagr ni rüjn delant loj monstroo ni brii loj nijsdoo, abi' rniabeeb rüjn ree bénguidxliuj tijb xfigur monstroo ni brii loj nijsdoo, monstroo ni bidxeelguijdx con espad abi' gubajnb. ¹⁵ Abi' monstroo ni brii loj guidxliuj xt gojpib gualrniabee par gudëëdib gualnaban loj xfigur monstroo ni brii loj

nijdsdo, par guinee figur guin në par gugüjtib gra ree bén ni ad rajpt respejt figur guin. ¹⁶ Gunabee tëë monstroo ni brier loj guidxliuj gra ree bejn, zi'c ree bengol zi'c ree xindoo, benrijcw ree në ree bénprob, bén naj ree zi'c bén nado' në ree bén ad najt zi'c bén nado', din chu' sen yaa reeman ladbee o lucwaj reeman. ¹⁷ Abi' achut zajc sii o guto' ya bal id ca reeman sen guin, abi' sen guin naj laj monstroo guin o xinumbrib.

¹⁸ Guie ryaadx gualrignia'. Bén rajp gualrignia' cwëë xcwentaman con xnumbr monstroo guin, abi' numbr guin naj xho'pgayuu gayojnbixho'p. Con numbr guin ririi laj tijb bénguidxliuj.

14

Cant ni biil tibgayuu tiuubitap mil ree bejn

¹ Baguia tëën guial za' bén naj zi'c xi xiil Dios guijc dajn ni la Sión. Bén naj zi'c xi xiil Dios za'man con tibgayuu tiuubitap mil ree bejn, graczi reeman ca lucwaj reeman laj bén naj zi'c xi xiil Dios në laj xDadaman. ² Abi' biguiejnan tijb naquie' xanyabaa zi'c naquie' rüjn zil da't nijs, o zi'c rguien rbidxa' guziaaw rejs da't, o zi'c chi rusijdx zien ree bejn arp. ³ Dxel rool reeman tijb cant cüb delant loj yagxhil lod zobjb bén rniabee në loj guidap ree be za' yagaj në loj ree bengol guin. Ad zile't chu gusiid cant guin, naabzi ree bén tibgayuu tiuubitap mil guin, laa reeman naj bén gulaa loj ree bénguidxliuj. ⁴ Abi' laa reeman naj ree xinguaaaw ni ad bagaalt béngunaa, gojc reeman naya abi' zinal reeman bén naj zi'c xi xiil Dios bantëëz guin rejman. Laa reeman naj ree bén gulaa loj ree bénguidxliuj abi' zi'c gualnaza'c yaloj ni rinë bejn loj Dios zian naj reeman delant loj Dios në delant loj bén naj zi'c xi xiil Dios. ⁵ Ad goct basquiee reeman, nayadxuj reeman delant loj Dios.

Ruson ni badëë guiyon ree anjl

⁶ Dxel baguian tijb anjl rzujman xanyabaa con tijb ruson ni naj par tiblayaa par gugoijnman gra ree bén naban loj guidxliuj, xhietëëz diidx rniee reeman, o xhietëëz loj diaa zëed reeman, o xhietëëz ciuda o nacion zëed reeman. ⁷ Dxel dád rejs gunee anjl guin rëbaman:

—Gol bidxeb Dios, gol gules xvaloraman, din ma bidxin hor yadëed ree bejn cwent lojman. Gol gojp da't respejt bén been xanyabaa, guidxliuj në nijdsdoo në lod rajch nijs.

⁸ Dxel rëb stijb anjl:

—Ma biajb, ma biajb Babilonia din zi'c chi rusüdx tijb bejn stijb bejn, zian ma basquiee ciuda narooob guin gra ree bénguidxliuj guial güün reeman graloj ree nidxuudx, graloj ree dol ro'.

⁹ Dxel rejs da't gunee anjl bayon guin rëbaman:

—Bal chu gap da't monstroo guin respejt con xfigurib abi' tiëbaman tia xsenb lucwajman o yaaman, ¹⁰ bén zii yayal xcasti narooob Dios, zro' da't gudëëdaman laaman casti. Abi' sagdiajman loj bajl ni caye'c azufre delant loj ree xianjl Dios në delant loj bén naj zi'c xi xiil Dios. ¹¹ Ad yu' tëët dxej yayü' bajl guin. Ni'qui radxe ni'qui guaial achet gualraziiladx par ree bén rajp da't respejt monstroo guin con xfigurib, o bén ca ree xsenb. ¹² Zeel bén naj ree xbejn Dios bén ruzoob ree xtiidxaman abi' rliladx reeman Jesucrist, ad rayalt yaleny'a' reeman.

¹³ Biguiejn tëën cha' bén ni na lon diizd xanyabaa:

—Bacaa ni ganin lojl: “Diizd yan xiquilbaa ree bén rëjt con gualrliladx Jesucrist.”

Dxel rëb xSprijt Dios: “Walican din ma yaziiladx reeman xcwent ree guialzi ni gudëd reeman abi' chinë reeman gualbenza'c reeman.”

Guialnaza'c ni runee guidxliuj

¹⁴ Dxel baguian tijb zaj naquich abi' loj zaj guin zojb zi'c tijb bejn. Yu' tijb coron or guijcaman abi' yaaman ca'man tijb hoz ni nadoxh ro'. ¹⁵ Dxel brii stijb anjl lën yadoo abi' rejs da't guneeman bën ni zojb loj zaj guin rëbaman:

—Badxe' xi hosil, batüüg ree guialnaza'c loj guidxliuj din ma gojl reen ma bidxin tiamp ni yado'p reen.

¹⁶ Abi' bën zojb loj zaj guin badëed xi hosaman loj guidxliuj abi' bato'paman guialnaza'c loj guidxliuj.

¹⁷ Dxel brii stijb anjl lën yadoo ni naj xanyabaa, ca' gajcaman tijb hoz ni nadoxh ro'. ¹⁸ Dxel niz loj altar brii stijb anjl bën rajp gualrniabee par bajl, abi' dád rejs guneenëman bën ca' hoz ni nadoxh ro' guin, rëbaman lojman:

—Badxe' xi hosil ni nadoxh ro', batü' ree uv ni yu' loj guidxliuj din ma gojl reen ma gojl tiamp ni yado'p reen.

¹⁹ Dxel badëed anjl guin xi hosaman loj guidxliuj guin, abi' bato'paman uv guin ree loj guidxliuj. Abi' badxe'man uv guin ree lod guixii reen, laan rën guiëb lod yu' xcasti Dios. ²⁰ Dxel xijch ciuda guin bixii ree uv guin abi' lën lod bixii ree uv guin birii rejn. Rejn guin bixie'n loj guidxliuj zi'ct choon gayuu kilometro abi' wë'pan zi'ct xt niz ro' ree way.

15

Bën naj ree xi anjl Dios con guigajdx ree guialzi

¹ Dxel baguian stijb senro' xanyabaa, tijb sen ni diidxli badxaloj bejn: Baguian gajdx ree anjl con gajdx guialzi. Guialzi guin ree naj gajdx ni chigra gac din con guialzi guin ree gusiaaloj Dios xcastiman.

² Baguia tëen zi'c nijsdoo, per najn zi'c tijb vidr xculor bajl. Dxel lojn za' ree bën been ree gan loj monstroo, loj figur con loj xnumbrib, ca' reeman arp ni badëed Dios loj reeman. ³ Abi' cayool reeman xcant Moisejs xbejn Dios në xcant bën ni naj zi'c xi xiil Dios, rëb cant guin:

Naroob në ni diidxli radxaloj bejn

naj ree ni rüjnl, dux Dadan Dios Bën rajp gra gualrniabee.

Xnejz da't në zi'c rayal rüjnl,

lüy guial rniabeel gra ree bénguidxliuj.

⁴ ¿Chu ad zadxebt lüy?

¿Chu ad zuza'tt lüy zagdxe, dux Dadan Dios?

Tijbzi lüy naj bën naya nali

abi' bénguidxliuj gui't gap da't reeman lüy respejt

gual ma balüül bejn ree guial xnejz rüjnl.

⁵ Chi gulox baguian ni guin ree, dxel baguian bixal luar lod mazri nagle' lën xyadoo Dios xanyabaa. ⁶ Abi' lën yadoo guin brii gajdx ree anjl bën ca' ree gajdx ree guialzi, najcw reeman lajd naquich ni rdiin bacha', abi' naxii tijb cinch or luxdoo reeman. ⁷ Abi' tijb guidap ree be ni za' lod za' Dios, badëeb loj tijbgaj ree anjl guin tijb cojp or ni guidxa xcasti Dios bën naban guidib tiamp në par tiblayaa. ⁸ Abi' lën yadoo guin gudxan xgo'xh xbacha' Dios në xgualrniabeeman. Achut gojc niu lën yadoo guin xt chi ma gulox guigajdx ree guialzi ni zidnë ree anjl guin.

16

Cojp ni guidxa ree xcasti Dios

¹ Dxel biguejnan cha' bejn rejs da't guneeman diidz lën yadoo guin, rëbaman loj guigajdx ree anjl guin:

—Gol chej, gol bigla't xcasti Dios ni yu' loj guigajdx ree cojp guin loj guidxliuj.

² Dxel wej anjl yaloj guin, bala'taman ni yu' loj xcojppaman loj guidxliuj. Abi' gra ree bën ni yu' xsen montruo guin bën gop da't ree respejt xfigurib, brii guiadxyoodx lad reeman, ni rdoob da't.

³ Abi' anjl barojp guin bala'taman ni yu' loj xcojppaman loj nijsdoo. Abi' nijs guin bayajcan rejn zi'c xrejn tijb bengüt abi' gra ree be naban loj nijs guin güjt.

⁴ Anjl bayon guin bala'taman ni yu' loj xcojppaman loj ree guiw në lod rajch ree nijs abi' nijs guin ree bayajc reen rejn. ⁵ Abi' biguejnan rëb anjl ni rniabee ree nijs guin:

—Xnejz naj ni cayüjn në zi'c cayüjn xgualguxtisil, Dad Dios, lüj naj bën naya nali, najl Dios yan në diidz gocli. ⁶ Din bénguidxliuj ree guxhie' reeman rejn bagüjt reeman xbejn reel në ree bën badëed ree xtiidzil. Zeel ma badëedil rejn guië' reeman, abi' zian rayal reeman.

⁷ Abi' niz loj altar biguejnan cha' stijb bën rëb:

—Walican, Dad Dios bën rajp gra gualrniabee. Xnejz në zi'c rayal cayüjn xgualguxtisil.

⁸ Abi' anjl badajp guin bala't ni yu' loj xcojppaman loj gubijdx din guze'can bejn ree zi'c bajl. ⁹ Gra reeman we'c por xgualnalaa da't gubijdx guin. Per ni'qui zian ad bayüjnt reeman xgab por xtol reeman, ad baza'tt reeman Dios zagdx guneeguijdx reeman laaman, laaman gual najman bën rniabee ree gualzi guin.

¹⁰ Anjl bagaay guin bala'taman ni yu' loj xcojppaman lod rbej montruo ni rniabee guin, abi' bicajy loj guidxliuj, abi' xt rawya' lüdx ree bejn por gualzi ni cadëd reeman. ¹¹ Per ni'czi zian ad basa'nt reeman ni mal ni rüjn reeman, al mazri been reeman por gualzi ni gudëd reeman në por guiadx ni gudxib lad reeman, guneeguijdx reeman Dios bën zojb xanyabaa.

¹² Anjl baxo'p guin bala't ni yu' loj xcojppaman loj guiwro' la Eufates abi' gubidx nijs loj guiw guin. Zian bixal nejz din täd ree rey bën zëed ree lad lod rliejn gubijdx. ¹³ Dxel baguian ro' dragon guin, con ro' montruo guin në ro' bën rusquiee rëb rudëe xtiidz Dios loj ree bejn brii choon ree sprijt mal ni naj zi'c bidx. ¹⁴ Guiyon ree sprijt guin naj xsprijt xindxab, abi' rüjn reen milagr abi' rej reen lod za' gra ree rey loj guidxliuj persi rado'p reeman din til reeman con Dios bën rajp gra gualrniabee, dxej ni gui'taman guidgueenman gan loj gra reeman.

¹⁵ Rëb Jesucrist:

—Gol badxe'guijc gual dxejczy gualan zi'c chi ri't tijb xingubaan tijbzi golp. Xiquilbaa ree bën rbëz naj, bën za'sin ree chi gualan din chitëe yaya'nxtu reeman zi'c chi rniaaz bën za' zibëel.

¹⁶ Sprijt mal guin ree bato'p gra ree rey ni yu' loj guidxliuj tijb luar lod la Armagedón con diidz hebreo.

¹⁷ Abi' anjl bagajdx guin bala't ni yu' loj xcojppaman loj bi, abi' diidz lën yadoo ni yu' xanyabaa niz lod za' xyagxhil bën rniabee, biguien rejs da't cha' bën rëb:

—Ma bayaaloj gojc ni rayal gac.

¹⁸ Abi' guzuloj rè'p nijs, rajc naquie', rbidxa' guziaaw dxel bi't xudoxh, tijb xudoxh ni ad goct wayi't diizd guzuloj yu' bejn loj guidxliuj, din xu guin naj ni mazczi ni doxh. ¹⁹ Abi' gula' ciuda narooob guin gojcan choon lala', dxel guidib guidxliuj bize'n ree ciuda në ree guiedx. Abi' Dios ad bayanladxtaman Babilonia par gudëe xcasti ro'man loj ciuda narooob guin. ²⁰ Abi' gunijt ree gra yuj riga' loj nijsdoo në ree guia'. ²¹ Biajb tëë guiajyabaa guijc ree gra ree bénguidxliuj, dxel tijbgaj ree guiaj yabaa guin na' reen cost tiuu quil. Abi' ree bejn guneeguidx reeman Dios, por ree guialzi guin, guial dád ni doxh gojc chi biajb ree guiajyabaa guin.

17

Guialguxtis ni güün Dios con béngunaa dxuudx

¹ Abi' tijb guigajdx ree anjl guin bi'taman naman lon:

—Guda din gulün lüj casti ni rayal béngunaa dxuudx ni zojb loj nijsro', ² laaman goc xtuu ree rey ni yu' loj guidxliuj, abi' zi'c rusüdx tijb bejn stijb bejn, zian bazaalguiiwaman bejn ree loj guidxliuj con ree ni ad rüjnt sirv ni rüjnman.

³ Abi' por xSprijt Dios binë anjl guin naj lod naj ganax yujbidx. Ni baguian tijb béngunaa dxiibaman tijb monstroo xnia, abi' guidib ladib ca diidxgujdx par Dios, yu' gajdx guijquib con chii xcajchib. ⁴ Abi' béngunaa guin najcwaman lajd murad në ni xnia, najcchaawnën ganax or në ree guiaj zagdxë në ree perl. Abi' ca'man tijb cojp or guidxa ree ni nabixhladx lojn në ree ni dxuudx ni rüjnman. ⁵ Abi' lucwajman ca tijb letrer ni achutczy rignia' ni rën guiëban, rëb loj letrer guin: “Babilonia, ciuda narooob ni naj xniaa ree béngunaa dxuudx në xniaa ree ni dxuudx ni rajc loj guidxliuj,” ⁶ Dxel gogbeen guial rzüdx béngunaa guin con xrejñ ree xbejn Dios, con xrejñ ree bën ni güt guial gunee reeman xtiidx Jesús. Abi' dád badxalon chi baguian zian. ⁷ Dxel na anjl guin lon:

—¿Chexc zeel dád radxalojl? Naj gusignia' lüj ni rën guiëb béngunaa ni baguiaal në monstroo ni dxiibaman, be ni yu' gajdx guijc con chii xcajch. ⁸ Monstroo ni baguiaal, laab naj be guban gocli, per yan ad nabantrib. Per gulüülojb lën bizë ni ad yu't lod rliox dxelri nidlojb tiblyayaa. Abi' ree bën naban loj guidxliuj, bën ni ad cat ree laj loj xlibr guialnaban diizd gocli chi gad guidxliuj gacchaaw, laa reeman yadxaloj chi guguaa reeman monstroo ni guban gocli, be ad nabant yan per gui'tib.

⁹ 'Guie ryaadx quiarguejn. Guigajdx guijc monstroo guin rën guiëban gajdx guia' lod zojb béngunaa guin ¹⁰ rën tëë guiëban gajdx ree rey. Gaay ree rey guin ma gudëed xguialrniabee, abi' bën baxo'p guin naj bën canabee yan. Dxelri nabee bën bagajdx guin, per ad xchejt nabeeman. ¹¹ Abi' monstroo ni guban gocli, abi' yan ad nabantrib, laab gac rey baxujñ, per loj gajc gajdx ree rey guin grii rey gac xhujn dxel yyalib lod rayalib casti par tiblyayaa.

¹² 'Guidxii cajch ni baguiaal rën guiëb chii ree rey ni ad wazuloj nabee. Per chi tia' reeman guialrniabee, ad xchejt nabee reeman con monstroo guin. ¹³ Abi' guidxii ree rey guin yaya'n reeman diidx abi' yayü xguialguxtis reeman con xguialrniabee reeman loj monstroo guin, ¹⁴ abi' til reeman con bën naj zi'c xi xiił Dios. Per güün bën naj zi'c xiił guin laa reeman gan din laaman naj Dad loj gra ree dad, naj tëëman rey loj gra ree rey. Abi' bën za' ree con bën naj zi'c xi xiił Dios, laa reeman naj bën bazooob xtiidx Dios, bën ma naj ree par laaman abi' diidxli zinal reeman xnejz Dios.

¹⁵ Na tëë anjl guin lon:

—Nijs ni baguiaal lod zojb béngunaa dxuudx guin laan rën guiëb graloj ree bën rniee graloj ree diidx, bën gra lad ree, bën zëed ree gra loj ree nacion. ¹⁶ Abi' monstroo guin con guidxii xcajchib ni baguiaal, guidxe'ch reeman béngunaa dxuudx guin, tio'nladx reeman laaman, gusa'n reeman zibëelaman, gaw reeman xbëelaman abi' guze'c reeman laaman. ¹⁷ Dios yazaladx loj guidxii ree rey guin quiarguejn din güün reeman zi'c rënman. Yaya'n reeman diidx din yayü xguialrniabee reeman loj monstroo guin, xt gac cumplid ni rëb Dios gac. ¹⁸ Abi' béngunaa ni baguiaal, laaman naj ciuda narooob ni rniabee ree rey yu' loj guidxliuj.

18

Biajb guiedx Babilonia

¹ Chi gulox baguian ni guin ree, dxel baguian stijb anjl zidguiajtaman xanyabaa. Rajpaman zro' guialrniabee, abi' xbacha'man basni guidib guidxliuj, ² abi' rnieeman rejs da't rëbaman:

—Ma biajb, ma biajb Babilonia ma naj ciuda narooob guin zi'c lidx ree xindxab, zi'c lidx ree graloj ree sprijt mal, zi'c lidx ree graloj ree be ni rzuj, bedxuudx ree be rbijxhladx ree bejn. ³ Din zi'c chi rusüdx bejn stijb bejn, zian ma batiaalguüiw ciudaro' guin gra ree bénguidxliuj par güün reeman graloj ree ni dxuudx. Abi' ree rey yu' ree loj guidxliuj ma been reeman ni dxuudx guin ree con ciuda guin, abi' ree bën rüjn negojs loj guidxliuj ma naj reeman rijcw por graczi ree ni dxuudx rajc ni.

⁴ Dxel biguejnan cha' stijb bën gunee diidx xanyabaa rëbaman:

—Gol brii loj ciuda guin, da bejn reen, chitëe go'chidi loj ree dol ni rajc ni chitëe tëdidi gualzi ni gac ree loj ciuda guin. ⁵ Din dád zien xtol reeman zeel ma bidxinan xt xanyabaa, abi' Dios ad zayanladxtaman ni mal guin ree. ⁶ Gol beennë ciuda guin zi'cgajc beennën ben ren ree, gol been din yaguijxan xcastin tio'p volt mazri guial loj ni beennën bejn ree abi' gol basagdiajn tio'p volt mazri guial loj ni basagdiajn ben ren ree. ⁷ Gol basagdiaj ciuda guin naya zi'c babaan chi beenan ni dxuudx ree, abi' zi'c beenan xgab rëban: “Zooban guie zi'c tijb bën rniabee, ad najtan bën bizëjb ad yu' tëtë dxej chu'nayan.” ⁸ Zeel tijbzi dxej guidxajg lasa' ree gualzi par ciuda guin, zi'c gualgüjt, guialrunaya, guialrliaan, dxel che'can con bajl. Din narooob xguialrniabee dux Dad ree Dios bën gudëed casti ciuda guin.

⁹ Abi' ree rey ni yu' loj guidxliuj, bën babaa ree guial been reeman ni dxuudx con ciuda guin, zoon reeman, naya sagdiaj reeman chi guguiaa reeman go'xh ni caye'can. ¹⁰ Abi' zijt su reeman chi guguiaa reeman casti ni cadëdan, dxel guiëb reeman:

—i;Probza lüj, probza lüj Babilonia, ciuda narooob ni guyu gojl par gra! Din tibrajtzi bi't casti par lüj.

¹¹ Abi' ree bën rüjn negojs loj guidxliuj zoon reeman zu tëë luxdoo reeman naya por ciuda guin, din achutri sii ni ruto' reeman, ¹² zi'c or, plajt, guiaj zagdx ree, perl, lajd zagdx ree, lajd sed ree culor murad con ni xnua, në graloj ree tabl ruree nejxh në graloj ree ni been reeman con ree tabl zagdx, bronze, guib con marmol në marfil. ¹³ Ad zajc tëetri guto' reeman canel në graloj ree ni ruree nejxh, ad zajctri guto' reeman goxyaal, mirra, parfum, vin, sejt oliv, harin zagdx, trigo, go'n, xiil, way, carrejt, ad zajc tëetri ree guto' reeman bejn ree. ¹⁴ Abi' guiëb reeman loj ciuda guin:

—i;Ad rajptril gualnaza'c ni bayuladx da'til, tiblayaa ma banijtl zi'c gubanl con gra ree ni za'c ni gopil!

¹⁵ Gra ree bén been negojs, bén gojc ree rijcw por ciuda guin, zijt su reeman guialrdxeb reeman casti ni cadéd ciuda guin. Zoon reeman, zazagdiaj reeman, zunaya reeman. ¹⁶ Abi' guiëb reeman:

—¡Probza, probza ciuda narooob guin! Laan guial guzujchaawan con ree lajd zagdx, lajd culor murad con ni xnía, laan guial guzujchaawan con or, con perl nè con guiaj zagdx ¹⁷ din, ¡tibrajtzi gunidloj gra ree guialnaza'c guin!

Gra ree bén zè lèn barcw, zi'cgajc xcapitan ree barcw, gra ree mariner nè los demazri ree bén rüjn dxiin lèn barcw, guzudxe reeman zijt ¹⁸ chi baguiaa reeman go'xh ni cayë'c ciuda guin, abi' gurixdiaj reeman rëb reeman:

—¿Goc guyu tijb ciuda lasa' ciuda ro' guie?

¹⁹ Abi' harooob yuj guiyc reeman, roon reeman abi' guyunaya luxdoo reeman rëb reeman:

—¡Probza!, probza ciuda narooob guin por xguialnaza'can gra ree bén been negojs bén rajp ree barcw gojc reeman rijcw, din tibrajtzi gunidlojn.

²⁰ Dxel biguien cha' bén na:

—Per lëjt bén zobj ree xanyabaa, lëjt najdi xi apóstoles Jesucrist, lëjt bén rudëd ree xtiidx Dios nè los demazri ree bén naj xbejn Dios, gol babaa por ni cazajc ciuda guin din zian cayüjn Dios xguialguxtisaman por ni beennë ciuda guin lëjt.

²¹ Abi' tijb anjl gojl da't, gulesaman tijb guiaj narooob, zi'c tijb guiaj mulin abi' bazaalaman laan loj nijsdoo rëbaman:

—Zi'c bazalbin guiaj guie con guidib da gojlan zian nidoxh sac ciuda narooob Babilonia, abi' achutri guguaiaa Babilonia guin stijb. ²² Ad zaguentri ree cha' arp, ni'qui ree xinrucwejdx, ni'qui ree bidxa, ni'qui ree cha' trompejt ad zaguentri loj ciuda guin. Achutri bejn güün dxiin ni, ni'qui xnaquie' mulin ad zaguentri ni. ²³ Achetri guiyc che'c loj ciuda guin, achutri guxhliaa. Gra ree bén been negojs loj ciuda guin ganax Bén zobjloj gojc reeman loj guidxliuj, abi' ciuda guin basquieen gra ree nacion con ree ni dxuudx ni beenan.

²⁴ Abi' loj ciuda guin bagüjt reeman Bén badëd ree xtiidx Dios, nè ree Bén rliidx Dios, abi' por ciuda guin bagüjt reeman los demasri ree Bén ma güjt loj guidxliuj.

19

¹ Chi gulox baguian bigueijn tëen zian, dxel dád rejs bigueijnan cha' zien da't ree Bén canee xanyabaa rëb reeman:

¡Quixtëe Dios! Por dux Dad ree Dios zëd perdon, respejt nè guialrniabee,

² din laaman waliman abi' xnejz rüjn xguialguxtisaman,

ma badëdaman casti béngunaa dxuudx ni bazaalguiiw

bénguidxliuj ree con ree xni malaman,

ma been Dios guialguxtis con laaman persi baguijxaman ni bagüjtaman xbejnman.

³ Abi' bigueijnan rëb reeman stijb:

—¡Quixtëe Dios! Ad yu't dxej yayü' go'xh ni cayë'c ciuda guin.

⁴ Abi' guigajlbitap ree bengol con guidap ree be naban guin bazuxib reeman delant loj xyagxhil Dios par gap da't reeman laaman respejt, rëb reeman:

—¡Quixtëe Dios! ¡Diidxza'c guin ree naj par laaman!

⁵ Abi' niz lod za' yagxhil guin bigueijnan cha' Bén rëb: Gradi zi'c bengol zi'c xindoo gol gules xvalor dux Dad ree Dios,

lëjt rüjndi laaman sirv abi' rajpidi laaman respejt.

Xgualruhxhliaa bén naj zi'c xi xiil Dios

⁶ Biguiejn tëën zi'c chi rguien cha' zien da't bejn, o zi'c xnaquie' nijsro', o zi'c chi rbidxa' da't guziaaw, rebaman:

¡Quixtëë Dios! Din ma canabee dux Dad ree Dios,
bén ca' gra gualrniabee.

⁷ Yan yadxë' du luxdoo ree zagdxë, yabaa ree yales tëë ree xvaloraman.

Din ma bidxin dxej guhxhliaa bén naj zi'c xi xiilaman
abi' bén gac lacheelaman ma za'chaawaman.

⁸ Najcwaman lajd zagdxë, ni naquich, naya rulaa tëën bacha'.

Din lajd naquich guin rën guiëban ni zagdxë ni been ree xbejn Dios.

⁹ Abi' na anjl guin lon:

—Bacaa: “Xiquilbaa ree bén naj gui't loj xgualruhxhliaa bén naj zi'c xi xiil Dios.”

Na tëë anjl guin:

—Ni guie ree naj xtiidxli Dios.

¹⁰ Dxel bazuxiban loj anjl guin par ga'p da'tan laaman respejt, per naman lon:

—Ad güünl zian. Din zi'cgajc lüj xmandadzi Dios cayguieen, zi'cgajc gra ree lasa'l bén wali ree rüjncwent xtiidx Jesucrist. Gojp da't respejt Dios.

Din por Jesús zëëd ni rníee ree bén rudëëd xtiidx Dios.

Bén dxiib tijb way naquich

¹¹ Dxel baguian zojbyal xanyabaa baguia tëën tijb way naquich. Bén dxiib laab laman: Bén ruzoob xtiidxaman në bén wali, din xnejz rüjn xgualguxtisaman në xwadijlaman, ¹² guiaalojman rulaan bacha' zi'c bajl abi' zien ree coron yu' gujcaman, tib lajtaman ca laj tijb bejn ni achut rignia', tijbzi laaman ragbee xhie rën guiëban, ¹³ guidib rejnzi xabaman, abi' laman Xtiidx Dios.

¹⁴ Abi' ree xsuldadaman bén yu' xanyabaa zinal reeman laaman dxiib reeman way naquich, najcw reeman lajd zagdxë ni naquich ni naya tëë.

¹⁵ Ro'man ririi tijb espad ni nadoxh ro', con espad guin gudëëdaman casti bénguidxliuj, në con var guiib nabeeman laa reeman. Zi'c rë'p bejn guijc uv par guixiin, zian gudëëdaman loj reeman casti narooob ni zëëd por Dios bén rajp gra gualrniabee. ¹⁶ Loj xcajpaman con cüdaman ca ree diidx ni rëb: “Rey bén rniabee loj ree rey në Dad bén rniabee loj ree dad.”

¹⁷ Dxel baguian tijb anjl za'liman loj gubijdx, dád rejs rbidxa'man, rbejdxa-man gra ree be ni rzuj xanyabaa, rëbaman:

—Gol guda, gol bachajg lasa'di lod guneë Dios ni gawidi zro' da't, ¹⁸ zi'c xbëël ree rey, xbëël ree capitán, xbëël ree bén achut rüjn gan, zi'c xbëël ree way, xbëël ree bén rbib laa reeb, xbëël gra ree bejn, zi'c xbëël ree bén naj zi'c bén nado' në xbëël ree bén ad najt zi'c bén nado', zi'c xi bëël ree bengol në ree xindoo.

¹⁹ Dxel baguian monstruo con ree rey yu' loj guidxliuj në ree xsuldad reeman, nadxag lasa' reeman par til reeman con bén dxiib way naquich guin con ree xsuldadaman. ²⁰ Per laa reeman gunaaz reeman monstruo guin con bén rusquieë rëb rudëë xtiidx Dios loj ree bejn, bén rüjn milagr niz loj monstruo guin. Abi' por ree milagr guin basquieeman bén guyu ree xsen monstruo guin gojp tëë reeman respejt xfigurib. Abi' monstruo guin con bén rusquieë ni rëb rudëë xtiidx Dios loj ree bejn, grop reeman guidib naban reeman bazaal reeman laa reeman loj bajl lod caye'c azufre. ²¹ Abi'

los demazri ree xbejn monstroo guin güjt reeman con espad ni ririi ro' Bén dxiib way naquich guin, abi' gudaw ree be ni rzuj xanyabaa laa reeman, xt gudxa lèn reeb gudaw ree xbeél reeman.

20

Ti mil ijz

¹ Dxel baguian zidguiajt tijb anjl xanyabaa, ca'man xguibliaw bizè ni ad yu't lod rliox, ca' tēeman tijb caden narooob. ² Abi' gunaazaman dragon, bëél gulal ni la xindxab nè satanás, guxhiiman laab con caden guin por timil ijz. ³ Dxel bazaalaman laab lèn bizè ni ad yu't lod rliox abi' basiaawdxi'chaman bizè guin chitèè gusquieeri reeb bejn ree loj guidxliuj xt chi ma bayaaloj timil ijz dxel yariib lèn bizè guin tibladed.

⁴ Dxel baguian yagxhil zagdxe ree lasa' xyagxhil ree rey, lojn zojb ree Bén ni ma cwa' gualrniabee par güün reeman gualguxtis. Baguia tēen xsprijt ree Bén ni biru' yējn guial gutie'ch reeman xtiidx Dios nè gra ni ragbee reeman por Jesús. Laa reeman ad gojpt respejt monstroo guin ni'qui xfigurib abi' ad cwējbt reeman niu xsenb lucwaj reeman o yaa reeman. Abi' baguian baban reeman stijb, dxel gunabee reeman con Cristo timil ijz. ⁵ Laan naj ni yaloj ni yaban ree bengüt, per stijb ree bengüt ad zabant reeman xt yaza' timil ijz. ⁶ jXiquilbaa ree Bén yaban yaloj! Laa reeman ma naya niz loj Dios abi' ad zayaltri reeman gualgüjt rarojp, laa reeman gac xbixhioz Dios con xbixhioz Cristo abi' nabeenè reeman laaman timil ijz guin.

⁷ Chi ma bayaaloj timil ijz guin, dxel yarii xindxab guin lod nayaawix ⁸ Par gusquieex bejn ree guidib guidxliuj. Gusquieex Gog nè Magog din guchajg lasa' ree xbejn reeman din güün reeman wadijl. Abi' guido'p zien da't reeman zi'c üx ni riga' ro' nijsdoo. ⁹ Gra lad gui't reeman, guido'p reeman gadéd lod za' ree xbejn Dios nè gadéd ro' guiedx lod rēnman. Per laaman diizd xanyabaa guixhiaalaman bajl ni guze'c Bén guin ree xt yadēj reeman. ¹⁰ Abi' xindxab ni basquiee laa reeman laax chu' loj bajl lod caye'c azufre, lod ma za' monstroo con Bén rusquiee rēb rudēè xtiidx Dios loj ree bejn, lod ad yu't dxej yarii reeman lod sagdiaj tēè reeman dxej guiala.

Yadēèd ree bejn cwent loj Dios

¹¹ Dxel baguian tijb yagxhil zi'c xi yagxhil rey, tijb yagxhil narooob ni naquich. Lojn zojb tijb bejn abi' delant lojman biquied guidxliuj nè xanyabaa, gunidloj reen tiblyaa. ¹² Dxel baguian guial delant loj yagxhil guin lod zojb Dios, ni za' ree bengüt, zi'c ree bengol zi'c ree xindobéz. Abi' bixal loj ree libr, dxel bixal loj stijb libr ni la xlibr guialnaban. Dxel been Dios xgualguxtisaman con ree bengüt guin zi'c ca loj ree libr guin xcwent ree ni been reeman. ¹³ Nijsdoo bayü xbengütan, abi' gualgüjt bayü xbengütan, abi' ree bengüt ni za' lod cabéz reeman guidxin dxej ni yadēèd reeman cwent loj Dios, bibig reeman yagaj din güün xgualguxtis Dios con laa reeman bal conin been reeman. ¹⁴ Dxel gualgüjt con lod guzu ree bengüt gulēz reeman guidxin dxej yadēèd reeman cwent loj Dios, grop reen bazaal reeman loj bajl, bajl guin naj gualgüjt barojp. ¹⁵ Abi' loj gajc bajl guin bayal ree Bén ad cat laj loj xlibr guialnaban.

21

Xanyabaa cüb con guidxliuj cüb

¹ Chi gulox baguian ni guin ree, dxel baguian tijb xanyabaa cüb con tijb guidxliuj cüb, din xanyabaa con guidxliuj ni guyu diizd yaloj ma gunijt

reen, ziangajc nijsdoo. ² Dxel baguian Jerusalén cüb, xguiedx narooob Dios zidguiajtan xi xanyabaa Dios. Dád za'chaawan zi'c rzujchaaw tijb biingunaa chi ma guxhliam con xin gac lacheelim. ³ Abi' dád rejs biguejnan cha' bën gunee lod za' xyagxhil Dios, rëbaman:

—Ma za' Dios con ree bejn, guibannëman laa reeman abi' laa reeman gac xbejnman, guiáad laaman suman con laa reeman abi' gacaman xDios reeman. ⁴ Laaman gutiaa loj reeman nijs biin reeman, dxel achetri gualgüjt chu', gualroon, gualrunaya në gualzi, din gra ree ni guyu gocli ma gudëd reen.

⁵ Abi' bën zojb loj yagxhil guin, naman:

—Gra cayünan nicüb.

Na tëëman:

—Bacaa ree diidx guie, din laa reen naj diidxli ni rayal chililadx bejn.

⁶ Dxel naman:

—Ma gojc ni rayal gac. Naj naj zi'c A con Z, din tijbzi naj rniabee diidz guia'xchej në par tiblayaa. Bën re'c nijs, naj yazaladx nijs lojman nijs ni rirri lod rajch nijs ni runee gualnaban.

⁷ Bën ni güün gan loj dol, laaman yayal gra ree ni guin. Abi' naj gac xDiosaman guiáad laaman gac da xi'nan. ⁸ Per ree bën rdxeb sudxi'ch loj ni rililadx reeman naj, bën ad rililadxt ree naj, bën ruladx ree güün ganax ni mal, bën rugüjt ree bejn, bën rüjn ree nidxuudx con ree bën ad najt lacheel reeman, bën rüjn ree gualbidxaa, bën rën ree ni naladx reeman naj ree Dios, në gra ree bën rusquiee, laa reeman rayal loj bajl lod caye'c azufre, bajl guin naj gualgüjt rarojp.

Jerusalén cüb

⁹ Dxel tijb guigajdx ree anjl bën ca' ree guigajdx ree cojp ni guidxa guigajdx ree gualzi bigra guin, bi'taman lod za'n, naman lon:

—Guda, din gulün lüj biinxdüb ni gac lacheel bën naj zi'c xi xiil Dios.

¹⁰ Abi' por Sprijt binë anjl guin naj guijc tijb guia' narooob, guijc tijb guia' ya. Ni balüüman naj Jerusalén, xcuada narooob Dios zidguiajtan xi xanyabaa Dios. ¹¹ Rulaan bacha' por xbacha' Dios. Abi' bacha' guin naj zi'c xbacha' tijb guiaj lasajc, guiaj zagdxë ni la Jaspe, nayni zi'c tijb vidr. ¹² Gadëd ro' ciuda guin naj tijb ze' narooob, tijb ze' ya con chiptio'p ree port, abi' tijb gaj ro' ree port guin za' tijb gaj ree anjl. Lad ree port guin ca zi'c la guidxiptio'p cwaaw ree bën Israel, tijb gaj lad port guin ca zi'c la tibcwaaw gaj reeman. ¹³ Choon ree port guin naj niz lod rliejn gubijdx, abi' choon reen naj niz lod rëëz gubijdx, za choon ree port guin naj niz lad norte, za choonan naj niz lad sur. ¹⁴ Abi' con chiptio'p guiaj naj xcimiant ze' guin, dxel loj ree guiaj guin ca laj ree guidxiptio'p ree xi apóstoles bën naj zi'c xi xiil Dios.

¹⁵ Anjl ni guneenë naj ca'man tijb var or din tia'beenëman ciuda guin con ree port guin con ze' guin.

¹⁶ Ciuda guin najn ni cuadrad, zi'cgajc zioolan ziangajc gulajgan. Cwa'bee anjl guin laan con var or ni ca'man, xi mididan naj tio'p mil tio'p gayuu kilometro, zi'c guyoolan ziangajc yan, ziangajc gulajgan. ¹⁷ Dxel cwa'man midid ze' guin, abi' ze' guin najn gayojnbitap mejtr zi'c naj xmidid bénguidxliuj zi'c bare'xh anjl guinan.

¹⁸ Ze' guin gojcnën guiaj ni la Jaspe, abi' ciuda guin najnën ganax or, zi'cgajczi naj vidr nayni. ¹⁹ Xguiaj cimiant ze' guin najcchaawnën gadx-agayaa ree guiaj zagdxë. Guiaj yaloj guin najcchaawnën con guiaj ni la Jaspe, guiaj barojp guin najcchaawnën guiaj ni la zafiro, guiaj bayon guin

najcchaawnën guiaj ni la ágata, guiaj badajp guin najcchaawnën guiaj ni la esmeralda, ²⁰ guiaj ni bagaay guin najcchaawnën guiaj ni la ónice, guiaj ni baxo'p guin najcchaawnën guiaj ni la cornalina, guiaj bagajdx guin najcchaawnën guiaj ni la crisólito, guiaj goc xhujn najcchaawnën con guiaj ni la berilo, guiaj goc gaa najcchaawnën guiaj ni la topacio, guiaj ni goc chii najcchaawnën guiaj ni la crisoprasa, guiaj ni goc chiptib najcchaawnën guiaj ni la jacinto, guiaj ni goc chiptio'p najcchaawnën guiaj ni la amatista. ²¹ Gra guidxiptio'p ree xport ciuda guin gojcnë reen con chiptio'p ree perl, tijb gaj perl guin najnë tijbgaj port. Abi' nejj narooob ni naa galay ciuda guin najn ganax or, zi'c tal naj tijb vidr ni rdëb biani grop xijch.

²² Ni'qui tijb yadoo ad baguiatan loj ciuda guin din dux Dad ree Dios bën ca' gra gualrniabee con bën naj zi'c xi xiilaman, laa reeman naj xyadoo ciuda guin. ²³ Abi' loj ciuda guin ad rüjnt naguiejn gusni gubijdx ni'qui bëew, din xbacha' Dios rusni ni abi' bën naj zi'c xi xiilaman laaman naj bajl ni. ²⁴ Bén zëed ree lod rent lod ren sa reeman loj bacha' guin, bën ma naj ree perdon. Abi' ree rey loj guidxliuj guie guidnë xguialza'cdxoon reeman loj ciuda guin. ²⁵ Xport ciuda guin ad yu't dxej yaaw reen radxe, abi' ni ad zut guiaal. ²⁶ Gra xguialza'cdxoon con gra xguialzagdx ree bën zëed lood rent lood ren, guidxin reen loj ciuda guin. ²⁷ Per ad yu't dxej chu' ni dxuudx loj ciuda guin, ni'qui ree bën rüjn ni dxuudx ni'qui ree bën rusquiee, bën cazi ree laj loj xlibr gualnaban ni ca' bën naj zi'c xi xiil Dios, laaz reeman chu' loj ciuda guin.

22

¹ Balüü tée anjl guin lon tijb guiiw naya ni razaladx gualnaban, naynidxuj zi'c tijb guiaawajn. Ririi nijs guin lod za' xyagxhil Dios con bën naj zi'c xi xiilaman, ² abi' zën galay loj nejj narooob ni naa galay ciuda guin. Galay nejj guin naa guiiw guin, abi' grop lad guiiw guin zojb yag ni runee gualnaban ni rtia chiptio'p loj ninejxh, gazobëew ridxaa ninejxh ni rtia lojn. Abi' ree xbalag yag guin rüjn reen sirv par gac bejn nadaan. ³ Achetri ni mal chu' ni, abi' Dios con bën naj zi'c xi xiilaman cwe loj xi yagxhil reeman guiáad ree xbejn reeman gap da't laa reeman respejt. ⁴ Abi' ni guguiaal loj reeman Dios, bën ni ca ree lajman lucwaj. ⁵ Achetri guiaal chu' ni, ad ryaadxt bajl ni'qui gubijdx din dux Dad ree Dios gusni ni, abi' ma nabee reeman tiblyaa con laaman.

Ma zidyob gui't Jesucrist

⁶ Dxel na anjl guin lon:

—Diidx guie ree naj ni diidxli ni rayal chililadx ree bejn. Abi' Dios bën razaladx diidx loj ree bën rudëd xtiidxaman loj ree bejn, laaman guxhaal xi anjl din gulüüman bejn ree ni ma zidyob gac. ⁷ Dad Jesucrist rëb gual nayob gui'taman.

¡Xiquilbaa ree bën ridxga' ni ca loj libr guie ni rugojn ni gac!

⁸ Naj Waj, baguiatan biguiejn tēen ni guin ree. Abi' chi gulox baguiatan biguiejn tēen ni guin ree, dxel bazuxiban par ga'p da'tan respejt anjl ni balüü ree ni guin lon. ⁹ Per naman lon:

—Ad güünl zian. Din naj zi'cgajc lüj, xmandadzi Dios cayguieen, zi'cgajc ree xcompniaril bën rudëd ree xtiidx Dios, nē ree bën ridxga' ree ni ca loj libr guie. Zeel Dios gojp da't respejt.

¹⁰ Na tēeman lon:

—Ad guquie'chil diidx ni zëed ree loj libr guie, diidx ni rugojn ree ni gac, din ma zidyob gac reen. ¹¹ Gol basa'n ree ben mal con xni mal reeman, abi' ree bén naban nadxuudx zu naban reeman nadxuudx bal zian ruladx reeman. Per bén rüjn ree zi'c rayal gusnuu güün reeman zi'c rayal abi' ree bén naban zi'c rën Dios gusnuu guiban reeman zi'c rën Dios.

¹² Rëb Jesucrist:

—Gol badxe'gujic guial nayob guialan, abi' guidne'n ni rayal tijbgaj bejn bal gonin been tijbgajman. ¹³ Naj naj zi'c lejtr A con lejtr Z, lejtr ni rzulojnë ni rlioxnë tëë alfabeto, din tijbzi naj rniabee diidx guia'xchej në par tiblyaa.

¹⁴ Xiquilbaa ree bén ni naj zi'c ree bén ma gudiib xab guial ridxga' reeman xtiidx Dios, din gac chu' reeman niz ro' xport ciuda guin din gap tëë reeman derejch gaw reeman ni nejxh ni rtia loj yag runee guialnaban. ¹⁵ Abi' xijch ciuda guin yaya'n ree benguijdx, bén rüjn ree guialbidxaa, bén rüjn ree ni dxuudx con ree bén ad najt lacheel reeman, bén rugüjt ree bejn, bén ni rajp ree respejt ni naladx reeman naj dios, në ree bén ruladx cwëëgujic ni rusquiee rniece tëë reeman diidx rusquiee ree. ¹⁶ —Naj Jesús ma guxhal da anjlan din gugojnman lëjt gra ree ni guie din guiëbidi laan loj gra ree bén rliadx naj. Naj naj quijb xdiaa rey Davi, loj xdiaaman zialan. Naj naj zi'c bajl nayni ni rliejn rsildoo.

¹⁷ XSprijt Dios con biinxdüb ni gac lacheel bén naj zi'c xi xiil Dios rëb reeman:

—Guda.

Abi' bén rigueijn rniece reeman zian, rëb gajcaman:

—Guda.

Chutëëz bén re'c nijs, gol guda, abi' bén rën zajc guië'man nijs runee guialnaban lagajzi.

¹⁸ Gra ree bén rigueijn ree diidx ni zëed loj libr guie ni gac, naj rni lojdi bal chu bén gucaa gujic ni zëed loj libr guie, ziangajc zusro' Dios guialzi ni zëed loj libr guie par laaman. ¹⁹ Ziangajc bal chu chiquied xhie diidx gujic ree diidx ni zëed loj libr guie ni gac ziangajc chiquied Dios gujic ni rayalaman loj yag runee guialnaban ni ruza't libr guie ad zayu tëëtaman loj xciuda Dios ni ruza't libr guie.

²⁰ Bén ragbee guial diidxli naj gra ree ni guie, rëbaman:

—Walin, nayob guialan.

Zian gacan Dad Jesús, ¡Guda!

²¹ Dad Jesús güünle' gradi. Amén.